

# De riidz ni trat cub nu bicy nu Ñgyoozh mbecy

Texmelucan Zapotec Bible

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

*Language:*  
*Country:*  
*Publisher:*  
Copyright: © 2004 Wycliffe Bible Translators, Inc.  
Last Updated: 2023-10-20  
ID: a3abfdf5-9802-4f67-b4c1-8a10c372599b  
ISO: zpz  
ISBN:

San Mateo.....	4
San Marcos .....	38
San Lucas .....	59
San Juan .....	94
Hechos .....	121
Romanos.....	153
1 Corintios.....	168
2 Corintios.....	182
Gálatas .....	191
Efesios .....	197
Filipenses .....	202
Colosenses.....	206
1 Tesalonicenses .....	210
2 Tesalonicenses .....	213
1 Timoteo.....	215
2 Timoteo.....	220
Tito.....	223
Filemón .....	225
Hebreos.....	226
Santiago .....	236
1 San Pedro.....	240
2 San Pedro.....	245
1 San Juan .....	248
2 San Juan .....	252
3 San Juan .....	253
San Judas.....	254
Apocalipsis.....	256

# San Mateo

## De gyitoo bel ni Jesucrisht

**1** Nu nii tub lisht ni de gyitoo bel ni Jesucrisht, biñ nu bruu lat nez gyitoo Dabi nu nez gyitoo Abraham.

<sup>2</sup> Abraham guc yu uz Isaac. Ze' Isaac guc yu uz Jacob. Ze' Jacob guc yu uz Judá nu de' zir de b icy yu. <sup>3</sup> Ze' Judá guc yu uz Fares nu Zara. Ze' ñaa dey, mi ze' lam Tamar. Ze' Fares guc yu uz Esrom. Ze' Esrom guc yu uz Aram. <sup>4</sup> Aram guc yu uz Aminadab. Aminadab guc yu uz Naasón. Naasón guc yu uz Salmón. <sup>5</sup> Salmón guc yu uz Booz. Ze' ñaay lam Rahab. Ze' Booz guc yu uz Obed. Ze' ñaay lam Rut. Obed guc yu uz Isaí. <sup>6</sup> Isaí guc yu uz rey Dabi. Ze' Dabi guc yu uz Salomoong. Ze' ñaay, nde' biñ nu guc mñaa Urías.

<sup>7</sup> Salomoong guc yu uz Roboam. Ze' Roboam guc yu uz Abías. Ze' Abías guc yu uz Asa. <sup>8</sup> Asa guc yu uz Josafat. Josafat guc yu uz Joram. Joram guc yu uz Uzías. <sup>9</sup> Uzías guc yu uz Jotam. Jotam guc yu uz Acaz. Acaz guc yu uz Ezequías. <sup>10</sup> Ezequías guc yu uz Manasés. Manasés guc yu uz Amón. Amón guc yu uz Josás. <sup>11</sup> Josás guc yu uz Jeconías nu de b icy yu. Tiem ze' gua de mbecy Israeel pres gashtal lo yu ni Babilonia.

<sup>12</sup> Despuees ornu bri dey Babilonia, Jeconías guc yu uz Salatiel. Salatiel guc yu uz Zorobabel. <sup>13</sup> Zorobabel guc yu uz Abiud. Abiud guc yu uz Eliaquim. Ze' Eliaquim guc yu uz Azor. <sup>14</sup> Azor guc yu uz Sadoc. Sadoc guc yu uz Aquim. Aquim guc yu uz Eliud. <sup>15</sup> Ze' Eliud guc yu uz Eleazar. Eleazar guc yu uz Matán. Matán guc yu uz Jacob. <sup>16</sup> Jacob guc yu uz See ñgyee Li. Fiñ ze' guc ñi ñaa Jesuuz, biñ nu rnii den nu nac Mesías, biñ nu ca lo cuen nu cyid nu co mbañ de mbecy.

<sup>17</sup> Orze' gush ñi nese tiem nu bzu Abraham gashtal tiem nu bzu Dabi guc trotap nac nez dey. Nunu guca' trotap nac nez dey, gush ñi nese tiem nu bzu Dabi gashtal tiem nu gua dey pres gal Babilonia. Nunu guca' tub trotapa' nac nez dey nese tiem nu gua dey pres ze' gashtal tiem nu gul Mesías, biñ nu ca lo cuen nu cyid nu co mbañ de mbecy.

## Ornu gul Jesucrisht

<sup>18</sup> Mod nu guc ornu gul Jesucrisht. Li, fiñ nu guc ñaam, bi bya' lo riidz nu chelaañ See, tees anzir nu gyatublaazh dey, orze' bi rabee nu secyi zuñ nu nac coz ily nu b icy Espiriit Yon ni Ñgyoozh. <sup>19</sup> See, yu nu gac ñgyeeñ nac yu tub mbecy nu ricy coz nu se'ñ. Orze' wangalagy yu coy gyel mbecy niñ lo dela mbecy. Orze' mnii tooy nu tily yu trat ze' dze ga nu wachelaay ñi.

<sup>20</sup> Lat nu rash yu shcab nu nac nde', orze' bruu zac tub anc ni Ñgyoozh loy lat pcaa yu. Orze' anc ze' nay:

—See nez Dabi, cue' dzib ru nu gash ru Li nu gac mñaar, gun secyi zuñ nu nac Espiriit Yon ni Ñgyoozh.

<sup>21</sup> Na gaal ñi tub mdoo gyeey. Orze' co lar mi Jesuuz. Ni gruu lam gun mi ze' co mbañ mi de mbecy ledz mi nu nac cyi dey —na anc ze'.

<sup>22</sup> Dela de coz ii ni guuc ñi par nu byu' niñ gal nu mnii Shuaan den lat de riidz nu bzeeñ tub yu nu mnii por cuen nim ornu nam:

<sup>23</sup> Tub fiñ feñ yon chu' i'ñ ñi.

Orze' gaal ñi tub mdoo gyeey.

Mi ze' co la dey mi Emanuel, mniim. (Riidz Emanuel ze' yaruuñ: Ñgyoozh nac num de ub naa.)

<sup>24</sup> Na ornu See briish yu yaa ni pcaa ze', orze' b icy yu gal nu mnii anc ni Shuaan den. Orze' pchelaay Li. Byac ñi mñaay. <sup>25</sup> Tees wangal dey losa'y gashtal bi bded nu gul i'ñ ñi. Nunu See bloo lay mi Jesuuz.

## De yu nu rsya' mod nu ricy bel baa gua güii dey Jesuuz

**2** Jesuuz gul mi tub gyedz nu ri lo yu ni Judea nu la Beleeng. Gul mi tiem nu Herodes nac yu rey. Orze' bri la be mbecy nu bruu gashtal ze' nu driib doo, briy Jerusaleeng. De yu ze' nac dey mbecy nu rsya' de mod nu ricy bel baa. <sup>2</sup> Orze' bdugyi' dey:

—¿Ca lugaar gul rey ni de mbecy Israeel? Gun gashtal ze' nu driib doo bzaac d e bel baa nu briic muesht nu bi gul yu. Nde' nu yap d e nu griib zily d e yu —na dey.

<sup>3</sup> Na ornu güeñ rey Herodes nde', orze' toná' la guc deet nañ lardooy. Nunu ni zi'l guc deet nañ lardoo de' zir de mbecy gyedz Jerusaleeng ornu güeñ yu de coz ze'. <sup>4</sup> Orze' Herodes bredz yu de uz zub lo, nunu bredz yu de yu nu rlyuu leey nu bzeeñ Moisees nu gyatublaazh dey. Orze' bdugyi' y lo dey ben ca lugaar gal Mesías, biñ nu ca lo cuen nu cyid nu co mbañ de mbecy. <sup>5</sup> Orze' de yu ze' nay:

—Gal mi tub gyedz nu ri lo yu ni Judea nu la Beleeng, gun ni pcaa tub yu nu mnii por cuen ni Ñgyoozh ornu pcaa:

<sup>6</sup> Ru Beleeng, tub gyedz nu ri lo yu ni Judea, ru walab tub gyedz nu ich zir zu par de' zir de gyedz ily nu yu' lo de yu ni Judea, gun ze' nu ri ru gruu zac tub biñ nu gyub ic.

Mi ze' gyub ic mi de mbecy n e, de mbecy Israeel.

Ni pcaa de yu nu mnii por cuen ni Ñgyoozh —na dey.

<sup>7</sup> Orze' Herodes dze ga bredz yu de yu nu rsya' mod nu ricy bel baa. Gaze' nu bdugyi'y lo dey la gaal tiem nu bruu zac bel baa ze'. <sup>8</sup> Orze' bzuu nez yu dey zay Beleeng. Orze' nay:

—Gua der gal ze'. Nap yub der mdoo ze'. Ornu gyap ru yu ze', orze' yeeda' der laaba' par ii gun orze' gyroor rishlo. Gun ni' ya cha grib zilya yu —na Herodes.

<sup>9</sup> Na ornu bya' lo nu bee dey riidz nu rey Herodes, orze' de yu nu rsya' mod nu ricy bel baa ze' bruu dey loy zay. Na ornu bi zaab za dey zay, orze' bruu zaca' bel baa nu bi bzaac dey anzir par ze' nu driib doo ze'. Za ma gashtal ze' nu mbish mdoo ze'. Ze' guca ma.

<sup>10</sup> Ornu bzaac dey bel baa ze', orze' tona' la bet lagy yu. <sup>11</sup> Orze' ornu gu' dey nañ yu', orze' bzaac dey mdoo ze' nu ñaam Li. Orze' gusu tib dey nunu briib zilly dey mdoo ze'. Gaze' nu tub ga la dey pshaal yu ru' cajoo niy. Orze' briic dey or ganim. Briic dey tub lo yaal nap nu dzi ñgyup sac ganim. Nunu briic dey tub lo ga' bid nu zguul ti' nu la mirra ganim. <sup>12</sup> Orze' despuees mnii Ñgyoozh lat pcaa dey nu cue' cush cyay ded yu lo Herodes. Orze' reña' nez bish cya dey yay par ledz yu.

### See nuy Li za nu ngach dey mdoo par Egipto

<sup>13</sup> Despuees ornu bi ya de yu nu rsya' mod nu ricy bel baa ze', orze' bruu zac tub anc ni Ñgyoozh Shuaan den lat pcaa See. Orze' nay rab yuy:

—Wesh te. Gush mdoo ii nu ñaam. Orze' na gua dze der gashtal lo de yu ni Egipto. Ze' cyiiñ ru gashtal ornu ya nee lor, gun Herodes yub yu mdoo ii par nu cut yuy —nay.

<sup>14</sup> Orze' See lueg la wesh tey, nunu gush yu mdoo ze', nunu pteey ñaa mdoo ze'. Orze' gush nez yu zay laab nañ rel ze', za nuy mdoo ze' nu ñaam par Egipto.

<sup>15</sup> Ze' pcyiiñ dey gashtal gut la Herodes. Ni guuc ñi par nu byu' niñ gal nu mnii Ñgyoozh Shuaan den lat de riidz nu pcaa tub yu nu mnii por cuen nim ornu nam: "Ya bredzä iñä par nu gruum Egipto", nam. Ni pcaa yu nu mnii por cuen ni Ñgyoozh.

### Herodes pcaay mbecy nu cut yu de yu nguzh mi'

<sup>16</sup> Na ornu gud lagy Herodes nu de yu nu rsya' mod nu ricy bel baa ze' nu bguu dey yu, orze' tona' la guzi lagy yu. Orze' bicy yu mandaar nu cut mbecy de yu nguzh mi' nu yu' ña'n cyup par gash. Cut dey de yu nguzh nu yu' Beleeng gal nu de yu nguzh nu yu' dub yub la gaab ga ru'ñ. Ni mod bicy yu gun gush yu tiem nu bruu zac bel baa gal nu mnii de yu nu rsya' mod nu ricy ma ze'. <sup>17</sup> Ni mod guc fi par nu byu' niñ gal nu pcaa Jeremías, tub yu nu mnii por cuen ni Ñgyoozh ornu pcaa:

<sup>18</sup> Lat gyedz nu la Ramá zaab ti' mbecy.

Tona' la ruun dey.

Tona' la ricy dey sentiir.

De yu nu ruun ze', nde' nez Raquel.

Ruun dey nu nac iñ yu.

Tees walagy dey nu cuic mbecy consuel niy gun dela de iñ dey bi gut yu.

Ni pcaa Jeremías.

<sup>19</sup> Despuees ornu gut Herodes, orze' tub anc ni Ñgyoozh Shuaan den bruu zaca' lat pcaa See lat nu rcyiiñ yu Egipto. <sup>20</sup> Orze' nay rab yuy:

—Wesh te. Gun gyar nu yu nguzh ze' nu ñaam. Yaa par lo de yu ni Israeel, gun na bi gut yu nu rlagy cut yu nguzh ze' —nay.

<sup>21</sup> Orze' See wesh tey ya nuy yu nguzh ze' nu ñaam Li. Yay par lo de yu ni Israeel. <sup>22</sup> Tees ornu güeñ yu nu Arquelao byeeñ yu lo uz yu Herodes nu riib ic yu Judea, orze' gudzib yu ñgyay lugaar ze'. Orze' laaba' lat pcaa yu mnii Ñgyoozh loy lac mod gyicy yu. Orze' guay tub lugaar ni Galilea. <sup>23</sup> Na ornu briy ze', guay pcyiiñ yu tub gyedz nu la Nazaret. Ni guc de nde' par nu byu' niñ gal nu mnii tub yu nu mnii por cuen ni Ñgyoozh ornu mniy nu mbecy niyy nu Jesuuz nac mi tub mbecy Nazaret.

Waa nu briib nis mbecy pshaal yu riidz ni Ñgyoozh tub lugaar uz zi

3 Tiem ze' bri Waa nu briib nis mbecy tub lugaar ub zi lo yu ni Judea. Orze' brugyi' rshaal yu riidz nu bruu lo Ñgyoozh. <sup>2</sup> Orze' nay:

—Mne' der dela cyi nu ricy ru gun sñuu ga cyid gyel gubier ni Ñgyoozh —nay.

<sup>3</sup> Gun Isaías, yu nu mnii por cuen ni Ñgyoozh, laab Waa bzat yu ornu nay:

Zaab ti' tub mbecy.

Rbish tiy tub lugaar ub zi.

Orze' nay:

"Nañ lardoo den nañ gal nu na tub nez.

Orze' b icy nap der nez ze' par ornu cyid Shuaan den. Pshaal der tub nez nu li par nu ded mi", na Isaías, nay.

<sup>4</sup> Shab Waa, nde' byaañ nu gyich camey. Ze' nañ yu ri tub sinch gyid. Coz nu bdow yu, nde' gushagy nu dziñ doo ni bez gyish. <sup>5</sup> De mbecy nu yu' Jerusaleeng, nu de mbecy nu yu' lo de yu nu la Judea, nu de mbecy nu yu' gaab ga ru' gyoow Jordaang, za dey nu zuub gyidag yu coz nu rnii Waa. <sup>6</sup> Na ornu blazh pshuub ru' dey dela ciy, orze' Waa briic yu nu wi nis dey gyoow Jordaang.

<sup>7</sup> Tees ornu bzaac Waa nu dzi zigy de mbecy fariseo gal nu mbecy saduceo bru'ñ dey par nu cuic yu nu zu nis dey, orze' nay:

—De ru mbecy shiñ ricy, ¿cyu mnii lo der nu gac gla der lo cashtig ily ni Ñgyoozh nu bi yad gaab ñi? <sup>8</sup> Bicy der tub mod nu nap gabe nu bi mne' der cyir. <sup>9</sup> Cue' gnii too der nu glar ni de cashtig ze' nu nac nu rnii der: "Nac naa nez gyitoo bel nin Abraham", rniir, gun rishli Ñgyoozh gac gyash mi gashtal de gyita' ii nu gyicy mi nu gyac ñi nez Abraham. <sup>10</sup> Gun cashtig ni Ñgyoozh nañ gal na tub gyibag. Bi zu lily laañ par nu shi'ñ ñi dela yag gashtal lyu lañ. Dela yag nu wacuic uuggy nap, gyi'ñ ñi nuna chañ lo gyi.

<sup>11</sup> Ya nu rishli drica nu zu nis der nu nis par nu gabe nu bi mne' der cyir, tees biñ nu cyid par lo, mi ze' cuic mi Espiriit Yon ni Ñgyoozh ni mbecy, nunu cuic mi tub cashtig nu nañ gal nu na gyi. Mi ze' gya zir zum par ya. Ya rila wangyapa du ni gyid lab mi. <sup>12</sup> Mi ze' nam gal

nu na tub mbecy nu bi zu lily nu tub ya ru' biiz par nu com dela mbig y trig, nunu gyicy tublaazh mi ñii par nu cu' choow mi ñii nañ ye. Ze' de gyid ich ñii zeed mi ñii chañ lo tub gyi nu rila wayu —na Waa.

### Jesuuz winis mi

<sup>13</sup> Tiem ze' Jesuuz bruum Galilea zam gashtal ru' gyooow Jordaang. Orze' bru'ñam lugaar ze' nu ri Waa gun orze' cuic yu nu zu nis mi. <sup>14</sup> Nu loga la "Cue", na Waa rab yum. Orze' nay:

—Ya rlagy ñi nu cuic ru nu zu nisa. Ze' ii ca ru yad ru lo —nay.

<sup>15</sup> Orze' na Jesuuz rab mi yu:

—Bzaan la nu ni gac ñii na, gun rlagy ñi nu gyicy yac den nu de coz nu rlagy Ñgyoozh —nam.

Orze' Waa pshet ic yu. <sup>16</sup> Cuanzir nu wi nis Jesuuz, orze' bruum lo nis. Orze' sij la byaal gyibaa. Orze' Jesuuz bzaac mi Espiriit Yon ni Ñgyoozh nu bet mi. Bet mi gal nu yet tub begy gusub mi toom. <sup>17</sup> Orze' zaab ti' nu rnii gashtal gyibaa. Orze' nam:

—Mi ii i'ñä, biñ nu ton a' la rca nunu ton a' la yet lagya —nam gal baa.

### Jesuuz guc preb mi

**4** Gaze' nu Espiriit Yon ni Ñgyoozh gua num Jesuuz tub lugaar ub zi par nu gyicy nuras preb mi.

<sup>2</sup> Brim cyuu dzi nu cyuu rel nunu rila wangow mi gyit. Orze' despuees byan mi. <sup>3</sup> Orze' becha' nuras lom par nu gyicy yu preb mi. Orze' nay:

—Benu ru rishli gaal nac ru i'ñ Ñgyoozh, orze' mnii lo de gyita' ii nu gyac ñi gyishtily —nay.

<sup>4</sup> Orze' Jesuuz nam rab mi nuras:

—Lat de riidz ni Ñgyoozh rniiñ: "Walab gyishtily zi'l gyicy ñi nu cui mbañ mbecy, sinu ni' zi'l dela riidz nu rnii Ñgyoozh gyicy ñi nu cui mbañ dey", rniiñ —nam.

<sup>5</sup> Gaze' nu za nu nuras mi par Jerusaleeng, gyedz ni Ñgyoozh. Orze' pshup yu Jesuuz ze' nu gya zir ni yu' nu driib zily de mbecy Israel Ñgyoozh. <sup>6</sup> Orze' nay rab yum:

—Benu ru rishli gaal nac ru i'ñ Ñgyoozh, bzut yeñ gashtal lo yu re, gun ryat ru lat de riidz ni Ñgyoozh ornu rniiñ:

Ñgyoozh cu'm riiñ yaa de anc nim nu ña dey ru.  
Orze' laagy yaa dey ru  
gun orze' cue' nu gad güii  
par ni gyi'r lo de gyita',  
rniiñ —na nuras.

<sup>7</sup> Orze' Jesuuz nam rab mi nuras:

—Ni' zi'l rniiñ lat de riidz nim: "Cue' gyicy ru preb Ñgyoozh Shuaan ru, biñ nu nac Ñgyoozh nir", rniiñ —na Jesuuz.

<sup>8</sup> Gaze' nu za nu ga' nuras mi gashtal too tub b icy ily. Orze' blyuuy dela lugaar nu yu' gyishlombecy nu dela gyel lily niñ lom. <sup>9</sup> Orze' nay rab yum:

—Ya ric a dela nde nir benu zu tib ru lo par nu riib zily ru ya —nay.

<sup>10</sup> Orze' Jesuuz nam rab mi nuras.

—Bruu chu lo ii nuras, gun lat de riidz ni Ñgyoozh rniiñ: "Briib zily Shuaan ru biñ nu nac Ñgyoozh nir, nunu coz nu rlagy zi'l mi gyicy ru", rnii riidz nim —na Jesuuz.

<sup>11</sup> Orze' nuras bruu chuy lo Jesuuz. Orze' bru'ñna de anc par nu locyuub dey mi.

### Jesuuz brugyi' ricy mi riiñ Galilea

<sup>12</sup> Ornu Jesuuz güeñ mi nu pshet lag mbecy Waa pres, orze' zam par Galilea. <sup>13</sup> Tees wancyiiñ mi Nazaret sinu guam pcyiiñ mi tub gyedz nu la Caper-naum. Capernaum nde' garee riñ ru' nisyudoo lo yu ni de nez mbecy Zabulón nu ni nez Neftalí. <sup>14</sup> Ni mod guc ñi par nu gyu' niñ gal nu pcaa Isaías, yu nu mnii por cuen ni Ñgyoozh:

<sup>15</sup> De yu ni nez Zabulón nu de yu ni nez Neftalí nu ri tub la ga' ru' gyroow Jordaang garee ru' nisyudoo,

gal nu de lo yu ni Galilea,  
ze' nu yu' mbecy nu walab mbecy Israel,  
<sup>16</sup> de mbecy nu yu' lugaar ze' rded dey ze' nu cow. Gzac dey tub gyi ily nu cuic ñi yaa.  
Gyi ze' nde' cuic ñi yaa lat de mbecy nu yu' ze' nu cow,

ze' nu yu' mbecy nu na gal nu na mbecy gut, rniiñ.

<sup>17</sup> Nese tiem ze' brugyi' Jesuuz nu rshaal mi de coz ni Ñgyoozh. Orze' nam:

—Mne' der dela cyi nu ricy ru gun sñuu ga cyid gyel gubier ni Ñgyoozh —nam.

### Jesuuz bredz mi tap de yu nu rub bel

<sup>18</sup> Lat nu gusa Jesuuz de ru' nisyudoo ni Galilea, orze' bzaac mi cyup mbecy nuy b icy yu. Tub yu lay Simoo, nunu laab yu ze' rnii dey Bed. Ze' tuuba'y lay Ndrees. Rup laa dey nac yu mbecy rub bel. Yu' dey nu rne'y gyish niy lo nis. <sup>19</sup> Orze' na Jesuuz rab mi dey:

—Da ca der icha. Orze' ya gyicya nu gal nu rub der bel, ni' zi'l te' der mbecy gun orze' cyid ca dey icha —nam.

<sup>20</sup> Orze' laab or la ze' bzeeñ dey gyish niy za ca dey ich mi.

<sup>21</sup> Orze' bzam sñuu miiñ par lo. Ze' bzaaca'm tub cyupa' dey nuy b icy yu: Santiag nuy Waa. De yu ze' nac yu i'ñ Zebedeo. Yu' dey nañ tub barc nuy uz yu. Laaba' gyish nu rub bel ricy nap dey. Orze' Jesuuz bredz mi dey.

<sup>22</sup> Orze' lueg la bzeeñ ga dey barc niy. Bzeeñ ga la dey uz yu. Orze' za nu dey mi.

### Jesuuz rlyuum ni zigy mbecy

<sup>23</sup> Jesuuz gusam dutuub la lo yu ni Galilea. Tub ga la lugaar nu rded mi, rlyuum ni de mbecy nañ de yu' nu rsya' dey riidz ni Ñgyoozh, nunu pshaal mi de riidz nu sac ni gyel gubier nim, nunu b icy yac mi de lo la güii nu rac ni de mbecy. <sup>24</sup> Orze' bzu laa riidz dutuub la lo yu ni Siria de coz nu ricy mi. Orze' brugyi' rza nu dey dela mbecy nu rat de lo la güii lom, nu dela mbecy nu

rzac de lo la coz deet. Rza nu dey de yu nu b icy ni nuras. Rza nu ga' dey de yu nu nash bi. Nunu rza nu ga' dey de yu nu nac mbecy chi. Orze' Jesuuz b icy yac mi dela dey.<sup>25</sup> Nunu ton a' la mbecy zigy bruuuy lo yu ni Galilea, bruu dey lat de tii gyedz nu rnii dey Decápolis, nunu bruu ga' dey Jerusaleeng, nunu bruu ga' dey de la lo yu ni Judea, nunu bruu ga' dey tub la' ga' lo yu ni ru' gyoow Jordaang. Orze' dela de yu ze' guay lo Jesuuz.

### Jesuuz blyuum ni de mbecy too tub b icy

**5** Na ornu Jesuuz bzaac mi de mbecy zigy ze', orze' gup mi too tub b icy. Orze' gusub mi. Orze' de yu nu rsya' lom byatublaazh dey lom.<sup>2</sup> Orze' brugyi' rlyuum ni dey. Gaze' nu nam:

### Coz nu rishli nu dzi ni mbecy

<sup>3</sup> —Dzi ni de mbecy nu rad lag yu ricy falt coz ni Ñgyoozh ni, gun de yu ze' gzac dey lo gyel gubier nim.

<sup>4</sup> 'Dzi ni de mbecy nu ricy shni nu nac cyi gun Ñgyoozh cuic mi consuel niy.

<sup>5</sup> 'Dzi ni de mbecy nu wayicy gyel lily ni, gun dutuub la gyishlombecy nu yad par lo gyiyeen ñi yaa dey.

<sup>6</sup> 'Dzi ni de mbecy nu ric la añ ni nu gyanap yu lo Ñgyoozh, gun mi ze' gyicy mi nu gac yu gal nu rlag yu.

<sup>7</sup> 'Dzi ni de mbecy nu rashni lag yu losa', gun Ñgyoozh gashnii ga' lag yu mi dey.

<sup>8</sup> 'Dzi ni de mbecy nu caacy lardoo, gun de yu ze' gzac dey lo Ñgyoozh.

<sup>9</sup> 'Dzi ni de mbecy nu gyicy nu gyanap mbecy nu losa'y, gun Ñgyoozh gniim: "De yu ze' i'ñq", gniim.

<sup>10</sup> 'Dzi ni de mbecy nu rzac zi nu nac de coz nu se'ñ, gun de yu ze' gzac dey lo gyel gubier ni Ñgyoozh.

<sup>11</sup> 'Dzi ni de ru ornu mbecy nii ziy ni der, ornu mbecy griib dey de lo la gyidza too der nu nac ya —nam—.

<sup>12</sup> Ornu gyeen der de coz ze', orze' bet lag yu der, nunu b icy der nu nap zu lag yu gun gyibaa gyad tub i der nu ton a' la coz ily. Gun ni' zi'l mod pshet zi dey de yu nu mnii por cuen ni Ñgyoozh, de yu nu gu' anzir nu chu' de ru —nam—.

### De ru na der gal na zed nunu na der gal na yaa

<sup>13</sup> 'De ru ricy der lat de mbecy ni gyishlombecy ii gal nu ricy zed nu tub nac beel. Tees benu zed gruu nu ri'ñiñ, orze' ¿lac mod gyicy der par nu cush cya' nu ri'ñiñ tuuba' tir? Benu gruu nu ri'ñiñ, orze' se la' la cyiññ ñi, sinu par nu dune'ñ nunu par nu zuub gyi' cyu zi'l mbecy nu ded tooñ.

<sup>14</sup> 'De ru na der gal nu na tub gyi lat de mbecy nu yu' gyishlombecy ii. Tub gyedz nu riib too tub b icy rila wac cach loñ. <sup>15</sup> Ni' zi'l mbecy wacaa dey gyi tub candiil par nu griiy ñi nañ tub cajoo, sinu gzuub dey ñi tub ze' nu gya par nu cuic ñi yaa lo dela mbecy nu yu' nañ yu'.

<sup>16</sup> Ni' zi'l mod b icy de ru. Gun mod nu gyicy der nde' nañ gal nu na yaa ni candiil. Orze' b icy der mod nu nap, gun ornu de mbecy gzac dey de coz nu ricy der,

orze' gyabec dey gyel mbecy ni Ñgyoozh uz den nu Zub gyibaa —nam—.

### Jesuuz rlyuum ni de mbecy lac yaruu de riidz ni leey

<sup>17</sup> 'Cue' sa' lag yu der nu ya yap a nu tilya leey ni Moisees o nu tilya de riidz nu blyuu de yu nu mnii por cuen ni Ñgyoozh. Gun ya walab nu yap a par nu tilya de leey ze' sinu par nu ric a nu gad lag yu der lac yaruuñ.

<sup>18</sup> Gun rishli rn e lo der nu lat nu zu gyibaa nu gyishlombecy ii, wac nit lo ni tub riidz ni de leey ze'. Wantit loñ gashtal shuub la tiem nu gac dela coz nu bi cañ nu gac ñii. <sup>19</sup> Nde' nu cyu zi'l mbecy nu wayicy paa nu mas tub coz mi' ni leey ze', nunu cyu zi'l mbecy nu lyuu ni losa' nu ni gyicy yu, orze' Ñgyoozh niim nu yu ze' gash zir zuy lat de mbecy nu riib ic mi par de' zir mbecy. Ze' de yu nu ricy yac nu de leey ze', nunu lyuu ni losa'y nu ni gyicy dey, orze' niim nu yu ze' nac yu mbecy Zub lo lat de mbecy nu riib ic mi. <sup>20</sup> Gun ya rn e lo de ru nu benu wayicy paa zir der nu de leey ze' gaze' de mbecy nu rlyuuñ, gal nu de mbecy fariseo, orze' rila wazac der lo Ñgyoozh —nam—.

### Jesuuz rlyuum ni de mbecy nu nac gyel dza' ic

<sup>21</sup> 'De ru bi güeñ der nu mnii de gyitoo bel nir: "Cue' cut ru losa'r, gun cyu zi'l mbecy nu rut losa', yu ze' rlag yu ni cuic de yu nu zu riiñ cashtig niy", mnii dey.

<sup>22</sup> Tees ya rn e lo der nu cyu zi'l mbecy nu rzi lag yu losa', yu ze' Ñgyoozh gri beem niy. Nunu yu nu gab zi losa', de mbecy ni junt Zub lo gri beey niy. Nunu yu nu gnii nu tub losa' nu nac yu tub mbecy ton, yu nu ni nii ze' yad ñi ni yu gyay lo gya ni gabil.

<sup>23</sup> 'Nde' nu benu cha nur gun nir ze' nu driib zily ru Ñgyoozh, orze' ze' gyeza' lag yu nu tub losa'r ca ic yu lor, <sup>24</sup> orze' bzeeñ gun nir ze' nu driib zily ru Ñgyoozh ze'. Nu loga la gua b icy rishnap nu losa'r. Gaze' nu cush cyar ze' nu driib zily ru Ñgyoozh par nu cuic ru gun nir nim.

<sup>25</sup> 'Benu ca na tub losa'r rlag yu cu'y cyir lo de fushtiz, orze' bzu altant nu gyicy ru rishnap nur yu lat nu gabee cuic ñi tiem nir, anzir nu gu'y ru yaa de fushtiz. Gun ornu bi bgu'y ru yaa de fushtiz, orze' gyabec dey ru yaa de yu nu riib ic ro' gyiib. Orze' shet lag yu ru nañ. <sup>26</sup> Gun rishli ya rn e lo der nu waruur nañ gashtal cuua lar dela tiñ nu nii dey.

### Jesuuz rlyuum ni de mbecy nu nac mbecy nu ral losa' nu wanchelaa

<sup>27</sup> 'De ru bi güeñ der nu mnii de gyitoo bel ornu nay: "Cue' gal der losa'r nu wanchelaar", nay. <sup>28</sup> Tees ya rn e lo der nu cyu zi'l mbecy nu güü lo tub biñ mñaa nu rnii zi'l tooy nu rlag yu gal yum, orze' yu ze' bi b icy yu cyi nu bi gul yum nañ lardooy.

<sup>29</sup> 'Orze' benu tub urlo beer gyicy ñi nu gyicy ru cyi, orze' cor ñii nunu ne'r ñii, gun nap zir benu dune' tub zi lugaar ni cuerpa nir, gaze' nu dutuub la cuerpa nir gyet lag ñi gabil. <sup>30</sup> Nunu benu yaa beer gyicy ñi nu gyicy ru cyi, orze' pshiñ ñi nunu mne'ñ chañ zet, gun nap zir

nu dune' tub zi lugaar ni cuerp nir, gaze' nu dutuub la cuerp nir gyet lag ñi gabily —nam—.

### Jesuuz rlyuum ni de mbecy nu nac mbecy nu rzaan losa'

<sup>31</sup> 'Ni' zi'l mnii dey gulas: "Cyu zi'l mbecy nu rlagz zaan mñaa, orze' rlagz ñi nu coy tub gyicy ni rishbeey nu zaan yu losa'y", na dey. <sup>32</sup> Tees ya rnëe lo der nu benu tub mbecy zaan yu mñaaay, benu walab nu nac nu byu' beem nu reña' yu gyeey, orze' nde' cyi na, gun ricy yu nu gyicy mñaaay coz cyi ornu gash mi reña' yu gyeey. Nunu yu gyeey nu gash biñ mñaa ze' ni' ricy yu coz cyi nu nac de coz ze'.

### Jesuuz rlyuum ni de mbecy nu nac riidz nu rnii mbecy nu segur

<sup>33</sup> 'Ni' bi güeñ der nu mnii de gyitoo bel: "Cue' gyicy der nu wayicy yac ru nu de coz nu mniir lo Ñgyoozh, Shuaan na, nu segur la gyicy ru, sinu gyicy yac ru nu de riidz nu mniir lom nu segur la gyicy ru", na dey.

<sup>34</sup> Tees ya rnëe lo der nu rila cue' niir lo mbecy nu segur la rishli tub riidz. Ornu nii der tub riidz, orze' cue' zat ru gyibaa par nu gabe nu rishli rniir, gun gashtal ze' Zub Ñgyoozh riib ic mi. <sup>35</sup> Nunu ornu niir tub riidz cue' zat ru gyishlombecy par nu gabe nu rishli rniir, gun ii tub lugaar nu zu gyi' Ñgyoozh. Ni cue' zat ru Jerusaleeng, gun nde' gyedz nu zu rey zub lo. <sup>36</sup> Ni cue' zat ru too ub ru par nu gabe nu riidz nu rniir nde' coz rishli, gun ni tub gyich toor wac gyicy caacy ru ñii o nu gyicy caas ru ñii. <sup>37</sup> Orze' tub zi coz nu gac nii der, nde' "Laab ni" o "Walab ni", gun mas lac ru' co ic ru nu niir par nu gabe nu rishli rniir, orze' nde' gruuñ gashtal lo nuras.

### Jesuuz rlyuum ni de mbecy nu nac mbecy nu ricy gal ga

<sup>38</sup> 'De ru bi güeñ der nu mnii dey gulas: "Benu tub mbecy cad güiyy urlo losa'y, orze' losa'y cush cya ga'y cad güiyy urlo yu nu ni b icy ze'. Benu tub mbecy cad güiyy lay losa'y, orze' cush cya ga'y cad güiyy lay yu nu ni b icy ze'", na dey. <sup>39</sup> Tees ya rnëe lo der: Cue' co yaa der lo mbecy nu shiñ ricy nu de ru. Sinu lugaar nu co yaar, nap zir nu "O la" mnii der. Benu tub mbecy shet yu zig tub la' yalom, orze' zaaba'r tub la' ga' loy nu shet yu. <sup>40</sup> Benu tub mbecy shecha'y ru lo de fushtiz par nu coy yaag ru, orze' briic la niy nunu briica' la checyet nir niy. <sup>41</sup> Benu mbecy caay ru nu cha nur suuy cyaal or nez, orze' cha nu lar ñii tub or nez. <sup>42</sup> Benu ca na mbecy cyiñ yu la coz lor cuic ru ñii niy. Benu ca na mbecy rlagz yu coy la coz lor, orze' cue' zu ir nu wabic ru.

### Jesuuz rlyuum ni de mbecy nu ca dey de losa' yuuy

<sup>43</sup> 'Ni' bi güeñ der nu bi mnii dey gulas: "Pca der de amig nir. Ze' de losa' yuur b icy nu gazi lagz ru loy", mnii dey. <sup>44</sup> Tees ya rnëe lo der: Pca der de losa' yuur, nunu bdiiñ der lo Ñgyoozh ni de yu nu shiñ ricy nu de ru. <sup>45</sup> Gun orze' laab ricy der gal nu rlagz ñi nu gyicy de

mbecy nu nac i'ñ Ñgyoozh, uz den, biñ nu zub gyibaa. Gun mi ze' ricy mi nu driib doo par nu ca yaa too mbecy nap nu mbecy a' nap. Nunu ricy mi nu yet gyey too mbecy nap nu too mbecy a' nap. <sup>46</sup> Gun benu de ru ca der de mbecy nu rca zi'l ru, orze' ñla ñuu i der gyad? Gun mas de yu nu rte' tiñ par gubier Rom ni' ricy dey nde'. <sup>47</sup> Nunu benu de b icy zi'l ru nap nii nu der yu, ña dzi coz ilya' ricy der rziir? Mas gashtal de mbecy nu walab mbecy ni Ñgyoozh ni ricy yu. <sup>48</sup> Guc der mbecy nu sac falt ni gal nu na Ñgyoozh, Uz der nu zub gyibaa, nac mi biñ nu sac falt ni.

### Jesuuz rlyuum ni de mbecy nu nac de coz nap nu ricy dey

<sup>6</sup> 'Bzu der altant nu nac de coz nu gyicy der par Ñgyoozh. Cue' glyuu der ñii lo mbecy par nu gzac dey coz nu ricy der, gun benu ni gyicy der, orze' Ñgyoozh, uz den, biñ nu zub gyibaa rila wabic mi i der.

<sup>7</sup> 'Ornu cuic ru gun ni tub mbecy nu ricy falt ñi ni, orze' cue' cuic ru nu gad lagz mbecy. Gun ni ricy de mbecy rzuu lo nañ de yu' nu rsya' der riidz ni Ñgyoozh nu lat de cay. Ni mod ricy dey par nu dela mbecy gyabic dey gyel mbecy niy. Tees ya rishli rnëe lo der nu gyel mbecy nu byabic zi'l dey niy, nde' zi'l dela i dey.

<sup>8</sup> 'Ze' ornu ru cuic ru gun ni mbecy nu ricy falt ñi ni, orze' cue' cuic ru nu gad lagz par ni tub amig nir.

<sup>9</sup> 'Sinu dze ga gyicy ru ñii. Orze' Ñgyoozh uz na zac mi de coz nu ricy de ru dze ga. Orze' gyabic mi i der.

### Jesuuz rlyuum ni de mbecy lac mod nii nu dey Ñgyoozh

<sup>10</sup> 'Na de ru ornu nii nu der Ñgyoozh, orze' cue' gyicy der gal nu ricy de mbecy rzuu lo, gal nu ricy de mbecy nu yet lagz nu gyes su nii nu Ñgyoozh nañ de yu' nu rsya' den riidz nim, nu de ze' nu yacyup la' nez. Ni ricy dey par nu gzac dela mbecy de coz nu ricy dey. Ya rishli rnëe lo der nu nde' zi'l dela i dey. <sup>11</sup> Tees ru ornu nii nur Ñgyoozh, gu' nañ yu' nir nunu soow ru ro' nir. Orze' mnii nu Ñgyoozh, uz ru, biñ nu zu lor. Orze' Ñgyoozh, uz ru, biñ nu rad lagz de coz nu ricy mbecy dze ga, mi ze' gyabic mi i der.

<sup>12</sup> 'Lat nu rnii nu der Ñgyoozh, cue' zañ tir gniir riidz nu wacyiñ gal nu ricy de yu nu a' yu' lo Ñgyoozh. De mbecy ze' rnii tooy nu segur la cuic mi de coz nu rgyiñ dey nu nac nu dzi zañ riidz rnii dey, rziy. <sup>13</sup> Orze' cue' gyicy der gal nu ricy de yu ze', gun Ñgyoozh, uz den, bi rad lagz mi ca na coz nu cyiñ ni der anzir nu cyiñ der lom. <sup>14</sup> De ru, i mod gniir nu der Ñgyoozh —nam—.

Ñgyoozh, Uz de, ru biñ nu zub gyibaa. Rlagz ñi ca lagz de lor.

<sup>15</sup> Dë ya rdiñ dë nu cyid gyel gubier nir lat de.

Rdiñ dë lor nu gac ñii gyishlombecy ii gal nu rlagz ru, nunu gal nu rac gyibaa.

<sup>16</sup> Dzi na doo coz nu rlagz ñi nu daw de.

<sup>17</sup> Bicy sulagy ne de ni de coz cyi nu ricy de gal nu de ya, ricy sulagya' de ni de yu nu shiñ ricy nu de ya.

<sup>13</sup> Cue' zaan ru nu gyet lag dę lo preb, sinu bloo chu dę ya lat de coz a' nap.

Gun ru nac ru biň nu riib ic  
nunu ru nac ru biň nu gac gyicy dela coz  
nunu ru nac ru biň nu lily na.

Ni nac ru par tub la. Ni gac ñii.

<sup>14</sup> Se benu de ru gyicy sulagy der ni reña' mbecy nu shiň ricy nuy ru, orze' ni' zi'l Ñgyoozh, uz den, biň nu zub gyibaa, gyicy sulagya'm ni der. <sup>15</sup> Tees benu wagicy sulagy der ni reña' mbecy, orze' ni' zi'l Ñgyoozh, uz den, wayicy sulagy mi ni de cyi nu ricy der.

#### Jesuuz rlyuum ni de mbecy lac mod gyicy dey ornu ca dey ni ub yu nu cue' goy gyit nu nac Ñgyoozh

<sup>16</sup> 'Ornu de ru ca der ni ub ru nu cue' gow ru gyit lat nu rzu bich der nu nac Ñgyoozh, cue' gyicy der nu gabe nu ricy shnir gal nu ricy de mbecy rzuu lo. De yu ze' rash dey tub mod par nu gabe nu ni ricy dey lo Ñgyoozh. Ya rishli rnęe lo der nu nde' zi'l dela i dey.

<sup>17</sup> De ru, ornu gyicy ru nde' par lo Ñgyoozh, orze' bdaab lo der nunu bzu caacy der, <sup>18</sup> gun orze' de' zir mbecy wad lagy dey ti ni ricy der. Tub zi la Ñgyoozh, Uz den, biň nu zu ngach nu de ru, rad lagy mi. Orze' Ñgyoozh, Uz den, biň nu rzac de coz nu ricy der dze ga, orze' mi ze' gyabic mi i der.

#### Jesuuz rlyuum ni de mbecy nu nap zir nu gyicy dey de coz nu sac ñi gyibaa

<sup>19</sup> 'Cue' cyaañ der de gyel nap nir gyishlombecy ii, gun de gyel nap nu yu' gyishlombecy ii gac gnit lo bigyich ñi, gac griib guul ñi, gac chu' gubaan nañ yu' coy ñi nu cha nuy. <sup>20</sup> Nap zir pcyaañ der gyel nap nir gyibaa. Gun lugaar ze' wac nit lo bigyich ñi, nunu warib guul ñi. Ni gubaan wac chu'y nu cha nuy ñi. <sup>21</sup> Gun ze' nu rcyaañ ru gyel nap nir, ze' lugaar nu ric la añ nir lo.

#### Jesuuz rlyuum ni de mbecy nu urlo mbecy, nde' nañ gal na tub candiil

<sup>22</sup> 'Urlor, nde' nañ gal na tub candiil nu rbic yaa nañ shcab nir. Orze' benu gyicy ru coz nap nu ursor, orze' gzu yaa nañ dutuub la shcab nir. <sup>23</sup> Tees benu gyicy ru coz cyi nu ursor, cow la zu nañ shcab nir. Nunu benu sac la yaa nañ shcab nir, orze' cow la zu. Orze' ton'a' la shiň zu nañ shcab nir.

#### Jesuuz rlyuum ni de mbecy nu wac zu bich dey nu nac tiñ gal nu Ñgyoozh

<sup>24</sup> 'Rila wac nu tub mbecy gyicy yu riiñ ni cyup patroo niy, gun benu ni, orze' gazi lagy yu lo tub yu. Ze' tuuba'y cay yu. O nu gyicy paay nuy tub yu. Ze' tuuba'y güii naañ yu loy. Orze' wac zu bich mbecy nu nac Ñgyoozh, nunu ni' zi'l wac zu bich yu nu nac de gyel nap nu yu' gyishlombecy ii laab tub zi'l tiem.

#### Jesuuz rlyuum ni de mbecy nu Ñgyoozh zum altant ni de iñ mi

<sup>25</sup> 'Nde' nu ya rnęe lo der: Cue' sug ic der nu nac de coz nu gow der o nu go' der par nu cui mbañ ru gyishlombecy ii. Ni cue' sug ic der nu nac shab ru. <sup>26</sup> A walab dzi zir sac nu cui mbañ der lo Ñgyoozh gaze' de coz nu gow der? Nunu za walab nu dzi zir sac cuerp ni der gaze' shab ru? <sup>27</sup> Güii der de chigyiñ nu rded lo bi. Ni wagnuuz ma. Ni wagte' ma cosech par nu cu' choow ma ñii nañ ye. Tees Ñgyoozh uz den, biň nu zub gyibaa, rgoow mi de ma. Ze' yegar de ru. <sup>28</sup> A walab sac zir der gaze' de chigyiñ? <sup>29</sup> Ca na de ru nu nac nu dzi rsug ic der, orze' gac tuuñ zir der lo yur mas ñuu se tub or?

<sup>28</sup> 'Lagu dzi rsug ic der nu nac shab ru? Bdu' cuen der lac mod raly de ya gyee nu nash ngush. Ni wagicy ñi riiñ. Ni wagri'ñ iily. <sup>29</sup> Tees ya rnęe lo der nu rey Salomoong, mas ton'a' la guani'ñ yu, tees wansuy tub negy nu nsaap ñi gal nu na de gyee ze'. <sup>30</sup> Benu Ñgyoozh rtish mi de gyish, de nu nash ngush na nunu ina gyañ lo gyi nañ yo, nde' nu segur la tiish mi de ru, mbecy nu a' ricy cup consuel lom. <sup>31</sup> Nde' nu cue' dzi csug ic der. Orze' niir: "¿Ca gad de coz nu dow na?", o rnii ga' der: "¿Ca gad de coz nu do'n?" o rnii ga' der: "¿Ca gad negy cuish naa?" rnii der. <sup>32</sup> Gun dela de coz ze' ricy ñi nu rsug ic mbecy nu walab mbecy ni Ñgyoozh. Tees de ru, zu Ñgyoozh uz der, biň nu zub gyibaa nunu mi ze' bi rad lagy mi nu de nde' coz nu galagy ñi ni der. <sup>33</sup> Orze' nu loga la bzub lo der nu nac gyel gubier ni Ñgyoozh, nunu ni' bzub lo der ni nu rlagy mi nu gyanap der lom. Orze' ub mi cuic mi dela coz nu galagy ñi ni der. <sup>34</sup> Orze' cue' dzi gash der shab par nu nac ina, gun yu' ga' coz par ina nu gash der shcab. Tub dzi ga yu' zir coz nu gash der shcab —nam—.

#### Jesuuz rlyuum ni de mbecy nu cue' nii dey ti yu' falt ni losa'

<sup>7</sup> 'Cue' nii der nu yu' falt ni losa'r gun orze' Ñgyoozh waniam nu yu' falt ni der. <sup>2</sup> Gun mod nu gyicy der nu losa'r, laaba' mod ze' gyicy Ñgyoozh num de ru. Nunu laaba' beey nu tush pee der ni losa'r, laaba' beey ze' tush pee Ñgyoozh ni de ru. <sup>3</sup> De ru na der gal nu na mbecy nu rgu' cuen tooop mi' nu ri urlo losa'. Ze' yabicy nu ri urlo ub ru, nde' wagicy cuen der ñii. <sup>4</sup> Ze' benu ru ri tub yabicy ursor, orze' ¿lagu rnii ga'r lo losa'r: "Doo ursor gun loo tooop mi' ze", rnii ga' der?

<sup>5</sup> A mbecy rzuu lo! Bloo yabicy ily nu ri ursor loga la,

gun orze' nap zir zac ru tooop mi' nu ri urlo losa'.

<sup>6</sup> 'Yu' mbecy nu na dey gal nu na che'. Cue' cuic der coz nap ni Ñgyoozh ni che' nis cush cya ma shet ru' ma der. Yu' ga' mbecy na dey gal nu na cuch. Orze' cue' cuic der de coz nu dzi sac nir ni cuch gun nis tab yu ma ñii.

### Jesuuz rlyuum ni de mbecy nu cyiñ dey lo Ñgyoozh

<sup>7</sup>'Bdiiñ der lo Ñgyoozh, gun Ñgyoozh cuic mi de coz nu cyiñ der. Byub der ñii gun orze' gad ñi ni der. Mnii nu der mi, gun orze' shaal mi ro' ni der. <sup>8</sup>Gun cyu zi'l mbecy nu rgyiñ, gad ñi niy. Cyu zi'l mbecy nu ryub, gyad yuñ. Nunu cyu zi'l mbecy nu rnii num, shaal mi ro' niy.

<sup>9</sup>'¿Walab gaal grusu tub mbecy lat der nu cuic yu tub gyita' ni iñ yu ornu rgyiñ yu tub gyishtily loy? <sup>10</sup>¿O walab gaal cuic yu tub bily ni iñ yu ornu rgyiñ yu tub bel loy? <sup>11</sup>Gunca de ru nac der mbecy a' nap rad lagy der lac mod rbic ru coz nap ni iñ ru, ze' yegar Ñgyoozh, uz den, biñ nu zub gyibaa wabicy mi coz nap ni de yu nu rgyiñ lom.

<sup>12</sup>'Nde' nu i mod b icy der: Gal mod nu rlag y ub der nu gyicy nu mbecy ru, orze' ni' zi'l mod b icy nu der dey. Gun nde' mod nu yaruu leey nu bzeeñ Moisees nu de riidz nu bzeeñ de yu nu mnii por cuen ni Ñgyoozh.

### Jesuuz rlyuum ni de mbecy nu ñuu zi mbecy gash dey nez ni Ñgyoozh

<sup>13</sup>'Gu' der gyro' nu shii. Gun ro' nu gash de mbecy nez nu gyay par gably, nde' tub ro' she nunu nde' tub nez zu. Nunu zigy dey gash yu nez ze'. <sup>14</sup>Tees ro' nu gash mbecy nez nu gyay ze' nu cui mbañ yu, nde' tub ro' shii nunu tub nez las. Nunu ñuu zi dey gyap yuñ —nam—.

### Jesuuz rlyuum ni de mbecy nu dub gal nu na mbecy dub ni na coz nu ricy yu

<sup>15</sup>'Bzu der cuidad nu de mbecy rguu, de yu nu ricy nu rnii por cuen ni Ñgyoozh. De yu ze' ru'ña dey lat der. Rlyu nu na dey gal nu na tub shily mazh. Tees nañ lardoo dey nañ gal nu na tub lob dañ. <sup>16</sup>De ru gac gyu' lo der dey nu nac de coz nu ricy yu. Gun tub ya gyech wac cuic ñi urbyay. Ni' tub ya gyech wac cuic ñi urlas mni. <sup>17</sup>Tees tub yag benu nap nañ, orze' rbic ñi uug y nap. Ze' tuuba' yag a' nap na, nde' rbic ñi uug y wacyiñ. <sup>18</sup>Yag nu nap na ze' rila wac cuic ñi uug y nu wacyiñ. Ze' yag a' nap na ze', rila wac cuic ñi uug y nap.

<sup>19</sup>Dela yag nu wacuic uug y nap gyiñ ñi, nunu chañ lo gyi. <sup>20</sup>Nde' nu de ru gyu' lo der de mbecy rguu ze' nu nac mod nu ricy dey.

### Jesuuz rlyuum ni de mbecy nu walab dela mbecy nu rnii nu nac mi Shuaan yu gzac dey lo gyel gubier ni Ñgyoozh

<sup>21</sup>'Walab dela mbecy nu nii lo: "Shuaana, Shuaana", rniiy, walab dela de yu ze' gzac dey lo gyel gubier ni Ñgyoozh, sinu tub zi la de yu nu ricy zi'l coz nu rlag y Ñgyoozh, uz den, biñ nu zub gyibaa. <sup>22</sup>Ornu shuub dzi nu ri bee Ñgyoozh ni dela mbecy, orze' zigy mbecy niy lo: "Shuaana, Shuaana, de ya pshaal de riidz ni Ñgyoozh nu nac rishbeey nir. Nunu nu nac rishbeey nir bloo chü de zañ nuras. Nunu nu nac rishbeey nir b icy de zañ nusuriidz", gnii dey. <sup>23</sup>Tees ya gneé lo dey: "Rila

a' yu' lo de ru. Bruu chu der lo ii, de ru mbecy shiñ ricy", gneé —nam—.

### Jesuuz rlyuum ni de mbecy nu rlag y ñi gyicy yac dey nu riidz nim par nu zu fert dey

<sup>24</sup>'Orze' na, dela de mbecy nu rzuub gyidag de riidz nu rnëe nunu ricy yu gal nu rnëe, de yu ze' nac yu mbecy nu yu' shcab ni. Nay gal nu na tub mbecy nu bzaa tub yu'. Gush yu semient niñ nu gyita'. <sup>25</sup>Orze' bet gyey. Nunu bri nis yu. Nunu bded tub gyey bi ily. Nunu bdugyiñ ich yu' ze' tees wangyet lag ñi, gun lo gyita' zub ñi. <sup>26</sup>Tees dela de yu nu rzuub gyidag de riidz nu rnëe, ze' wagyicy yu gal nu rnëe, de yu ze' nay gal nu na tub mbecy nu sac shcab ni nu bzaay yu'y lo yu uzh. <sup>27</sup>Orze' bet gyey. Nunu bri nis yu. Nunu bded tub gyey bi ily. Bdugyiñ ich yu' ze'. Orze' bdu' chu'ñ yu' ze'. Nunu coz ily guc —nam.

<sup>28</sup>Ornu blazh mnii Jesuuz de coz ze', orze' de mbecy tona' la za nu ic dey nu nac de coz nu blyuum ni dey.

<sup>29</sup>Gun blyuum ni dey gal nu rlyuu tub mbecy nu ricy cup rishbeey, walab gal nu na coz nu rlyuu de mbecy nu rlyuu leey ni Moisees.

### Jesuuz b icy yac mi tub mbecy nu ta' tub lo gyedz nu la lepra cuerpi nyi

**8** <sup>8</sup>Ornu Jesuuz bet mi nu bruum logyi', orze' tona' la mbecy zigy gua ca dey ich mi. <sup>2</sup>Orze' bru'ña tub mbecy nu ta' gyedz nu la lepra lom. Orze' gusu tib yu lom. Orze' nay rab yum:

—Jesuuz, benu rlag y ru, orze' gac gyicy yac ru ya ni güii ne —nay.

<sup>3</sup>Orze' Jesuuz gul yaam yu. Orze' nam rab mi yu:

—Rlagya. Na byac ru —nam rab mi yu.

Orze' lueg la byac yu. <sup>4</sup>Orze' na ga' Jesuuz rab mi yu:

—Na neé lor nu cue' la niir lo ni tub la mbecy, sinu gua lo uz nu cha lyuur ub ru loy. Orze' cuic ru gun nir nu rniiñ lo leey ni Moisees par nu gad lagy dela mbecy nu bi byac ru ni güii nir —nam.

### Jesuuz b icy yac mi tub moz ni tub yu nu riib ic tub gaynal soldad Rom

<sup>5</sup>Ornu Jesuuz gu'm ru' gyedz Capernaum, orze' bru'ña tub yu nu riib ic tub gaynal soldad lom. Orze' bdiiñ yu tub faboor lom. <sup>6</sup>Orze' nay:

—Jesuuz, ya zu tub moz ne yu' mbish rat yu. Na byac yu mbecy chj nunu dzi rzac yu —nay.

<sup>7</sup>Orze' Jesuuz nam rab mi yu:

—Ya chä nu gyicy yacä yu —nam.

<sup>8</sup>Orze' na ga' yu nu riib ic ze':

—Rila wangyapä nu char yu', nomaas benu nii zi'l ru nu gyac moz ne, orze' gyac yu. <sup>9</sup>Gun ni' ya ricya de coz nu rnii de yu nu gya zir zu par ya. Nunu ni' ya' ga' soldad nu gash zir zu par ya nu ricy yu de coz nu rnëe. Ornu rnëe lo tub yu nu "Char re", neé, orze' rzay. Ze' tuubay, ornu dredzä yu nu cyid yu, orze' ryiid yu. Nunu ornu rcä moz ne nu gyicy yu la coz, orze' ricy yuñ —nay.

<sup>10</sup> Ornu güeñ Jesuuz de riidz ze', orze' ton'a' la za nu ic mi. Orze' nam rab mi de yu nu za ca ich mi:

—Ya rishli rnęę lo der nu lat de mbecy Israeel rila nıgul gyapą ni tub la mbecy nu ricy cup consuel lo gal nu na consuel nu ricy cup yu ii —nam—. <sup>11</sup> Ya rnęę lo der nu dub yub la gyishlombecy gruu mbecy nu gzub dey goy gyit tublaazh la nu Abraham, nu Isaac gal nu Jacob lugaar ze' nu riib ic Ñgyoozh. <sup>12</sup> Tees de yu nu rlyu nu gya cyiñ lo Ñgyoozh, de yu ze' dune' dey ze' nu cow, ze' nu chu' mbecy nu gun yu nunu nu siigy lay yu —nam.

<sup>13</sup> Orze' Jesuuz nam rab mi yu nu riib ic ze':

—Yaa la yu'r, gun gac ŋii gal nu ru mnii toor —nam. Orze' laab or la ze' byac moz ni yu nu riib ic ze'.

### Jesuuz b icyac mi ŋaa gud Bed

<sup>14</sup> Orze' Jesuuz guam yu' Bed. Orze' ze' bzaac mi ŋaa gud yu riib rat mi. Pcaañ zig nim. <sup>15</sup> Orze' Jesuuz bdu' yaam yaa biñ rat ze'. Orze' lieg la bruu zig mi. Orze' wesh tem brugyi' rzu bich mi nu nac dey.

### Jesuuz b icyac mi zañ mbecy rat

<sup>16</sup> Na ornu bi yecheñ, orze' de mbecy bru'ña nu dey zigy mbecy nu b icyac mi nuras lo Jesuuz. Orze' bloo chum de nuras ze' nu tub zi riidz nim. Nunu b icyac mi zañ de mbecy rat. <sup>17</sup> Ni guuc ŋi par nu gyu' ni de riidz nu pcaa Isaías, tub yu nu mnii por cuen ni Ñgyoozh ornu bzat yu Mesías ornu mniyi: "Mi ze' co chum de güii gyidz nu yu' nañ cuerpa nin, nunu gyicy yac mi de ub na ni de güii." Ni pcaa Isaías.

### De mbecy nu ngulagy cha ca ich Jesuuz

<sup>18</sup> Ornu bzaac Jesuuz nu dzi bde' mbecy lom, orze' mniim lo de yu rsya' lom nu cha dey tub la' ga' ru' nisyudoo. <sup>19</sup> Orze' bru'ña tub yu nu rlyuu leey ni Ñgyoozh. Orze' nay:

—Masht, ya bi zu lilya nu cha du ru ca zi'l ze' nu char —nay.

<sup>20</sup> Orze' na Jesuuz rab mi yu:

—De bez ricy cup ma blyuu ni ma. Ze' de chigyiñ ricy cup ma teez ma. Tees ya, biñ nu byac mbecy, a' ricy cupa ni tub lugaar mi' par nu gabishä zu lagya —nam.

<sup>21</sup> Orze' bru'ña tuuba' yu nu rsya' lom. Orze' nay rab yum:

—Jesuuz, ¿a wazaan ru nu leza gashtal gat uza? Orze' cachä yu —nay.

<sup>22</sup> Orze' na Jesuuz rab mi yu:

—Na la da ca ichä. Bzaan nde' par de mbecy nu na gal na mbecy gut nu cach dey losa' gut yu —nam.

### Jesuuz mniim lo gyey bi nu gariñ

<sup>23</sup> Orze' Jesuuz gu'm nañ barc nu de yu nu rsya' lom.

<sup>24</sup> Orze' lat nu za dey ze', sij la bru'ña tub gyey bi ily lo nisyudoo, nunu ton'a' la coz ily b icyac gyey bi ze'. Orze' de nguuly lo nisyudoo psoow lañ barc. Ze' Jesuuz mbish mi nas mi nañ barc ze'. <sup>25</sup> Orze' de yu nu rsya' lom pcueeñ dey mi. Orze' na dey rab yum:

—Shuaan dę, bloo mbañ den! Gun bi rnit lo den lo nis —na dey.

<sup>26</sup> Orze' Jesuuz nam rab mi dey:

—¿Lagu dzi rdzib der? ¡Dzi ga ŋuu mi' consuel ricy cup der lo! —nam.

Orze' wesh tem mniim lo bi nu lo nisyudoo nu gariñ. Orze' rup laañ gucañ. Se ri zu la byac. <sup>27</sup> Orze' za nu la ic dey. Orze' na dey rab yu losa'y:

—¿Ze' cyu' mbecy nac mi ii? Gashtal bi nu nisyudoo rzuub gyidag ŋi nim —na dey.

### Jesuuz b icyac mi cyup mbecy nu b icyac ni nuras

<sup>28</sup> Ornu Jesuuz bru'ña tub la' ga' ru' nisyudoo, orze' bruum nañ barc par lo yu ni Gadara. Orze' bru'ña cyup mbecy nu bruu nañ de blyuu nu rcach dey añ lom. De yu ze' yu nu b icyac ni nuras. Nunu raloc dey. Ni tub la mbecy wagac ded dey nez nu rded cyup de yu ze' par nu dzi tañ dey. <sup>29</sup> Orze' brugyi' rbish ti dey:

—¿La ryub ru yad ru lo ii Jesuuz i'ñ Ñgyoozh? ¿A yad ru nu ted zir de ya anzir nu shuub tiem? —na nuras.

<sup>30</sup> Na sňuu miiñ par lo rded row tub nac cuch zigy.

<sup>31</sup> Orze' de nuras mnishbaa dey lo Jesuuz. Orze' na dey:

—Ze' benu co chur de ya, bzaan nu chu' de nañ de cuch re —na dey.

<sup>32</sup> Orze' Jesuuz nam rab mi dey:

—Gua der —nam.

Orze' de nuras ze' gua dey gu'y nañ de cuch zigy ze'. Laab or la ze' dela de cuch zigy ze' rzab la de ma carer bzu tiily ma par gyoow. Orze' bet lag de ma lo nisyudoo. Orze' gut de ma lo nis.

<sup>33</sup> Orze' de yu nu rña de cuch ze' gush dey carer yay par lat gyedz. Orze' brugyi' ryoo dey riidz de coz nu guc nu de mbecy nu b icyac ni nuras ze'. <sup>34</sup> Orze' dela de mbecy nu yu' gyedz ze' bruu dey zay lo Jesuuz. Na ornu bzaac dey mi, orze' mnishbaa dey lom nu gruum ledz dey.

### Jesuuz b icyac mi tub mbecy chi

<sup>9</sup> Orze' Jesuuz gu'm nañ tub barc zam tub la' ga' ru' nisyudoo. Orze' brim gyedz nu rcyiñ mi.

<sup>2</sup> Orze' bru'ña nu dey tub mbecy chi lom. Riib yu lo nuun. Na ornu Jesuuz gud lagy mi nu dzi ricy cup dey consuel lom, orze' nam rab mi yu rat ze':

—Yu feñ, cue' dzi gyicy shnir. Briic baloor. Ya bi ricy sulagya de cyir —nam.

<sup>3</sup> Laab ze' nguua la be de yu nu rlyuu leey ni Ñgyoozh. Orze' na dey nañ lardooy: "Coz nu yu ii mniyi, nde' zañ contr ni Ñgyoozh", rnii dey nañ lardooy. <sup>4</sup> Tees Jesuuz gud lagy mi de coz nu mnii dey nañ lardooy. Orze' nam rab mi dey.

—¿Lagu dzi shiñ rnii too der? <sup>5</sup> Dzi zir a' biigy par nu nee nu bi ricy sulagya de cyir gaze' nu nee nu wes su nunu bza. <sup>6</sup> Tees na lyuū lo der nu ya, biñ nu byac mbecy, ricy cupa rishbeey nu gyicy sulagya de cyi de mbecy gyishlombecy ii —nam.

Orze' Jesuuz nam rab mi mbecy chi ze':

—Weshte. Gush nuun nir yaa yu'r —nam.

<sup>7</sup> Orze' mbecy chi ze' weshtey nunu yay par yu'y.

<sup>8</sup> Ornu de mbecy bzaac dey nde', orze' gudzib dey, nunu byabic dey gyel mbecy ni Ñgyoozh. Byabic dey gyel mbecy nim gun briic mi rishbeey ni mbecy nu gyicy yu coz ily.

### Jesuuz bzum Mateo nu gac nuy mi

<sup>9</sup> Orze' Jesuuz bruum lugaar ze' zam. Na nez nu zam bzaac mi ya, tub mbecy nu la Mateo zuba rloq tiñ tub lugaar ze' nu rboo dey tiñ por cuen ni gubier Rom. Gaze' nu nam rab mi ya:

—Da ca icha —nam.

Orze' wes su za ca ich mi.

<sup>10</sup> Na despuees, ornu Jesuuz bru'ñam yu', lat nu zub mi row mi gyit, orze' bru'ña zigy de mbecy nu rboo tiñ por cuen ni gubier Rom, nu zigy de mbecy bdune' bru'ña dey. Orze' gusub dey nuy mi tublaazh la lo tub zi'l mez. <sup>11</sup> Na ornu bzaac de mbecy fariseo, orze' bdugyi' dey lo de yu nu rsya' lom:

—¿Lagu moscuel ni de ru row yu gyit tublaazh nu de mbecy nu rboo tiñ por cuen ni gubier gal nu de mbecy bdune'? —na dey.

<sup>12</sup> Na ornu güeñ Jesuuz nde', orze' nam rab mi dey:

—Par de mbecy ruub walagy ñi doctoor tees par de mbecy rat rlagy ñi. <sup>13</sup> Gua der. Gash ñuur shcab ben lac yaruu riidz ni Ñgyoozh ze' nu rniiñ: “Ñgyoozh nam: Ya rlagy nu gashni lagy der losa'r. Walagy nu cuic der gun bañcyug lo, nam.” Ni rniiñ gun ni' ya a' yapä nu redža de mbecy nu sac cyi, sinu dredža de mbecy cyi par nu ne' dey cyiy —nam.

### De yu nu rsya' lo Waa bdugyi' dey lo Jesuuz lagu waca dey ni ub yu nu cue' gow dey gyit

<sup>14</sup> Na de yu nu rsya' lo Waa nu briib nis mbecy bru'ña dey lo Jesuuz. Orze' na dey rab yum:

—De ya gal nu de mbecy fariseo rca de ni uba nu cue' daw de gyit lat nu rzu bich de nu nac Ñgyoozh. ¿Lagu de yu nu rsya' lor wagyicy dey nde'? —na dey.

<sup>15</sup> Orze' na Jesuuz nam rab mi dey:

—Ya na gal nu na tub nob. ¿Walab gaal gac gyicy shni de mbecy nu yu' lo fandang lat nu gabee rded nob lat dey? Tees shuub dzi nu co mbecy nob ze' lat dey. Orze' gaze' nu gac ca dey ni ub yu nu cue' goy gyit par nu gyicy shni dey.

<sup>16</sup> 'Gun mod nu b icy de gyitoo bel, nde' nañ gal nu na tub negy gush. Ni tub la mbecy wayicy mi rumien negy gush nu tub la' negy cub nu nigul gyo' nis, gun nis gash beñ negy cub ze'. Orze' shaa ye zir negy gush ze'.

<sup>17</sup> Nunu mod nu b icy de gyitoo bel, nde' nañ gal nu na tub gyid gush nu rgu' choow dey ñup ni urbyay. Ni tub la mbecy wac cu' choow yu ñup urbyay cub nañ gyid gush gun nis cyich ñiñ. Orze' shu dela ñup urbyay ze'. Orze' nit lo gyid ze'. Nde' nu rlagy ñi cu' choow dey ñup urbyay cub nañ gyid cub, gun orze' rup laañ zu nap ñi —na Jesuuz.

### I'ñ Jairo nu biñ mñaa nu gul shab Jesuuz

<sup>18</sup> Lat nu Jesuuz gabee zum rniiim de riidz ze', orze' bru'ña tub yu nu riib ic lat de mbecy Israeel. Orze' gusu tib yu lom. Orze' nay rab yum:

—I'ñä saa la gut ñi. Tees benu ru char gal yaar ñii, orze' gyabañ ñi —nay.

<sup>19</sup> Orze' wes su Jesuuz nu za num yu. Nunu de yu nu rsya' lom za nu dey mi.

<sup>20</sup> Na zu tub biñ mñaa. Bi bza' trocyup ña'n nu rat mi nu rshu reñ mi. Orze' becha'm par ich Jesuuz. Gaze' nu gul yaam ru' shab mi, <sup>21</sup> gun mnii toom nu mas ñuu shab Jesuuz gal yaam, orze' gyac mi. <sup>22</sup> Orze' Jesuuz bish cyam bgüiim lo biñ mñaa ze'. Orze' nam rab mim:

—Cue' dzib ru biñ mñaa. Nu nac nu b icy cup ru consuel lq, nde' nu byac ru —nam.

Orze' lug la byac biñ mñaa ze'.

<sup>23</sup> Na ornu bru'ña Jesuuz yu' mbecy nu riib ic ze', orze' gu'm nañ yu'. Orze' bzaac mi nu bi nguua de musiic, nunu bzaac mi nu dzi deet nguua de mbecy nu ricy shni dey. <sup>24</sup> Orze' nam:

—Bruu chu der ii, gun fiñ guzh ii nu nas zi'l ñi walab nu guut ñi —nam.

Orze' de mbecy brugyi' rigy nu naañ dey mi.

<sup>25</sup> Cuanzir nu bruu de mbecy ich yu' ze', orze' Jesuuz gu'm nañ yu'. Gaze' nu bdu' yaam yaa fiñ guzh gut ze'. Orze' wesh teñ. <sup>26</sup> Orze' bzu laa riidz ni de coz nu guc ze' dutuub la de lugaar ze'.

### Jesuuz b icy yac mi cyup mbecy lo ca'

<sup>27</sup> Ornu Jesuuz bruum lugaar ze' zam, orze' cyup mbecy lo ca' za cay ich mi. Orze' brugyi' rbish ti dey:

—Gushni ñuu lagy de ya, Jesuuz, nez rey Dabi —na dey.

<sup>28</sup> Ornu Jesuuz gu'm nañ yu', orze' de yu lo ca' ze' becha' dey lom. Orze' bdugyi'm lo dey:

—¿A rzeña lagy der nu gac gyicya nu nde'? —nam. Orze' na dey:

—Rzeña lagy de Jesuuz —na dey.

<sup>29</sup> Orze' Jesuuz gul yaam urlo dey. Orze' nam rab mi dey:

—Gac ñii gal nu rzeña lagy der —nam.

<sup>30</sup> Orze' byanap urlo dey. Orze' Jesuuz fert bdu'm riiñ yaa dey. Orze' nam rab mi dey:

—Cue' nii der lo ni tub la mbecy —nam.

<sup>31</sup> Tees, laab or bruu dey lom, orze' brugyi' rtush las dey riidz dutuub la lugaar ze', de coz nu b icy mi.

### Jesuuz b icy yac mi tub mbecy gop

<sup>32</sup> Lat nu bruu de mbecy nu guc lo ca' ze' lom, orze' bru'ña la be mbecy nuy tub mbecy nu byagop lom. Byagop yu nu b icy ni nuras yu. <sup>33</sup> Orze' cuanzir nu bloo chum nuras ze', orze' gop ze' brugyi' rniiy. Orze' toná la za nu ic de mbecy. Orze' na dey:

—Rila a' zac den coz nu na gal nu na nii lo de yu ni de mbecy Israael —na dey.

<sup>34</sup> Tees de mbecy fariseo na dey:

—Yu nu riib ic de nuras briic yu rishbeey ni yu ii par nu co chuy de' zir nuras —na dey.

### Jesuuz gushni lagy mi de mbecy

<sup>35</sup>Jesuuz gusam dela lat gyedz nu dela ranch. Tub ga la gyedz nu rded mi rlyuum ni de mbecy nañ yu' nusraya' mbecy riidz ni Ñgyoozh. Pshaal mi de riidz nu sac ni gyel gubier ni Ñgyoozh, nunu b icy yac mi mbecy ni de lo la güii. <sup>36</sup>Ornu bzaac mi de mbecy zigy, orze' tona' la gushni lagy mi dey, gun shni yu' dey, nunu rshi'ñ dey baloor. Na dey gal nu na shily nu sac cyu nu rña. <sup>37</sup>Orze' nam rab mi de yu nu rsya' lom:

—Rishli gaal cosech tona' la sheñ ñi, tees de yu nu ricy riiñ, ñuu zi dey. <sup>38</sup>Nde' nu, bdiñ der lo Shuaan cosech ze' nu gzeed zir mi mbecy nu te' de cosech ze' —nam.

### Jesuuz pcuim trocyup Aposht nim

**10** Orze' Jesuuz bredz mi za' trocyup laa yu nu rsya' lom. Orze' briic mi rishbeey ni dey par nu co chu dey de nuras, nunu briic mi rishbeey nu gyicy yac dey mbecy nu rat de lo la güii, nu dela coz shni nu rzac de mbecy.

<sup>2</sup>Orze' nii nu la de trocyup Aposht. Gush lañ yu loga la, nde' Simoo, yu nu rnii dey Bed, nu b icy yu Ndrees, nu Santiag nu b icy yu Waa, de yu ze' iñ Zebedeo, <sup>3</sup>Lip nu Bartol, nu Tomaas nu ya, Mateo, tub mbecy nu pte' tiñ por cuen ni gubier Rom, nu Santiag, iñ Alfeo, nu Tadeo, <sup>4</sup>nu Simoo, yu nu nac partid nu la Celote, nu Judas Iscariote, yu nu bish cya ich mi.

### Jesuuz bzuu nez mi de trocyup Aposht nu cha shaal yu riidz nu sac ni Ñgyoozh

<sup>5</sup>Orze' Jesuuz bzuu nez mi de trocyup Aposht. Orze' bdu'm riiñ yaa dey. Orze' nam:

—Cue' cha der lat de mbecy nu walab mbecy Israel, nunu ni cue' cha der de ze' nu yu' mbecy Samaria.

<sup>6</sup>Nap zir gua der lat de mbecy Israel, de yu nu na gal nu na shily bdune'. <sup>7</sup>Gua der lo dey, nunu mnii der nu sñuu ga ri gyel gubier ni Ñgyoozh lat dey. <sup>8</sup>Bicy yac der de mbecy rat, nunu b icy der nu gyacaacy de mbecy gut, nunu b icy der nu gyacaacy de mbecy gubag nu nac gyedz nu la lepra, nunu co chu der de nuras. Ya leew la grica mod ze' ni der nu gac gyicy ru de coz ze'. Nde' nu cue' co der ir ornu gyicy der de nde' —nam—.

<sup>9</sup>Cue' cha nu der tiñ or, ni tiñ plat, ni tiñ corient. <sup>10</sup>Ni cue' cha nu der moraal par nu rir coz nu gow der nez. Ni cue' cha nu der cyup shab ru. Nomaas nu zu zi'l der ze' gua nu. Nunu cue' cha nu der cyup nez gyid lab ru. Ni cue' cha nu der cyup yangar. Gun mbecy nu ricy riiñ yad ñi nu cuic dey coz nu gow yu.

<sup>11</sup>'Ornu gri der tub gyedz o tub ranch, orze' yub der tub mbecy nap, nu cyiiñ der loy gashtal gruu la der lughaar ze'. <sup>12</sup>Ornu chu' der nañ yu' ze', ornu nii nu der yu ñgyoozh, orze' nii der nu Ñgyoozh gac num dey.

<sup>13</sup>Benu mbecy guyu' ze' nac yu mbecy nap, orze' gac ñii gal nu mnii der. Tees benu a' nap yu, orze' wac ñi

gal nu mnii der. <sup>14</sup>Benu mbecy washet ic dey nu chu'r tub yu' o tub gyedz, ni wazuub gyidag dey ni der, orze' gruu der lughaar ze' nunu cyib der yu gyedz ni gyid lab ru par nu gabe nu a' nap b icy dey. <sup>15</sup>Ya rishli rnëe lo der nu ornu shuub dzi nu gri bee Ñgyoozh ni de mbecy nu yu' gyedz ze', cashtig ily zir cuic mi ni dey gaze' cashtig nu cuic mi ni de mbecy nu gu' gyedz nu la Sodoma nu Gomorra —nam—.

### Gru'ña nu gzac zi mbecy

<sup>16</sup>'Güii der na. Ya zu nezä der char. Nunu na der gal nu na shily nu cha lat lob. Guc der mbecy nu dzach zu gal nu zu bily, tees guc der mbecy gugy na gal nu na begy. <sup>17</sup>Bzu der cuidad gun yu' de mbecy nu gu'y der yaa de fushtiz nunu yu' ga' mbecy nu gaaz dey de ru nañ yu' nu rsya' den riidz ni Ñgyoozh. <sup>18</sup>Gashtal lo gubier nu lo de rey cha nu dey de ru nu nac ya, gun orze' gac zat der ya lo dey gal nu lo de mbecy nu walab mbecy Israel. <sup>19</sup>Tees ornu gu' dey de ru yaa de fush-tiz, cue' sug ic der la na riidz nu niir nunu cue' sug ic der nu lac na riidz nu gniir, gun ornu shuub tiem nu galagy ñi nu gnii der, orze' Ñgyoozh cuic mi riidz nu gniir. <sup>20</sup>Gun riidz nu de ru gniir, nde' walab riidz ni ru zi'l, sinu nde' riidz ni Espiriit Yon ni Ñgyoozh uz den. Orze' de ru gniir riidz nu druu lo mi ze'.

<sup>21</sup>'Tees yu' mbecy nu gu' dey b icy yu yaa de mbecy nu rzi lagy par nu cut dey yu. Nunu yu' ga' mbecy nu ni zi'l gyicy nu dey iñ yu. Ze' yu ga' dey cush cyay ich uz yu gun orze' cut mbecy yu. <sup>22</sup>Dela de mbecy gazi lagy dey lo der par nu nac ya. Tees yu nu gagye gash-tal gat la, yu ze' gruu mbañ yu. <sup>23</sup>Nunu ornu rted zi dey de ru tub gyedz, orze' cha der tuuba' gyedz. Tees ya rishli rnëe lo der nu walazh chesa der de gyedz ni de mbecy Israel anzir nu yapä tuuba' tir, ya, biñ nu byac mbecy.

<sup>24</sup>'Sac ni tub yu nguzh scuel nu zily zir nac yu par moscuel niy. Nunu sac ni tub moz nu zily zir nac yu par patroq niy. <sup>25</sup>Beñ benu tub yu nguzh scuel gyac yu gal nu na moscuel niy. Nunu ni' zi'l beñ benu tub moz gyac yu gal nu na patroq niy. Benu nii mbecy nu ya, tub mbecy nu riib ic nañ tub yu', nacä tub nuras nu la Beelzebé, orze' dzi zir rnii dey ni de ru, mbecy nu nac famil ne.

### Cyu lo rlagy ñi nu dzib na

<sup>26</sup>'Nde' nu cue' dzib der lo de mbecy. Gun sac ni tub coz ngach nu waruu zac ñi. Nunu dela coz nu wagad lagy mbecy, nde' gad lagy dey. <sup>27</sup>De coz nu rnëe lo der ngach, nde' co zac der ñii lat dela mbecy. Nunu de coz nu rnëe lo der dze ga, nde' ye la nii der lo de mbecy. <sup>28</sup>Cue' dzib der lo de mbecy nu rut cuerpa ni losa', tees wac cut dey lardoo losa'y. Nap zir gudzib der lo Ñgyoozh biñ nu gac nit lo cuerpa ni mbecy nu lardooy gabily.

<sup>29</sup>'A walab nu rut dey cyup chigyiñ mi' par tub sentab mi'? Tees ni tub ma wayet lag ma lo yu benu Ñgyoozh uz der wazaan mi. <sup>30</sup>Ze' yegar de ru, Ñgy-

ooth rad lag mi la be gyich too der. Delañ ngab ñi nim.<sup>31</sup> Nde' nu cue dzib der, gun de ru dzi zir sac der gaze' de chigyiñ zigy ze'.

**Gal nu gyicy nu mbecy Jesuuz lo losa'y, orze' ni' zi'l gyicy num yu lo Ñgyoozh uz mi**

<sup>32</sup> 'Cyu zi'l mbecy nu gnii lo losa' nu ya nac Shuaan yu, ni' zi'l nee ya lo Ñgyoozh uz nu zab gyibaa nu nac yu ne. <sup>33</sup> Tees cyu zi'l mbecy nu nii nu a' nac Shuaan yu lo de mbecy, orze' ni' zi'l gyicya du yu lo Ñgyoozh, uz, biñ nu zab gyibaa. Neé nu a' nac yu ne —nam—.

**Jesuuz ricy mi nu rla' losa' mbecy**

<sup>34</sup> 'Cue' nii too der nu ya yap nu gyicya nu nap chu' mbecy nu losa'y. Walab nu gyicya nu nap chu' dey, sinu nu chucoo dey nu losa'y. <sup>35</sup> Ya yap nu gyicya nu de yu gyeey chay contr ni uz yu. Ze' fiñ mñaa chañ contr ni ñaañ. Tub fiñ mñaa chañ contr ni ñaa gud ñi. <sup>36</sup> De yu nu gac losa' yuu dey gruuuy laab lat famil ni dey.

<sup>37</sup> 'Mbecy nu rca zir uz, o yu nu rca zir ñaa gaze' ya, yu ze' rila wangyap yu nu gac yu ne. Yu nu rca zir i'ñ gyeey o i'ñ yu fiñ mñaa gaze' ya, yu ze' ni' zi'l wangyap yu nu gac yu ne. <sup>38</sup> Cyu zi'l mbecy nu washet ic nu gzac zi nu nac ya, yu ze' ni' zi'l wangyap yu nu gac yu ne.

<sup>39</sup> Yu nu rlagy co nap ub gyishlombecy ii yu ze' wad nu cui mbañ yu. Ze' yu nu shet ic nu zac zi, nunu mas gat yu nu nac ya, yu ze' gruu mbañ yu —nam—.

**In nu gyabic Ñgyoozh**

<sup>40</sup> 'Cyu zi'l mbecy nu nap nii nu de ru, ni' zi'l nap nii nuy ya nunu ni' nap nii nuy biñ nu bzuu nez ya. <sup>41</sup> Cyu zi'l mbecy nu nap nii nu de yu nu mnii por cuen ni Ñgyoozh nu nac nu chay loy por cuen nim, orze' laaba'i yu nu rnii por cuen ni Ñgyoozh ze' gyad niy. Cyu zi'l mbecy nu nap nii nu tub mbecy nap, yu ze' laaba i mbecy nap ze' gyad niy. <sup>42</sup> Cyu zi'l mbecy nu cuic mas ñuu tub taz nis rag go' yu nu blaazha' zir mbecy shni, yu nu yad ca icha, yu ze' segur la gyad iy —nam.

**Waa nu briibnis mbecy rzuu nez yu de mbecy nu cha nuy rasoo lo Jesuuz**

**11** Na ornu blazh bdu' Jesuuz riiñ yaa de yu nu rsya' lom, orze' bruum zam. Za lyuum nunu za shaal mi de riidz nu druu lo Ñgyoozh lo de mbecy nu yu' de gyedz gaab ga ni de lugaar ze'.

<sup>2</sup> Na Waa nu briibnis mbecy bet lag yu pres. Na ornu güeñ yu de coz nu ricy Crisht na, orze' bzuu nez yu la be de yu nu rsya' loy nu cha tugyi' dey lom, <sup>3</sup> ben a laab mi biñ nu ca lo cuen nu cyid, o ti cuez dey nu cyid reña'm.

<sup>4</sup> Na ornu gua dey bdugyi' lo Jesuuz, orze' nam rab mi dey:

—Yaa nii der lo Waa de coz nu rzac der gal nu de coz nu reñ der. <sup>5</sup> Yaa nii der loy nu de lo ca' bi rzac dey; de mbecy coj rac rza nap la dey; de mbecy nu rat nu ta' gyedz nu la lepra byac dey; de go' bi reñ dey; de yu nu

bi gut byabañ yu tuuba' tir; nunu rdunii de riidz nu sac ni Ñgyoozh lo de mbecy zi. <sup>6</sup> Dzi ni de mbecy nu wayeca nu ricy cup consuel lo —nam.

<sup>7</sup> Na ornu bi ya de yu ze', orze' Jesuuz bzat mi Waa lo de mbecy zigy. Orze' nam:

—Ornu gua der gua güiir Waa tub lugaar ub zi, ¿la nay guzii der? ¿Uti a guzii der nu nac yu mbecy nu ricy cyup ic gal nu na tub yagyi nu rguul bi par re par ii guzii der? <sup>8</sup> Ze' benu walab, orze' ¿la na tub mbecy nu gua güi der? ¿A gua güi der tub mbecy nu zu tub negy cyit na? Walab ni, gun rad lagy der nu yu nu zu negy cyit na, yu ze' rcyiiñ yu yu'rey. <sup>9</sup> ¿Orze' la gaal na tub mbecy gua güi der? ¿A gua güi der tub yu nu rnii por cuen ni Ñgyoozh? Laab, nunu ya rnëe lo der nu zily zir nac Waa gaze' de yu nu mnii por cuen nim. <sup>10</sup> Gun laab Waa rzat riidz ni Ñgyoozh ze' nu rniiñ:

Ñgyoozh nam rab mi biñ nu ca lo cuen nu co mbañ mbecy:

"Ya zuu nez ya nu nii por cuen ne nu cha gay lor, gun orze' zu lily yu nez nu char", nam.

Ni rnii riidz ni Ñgyoozh.

<sup>11</sup> 'Gun ya rishli rnëe lo der nu ni tub la mbecy nu pcyiiñ gyishlombecy ii a' zily zir nac yu gaze' Waa nu briibnis mbecy par lo Ñgyoozh. Tees yu nu gash zir zu lat de yu nu gyub ic Ñgyoozh, yu ze' gya zir zuy par Waa nu briibnis mbecy.

<sup>12</sup> 'Gun nese tiem nu Waa brugyi' yu rshaal yu riidz ni Ñgyoozh, nunu gashtal dzi na, za rii la rde' mbecy lo de yu nu riib ic Ñgyoozh. Nunu fert la pshet yaa dey yu ben a waza' lo dey yu. <sup>13</sup> Gun dela riidz nu mnii de yu nu mnii por cuen ni Ñgyoozh nu de leey nu bzeeñ Moises bzat ñi gyel gubier nim gal pshuub la dzi nu bri Waa. <sup>14</sup> Nde' nu nee lo der ben a wayeña lagy der nu Waa nac yu Elías, yu nu ca lo cuen nu cyid. <sup>15</sup> Benu ca na der zub gyidag ru, orze' b icy der nu gyet lag ru cuen.

<sup>16</sup> 'Na, ¿la ñuu tub coz nu saapa de mbecy nu yu' tiem na? Na dey gal nu na de yu nguzh nu nguaa rgyit lat yagyi'. Lat nu rtub su losa' dey, orze' ye ga la rbish ti dey nguaay, orze' na dey rab yu losa'y: <sup>17</sup> "Blaq dë di gyel cyit nu bdzi, tees wangul gyi' der. Na ornu bdul ru' dë tub di nu shni za, ni wanguun der", rnii dey nguaay. Gun de mbecy nu yu' tiem na wangalagy dey ni tub la mod. <sup>18</sup> Gun Waa biid yu. Wangoow nap yu nunu wango'y ñup. Orze' rnii dey nu tub nuras riib ic yuy. <sup>19</sup> Ze' ornu ya, biñ nu byac mbecy, bri, orze' ya rdaw la zi'l coz nunu rdo' la zi'l ñup. Orze' rnii dey nu nacä mbecy row shaad nunu mbecy ro' ñup, nunu nacä amig ni de mbecy bdune' nunu nacä amig ni de yu nu rboor tiñ por cuen ni gubier Rom. Orze' ni tub la mod wangyet lagy dey. Tees rabee nu de mod nu psa' lagy Ñgyoozh nde' mod nap nu nac nu gruu nap ñi —nam.

**De gyedz nu wansuub gyidag de riidz ni Jesuuz**

<sup>20</sup> Orze' Jesuuz brugyi' rshuu num de mbecy nu yu' gyedz ze' nu b icy zir mi nusuriidz, gun wanne' dey de ci yu ricy yu. Orze' nam rab mi dey:

<sup>21</sup> —¡Cuaa de ru mbecy nu yu' gyedz Corazín! Nunu, ¡cuaa de ru mbecy gyedz Betsaida! Gun benu ŋgyicya nusuriidz lat de mbecy nu yu' gyedz Tiro nu gyedz Sidón gal nu bickyat de ru, orze' bi gulas nne' dey cyiy. Orze' nzu dey shab cuiñ yu nunu ncoo dey di'ñ tooy par nu gabe nu ŋgyac dey mbecy shni. <sup>22</sup> Tees ya rnęe lo der nu dzi nu gri bee Ńgyoozh ni de mbecy, cashtig ily zir cuic mi ni de ru gaze' ni de mbecy nu yu' gyedz Tiro nu Sidón. <sup>23</sup> Ze' de ru mbecy nu yu' gyedz Capernaum, ¿a rlagy der chup ru gal gyibaa? Tees de ru gyet lag der ze' nu blaazha' zir gyi ni gabily. Gun ze' benu ŋgyicya nusuriidz gyedz Sodoma gal nu bickyat de ru, orze' gabee ri ru' gyedz ze' na. <sup>24</sup> Tees ya rnęe lo der nu dzi zir cashtig ily cuic Ńgyoozh ni de ru ornu shuub dzi nu gri beem ni der, gaze' ni de mbecy nu gu' Sodoma —nam.

**"Da der lo, orze' gad nu zu lagy ru", na Jesuuz**

<sup>25</sup> Orze' tiem ze' Jesuuz nam:

—Ñgyoozh, uz dę, biň nu nac Shuaan gyibaa gal nu gyishlombecy ii, ya dricę gras nir gun bicky ru nu rad lagy de yu nu na gal nu na mdoo de coz nu pcach ru lo de yu nu rad lagy nu lo de yu nu yet lag cuen. <sup>26</sup> Ni bicky ru gun nde' coz nu rlagy ub ru —nam rab mi Ñgyoozh.

<sup>27</sup> Orze' nam rab mi de mbecy:

—Ñgyoozh, uza, bgu'm dela coz yaą, gun ni tub la mbecy wagad lagy dey lac na ya, i'ñ mi sinu tub zi Ñgyoozh, uza rad lagy mi lac na ya nim. Nunu se cyu la rad lagy lac na Ñgyoozh. Sinu tub zi ya, i'ñ mi rad lagy lac nam. Nunu cyu zi'l mbecy nu rlagya gac lyuum loy.

<sup>28</sup> Da der lo, de ru mbecy nu na gal nu na mbecy gut-siñ nunu de ru mbecy nu na gal nu na mbecy nu nuu yuu, gun ya gricę nu zu lagy der. <sup>29</sup> Gush der yug nu gricę nir nunu psya' der lo gun ya paseža nunu gugy na nañ lardoo, gun orze' gad nu zu lagy der nañ lardoor. <sup>30</sup> Gun yug nu gricę ni der nde' a' fers cha nu der ñii nunu yuu nu gricę gu der, nde' yuu dzach —na Jesuuz.

**De yu nu rsya' lo Jesuuz rcyug dey za' ni trig sab, dzi nu rzu lagy mbecy**

**12** Na tiem ze', tub sab, dzi nu rzu lagy mbecy Israeel, Jesuuz bded mi lat tub nac trig. Orze' de yu nu rsya' lom briib nu ran dey. Orze' brugyi' rcyug dey za' ni trig. Orze' bdow dey ñi. <sup>2</sup> Na ornu bzaac de mbecy fariseo, orze' na dey rab yu Jesuuz:

—Güii de yu nu rsya' lor. Ricy dey tub coz nu a' yad ñi nu gyicy den sab —na dey.

<sup>3</sup> Orze' nam rab mi dey:

—Walab gaal nigul sya' der coz nu bicky Dabi lat nu byan yu nu sac coz nu gow yu? <sup>4</sup> Orze' gu'y nañ yu' ni Ñgyoozh nu de yu nu rded nuy. Nunu bdow dey gyishtily nu bzeeñ mbecy ze'. Nde' gyishtily nu zu riiñ lo Ñgyoozh. Bdow dey ñi mas a' yad ñi nu ni gyicy dey. Gun gyishtily ze', de uz zi'l gac gow yuñ. <sup>5</sup> ¿O a ni' nigul sya' der leey ni Moisees ze' nu rniiñ nu de uz ricy dey coz nu zañ contr ni leey ni dzi nu rzu lagy mbecy; tees

nde' a walab nu cyi na nu ni ricy dey? <sup>6</sup> Ya rnęe lo der nu lat de ru na zu tub coz nu zily zir nac gaze' yu' nu driib zily den Ñgyoozh. <sup>7</sup> De ru wangyet lag der cuen lac yaruu de riidz ni Ñgyoozh, ze' nu rniiñ: "Ya rlagya nu gashni lagy der losa'r. Walagya nu cut ru bañcyug nu cyid gun lo, na Ñgyoozh", rniiñ. Benu ŋgyet lag der cuen, orze' wanii der nu yu' cyi mbecy ornu sac cyiy. <sup>8</sup> Gun ya, biň nu byac mbecy, riib icę dzi nu rzu lagy mbecy —nam.

**Jesuuz bicky yac mi tub mbecy yaa gush beñ**

<sup>9</sup> Orze' bruu Jesuuz lugaar ze' zam. Orze' gu'm nañ tub yu' nu rsya' de mbecy riidz ni Ñgyoozh. <sup>10</sup> Ze' nañ yu' ze' ri tub mbecy yaa gush beñ. Nunu yu' ga' la be mbecy nu ryub dey tub mod par nu griib dey cyi too Jesuuz. Orze' na dey rab yum:

—¿A gruu nap ñi par lo leey ni Moisees nu gyicy yac den tub mbecy rat sab, dzi nu rzu lagy mbecy? —na dey.

<sup>11</sup> Orze' na ga' Jesuuz rab mi dey:

—¿A grusu tub der lat ii benu yu' shily ni der, ze' gyet lag tub ma gyeryuu, a waya boo der ma dzi nu rzu lagy mbecy? <sup>12</sup> Tees dzi zir sac tub mbecy gaze' tub shily. Nde' nu nap gruuñ par lo leey ze' nu nap gyicy den sab, dzi nu rzu lagy mbecy —nam.

<sup>13</sup> Orze' nam rab mi mbecy rat ze':

—Bzaab yaar lo —nam.

Orze' mbecy rat ze' bzaab yaay lom. Orze' lueg la byanap ñi gal nu na tuubañ. <sup>14</sup> Orze' de mbecy fariseo bruu chu dey lom. Orze' brugyi' ro dey riidz nu lac mod gyicy dey par nu cut yum.

**Byu' ni tub nac riidz nu mnii Isaías ni Jesuuz**

<sup>15</sup> Na ornu gud lagy Jesuuz nu ni rnii dey, orze' brum lugaar ze' zam. Nunu zigy mbecy za ca dey ich mi. Orze' bicky yac mi dela mbecy rat nu yu' lat dey. <sup>16</sup> Nunu pcach mi ru' dey nu cue' nii dey lo de mbecy cyu nac mi. <sup>17</sup> Ni bicky mi gun par nu gyu' ni de riidz nu pcaa Isaías ornu mniyi: Orze' Ñgyoozh nam:

<sup>18</sup> Ii zu biň nu pcui nu gyicy riñ ne.

Mi ze' biň nu rca nunu biň nu gyedzu' lagya.

Ya zeedę Espiriit Yon ne nu gac num mi ze'.

Orze' mi ze' cuic mi nu gad lagy dela mbecy ni gyel fushtiz ne,

gashtal de mbecy nu walab mbecy Israael.

<sup>19</sup> Mi ze' wo zim riidz nu de mbecy, nunu wabish tim.

Nunu waya sam niim lat cay par nu gyeñ mbecy.

<sup>20</sup> Nunu waca chu lom lo ni tub la mbecy shni.

Nunu ni' zi'l washi'ñ mi baloor shni nu ricy cup dey.

Sinu rzu fert mi gashtal zu nap lam gyel fushtiz nim.

<sup>21</sup> Nunu de lo la nez mbecy cyish lo dey lom, na Ñgyoozh, na Isaías.

**Mbecy rnii dey nu Jesuuz ricy mi coz ily nu nac nuras**

<sup>22</sup> Orze' bru'ña nu de mbecy tub gop lom, nunu ca' loy. Ni nay par nu bicky ni nuras yu. Orze' Jesuuz bicky yac mi yu. Orze' byanap urloy nunu brugyi' rac rniiy.

<sup>23</sup> Orze' ton'a la za nu ic de mbecy nunu brugyi' rgugyi' dey lo losa'y. Orze' na dey:

—A walab gaal yu ii yu nu nac nez Dabi? —na dey.

<sup>24</sup> Na ornu güeñ de mbecy fariseo, orze' na dey:

—Beelzebé, yu nu riib ic de nuras, yu ze' bicy yu nu cyiiñ yu ii nu co chuy de' zir de nuras —na dey.

<sup>25</sup> Na ornu gud lagy Jesuuz de coz nu rnii too dey, orze' nam rab mi dey:

—Benu tub nac mbecy dulew dey nu chucooy laab nu losa' zi'l yu, orze' nit lo dey. O benu tub famil o de mbecy nu yu' tub gyedz chucooy laab nu losa' zi'l yu, ni' zi'l wazu dey. <sup>26</sup> Benu tub nuras co chuy laab nu losa' nuras yu, orze' gyach dey, nunu wazu laa riiñ nu gyicy dey. <sup>27</sup> De ru rnii der nu Beelzebé b icy yu nu cyiiñ ya nu loo ch yu nuras. Ze' benu ni, orze' ?cyu briic rish-beey ni de losa'r nu ni ricy yu? Nde' nu de losa'r ze' gac lyuu dey lo der nu de ru radza der. <sup>28</sup> Tees Espirit Yon ni Ñgyoozh ricy mi nu ya rac rloo ch yu nuras, nunu nu nac nu nde' rabee nu bi bri gyel gubier ni Ñgyoozh lat der.

<sup>29</sup> Tees rlag yñi nu gyicy mbecy gan nuras zub lo, gaze' nu gac co chu dey de' zir nuras nu zaab ich. Gal nu ricy nu dey tub mbecy fert. Benu rlag yñi dey chu'y yu'y, orze' nu loga la rlag yñi cyiig dey yu. Gaze' nu gac chu' dey yu'y par nu co dey suuy.

<sup>30</sup> Gun yu nu waya faboor ne, yu ze' zay contr ne. Nunu yu nu walocyuub ya nu te' de mbecy, yu ze' tush las yu dey.

<sup>31</sup> 'Nde' nu ya rn e lo der nu Ñgyoozh gac gyicy sulag y mi ni cyu zi'l mbecy ni de lo la cyi nu ricy yu nunu de lo la riidz a' nap nu driib ru'y. Tees cyu zi'l mbecy nu nii zi ni Espiriit Yon nim, yu ze' wayicy sulag y mi ni y.

<sup>32</sup> Cyu zi'l mbecy nu nii zi ne ya biñ nu byac mbecy, Ñgyoozh gac gyicy sulag y mi ni y. Tees yu nu nii zi ni Espiriit Yon nim, de yu ze' wayicy sulag y mi ni dey tiem nu yu'n na, gal nu tiem nu yad par lo.

### Tub ga la yag rabee la nañ nu nac mod nu na uug yñi

<sup>33</sup> Benu tub yag nap nañ, orze' nap na uug yrbic ñi. Ze' benu tub yag a' nap nañ, orze' rbiç ñi uug yshiñ na. Nde' nu gyu' lo der la na tub yag nu nac uug ynu rbiç ñi. <sup>34</sup> De ru, mbecy a' nap! ?Lac gyicy der gniir coz nap, ze' nac der mbecy a' nap? Gun nu ru' mbecy rniy lac na de coz nu dzi yu' nañ lardooy. <sup>35</sup> Benu tub mbecy nap, yu ze' rniy coz nap gun coz nap yu' nañ lardooy. Benu tub mbecy a' nap, rniy coz a' nap. Ni rniy gun yu' coz a' nap nañ lardooy. <sup>36</sup> Ya rn e lo der nu ornu shuub dzi nu ri bee Ñgyoozh ni dela mbecy, orze' rlag yñi nii der la gyi' nu mnii der tub ga de riidz ton nu briib ru' der. <sup>37</sup> Gun dub gal na riidz nu mnii der, dub ni ri bee Ñgyoozh ni der, ben a nu gruu nap der o nu gruu fals der —nam.

### De mbecy fariseo rgyiiñ dey tub nusuriidz

<sup>38</sup> Orze' la be de mbecy fariseo gal nu de yu nu rlyuu leey ni Ñgyoozh brugyi' rnii dey. Orze' na dey rab yu Jesuuz:

—Masht, de ya rlag yñi nu zac a nu gyicy ru tub nusuriidz par nu gad lag yñi nu laab ru —na dey.

<sup>39</sup> Orze' na Jesuuz rab mi dey:

—Par de mbecy a' nap, de yu nu wagiyicy paa nu yu' tiem na, wada' muesht par nu zac dey. Nomaas muesht ni Jonás, yu nu mnii por cuen ni Ñgyoozh, nde' zi'l muesht nu gad ni de yu ze'. <sup>40</sup> Gal nu Jonás briy chon dzi nu chon rel nañ tub bel ily, nde' nu ni' zi'l ya, biñ nu byac mbecy cuj chon dzi nu chon rel ze' nu yu' aña. <sup>41</sup> Ornu shuub dzi nu ri bee Ñgyoozh ni dela mbecy nu yu' tiem na, orze' de mbecy gyedz Nínive gyes su dey nu nii yu' cyi der. Gun de mbecy Nínive mne' dey cyi ornu güeñ dey de riidz ni Ñgyoozh nu pshaal Jonás loy. Nunu na la, zu tub mbecy lat der nu gya zir zuy par Jonás. <sup>42</sup> Gun ni' zi'l biñ mñaa nu riib ic tub nasyoong nu ri par yaa been ornu shuub dzi nu gri bee Ñgyoozh ni dela mbecy. Orze' gaza' biñ mñaa ze' gyes suum nu niim nu yu' cyi der, gun mi ze' bruum tub lugaar nu ton'a la zet par nu guam bzuub gyidag mi shcab lily ni rey Salomoong, nunu na la zu tub mbecy lat der nu gya zir zuy gaze' rey Salomoong.

### Nuras nu rbish cya lugaar ni tuuba' tir

<sup>43</sup> De ru na der gal nu na tub mbecy ornu druu chu nuras loy. Orze' nuras ze' rzay tub lugaar wach. Ryub yu tub lugaar nu zu lag yu. Na ornu wagad lugaar ze', orze' rnii tooy: <sup>44</sup> "Nap zir cush cyan, laab ze' nu bruun", rnii tooy. Na ornu griy, orze' gyap yu mbecy ze' nu nay gal nu na tub yu' nu nat laa nañ, nunu se cyudz la zu nañ ñi nu bdulyuub. <sup>45</sup> Orze' chay nu cha te'y tub gagya' nuras nu shiñ zir ricy gaze' ub yu. Orze' chu' dey nañ mbecy ze' nu cyiiñ yu. Orze' mbecy ze' yashiñ zir na mod nu nay, gaze' nu loga. Nde' mod nu gzac de mbecy a' nap nu yu' na —nam.

### Bru'ña de famil ni Jesuuz

<sup>46</sup> Gabee rnii ru' Jesuuz nu de mbecy, ornu bru'ñaam nu de b icy mi. Yu' dey gashtal ich la yu' nu rlag yu nii nuy Jesuuz. <sup>47</sup> Orze' tub mbecy byooy rishlom:

—Ñaar nu de b icy ru yu' dey gashtal ich yu' re. Rlag yñi dey nii nuy ru —na dey.

<sup>48</sup> Orze' Jesuuz nam rab mi yu nu byoo rishlom ze':

—¿Cyu ñaa, cyu de b icya? —nam.

<sup>49</sup> Orze' blyuu yaam lo de yu nu rsya' lom. Orze' nam:

—Ii nguaa ñaa nunu ii nguaa de b icya. <sup>50</sup> Cyu zi'l mbecy nu ricy coz nu rlag yñi Ñgyoozh, uz a nu Zub gyibaa, de yu ze' nac dey b icya nu zana nu ñaa —nam.

### Riidz tiily ni de mbigy

**13** Orze' laab dzi ze' bruu Jesuuz nañ yu' nu rcyiiñ mi zam par ru' nisyudoo. Orze' ze' gusub mi.

<sup>2</sup> Orze' como ton'a la mbecy zigy byatublaazh dey lom, orze' gu'm nañ tub barc gusub mi. Ze' de mbecy zigy gacua dey ru' nisyudoo. <sup>3</sup> Ze' blyuum zañ coz ni dey nu riidz tiily.

Orze' nam rab mi dey:

—Tub mbecy bruuuy zay za nuuz yu mbigy.<sup>4</sup> Lat nu rtich yu de mbigy ze', yu'ñ bet lag ñi ru' gyernez, orze' bru'ña chigyiñ bdow ma ñii.<sup>5</sup> Ze' yu' ga'ñ bet lag ñi lo yu las ru' nu ri gyita' par nañ. Orze' dzach briib ñi gun las ru' yu ze'.<sup>6</sup> Na ornu briib doo na, orze' bziiñ. Orze' guwach ñi gun sac sheñ yu nu shet nap ñi lyuñ.<sup>7</sup> Ze' yu' ga'ñ bet lag ñi lat gyech. Orze' dzach guuly gyech ze'. Orze' pcyiig ñi de yamni ze'.<sup>8</sup> Ze' yu' ga'ñ bet lag ñi lo yu nap. De nde' tona' la nap na cosech briic ñi. Yu'ñ briic ñi tub gaynal mbigy. Yu'ñ briic ñi gayon mbigy. Ze' yu' ga'ñ briic ñi gal rup tii mbigy —nam.

<sup>9</sup> Orze' na ga'm:

—Mbacy nu Zub gyidag rlagy ñi gyicy yu nu gyet lag yu cuen —nam.

### La gyi' rniim nu riidz tiily

<sup>10</sup> Na despuees de yu nu rsya' lom becha' dey lom, orze' na dey rab yum:

—¿La gyi' nu rniir nu riidz tiily lo de mbacy? —na dey.

<sup>11</sup> Orze' Jesuuz nam rab mi dey:

—Par de ru Ñgyoozh briic mi nu gad lagy der coz ni gyel gubier nim, de coz nu wagad lagy mbacy gulas. Tees de yu re wac gyet lag dey cuen.<sup>12</sup> Gun mbacy nu ricy cup la coz, sheñ zir gad niy. Orze' tona' la coz sheñ gyicy cup yu. Tees yu nu sac ni, gashtal coz miiñ nu ricy cup yu gruuñ niy.<sup>13</sup> Nde' nu ya rnœ mod ni riidz tiily, gun orze' zac dey tees wayu' loy, nunu gyeñ dey tees wayet lag yu cuen.<sup>14</sup> Gun orze' gyu' niñ gal nu mnii Isaías, yu nu mnii por cuen ni Ñgyoozh ornu nay:

Ñgyoozh nam:

"Mas gyeñ der,  
tees wayet lag der cuen.  
Nunu mas mbi la güii der,  
tees wayu' lo der.

<sup>15</sup> Gun shcab ni de mbacy ii guton ñi,  
nunu byoow gyidag dey,  
nunu byoow urlo dey.  
Gun orze' wazac dey nu urloy,  
nunu wayeñ dey nu gyidag yu,  
nunu wayet lag dey cuen nu shcab niy,  
nunu nis cush cya dey par lo,  
nis gyicy napä dey",  
na Ñgyoozh, na Isaías.

<sup>16</sup> Tees de ru dzi ni der, gun rzac der nu urlor, nunu reñ der nu gyidag ru.<sup>17</sup> Ya rishli rnœ lo der nu zigy de yu nu mnii por cuen ni Ñgyoozh gal nu zigy de mbacy nap ngulagy dey nzac yu de coz nu de ru rzac ru, tees wansac dey. Nunu ngulagy dey ñgyeñ yu de coz nu reñ de ru, tees wangyeñ dey —na Jesuuz—.

### Jesuuz rniim lac yaruu de riidz tiily ze'

<sup>18</sup> 'Bzuub gyidag der. Orze' gad lagy der lac yaruu riidz ni mbacy nu mnuuz mbigy ze'.<sup>19</sup> De mbacy nu rzuub gyidag riidz ni gyel gubier ni Ñgyoozh par wayet lag dey cuen, de yu ze' na dey gal nu na yu nu ri ru' gyernez. Rnii mbacy riidz ze' lo dey, tees orze' dru'ña nuras rbooy de riidz nap ze' nañ lardooy dey.<sup>20</sup> Ze' yu'

mbecy nu na gal nu na mbigy nu bet lag lo yu las ru' nu ri gyita' par ñañ. Ornu nu loga la reñ dey riidz ni Ñgyoozh, orze' "O" rnii dey nunu yet lagy yuñ.<sup>21</sup> Tees par nu las ru' yu ze', wac shet riidz ze' sheñ lyuñ. Orze' la be zi'l dzi ragyee dey. Tees despuees, ornu dru'ña nu zac ziy o ornu dru'ñañ nu deet rzac yu nu nac riidz ze', orze' druuh chu dey lo riidz ze'.<sup>22</sup> Ze' yu' mbacy nu na gal nu na mbigy nu bdunuuz lat gyech ze'. De yu ze' rzuub gyidag dey riidz ni Ñgyoozh. Tees de gyel rsug ic nu nac de coz ni gyishlombecy ii nunu de gyel ye rzac lo gyel nap, de nde' ricy ñi gan dey. Gal nu ricy gyech nu wacsan ñi nu cuic ya mni cosech, ni ricy de coz ze'. Wacsan ñi gyicy nap riidz ni Ñgyoozh shcab ni de mbacy ze'.<sup>23</sup> Ze' yu' mbacy nu na gal nu na mbigy nu bet lag lo yu nap. Orze' ornu reñ dey riidz ze', orze' yet lag dey cuen, nunu rbic ñi cosech nañ lardooy. Yu'ñ briic ñi tub gaynal mbigy. Yu'ñ briic ñi gayon mbigy. Yu' ga'ñ briic ñi gal rup tii mbigy —nam.

### Riidz tiily ni gyish

<sup>24</sup> Orze' Jesuuz mniim tuuba' riidz tiily lo dey. Orze' nam:

—Mod nu ricy riidz ni gyel gubier ni Ñgyoozh, nañ gal nu na mod nu b icy mbacy nu gua nuuz mbigy bdu-cui lo yu ni ze'.<sup>25</sup> Tees ornu dela dey nas yu rel, orze' bru'ña losa' yuuy. Orze' mnuuz yu mbigy gyish lat de mbigy nap ze'. Orze' yay.<sup>26</sup> Na ornu guuly ñi nunu pshuub tiem nu ca nan za' niñ, orze' ni' zi'l guuly gyish nu bdunuuz lat yamni ze'.<sup>27</sup> Orze' bru'ña de yu nu ricy riiñ ni mbacy ze'. Orze' na dey rab yuy: "¿Lac guc briib de gyish ze'? Ze' ru mnuuz ru mbigy bducui", na dey.<sup>28</sup> Orze' na yu nu mnuuz mbigy ze' rab yu dey: "Ca zi'l na tub yu nu rzi lagy gua nuuz yu nde", nay. Orze' na ga' de yu nu ricy riiñ ze': "¿A rlagy ru chä dë loo lyu de de gyish ze?" na dey.<sup>29</sup> Orze' na yu nu mnuuz mbigy ze' rab yu dey: "Walagya, gun ornu co lyu der de gyish ze', orze' gyicy ñi nu gruu lyu ga' ya mni ze'.<sup>30</sup> Nap zir zaan der galy ñi tublaazh la gashtal shuub tiem nu te' cosech. Orze' gyicya mandaar lo de yu nu ricy riiñ ne nu co lyu dey de gyish ze' loga la. Orze' gag yeñ ñi par nu chañ lo gyi. Orze' gaze' nu te' dey cosech ze' nunu cu' choow dey ñi nañ ye", nay —nam.

### Riidz tiily ni mbigy urnishtas

<sup>31</sup> Orze' Jesuuz mniim tuuba' riidz tiily lo dey. Orze' nam:

—Gyel gubier ni Ñgyoozh rac ñi gal nu rac nu tub mbigy ya urnishtas nu rnuuz mbacy lo yu niy,<sup>32</sup> gun nde' mbigy nu blazha' zir mbigy mi' gaze' de' zir mbi-gy. Tees ornu raly ñi zily zir ñi yac ñi gaze' de' zir de yag mi'. Yac ñi gal nu na tub yag ily. Gashtal de chigyiñ nu rded lo bi dru'ña ma lat yaañ, nunu rzaa ma teez ma —nam.

### Riidz tiily ni Lebadur

<sup>33</sup> Orze' mniim tuuba' riidz tiily lo dey. Orze' nam:

—Gyel gubier ni Ñgyoozh nañ gal nu na lebadur nu gush tub biñ mñaa. Bdu'm ñii lat chon nac arin. Orze' ptub yaam ñii, gun orze' lebadur ze' cshup ñi dela cub zañ ze' —nam.

### La gyi' nu mnii Jesuuz de riidz tiily ze'

<sup>34</sup> De la nde' mnii Jesuuz lo de mbecy nu riidz tiily. Nunu waniim lo dey benu walab nu riidz tiily. <sup>35</sup> Ni b icy mi par nu gyu' niñ gal nu mnii tub yu nu mnii por cuen ni Ngoozh ornu nay:  
Biñ nu ca lo cuen nu cyid nam:  
"Ya gnęe lo dey nu riidz tiily.  
Ya gnęe lo dey de coz nu wangad lagy mbecy nese nu bzub gyi' gyishlombecy", nam,  
na yu nu mnii por cuen ni Ñgyoozh.

### Jesuuz rshaal mi riidz tiily ni gyish nu briib lat ya mni ze'

<sup>36</sup> Orze' Jesuuz mnii num dey ñgyoozh, orze' bzuu nez mi dey yay yu'y. Orze' gu'm nañ yu'. Orze' bruña de yu nu rsya' lom. Orze' byatublaazh dey lom. Orze' na dey rab yum:

—Lac yaruu de riidz tiily ni gyish nu briib lat ya mni ze'? —na dey.

<sup>37</sup> Orze' Jesuuz nam rab mi dey:

—Mbacy nu mnuuz mbigy bducui ze', nde' ya biñ nu byac mbecy. <sup>38</sup> Na yu ze' nde' gyishlombecy ii. Ze' de mbigy bducui ze', nde' de mbecy nu rash gyel gubier ni Ñgyoozh. Ze' de gyish ze', nde' de mbecy nu nac nu nuras. <sup>39</sup> Ze' mbecy rzi lagy nu mnuuz mbigy gyish ze', nde' nuras. Ze' cosech ze' nu nde' ornu shuub dzi ni gyishlombecy ii. Ze' de mbecy nu te' cosech ze', nde' de anc ni Ñgyoozh. <sup>40</sup> Gal nu rte' dey de gyish nu ne' dey ñi lo gyi, ni' zi'l gac ornu shuub dzi ni gyishlombecy ii. <sup>41</sup> Tiem ze' ya biñ nu byac mbecy zuu nez de anc ne nu cha te' dey dela mbecy nu rlyuu coz cyi lo losa', gal nu de mbecy nu a' nap ricy. De anc ze' coy de mbecy nu shiñ ricy ze' lat de mbecy nu nac nu gyel gubier ne. <sup>42</sup> Orze' zeed yu dey chay lo gyi. Ze' nu chu' dey gun yu nunu siigy lay yu —nam—. <sup>43</sup> Gaze' nu de mbecy ni Ñgyoozh ryal gabe dey gal nu rabe doo güidz lugaar ze' nu riib ic Ñgyoozh, uz dey. De yu nu rzuub gyidag rlagy ñi nu gyicy yu nu gyet lag yu cuen —nam—.

### Riidz tiily ni gyel nap nu ri ngach

<sup>44</sup> Gyel gubier ni Ñgyoozh nañ gal nu na gyel nap nu ri ngach lo yu. Orze' tub mbecy byap yu gyel nap ze'. Orze' pcach yuñ tuuba' tir laab lugaar ze'. Nunu tona' la bet lagy yu. Orze' yay biit yu dela coz nu ricy cup yu, gaze' nu wiij lugaar ze' nu ri gyel nap ze'.

### Riidz tiily ni urndub nu tona' la coz ily sac

<sup>45</sup> Ni' zi'l mod ricy nu mbecy gyel gubier ni Ñgyoozh gal nu ricy de mbecy nu ricy daljez nu rded ryub dey urndub nu dzi cyit na. <sup>46</sup> Na ornu gyap yu tub urndub

nu tona' la ñgyup sac, orze' yay nu cut yu dela coz nu ricy cup yu. Orze' cush cyay ziy urndub nu dzi sac ze'.

### Riidz tiily ni gyish nu rub bel

<sup>47</sup> Mod nu rac nu gyel gubier ni Ñgyoozh, nde' mod nu rac nu tub gyish nu rub mbecy bel. Gyish ze' rne' dey ñi lo nisyudoo. Orze' zañ lo bel rzu' ma nañ ñi.

<sup>48</sup> Na ornu dzaa nañ gyish ze', orze' co dey ñi par lo yu wach. Orze' chesub dey nu cuiy de bel nu gu' nañ gyish ze'. Orze' de bañ nap cu' choow dey ma nañ chicyiw niy. Ze' bañ wacyiñ ne' dey ma. <sup>49</sup> Ni' zi'l mod gac ornu shuub dzi ni gyishlombecy ii. De anc gru'ña dey. Co reñ yu de mbecy a' nap lat de mbecy nap. <sup>50</sup> Orze' zeed yu dey chay lo gyi, ze' nu chu' dey gun yu nunu siigy lay yu —nam.

### Gyel nap cub nu gyel nap gush

<sup>51</sup> Orze' nam rab mi dey:

—¿A yet lag der cuen dela de riidz ii? —nam.

—A, yet lag de cuen —na dey.

<sup>52</sup> Orze' na ga'm rab mi dey:

—Ornu tub mbecy nu rlyuu leey ni Ñgyoozh rac yu de coz ni gyel gubier nim, orze' yac yu gal nu na shuaan tub yu'. Orze' yu ze' rbooy coz cub nu coz gush ze' nu yu' choow de coz niy —nam.

### Jesuuz yam Nazaret

<sup>53</sup> Ornu blazh mnii Jesuuz de riidz tiily ze', orze' brum zam. <sup>54</sup> Orze' brim ledz mi. Gaze' nu brugyi' rlyuum ni de mbecy nañ yu' nu rsya' dey riidz ni Ñgyoozh. Orze' tona' la za nu ic de mbecy. Orze' na dey:

—Ze' ¿ca psya' ga' yu ii de coz ily nu rniiy? Ze' ¿lac mod ricy yu nu rac ricy yu de nusuriidz ze'? <sup>55</sup> Ze' ¿a walab yu ii iñ biryag? Ze', ñaay nde' Li nu de b icy yu Santiag, nu See, nu Simoo, nu Judas. <sup>56</sup> Nunu ¿a walab laab lat na ii rcyiñ de zan yu? Ze' ¿ca guud de coz nu ricy yu beni? —na dey.

<sup>57</sup> Orze' wancheel reñ dey mi. Orze' nam rab mi dey:

—Ca zi'l lugaar mbecy rca lagy dey lo yu nu rnii por cuen ni Ñgyoozh. Nomaas ledz yu, nu de famil niy waca lagy dey loy —nam.

<sup>58</sup> Orze' wangac gyicy mi zañ nusuriidz par nu wangyicy cup de mbecy ze' consuel lom.

### Gut Waa nu briib nis mbecy

<sup>14</sup> Laab tiem ze' rey Herodes, yu nu riib ic lo de yu ni Galilea, güeñ yu de riidz nu zaab ni Jesuuz.

<sup>2</sup> Orze' nay rab yu de yu nu zu riiñ loy:

—Yu ze', nde' Waa nu briib nis mbecy. Byabañ yu.

Nde' nu rac ricy yu de nusuriidz ily ze' —nay.

<sup>3</sup> Ni mniy gun laab yu b icy yu mandaar nu pcyig dey Waa nu pshet lag dey yu nañ yu' gyiib. Ni b icy yu par nu nac Herodías, mñaa b icy yu Lip. <sup>4</sup> Gun Waa nu briib nis mbecy zaab rnii lay lo rey Herodes. Orze' rniiy:

—Ru rach ñi nir lo Ñgyoozh nu gush ru biñ mñaa ze' —rniiy.

<sup>5</sup> Orze' rey Herodes ngulagy yu ñgyut yu Waa, tees gudzib yu lo de mbecy Israeel. Gun b icy dey Waa par tub yu nu mnii por cuen ni Ñgyoozh. <sup>6</sup> Tees ornu pshuub dzi nu b icy dey sa' ni dzi nu gul rey Herodes, orze' i'ñ Herodías bilgyi'ñ lo dela mbecy. Orze' rey Herodes tona' la bet lagy yu. <sup>7</sup> Orze' mniiy lo fiñ ze' nu waded la cuic yu la zi'l coz nu cyiñ ñi loy. <sup>8</sup> Orze' nu loga la bdugyi'ñ lo ñaañ. Gaze' nu nañ rab ñi rey Herodes:

—Rlagya nu cuic ru too Waa ne nañ tub gya'n —nañ.

<sup>9</sup> Orze' rey Herodes tona' la b icy shniy ornu güeñ yu riidz ze', tees como lo rgüii la de mbecy nu nguaa ze' mniiy nu waded la cuic yu la zi'l coz nu cyiñ fiñ feñ ze', <sup>10</sup> orze' b icy yu mandaar lo tub soldad nu cha shi'ñ yu too Waa nañ yu' gyiib. <sup>11</sup> Orze' lueg la za nuy ñi nañ tub gya'n. Orze' briic yu ni fiñ feñ ze'. Orze' fiñ feñ ze' gush ñi nde'. Orze' byabici ñi nde' ni ñaañ.

<sup>12</sup> Orze' despuees bru'ña de yu nu rsya' lo Waa nu gua te dey cuerpi nyi. Orze' pcach dey ñi. Orze' gua nii dey lo Jesuuz.

### Jesuuz bgoow mi gaay miily mbecy

<sup>13</sup> Ornu güeñ Jesuuz coz nu bzac Waa, orze' bruum lugaar ze'. Zam tub lugaar ub zi nañ tub barc. Na ornu gud lagy de mbecy, orze' bruu dey lat de gyedz za ca' dey ich mi par lo yu bigy. <sup>14</sup> Orze' Jesuuz bruum nañ barc. Na ornu bzaac mi de mbecy zigy, orze' gushni lagy mi dey. Orze' b icy yac mi de mbecy rat nu gua nu dey. <sup>15</sup> Na or becheñ, orze' bru'ña de yu nu rsya' lom. Orze' na dey rab yum:

—Na tona' la bi gudze nunu ii tub lugaar ub zi. Bzuu nez de mbecy gyay, gun orze' cha dey lat de gyedz nu yu' gaab ga, gun orze' zi dey coz nu gow yu —na dey rab yum.

<sup>16</sup> Orze' na Jesuuz rab mi dey:

—Walagy ñi nu gya dey. De ru briic coz nu gow dey —nam.

<sup>17</sup> Orze' na ga' dey:

—Sac la' zir coz nu ricy cup d e nomaas gaay gyishtily nu cyup bel mi' —na dey.

<sup>18</sup> Orze' na ga'm rab mi dey:

—Da nu der ñii lo ii ben —nam.

<sup>19</sup> Orze' Jesuuz mniim lo de mbecy nu gzub dey lo gyizh. Orze' bdu' yaam gaay gyishtily ze' nu cyup bel ze'. Orze' bgüiim par baa. Orze' briic mi gras ni Ñgyoozh. Orze' blew mi gyishtily ze'. Orze' briic mi ñii ni de yu nu rsya' lom. Orze' bleez dey ñi lat de mbecy zigy.

<sup>20</sup> Orze' dela mbecy bdow gyel la dey. Ornu blazh nu bdow dey, orze' brusub trocyup ru' chicyiw de coz nguzh ni gyishtily nu pte' dey ze'. <sup>21</sup> De yu nu bdow ze' gaay miily dey nac yu: Ze' reñ de biñ mñaa nu de yu nguzh.

### Jesuuz bzam lo nis

<sup>22</sup> Orze' Jesuuz mniim lo de yu nu rsya' lom nu chu' dey nañ barc par nu cha ga dey lo gashtal tub la' ga' ru' nisyudoo. Orze' Jesuuz byeeñ gam par nu nii num de mbecy ñgyoozh. Orze' bzuu nez mi dey yay yu'.

<sup>23</sup> Na ornu blazh nu mnii num dey ñgyoozh na, orze' ub zi lam zam tub logyi' nu nii num Ñgyoozh. Na or becheñ laab lugaar ze' zum ub zi lam. <sup>24</sup> Laab tiem ze' zaab barc nu za nu de yu nu rsya' lom gazel nisyudoo. Tees tona' la ricy nu de nguuly lo nisyudoo barc ze', gun par nez nu zañ druu bi. <sup>25</sup> Na ornu gabee cas ru' zu, orze' rza la Jesuuz. Lo nis zam lo dey. <sup>26</sup> Na ornu bzaac dey nu yad mi lo nis, orze' tona' la gudzib dey. Orze' rbish ti la dey. Orze' na dey:

—;Nde' tub bis! —na dey.

Nunu rbish ti dey nu tanta' gudzib dey.

<sup>27</sup> Tees orze' Jesuuz nam rab mi dey:

—;Briic der baloor! ;Yä nu nde! ;Cue' dzib der! —nam.

<sup>28</sup> Orze' Bed nay rab yum:

—Shuaan d e, ze' benu laab ru, orze' b icy nu ya gza lo nis nu yapa lor —nay.

<sup>29</sup> Orze' nam rab mi yu:

—Da —nam.

Orze' Bed bruuy nañ barc, nunu brugyi' nu rzay lo nis zay par lom. <sup>30</sup> Tees ornu bdu' cuen yu nu dzi druu bi, orze' gudzib yu. Orze' brugyi' rzez tiy lo nis. Orze' brish tiy. Orze' nay:

—;Shuaan d e, bloo mbañ ya! —nay.

<sup>31</sup> Orze' lueg la Jesuuz bdu' yaam yaay. Orze' nam rab mi yu:

—;Dzi ga ñuu mi' consuel ricy cup ru! ¿Lagu b icy cyup ic ru? —nam.

<sup>32</sup> Na ornu gu'y nañ barc nuy mi, orze' lueg la guri bi.

<sup>33</sup> Orze' de yu nu yu' nañ barc ze' gusutib dey lo Jesuuz. Orze' na dey rab yum:

—;Rishli gaal ru nac ru i'ñ Ñgyoozh! —na dey.

### Jesuuz b icy yac mi de mbecy rat Genesaret

<sup>34</sup> Orze' bded dey lo nisyudoo ze'. Orze' bru'ña dey lo de yu ni Genesaret. <sup>35</sup> Ornu de mbecy nu yu' lugaar ze' byu' lo dey Jesuuz, orze' ptush las dey riidz par dela lugaar ze'. Orze' za nu dey dela mbecy rat lom. <sup>36</sup> Orze' mnishbaa dey lom nu zaan mi gal dey mas ñuu ru' shab mi. Orze' dela yu nu gul yaa ru' shab mi byac dey.

### De cushtom ni gyitoo bel

<sup>15</sup> Orze' la be de mbecy fariseo, gal nu de mbecy nu rlyuu leey ni Ñgyoozh bruu dey Jerusaleeng za dey lo Jesuuz. Orze' bdugyi' dey lom. Orze' na dey:

<sup>2</sup> —¿Lagu de yu nu rsya' lo ru wagyicy yac dey nu de cushtom ni de gyitoo bel ni den nu wagnaa dey anzir nu gow yu gyit gal mod nu bzeeñ de gyitoo bel? —na dey.

<sup>3</sup> Orze' Jesuuz nam rab mi dey:

—Ze' de ru, ¿lagu rlagy der zuub yaar de riidz ni Ñgyoozh par nu gyicy yac der cushtom ni gyitoo bel nir? —nam.

<sup>4</sup> —Gun Ñgyoozh nam: "Pca lagy lo uz ru nunu pca lagy ru lo ñaar, gun yu nu nii zi ni uz o yu nu nii zi ni ñaa, yu ze' rlagy ñi nu gat yu", nam. <sup>5</sup> Tees de ru rniir nu benu tub mbecy niyy lo uz yu o nii lo ñaay nu la zi'

coz nu rlagy ñi cuic yu ni dey, nde' bi briic yu ni Ñgyoozh. Orze' walagy ñi locyuub yu uz yu nu ñaaay. <sup>6</sup> Nde' nu par nu nac de cushtom ni gyitoo bel ni der, orze' rzu chu der de riidz nu rnii Ñgyoozh. <sup>7</sup> ;A de ru mbecy rzuu lo! Tona' la nap mnii Isaías, yu nu mnii por cuen ni Ñgyoozh, ornu mniyi:

<sup>8</sup> De mbecy ii rzat dey ya nu ru' zi'l yu.

Tees nañ lardooy dey ricy zet lagy yu lo.

<sup>9</sup> Se la la cyiiñ ñi nu driib zily dey ya gun driib zily ton dey ya.

Leey nu bloo ic mbecy, nde' zi'l rlyuu dey.

Ni na Ñgyoozh lat de riidz ni Isaías —na Jesucrisht.

<sup>10</sup> Gaze' nu bredz Jesuuz de mbecy zigy nu gyatublaazh dey lom. Orze' nam rab mi dey:

—Dela der bzuub gyidag der, nunu b icy der nu gyet lag ru cuen. <sup>11</sup> Nde' nu walab coz nu chu' par ru' mbecy gyicy ñi nu gabag yu, sinu coz nu driib ru' dey, nde' gyicy ñi nu gabag yu —nam.

<sup>12</sup> Orze' de yu nu rsya' lom becha' dey lom. Orze' na dey rab yum:

—¿A wangad lagy ru nu de mbecy fariseo guzi lagy dey ornu güeñ yu de coz nu mniir? —na dey.

<sup>13</sup> Orze' na ga'm:

—Coz nu rlyuu mbecy, nde' nañ gal nu na tub ya mni. Ca zi'l na tub ya mni nu walab Ñgyoozh uzä mnuz mi, nde' rlagy ñi nu gruu luyñ. <sup>14</sup> Cue' gyicy cuen der dey, gun na dey gal na mbecy loca'. Benu tub lo ca' luyuuy nez ni losa' lo ca'y, orze' rup laa dey gyet lag yu tub zi'l gyegy —nam.

<sup>15</sup> Orze' Bed nay rab yu Jesuuz:

—Pshaal lo dë de riidz tiily nu mniir ze' —nay.

<sup>16</sup> Orze' na Jesuuz:

—¿Walab gaal ni' de ru wangyet lag der cuen? <sup>17</sup> ¿A wagad lagy ru nu de coz nu chu' par ru' mbecy yaañ par nañ yu? Orze' gruu ga'ñ nañ yu. <sup>18</sup> Tees de coz nu driib ru' mbecy, nde' druuñ gashtal nañ lardooy. Orze' de coz ze' ricy ñi nu rabag yu. <sup>19</sup> Gun nañ lardooy dey druu shcab a' nap. Ze' druu nu rut dey losa'y. Ze' druu nu ral dey losa'y nu wanchelaay. Ze' druu nu ral dey losa'y de lo la mod nu a' nap. Ze' druu nu ricy dey gubaan. Ze' druu nu rguu dey. Ze' druu nu rnii dey rishcuen. <sup>20</sup> De nde' coz nu ricy ñi nu rabag mbecy. Tees benu mbecy wanaay ornu gow yu gyit, walab nde' gyicy ñi nu gabag yu —nam.

Tub biñ mñaa nu walab biñ guledz tona' la b icy cup mi consuel lo Jesuuz

<sup>21</sup> Orze' Jesuuz bruum lugaar ze' zam par lo de yu ni gyedz Tiro nu Sidón. <sup>22</sup> Orze' bru'ña tub biñ mñaa, biñ Cananea nu pcyiiñ lugaar ze', lo Jesuuz. Orze' rbish ti num Jesuuz. Orze' nam:

—¡Jesuuz, biñ nu nac nez Dabi, gushni ñuu lagy ya! Fiñ guzh né b icy ni nuras ñi nunu tona' la rzac ñi —nam.

<sup>23</sup> Tees Jesuuz rila waniim. Orze' bru'ña de yu nu rsya' lom. Orze' na dey rab yum:

—Mnii lo biñ mñaa re nu gyam, gun yad mi rbish tim par ich na —na dey.

<sup>24</sup> Orze' na Jesuuz:

—Ñgyoozh bzuu nez mi ya nu yapä lat de mbecy Israeel, de yu nu na gal nu na shily bdune' —nam.

<sup>25</sup> Tees biñ mñaa ze' becha'm lo Jesuuz. Orze' gusib mi. Orze' nam:

—Jesuuz, blocyuub ya —nam.

<sup>26</sup> Orze' na ga' Jesuuz:

—Walab se'ñ nu loon gyishtily yaa de yu nguzh nin par nu ne'n ñi lo che' —nam.

<sup>27</sup> Orze' na biñ mñaa ze' rab mi Jesuuz:

—Laab ni gal nu mniir. Tees mas de che' gac gow ma de coz nguzh nu gyet lag lo mez ni shuaan ma —nam.

<sup>28</sup> Orze' Jesuuz nam rab mi biñ mñaa ze':

—¡Dzi ga fert ricy cup ru consuel lo! Na ya gyicya gal nu rlagy ru —nam.

Orze' laab or la ze' byac fiñ nguzh nim.

### Jesuuz b icy yac mi zañ mbecy rat

<sup>29</sup> Orze' bruu Jesuuz lugaar ze' zam dub ru' nisyudoo la ni Galilea. Orze' pcam tub logyi' zam. Orze' ze' gusub mi. <sup>30</sup> Orze' tona' la mbecy zigy byatublaazh dey lugaar ze' nu Zub mi. Gua nu dey mbecy coj, gal nu mbecy lo ca'. Gua nu dey mbecy yaa b icy, gal nu mbecy gop. Gua nu dey zañ zir lo de mbecy rat. Gua tish dey de yu ze' lom. Orze' b icy yac mi dey. <sup>31</sup> Orze' tona' la za nu ic de mbecy ornu bzaac dey nu de mbecy gop brugyi' rniiy; nu de mbecy yaa b icy byanap yaa dey; nu de mbecy coj brugyi' rza nap dey; nu de mbecy lo ca' brugyi' rzac dey. Orze' brugyi' nu driib zily dey Ñgyoozh, biñ nu driib zily de mbecy Israael.

### Jesuuz bgoow mi tap miily mbecy

<sup>32</sup> Orze' Jesuuz bredz mi de yu nu rsya' lom nu gyatublaazh dey. Orze' nam rab mi dey:

—Ya rashni lagya de mbecy zigy ii gun bi bza' chon dzi nu yu' dey lo ii, nunu blazh coz nu gow dey. Walagya zuu nezä dey gyay yu' gal ran zi'l yu, gun dzi ga suun ñi dey nez nu yay —nam.

<sup>33</sup> Orze' na de yu nu rsya' lom:

—¿Tees lac gyicy na nu gad de coz nu gow de mbecy zigy ii? Gun ii tub lugaar ze' nu sac la mbecy —na dey.

<sup>34</sup> Orze' na ga' Jesuuz rab mi dey:

—¿La be gyishtily ricy cup der? —nam.

Orze' na dey:

—Gagy gyishtily nu cyup chon bel mi' —na dey.

<sup>35</sup> Orze' Jesuuz b icy mi mandaar nu gzub dey lo yu.

<sup>36</sup> Orze' gush mi gagy gyishtily ze' nu de bel ze'. Orze' briic mi gras ni Ñgyoozh. Orze' blew mi ñii briic mi ni de yu nu rsya' lom. Orze' de yu ze' bleez dey ñi lat de mbecy zigy. <sup>37</sup> Orze' dela dey bdow gyel lay. Orze' blazh ze', pte' dey gagya la chicyiw de coz ngush nu brusub. <sup>38</sup> De yu nu bdow gyishtily ze' tap miily dey nac yu. Reñ de biñ mñaa nu de yu nguzh. <sup>39</sup> Despuees ni de nu nde', Jesuuz mnii num dey ñgyoozh. Orze' bzuu nez mi dey yay. Orze' gu'm nañ barc. Orze' zam par lo yu ni Magadán.

**De mbecy fariseo gal nu de mbecy saduceo bdiiñ dey tub nusuriidz**

**16** Orze' bru'ña ga' de mbecy fariseo nu de mbecy saduceo lo Jesuuz. Brugyi' rgugyi' dey lom par nu gyicy dey preb mi. Bdiiñ dey lom nu gyicy mi tub nusuriidz baa par nu gabe nu Ñgyoozh nac num mi.

<sup>2</sup>Tees Jesuuz nam rab mi dey:

—Or nu bi za doo, orze' rnii der: "Nap zu ina gun bi ta' za ña par ze' nu za doo", rnii der. <sup>3</sup>Nunu or za' yu rnii der: "Dzi na gyet gyey gun zu cow de ru' baa nunu ta' za ña", rnii der. ¡Mbecy rzuu lo! Rad lagy der lac yaruu de muesht nu ta' baa, tees wagad lagy der lac yaruu de muesht nu ricy nu gabe la tiem. <sup>4</sup>Par de mbecy a' nap, de yu nu wagyicy paa nu yu' tiem na, rgyiiñ dey tub nusuriidz, tees wad ñi ni dey; nomaas nusuriidz ni Jonás, yu nu mnii por cuen ni Ñgyoozh, nde' zi'l nusuriidz nu gad ni dey —nam.

Orze' Jesuuz bruum lat dey zam.

### Lebadur ni de mbecy fariseo

<sup>5</sup> Na ornu de yu nu rsya' lom bi gul dey tub la' ga' ru' nisyudoo, orze' mniim lo de yu nu rsya' lom nu cue' nii dey lo ni tub la mbecy nu nac mi Mesías, biñ nu ca lo cuen nu co mbañ mbecy.

—Bdu' cuen der nunu b icy cuidad der nu lebadur ni de mbecy fariseo nu de mbecy saduceo —nam.

<sup>7</sup> Orze' de yu nu rsya' lom brugyi' ro dey riidz nu losa'y. Gaze' nu na dey:

—¿Ti walab nu a' dun gyishtily, nde' nu ni rnii? —na dey.

<sup>8</sup> Tees Jesuuz gud lagy mi de coz nu mnii dey. Orze' nam rab mi dey:

—¿Lagu rnii der nu wangyiid nur gyishtily? ¿A nde' nu ni rnëe rzi der? ¡Dzi ga consuel mi' ricy cup der lo! <sup>9</sup>¿A gaal zi gabee waget lag der cuen? ¿A wagyeza' lagy der ni gaay gyishtily nu bleza lat gaay miily mbecy? Ze' ¿la be chicyiw pte' der? <sup>10</sup>Nunu ni' ¿a wagyeza' lagy der ni gagy gyishtily nu bleza lat tap miily mbecy? Ze' ¿la be chicyiw de nu brusub pte' der? <sup>11</sup>¿Walab gaal wangyet lag der cuen nu walab gyishtily bzata lo der ornu mnëe lo der nu b icy cuidad der nu lebadur ni de mbecy fariseo nu de mbecy saduceo? —nam.

<sup>12</sup> Orze' bet lag dey cuen nu Jesuuz walab nu bzat mi lebadur nu yu' nañ gyishtily; sinu bzat mi de riidz nu rlyuu de mbecy fariseo nu de mbecy saduceo.

**Bed mniiy nu Jesuuz nac mi Mesías biñ nu ca lo cuen nu co mbañ mbecy**

<sup>13</sup> Ornu bru'ña Jesuuz lo de yu nu yu' gaab ga Césarea ni Felipo, orze' nam rab mi de yu nu rsya' lom:

—¿Cyu rnii de mbecy nu nac ya, biñ nu byac mbecy? —nam.

<sup>14</sup> Orze' na dey:

—Yu' mbecy nu rnii nu ru Waa nu briib nis mbecy. Ze' yu' ga' dey rnii nu ru Elías. Ze' yu' ga' dey rnii nu ru Jeremías, o ca zi'l na de yu nu mnii por cuen ni Ñgyoozh, rnii dey —na dey.

**15** —Ze' de ru ¿cyu rnii der nu nac? —nam.

**16** Orze' na Bed rab yum:

—Laab ru Mesías, i'ñ Ñgyoozh mbañ, biñ nu ca lo cuen nu gzeed Ñgyoozh nu co mbañ de mbecy nim —na Bed.

**17** Orze' na Jesuuz:

—Dzi nir Simoo, i'ñ Jonás, gun ni tub la mbecy wan cuic yu nu gad lagy ru, sinu Ñgyoozh uza nu zub gyibaa briic mi nu gad lagy ru. <sup>18</sup> Ya nee lor nu ru Bed, tub mbecy nu na gal nu na tub gyita'. Nunu dela mbecy nu nac nu gyita' ze' nac dey mbecy ne. Nunu de yu ze' mas gat dey tees wanit loy. <sup>19</sup> Nunu ya ricq rishbeey nir par nu shaal ru nez nu chu' mbecy lat de yu nu riib ic Ñgyoozh. La zi'l mod nu ricy mbecy, benu ru niir nu walab ni rlagy ñi gyishlombecy ii, orze' ni' zi'l gashtal gyibaa walab ni rlagy ñi nii Ñgyoozh. Nunu la zi'l coz nu ru niir nu laab ni gyishlombecy ii, orze' ni' zi'l laab ni iii Ñgyoozh gashtal gyibaa —nam.

<sup>20</sup> Orze' Jesuuz mniim lo de yu nu rsya' lom nu cue' nii dey lo ni tub la mbecy nu nac mi Mesías, biñ nu ca lo cuen nu co mbañ mbecy.

### Jesuuz mniim lo de yu nu rsya' lom nu gat mi

<sup>21</sup> Nese tiem ze' Jesuuz brugyi' rnii lo de yu nu rsya' lom nu rlagy ñi nu gyam Jerusaleeng. Nunu mniim nu de yu bel ni de mbecy Israeel, nu de uz zub lo, nu de yu nu rlyuu leey ni Moisees, de yu ze' gyicy dey nu tona' la gzac zim. Orze' mniim nu cut dey mi tees nañ chon dzi gyabañ mi. <sup>22</sup> Orze' Bed gua nu reñ yu Jesuuz. Gaze' nu fert mniiy tub riidz lom. Orze' nay rab yum:

—¡Shuaan de, cue' zaan yaa Ñgyoozh nu rila cue' ni zac ru! —nay.

<sup>23</sup> Orze' Jesuuz bish cyam mniim loy. Orze' nam:

—¡Bruu chu lo ii nuras! Ricy ru nu yabiig yir coz nu rlagy ñi gyicya, gun shcab nir wasaap ñi shcab ni Ñgyoozh; sinu shcab nir nde' shcab nu ricy cup mbecy zi'l —nam.

<sup>24</sup> Orze' Jesuuz nam rab mi de yu nu rsya' lom:

—Benu ca na mbecy rlag yu nu gac yu mbecy nu rsya' lo, orze' rlag yu nu cue' gyicy cuen yu coz nu rlag yu. Nunu rlag yu nu shet ic yu nu gzac ziy nu nac ya. Orze' rlag yu gyicy yu gal nu rlagya. <sup>25</sup> Gun yu nu rlag co nap ub, yu ze' nit loy. Tees yu nu nit lo nu nac ya, yu ze' rishli gruu mbañ yu. <sup>26</sup> Gun ¿la rusub ni mbecy benu gyicy yu gan dela coz nu yu' gyishlombecy, tees lardooy dune'ñ? ¿Nunu la coz gac cyish mbecy nu gyad lardooy? <sup>27</sup> Gun ya biñ nu byac mbecy sñuu ga yapa nu gyel lily ni Ñgyoozh uza nu de anc nim. Orze' gaze' nu ya gyabica i tub ga la de mbecy dub gal nu na coz nu b icy dey. <sup>28</sup> Gun ya rish li rnëe lo der nu la be de mbecy nu yu' lat der ii na la, wat dey gashtal zac la dey ya, biñ nu byac mbecy nu yapa mod ni tub rey —nam.

### Bdza nu na Jesuuz

**17** Ornu bded tub shuup dzi, orze' Jesuuz gua nu reñ mi Bed nu Santiag nu Waa, b icy yu. Orze' gup mi too tub b icy nu dzi gya nu de yu ze'. <sup>2</sup> Orze'

bdza nu na Jesuuz lo rgüii la dey. Orze' gal nu na doo güidz ni na lom byac. Ze' shab mi byacaacy ryal lañ.  
<sup>3</sup> Orze' sij la bruu zac Elías nu Moisees, lo rgüii la de yu nu rsya' lom, nu ro dey riidz nu Jesuuz. <sup>4</sup> Orze' Bed nay rab yu Jesuuz:

—Shuaan dę, j̄dzi ga nap nu yu' dę ii! Benu rlagu ru, orze' zaą dę chon ramad ni der: tub par ru, tuuba' par Moisees, tuuba' par Elías —nay.

<sup>5</sup> Orze' lat nu gabee rnii Bed, orze' bruu zac tub za ryal too dey. Orze' psoow ñi dey. Orze' zaab ti' mbecy lat za ze'. Orze' nam:

—Mi ii i'ñq̄ nu tona' la rca, nunu tona' la yet lagya. Bzuub gyidag der nim —nam.

<sup>6</sup> Na ornu güeñ de yu nu rsya' lom de riidz ze', orze' gugiyit tiily la dey lo yu. Nunu tona' la gudzib dey.

<sup>7</sup> Orze' becha' Jesuuz lo dey nunu gul yaam dey. Orze' nam rab mi dey:

—Wes su der. Cue' dzib der —nam.

<sup>8</sup> Na ornu bri' lo dey, orze' wansaca' dey cyu' zir mbecy. Se Jesuuz zi'l bzaac dey.

<sup>9</sup> Gaze' nu gush nez num dey bet mi par gyi' b icy ze'. Na lat nu ya num dey, orze' pcach mi ru' dey. Orze' nam rab mi dey:

—Cue' nii der lo ni tub la mbecy de coz nu bruu zac lo der gashtal shuub la dzi nu ya, biñ nu byac mbecy, gata nunu gyabaña tuuba' tir —nam.

<sup>10</sup> Orze' de yu nu rsya' lom ze' na dey rab yum:

—Lagu de yu nu rlyuu leey ni Ngoozh rniy nu Elías rlagu ñi nu cyid yu loga la? Gaze' nu cyid Mesías, biñ nu ca lo cuen nu co mbañ mbecy —na dey.

<sup>11</sup> Orze' na Jesuuz rab mi dey:

—Rishli gaal nu Elías cyid yu loga la par nu gzu nap yu de la coz. <sup>12</sup> Tees ya neę lo der nu Elías bi biid yu, nunu de mbecy wangyu' lo dey yu, tees b icy nu dey yu dela coz a' nap nu mnii too dey nu gyicy nuy yu. Ni' zi'l mod ted zi dey ya, biñ nu byac mbecy —nam.

<sup>13</sup> Orze' de yu nu rsya' lom bet lag dey cuen nu Waa nu briib nis mbecy rzat mi lo dey.

### Jesuuz b icy yac mi tub yu nguzh nu b icy ni nuras

<sup>14</sup> Na ornu bru'ñam ze' nu byatublaazh de mbecy, orze' tub mbecy bru'ñay lo Jesuuz. Gusu tib yu lom. Orze' nay rab yum:

<sup>15</sup> —Jesuuz, gushni ñuu lagy i'ñq̄ gun ricy ñi bi rat ca' niy. Nunu tona' la rzac yu. Bi guzañ tir yet lag yu lo gyi nu lo nis. <sup>16</sup> Bi gua du yu lo de yu nu rsya' lor, tees wangac gyicy yac dey yu —nay.

<sup>17</sup> Orze' na Jesuuz:

—A der mbecy nu yu' na! Dzi ga wagyicy cup der consuel lo. Dzi ga mnu shcab ni der. La' zir be tiem rlagu ñi nu chesa du der? Da nu der yu nguzh rat ze' lo —nam.

<sup>18</sup> Orze' Jesuuz b icy mi mandaar lo nuras ze' nu cue' ni gyicy yu. Orze' bruu chuy lo yu nguzh rat ze'. Orze' laab or la ze' byac yu nguzh ze'.

<sup>19</sup> Na ornu bded nde', orze' de yu nu rsya' lom mnii nu reñ dey mi. Orze' na dey:

—Lagu wangac loo chy dę nuras ze'? —na dey.

<sup>20</sup> Orze' nam rab mi dey:

—Nde' par nu dzi ñuu mi' consuel ricy cup der lo. Gun rishli rneę lo der benu ricy cup der mas ñuu miiñ consuel, mas ñuu gal nu na mbigy urnishtas, orze' gac nii der lo tub b icy nu gruu chuñ nu chañ tuuba' lugaar nunu gac ñii gal nu nii der. Gun ni tub coz warusuñ nu wac ñi benu ricy cup der consuel lo. <sup>21</sup> Tees de nuras nu ni na, yu ze' waruu chuy benu i zi'l, sinu rlagu ñi nu cyiñ der lo Ngoozh, nunu ca der ni ub ru nu cue' gow ru gyit lat nu rzu bich der nu nac mi.

### Jesuuz rnii ga'm tuuba' tir nu cut mbecy mi

<sup>22</sup> Lat nu gabee rded mi tublaazh num de yu nu rsya' lom lo de yu ni Galilea, orze' Jesuuz nam rab mi dey:

—Ya, biñ nu byac mbecy, gu' dey ya yaa de' zir mbecy. <sup>23</sup> Orze' cut dey ya. Tees dzi chon gyabaña —nam.

Orze' de yu nu rsya' lom, ornu güeñ dey nde', tona' la b icy shni dey.

### Jesuuz cyish mi tiñ nu rboo mbecy cuen ni yu' nu driib zily mbecy Ngoozh

<sup>24</sup> Na ornu Jesuuz nu de yu nu rsya' lom bri dey Capernaum, orze' de yu nu rboo tiñ por cuen ni yu' nu driib zily dey Ngoozh bru'ña dey lo Bed. Orze' na dey rab yuy:

—Ze' masht nir, ja cuic yu tiñ nu dric den par cuen ni yu' nu riib zily den Ngoozh? —nay.

<sup>25</sup> Orze' na Bed:

—Cuic mi ñii —nay.

Ornu Bed gu'y nañ yu, orze' Jesuuz mniim loga la. Orze' nam:

—La' ñuu shcab rash ru Simoo? Ca na de mbecy cyish yu tiñ ni de rey gyishlombecy ii? A de yu guledz cyish yu, uti de mbecy yad? —nam.

<sup>26</sup> Orze' na ga' Bed:

—Laab de mbecy yad —nay.

Orze' na Jesuuz:

—Orze' de mbecy guledz, ja walagy ñi nu cyish dey beni? <sup>27</sup> Par nu cue' gyicy na nu gazi lagy ni tub la mbecy, orze' gua ru' nisyudoo. Shet lag ru duu gyedz nir nu rub bel. Orze' bel loga la nu gad nir, orze' güiir ru' ma. Ze' ri tub tiñ nu gal ñii nu griib ru lo rup laa den. Orze' cha nur ñii cuic ru ni dey —nam.

### Cyu gac mbecy nu gya zir zu

<sup>18</sup> Laab tiem ze' bru'ña de yu nu rsya' lom. Orze' na dey:

—Cyu nu gya zir zu lat de yu nu riib ic Ngoozh? —na dey.

<sup>2</sup> Orze' Jesuuz bredz mi tub yu nguzh mi' nu chay lom. Orze' bzum yu lat dey. <sup>3</sup> Orze' nam rab mi dey:

—Ya rishli rneę lo der, benu wachaa der mod nu ricy ru, nunu benu wash der mod nu na gal nu na yu nguzh ii, orze' wac chu' der lat de yu nu riib ic Ngoozh. <sup>4</sup> Mbecy nu gya zir zu lat de yu nu riib ic Ngoozh, yu ze' yu nu gyicy gyel gyidz ni. Nunu yu ze' yu nu gyac gal nu na yu nguzh mi' ii. <sup>5</sup> Ca zi'l na mbecy nu

shet ic yu nu gac nuy tub yu nguzh mi' gal nu na yu ii, orze' ni' pshet ic yu nu gac nuy ya —nam.

### Cue' lyuu mbecy ni losa'y nu gyicy yu cyi

<sup>6</sup> Orze' na ga' Jesuuz:

—Cyu zi'l mbecy nu gyicy nu gnu tub mbecy shni nu ricy cup consuel lo, nap zir nu cyiig dey tub gyita' gyech ily nu rdugu yeñ yu. Gaze' nu shet lag dey yu lo nisyudoo par nu gat yu. <sup>7</sup> ;Dzi ga cuaa de mbecy gyishlombecy ii nu ricy dey nu rnu losa'y! Gun segur la yu' coz nu ricy ñi nu ricy mbecy cyi, tees ;cuua mbecy nu rlyuu coz cyi lo losa'!

<sup>8</sup> 'Nde' nu benu tub yaar o tub gyi'r gyicy ñi nu gyicy ru cyi, orze' nap zir nu cyug ru ñii nunu ne'r ñii gun nap zir nu gzur nu tu'nc tub yaar o nu tu'nc tub gyi'r, gaze' nu shet lag Ñgyoozh dutuub la cuerp nir lo gyi nu rila wayu. <sup>9</sup> Nunu benu tub ursor gyicy ñi nu gyicy ru cyi, orze' cor ñii, nunu ne'r ñii, gun nap zir nu gzur nu tub zi ursor gaze' nu gyet lag ru lo gyi ni gabily nu rup laa ursor —nam.

### Riidz tiily ni shily nu bdune'

<sup>10</sup> Orze' na ga'm:

—Orze' cue' güii naañ der lo de mbecy nu na gal nu na de yu nguzh mi' ii. Gun gyibaa zaab zu la de anc ni dey lo Ñgyoozh, uz na, biñ nu zub gyibaa. <sup>11</sup> Gun ya biñ nu byac mbecy, yapa nu loo mbaña de mbecy bdune'.

<sup>12</sup> '¿Lac ñuu rzii der? Ze' benu tub mbecy zu tub gaynal shily niy, orze' dune' tub ma niy, ;a walab nu zeeñ yu nobent zub gaa ma logyi', orze' cha yub yu tub bañ nu bdune' ze'? <sup>13</sup> Gun ya rishli rnëe lo der, benu gyicy yu gan nu gyad ma niy, orze' gyet zir lagy yu nu nac tub ma ze', gaze' nu nac nobent zub gaa bañ nu wantune' ze'. <sup>14</sup> Ni' zi'l mod ricy Ñgyoozh, uz den, biñ nu zub gyibaa. Walagy mi nu dune' ni tub mbecy nu na gal nu na de yu nguzh mi' ii —nam.

### Rlagy ñi gyicy sulagy na ni losa'n

<sup>15</sup> Orze' na ga'm:

—Ze' benu ca na tub losa'r shiñ ricy nuy ru, orze' gua ub zi'l ru loy. Ornu ub ziy, orze' nir loy la na falt niy. Ze' benu zuub gyidag yu nir, orze' b icy ru gan bzu nap ruy.

<sup>16</sup> Ze' benu wazuub gyidag yu nir, orze' cuedz ru sa tub o sa cyup losa'r nu cha nur loy. Gun orze' gac cyup o chon teshtig nu gyeñ dey de coz nu gniir. <sup>17</sup> Tees benu wazuub gyidag yu ni de yu ze', orze' gua niir lo de mbecy ni Ñgyoozh ornu yu' tublaazh dey. Orze' benu wangyeñ yu ni dela mbecy ze', orze' gyicy der yu par tub mbecy nu walab mbecy ni Ñgyoozh, o par tub mbecy nu rte' tiñ por cuen ni gubier Rom.

<sup>18</sup> Ya rishli rnëe lo der: lac zi'l mod nu ricy mbecy, be-nu de ru niir gashtal gyishlombecy ii nu walab ni rlagy ñi, orze' ni' zi'l gashtal gyibaa walab ni rlagy ñi nii Ñgyoozh. Nunu la zi'l coz nu de ru niir gashtal gyishlombecy ii nu laab ni, orze' ni' zi' laab ni nii Ñgyoozh gashtal gyibaa.

<sup>19</sup> 'Nunu neë ga' lo der: benu cyup der tub zi'l riidz nu gniir ornu cyiñ der lo Ñgyoozh, uz der, biñ nu zub gyibaa, orze' gyicy mi gal nu rlagy der. <sup>20</sup> Gun ca zi'l ze' nu gyatublaazh cyup der o chon ru nu nac ya, ze' zü lat der —nam.

<sup>21</sup> Orze' bru'ña Bed lo Jesuuz. Orze' nay rab yum:

—Shuaan de, ;la be tir rlagy ñi nu gyicy sulagy ñi losa' ornu shiñ gyicy nuy ya? ;A mas ñuu gagy tir? —nay.

<sup>22</sup> Orze' na Jesuuz rab mi Bed:

—Walab nu rnëe nu gagy zi'l tir gyicy sulagy ru ni losa'r, sinu gashtal gagy tir nu setent gyicy sulagy ru ni losa'r —nam—.

### Riidz tiily ni tub moz nu wagyicy sulagy

<sup>23</sup> 'Nde' nu mod nu rac nu gyel gubier ni Ñgyoozh, nde' nañ gal nu na mod nu rac nu tub rey. Rey ze' ngulagy yu nza' loy ni de coz nu ca lo cuen ni de moz niy.

<sup>24</sup> Saa la brugyi'y nu rza' loy nu de moz niy ornu bru'ña nu dey tub yu nu zaab bee miyoq la niy. <sup>25</sup> Orze' como moz ze' sac la tiñ niy par nu gyabic yu ni rey ze', orze' rey ze' mniiy nu sa'y moz ze' nu mñaay nu de yu nguzh niy nu dela suuy par nu gad tiñ nu cyish yu dela di'ñ yu. <sup>26</sup> Orze' moz ze' gusu tib yu lo rey ze'. Orze' nay rab yuy: "Cuaa ya, b icy cup ñuu pasez ne. Ya grish gulya dela nde' nir", nay. <sup>27</sup> Orze' rey ze' gushni lagy yuy. Orze' b icy sulagy yu ni moz ze' ni dela di'ñ yu. Orze' blaay yu.

<sup>28</sup> 'Na ornu moz ze' bruuy ro' rey ze' yay, orze' bdzeel yu losa' moz yu, tub yu nu zaab ñuu mi' tiñ niy. Orze' bdu' yaay ngüez yu. Orze' brugyi' rsliy yeñ yu. Orze' nay rab yuy: "Gyabic ru tiñ nu zaab ru ze' ne", nay.

<sup>29</sup> Orze' losa' moz yu ze' gusu tib yu loy. Orze' nay: "Bicy cup ñuu pasez ne. Gaze' gyabica delañ nir", nay.

<sup>30</sup> Tees yu ze' wangalagy yu gyicy cup yu pasez ni losa'y, sinu mniiy nu cha yu ze' nañ yu' gyiib gashtal cuua lay dela nu zaab yu niy. <sup>31</sup> Na ornu bzaac de' zir moz de coz nu guc, orze' ton'a' la deet guc nañ lardoor dey. Orze' gua too dey rishlo rey dela coz nu guc.

<sup>32</sup> Orze' rey ze' bredz yu moz ze' nu chay loy. Orze' nay rab yuy: "¡Ru mbecy a' nap! Ya b icy sulagy ñir ni dela di'ñ ru gun mnishbaar lo. <sup>33</sup> Orze' ni' ru rlagy ñi nu ñgyashni lagy ru losa'r gal nu ya gushni lagya ru", nay.

<sup>34</sup> Orze' ton'a' la guzi lagy rey ze'. Orze' bzeed yu moz ze' lo cashtig gashtal cuua lay dela di'ñ yu —na Jesuuz.

<sup>35</sup> Orze' na ga'm:

—Ni' zi'l gyicy Ñgyoozh, uza, biñ nu zub gyibaa, nu de ru benu wayicy sulagy der ni losa'r nañ lardoor —nam.

### ¿A gac zaan losa' mbecy?

<sup>19</sup> Ornu blazh mnii Jesuuz de riidz ze', orze' bruum lo de yu ni Galilea zam par lo de yu ni Judea nu ri tub la' ga' dzu gyoow Jordaan. <sup>2</sup> Orze' ton'a' la mbecy zigy gua ca dey ich mi. Orze' ze' b icy yac mi zañ mbecy rat.

<sup>3</sup> Orze' bru'ña la be de mbecy fariseo par nu gyicy dey preb mi. Gaze' nu na dey rab yum:

—¿A nap zuñ par lo leey ni Moisees nu gac zaan mbecy mñaay nu nac la zi'l gyi'? —na dey.

<sup>4</sup> Orze' na Jesuuz rab mi dey:

—¿Walab gaal nigul sya' der de riidz ni Ñgyoozh, ze' nu rniiñ nu nese nu bzub gyi' gyishlombecy Ñgyoozh psa' lagy mi tub yu gyeey nu tub biñ mñaas? <sup>5</sup> Ni' zi'l rniiñ nu de yu gyeey zeeñ dey uz yu nu ñaay par nu gyatublaazh yu nu mñaay. Orze' lo cyup dey gyac yu se tub zi mbecy, rniiñ. <sup>6</sup> Nde' nu walaba' cyup dey nac yu sinu se tub ziy. Nde' nu ni tub la mbecy wac gyicy yu nu gla' losa' cyup mbecy, benu bi nac dey mbecy nu bi b icy tublaazh Ñgyoozh —nam.

<sup>7</sup> Orze' na de mbecy fariseo ze' rab yum:

—Benu ni, ¿lagu mnii Moisees nu co mbecy gyicy rishbeey nu gzaan dey mñaay, orze' gzu nez yum gyam? —na dey.

<sup>8</sup> Orze' na Jesuuz rab mi dey:

—Laab par nu dzi zed lo der, nde' nu Moisees briic yu rishbeey nu zaan der mñaar. Tees nese nu bzub gyi' gyishlombecy walab ni mod rlagy ñi. <sup>9</sup> Ya' rnęe lo der nu cyu zi'l mbecy nu coy gyicy nu zaan yu mñaay, benu walab nu nac nu shiñ b icy mi nu reña' yu gyeey, orze' chelaay tuuba' biñ mñaas, orze' yu ze' ricy yu cyi nu wangyicy paay nu mñaay. (Nunu cyu zi'l mbecy nu gash tub biñ mñaas nu bzaan ñgyee, orze' yu ze' ni' zi'l ricy yu cyi par lo Ñgyoozh nu gul yu mñaas losa'y) —nam.

<sup>10</sup> Orze' de yu nu rsya' lom nay rab yum:

—Benu ni rac nu tub yu gyeey nu mñaay, orze' nap zir nu cue' chelaan —na dey.

<sup>11</sup> Orze' na Jesuuz rab mi dey:

—Par walab dela mbecy gac gyicy yac yu de riidz nu mnii der ze', tees de yu nu locyuub Ñgyoozh zi'l nu gac gzu laay ub ziy. <sup>12</sup> Gun zañ coz gyicy ñi nu wacyiiñ mbecy nu chelaay. Gun yu' mbecy nil nese nu gul laay wacyiiñ yu nu chelaay. Ze' yu' ga' dey, mbecy b icy yu nu wacyiiñ yu nu chelaay. Ze' yu' ga' mbecy ricy yu nu wacyiiñ yu nu chelaay nu nac gyel gubier ni Ñgyoozh. Benu ca na mbecy gac gyicy yu nu cue' chelaay, orze' gac gyicy yuñ —nam.

Jesuuz bdiiñ mi lo Ñgyoozh ni de yu nguzh mi'

<sup>13</sup> Orze' la be mbecy bru'ña nu dey de yu nguzh lo Jesuuz par nu gal yaam dey nunu cyiñ mi lo Ñgyoozh ni dey. Orze' de yu nu rsya' lom bdza' dey ni de mbecy nu bru'ña nu de yu nguzh ze'. <sup>14</sup> Orze' na Jesuuz rab mi dey:

—Bzaan der gyecha' de yu nguzh lo. Cue' niir lo dey nu ruu chuy. Gun lugaar ze' nu riib ic Ñgyoozh, nde' lugaar nu yu' mbecy nu na gal nu na de yu nguzh ii —nam.

<sup>15</sup> Orze' gul yaam de yu nguzh ze'. Orze' bruum lugaar ze' zam.

### Tub mbecy guani'ñ guay lo Jesuuz

<sup>16</sup> Tub tir gua tub yu feñ lo Jesuuz. Orze' nay rab yum: —Masht nap, ¿la ñuu coz nap rlagy ñi nu gyicya par nu cui mbaña tub la? —nay.

<sup>17</sup> Orze' na Jesuuz rab mi yu:

—¿Lagu rnii ga' ru nu nap ya? Se cyu' zir nu nap sinu tub zi la Ñgyoozh. Benu rlagy ru gad gyel mbañ nir, orze' rlagy ñi gyicy yac ru nu de riidz nu rnii Ñgyoozh lo de mbecy nu gyicy yac dey —nam.

<sup>18</sup> Orze' na yu feñ ze':

—¿Ca na de riidz nu rzat ru ze'? —nay.  
Orze' na Jesuuz:

—Cue' cut ru losa'r. Cue' gal ru mbecy nu wanchelaar. Cue' gyicy ru gubaan. Cue' riib ru gyidza too losa'r. <sup>19</sup> Pca lagy lo uz ru nunu pca lagy lo ñaar, nunu pca losa'r gal nu rcar ub ru —nam.

<sup>20</sup> Orze' na yu feñ ze':

—Dela nde' bi b icy yacä ñii. ¿La' zir coz rlagy ñi nu gyicya? —nay.

<sup>21</sup> Orze' na Jesuuz rab mi yu:

—Benu rlagy ru gac ru mbecy nu zu gal mod nu rlagy Ñgyoozh, orze' yaa cut ru dela coz nu yu' nir. Gaze' nu tiñ ze' cuic ru ni de mbecy zi. Orze' gyibaa gyad gyel nap nir. Nunu cyid ru nu cyid car ichä —nam.

<sup>22</sup> Na ornu güeñ yu feñ ze' de riidz ze', orze' tona' la b icy shniy. Orze' yay. Gun tona' la yu' gyel nap niy.

<sup>23</sup> Orze' Jesuuz nam rab mi de yu nu rsya' lom:

—Ya rishli rnęe lo der nu tona' la biigy nu chu' tub guani'ñ lat de mbecy nu riib ic Ñgyoozh. <sup>24</sup> Nunu nee ga' lo der nu a' biigy zir nu ded tub camey gyeegy gyi' tub gysishtiib gaze' par nu chu' tub mbecy guani'ñ lat de mbecy nu riib ic Ñgyoozh —nam.

<sup>25</sup> Na ornu güeñ de yu nu rsya' lom nde', orze' tona' la za nu ic dey. Orze' brugyi' rnii dey:

—Ze' benu ni, ¿cyu gac gruu mbañ? —na dey.

<sup>26</sup> Orze' Jesuuz bgüiim lo dey. Orze' nam rab mi dey:

—Par de mbecy, rila wac gyicy dey nde'. Tees Ñgyoozh gac gyicy mi dela coz —nam.

<sup>27</sup> Orze' na Bed rab yum:

—Ze' dę yä bzeeñ dę dela coz nu yu' nę dę nunu yap cä dę ich ru. Orze' ¿la ñuu coz gad nę dę? —nay.

<sup>28</sup> Orze' Jesuuz nam rab mi dey:

—Ya rishli rnęe lo der, ornu shuub tiem nu bi zu nap dela coz, ornu yä biñ nu byac mbecy, chesubä nu gyub içä ze' nu yu' gyel lily nę, orze' de ru mbecy nu yad ca ichä ni' chesub der lo trocyup yashily par nu gri bee der ni de trocyup nac nez mbecy Israeel. <sup>29</sup> Nunu dela de mbecy nu bzeeñ coz ni nu nac yä, de yu nu bzeeñ yu', de yu nu bzeeñ b icy, de yu nu bzeeñ zan, de yu nu bzeeñ uz, de yu nu bzeeñ ñaa, de yu nu bzeeñ iñ, de yu nu bzeeñ yu ni, de yu ze' tub gaynal tant nu sheñ zir gyad niy nunu gad nu cui mbañ yu lo Ñgyoozh tub la. <sup>30</sup> Tees zigy de mbecy nu gya zir zu na, de yu ze' gyac yu yu nu gash zir zu par lo. Ze' zigy de mbecy nu gash zu na, de yu ze' gyac dey mbecy nu gya zir zu par lo —nam.

## Riidz tiily ni mbecy ricy riiñ

20 Orze' na ga' Jesuuz:

—Mod nu rac nu gyel gubier ni Ñgyoozh, nde' nañ gal nu na mod nu guc nu tub mbecy nu b icy cup tub nac lyucy urbyay. Tub or napor bruuy yu'y guay gua yub yu moz nu gyicy yu riiñ lat lyucy urbyay niy. <sup>2</sup> Orze' bza' lo nuy dey nu cyish yu tub tiñ plat ni dey tub dzi ga. Orze' bzeed yu dey zay gyicy yu riiñ lat lyucy urbyay niy. <sup>3</sup> Na tub g yiib gaa or napor bruuy guay lat yagyi' tuuba' tir. Orze' bzaac yu la be mbecy nu zu nat yu. <sup>4</sup> Orze' nay rab yu de mbecy ze': "Ni' de ru gua der gyicy ru riiñ lat lyucy urbyay ne, nunu grishä' ni der ca na nu yad ñi", nay. Orze' de yu ze' gua dey. <sup>5</sup> Na tub or wi doo ni' zi'l b icy yu. Na tub g yiib chon or gudze, ni' zi'l b icy yu. <sup>6</sup> Na ornu sñuu ga gyap or g yiib gaay, orze' bish cya ga'y lat yagyi'. Orze' byapa'y tub naca' moz yu' nat yu. Orze' nay rab yu dey: "Ze' ñagu ni yu' der ii? ¿Gua la dzi wangyicy der riiñ?" nay. <sup>7</sup> Orze' na de moz ze': "Nde' gun ni tub la mbecy wancuic yu riiñ nu gyicy de", na dey. Orze' na ga'y rab yu dey: "Ni' de ru gua der gyicy ru riiñ lat lyucy urbyay ne", nay.

<sup>8</sup> Na or becheñ, orze' na yu nu guni lyucy urbyay ze' rab yu yu nu riib ic de moz: "Bredz de moz nu gy-atublaazh dey. Orze' gyabic ru i dey. Nu loga la gyabic ru i de yu nu gu' lo riiñ or gudze. Orze' gaze' nu gyabic ru i de yu nu gu' lo riiñ nese or napor", nay. <sup>9</sup> Orze' brugyi' rgyish yu ni de yu nu gu' lo riiñ g yiib gaay or gudze nu tub ga tiñ plat. <sup>10</sup> Na ornu bdugyi de yu nu gu' lo riiñ or napor nu gyash niy, orze' mnii too dey nu sheñ zir gyad niy. Tees ni' zi'l byabic yu ni dey tub ga zi'l tiñ plat. <sup>11</sup> Na ornu byad i dey, orze' brugyi' rnid ru' dey nu rzat zi dey yu nu guni lyucy urbyay ze'. <sup>12</sup> Orze' na dey rab yu yu nu guni lyucy urbyay ze': "De yu nu bru'ña or gudze se tub or zi b icy yu riiñ. Ze' de y a gua la dzi gugye de lo riiñ, nunu gua la dzi ta' de lo ba", na dey. <sup>13</sup> Tees yu nu guni lyucy urbyay ze' nay rab yu tub de yu ze': "A cue, par y a walab nu b icy ras du ru. ¿A walab nu bza' lo du ru nu grishä' tub tiñ plat nir par tub dzi?" nay. <sup>14</sup> "Nap zir O la mnii. Yaa la, yaa nu ca na la nu bi guud nir, gun y a rlagya rishä' ni yu nu bru'ña or gudze ni' zi'l gal nu brishä' ni ru. <sup>15</sup> ¿A walab se'ñ be-nu y a gyicya ca na la nu yad icä nu tiñ ne? ¿O ti rasaap lagy ru nu y a naçä mbecy nap lagy?" nay.

<sup>16</sup> Nde' nu de mbecy nu gash zu na, de yu ze' gyac yu mbecy nu gya zir zu. Ze' de mbecy nu gya zu na, de yu ze' gyac yu mbecy nu gash zir zu —nam.

## Mnii ga' Jesuuz nu cut mbecy mi

<sup>17</sup> Orze' lat nu rca Jesuuz zam par Jerusaleeng, za nu reñ mi de trocyup yu nu rsya' lom. Orze' nam rab mi dey:

<sup>18</sup> —Gal nu de ru rzac ru, rcan zan par Jerusaleeng. Orze' gu' dey y a, biñ nu byac mbecy, yaa de uz Zub lo gal nu yaa de yu nu rlyuu leey nu bzeeñ Moisees. Orze' nii dey nu rlagya ñi nu gata nu yu' falt ne. <sup>19</sup> Gaze' nu

gu' dey y a yaa de mbecy yad par nu gubdzaa dey y a, nunu gaaz dey y a nu cuart nunu caa dey y a lo cruz. Tees dzi chor gyabaña —nam.

## Santiag nu Waa bdiiñ dey tub faboor lo Jesuuz

20 Orze' bru'ña ñaa de i'ñ Zebedeo lom. Bru'ña num de i'ñ mi. Orze' gusub tib mi lo Jesuuz par nu bdiiñ mi tub faboor lom. <sup>21</sup> Orze' na Jesuuz rab mi biñ mñaa ze':

—¿La coz rlagya ru? —nam.

Orze' na biñ mñaa ze':

—Y a rlagya nu ornu bi riib ic ru, orze' gyicy ru mandaar nu tub i'ñä gzub ñi par yaa beer, Ze' tuuba'ñ gzub ñi par yaa reg ru —nam.

22 Orze' na Jesuuz:

—De ru wagad lagy der la coz rgyiiñ ru lo. ¿A gagye de ru nu gzuub ru'r taz nu gzuub dey ru? —nam.

Orze' na dey:

—Gac gagye de —na dey.

23 Orze' na ga'm rab mi dey:

—Rishli gaal taz nu zuub dey ru' y a, laaba' nde' zuub dey ru' de ru. Tees par nu gzub der par yaa be e o par yaa rega, nde' walab cuen ne y a nu gyicya ñii du der; sinu de lugaar ze', nde' par de yu nu bi pcui Ñgyoozh, uz den —nam.

24 Na ornu güeñ se tii ga' de yu nu rsya' lom ze', orze' bdza' dey ni cyup de yu ze' nuy b icy yu. <sup>25</sup> Orze' Jesuuz bredz mi dey. Orze' nam:

—De ru rad lagy der nu de mbecy nu ricy gyel gubier ni reña' lugaar, dzi ricy dey gyel lily niy nu de mbecy shni. De mbecy Zub lo zaab ricy lay mandaar dey.

<sup>26</sup> Tees lat de ru walab ni mod rlagya ñi. Ze' benu ca na tub mbecy nu ri lat der rlagya yu nu gac yu tub yu lily, orze' rlagya ñi nu gyicy yu coz nu rlagya de' zir losa'y.

<sup>27</sup> Nunu benu ca na tub yu nu ri lat der rlagya yu gac yu mbecy Zub lo, orze' rlagya ñi nu gyicy yu de coz nu galaga ñi ni de' zir losa'y. <sup>28</sup> Nde' nu ni' zi'l mod y a, biñ nu byac mbecy, a' yap a nu gyicy mbecy coz nu rlagya, sinu par nu gyicya coz nu rlagya mbecy nunu par nu gata, gun grishä' nu gruu zigy mbecy lo cashtig —nam.

## Jesuuz b icy yac mi cyup mbecy lo ca'

<sup>29</sup> Na ornu bruum gyedz Jericó, orze' tona' la zigy mbecy za ca dey ich mi. <sup>30</sup> Na zu cyup mbecy lo ca' gusub dey cuit nez nu zam. Ornu güeñ dey nu yad mi, orze' brugyi' rbish ti dey. Orze' na dey:

—¡Jesuuz nez Dabi, gushni ñuu lagy de y a! —na dey.

<sup>31</sup> Orze' de mbecy zigy bdza' dey niy, nunu mnii dey nu cue' cush ti dey. Tees de yu ze' rbish ti ga' zir dey.

Orze' na dey:

—¡Jesuuz nez Dabi, gushni ñuu lagy de y a! —na dey.

<sup>32</sup> Gaze' nu gusu Jesuuz. Orze' bredz mi de lo ca' ze'. Orze' nam rab mi dey:

—¿La coz rlagya der nu gyicya du de ru? —nam.

<sup>33</sup> Orze' na dey:

—De y a rlagya de nu gyanap urlo de —na dey.

<sup>34</sup> Orze' Jesuuz gushni lagy mi dey. Orze' gul yaam urlo dey. Orze' laab or la ze' byanap urlo dey. Orze' za ca dey ich mi.

### Jesuuz gu'm Jerusaleeng

**21** Ornu bru'ña dey gyi' b icy ni ya Oliva gaab ga Betfagé, tub gyedz nu ri gaab ga Jerusaleeng, orze' Jesuuz bzuu nez mi cyup de yu nu rsya' lom nu cha ga dey lom. <sup>2</sup> Gaze' nu nam rab mi dey:

—Gua der gyedz nu ri gal du re. Orze' re gyap der tub bur gus ca cuñ ma nu tub bur mi' ni ma. Orze' shaagy der ma cyid nur de ma lo ii. <sup>3</sup> Benu ca na mbecy niyy lo der nu lagu, orze' nii der: "Shuaan na cyiñ ma nim. Gaze' nu lueg la tush cya ga'm ma", nii der —nam.

<sup>4</sup> Ni guuc ñi par nu byu' niñ gal nu pcaa tub yu nu mnii por cuen ni Ñgyoozh ornu pcaa:

<sup>5</sup> Mnii der lo de mbecy gyedz Sión, orze' nii der: "Güii, yad rey ni der lor. Nac mi tub mbecy shni. Riib mi tub bur mi', tub bañ nu nac i'ñ tub bur yuu."

Ni pcaa tub yu nu mnii por cuen ni Ñgyoozh.

<sup>6</sup> Orze' de yu nu rsya' lom gua dey b icy yu gal nu mniim. <sup>7</sup> Orze' gua nu dey bur gus ze' nu bur mi' ni ma lom. Orze' briib dey shab yu ich bur mi' ze'. Orze' gutib Jesuuz ma. <sup>8</sup> Nunu tona' la mbecy zigy yu' ze'. Yu' dey pcuaay shab yu gyernez. Yu' ga' dey pshiñ yu yaa yag nu pcuaay gyernez. <sup>9</sup> Orze' dela mbecy nu Zub lo lom, gal nu de yu nu zaab par ich mi brugyi' rbish ti dey. Orze' na dey:

—;Dzi ga zily nac biñ nu bruu lat nez rey Dabi! ;Ñgyoozh nac num ru, biñ nu bzu' nez mi! ;Dzi ga zily nac Ñgyoozh, biñ nu gya zir zu! —na dey.

<sup>10</sup> Na ornu Jesuuz gu'm lat gyedz Jerusaleeng, orze' dela mbecy se nu ryach zi'l dey. Orze' brugyi' rgugyi' dey lo losa'y:

—;Ze' cyu nde'? —na dey.

<sup>11</sup> Orze' na de mbecy:

—Yu ze' Jesuuz, tub yu nu rnii por cuen ni Ñgyoozh, yu nu bruu Nazaret, tub gyedz nu ri lo yu ni Galilea —na dey.

### Jesuuz gu'm loli' ni yu' nu driib zily de mbecy Ñgyoozh

<sup>12</sup> Orze' Jesuuz gu'm loli' ni yu' nu driib zily mbecy Ñgyoozh. Orze' bloom de yu nu nguua rut ze' gal nu de yu nu rzii nañ yu' ze'. Orze' ptush cyam mez ni de yu nu rtich tiñ, gal nu yashily ni de yu nu rut begy.

<sup>13</sup> Orze' nam rab mi dey:

—Ñgyoozh nam lat riidz nim: "Yu' ne gruu lañ yu' nu gnii nu mbecy ya", nam. Ze' de ru ricy der ñii nu nañ gal nu na tub blyuu ni gubaan —nam.

<sup>14</sup> Orze' bru'ña de mbecy lo ca' nu de mbecy coj lo Jesuuz loli' ni yu' ze'. Orze' b icy yac mi dey. <sup>15</sup> Tees de uz Zub lo gal nu de yu nu rlyuu leey nu bzeeñ Moisees bzaac dey de nusuriidz nu b icy mi. Nunu güeñ dey nu dici rbish ti de yu nguzh nu yu' ze'. Orze' na de yu

nguzh ze': "¡Dzi ga zily nac biñ nu bruu lat nez rey Dabi!" na dey. Orze' de uz ze' nu de yu nu rlyuu leey ze' tona' la guzi lagy dey. <sup>16</sup> Orze' na dey rab yum: —¿A wagyeñ ru de coz nu rbish ti de yu nguzh ze'? —na dey.

Orze' na Jesuuz rab mi dey:

—A, reña. ¿A walab gaal nigul sya' de ru lat riidz ni Ñgyoozh ze' nu rniiñ:

Ñgyoozh, ru b icy ru nu ru' de mdoo driib nu rbish ti dey nu ryabic dey gyel mbecy nir mod nu nap, rniiñ? —nam.

<sup>17</sup> Orze' bzeeñ mi dey bruum zam gashtal gyedz Be-tania. Ze' bechem.

### Jesuuz bzaa lagy mi ni tub ya las

<sup>18</sup> Na ornu bza' yu, orze' gush nez mi ya ga'm par Jerusaleeng. Orze' briib nu ran mi. <sup>19</sup> Orze' bzaac mi tub ya las Zub ñi cuit nez. Orze' gush nez mi zam looñ. Tees ni tub uugy wangyap mi looñ. Nomaas lyag zi'l ta' niñ. Orze' nam rab mi ya las ze':

—;Bee dzi na par lo rila wazaca' lor nu cuic ru uugy! —nam.

Orze' lueg la guwach ya las ze'. <sup>20</sup> Na ornu bzaac de yu nu rsya' lom tona' la za nu ic dey. Orze' bdugyi' dey lo Jesuuz:

—¿Lagu nu dzi dzach guwach ya las re? —na dey.

<sup>21</sup> Orze' nam rab mi dey:

—;Ya rishli rnęe lo der benu ricy cup der consuel lo, nunu benu cue' gyicy cyup ic der, walab nu tub lo zi'l nu i gyicy nu der ya las, sinu ni' gac nii der lo tub b icy re: "Bruu chu. Gua gyet lag ru lo nisyudoo re", niir, nunu ni gac ñii. <sup>22</sup> Nunu benu de ru gyicy cup der consuel ornu cyiñ der de coz nu rlagy ru lo Ñgyoozh, orze' gad ñi —nam.

### De mbecy bdugyi' lo Jesuuz nu ca bloom rishbeey

<sup>23</sup> Na ornu bri Jesuuz Jerusaleeng, orze' gu'm loli' ni yu' nu driib zily de mbecy Ñgyoozh. Lat nu zum rlyuum ni de mbecy, orze' bru'ña de uz Zub lo gal nu de yu bel ni de mbecy Israeel. Orze' bdugyi' dey lo Jesuuz. Orze' na dey rab yum:

—¿La na rishbeey ricy cup ru nu ricy ru de coz ii? ¿Cyu briic rishbeey ze' nir? —na dey.

<sup>24</sup> Orze' na Jesuuz rab mi dey:

—Ni' ya dugyi' tub coz lo der. Benu tush cya der ñii, orze' ni' ya nee lo der la na rishbeey ricy cupa nu ricya de coz ii. <sup>25</sup> ¿Cyu bzuu nez Waa nu biid yu nu briib nis yu mbecy? ¿A Ñgyoozh bzuu nez mi yu uti mbecy? —nam.

Gaze' nu brugyi' ro dey riidz nu losa'y. Orze' na dey:

—Benu niin nu Ñgyoozh bzuu nez mi yu biid yu, orze' nii Jesuuz gab yu de ub na: "Ze' ;lagu wancheña lagy der de riidz nu mniyy beni?" gniyy. <sup>26</sup> Ze' benu gniin nu mbecy bzuu nez yuy, orze' dzib na lo de mbecy,

gun dela mbecy ricy dey Waa par tub yu nu mnii por cuen ni Ñgyoozh —na dey.

<sup>27</sup> Orze' na dey rab yu Jesuuz:

—Wagad lagy dē —na dey.

Orze' nam rab mi dey:

—Ni' yā wanę̄ lo der la na rishbeey ricy cupa nu ri-  
cyā de coz ii —nam.

### Riidz tiily ni cyup yu feñ nu b icy yu

<sup>28</sup> Orze' na Jesuuz rab mi dey:

—¿La ŋuu shcab gash der ni tub riidz nu gnę̄ lo der  
na? Zu tub mbecy. Zu cyup i'ñ yu. Orze' guay lo i'ñ yu,  
yu gush ze'. Orze' nay rab yuy: "Gua gyicy ru riiñ lat  
lyucy urbyay ne", nay. <sup>29</sup> Orze' na yu feñ ze' rab yu uz  
yu: "¡Wayá!" nay. Tees despuees bdza shcab niy. Orze'  
guay. <sup>30</sup> Orze' mbecy ze' guay lo tuuba' i'ñ yu. Orze' ni'  
zi'l mniiy. Orze' na yu feñ ze' rab yu Uz yu: "O. Yā cha",  
nay. Tees wanchay. <sup>31</sup> ¿Orze' ca na lo cyup de yu feñ ze'  
b icy yu coz nu rlagy uz yu? —na Jesuuz.

Orze' na dey rab yum:

—Yu feñ loga ze' b icy yu coz nu rlagy uz yu —na dey.

Orze' na ga' Jesuuz rab mi dey:

—Yā rishli rnę̄ lo der gashtal de yu nu rte' tiñ por  
cuen ni gubier Rom, gal nu de biñ congal, de yu ze'  
chu' dey lat de mbecy nu riib ic Ñgyoozh anzir nu chu'  
de ru. <sup>32</sup> Gun Waa nu briib nis mbecy biid yu nu blyuuy  
ni der nu lac gyicy der nu chu'r nu mod nu se'ñ, tees  
de ru wancheña lagy der niy. Ze' de yu nu rte' tiñ por  
cuen ni gubier Rom, gal nu de biñ congal guña lagy  
dey ni Waa. Tees de ru mas bzaac der de nu nde', tees  
wanne' der de cyi nu ricy ru par nu ñgyeña lagy der de  
coz nu mniiy —nam—.

### Riidz tiily ni de moz a' nap

<sup>33</sup> 'Bzuub gyidag der tuuba' riidz tiily ii: Tub shuaan  
tub nac yu mnuuz yu tub nac lyucy urbyay. Gaze' nu  
bdu'y lo' dub yub la ru'ñ. Orze' bzaay tub zo nu  
dushū de urbyay ze'. Nunu bzaay tub ze' nu gya.  
Orze' too ze' bzuub yu tub yu' nu duña de lyucy urbyay  
ze'. Gaze' nu bzeen yuñ yaa mbecy nu nuuz dey coz  
cyaa. Gaze' nu gush nez yu zay tub lugaar zet. <sup>34</sup> Na  
ornu byap tiem nu dulag urbyay ze' na, orze' shuaan  
urbyay ze' bzuu nez yu la be moz niy zay lo de yu nu  
mnuuz coz cyaa ze' nu gyabicy yu ca na nu bdugyi yu  
nu guni yu ze'. <sup>35</sup> Tees de yu nu mnuuz coz cyaa ze'  
pshet yaa dey de moz ze'. Tub yu bgaaz dey yu. Tu-  
uba'y biit dey yu. Ze' tuuba'y bgoow gyita' dey yu.  
<sup>36</sup> Orze' shuaan lyucy urbyay ze' bzeeda'y tub naca'  
moz. Zañ zir yu bzeed yu byaj cyup gaze' nu loga, tees  
de yu ze' ni' zi'l mod b icy nu dey de moz ze'.

<sup>37</sup> 'Na despuees ni de nu nde', orze' bzeed lay ub la  
i'ñ yu. Orze' mni tooy: "Ca gaal lagy dey lo i'ñ na", mni  
tooy. <sup>38</sup> Tees ornu bzaac de mbecy nu mnuuz coz cyaa  
ze', i'ñ shuaan lyucy urbyay ze', orze' na dey rab yu  
losaly: "Yu re gyiyeñ nuy gyel nap ni uz yu. Na yaa der  
chan dut nay. Orze' de ub na gyiyeñ dun de gyel nap

niy", na dey. <sup>39</sup> Orze' pshet yaa dey yu nunu bloo dey  
yu lat lyucy urbyay ze'. Orze' biit dey yu.

<sup>40</sup> Ze' na ornu cyid shuaan lyucy urbyay ze', ¿la gyicy  
nuy de yu nu mnuuz coz cyaa ze' rsa' lagy der?  
—nam.

<sup>41</sup> Orze' na dey:

—Waded la cut yu de mbecy wagat lo ze'. Orze' cuic  
yu de lyucy urbyay ze' ni reña' mbecy, gun orze' tiem  
ni de nu nde' glew dey ñi gal nu yad ñi —na dey.

<sup>42</sup> Orze' na ga'm rab mi dey:

—¿A rila nigul sya' de ru lat de riidz ni Ñgyoozh ze'  
nu rniiñ:

Gyita' nu mne' de biryu  
byac ñi gyita' nu ricy zir ñi presis;  
nii tub coz nu ricy Ñgyoozh  
nunu nde' tona' la cyit par de ub na,  
rniiñ? <sup>43</sup> Nde' nu yā rnę̄ lo der nu Ñgyoozh gyicy mi  
nu gruu gyel gubier nim yaa de ru. Orze' gyu'ñ yaa  
reña' mbecy, de yu nu gyicy paa. <sup>44</sup> Cyu zi'l mbecy nu  
gyes saa lo gyita' ze', orze' gzug lay. Ze' benu gyita' ze'  
gyet lag ñi too ca na mbecy, orze' gyagyez la mbecy  
ze' —nam.

<sup>45</sup> Orze' de uz zub lo gal nu de mbecy fariseo güeñ  
dey de riidz tiily nu mniim ze'. Orze' bet lag dey cuen  
nu lo dey pcaam. <sup>46</sup> Orze' ngulagy dey ngu' yaay mi,  
tees gudzib dey lo de mbecy gun b icy dey Jesuuz par  
tub yu nu rnii por cuen ni Ñgyoozh.

### Riidz tiily ni fandang

<sup>22</sup> Orze' brugyi' ga' rnii Jesuuz nu riidz tiily lo dey  
tuuba' tir. Orze' nam rab mi dey:

<sup>2</sup> —Mod nu rac nu gyel gubier ni Ñgyoozh, nde' mod  
nu guc nu tub rey. Rey ze' bzu yey tub sa' ni fandang  
par nu chelaa yu feñ niy. <sup>3</sup> Orze' mniy lo de moz niy nu  
chay cha teey de yu nu ca lo cuen nu cha fandang.  
Tees de yu nu ca lo cuen nu cha ze', wangalagy dey  
ñgyay. <sup>4</sup> Orze' bzeed yu reña' moz nu chay. Orze' mniy  
lo dey: "Mnii lo de yu nu ca lo cuen nu cyid ze' nu bi  
bzu lilya dela coz nu dow den. Nunu bi b icya mandaar  
nu gut chigud gal nu de bañ nu bi b icy re'ñä. Delañ bi  
zu lily ñii nu cyid dey fandang", nay. <sup>5</sup> Tees de yu nu ca  
lo cuen nu cha fandang ze', wangalagy cuen dey. Tub yu  
zay lat naay. Ze' tuuba'y zay gyicy yu daljez niy. <sup>6</sup> Ze'  
tub naca' dey bdu' yaa dey de moz ni rey ze'. Orze'  
shiñ b icy nu dey yu gashtal biit la dey yu. <sup>7</sup> Orze' tona'  
la guzi lagy rey ze'. Orze' b icy yu mandaar lo de soldad  
niy nu chay cut yu de mbecy nu biit moz niy ze', nunu  
caay gyi ledz dey. <sup>8</sup> Gaze' nu bredz yu de moz niy. Orze'  
nay: "Dela de coz bi zu lily ñii par fandang, tees de yu  
nu ca lo cuen nu ñgyiid, wangalagy dey nu ñgyiid yu.  
<sup>9</sup> Orze' na gua der de nez zu. Orze' cuedz der cyu zi'l  
mbecy nu gyap ru nu cyid yu fandang", nay. <sup>10</sup> Orze' de  
moz ze' bruu dey zay de lat cay. Nunu b icy tublaazh  
dey ca na la de mbecy nu byap dey: tant mbecy a' nap  
nunu tant mbecy nap. Orze' bdzaa la nañ yu' ze' nu yu'  
mbecy lo fandang.

<sup>11</sup> 'Orze' rey ze' gu'y nañ yu' ze' nu bgüiiy lo dela  
mbecy nu bru'ña ze'. Orze' bdu' cuen yu lo tub mbecy

nu a' zuy negy par fandang. <sup>12</sup> Orze' na rey ze' rab yu mbecy ze': "¿Lac guc gu'r ii ze' a' zur negy par fandang?" nay. Tees mbecy ze' rila waniiy. <sup>13</sup> Orze' rey ze' nay rab yu de moz niy: "Pcyiig der gyi'y nunu pcyiig der yaay. Nunu mne' der yu chay ze' nu cow, ze' nu gun yu nunu siigy lay yu", nay. <sup>14</sup> Gun Ñgyoozh rbedz mi zigy mbecy tees ñuu zi mbecy pcuim —na Jesuuz.

### Riidz ni tiñ nu rte' mbecy por cuen ni gubier

<sup>15</sup> Orze' de mbecy fariseo ya dey, nunu orze' psaap dey riidz ben lac mod gac gyicy dey nu gadzam nu riidz par nu cu' zi dey mi. <sup>16</sup> Orze' bzuu nez dey la be de mbecy nu nac nu de mbecy fariseo nu la be ga' de mbecy ni Herodes nu cha nii dey lom. Orze' na dey rab yum:

—Masht, dę yę rad lagy dę nu ru rniir coz rishli.

Nunu ru wagyicy cuen ru de coz nu rnii mbecy, sinu rlyuur ni dey mod nu rlagy Ñgyoozh nu chu' dey, gun ru a' nac ru mbecy nu rcui. <sup>17</sup> Orze' mnii ñuu lo dę mod nu ru rnii toor. ¿A gruu nap ñi nu griib den tiñ nu rbic dey ni yu nu riib ic de nasyoong, uti waruu nap ñi? —na dey.

<sup>18</sup> Tees Jesuuz gud lagy mi nu nac dey mbecy rzi lagy. Orze' nam:

—Mbecy rzuu lo, ¿lagu rzu der caa ze' lo? <sup>19</sup> Blyuu der tiñ nu cyish ru ze' lo —nam.

Orze' gua nu dey tub tiñ plat lom. <sup>20</sup> Orze' Jesuuz bdugyi'm lo dey:

—¿Cyu nab ca lo tiñ ii nunu cyu nu la ca looñ? —nam.

<sup>21</sup> Orze' na dey:

—Lo César, yu nu riib ic de nasyoong, gal nu nu lay —na dey.

Orze' na ga' Jesuuz rab mi dey:

—Benu ni, orze' briic der ni César, yu nu riib ic ze', de coz nu nac niy, nunu briica' der ni Ñgyoozh de coz nu nac nim —nam.

<sup>22</sup> Na ornu güeñ dey de riidz ze', orze' za nu la ic dey nunu zu ga lam gush nez dey yay.

### Lac mod chu' mbecy ornu bi gut yu

<sup>23</sup> Laab dzi ze' gua la be de mbecy saduceo gua güii dey Jesuuz. De mbecy saduceo rnii dey nu ornu gat mbecy, orze' wagyabaña' dey. Nde' nu bdugyi' dey lo Jesuuz. Orze' na dey.

<sup>24</sup> —Masht, Moisees mniiy nu benu tub mbecy gat yu, ze' gyiyeeñ mñaay, ze' sac la i'ñ yu, orze' gash b icy yu byud ze', gun orze' cuic yu mdoo ni byud ze' por cuen ni gyitoo b icy yu, na Moisees. <sup>25</sup> Na lat de ub na ii bzu gagy mbecy nuy b icy yu. Orze' yu loga guud mñaay. Orze' gut yu. Ze' mñaay wangaal lam mdoo. Orze' byeeñ byud ze' lo yu nu gul loy. <sup>26</sup> Ni' zi'l bzac yu ze' nu gut yu. Orze' ni' zi'l bzac yu chon nu gul loy. Orze' ni' zi'l bzac byud ze' nu za' gagy la dey nuy b icy yu. <sup>27</sup> Na ornu blazh dela dey gut yu, orze' ni' zi'l biñ mñaas ze' gut mi. <sup>28</sup> Ze' na ornu shuub dzi nu gyabañ de mbecy gut ze', orze' ¿ca na de yu ze' lo gagy yu nuy

b icy yu gac mñaas dey mi ze'? Gun dela dey pcyiñ nuy mi —na dey.

<sup>29</sup> Orze' Jesuuz nam rab mi dey:

—De ru radza der, gun de ru wagyet lag der cuen de coz nu mniiñ lat de riidz ni Ñgyoozh. Ni wagad lagy der la na coz nu gac gyicy mi. <sup>30</sup> Ornu de mbecy nu bi gut gyabañ dey, orze' wachelaa ga' dey, sinu orze' chu' dey gal nu yu' de anc nu yu' gyibaa. <sup>31</sup> Ze' na ni nu gyabañ mbecy, ¿walab gaal wacsya' der de riidz nu bzeeñ Ñgyoozh par de ru? Laab mi nam: <sup>32</sup> "Yę nacä Ñgyoozh ni Abraham, nacä Ñgyoozh ni Isaac, nunu nacä Ñgyoozh ni Jacob." ¡Gun Ñgyoozh a' nac mi Ñgyoozh ni mbecy nu bya' lo la sinu nac mi Ñgyoozh ni mbecy nu mbañ mas bi gut yu! —na Jesuuz.

<sup>33</sup> Na ornu güeñ de mbecy de riidz ze', orze' za nu la ic dey nu nac de coz nu blyuum.

### Leey zub lo zir par de' zir leey

<sup>34</sup> Orze' ornu gud lagy de mbecy fariseo nu psoow mi ru' de mbecy saduceo, orze' byatublaazh dey. <sup>35</sup> Orze' bruu su tub yu nu rlyuu leey ni Ñgyoozh nu bdugyi' y lom par nu shet lag yum nañ caa. Orze' nay rab yum:

<sup>36</sup> —Masht, ¿ca na leey ni Ñgyoozh nac ñii leey zub lo zir? —nay.

<sup>37</sup> Orze' na Jesuuz rab mi yu:

—Pca Shuaan ru, biñ nu nac Ñgyoozh nir, nu dutuub la lardoor, nu dela gyel mbañ nir, gal nu nu dela shcab nir." <sup>38</sup> Nde' leey zub lo zir par de' zir leey. Nde' leey nu gya zir zu. <sup>39</sup> Ze' leey cyup, nde' nu "Pca der losa'r gal nu rcar ub ru." Nde' saap ñi leey loga ze'. <sup>40</sup> Orze' lo cyup de leey ze' nac ñi cyong de' zir leey nu bzeeñ Moisees, gal nu de' zir de riidz nu bzeeñ de yu nu mnii por cuen ni Ñgyoozh —nam.

¿Cyu nez nac Mesías, biñ nu ca lo cuen nu co mbañ mbecy?

<sup>41</sup> Lat nu gabee yu' tublaazh de mbecy fariseo,

<sup>42</sup> orze' na Jesuuz rab mi dey:

—¿La ñuu shcab rash der nu nac Mesías, biñ nu ca lo cuen nu co mbañ mbecy? ¿Cyu nez nac mi? —nam.

Orze' na dey:

—Nez Dabi nac mi —na dey.

<sup>43</sup> Orze' na Jesuuz rab mi dey:

—Benu ni, ¿lagu mnii Espiriit Yon ni Ñgyoozh lo Dabi nu mniiy nu nac mi Shuaan yu? Gun ub la Dabi nay:

<sup>44</sup> Ñgyoozh nam rab mi Shuaan:

"Gzub ru lugaar nu gzub mbecy nu gya zir zu par yaa bee ii,

gashtal gyicy la nu gyicy ru gan de losa'r yuurr", na Ñgyoozh, na Dabi.

<sup>45</sup> 'Orze' ¿walab gaal gac gruu Mesías, biñ nu ca lo cuen nu co mbañ mbecy lat nez Dabi, benu Dabi mniiy nu nac mi Shuaan yu? Gun bi guañ na'ñ gul Dabi anzir nu gal mi. Orze' ¿walab gaal gac gruum lat nez yu? —nam.

<sup>46</sup> Orze' rila wangac tush cya dey ni tub riidz. Nunu nese laab dzi la ze' wancuica' dey baloor nu ngugyi'lom.

**Jesuuz mniim nu gyicy cuidad dey nu mbecy fariseo gal nu mbecy nu rlyuu leey**

**23** Gaze' nu Jesuuz nam rab mi de mbecy gal nu de  
yu nu rsya' lom:

<sup>2</sup>—De yu nu rlyuu leey ni Ñgyoozh gal nu de mbecy fariseo zu dey riiñ nu rshaal dey lac yaruu leey nu bzeeñ Moisees. <sup>3</sup> Nde' nu de ru rlagy ñi zuub gyidag der ni de coz nu rnii dey, tees cue' gyicy der mod nu ricy dey, gun coz nu rlyuu dey, nde' walab mod nu ricy de ub yu. <sup>4</sup> Nde' nañ gal nu na nu rzuub dey yuu ich mbecy gashtal wagagyee ga' la dey. Ze' de ub yu walagy yu gal yuñ ni nu tub mbiz yu par nu locyuub yu losa'y nu guy yuu ze'. <sup>5</sup> Dela coz nu ricy dey, tub lo zi'l ricy dey par nu gabe nu dzi rlyu dey. Yet lagy dey rcaay tub nac riidz ni Ñgyoozh cyugay nu ic chidz yu, nunu yet lagy dey gyicy tuñ zir yu shab yu par nu gabe nu nac dey mbecy da. <sup>6</sup> Yet lagy dey rzub yu lugaar nu gua de mbecy lily lat gasht, nunu yet lagy dey rzub yu lugaar nu gua de mbecy zub lo nañ yu' nu rsya' de mbecy riidz ni Ñgyoozh. <sup>7</sup> Yet lagy dey ornu rca lagy de mbecy loy ornu rnii nu dey yu lat yagi'. Nunu ni' yet lagy dey ornu rnii de mbecy yu masht.

<sup>8</sup>'Ze' de ru walagy ñi nu nii de mbecy nu nac der masht, gun dela de ru b icy ru losa'r nunu tub zi masht ni der zum. Nde' yañ biñ nu blosu Ñgyoozh. <sup>9</sup> Nunu rila walagy ñi nii der nu uz ru ni tub la mbecy gyishlombe cy ii, gun zu tub zi uz der. Nde' Ñgyoozh, biñ nu Zub gyibaa. <sup>10</sup> Nunu cue' shet ic der nu nii dey nu nac ru tub yu nu riib ic ni dey, gun tub zi ya, biñ nu ca lo cuen nu co mbañ mbecy naca biñ riib ic de ru. <sup>11</sup> Mbecy nu ricy coz nu galagy ñi ni losa', yu ze' yu nu gya zir zu lat de ru. <sup>12</sup> Gun cyu zi'l mbecy nu ricy zily ub, yu ze' gruu gyel mbecy niy. Ze' yu nu ricy gyel gyidz ni, yu ze' gya yu mbecy nu gya zir zu.

<sup>13</sup>'Cuaa de ru, mbecy nu rlyuu leey ni Ñgyoozh, gal nu de ru mbecy fariseo, gun nac der mbecy rzuu lo! De ru rsoow der ro' nu chu' de mbecy lat de yu nu riib ic Ñgyoozh, gun orze' wac chu' mbecy lugaar ze'. Gun ni de ub ru wayu'r lugaar ze', ni wacsan der nu chu' de' zir mbecy nu rlagy chu' lugaar ze'.

<sup>14</sup>'Cuaa de ru mbecy nu rlyuu leey ni Ñgyoozh nu de ru mbecy fariseo, gun nac der mbecy rzuu lo! Nunu rboor yu' de byud nu de gyel nap nim. Orze' par nu rlagy der nu soow sur lo de coz a' nap nu ricy ru, orze' chi rnii nu der Ñgyoozh. Nde' nu de ru cashtig ily zir gad ni der.

<sup>15</sup>'Cuaa de ru mbecy nu rlyuu leey ni Ñgyoozh gal nu de ru mbecy fariseo, gun nac der mbecy rzuu lo! Tona' la rboor lo der rded ru dutuub la lugaar par nu gyicy ru gan mas ñuu tub mbecy nu chetib ic leey ni der yu. Nunu ornu bi b icy der gan tub mbecy, orze' ricy der nu dub gal nu na cashtig nu yad ñi nu gad ni der gabil, orze' de yu ze' cyup tir ni na cashtig yad ñi nu gad ni dey.

<sup>16</sup>'Cuaa de ru! Na der gal nu na mbecy lo ca'. Ze' rlyuu der nez ni losa'r. De ru rniir: "Benu zat na yu' ni Ñgyoozh par nu gabe nu gyicy paa den nu riidz nu rniin, orze' walagy ñi gyicy paan nu riidz ze'. Ze' benu zat den or nu yu' nañ yu' ni Ñgyoozh par nu gabe nu ricy paan nu riidz nu rniin, orze' rlagy ñi gyicy paan", rniir der. <sup>17</sup>¡Der mbecy ton! ¡Mbecy lo ca'! ¿Ca na nu ricy zir ñi presis: a yu' ni Ñgyoozh uti or nu ta' nañ ñi? Gun yu' ni Ñgyoozh, nde' ricy ñi nu or ze' nac ñii coz nim. Walab or ze' ricy ñi nu yu' ze' nac ñii yu' ni Ñgyoozh.

<sup>18</sup>Nunu ni' zi'l rnii de ru: "Benu tub mbecy zat yu mez nu zu ze' nu rcaa dey gyi bañcyug par nu gabe nu ricy paay nu riidz nu rnii, orze' walagy ñi gyicy paay nu riidz nu mniy. Ze' benu zat yu bañcyug nu riib lo mez ze', orze' rlagy ñi nu gyicy paay", rnii der. <sup>19</sup>¡Mbecy lo ca'! ¿Ca na coz ricy zir ñi presis: a mez uti bañcyug nu riib loñ? Gun mez ze' ricy ñi nu bañcyug nu riib loñ, ma ze' cyiiñ ma par Ñgyoozh. Tees walab bañcyug ze' gyicy ma nu cyiiñ mez ze' par Ñgyoozh. <sup>20</sup>Mbecy nu rzat mez ze' rzat yuñ par nu gabe nu gyicy yac yu riidz nu rnii. Orze' ni' zi'l rzat yu bañcyug nu riib loñ. <sup>21</sup>Mbecy nu rzat yu' ni Ñgyoozh, walab tub lo zi'l yu' ze' rzat yu, sinu ni' rzat yu Ñgyoozh, biñ nu zu nañ ñi. <sup>22</sup>Nunu mbecy nu rzat gyibaa walab tub lo zi'l gyibaa rzat yu, sinu ni' rzat yu lugaar ze' nu riib ic Ñgyoozh, gal nu biñ nu Zub lugaar ze'.

<sup>23</sup>'Dzi ga cuaa de ru mbecy nu rlyuu leey ni Ñgyoozh gal nu de ru mbecy fariseo gun nac der mbecy rzuu lo! Dela coz nu ricy cup der, lo tii nac ñii, rbic der tub nac ñii ni Ñgyoozh: gashtal de gyish loow comid, de mushtily, de aniis, de comin rbic der nim. Tub nac gaañ lo tii nac ga de gyish mi' ze' rbic der nim. Tees wagyicy cuen der de riidz nu ricy ñi presis nu ca lo leey. Wagyicy cuen der de riidz nu rniiñ nu chu'n nu se'ñi. Ni wagyicy cuen der de riidz nu rniiñ nu gashni lagy na losa'n, nu de riidz nu rniiñ nu nap chu' den. Rlagy ñi gyicy yac der nu de riidz ze', nunu cue' checa der nu gyicy ru de' zir coz nu bi ricy ru ze'. <sup>24</sup>Na der gal nu na lo ca' nu rlyuu nez ni losa'. De ru rzeed der be'y mi' nu ibel tees camey rab der dutuub la ma.

<sup>25</sup>'Cuaa de ru mbecy nu rlyuu leey ni Ñgyoozh nu de ru mbecy fariseo! ¡Nac der mbecy rzuu lo! Na der gal na tub taz uti tub gya'n. Par ich zi'l ñi tona' la nap rgyiib der. Ze' par nañ ñi dza la yu' coz nu b icy gubaan der, nu de coz nu ye rzac der lo. <sup>26</sup>¡Mbecy fariseo lo ca'! Rlagy ñi nu loga la cyib der par nañ taz ze', nu gya'n ze'. Orze' ni' zi'l par ich ñi gac ñii coz caacy.

<sup>27</sup>'Cuaa de ru mbecy nu rlyuu leey ni Ñgyoozh gal nu de ru mbecy fariseo! ¡Nac der mbecy rzuu lo! Na der gal nu na ru' baa ni añ nu dzi guzig par ich. Nap rabeeñ par ich ñi. Ze' par nañ ñi yu' rit nu beel guudz. <sup>28</sup>Ni' zi'l par lo de mbecy, rlyu nu nac der mbecy nap, ze' nañ lardoo der nac ru mbecy rzuu lo, nunu nac der mbecy nu ricy de lo la cyi.

<sup>29</sup>'Cuaa de ru, mbecy nu rlyuu leey ni Ñgyoozh gal nu de ru mbecy fariseo! ¡Nac der mbecy rzuu lo! Nap ricy nap der ru' baa ni de yu nu mnii por cuen ni Ñgyoozh, nu ru' baa ni de yu nu gac mbecy nap par nu

gabe nu rca lagy der lo dey. <sup>30</sup> Orze' rnii der: "Bi bicy na nu de ub na ūcyiiñ na tiem nu gu' de gyitoo bel nin, orze' de ub na waric yaan ornu biit dey de yu nu mnii por cuen ni ūgyoozh", rnii der. <sup>31</sup> Nu nac de riidz nu rnii der ze', nde' rabee nu rad lagy der nu nac ru nez de yu nu biit de yu nu mnii por cuen ni ūgyoozh. <sup>32</sup> Benu ni, orze' de ru bza' lo la der laz nu bzuub de gyitoo bel ni der gyi' ze'.

<sup>33</sup> 'Na der gal na bily. Na der gal na nez bily. ¿Lagu rnii too der nu glar lo cashtig nu cuic ūgyoozh? Cashtig ze', nde' gably. <sup>34</sup> Nde' nu ya zeeda mbecy nu nii por cuen ni ūgyoozh, nunu zeeda mbecy nu rad lagy, nunu zeeda mbecy nu lyuu ni der. Tees yu' nu cut der dey. Yu' ga' nu caa der yu lo cruu. Yu' ga' nu gaaz der yu nañ yu' nu rsya' der riidz ni ūgyoozh. Nunu yu' ga' nu gzab der ich yu gaza' gyedz la. <sup>35</sup> Nde' nu too de ru gzeed ūgyoozh dela cashtig gyi' nu biit dey de mbecy nap ze': nese nu biit dey Abeel gashtal nu biit dey Zácarí, iñ Berequías, yu nu biit der loli' ni yu' ni ūgyoozh par gazel ni mez nu rcuaa der gun lom nu yu' yon nim. <sup>36</sup> Ya rishli rnēe lo der nu dela cashtig nu nac nu gut de mbecy nap ze' dugyiñ gaza' de ru, mbecy nu yu' tiem na —nam—.

### Jesuuz ricy mi sentiir nu nac de mbecy Jerusaleeng

<sup>37</sup> ;A der mbecy Jerusaleeng! Rut der de yu nu rnii por cuen ni ūgyoozh. Nunu rgoow gyita' der de yu nu rzeed ūgyoozh lat der. Zañ tir ngulagyā ūgyicy tublaazha' der gal nu ricy tub gyid ornu ricy tublaazh ma dzech ni ma nañ lowe' ma. Tees de ru wangalagy der. <sup>38</sup> Na ledz der gyiyeen ub ziñ. <sup>39</sup> Gun ya rnēe lo der nu nese na la wazaca' la der ya gashtal shuub la dzi ornu nii der: "Dzi ga zily nac biñ nu bzuu nez ūgyoozh, Shuaan na, biñ nu cyid lo den", nii der —na Jesuuz.

### Jesuuz mniim nu dudily yu' nu driib zily dey ūgyoozh

**24** Orze' bruu Jesuuz loli' ni yu' nu driib zily de mbecy ūgyoozh zam. Orze' bru'ña de yu nu rsya' lom. Orze' brugyi' rlyuu dey de yu' ze' lom.

<sup>2</sup> Orze' na Jesuuz rab mi dey:

—¿A rzac der dela coz ii? Ya rishli rnēe lo der nu sac tub gyita' ii nu gyiyeen ñi too losa'ñ. Delañ dudily ñi —nam.

### Lac mod gad lagy mbecy ornu shuub dzi nu gya' lo dela coz

<sup>3</sup> Orze' za num dey par too bicy ni ya Oliva. Orze' gusub mi. Orze' de yu nu rsya' lom byatublaazh dey lom par nu cugyi' reñ dey lom. Orze' na dey:

—Mnii lo dē nu gul gac de nde'. ¿La na muesht gruu zac ornu cyid ru tuuba' tir? Nunu ¿gul shuub dzi ni tiem nu yu'n na? —na dey.

<sup>4</sup> Orze' na Jesuuz rab mi dey:

—Bzu der cuidad nis guu mbecy der, <sup>5</sup> gun tona' la zigy mbecy grusac yu nu gash yu nu la. "Ya Mesías, biñ nu ca lo cuen nu co mbañ mbecy", niyi. Orze' gyicy yu nu tona' la zigy mbecy gadza dey. <sup>6</sup> Ornu gyeñ der nu

bi yu' gyel yuu gaab ga, gal nu de ze' nu zet, tees cue' dzib der, gun nde' coz nu rlagy ñi nu gac. Tees gabee nigul shuub dzi nu gya' lo dela coz. <sup>7</sup> Gun tub nac mbecy chu'y gyel yuu nu tub naca' mbecy. Nunu tub gubier chu'y gyel yuu nu tuuba' gubier. Nunu cyid cubiñ. Nunu grib duru zañ lugaar ni gyishlombecy. <sup>8</sup> Tees dela nde' nu gzub zi'l gyi'ñ nu gzac zi de mbecy.

<sup>9</sup> 'Orze' gu' dey de ru yaa mbecy par nu shet zi dey de ru nunu par nu cut dey de ru. Nunu dela de mbecy gazi lagy dey lo der par nu nac ya. <sup>10</sup> Nunu tiem ze' zigy de ru checa der nu gyicy cup ru consuel lo. Nunu gazi lagy der lo losa'r. Nunu cush cya' tub, cush cya tub zi'l der ich losa'r. <sup>11</sup> Nunu gruu sac zigy mbecy rguu, mbecy nu nii nu nac mbecy nu rnii por cuen ni ūgyoozh. Nunu gyicy dey nu gadza zigy mbecy.

<sup>12</sup> Nunu par nu tona' la gyañ nu shiñ gyicy de mbecy, orze' checa dey nu rcay losa'y. <sup>13</sup> Tees yu nu gagye gashtal gat la, yu ze' yu nu co mbañ ūgyoozh. <sup>14</sup> Nunu de riidz nu sac ni gyel gubier ni ūgyoozh grush las ñi dutuub la gyishlombecy par nu gad lagy de lo la mbecy. Gaze' nu shuub dzi ze'.

<sup>15</sup> 'Na Ñeel, yu nu mnii por cuen ni ūgyoozh, bzeen yu riidz ni coz bag nu gyicy ñi nu nit lo. Ornu zac der nu chu'ñ lugaar ni ūgyoozh, (Mbecy nu csya' de riidz ii rlagy ñi nu gyicy yu nu gyet lag yu cuen.) <sup>16</sup> orze' de mbecy nu yu' lo de yu ni Judea rlagy ñi nu ruu chu dey chay par logyi'. <sup>17</sup> Nunu mbecy nu Zub too yu' walagy ñi nu gyet yu nu chu'y nañ yu' nu coy la coz anzir nu ruu chuy. <sup>18</sup> Mbecy nu ri ricy riñ lat naa, walagy ñi nu cush cyay cha gyiy shab yu. <sup>19</sup> ;Tees cuua de biñ mñaa nu secyi zu tiem ze'! ;Cuua de biñ nu rgagy mdoo tiem ze'! <sup>20</sup> Bdiiñ der lo ūgyoozh nu cue' nu ruu chu der tiem rag, ni sab, dzi nu rzu lagy mbecy. <sup>21</sup> Gun tiem ze' dzi zir zac zi mbecy gaze' de tiem nu bded gaal zi'l nu bzub gyi' gyishlombecy, nunu gaze' de' zir tiem nu yad par lo. <sup>22</sup> Nunu benu ūgyoozh wayicy shub mi tiem ze', orze' ni tub la mbecy waruu mbañ yu. Tees gyicy shuub mi tiem ze' par nu nac de mbecy nu bi pcam.

<sup>23</sup> 'Orze' benu ca na mbecy niyi lo der: "Güii ii zu Mesías, biñ nu ca lo cuen nu co mbañ mbecy" o "Güii re rim", niyi. Tees de ru cue' cheña lagy der. <sup>24</sup> Gun grusu mbecy rguu nu niyi nu nac yu Mesías. Nunu grusu mbecy rguu nu niyi nu nac yu mbecy nu rnii por cuen ni ūgyoozh. Zañ muesht lyuu dey, nunu zañ nusuriidz gyicy dey par nu gad mod nu guu dey mbecy. Mas gashtal de mbecy nu bi pcui ūgyoozh guu mbecy ze' dey, benu gac. <sup>25</sup> Bzuub gyidag der, ya tiem bi mnēe lo der. <sup>26</sup> Nde' nu benu mbecy niyi lo der: "Güii der, tub lugaar ub zi ri Mesías", niyi, cue' cha der loy. O benu nii ga' dey: "Güii der, re ri ngach mi", nii dey, cue' cheña lagy der. <sup>27</sup> Gun ya, biñ nu byac mbecy, sij zi'l gru'ñ gal nu ricy yaa ni guzii ornu rzuñ dutuub la baa. <sup>28</sup> Gun ze' nu nguaa de cuerpa gut, ze' gyatublaazh dela lyash —nam—.

### Cyid Jesuuz, biñ nu byac mbecy, tuuba' tir

<sup>29</sup> 'Na ornu ded tiem nu zac zi de mbecy ze', orze' gyet cow lo doo güidz, nunu beey wabica' ma yaa. De

bel nu ta' baa gyet lag ma. Nunu dela fers nu nash baa cueñ ñii. <sup>30</sup> Orze' gruu sac muesht ne ya, biñ nu byac mbecy, baa. Orze' de lo la mbecy nu yu' gyishlombecy gun yu. Orze' zac dey ya, biñ nu byac mbecy, nu yapa lat za baa. Zac dey nu gac gyicya coz ily, nunu zac dey nu tonal la lily na. <sup>31</sup> Orze' ya zuu nez de anc ne, ornu fert dulaa trumpet par nu cha te' dey de mbecy nu bi bduucui gashtal se tap la scyiñ ni gyishlombecy: gash ñi gashtal ze' nu bzub gyi' baa nu gashtal ze' nu bya' loñ ni gyi' baa.

<sup>32</sup> 'Psysa' der mod nu ricy ya las. Ornu bi rga'ñ nu driib lyag niñ, orze' de ru bi rad lagy der nu bi yad tiem zig.

<sup>33</sup> Ni' zi'l mod ornu zac der gac dela coz nu mnęe lo der, orze' bi neñ der nu ya, biñ nu byac mbecy, bi zü la nu yapa. <sup>34</sup> Ya rishli rnęe lo der nu de mbecy nu yu' tiem ze' walazh dey gat yu gal gac la dela de coz ze'.

<sup>35</sup> Baa nuñ gyishlombecy ii delañ ded niñ, tees riidz nu ya rnęe nde' rila waded niñ.

<sup>36</sup> 'Tees dzi ze', nu or ze', se cyu la rad lagy. Ni de anc nu yu' gyibaa, ni ya iñ Ngoozh wagad lagya, sinu tub zi la Ngoozh uz den rad lagy mi.

<sup>37</sup> 'Gal nu gac ornu shuub dzi nu ya yapä tuuba' tir. <sup>38</sup> Tiem ze' anzir nu gyet gyey ily nu mnit lo gyishlombecy ze', orze' de mbecy pcyiiñ dey gyishlombecy ii. Nu bdow zi'l dey, nunu go'y, nunu pchelaa dey gashtal pshuub la dzi nu gu' Noé nañ barc. <sup>39</sup> Tees ni wannii la too dey ti ni gac ñii gashtal bru'ña la gyey. Orze' za nuñ dey. Ni' zi'l gac ornu shuub dzi nu ya biñ nu byac mbecy yapä tuuba' tir. <sup>40</sup> Orze' tiem ze' cyup mbecy riy ricy yu riiñ lat naay. Tub yu gruuuy gyishlombecy ii nu gyay. Ze' tuba'ly gyiyeen yu.

<sup>41</sup> Cyup biñ mñaa cam rom iiñ gyech. Tub mi gruum gyishlombecy ii nu gyam. Ze' tuba'm gyiyeen mi.

<sup>42</sup> 'Orze' bzu der altant gun wagad lagy der ca dzi yap ya, biñ nu nac Shuaan der. <sup>43</sup> Tees b icy der nu gad lagy ru tub coz. Benu tub shuaan tub yu' gad lagy yu la or cyid gubaan, orze' zu lily yu nunu wazaan yu nu chu'y nañ yu'y nu coy suuy. <sup>44</sup> Nde' nu de ru rlagy ñi nu gyiyeen lily der, gun ya biñ nu byac mbecy yapä or nu rila a' sa' lagy der —nam—.

### Riidz ni cyup moz

<sup>45</sup> 'Ca na moz nu ricy paa nu moz nu yu' shcab ni? Yu ze' bdu' patroq niy riiñ yaay nu gyub ic yu de' zir moz nu yu' niy, par nu cuic yu nu gow de yu ze' or niñ. <sup>46</sup> Dzi ni moz ze' benu gyap patroq niy yu ornu griy nu ricy yu gal nu mniy loy. <sup>47</sup> Ya rishli rnęe lo der nu patroq niy cu'y riiñ yaay nu gyub ic yu dela coz niy. <sup>48</sup> Tees be-nu moz ze' nac yu mbecy a' nap, orze' nii tooy nu wari gyiily patroq niy. <sup>49</sup> Orze' gyicy ras nuy de losa' moz yu. Gow yu, nunu go'y nu de mbecy rzugy. <sup>50</sup> Orze' gri patroq niy tub dzi nu a' sa' la lagy yu. Griy tub or nu wagad lagy lay. <sup>51</sup> Orze' tonal la cashtig ily cuic yu ni moz ze'. Gyicy nuy yu gal nu ricy nu dey de mbecy rzuu lo. Orze' gun yu, nunu siigy lay yu.

### Riidz tiily ni tii fiñ feñ

<sup>25</sup> 'Mod nu rac nu gyel gubier ni Ngoozh, nde' nañ gal nu na mod nu gac ornu bbed tiem nu wangri nob ze', orze' brugyi' nu ryeed pcaa deñ. Orze' gush pcaa delañ. <sup>6</sup> Na ornu bi yad razeel rel, orze' brugyi' rbish ti mbecy: "¡Bi yeed nob! ¡Bruu der nu cha cheel ru nob!" rnii dey. <sup>7</sup> Orze' dela de fiñ feñ ze' wesh te deñ carer, nunu bzu nap deñ candiil niñ. <sup>8</sup> Orze' de fiñ ndejad ze' nañ rab ñi de fiñ cuidad ze': "Doo ñuu asecy ni der ne de, gun ryuu candiil ne", naañ. <sup>9</sup> Orze' na de fiñ cuidad ze': "Waric de asecy. Gun ni par de ya wal ñii, ze' yegar par de ru. Gua der lo mbecy nu rut asecy. Orze' lo mbecy ze' zi der ñii nir", na deñ. <sup>10</sup> Tees lat nu gua zii de fiñ ndejad ze' asecy niñ, lat ze' bri la nob. Orze' de fiñ nu bzu lily ze' gu' deñ nu nob lo fandang. Orze' byoo ro'. <sup>11</sup> Na ornu byoo ro', orze' bri gaaya' de fiñ ndejad ze'. Orze' na deñ ta'ñ gyro': "Pshaal ñuu ro' ne de", na deñ. <sup>12</sup> Tees orze' na nob ze': "Ya rishli a' yu' lo de ru", nay —na Jesuuz.

<sup>13</sup> Orze' na ga'm:

—Orze' rlagy ñi gac der mbecy nu rzu altant, gun ni wagad lagy der ni ca dzi ni ca na or yap ya, biñ nu byac mbecy, tuuba' tir —nam—.

### Riidz tiily ni tiñ

<sup>14</sup> 'Mod nu rac nu gyel gubier ni Ngoozh, nde' nañ gal nu na mod nu bzac tub mbecy nu gua biaj. Ornu bi zuu lay nu chay tub lugaar, orze' bredz yu dela moz niy nu bdu'y riiñ yaay nu ñay dela suuy. <sup>15</sup> Orze' tub yu briic yu gaay tant tiñ niy. Ze' tuuba'y briic yu cyup tant tiñ niy. Ze' tuuba'y briic yu tub tant tiñ niy. Dub gal mod nu rlyu nu cyiiñ tub ga dey dub ni tiñ briic yu ni dey. Orze' gush nez yu zay. <sup>16</sup> Na moz nu guud gaay tant tiñ ni ze', lueg la guay b icy yu daljez nu tiñ ze'. Orze' b icy yu gan tub gaaya' tant tiñ. <sup>17</sup> Ni' zi'l b icy mox nu guud cyup tant tiñ ni ze'. Orze' b icy yu gan tub cyupa' tant gal nu guud niy. <sup>18</sup> Tees yu nu guud tub tant ni ze', orze' yay bduuñ yu gyegy nu pcach yu tiñ ni patroq niy.

<sup>19</sup> 'Na ornu bi rac zañ tiem, orze' bri patroq ze'. Orze' bza' loy nu de moz ze' niy. <sup>20</sup> Nu loga la bru'ña yu nu guud gaay tant tiñ ni ze'. Orze' byabic yu gaay tant nu za nuy ze' gal nu tub gaaya' tant iñ ñi. Orze' nay rab yu patroq niy: "Ru briic ru gaay tant ne. Na ii ga' tub gaaya' tant nu b icy gan", nay. <sup>21</sup> Orze' patroq ze' nay rab yu: "Nap tonal la. Ru nac ru tub moz nu ricy paa. Na par nu b icy paan nu ñuu mi' nu briic nir, na riiñ ily zir grica nu gyicy ru. Gyeed gun gyet lagy ru nur ya", na patroq. <sup>22</sup> Orze' bru'ña ga' yu nu guud cyup tant ni ze'. Orze' nay rab yu patroq niy: "Ru briic ru cyup tant

nē. Nde' nu gyash ru ñii nir, gal nu cyupa' tant nu biciya gan", nay. <sup>23</sup> Orze' na patroq niy rab yuy: "Nap ton'a la. Ru nac ru tub moz nu ricy paa. Na par nu b icy paar nu ñuu mi' nu briica nir, nde' nu na riiñ ily zir grica nu gyicy ru. Na gyeed gun gyet lagy ru nur ya", na patroq.

<sup>24</sup> Tees ornu bru'ña ga' yu nu guud tub tant tiñ ni ze', orze' nay rab yu patroq niy: "Ya rad lagya nu ru nac ru tub mbecy nu dzi cyigy lardoo. Gun ru wagyicy ru riiñ, tees rboor ganaz ni de moz nir. <sup>25</sup> Orze' gudziba. Nde' nu ya pcacha tiñ nir lo yu. Nde' nu ii gyash ru ca na nu nir", nay. <sup>26</sup> Orze' patroq ze' nay rab yuy: "Dzi ga mbecy zed nac ru. Dzi ga a' nap ru, benu ru rad lagy ru nu ya ryasha de ganaz ni de moz ne, mas wagyicy uba riiñ. <sup>27</sup> Orze' ¿lagu wanchar ñgya seeñ ru tiñ ze' nañ banc? Gun orze' ornu ndri gyabic ru tiñ ne nu ñuu i'ñ ñi", nay. <sup>28</sup> Orze' na patroq rab yu de yu nu yu' ze': "Blooder tub tant tiñ nu ri yaay. Briic der ñii ni yu nu ricy cup tii tant. <sup>29</sup> Gun mbecy nu bi ricy cup gad zir ñi niy nunu gashtal grusuba' lañ niy. Ze' mbecy nu sac ni gashtal coz miiñ nu ricy cup yu gruuñ niy. <sup>30</sup> Ze' moz wacyiiñ ii, bloo der yu chay ich yu', ze' nu cow. Ze' gun yu nunu siig y lay yu", nay —na Jesuuz—.

### Ornu ribee Crisht ni dela mbecy

<sup>31</sup> 'Ornu ya, biñ nu byac mbecy, chu' nu gaca rey, orze' yapä nu de anc ne nunu chesubä nu gyub ica de mbecy lugaar ze' nu yu' gyel lily ne. <sup>32</sup> Orze' dela mbecy ni gyishlombecy gyatublaazh dey lo. Orze' ya glewa dey nu gyac cyup nac yu gal nu ricy tub mbecy nu rña shily nu co reñ yu shily lat de chiib. <sup>33</sup> Orze' ya zeeda de shily par yaa bee. Ze' de chiib zeeda ma par yaa rega. <sup>34</sup> Orze' ya biñ nu nac rey, nee lo de mbecy nu yu' par yaa bee: "Da der gun ñgyoozh, uz den, nap ricy num der. Gush der gyel nap nu bi bzu ye ñgyoozh ni der ze' nu riib ic mi nese anzir nu gzub gyi' gyishlombecy. <sup>35</sup> Gun ya byana, ze' de ru briic ru coz nu daw. Ya bigya nis, ze' de ru briic ru nis do'. Ya guca mbecy zu nez, ze' de ru bredz ru ya nu gua yu'r. <sup>36</sup> Ya b icy falt shaba, ze' de ru briic ru shaba. Ya gurata, ze' de ru biid güii der ya. Ya bet lagä nañ yu' gyiib, ze' de ru biid zaab lo der ya", nee. <sup>37</sup> Orze' de mbecy nap nu yu' par yaa bee nii dey: "Shuaan de, ¿gul bzaac de ru nu ran ru, ze' briic de coz nu gow ru? O ¿gul bzaac de ru nu rbigy ru nis, ze' briic de nis go'r? <sup>38</sup> O ¿gul bzaac de ru nu zu nez ru, ze' briic de posad nir? O ¿gul b icy falt shab ru, ze' bric de ñii nir? <sup>39</sup> O ¿gul bzaac de ru gurat ru, o gul bzaac de ru rir yu' gyiib, ze' gua zaab lo de ru?" nii dey. <sup>40</sup> Orze' ya, biñ nu nac rey, nee lo dey: "Ya rishli rnée lo dela de ru mbecy nu ni b icy nu de b icya, de mbecy nu blaazha' zir mbecy shni, orze' ni' zi'l b icy nu der ya", nee.

<sup>41</sup> 'Orze' ya, biñ nu nac rey, nee lo de mbecy nu yu' par yaa rega: "Bruu chu de ru lo ii, de ru mbecy nu bzaa lagy ñgyoozh ni. Gua der lo gyi nu rila wayu: lo gyi nu bzu ye ñgyoozh par nuras nu de anc niy. <sup>42</sup> Gun ya byana, ze' de ru wancuic der nu daw. Ya bigya nis, ze' de ru wancuic ru nis do'. <sup>43</sup> Ya guca mbecy zu nez,

ze' de ru wancuedz ru ya nu cha yu'r. Ya b icy falt shaba, ze' de ru wancuic der ñii ne. Ya guratä nunu betlagä nañ yu' gyiib, ze' de ru wancyiid güii der ya", nee. <sup>44</sup> Orze' nii dey lo: "Shuaan de, ¿gul bzaac de ru nu ran ru, o nu bigy ru nis, o nu zu nez ru, o nu sac shab ru, o nu rat ru, o nu rir nañ yu' gyiib, ze' wanlocyuub de ru?" nii dey. <sup>45</sup> Orze' ya, biñ nu nac rey, nee ga' lo dey: "Ya rishli rnée lo der nu la zi'l tiem nu wanlocyuub der mas ñuu tub de mbecy nu blaazha' zir mbecy shni, orze' ni' zi'l wanlocyuub der ya", nee lo dey. <sup>46</sup> Orze' de yu ze' gyet lag dey lo cashtig nu rila wayeca. Ze' de mbecy nap gad nu cui mbañ dey lo ñgyoozh tub la —nam.

### Mbecy bloo ic dey lac mod cut dey Jesuuz

**26** Na ornu blazh mnii Jesuuz dela de riidz ze', orze' nam rab mi de yu nu rsya' lom:

2 —De ru bi rad lagy der nu nañ cyup dzi chu' sa' ni Pas. Orze' ya, biñ nu byac mbecy, gu' dey ya yaa de mbecy par nu cut dey ya lo cruce —nam.

3 Orze' laab tiem ze' de uz zub lo gal nu de yu bel ni de mbecy Israeel byatublaazh dey yu' Caifás, yu nu riib ic de uz. <sup>4</sup> Orze' bloo ic dey tub mod par nu shet lag dey Jesuuz pres nu nac gyel rguu, gun orze' gyicy dey nu gat mi. <sup>5</sup> Tees na dey:

—Walagy ñi shet yaan yu lat sa' gun nis gyach de mbecy —na dey.

### Tub biñ mñaa pcoom asecy too Jesuuz

<sup>6</sup> Na lat nu pcyiiñ Jesuuz Betania yu' Simoo, yu nu gurat gyedz nu la lepra, <sup>7</sup> orze' bru'ña tub biñ mñaa lo Jesuuz nu tub lamet nu byaa nu gyita' nu la alabastro. Dza laa nañ ñi nu yu' asecy zguul nu dzi ñgyup sac. Orze' lat nu gabee Zub mi rom gyit, orze' biñ mñaa ze' pcoom asecy zguul ze' too Jesuuz. <sup>8</sup> Na ornu bzaac de yu nu rsya' lom, orze' guzi lagy dey. Orze' brugyi' rnii dey:

—¿Lagu leew la mnit lom asecy zguul re? <sup>9</sup> Gun nde ñgyac nsa'y ñi par nu sheñ tiñ ñgyaad. Orze' tiñ ze' mbic mi ni de mbecy zi —na dey.

<sup>10</sup> Na ornu gud lagy Jesuuz de coz nu mnii dey, orze' nam rab mi dey:

—¿Lagu ricy seed der biñ mñaa ii? Mi ii ton'a la nap b icy num ya. <sup>11</sup> Gun mbecy zi dub laa tiem yu'y lat der. Tees ya walab dub laa tiem cyiñä lat der. <sup>12</sup> Coz nu b icy biñ mñaa ii num ya ornu pcoom asecy zguul cuerpa ne, nde' par nu rzu lily mi ya par ornu cach dey ya. <sup>13</sup> Ya rishli rnée lo der nu ca zi'l lugaar ni gyishlombecy nu shaal dey riidz nu sac nu bruu lo ñgyoozh, orze' ni' ga' dey coz nu b icy nu biñ mñaa ii ya par nu gyeza' lagy mbecy mi —na Jesuuz.

### Judas bish cyay ich Jesuuz

<sup>14</sup> Orze' Judas Iscariote, tub yu nu bruu lat trocyup de yu nu blosu Jesuuz, gua niiy lo de yu nu riib ic de uz.

<sup>15</sup> Orze' nay rab yu dey:

—¿La be cyish der nę, orze' ya gyabica Jesuuz yaa der? —nay.

Orze' bza' lo dey nu cyish yu gal rub tii tiň plat niy.  
<sup>16</sup> Orze' nese or la ze' brugyi' ryub Judas mod par nu gu'y Jesuuz yaa dey.

### Jesuuz bzeeň mi mod nu gow nu dey losa'y

<sup>17</sup> Dzi loga ni sa' nu row dey gyishtily nu sac lebadur, orze' de yu nu rsya' lo Jesuuz bru'ña dey lom. Orze' na dey rab yum:

—Ca rlagy ru nu chą dę zu yę coz nu gyicy na che dzi sa' ni Pas? —na dey.

<sup>18</sup> Orze' nam rab mi dey:

—Yaa der lat gyedz. Orze' cha der lo i mbecy. Orze' ze' nii der: "Masht nam: Yą byap or nę, nunu yą nu de yu nu rsya' lę ded dę sa' ni Pas yu'r, nam." Ni nii der —na Jesuuz.

<sup>19</sup> Orze' de yu nu rsya' lom b icy dey gal nu mniim. Orze' bzu ye dey tub comid ni dzi sa' ni Pas.

<sup>20</sup> Na or biche, orze' gusub Jesuuz nu de trocyup yu nu rsya' lom nu gyicy dey che. <sup>21</sup> Orze' lat nu ricy dey che, orze' nam rab mi dey:

—Yą rishli rnęe lo der nu lat de ru gruu su tub ru nu cush cyar ichą —nam.

<sup>22</sup> Orze' tona' la b icy shni de yu nu rsya' lom. Orze' tub ga dey brugyi' rgugyi' dey lom. Orze' na dey:

—Shuaaną, ¿walab gaal yą? —na dey.

<sup>23</sup> Orze' na Jesuuz rab mi dey:

—Tub yu nu rne' gyishtily laab naň tub zi'l gya'n nu yą, yu ze' cush cya'y ichą. <sup>24</sup> Gun yą, biň nu byac mbecy, rishli gata gal nu pcaa de yu nu mnii por cuen ni Ñgyoozh. ¡Tees cuaa yu nu cush cya ichą! Nap zir bi b icy na nu cue' ñgyal yu nu ni gyicy ze' —nam.

<sup>25</sup> Orze' na Judas, yu nu bish cya ich mi:

—Masht, ¿walab gaal yą? —nay.

Orze' na Jesuuz:

—Gal nu ru mniir, nde' laab ni —nam.

<sup>26</sup> Na lat nu gabee nguaa dey row yu gyit, orze' Jesuuz gush mi tub gyishtily. Orze' briic mi gras ni Ñgyoozh nu nac ñii. Gaze' nu blew mi ñii. Orze' briic mi ñii ni de yu nu rsya' lom. Orze' nam:

—Gush der gyishtily ii gow ru, gun nii cuerpe ne —nam.

<sup>27</sup> Gaze' nu gushą'm tub taz nu yu' ñup urbyay. Orze' briica'm gras ni Ñgyoozh. Gaze' nu briic mi ñii ni dey. Orze' nam:

—Dela de ru go' der nu yu' naň taz ii. <sup>28</sup> Gun nu nii reňa nu gzu nap ñi trat cub nu b icy Ñgyoozh nu de mbecy. Nu nii reňa nu dushu par nu gruu mbaň zigy mbecy, par nu gyicy sulagy Ñgyoozh ni dela cyi dey.

<sup>29</sup> Ya rishli rnęe lo der nu rila wado' ga' ñup ni urbyay tuuba' tir gashtal shuub la dzi nu do' du de ru ñup cub lugaar ze' nu riib ic Ñgyoozh, uz den —nam.

### Jesuuz mniim nu ne' Bed mi

<sup>30</sup> Na ornu blazh biil num dey tub Salmo, orze' bruu num dey yu' ze' za num dey b icy ni ya Oliva. <sup>31</sup> Gaze' nu nam rab mi dey:

—Rel na dela de ru checa der nu gyicy cup ru consuel lę nu nac de coz nu gzacą, gun ni rniiň lat de riidz ni Ñgyoozh. Orze' nam: "Yą duta biň nu rña shily, orze' dela shily nim grush las ma", nam. <sup>32</sup> Tees despuees ornu gyabaňa, orze' ya gya ga lo de ru par Galilea —nam.

<sup>33</sup> Orze' na Bed rab yum:

—Mas dela dey checa dey nu gyicy cup dey consuel lor nu nac de coz nu gzac ru, tees ya rila wanę ru —nay.

<sup>34</sup> Orze' na ga'm rab mi yu:

—Yą rishli rnęe lor nu laab rel na, anzir nu cuedz ngüel ru' loga ma, chon tir niir nu a' yu' lor ya —nam.

<sup>35</sup> Tees Bed bzu fert yu. Orze' nay:

—Mas gata du ru, tees ya rila wanęe nu a' yu' lo ru —nay.

Nunu ni' zi'l mnii de' zir de yu nu rsya' lom.

### Jesuuz mnii num Ñgyoozh Getsemaní

<sup>36</sup> Orze' Jesuuz gush nez mi zam nu de yu nu rsya' lom tub lugaar nu la Getsemaní. Orze' nam:

—Bzub der ii lat nu yą chą par re nu neę du Ñgyoozh —nam.

<sup>37</sup> Orze' za nu reň mi Bed nu rup laa i'ñ Zebedeo. Orze' brugyi' ricy shnim, nunu ton'a la deet rac naň lardoomb. <sup>38</sup> Orze' nam rab mi dey:

—Yą rlagy la gata nu tanta' shni rac naň lardoo. Blez der ii nunu bzu der altant nu ya —nam.

<sup>39</sup> Gaze' nu gua ga'm sňuu miň par lo. Orze' wes saa tiily mi lo yu nunu brugyi' rnii num Ñgyoozh. Orze' nam:

—Uza, benu gac, ¿a wabo chur taz nu gzuub ru'? Tees cue' gac ñii gal nu rlagya sinu gal nu rlagy ru —nam.

<sup>40</sup> Na ornu bish cyam lo de yu nu rsya' lom ze', orze' byap mi dey nguaas nas yu. Orze' nam rab mi Bed:

—¿Walab gaal ni ñuu tub or wangagye der nu nzu der altant nu ya? <sup>41</sup> Bzu der altant nunu mnii nu der Ñgyoozh, gun orze' cue' gyicy de coz cyi gan der. Gun naň lardoo der rlagy ru gyicy ru coz nap tees cuerpe ni der wacyiň ñi —nam.

<sup>42</sup> Orze' nu cyup la nu rzam nu rnii num Ñgyoozh, orze' nam:

—Uza, ben a wac co chur taz nu gzuub ru' o gashtal do' la ñii, tees gac ñii gal nu ru rlagy ru —nam.

<sup>43</sup> Orze' bish cya ga'm tuuba' tir zam lo dey. Orze' ni' zi'l byap mi dey nguaas nas yu, gun rsuun la pcaal dey tanta' nu yeed ñi. <sup>44</sup> Orze' bzeeň mi dey za ga'm nu nii num Ñgyoozh tir chon la. Orze' mniim laab de riidz nu mniim or loga. <sup>45</sup> Orze' bish cya ga'm lo dey. Orze' nam rab mi dey:

—¿Walab gaal gabee nas ru' der nunu gabee rzu lagy der? Na bi ryap or nu ya, biň nu byac mbecy, gu' dey ya yaa de mbecy cyi. <sup>46</sup> Wes su der yaa na. Gun bi yad gaab yu nu cush cya icha —nam.

### Za nu dey Jesuuz pres

<sup>47</sup> Lat nu gabee rnii ru'm, lueg la bru'ña Judas, tub yu nu bruu lat trocyup de yu nu rsya' lom. Bru'ñay nu zi-gy mbecy nu nuu mandzicy, nu yu nu nuu garot. Yad dey par mandaar ni de yu nu zub lo ni de uz, nunu par mandaar ni de yu bel ni de mbecy Israeel. <sup>48</sup> Ze' Judas, yu nu bish cya ich mi, bi mniiy lo dey lac mod gyicy yu par nu gad lagy dey cyu Jesuuz. Orze' mniiy:

—Yu nu daw chit lo, yu ze' nde'. Orze' gua nu der yu pres —mniiy lo dey.

<sup>49</sup> Na ornu bru'ña Judas lo Jesuuz, orze' becha'y lom. Orze' nay rab yum:

—Masht, shnu ru! —nay.

Orze' bdow yu chit lom. <sup>50</sup> Orze' na Jesuuz rab mi yu: —Judas, b icy ca na la nu yad ru gyicy ru —nam.

Orze' becha' de mbecy lom. Bdu' yaa dey mi. Gaze' nu za nu dey mi pres.

<sup>51</sup> Tees tub yu nu zu nu Jesuuz bloo zay mandzicy niy naň gyid yu'ñ. Orze' pcyug yu gyidag tub moz ni yu nu riib ic de uz. <sup>52</sup> Orze' na Jesuuz:

—Bdu' choow mandzicy ze' se'ñ gun dela yu nu rgyish lo lo mandzicy gat yu nu mandzicy. <sup>53</sup> ¿A wagad lagy der nu ya gac nee lo Ñgyoozh, uza, nu zeed mi zigy zir anc par trocyup nac soldad nu locyuub dey ya?

<sup>54</sup> Tees benu ni, ¿lac mod gac par nu gyu' ni de riidz ni Ñgyoozh gal nu rniiñ nu gac? —nam.

<sup>55</sup> Orze' na Jesuuz rab mi de mbecy zigy ze':

—¿Lagu yad tub der ya gal nu rza tub dey tub gubaan: nu mandzicy nu garot? Gun de dzi la bri blyuu ni der lol'i ni yu' nu driib zily mbecy Ñgyoozh. Nunu wancu' yaa der ya nu ñgya nu der ya pres. <sup>56</sup> Tees dela nii ni raac ñi par nu gyu' niñ gal nu bi cañ lat de riidz ni Ñgyoozh, gal nu mnii de yu nu mnii por cuen nim —na Jesuuz.

Orze' laab or la ze' dela de yu nu rsya' lom bzeeñ dey mi. Bruu chu dey lom zay.

### Jesuuz zam lo junt zab lo

<sup>57</sup> Orze' de yu nu gua tub Jesuuz gua nu dey mi yu' Caifás, yu nu riib ic de uz. Ze' byatublaazh de yu nu rlyuu leey ni Ñgyoozh, nu de yu bel ni de mbecy Israeel. <sup>58</sup> Ze' Bed gua cay ich Jesuuz. Orze' zet zet zi'l zaab yu ich mi gashtal bri lay lol'i ni yu nu riib ic ze'. Orze' gu'y gusub yu lol'i ze' nu de yu nu rña yu' ze' par nu güiyy ben lac mod za' lo dey nu Jesuuz.

<sup>59</sup> Orze' de uz zab lo, nu dela de yu nu zu riiñ lat junt zab lo byub dey mod par nu griib dey cyi fals toom, gun orze' gad mod nu cut dey mi. <sup>60</sup> Tees rila wangad ni tub la mod ni dey mas zigy mbecy gua dey briib dey gyidza toom. Orze' gal brusu gaal cyup mbecy. <sup>61</sup> Orze' na dey:

—Yu ii nay: "Ya gac tilya yu' nu driib zily den Ñgyoozh, nunu naň chon dzi gac shes su ñii tuuba' tir", nay —na dey.

<sup>62</sup> Orze' yu nu riib ic ze' wes suy, orze' nay rab yu Jesuuz:

—¿A waniir lagu sac falt nir? ¿La ñuu cyi driib dey ic ru? —nay.

<sup>63</sup> Tees Jesuuz ri zi'l zum. Rila waniim. Orze' na ga' yu nu riib ic ze':

—Rishli gaal ni Ñgyoozh mbañ, mnii lo de benu nac ru Mesías, biň nu nac i'ñ Ñgyoozh —nay.

<sup>64</sup> Orze' na Jesuuz rab mi yu:

—Laab gal nu ru mniir. Ya rishli rnęe lo der nu gzac der ya, biň nu byac mbecy, zuba par yaa bee Ñgyoozh, biň nu rac ricy de lo la coz ily. Nunu gzac der ya yapä lat za —nam.

<sup>65</sup> Orze' yu nu riib ic ze' pshala lay shab yu par nu gabe nu walab se'ñ mniim. Orze' nay:

—Yu ii bzat ziy Ñgyoozh. ¿La' zir be teshtig rlagy ñi par yu ii? Na bi güeñ der de riidz a' nap nu mniiy. <sup>66</sup> ¿La ñuu rnii too der? —nay.

—Yu ii yu' falt niy nunu rlagy ñi gat yu —na dey.

<sup>67</sup> Orze' brugyi' rcoo yeñ dey lom. Nunu brugyi' nu rgaaz dey mi. Ze' yu' ga' dey briich yaay lom.

<sup>68</sup> —Ru, Mesías, jmniil o de cyu briich yaa lor! —na dey.

### Bed mne'y Jesuuz

<sup>69</sup> Na Bed gusub yu lol'i ni ich yu' ze'. Orze' bru'ña tub criad loy. Orze' naň rab ñiy:

—Ni' ru gusa nur Jesuuz, biň nu bruu Galilea, ¿shiñ? —naň.

<sup>70</sup> Tees Bed mniiy nu walab lo rgüii la dela mbecy. Orze' nay:

—Ya wagad lagya la coz rniir —nay.

<sup>71</sup> Orze' zay par gyero'. Ze' bzaac tuuba' criad yu. Orze' naň rab ñi de mbecy nu yu' ze':

—Ni' mbecy ii gusa num Jesuuz, biň nu bruu Nazaret —naň.

<sup>72</sup> Orze' ni' zi'l mnii Bed nu walab. Orze' nay:

—Ñgyoozh shiñ gyicy num ya benu ya walab rishli rnęe. ¡Ya a' yu' lo cyu mbecy nde! —nay.

<sup>73</sup> Na guchi ga' sňuu nde', orze' de yu nu yu' ze' na dey rab yu Bed:

—Wanted la ni' ru nac ru tub yu nu bruu lat dey, gun rabee nu nac mod nu za riidz nu rniir —na dey.

<sup>74</sup> Orze' Bed nay:

—Ñgyoozh shiñ gyicy num ya benu walab rishli rnęe. ¡Ya a' yu' lo cyu mbecy nde! —nay.

Orze' laab or la ze' bredz nguel. <sup>75</sup> Orze' byeza' lag yu de coz nu mnii Jesuuz ornu nam: "Anzir nu cuedz nguel ru' loga ma, ru niir nu a' yu' lor ya chon tir" —nam. Orze' bruu Bed zay. Nunu tonal' la zi ruun yu.

### Jesuuz zam lo Pilato

<sup>27</sup> Laab bza' yu la tuuba' dzi, orze' de uz zab lo gal nu de yu bel ni de mbecy Israeel byatublaazh

dey par nu go dey riidz ben lac mod gyicy dey par nu gat Jesuuz. <sup>2</sup> Orze' pcyig dey mi za nuy mi. Orze' bgu' dey mi yaa Poncio Pilato, yu nu riib ic por cuen ni gubier Rom.

### Gut Judas

<sup>3</sup> Na ornu Judas, yu nu bish cya ich Jesuuz, ornu gud lagy yu nu mnii dey nu gat Jesuuz, orze' brugyi' nu rnii tooy nu nap zir benu cue' ſlyuuuy Jesuuz lo dey. Orze' bish cyay gua zeeñ yu gal rub tii tiñ plat ze' lo de uz zub lo, nu lo de yu bel ni de mbecy Israeel. <sup>4</sup> Orze' nay:

—Ya Shiñ b icyä nu nac nu bish cya ich tub mbecy nu sac falt ni, nunu gashtal cut la dey yu —nay.

Tees de yu ze' nay rab yuy:

—Par nu nac nu nde' se la la nu ricy ñi n e d e ya.

¡Nde' cuen ni ru! —na dey rab yu Judas.

<sup>5</sup> Orze' mne' la Judas tiñ ze' loli' ni yu' nu driib zily mbecy Ñgyoozh. Orze' bruuy ze' yay. Orze' bzaab gyiy ub yu.

<sup>6</sup> Orze' de uz zub lo pte' dey dela tiñ ze'. Orze' na dey:

—Wac zeeñ den tiñ ii nañ alcansi ni gun, gun tiñ ii b icy ñi nu gut mbecy —na dey.

<sup>7</sup> Orze' psaap dey riidz ben lac gyicy nu dey tiñ ze'. Orze' wii dey tub nac yu nu la Yu ni Mbecy nu Rzaa Gyis. Orze' yu ze' wii dey ñi nu tiñ ze', par nu gac ñii tub campyoo nu cach dey de mbecy yad. <sup>8</sup> Nde' nu gashtal tiem na, yu ze' lañ Yu nu Guud nu Nac Reñ.

<sup>9</sup> Ni mod guc ñi par nu byu' niñ gal nu mnii Jeremías, tub yu nu mnii por cuen ni Ñgyoozh, ornu nay:

Orze' gush dey gal rub tii tiñ plat ze',  
pres nu mnii de mbecy Israeel nu cyish dey nu nac mi.

<sup>10</sup> Orze' nu tiñ ze' wii dey tub nac yu nu la Yu ni Mbecy nu Rzaa Gyis,  
gal nu mnii Ñgyoozh lo nu gyicya,  
na Jeremías.

### Jesuuz zum lo Pilato

<sup>11</sup> Na Jesuuz zum lo yu nu riib ic por cuen ni gubier par nu cugyi'y lom. Orze' nay:

—A ru nac ru rey ni de mbecy Israeel? —nay.

Orze' na Jesuuz:

—Laab ni gal nu ru mniir —nam.

<sup>12</sup> Orze' de uz zub lo ze' gal nu de yu bel ni de mbecy Israeel brugyi' driib dey cyi too Jesuuz, tees rila wannim. <sup>13</sup> Orze' Pilato bdugyi' lom tuuba' tir:

—A wagyeñ ru de cyi nu driib dey toor? —nay.

<sup>14</sup> Tees Jesuuz ni tub riidz wannim. Orze' Pilato, yu nu riib ic ze', tona' la za nu ic yu.

### Mnii dey nu Jesuuz rlagy ñi gat mi

<sup>15</sup> Na de ña'n la, lat nu rzu' sa' ni Pas, orze' yu nu riib ic ze', rlaay tub pres: ca zi'l na yu nu gnii mbecy nu du laa. <sup>16</sup> Tees tiem ze' ri tub mbecy nu la Barrabás pres. Yu ze' dela mbecy yu' lo dey yu par nu dzi coz ily b icy

yu. <sup>17</sup> Orze' lat nu bi yu' tublaazh de mbecy, orze' na Pi lato rab yu dey:

—Ca na mbecy rlagy der nu glaa? A glaa Barrabás o ti glaa Jesuuz, yu nu rnii der Mesías? —nay.

<sup>18</sup> Ni mniy gun nap gud lagy yu nu nac gyel rasaap lagy, nde' nu bgu' dey Jesuuz yaay.

<sup>19</sup> Na lat nu gusub Pilato lugaar ze' nu dri beey cyi, orze' bzeed mñaay tub rasqo loy. Orze' nam: "Cue' ne' ic ru lat asunt ni mbecy nu sac falt ni ze', gun che ton a la shiñ bguu pcaa la nu nac mi ze", na mñaay.

<sup>20</sup> Tees de uz zub lo ze' gal nu de yu bel ze' pcuug y dey lardoo de mbecy zigy nu cyiñ dey nu glaa Pilato Barrabás. Orze' cyiñ dey nu gat Jesuuz. <sup>21</sup> Tees ornu ni b icy dey, orze' Pilato, yu nu riib ic ze', orze' bdugyi' y lo dey tuuba' tir. Orze' nay:

—Ca na dey lo cyup yu rlagy der nu glaa yu? —nay.

Orze' na de mbecy:

—Barrabás! —na dey.

<sup>22</sup> Orze' na ga' Pilato:

—Ze' ñla coz rlagy der nu gyicya du Jesuuz, yu nu rnii der Mesías? —nay.

Orze' dela dey mniy:

—Cut ruy lo cruuuz! —na dey.

<sup>23</sup> Orze' na ga' Pilato:

—La ñuu coz a' nap b icy yu? —nay.

Tees dzi zir bish ti dey. Orze' na dey:

—Cut ruy lo cruuuz! —na dey.

<sup>24</sup> Na ornu Pilato gud lagy yu nu wayicy yu gan, sinu de mbecy zigy bi yu' la dey nu gyicy yu coz deet, orze' mniy lo tub mbecy nu cha gyiyyi nis par nu naay lo rgüii la dela mbecy. Orze' nay:

—Ya sac falt n e. Benu cut der mbecy nap ii, nde' falt ni de ru —nay.

<sup>25</sup> Orze' na ga' de mbecy zigy:

—Nu gat yu ze', nde' cuen n e d e ya, gal nu ni de nez d e n u gruu zac par lo —na dey.

<sup>26</sup> Orze' Pilato blaay Barrabás nu nac de riidz nu mnii de mbecy. Orze' b icy yu mandaar nu gaaaz dey Jesuuz. Orze' bgu' y mi yaa dey par nu caa dey mi lo cruuuz.

<sup>27</sup> Orze' de soldad gua nu dey mi nañ yu' ze' nu riib ic de gubier. Orze' dela soldad nu yu' ze' byatublaazh dey lom. <sup>28</sup> Orze' bloo dey shab mi. Orze' bzuu dey mi tub negy ña. <sup>29</sup> Gaze' nu bel dey ya gyech. Bzaa dey tub coron nu bri dey toom. Orze' bzuu dey tub yagi yaa beem. Orze' gusu tib dey lom. Nunu brugyi' rguu bdzaa dey mi. Orze' na dey:

—Shnu ru, rey ni de mbecy Israeel —na dey.

<sup>30</sup> Orze' brugyi' rco yeñ dey lom. Orze' bloo dey yag nu zu yaam ze', nunu brugyi' rshet dey ñi toom. <sup>31</sup> Ornu blazh bguu bdzaa dey mi, orze' bloo dey negy ña ze' yeñ mi. Orze' bzuu dey mi laab shab mi. Orze' za nu dey mi par nu caay mi lo cruuuz.

### Pcaa dey Jesuuz lo cruuuz

<sup>32</sup> Orze' nez nu za dey bdzeel yu tub mbecy Cirene, yu nu la Simqo. Orze' por fers la pcaa dey yu nu cha nuy cruuuz ni Jesuuz. <sup>33</sup> Orze' bru' ña dey tub lugaar nu la Gólgota. Nde' tub riidz nu yaruuñ: Lugaar ni cyug

too añ. <sup>34</sup> Gaze' nu briic dey ñup urbyay nu yu' can nu tub lo coz lya nu go'm. Tees ornu bicy mi preb ñi, orze' wangalagy mi go'm ñii.

<sup>35</sup> Orze' pcaa dey mi lo cruuuz. Orze' de soldad bloo dey cuen ben ca na dey dugiy tub ga shab mi. <sup>36</sup> Despuees ni de nu nde', orze' gusub dey nu rñay mi.

<sup>37</sup> Orze' par too cruuuz nu pcaa dey mi, pcaa dey tub gyicy cyim nu rniiñ de falt nim. Orze' rniiñ: "Yu ii Jesuuz, rey ni de mbecy Israeel", rniiñ.

<sup>38</sup> Orze' ni' zi'l pcaa dey cyup gubaan lo cruuuz cuit mi: tub yu par yaa beem, ze' tuuba'y par yaa reg mi.

<sup>39</sup> Orze' de mbecy nu rded lom rgyib la ic dey nu gyel rgubdzaa, nunu rab zi dey mi. <sup>40</sup> Orze' na dey:

—Ru mniir nu nit lor yu' nu driib zily mbecy Ñgyoozh, nunu nañ chon dzi mniir nu shes sur ñii. ¡Na bloo mbañ ub ru na! Benu rishli nac ru i'ñ Ñgyoozh. ¡Bet lo cruuuz! —na dey.

<sup>41</sup> Ni' zi'l de uz zub lo, nu de yu nu rlyuu leey ni Ñgyoozh, nu de yu bel ni de mbecy Israael bgubdzaa dey mi.

<sup>42</sup> Orze' na dey:

—Bloo mbañ yu reña' mbecy, tees ub yu wagac co mbañ yu. Nunu nac yu rey ni de mbecy Israeel. Ze' be-nu gyet yu lo cruuuz, orze' cheña lagy den niy. <sup>43</sup> Bicy cup yu consuel lo Ñgyoozh. Na rlagy ñi co mbañ Ñgyoozh yu benu rishli yet lagy mi mod nu bicy yu, gun rniiy nu nac yu i'ñ mi —na dey.

<sup>44</sup> Orze' ni' zi'l de gubaan nu ca num lo cruuuz brugyi' nu rgubdzaa dey mi.

### Gut Jesuuz

<sup>45</sup> Orze' tub or widoo bet cow dutuub la lo yu gal tub gyiib chon or gudze, gaze' nu bzu yaa. <sup>46</sup> Gaze' nu or ze' ye brish ti Jesuuz. Orze' nam:

—Elí, Elí, ¿lema sabactani? —nam.

Riidz ze' yaruuñ: "Ñgyoozh ne, Ñgyoozh ne, ¿lagu bzaan ru ya?"

<sup>47</sup> Orze' la be mbecy nu yu' ze', ornu güeñ dey nu brish tim, orze' na dey:

—Yu re rbedz yu Elías, yu nu mnii por cuen ni Ñgyoozh —na dey.

<sup>48</sup> Orze' lueg la tub mbecy gush yu carer gua gyiyy tub coz nu chayo' nis. Orze' psal yuñ lo ñup zii ni urbyay. Gaze' nu bzuub yuñ lo tub yagyi. Briic yuñ go'm.

<sup>49</sup> Tees de' zir mbecy na dey:

—Blez güiin, ben a cyid Elías nu co mbañ yuy —na dey.

<sup>50</sup> Orze' tuuba' tir ye brish tim. Orze' gut mi. <sup>51</sup> Orze' laab or ze' negy nu zaab gyero' ni lugaar yon nañ yu' nu driib zily mbecy Ñgyoozh pshala lañ gaal zi nu gush ñi gal ic lañ nu gal lo yu la. Nunu briib duru. Nunu de gyita' bet rich ñi. <sup>52</sup> Nunu de baa ni añ byaal ru'ñ. Nunu zigy mbecy ni Ñgyoozh nu bi gut byabañ dey. <sup>53</sup> Orze' bruu dey gyerbaa niy. Na despuees, ornu byabañ Jesuuz, orze' bya dey Jerusaleeng, gyedz ni Ñgyoozh. Orze' ze' zigy mbecy bzaac dey de yu ze'.

<sup>54</sup> Na ornu bzaac yu nu riib ic de soldad gal nu de' zir soldad nu briib duru ze' nu dela de' zir coz nu guc, orze' gudzib dey. Orze' na dey:

—¡Rishli gaal biñ ii guc mi i'ñ Ñgyoozh! —na dey.

<sup>55</sup> Orze' zet yu' zigy biñ mñaa. Rgüii dem lo Jesuuz. Laab de mi ze' biñ nu gua ca ich Jesuuz nese nu gusam Galilea, nunu blocyuub dem Jesuuz. <sup>56</sup> Lat de biñ mñaa ze' ri Li nu bruu tub gyedz nu la Magadán, nu tuuba' Li, ñaa Santiag nu See, nu ñaa de i'ñ Zebledo.

### Pcach dey Jesuuz

<sup>57</sup> Na or bi yecheñ, orze' bru'ña See, tub mbecy guani'ñ nu bruu Arimatea. Ni' yu ze' nac yu tub yu nu rsya' lo Jesuuz. <sup>58</sup> Orze' guay lo Pilato, nu bdiiñ yu cuerp ni Jesuuz loy. Orze' Pilato mniy nu cuic dey cuerp ni Jesuuz ni See. <sup>59</sup> Orze' gush yu cuerp nim, nunu ptiish yuñ tub sab cacy fin. <sup>60</sup> Orze' gua riy mi nañ tub gyerbaa cub ni ub yu. Gyerbaa ze' sa bicy yu mandaar nu bduuñ dey ñi nañ gyita'. Orze' psoow yu ru'ñ nu tub gyita' ily. Orze' yay. <sup>61</sup> Tees Li nu bruu Magadán, nu tuuba' Li gucua dem ru' baa ze'.

### Mña dey gyerbaa ni Jesuuz

<sup>62</sup> Na or bza' yu tuuba' dzi, laab nde' dzi nu rzu lagy mbecy, orze' de uz zub lo, nu de mbecy fariseo gua dey lo Pilato. <sup>63</sup> Orze' na dey:

—Shi Pilato, byeza' lagy de nu lat nu gabee mbañ mbecy rguu ze', orze' nay: "Ornu bi bza' chon dzi nu guta, orze' gyabaña", nay. <sup>64</sup> Nde' nu neñ lor nu gyicy ru mandaar lo de mbecy nu cha ña dey ru' baa niy gashtal shuub la dzi chon, gun nis ru'ña de yu nu rsya' loy rel. Orze' co dze dey cuerp niy. Gaze' nu nii dey lo mbecy nu byabañ yu. Orze' benu ni gac nu nac gyel rguu ze', orze' shiñ zir gruuñ gaze' gyel rguu nu mnii Jesuuz nu loga —na dey.

<sup>65</sup> Orze' na Pilato:

—Gac cha nu der de soldad nu gña dey. Gua der nu gyicy segur ru ru' baa niy. Ca na la benu gac —nay.

<sup>66</sup> Orze' bruu dey zay. Nunu bicy segur dey ru' baa. Orze' pcaa dey beey lo gyita' nu rsoow ru' gyerbaa ze'. Nunu bzeeñ dey soldad ze' nu rña dey.

### Jesuuz byabañ mi

**28** Na or bded sab, dzi nu rzu lagy mbecy, ornu bza' yu noming napor, orze' Li nu bruu Magadán, nu tuuba' Li gua dem gal ru' baa ni Jesuuz. <sup>2</sup> Orze' de repent la briib tub duru ily. Orze' bruu tub anc ni Ñgyoozh gashtal gyibaa. Bet yu lo yu. Orze' ptuyub yu gyita' nu rsoow ru' gyerbaa ze'. Gaze' nu gusub yu tooñ. <sup>3</sup> Anc ze' rabee gal nu rabee gyi ni guzii. Ze' shab yu, nde' tub negy cacy iily laa. <sup>4</sup> Na ornu bzaac de soldad anc ze', orze' gush la bis dey nu tanta' gudzib yu. Orze' bdzo'w la dey. <sup>5</sup> Orze' anc ze' nay rab yu de biñ mñaa ze':

—Cue' dzib der. Ya rad lagya nu de ru ryub der Jesuuz, biñ nu gut lo cruuuz. <sup>6</sup> Saca'm ii. Bi byabañ mi gal nu

mniim nu gzac mi. Orze' da der da güiir lugaar ze' nu bri dey mi.

<sup>7</sup> Orze' na ga' anc ze':

—Dzach zi der yaa niir lo de yu nu rsya' lom. Niir nu Jesuuz bi byabañ mi. Orze' mi ze' bi ya gam lo der par Galilea. Re zac der mi. Ni niir lo dey. Nde' coz nu ca lo cuen nu nēe lo der —na anc ze'.

<sup>8</sup> Orze' dzach bruu dem ru' baa ze' yam carer. Gudzib dem tees ni' zi'l tona' la yet lagy dem. Orze' ya dem carer ya num rasoo lo de yu nu rsya' lo Jesuuz. <sup>9</sup> Orze' sij la bruu zac Jesuuz lo dem. Orze' nam:

—Shnu ru —nam rab mi biñ mñaa ze'.

Orze' de mi ze' becha'm lo Jesuuz. Orze' bduyaa dem yeñ gyi'm nunu pca dem mi. <sup>10</sup> Orze' na Jesuuz rab mi de biñ mñaa ze':

—Cue' dzib der. Yaa nii der lo de bicya nu gya dey Galilea. Orze' ze' zac dey ya —nam.

#### Rishtoo lo ni de soldad nu rña ru' baa

<sup>11</sup> Na lat nu bi ya de biñ mñaa ze', orze' la be de soldad nu mña ru' baa ze' byay nu bya tooy riidz lo de uz zub lo dela de coz nu guc. <sup>12</sup> Orze' de uz zub lo ze' guay gua tooy rishlo de yu bel ni de mbecy Israeel par nu gyicy dey tub zi'l riidz. Orze' sheñ tiñ briic dey ni de soldad. <sup>13</sup> Orze' na dey rab yu de soldad ze':

—Rlagy ñi nii der nu de yu nu rsya' lo Jesuuz, gua dey rel, orze' bloo dze dey cuerپ ni Jesuuz lat nu nas der. <sup>14</sup> Nunu benu gyeñ Pilato, yu nu riib ic, nu ni mod bzac der, orze' dę ya cyaag dę ic yu, gun orze' dę ya soow su de ru loy —na dey.

<sup>15</sup> Orze' de soldad ze' gush dey de tiñ ze'. Orze' b icy dey gal nu mnii de uz zub lo ze'. Orze' riidz nu mnii de soldad ze', nde' riidz nu zaab lat de mbecy Israeel mas gashtal dzi na.

#### Jesuuz bdu'm riiñ yaa de yu nu rsya' lom

<sup>16</sup> Orze' de trotub yu nu rsya' lom gua dey Galilea gashtal logyi' ze' nu mnii Jesuuz nu cha dey. <sup>17</sup> Orze' ornu bzaac dey mi, orze' pca dey mi. Nomaas yu' la be mbecy lat dey nu wangad lagy dey ti laab mi. <sup>18</sup> Orze' Jesuuz byagaab mi lo dey. Orze' nam rab mi dey:

—Ñgyoozh briic mi rishbeey nę nu gyicya dela coz gyibaa nu gyishlombecy ii. <sup>19</sup> Gua der lo dela mbecy nu yu' dutuub la gyishlombecy, nunu gyicy der nu gyac dey mbecy nu rsya' lo. Nunu briic der nu zu nis dey par nu gabe nu nac nu dey Ñgyoozh uz den, nunu par nu gabe nu nac nu dey ya i'ñ mi, nunu par nu gabe nu nac nu dey Espiriit Yon nim. <sup>20</sup> Nunu lyuu der ni dey nu gyicy paay nu dela coz nu mnęe lo der. Nunu cue' nit lagy der nu ya nac du der dub laa tiem gashtal shuub la dzi ni gyishlombecy ii —nam.

# San Marcos

**Waa nu briibnis mbecy rniy de riidz ni Ñgyoozh tub lugaar ub zi**

**1** Nu loga la ni de riidz nu sac nu rnii de coz ni Jesu-  
crist, i'ñ Ñgyoozh.<sup>2</sup> Isaías, yu nu mnii por cuen  
ni Ñgyoozh nil bi pcaay:

Ñgyoozh nam rab mi Mesías:

Yä zuu nezä tub mbecy nu cha nuy rasoo né.  
Yu ze' cha gay lo ru.

<sup>3</sup> Zaab ti' tub mbecy rbishtiy tub lugaar ub zi.  
Orze' nay:

"Nañ lardoo den nañ gal nu na tub nez.  
Orze' b icy nap der nez ze' par ornu cyid Shuaan den.  
Pshaal der tub nez nu li par nu ded mi", nay.

<sup>4</sup> Orze' mbecy nu bzoo nez Ñgyoozh ze', nde' Waa nu  
briibnis mbecy. Pcyiñ yu tub lugaar ub zi nunu blyuu  
ni de mbecy nu rlagy ñi ne' dey dela cyi nu ricy yu,  
nunu gzu nis dey. Orze' gyicy sulagy Ñgyoozh de cyi  
dey. <sup>5</sup> Orze' zigy mbecy nu yu' lo yu ni Judea nunu zigy  
de mbecy nu yu' Jerusaleeng rza dey loy nu rzuub  
gyidag dey de riidz nu rniyi. Na ornu blazh pshuub ru'  
dey dela cyi nu ricy dey na, orze' Waa briic yu nu wi nis  
dey gyoow Jordaaang.

<sup>6</sup> Na shab Waa, nde' byaañ nu gyich camey. Ze' nañ  
yu ri tub sinch gyid. Coz nu bdow yu, nde' gushagy nu  
dзи doo ni bez gyish. <sup>7</sup> Orze' nay rab yu de mbecy:

—Par lo ya bi yad la tuuba' mbecy nu gac gyicy coz  
ily zir par ya. Ya ni wayapä nu shaagyä gyid nu Zub  
gyid lab mi. <sup>8</sup> Ya ricä nu zu nis der nu nis, tees mi ze'  
cuic mi Espiriit Yon ni der —na Waa.

## Bzu nis Jesuuz

<sup>9</sup> Orze' guc ñi tiem ze' nu Jesuuz bruum Nazaret, tub  
gyedz nu ri lo de yu ni Galilea. Zam lo Waa gal ru' gy-  
ooow Jordaaang. Orze' Waa briic yu nu zu nis mi gyoow  
ze'. <sup>10</sup> Orze' cuanzir nu bruum lo nis, bzaac mi byaal  
baa. Orze' Espiriit Yon ni Ñgyoozh gal nu na tub begy  
nam bet mi gusub mi toom. <sup>11</sup> Orze' zaab ti' Ñgyoozh  
gal gyibaa rniim. Orze' nam:

—Ru nac ru i'ñä, biñ nu tona' la rca, nunu tona' la yet  
lagya —nam.

## Jesuuz guc preb mi

<sup>12</sup> Gaze' nu lueg la Espiriit Yon ni Ñgyoozh gua num  
Jesuuz tub lugaar ub zi. <sup>13</sup> Orze' cyuu dzi brim lugaar  
ub zi ze'. Ze' b icy nuras preb mi. Ze' brim lat de bañ  
gyish. Tees de anc bzu bich dey nu nac mi.

<sup>14</sup> Na despuees nu guti Waa yu' gyiib na, Jesuuz bru-  
um lo yu ni Judea, zam par lo yu ni Galilea nu shaal mi  
riidz nu sac ni Ñgyoozh. <sup>15</sup> Orze' nam:

—Na bi pshuub dzi nunu sñuu ga cyid gyel gubier ni  
Ñgyoozh. Orze' mne' der dela cyi nu ricy ru, nunu b icy  
cup der consuel lo de riidz nu sac ze' —nam.

## Jesuuz bredz mi tap de yu nu rub bel

<sup>16</sup> Na tub dzi na bded mi ru' nisyudoo ni Galilea.  
Orze' bzaac mi Simooq nu Ndrees b icy yu. Yu' dey nu  
driy gyish nu rub bel lo nisyudoo, gun ruplaa dey nac  
yu mbecy rub bel. <sup>17</sup> Orze' na Jesuuz rab mi dey:

—Da ca der ichä. Orze' ya gyicyä nu gal nu rub der  
bel, ni' zi' te' der mbecy gun orze' cyid ca dey ichä  
—nam.

<sup>18</sup> Orze' lueg la bzeeñ dey gyish niy za cay ich mi.

<sup>19</sup> Na ornu bza ga'm sñuu miiñ par lo, ze' bzaac mi  
Santiag, i'ñ Zebedeo, nu b icy yu Waa yu' dey nañ barc.  
Laaba' gyish nu rub bel ricy nap dey. <sup>20</sup> Laab bzaac lam  
dey bredza' lam yu. Orze' lueg la bzeeñ dey uz yu  
Zebedeo nañ barc nu de moz niy. Orze' za ca la dey ich  
mi.

## Tub mbecy nu b icy ni nuras byac yu

<sup>21</sup> Gaze' nu bri num dey tub gyedz nu la Capernaum.  
Sab, dzi nu rzu lagy mbecy, gu' num dey nañ yu' nu  
rsya' de mbecy Israeel riidz ni Ñgyoozh. <sup>22</sup> Tona' la za  
nu ic dey de coz nu rlyuum, gun rlyuum ni dey gal nu  
rlyuu tub mbecy nu riib ic za' la, walab gal nu ricy de  
yu nu rlyuu leey ni Ñgyoozh. <sup>23</sup> Na nañ yu' nu rsya' de  
mbecy riidz ni Ñgyoozh ze', ri tub mbecy nu b icy ni  
nuras. Orze' rbish tiy. <sup>24</sup> Orze' nay rab yu Jesuuz:

—¿Lagu yad ru lat de Jesuuz Nazaret? ¿A yad ru nu  
za' lor de ya? Ya rad lagya nu ru nac ru mbecy yon ni  
Ñgyoozh —nay rab yu Jesuuz.

<sup>25</sup> Orze' Jesuuz bdza'm ni nuras ze'. Orze' nam rab mi  
yu:

—Dzi chel nunu bruu chu lo yu ii —nam.

<sup>26</sup> Orze' nuras ze' b icy yu nu b icy ñi bi ni mbecy ze'.  
Nunu rbish tiy. Gaze' nu bruu chuy loy. <sup>27</sup> Orze' dela de  
mbecy ze' za nu la ic dey nunu brugyi' rnii dey lo  
losa'y:

—¿Lac yaruu nii? Rlyuu tub leey cub, nunu rlyuu  
gal nu ricy mbecy nu riib ic za' la. ¡Gaza' nuras ricy yu  
mandaar, nunu rzuub gyidag dey niy! —na dey.

<sup>28</sup> Orze' lueg la brush las de riidz ni de coz nu b icy Je-  
suuz dela lugaar nu yu' gaab ga Galilea.

### Jesuuz b icyac mi ñaa gud Bed

<sup>29</sup> Cuanzir bruum nañ yu' nu rsya' mbecy riidz ni Ñgyoozh ze', orze' guam yu' Simqo nu Ndrees. Gua num Santiag nu Waa. <sup>30</sup> Tees ñaa gud Simqo riib rat mi. Pcaañ zig nim. Cuanzir bru'ña Jesuuz, mnii dey lom nu rat mi. <sup>31</sup> Gaze' nu gua Jesuuz bdu' yaam yaa biñ rat ze' pshes sum mi. Orze' lueg la bruu zigy mi, nunu brugyi' rzu bich mi nu nac dey.

### Jesuuz b icyac mi zañ mbecy rat

<sup>32</sup> Na ornu bi za doo, or nu bi yecheñ, orze' de mbecy bru'ña nu dey dela mbecy rat nunu dela mbecy nu b icy ni nuras lo Jesuuz. <sup>33</sup> Nunu dela mbecy gyedz by- atublaazh dey ro' Simqo nu Ndrees. <sup>34</sup> Orze' zigy mbe- cy b icyac mi, nunu zañ lo güii b icy mi nu mnit ni dey. Nunu bloo chum zañ nuras. Tees wansaan mi nu nii de nuras, gun yu' lo dey mi.

### Jesuuz rshaal mi riidz ni Ñgyoozh Galilea

<sup>35</sup> Na tuuba' dzi, or napor, gabee caas ru' zu, orze' weshtem. Bruum lat gyedz. Zam tub lugaar ub zi nu nii num Ñgyoozh. <sup>36</sup> Ze' Simqo nu de losa'y gua yub dey mi. <sup>37</sup> Na ornu byad mi na, orze' na dey rab yum:

—Dela mbecy ryub dey ru —na dey.

<sup>38</sup> Orze' nam rab mi dey:

—Yaa chan de' zir gyedz nu yu' gaab ga, gun orze' shaal na de riidz nu bruu lo Ñgyoozh, gun par nde' yapa —nam.

<sup>39</sup> Orze' gusam dela gyedz nu yu' Galilea. Pshaal mi de riidz nu bruu lo Ñgyoozh nañ de yu' nu rsya' de mbecy riidz ni Ñgyoozh. Nunu bloo chum zañ nuras nu b icy ni mbecy.

### Jesuuz b icyac mi tub mbecy nu ta' tub lo gyedz nu la lepra cuerpi ni

<sup>40</sup> Orze' bru'ña tub mbecy nu rat tub lo gyedz nu la lepra. Orze' gusu tib yu lo Jesuuz bdiiñ yu lom nu gyicyac mi yu. Gaze' nu nay rab yum:

—Ru gac gyicyac ru ya benu rlagry ru —nay.

<sup>41</sup> Orze' Jesuuz gushni lagy mi yu. Orze' gul yaam yu. Gaze' nu nam rab mi yu:

—Rlagry. ¡Na byac ru! —nam rab mi yu.

<sup>42</sup> Orze' lueg la mnit la gyedz ze', nunu byacyudz du- tuub la cuerpi ni. <sup>43</sup> Orze' fert pcach mi ru'y. Gaze' nu nam rab mi yu:

<sup>44</sup> —Na neñ lor nu cue' la niir lo ni tub la mbecy, sinu gua lo uz cha lyuur ub ru loy. Orze' cuic ru gun nu rlagry ñi par nu gyacaacy ru par lo Ñgyoozh gal nu rniiñ lo leey ni Moisees, gun orze' gad lagy dela mbecy nu bi byac ru ni güii nir —nam.

<sup>45</sup> Tees yu ze' guay mniiy lo ti cyu' la mbecy. Orze' brush las riidz ze' gal wangaca' la chu'm nu suelt la lat gyedz. Ze' ngush zil' gusam. Tees de mbecy nu bruu gal reñ ga la lugaar dru'ña ru' dey lom.

### Jesuuz b icyac mi tub mbecy chi

<sup>2</sup> Or bza' la be dzi bish cya ga' Jesuuz yam par Ca- pernaum. Orze' brush las riidz nu zum yu'm.

<sup>2</sup> Orze' byatublaazh mbecy lom gal wagada' la lugaar nu gzu dey mas par ich ze' nu Zub gyero'. Nunu pshaal mi riidz ni Ñgyoozh lo dey. <sup>3</sup> Orze' bru'ña tap mbecy. Bru'ña nu dey tub mbecy chi. <sup>4</sup> Na ornu tanta' nu wan- gac chu' dey lo Jesuuz na nu nac de mbecy zigy ze', orze' gup dey par too yu'. Gaze' nu pshaal dey par too yu' nañ ze' nu Zub Jesuuz. Orze' pshet dey nuun nu riib mbecy rat ze' lom. <sup>5</sup> Orze' ornu Jesuuz gud lagy mi nu ricy cup dey consuel lom, orze' nam rab mi mbecy chi ze':

—Yu feñ, ya bi ricy sulagyä de cyir —nam.

<sup>6</sup> Laab ze' nguaa la be de yu nu rlyuu leey ni Ñgyoozh. Orze' de yu ze' na dey nañ lardooy: <sup>7</sup> “Lagu ni rniiy? Coz nu rniiy, nde' zañ contr ni Ñgyoozh. Tub zi la Ñgyoozh gac gyicy sulagy mi de cyi nu ricy mbecy”, na dey.

<sup>8</sup> Orze' lueg la gud lagy Jesuuz nañ lardooy nu ni rnii too dey. Orze' nam rab mi dey:

—Lagu ni rnii too der? <sup>9</sup> Dzi zir a' biig y par nu neñ nu bi ricy sulagyä de cyir gaze' nu neñ nu wes zu, byash nuun nir nunu bza. <sup>10</sup> Tees ya neñ lo yu re nu gyes suy gzy par nu gad lagy der nu ya, biñ nu byac mbecy, ricy cupä rishbeey nu gyicy sulagyä de cyi de mbecy gyishlombecy ii. Gaze' nu nam rab mi mbecy rat ze':

<sup>11</sup> —Ya neñ du ru wes su, gush nuun nir, yaa yu'r —nam.

<sup>12</sup> Orze' wes suy, nunu lueg la pshet yaay nuun niy. Orze' gush nez yu yay lo rgüii la dela mbecy ze'. Nu nac nde', nde' nu za nu ic dela dey nunu byabic dey gyel mbecy ni Ñgyoozh. Gaze' nu na dey:

—Rila nigul zac na coz nu na gal na nii —na dey.

### Jesuuz bzum Leví nu gac nuy mi

<sup>13</sup> Gaze' nu za ga' Jesuuz par ru' nisyudoo. Ze' dela mbecy zigy bru'ña dey lom, nunu rlyuum ni dey. <sup>14</sup> Na nez nu zam, orze' bzaac mi Leví, iñ Alfeo. Zub yu ze' nu rbooroo mbecy tiñ por cuen ni gubier Rom. Gaze' nu nam rab mi yu:

—Da ca ichä —nam.

Orze' wes suy za cay ich mi.

<sup>15</sup> Na despuees, lat nu Zub Jesuuz rom gyit yu' Leví, ze' nguaa zigy mbecy nu rbooroo tiñ por cuen ni gubier, nu zigy de mbecy bdune'. Nguaa dey ze' nu Jesuuz nu de yu nu rsya' lom, gun yu' zigy mbecy bdune' lat de mbecy nu rde' lom. <sup>16</sup> Na ornu bzaac de mbecy fariseo nu de mbecy nu rlyuu leey ni Ñgyoozh nu Jesuuz rom gyit nu de mbecy ze', orze' bdugyi' dey lo de yu nu rsya' lom:

—Lagu moscuel ni de ru row yu gyit tublaazh nu de mbecy nu rbooroo tiñ por cuen ni gubier nu de mbecy bdune'? —na dey.

<sup>17</sup> Ornu güeñ Jesuuz nde', orze' nam rab mi dey:

—Par de mbecy ruub walagy ñi doctoor, tees par de mbecy rat rlagy ñi. Gal nu doctoor wagyicy nuy mbecy ruub guñaa, ni' ya a' yapa nu redzä mbecy nu sac cyi, sinu dredzä de mbecy cyi par nu ne' dey cyi —nam.

**De yu nu rsya' lo Waa bdugyi' dey lo Jesuuz lagu waca de yu nu rsya' lom ni ub yu nu cue' gow dey gyit**

<sup>18</sup> De yu nu rsya' lo Waa nu briib nis mbecy, nu de yu nu rsya' lo de mbecy fariseo rca dey ni ub yu nu cue' gow dey gyit lat nu rzu bich dey nu nac Ngooozh. Orze' gua mbecy lo Jesuuz. Orze' na dey rab yum:

—¿Lagu de yu nu rsya' lo Waa nu de yu nu rsya' lo de mbecy faraseo rca dey ni ub yu nu cue' goy gyit lat nu rzu bich dey nu nac Ngooozh, tees de mbecy nu rsya' lo ru wagyicy dey nde'? —na dey.

<sup>19</sup> Orze' na Jesuuz rab mi dey:

—Ya na gal nu na tub nob. ¿Walab gaal gac ca de yu nu yu' lo fandang ni ub yu nu cue' goy gyit lat nu gabee rded nob lat dey? Lat nu gabee rded nob lat dey, wac ca dey ni ub yu nu cue' goy gyit. <sup>20</sup> Tees shuub tub dzi nu co mbecy nob ze' lat dey. Orze' tiem ze' ca dey ni ub yu nu cue' goy gyit par nu gyicy shni dey.

<sup>21</sup> Gun mod nu b icy de gyitoo bel, nde' nañ gal nu na tub negy gush. Ni tub la mbecy wayicy mi rumien negy gush nu tub la' negy cub nu nigul gyo' nis, gun nis gash beñ negy cub ze'. Orze' shaa ye zir negy gush ze'. <sup>22</sup> Nunu mod nu b icy de gyitoo bel, nde' nañ gal na tub gyid gush nu rgu' choow dey ñup ni urbyay. Ni tub la mbecy wac cu' choow yu ñup ni urbyay cub nañ gyid gush, gun nis cyich ñiñ. Orze' shu dela ñup ni urbyay ze', nunu nit lo gyid ze'. Nde' nu rlagy ñi cu' choow dey ñup urbyay cub nañ gyid cub —nam rab mi dey.

**De yu nu rsya' lo Jesuuz rcyug dey za' ni trig sab, dzi nu rzu lagy mbecy**

<sup>23</sup> Na tub sab, dzi nu rzu lagy de mbecy Israeel, Jesus uz bded mi lat tub nac trig nu de yu nu rsya' lom. Orze' lat nu bded dem, orze' de yu nu rsya' lom ze' brugyi' rcyug dey za' nu gow dey. <sup>24</sup> Na ornu gud lagy de mbecy fariseo na, orze' na dey rab yu Jesuuz:

—Güii, ¿lagu de yu nu rsya' lor ricy dey tub coz nu a' yad ñi nu gyicy dey dzi nu rzu lagy den? Nde' walab se'ñ par lo leey ni den—na dey.

<sup>25</sup> Orze' na Jesuuz rab mi dey:

—¿Walab gaal nigul sya' der coz nu b icy Dabi tiem nu b icy falt coz nu cyiñ niy lat nu byan yu nu de mbecy nu gusa nuy? <sup>26</sup> Laab de yu ze' gu'y nañ yu' ni Ngooozh tiem nu Abiatar bzuy riiñ ni yu nu riib ic de uz. Orze' Dabi bdow yu gyishtily nu bzeeñ de mbecy nañ yu' ze'. Nde' gyishtily nu zu riiñ lo Ngooozh. Nunu de uz nu zu riiñ ni Ngooozh zi'l gac gow yuñ. Tees Dabi bdow yu gyishtily ze', nunu briic yuñ gow de yu nu gusa nuy —nam.

<sup>27</sup> Gaze' nu na'm rab mi dey:

—Ngooozh psa' lagy mi sab, dzi nu zu lagy mbecy par de mbecy. Walab nu psa' lagy mi de mbecy par

leey ni dzi nu rzu lagy mbecy. <sup>28</sup> Nde' nu ya, biñ nu by-ac mbecy, riib icä sab, dzi nu rzu lagy mbecy —nam.

**Jesuuz b icy yac mi tub mbecy yaa gush beñ**

<sup>3</sup> Orze' tuuba' dzi, orze' gua ga' Jesuuz nañ tub yu' nu rsya' mbecy riidz ni Ngooozh. Ze' ri tub mbecy yaa gush beñ. <sup>2</sup> Orze' de yu nu rzi lagy lom psiiñ dey nim ben a gyicy yac mi mbecy rat ze' sab, dzi nu rzu lagy mbecy, gun dzi ga ñgyaad tub mod nu riib dey cyi ic mi. <sup>3</sup> Orze' nam rab mi mbecy yaa gush beñ ze': —Wes su. Da lo gashtal gazel ii —nam.

<sup>4</sup> Gaze' nu nam rab mi de yu nu rzi lagy lom:

—¿A nap zuñ par lo leey ni Moisees nu gyicy den coz nap sab, dzi nu rzu lagy mbecy? ¿A nap nu gyicy den coz nap uti nu gyicy den coz a' nap? ¿A nii tub dzi nu gloo mbañ naa mbecy uti tub dzi nu gnit lon mbecy? —nam.

Tees wannii la dey. <sup>5</sup> Orze' bgüii tañ mi lo dey, nunu b icy mi sentiir, gun sac gyel rashni lagy ni dey. Gaze' nu nam rab mi mbecy rat ze':

—Bzaab yaar lo —nam.

Orze' mbecy ze' bzaab yaay lom. Orze' byanap lañ.

<sup>6</sup> Gaze' nu lueg la bruu chu de mbecy fariseo. By-atublaazh dey nu de mbecy ni Herodes nu bee dey ri-idz ben lac mod za' lo dey Jesuuz.

**Tona' la byawiiñ mbecy ru' nisyudoo**

<sup>7</sup> Tees Jesuuz za num de mbecy nu rsya' lom gal ru' nisyudoo. Nunu tona' la mbecy zigy za ca dey ich mi. Yu' mbecy nu bruu de lo yu ni Galilea. Yu' mbecy nu bruu de lo yu ni Judea. <sup>8</sup> Yu' mbecy nu bruu Jerusaleeng. Yu' mbecy nu bruu lo de yu nu la Idumea. Yu' mbecy nu bruu tub la' ga' ni gyoow Jordaan. Nunu yu' ga' mbecy nu bruu lo de yu ni Tiro nu Sidón. Dela ze' bruu dey za güii dey Jesuuz gun güeñ dey de coz ily nu b icy mi. <sup>9</sup> Gaze' nu mniim lo de yu nu rsya' lom nu zu lily dey tub barc nu ruu chum nu nac de mbecy zigy nis cyiñ zu dey mi. <sup>10</sup> Gun dela mbecy rat byatublaazh dey lom nu rlagy dey gal yaa dey mi nu nac nu bi b icy yac mi zigy mbecy. <sup>11</sup> Nunu dela de yu nu b icy ni nuras, ornu rzac dey mi, yes saa la dey lom. Orze' dub ru' la dey rbish ti nuy mi. Orze' rnii dey: —¡Ru nac ru i'ñ Ngooozh! —rnii dey.

<sup>12</sup> Orze' tona' la fert mniim lo dey nu cue' nii dey lo mbecy cyu nac mi.

**Jesuuz pcuim trocyup aposht nim**

<sup>13</sup> Despuees nde' gaze' nu za Jesuuz tub logyi'. Orze' bredz mi ca na de yu nu rlagy mi. Orze' gua dey lom.

<sup>14</sup> Gaze' nu bloo zum trocyup dey par nu chesa num yu nunu par nu zuu nez mi dey chay cha shaal dey de ri-idz ni Ngooozh. <sup>15</sup> Nunu briic mi rishbeey ni dey par nu co chu dey de nuras. <sup>16</sup> Orze' nii nu la de trocyup yu nu pcuim ze'. Gush lañ: Simoo, yu nu bloo lam Bed, <sup>17</sup> nu Santiag nu b icy yu Waa, de i'ñ Zebedeo. De yu ze' bloo lam Boanerges. Riidz ze' yaruñ: De I'ñ guzii. <sup>18</sup> Ze' tuuba' y Ndrees, nu Lip, nu Bartol, nu Mateo, nu Tomaas,

nu Santiag, i'ñ Alfeo, nu Tadeo, nu Simoo, yu nu nac partid nu la Celote,<sup>19</sup> nu Judas Iscariote, yu nu bish cya ich mi.

### Mbecy rnii dey nu Jesuuz ricy mi coz ily nu nac nuras

<sup>20</sup> Orze' Jesuuz gu'm nañ yu'. Orze' ze' byatublaazha' de mbecy zigy lom tuuba' tir gal wangaca' la ñgyow mi gyit nu de yu nu rsya' lom. <sup>21</sup> Orze' de famil nim güeñ dey de coz nu guc. Orze' za dey lom nu ricy pee dey cha nu dey mi por fers la, gun mnii mbecy nu guton mi. <sup>22</sup> Tees de mbecy nu bruu Jerusaleeng, de yu nu rlyuu leey ni Ñgyoozh, mnii dey nu Beelzebé, yu nu riib ic de nuras, b icy niy mi, nunu b icy yu nu cyiñ yu ii nu co chuy de' zir nuras, na dey. <sup>23</sup> Orze' Jesuuz bredz mi dey nu gyecha' dey lom. Gaze' nu mniim lo dey nu riidz tiily. Orze' nam:

—¿Walab gaal gac co chu nuras laab losa' nuras yu?  
<sup>24</sup> Benu tub nac mbecy dulew dey nu chuc oo dey laab nu losa' zi'l yu, orze' rila wazu dey. <sup>25</sup> Nunu benu tub famil chu cooy laab nu losa' zi'l yu, orze' ni' zi'l wazu dey. <sup>26</sup> Nunu benu de nuras dulew dey nunu chu coo dey laab nu losa' dey, orze' ni' zi'l wazu dey, sinu nit lo dey —nam—.

<sup>27</sup> Tees rlagy ñi nu gyicy mbecy gan yu nu riib ic de nuras zab lo. Gaze' nu gac co chuy de' zir nuras nu zaab ich. Gun ni tub la mbecy wac chu'y yu' tub mbecy fert nu coy suuy benu wacyiig dey yu loga. Tees benu nu loga la cyiig dey yu, gaze' nu gac chu' dey yu' yu' nu coy suuy.

<sup>28</sup> 'Rishli, ya neq lo der nu Ñgyoozh gac gyicy sulagy mi ni de mbecy ni de lo la cyi nu ricy yu nunu de lo la riidz a' nap nu rniyi, <sup>29</sup> tees cyu zi'l mbecy nu nii zi ni Espiriit Yon nim, yu ze' wayicy sulagy mi niy. Nde' cyi nu rila wac gyecy —na Jesuuz rab mi de mbecy nu shiñ mnii ze'.

<sup>30</sup> Ni mniim lo dey gun mnii dey nu b icy ni nuras mi.

### Bru'ña de famil ni Jesuuz

<sup>31</sup> Orze' bru'ña ñaam nu de b icy mi. Yu' dey gashtal ich yu'. Gaze' nu bzeed dey rasoo lo Jesuuz nu cham lo dey. <sup>32</sup> Orze' na de mbecy zigy nu nguaa lom ze' rab yum:

—Gal ich yu' re zu ñaar nu de b icy ru ryub dey ru —na dey.

<sup>33</sup> Orze' nam rab mi dey:

—¿Cyu ñaq nunu cyu de b icy? —nam.

<sup>34</sup> Gaze' nu bgüiim dub yub la lom. Orze' nam rab mi dey:

—Ii nguaa ñaq, nunu ii nguaa b icy. <sup>35</sup> Cyu zi'l mbecy nu ricy coz nu rlagy Ñgyoozh, de yu ze' nac dey b icy, zana, nu ñaq —nam.

### Riidz tiily ni de mbigy

**4** Orze' Jesuuz brugyi' ga'm rlyuum ni de mbecy ru' nisyudoo, nunu tona' la mbecy zigy byatublaazh dey lom. Orze' nde' nu gu'm, nañ tub barc gusub mi gal zaab zi'l ñi lo nis. Ze' de mbecy zigy gucua dey lo

yu ru' nisyudoo. <sup>2</sup> Ze' blyuum zañ coz ni dey nu riidz tiily.

Na lat nu rlyuum ni dey, orze' nam:

<sup>3</sup> —Bzuub gyidag der: Tub mbecy bruu y zay za nuuz yu mbigy. <sup>4</sup> Lat nu rtich yu mbigy ze', yu'ñ bet lag ñi ru' gyernez. Orze' bru'ña chigyiñ bdow ma ñii. <sup>5</sup> Ze' yu' ga'ñ bet lag ñi lo yu las ru' nu ri gyita' par nañ. Orze' dzach briib ñi gun las ru' yu ze'. <sup>6</sup> Na ornu briib doo na, orze' bziiñ. Orze' guwach ñi gun sac sheñ yu nu shet nap ñi lyuñ. <sup>7</sup> Ze' yu'ñ bet lag ñi lat gyech. Orze' dzach guuly gyech ze'. Orze' pcyiig ñi de yamni ze'. Orze' wancuic ñi cosech. <sup>8</sup> Ze' yu' ga'ñ nu bet lag ñi lo yu nap. Briib ñi nunu guuly ñi. Orze' tona' la cosech nap briic ñi. Yu'ñ briic ñi gal rub tii mbigy. Yu'ñ briic ñi gay-on mbigy. Yu'ñ briic ñi tub gaynal mbigy —nam.

<sup>9</sup> Orze' na ga'm:

—Yu nu Zub gyidag rlagy ñi gyicy yu nu gyet lag yu cuen —nam.

### La gyi' rniim nu riidz tiily

<sup>10</sup> Na ornu bya ub zim, de yu nu yu' lom nu de tro-cyup yu nu bloo sum ze' bdugyi' dey lom lac yaruu de riidz tiily ze'. <sup>11</sup> Gaze' nu nam rab mi dey:

—Ñgyoozh briic mi nu gad lagy de ru coz ni gyel gubernim, de coz nu wangad lagy mbecy gulas. Ze' de mbecy nu a' riib ic mi, ya rshaala lo dey nu riidz tiily.

<sup>12</sup> Gun orze' mas zac dey, tees wayu' loy, nunu mas gyeñ dey, tees wayet lag dey cuen, nunu nis cush cya dey par lom. Orze' gyicy sulagy mi ni dey —nam.

### Jesuuz rniim lac yaruu de riidz tiily ze'

<sup>13</sup> Gaze' nu na'm rab mi dey:

—Benu wagyet lag der cuen riidz tiily ze', ¿lac mod gyet lag der cuen de' zir ñi? <sup>14</sup> Yu nu gua nuuz mbigy ze', nde' yu nu rshaal riidz nu bruu lo Ñgyoozh. <sup>15</sup> Yu' mbecy nu na gal nu na mbigy nu nguaa ru' gyernez, lugaar ze' nu bdunuuz riidz ni Ñgyoozh. Orze' cuanzir nu reñ dey riidz ze', orze' lueg la dru'ña nuras nu rbooy ñi nañ lardoo dey. <sup>16</sup> Ze' yu' ga' mbecy nu na gal nu na mbigy nu nguaa lo yu las ru' nu ri gyita' par nañ ze'. Ornu nu loga la reñ dey riidz ni Ñgyoozh ze', orze' "O" rnii dey, nunu yet lagy dey. <sup>17</sup> Tees par nu las ru' yu ze', orze' wac shet riidz ze' sheñ lyuñ. Orze' ragyee dey la be zi'l tiem. Tees despuees, ornu dru'ñañ nu rzac zi dey o nu rzac deet dey nu nac riidz ze', orze' druu chu dey lo riidz ze'. <sup>18</sup> Ze' yu' ga' mbecy nu na gal na de mbigy nu bdunuuz lat gyech ze'. De yu ze' rzuub gyidag dey riidz ni Ñgyoozh. <sup>19</sup> Tees de gyel rsug ic nu nac de coz ni gyishlombecy ii, nunu de gyel ye rzac lo gyel nap, nunu de gyel rzaab lagy reña' coz, de nde' ricy ñi gan dey. Gal nu ricy gyech nu wacsan ñi cuiç yamni cosech, ni ricy de coz ze'. Wacsan ñi gyicy nap riidz ni Ñgyoozh shcab ni de mbecy ze'. <sup>20</sup> Ze' yu' ga' mbecy nu na gal nu na de mbigy nu bet lag lo yu nap ze'. De yu ze' "O" rnii ornu reñ yu de riidz ni Ñgyoozh, nunu rbic ñi cosech nañ lardoo dey. Yu'ñ rbic ñi gal

rub tii. Yu'ñ rbic ñi gayon. Yu' ga'ñ rbic ñi tub gaynal. Ni ricy riidz ni Ñgyoozh nu mbecy ze' —nam.

### Riidz tiily ni candiil

<sup>21</sup> Gaze' nu na ga'm:

—¿Walab gaal ri de mbecy tub candiil nañ tub cajoo o nañ tub nuun? ¿A walab nu rzuub dey ñi se'ñ? Gun orze' cuic ñi yaa. <sup>22</sup> Sac ni tub coz ngach nu waruu zac ñi. Nunu dela coz nu wagad lagy mbecy, nde' gad lagy dey. <sup>23</sup> De mbecy nu Zub gyidag rlagy ñi gyicy yu nu gyet lag yu cuen —nam.

<sup>24</sup> Gaze' nu na ga'm:

—Orze' nap bdu' cuen der de riidz nu reñ ru nim, gun dub gal nu ricy yac der de riidz ze', dub ñi gyet lag zir ru cuen. <sup>25</sup> Gun yu nu ricy yac de riidz ze' nay gal na tub mbecy nu ricy cup la coz. Yu nu ricy cup sheñ, sheñ zir gad niy. Ze' yu nu sac ni, gashtal coz miiñ nu ricy cup yu gruuñ niy —nam.

### Riidz tiily ni mbigy nu briib

<sup>26</sup> Orze' na'm:

—Gyel gubier ni Ñgyoozh rac ñi gal nu rac nu tub mbecy nu rnuuz mbigy. Mbacy rza nuuz yu mbigy ze'. <sup>27</sup> Orze' raas yu. Or za' yu yeshtey. Lat nu zaab za la dzi niy, mbigy ze' driib ñi. Gaze' nu raly ñi. Nunu wagad lagy yu lac mod driib ñi nunu ni lac mod raly ñi. <sup>28</sup> Gun ub la yu ricy ñi nu driib mbigy ze'. Orze' nu loga la raly tub gyizh. Orze' gaze' nu da' za' niñ. Orze' lat ze' raly de mbigy nu da' nañ gyez ze'. <sup>29</sup> Orze' ornu bi gul de mbigy ze', lueg la shi'ñ yuñ gun bi pshuub dzi nu dude'ñ. Ni' zi'l mod rac nu gyel gubier ni Ñgyoozh —nam.

### Riidz tiily ni mbigy urnishtas

<sup>30</sup> Gaze' nu na ga'm:

—¿La ñuu coz nu rac gal nu rac nu gyel gubier ni Ñgyoozh? ¿La ñuu coz saapä nu gyel gubier nim? <sup>31</sup> Gyel gubier ni Ñgyoozh rac ñi gal nu rac nu tub mbigy ya urnishtas. Ornu rdunuuz ñi, miiñ zir ñi par dela mbigy nu yu' gyishlombecy. <sup>32</sup> Tees ornu dunuuñ ñi, orze' raly ñi. Orze' zily zir ñi yac ñi gaze' de' zir yag mi'. She rgyich yaañ mas gal de chigyiñ rzaa ma teez ma lat ga'l nu rbic de yaañ ze'. Ni mod rac nu gyel gubier ni Ñgyoozh —nam.

<sup>33</sup> Zañ riidz tiily nu na gal nu na de nde' mniim. Ni mod blyuum de riidz ni gyel gubier ni Ñgyoozh ni dey. Dub gal mod nu gac gyet lag dey cuen, dub ni mniim lo dey. <sup>34</sup> Tees wanniim lo dey benu walab nu de riidz tiily ze'. Nunu ornu ub zim nu de yu nu rsya' lom, orze' pshaal mi dela riidz ze' lo dey.

### Jesuuz mniim lo gyey bi nu gariñ

<sup>35</sup> Laab dzi ze', or becheñ, orze' Jesuuz nam rab mi dey:

—Yaa der chan gal naa tub la' ga' dzu ru' nisyudoo —nam.

<sup>36</sup> Orze' bzeeñ dey dela mbecy zigy, za nu dey Jesuuz laab nañ barc nu bi rim ze'. Nunu za ga' reña' barc ze' nu za barc nu rim ze'. <sup>37</sup> Tees lat nu za dey ze', sij la bru'ña tub gyey bi ily. Orze' de nguuly lo nisyudoo rzu'ñ nañ barc ze' se nu dzaa zi'l ñi. <sup>38</sup> Ze' Jesuuz mbish mi nas mi par iiñ barc ze' lo tub almad. Gaze' nu pcueeñ dey mi. Orze' na dey rab yum:

—¡Masht! ¿A se la la nu ricy ñi nir nu nit lo den lo nis? —na dey.

<sup>39</sup> Gaze' nu weshtem nunu bicy mi mandaar lo bi. Orze' nam rab mi nisyudoo:

—¡Guri! —nam.

Orze' guri bi nunu se ri zu la byac. <sup>40</sup> Gaze' nu nam rab mi dey:

—¿Lagu dzi rdzib der? ¿Walab gaal gabee wagyicy cup der consuel lo? —nam.

<sup>41</sup> Orze' tona' la gudzib dey. Orze' na dey rab yu losa'y:

—Ze' ¿cyu mbecy nac mi ii? Gal bi nunu gal nisyudoo rzuub gyidag ñi nim —na dey.

### Jesuuz bicy yac mi tub mbecy rat nu bicy ni nuras

<sup>5</sup> Orze' bru'ña dey tub la' ga' ru' nisyudoo lo yu ni

Geresa. <sup>2</sup> Orze' cuanzir nu bruu Jesuuz nañ barc ze', orze' lueg la bdzeel mi tub mbecy nu bruu lat de blyuu nu rcach de mbecy añ. Yu ze' tub mbecy nu bicy ni nuras. <sup>3</sup> Nunu lat de blyuu ze' rciyiñ yu. Nunu ni tub la mbecy wagac cyiig yuy. Mas nu caden wagac gag yu, <sup>4</sup> gun zañ tir pcyiig dey gyi'y nu yaay nu caden. Tees rsug yu caden ze'. Nunu ni tub la mbecy wagac gyicy yu nu cuez se'y. <sup>5</sup> Zaab za lay dzi rel la rded yu de logyi' nu lat de blyuu ze'. Rbish tiy, nunu rshi'ñ yu ub yu nu gyita'. <sup>6</sup> Tees ornu bzaac yu Jesuuz zet ru' nu zam, orze' gush yu carer zay lom. Orze' gusu tib yu lom. <sup>7</sup> Gaze' nu na Jesuuz rab mi yu:

—Bruu chu lo mbecy ii nuras —nam.

Orze' dub ru' la nuras ze' rbish tiy. Gaze' nu nay rab yu Jesuuz.

—¿La ryub ru yad ru lo Jesuuz, i'ñ Ñgyoozh, biñ nu zi-ly zir nac? ¡Cyoozh cue' sheed zir ya! —nay.

<sup>9</sup> Orze' na Jesuuz rab mi yu:

—¿La lar? —nam.

Gaze' nu nay rab yum:

—Ya la bee miily gun zigy de naca —nay.

<sup>10</sup> Orze' tona' mnishbaay lom nu cue' co chum yu lu-gaar ze'. <sup>11</sup> Na par gyi' bicy ze' tona' la cuch zigy rded ma row ma. <sup>12</sup> Orze' dela nuras ze' mnishbaa dey lo Jesuuz. Gaze' nu na dey:

—Bzuu nez de ya lo de cuch re gun orze' chu' de nañ ma —na dey.

<sup>13</sup> Orze' briic Jesuuz rishbeey nu gruu dey. Gaze' nu bruu dey lo mbecy ze'. Gu'y nañ de cuch zigy ze'. Orze' rzab la de ma bzu tiily ma par gyoow. Bet lag de ma lo nisyudoo. Gut de ma lo nis. Cyup la miily cuch ze' gut ma lo nis.

<sup>14</sup> Orze' de yu nu rña de cuch ze' gush dey carer ya niyy de coz nu guc lo de mbecy nu yu' lat gyedz nu lo de mbecy nu yu' ngush. <sup>15</sup> Na ornu bru'ña de mbecy

ze' lo Jesuuz nunu ornu bzaac dey mbecy nu bicy ni de nuras ze', Zub yu, zuy shab yu, nunu byanap shcab niy, orze' tona' la gudzib dey.<sup>16</sup> Orze' dela de mbecy nu bzaac coz nu guc ze' mniiy lo de mbecy zigy ze' lac mod guc nu de cuch ze' nunu lac mod guc nu mbecy nu bicy ni nuras ze'.<sup>17</sup> Orze' brugyi' rnishbaa dey lo Jesuuz nu ruum ledz dey.

<sup>18</sup> Na ornu gu' Jesuuz nañ barc ze', orze' yu nu bicy ni nuras ze' mnishbaay lom nu cha num yu.<sup>19</sup> Tees Jesuuz wansaan mi. Orze' nam rab mi yu:

—Yaa lo de famil nir nunu niir de coz ily nu b icy Ñgyoozh num ru. Niir nu Ñgyoozh gushni lagy mi ru —nam.

<sup>20</sup> Gaze' nu mbecy ze' gush nez yu zay. Orze' brugyi' rniy lo dela mbecy nu yu' lo de yu ni Decápolis de coz ily nu b icy Jesuuz num yu. Orze' tona' la za nu ic de mbecy ze'.

### I'ñ Jario nu biñ mñaa nu gul shab Jesuuz

<sup>21</sup> Orze' Jesuuz gu'm nañ barc gula'm tub la' ga' dzu ru' nisyudoo. Orze' tona' la mbecy zigy byatublaazh dey lom. Laab ru' nisyudoo ze' zum.<sup>22</sup> Orze' bru'ña tub mbecy nu la Jairo, yu nu riib ic nañ tub yu' nu rsya' mbecy riidz ni Ñgyoozh. Laab bzaac lay Jesuuz, orze' wes saay lom.<sup>23</sup> Nunu tona' la mnishbaay lom. Orze' nay rab yum:

—I'ñ se nu gat zi'l lañ. Cuña yä chan gal yaar ñii gun, orze' gyac ñi, nunu cui mbañ ñi —nay.

<sup>24</sup> Orze' Jesuuz za num yu. Tona' la mbecy zigy za ca dey ich mi gal rcyi'ñ su la dey mi.<sup>25</sup> Orze' lat de mbecy ze' ri tub biñ mñaa nu bza' trocyup ña'n rshu reñ mi.<sup>26</sup> Zigy doctoor b icy nuy mi zañ lo guñaa. Mnit lo dela tiñ nim, nunu wangyac mi. Ca nu b icy ye zir ñi.<sup>27</sup> Na ornu gu' gyidag mi de coz nu b icy Jesuuz na, orze' becha'm par ich Jesuuz lat de mbecy zigy ze', nunu gul yaam shab mi.<sup>28</sup> Gun mnii toom nu mas ñuu shab Jesuuz gal yaam, orze' gyac mi.<sup>29</sup> Orze' laab or la ze' guca reñ ze', nunu gud lagy lam nu byac mi ni güii ze'.<sup>30</sup> Lueg la gud lagy Jesuuz nañ lardoorn nu bruu fers nim. Orze' bish cyam bgüii par ich mi lat de mbecy zigy. Gaze' nu nam:

—¿Cyu gul shaba? —nam.

<sup>31</sup> Orze' de yu nu rsya' lom na dey rab yum:

—Ru rzac ru nu de mbecy zigy rcyi'ñ su dey ru. Ze' ii nar: “¿Cyu gul yä?” nar —na dey.

<sup>32</sup> Tees gabee rgüii ru'm dub yub la lom par nu zac mi cyu gul mi.<sup>33</sup> Orze' bru'ña biñ mñaa ze'. Tona' la gudzib mi, nunu rash la bis mi, gun gud lagy mi coz nu bzac mi. Orze' wes saam yeñ gyi' Jesuuz, nunu mniim dela coz nu rishli.<sup>34</sup> Gaze' nu na Jesuuz rab mi biñ mñaa ze':

—Biñ mñaa, ru byac ru gun b icy cup ru consuel lo. Orze' dub gusht la yaa, nunu bi mnit güii nu rat ru —nam.

<sup>35</sup> Lat nu gabee rnii nu ru' Jesuuz biñ mñaa ze', orze' bru'ña tub mbecy nu bruu yu' mbecy nu riib ic ze'. Orze' nay rab yu yu nu riib ic ze':

—I'ñ ru bi guut ñi. Cue' ga' gyicy seed zir ru Mash —nay.

<sup>36</sup> Tees Jesuuz wangyicy cuen lam de riidz nu rniiy. Orze' nam rab mi yu nu riib ic ze':

—Cue' dzib ru. Bicy cup zi'l consuel lo —nam.

<sup>37</sup> Orze' wansaana'm cha ca zir mbecy ich mi nomaas Bed, nu Santiag, nu Waa, b icy yu za num.<sup>38</sup> Gaze' nu ornu bru'ñaam yu' yu nu riib ic ze', orze' bzaac mi nu se byach zi'l mbecy yu'y. Yu' mbecy ruun yu. Yu' ga'y rbish tiy.<sup>39</sup> Na ornu gu'm nañ yu' na, orze' nam rab mi dey:

—¿Lagu dzi rded deet der? ¿Lagu ruun der? Ze' fiñ nguzh ii nu nas ñi; walab nu guut ñi —nam.

<sup>40</sup> Orze' brugyi' rigy nu naañ dey mi. Orze' bloom dela dey par ich yu' ze'. Orze' gu'm nu uz fiñ nguzh ze' nu ñaañ nu chon de yu nu rsya' lom ze' par ze' nu mbish ñi.<sup>41</sup> Orze' bdu' yaam yaañ. Gaze' nu nam rab mi ñii:

—Talita cum —nam.

Benu gyal riidz ze', orze' nam: Fiñ nguzh, yä rnëe du ru weshte, nam.<sup>42</sup> Orze' laab or la ze' weshte fiñ nguzh ze' brugyi' rded ñi. Na fiñ ze' bi yu'ñ tub ña'n trocyup. Orze' tona' la za nu ic de mbecy.<sup>43</sup> Tees Jesuuz pcach mi ru' dey nu cue' la cuic dey nu gad lagy mbecy nu ni b icy mi. Nunu mniim nu cuic dey coz nu gow fiñ nguzh ze'.

### Jesuuz yam Nazaret

**6** Orze' bruu Jesuuz lugaar ze' yam par ledz mi, Nazaret. Nunu de yu nu rsya' lom ya nu dey mi.

<sup>2</sup> Na ornu pshuub sab, dzi nu rzu lagy mbecy na, orze' brugyi' rlyuum ni dey nañ yu' nu rsya' dey riidz ni Ñgyoozh. Ornu de mbecy zigy güeñ dey de coz nu rlyuum, orze' tona' la za nu ic dey. Orze' na dey:

—Ze' ¿ca guud de riidz re niy? Ze' ¿ca guud shcab niy? Ze' ¿lac mod rac ricy yu nusuriidz ily ze'?<sup>3</sup> Ze' ¿a walab yu ii biryag ze'? Ñaay Li. Bicy yu Santiag, nu See, nu Judas, nu Simqo. Nunu ¿a walab laab lat na ii rcyiñ de zan yu? —na dey.

Orze' wancheel reñ dey mi.<sup>4</sup> Orze' nam rab mi dey:

—Ca zi'l lugaar mbecy rca lagy dey lo yu nu rnii por cuen ni Ñgyoozh, nomaas de mbecy ledz yu, nu de famil niy, nu de famil nu yu' nuy nañ yu'y, dela de yu ze' waca lagy dey loy —nam.

<sup>5</sup> Orze' ze' wangac gyicy mi nusuriidz, nomaas la be zi'l mbecy rat gul yaam dey. Bicy yac mi yu.<sup>6</sup> Orze' za nu la ic mi nu wangyicy cup dey consuel lom. Orze' bruum Nazaret, gusam de' zir gyedz nu yu' gaab. Blyum ni de mbecy.

**Jesuuz bzuu nez mi de trocyup aposht nu cha shaal yu riidz nu sac ni Ñgyoozh**

<sup>7</sup> Orze' bredz mi de trocyup yu nu bi bloo sum ze' nu gyatublaazh dey. Gaze' nu brugyi' rzuu nez mi dey rzay cyup ga dey tub ga nez. Nunu briic mi rishbeey nu co chu dey nuras.<sup>8</sup> Nunu b icy mi mandaar lo dey nu cue' cha nuy ni tub la coz par nez. Nomaas tub yanga zi'l

dey cha nuy. Ni cue' cha nu dey moraal, ni cue' cha nu dey gyishtily, nunu cue' cha nu dey tiñ nañ nerbid niy.  
<sup>9</sup> Nomaas gyidlab zi'l caa gyi' dey. Nunu cue' cha nu dey cyup yaag yu. <sup>10</sup> Orze' na'm rab mi dey:

—Ca ze' nu cha der, gu' der nañ tub yu'. Orze' ze' ciyiñ der gashtal gruu la der lugaar ze'. <sup>11</sup> Ca zi'l ze' nu washet ic dey nu chu' der, ni wazuub gyidag dey riidz nu nii der, orze' ornu gruu der lugaar ze', cyib der yu gyedz nu ta' gyidlab ru par nu gabe nu a' nap b icy dey.

<sup>12</sup> Orze' bruu dey zay nunu mnii dey lo de mbecy nu rlagy ñi ne' dey dela cyi nu ricy yu. <sup>13</sup> Nunu bloo chu dey zañ nuras. Nunu briily dey asecy zigy mbecy rat. Nunu byac dey.

### Gut Waa nu briib nis mbecy

<sup>14</sup> Bzu laa riidz de coz nu ricy Jesuuz. Orze' rey Herodes güeñ yu de riidz ze'. Orze' nay:

—Byabañ Waa nu briib nis mbecy. Nde' nu cyiñ yu nu gyicy yu de nusuriidz ze' —nay.

<sup>15</sup> Yu' mbecy rnii dey nu Jesuuz nac mi Elías. Nunu yu' ga' mbecy rnii yu Jesuuz nac mi tub mbecy nu rnii por cuen ni Ñgyoozh gal nu na de yu nu gu' gulas.

<sup>16</sup> Ornu Herodes güeñ yu de coz nu mnii mbecy, orze' nay:

—Laab yu ze' Waa, yu nu b icy mandaar nu pcyug dey too. Na byabañ yu —nay.

<sup>17</sup> Ni mniim gun laab yu b icy yu mandaar nu pcyig dey Waa, nunu pshet lag dey yu nañ yu' gyiib nu nac Herodías, mñaa b icy yu Lip, gun Herodes gush yum. Bicy mñaay mi. <sup>18</sup> Ze' Waa mniiy lo Herodes nu rach ñii lo Ñgyoozh nu gush yu mñaay b icy yu.

<sup>19</sup> Orze' Herodías guzi lag y mi lo Waa. Ngulagy mi ñgyut mi yu tees wangac, <sup>20</sup> gun Herodes gudzib yu loy. Gud lag yu nu Waa nac yu mbecy nap par lo mbecy, nunu tant par lo Ñgyoozh. Orze' wansaan yu nu shiñ gyicy nu mbecy Waa. Nunu ornu mnii Waa loy, bet lag yu mas pcan shcab niy. <sup>21</sup> Tees orze' pshuub tub dzi nu guud mod nu gyicy Herodías nu gat Waa. Dzi ze', nde' dzi nu b icy dey sa' ni dzi nu gul Herodes.

Orze' bredz yu de fushtiz, nu de yu nu riib ic de soldad, nu de yu nu ricy ñi presis nu yu' lo de yu ni Galilea.

<sup>22</sup> Orze' ornu bru'ña iñ Herodías ze' nu nguaa dey, orze' bily gyi'ñ. Orze' tona' la bet lag y Herodes gal nu de mbecy nu nguaa nuy lo mez. Orze' nay rab yu fiñ ze':

—Bdiiñ la zi'l coz nu rlag y ru lo. Orze' ya ricä ñii nir —nay.

<sup>23</sup> Orze' mniiy nu waded la cuic yu la zi'l coz nu cyiñ ñi mas gal cyaal de coz nu riib ic yu cuic yu ñiñ. <sup>24</sup> Ornu bruuñ, orze' zañ lo ñaañ. Gaze' nu nañ rab ñim:

—¿La coz diñä? —naañ.

Orze' na Herodías rab mi ñii:

—Gua cyiñ ru too Waa —nam.

<sup>25</sup> Orze' fiñ ze' rlal dza lañ lueg la zañ lo Herodes bdiñ ñi too Waa. Gaze' nu nañ:

—Ya rlag yu nu lueg la cuic ru too Waa nu driib nis mbecy nañ tub gya'n —nañ.

<sup>26</sup> Herodes tona' la b icy shniy. Tees gun bi mniy nu waded la cuic yu la zi'l coz nu cyiñ ñi nunu bi güeñ dela mbecy nu nguaa nuy ze', orze' wangaca' gyicy cyup ic yu. <sup>27</sup> Orze' lueg la bzoo nez yu tub soldad b icy yu mandaar loy nu cyid nuy too Waa. <sup>28</sup> Orze' gua soldad ze', pshiñ yu too Waa nañ yu' gyiib. Orze' biid nuy ñi nañ tub gya'n. Briic yu ni fiñ feñ ze'. Orze' fiñ feñ ze' byabic ñi nde' ni ñaañ.

<sup>29</sup> Na ornu gud lag y de yu nu rsya' lo Waa na, orze' gua te dey cuer p niy. Pach dey ñi.

### Jesuuz bgoow mi gaay miily mbecy

<sup>30</sup> Ze' de trocyup aposht nu bzoo nez Jesuuz ze' bi byatublaazha' dey nuy mi. Orze' mnii dey lom dela coz nu b icy yu nu dela coz nu blyuuy. <sup>31</sup> Orze' Jesuuz nam rab mi dey:

—Yaa der chan tub lugaar ub zi. Zu lag y ñuu der —nam.

Ni mniim gun tona' la zigy mbecy ya yeed la dey gashtal wacuica' lañ tiem nu gow dey gyit. <sup>32</sup> Orze' gu' num dey nañ tub barc. Za dey tub lugaar ub zi. <sup>33</sup> Tees de mbecy bzaac dey bruum zam, nunu byu' lo dey mi. Orze' zigy mbecy nu bruu dela gyedz nu yu' ru' nisyudo ze', b icy lal dey zay g yi' lay tub la' ga' ru' nisyudoo. Orze' bru'ña dey anzir nu ru'ñam. <sup>34</sup> Na ornu bruum nañ barc ze', orze' bzaac mi dela mbecy zigy ze'. Orze' gushni lag y mi dey, gun na dey gal na shily nu sac cyu rña. Ze' brugyi' rlyuum zañ lo coz ni dey. <sup>35</sup> Ornu bi rdze, orze' de yu nu rsya' lom nay rab yum:

—Ii tub lugaar ub zi nunu tona' la gudze. <sup>36</sup> Orze' bzoo nez mbecy chay de lugaar ii nu de gyedz nu yu' gaab. Orze' zi dey coz nu gow yu, gun ii sac coz nu gow dey —na dey.

<sup>37</sup> Orze' na Jesuuz rab mi dey:

—De ru, briic coz nu gow dey —nam.

Orze' na dey rab yum:

—¿Walab gaal galag y ru nu gzi d e bee miily la tiñ gyishtily nu ricy na gow dey? —nay.

<sup>38</sup> Orze' na Jesuuz:

—¿La be gyishtily ricy cup der? Gua güii der ben —nam.

Ornu gud lag y dey la be, orze' na dey:

—Gaay gyishtily nu cyup bel —na dey.

<sup>39</sup> Orze' Jesuuz mniim lo dela mbecy nu Zub yu lo de gyizh ca' bee nac gay. <sup>40</sup> Orze' gucua bee nac ga mbecy. Lo tub nac ga dey bee tub gaynal yu o bee cyaal gaynal yu gucuay. <sup>41</sup> Orze' bdu' yaam gaay gyishtily ze' nu cyup bel ze'. Bgüüm par baa. Nunu briic mi gras ni Ñgyoozh nu nac de nde'. Gaze' nu blew mi gyishtily ze' briica'm ñii ni de yu nu rsya' lom nu cyez dey ñi ni de mbecy zigy. Orze' blewa'm cyup bel ze' briica'm ñii ni de yu nu rsya' lom par nu cyez dey. <sup>42</sup> Orze' dela de mbecy bdow gyel la dey. <sup>43</sup> Ornu bded nu bdow dey, orze' brusub trocyup ru' chicyiw de coz nguzh ni gyishtily ze' nu ni de bel ze' nu pte' dey. <sup>44</sup> Lo dela yu gyey nu bdow de gyishtily ze', gaay miily dey nac yu.

## Jesuuz bzam lo nis

<sup>45</sup> Cuanzir blazh nde', orze' Jesuuz mniim lo de yu nu rsya' lom nu chu' dey nañ barc nu cha ga dey lom gal tub gyedz nu ri tub la' ga' ru' nisyudoo nu la Betsaida. Ub mi byeeñ gam par nu nii num de mbecy ñgyoozh.

<sup>46</sup> Na or blazh nu mnii num dey ñgyoozh na, orze' pcam par tub logyi'. Zam nu nii num Ñgyoozh. <sup>47</sup> Na ornu becheñ na, barc ze' ri nu dey ñi laab gazel nisyudo. Ze' Jesuuz ub zi lam byeeñ mi par lo yu bigy.

<sup>48</sup> Orze' bzaac mi nu tona' la fers za barc ni dey, gun par nez nu zañ druu bi. Na ornu gabee caas ru' zu, orze' rza la Jesuuz. Lo nis zam lo dey. Orze' ricy peem nu ded lom lo dey. <sup>49</sup> Na ornu bzaac dey nu yad mi lo nis, orze' bis guzii dey mi. Orze' bish ti dey. <sup>50</sup> Gun dela dey bzaac yum, nunu tona' la gudzib dey. Tees Jesuuz lueg la mnii num dey. Orze' nam rab mi dey:

—¡Briic der baloor! ¡Yá nde'! ¡Cue' dzib der! —nam.

<sup>51</sup> Orze' gu'm nañ barc ze' nu yu' dey, nunu guca nu druu bi. Orze' tona' la za nu ic dey, <sup>52</sup> gun wangyet lag dey cuen coz nu b icy mi nu de gyishtily ze'. Gun noow na shcab ni dey.

## Jesuuz b icy yac mi de mbecy Genesaret

<sup>53</sup> Ornu blazh bded dey lo nisyudoo, bru'ña dey lo de yu ni Genesaret. Ru' ze' bzeeñ dey barc niy. <sup>54</sup> Orze' cuanzir nu bruu Jesuuz nañ barc ze', lueg la byu' lo de mbecy mi. <sup>55</sup> Orze' dzach la gusa dey dutuub la lugaar, nunu brugyi' dru'ña nu dey mbecy rat lo nuun ca zi'l lugaar nu güeñ dey nu zum. <sup>56</sup> Ca zi'l ze' nu rded mi, de ranch, de lat gyedz, o ngush, pcuaa dey de mbecy rat de lat yagi', nunu mnishbaa dey lom nu zaan mi gal dey mas ñuu ru' shab mi. Orze' dela de yu nu gul mi byac dey.

## De cushtom ni de gyitoo bel

<sup>7</sup> Orze' la be de mbecy fariseo nu la be de mbecy  
nu rlyuu leey ni Ñgyoozh bruu dey Jerusaleeng  
gua dey lo Jesuuz. <sup>2</sup> Dey ze' bzaac yu nu la be de mbecy  
nu rsya' lo Jesuuz a' caacy yaa dey row yu gyit, gun  
wanna dey gal nu rlagy ñi par lo leey ni dey. <sup>3</sup> Gun  
dela mbecy fariseo nu dela mbecy Israeel wow dey be-  
nu wanaa dey gal nu rlagy ñi nu ricy yac dey de cushtom  
ni gyitoo bel niy. <sup>4</sup> Nunu ornu rza dey yagi', ornu  
cush cya dey driy, benu wanaa dey, wagow yu. Nunu  
zañ zir cushtom rlagy ñi gyicy yac dey. Gush lañ: mas  
ñuu nu rgyiib dey de coz. Yu' mod nu rgyiib dey taz, de  
gya'n, de g yiib nu ray de coz, de nuun, de. Dela nde'  
rlagy ñi gyicy yac dey. <sup>5</sup> Orze' de mbecy fariseo nu de  
mbecy nu rlyuu leey ni Ñgyoozh b dbugyi' dey lo Jesuuz.  
Orze' na dey:

—¿Lagu de yu nu rsya' lo ru wagyicy yac dey cushtom  
ni de gyitoo bel nu wagnaa dey row yu gyit? —na  
dey.

<sup>6</sup> Orze' nam rab mi dey:

—Tona' la nap mnii Isaías lac na de ru, mbecy nu  
rzuu lo, ornu pcaay:

De mbecy ii rzat dey yá nu ru' zi'l yu,  
tees nañ lardoo dey ricy zet lagy yu lo.

<sup>7</sup> Se la la cyiñ nu driib zily dey yá, gun driib zily ton  
dey yá.

Leey nu bloo ic mbecy, nde' zi'l rlyuu dey.

Ni na Ñgyoozh lat de riidz ni Isaías. <sup>8</sup> Rzu chu der leey  
ni Ñgyoozh par nu rzu fert der cushtom ni mbecy —na  
Jesuuz.

<sup>9</sup> Orze' na ga'm:

—Dzi ga nap nu rzu chu der leey ni Ñgyoozh par nu  
gyicy yac der leey ni gyitoo bel ni der, <sup>10</sup> gun Ñgyoozh  
pcaam Moisees nu caay: "Pca lagy lo uz ru nunu pca  
lagy lo ñaar. Yu nu nii zi ni uz, o yu nu nii zi ni ñaa,  
rlagy ñi nu gat yu", pcaa Moisees. <sup>11</sup> Tees de ru rnir nu  
benu tub mbecy niy lo uz yu o niiy lo ñaay nu la zi'l  
coz nu rlagy ñi cuic yu ni dey, nde' corbán, orze'  
walagy fi locyuub yu uz yu nu ñaay. (Corbán nde'  
yaruuñ gun nu rbic dey lo Ñgyoozh.) <sup>13</sup> Orze' ricy der  
nu se la la cyiñ riidz ni Ñgyoozh par nu nac de cushtom  
nu bzeeñ de gyitoo gush ni der. Nunu zañ zir coz  
nu na gal na nde' ricy der —na Jesuuz.

<sup>14</sup> Gaze' nu bredz mi de mbecy zigy nu gyatublaazh  
dey lom. Orze' nam rab mi dey:

—Dela der bzuub gyidag der nunu b icy der nu gyet  
lag ru cuen. <sup>15</sup> Sac ni tub la coz par ich mbecy nu ornu  
chu'ñ nañ yu gyicy ñi nu gabag yu. Tees de coz nu  
druu nañ lardoo mbecy, dela nde' ricy ñi nu rabag yu.  
<sup>16</sup> Benu Zub gyidag der, orze' rlagy ñi nu zuub gyidag  
der —nam.

<sup>17</sup> Orze' bruum lo de mbecy zigy ze' yam. Ornu gu'm  
nañ yu', orze' de yu nu rsya' lom b dbugyi' dey lac za de  
riidz nu mniim ze'. <sup>18</sup> Orze' nam rab mi dey:

—¿Walab gaal ni' de ru wagyet lag der cuen? ¿Walab  
gaal wagad lagy der nu coz nu chu' nañ mbecy wac  
gyicy ñi nu gabag yu? <sup>19</sup> Gun de coz ze' walab nañ lar-  
dooy rzu'ñ, sinu nañ yu, nunu ruu ga'ñ —nam.

Nde' yaruuñ nu dela coz nu gow mbecy nac ñii coz  
cacy. <sup>20</sup> Orze' na ga'm:

—Gun de coz nu druu nañ lardoo mbecy, de nde' ricy  
ñi nu rabag yu. <sup>21</sup> Gun nañ lardoo dey druu shcab a'  
nap. Ze' druu nu ral dey losa'y nu wanchelaay. Ze'  
druu nu ricy dey gubaan. Ze' druu nu rut dey losa'y.  
<sup>22</sup> Ze' druu nu ral dey mñaa losa'y. Ze' druu nu ye rzac  
dey lo coz ni losa'y. Ze' druu nu shiñ ricy dey. Ze' druu  
nu rgyu dey. Ze' druu de lo la bis nu ricy cup dey. Ze'  
druu nu ricy saap lagy dey. Ze' druu nu rnii dey  
riscuen. Ze' druu nu ricy le' dey. Ze' druu nu ricy dey  
de lo la coz ton. <sup>23</sup> Dela coz a' nap ze' druuñ nañ lardoo  
mbecy, nunu ricy ñi nu rabag yu —na Jesuuz.

Tub biñ mñaa nu walab biñ guledz tona' la ricy cup mi  
consuel lo Jesuuz

<sup>24</sup> Orze' bruum lugaar ze' zam par lo de yu ni gyedz  
Tiro. Orze' gu'm nañ tub yu'. Wangalagy mi nzac mbe-  
cy mi tees wangac ngach lom. <sup>25</sup> Orze' lueg la güeñ tub  
biñ mñaa nu gu i'ñ tub fiñ feñ nu b icy ni nuras nu zu  
Jesuuz. Orze' bru'ñam wes saam yeñ gyi'm, nunu  
mnishbaam lom. <sup>26</sup> Biñ mñaa ze' walab mbecy guledz

tees nac mi mbecy sirofenicia. Orze' mnishbaam lo Je-suuz nu co chum nuras nu b icy ni i'ñ mi ze'. <sup>27</sup> Orze' Je-suuz nam rab mi biñ mñaa ze':

—Nu loga la rlagy ñi locyuuba de neza, de mbecy Israeel. Gun de yu ze' nac yu i'ñ Ngoozh. Gun walab se'ñ nu gruu gyishtily yaa de yu nguzh dune'ñ lo che' —nam.

<sup>28</sup> Orze' na biñ mñaa ze':

—Tees mas de che' nu rded nañ mez gow ma nguzh ru' de fiñ nguzh nu gyet lag lo yu —nam.

<sup>29</sup> Orze' na ga' Jesuuz rab mim:

—Nu nac nu ni mniir, gya lar. Bi bruu chu nuras lo i'ñ ru —nam.

<sup>30</sup> Orze' gush nez biñ mñaa ze' Yam. Na or brim yu'm na, bzaac mi i'ñ mi, nunu bi bruu chu nuras loñ riib ñi lo nuun.

### Jesuuz b icy mi tub mbecy go' nu gop

<sup>31</sup> Ze' Jesuuz bruum de lugaar garee Tiro zam par gyedz Sidón. Gaze' nu bruum Sidón zam par de lugaar nu la Decápolis. Orze' bruum Decápolis. Gaze' nu zam par lo nisyudoo ni Galilea. <sup>32</sup> Orze' ze' bru'ña nu dey tub mbecy go'. Nunu wagac nii nap yu. Mnishbaa dey lom nu gal yaam yu par nu gyicy yac mi yu. <sup>33</sup> Orze' Jesuuz bruu num mbecy rat ze' lat de mbecy zigy. Gua nu reñ mi yu. Gaze' nu mne' mbiz mi gyidag yu.

Pcoom nis yeñ mi yaam. Gaze' nu gul mi lyudz yu.

<sup>34</sup> Gaze' nu bgüiim par baa. Byash lagy mi. Orze' nam rab mi yu:

—Efata! —nam.

Benu gyal riidz nu mniim ze', orze' nam: ¡Byaal!, nam.

<sup>35</sup> Orze' lueg la byaal la gyidag yu nunu byachi lyudz yu. Nunu byanap la rniiy. <sup>36</sup> Gaze' nu b icy mi mandaar nu cue' la nii dey lo ni tub la mbecy. Dub gal nu fert zir rcach mi ru' dey dub ni mnii zir dey lo mbecy. <sup>37</sup> Tona' la za nu ic mbecy. Orze' na dey:

—Dela coz nu ricy yu nap ricy yu. ¡Ricy yu nu reñ mbecy go' nunu ricy yu nu rnii mbecy gop! —na dey.

### Jesuuz bgoow mi tap miily mbecy

<sup>8</sup> Tiem ze', ornu byatublaazha' dela mbecy zigy nunu wangad coz nu gow dey, orze' Jesuuz bredz mi de yu nu rsya' lom. Orze' nam rab mi dey:

<sup>2</sup> —Ya rashni lagya de mbecy zigy, gun bi bza' chon dzi nu yu' dey lo ii, nunu blazh coz nu gow dey. <sup>3</sup> Benu zuu neza dey gyay yu'y gal ran zi'l yu, orze' suun ñi dey nez, gun yu' dey zet bruuy —nam.

<sup>4</sup> Orze' na de yu nu rsya' lom rab yum:

—¿Lac gyicya' de ub na goow na dela mbecy zigy lugaar ub zi ii? —na dey.

<sup>5</sup> Orze' nam rab mi dey:

—¿La be gyishtily ricy cup der? —nam.

Orze' na dey:

—Gagy —nay.

<sup>6</sup> Gaze' nu b icy mi mandaar lo de mbecy zigy nu checua dey. Orze' gush mi gagy gyishtily ze'. Orze' bri-

ic mi gras ni Ngoozh. Gaze' nu blew mi ñii. Briic mi ni de yu nu rsya' lom nu cuic dey ni de mbecy zigy. Gaze' nu bleez dey ñi ni dela mbecy zigy. <sup>7</sup> Ricy cupa' dey la be bel mi'. Orze' briica'm gras ni Ngoozh nunu pcaa ga'm de yu nu rsya' lom nu cuic dey ma gow de mbecy zigy. <sup>8</sup> Orze' dela mbecy zigy bdow gyel la dey. Orze' blazh ze', pte' dey gag y la chicyiw coz nguzh nu brusub. <sup>9</sup> De yu nu bdow ze', tap miily dey nac yu. Orze' Jesuuz ptush las mi dey yay. <sup>10</sup> Gaze' nu lueg la gu' num de yu nu rsya' lom nañ tub barc. Bruum lu-gaar ze'. Gaze' nu bru'ñam lo yu nu la Dalmanuta.

### De mbecy fariseo bdiiñ dey tub nusuriidz

<sup>11</sup> Orze' bru'ña de mbecy fariseo brugyi' rgugyi' dey lom par nu gyicy dey preb mi. Bdiiñ dey lom nu gyicy mi tub nusuriidz baa par nu gabe nu Ngoozh nac num mi. <sup>12</sup> Gaze' nu gyi la byash lagy mi. Orze' nam rab mi dey:

—Ya waricä nusuriidz. ¿Lagu rgyiiña' de mbecy nu yu' na nusuriidz? Ya rishli rnëe lo der nu wada' nusuriidz par de mbecy nu yu' na —nam.

<sup>13</sup> Orze' bruum lugaar ze'. Gu' ga'm nañ barc zam tub la' ga' ru' nisyudoo.

### Lebadur ni de mbecy fariseo

<sup>14</sup> Na de yu nu rsya' lom na mnit lagy dey cha nuy gyishtily. Nomaas tub zi gyishtily ricy cup dey nañ barc ze'. <sup>15</sup> Orze' Jesuuz mniim lo dey nu gyicy cuidad dey. Gaze' nu nam rab mi dey:

—Bdu' cuen der nunu b icy cuidad der nu lebadur ni de mbecy fariseo nu lebadur ni Herodes —nam.

<sup>16</sup> Orze' de yu nu rsya' lom bee dey riidz nu losa'y. Gaze' nu na dey:

—¿Ti walab nu a' dun gyishtily, nde' nu ni rnii? —na dey.

<sup>17</sup> Ornu gud lagy Jesuuz coz nu mnii dey, orze' nam rab mi dey:

—¿Lagu rnii der nu wancyiid nu der gyishtily, nde' nu ni mneé? ¿Walab gaal wagyet lag der cuen? ¿Walab gaal noow na shcab ni der? <sup>18</sup> Zub urlo der, ¿walab gaal wacsac der? Nunu Zub gyidag der ¿walab gaal wagyeñ der? Nunu ¿walab gaal wagyeza' lagy der? <sup>19</sup> Ornu ble-wa gyishtily nu bdow gaay miily mbecy, ¿la be la chicyiw gyishtily nu brusub pte' der? —nam.

<sup>20</sup> Orze' na dey:

—Trocyp —nay.

Orze' nam:

—Ze' ornu blewa gyishtily nu bdow tap miily mbecy, ¿la be chicyiw gyishtily nu brusub pte' der? —nam.

Orze' na dey:

—Gagy —nay.

<sup>21</sup> Gaze' nu nam rab mi dey:

—¿A walab gaal gabee wagyet lag ru' der cuen? —nam.

Jesuuz b icy yac mi tub mbecy lo ca'

<sup>22</sup> Gaze' nu bru'ñam Betsaida. Ze' bru'ña nu dey tub mbecy lo ca' lom. Mnishbaa dey lom nu gal yaam yu. <sup>23</sup> Orze' bdu' yaam yaa mbecy lo ca' ze'. Gua num yu par ru' gyedz. Orze' pcoom nis yeñ mi urloy nunu gul yaam yu. Gaze' nu bdugyi'm loy ben a rzac yu mas ñuu ga. <sup>24</sup> Gaze' nu brugyi' rgüiiy. Orze' nay rab yum:

—Yä rzaçä mbecy gal na yag nay rded yu —nam.

<sup>25</sup> Bdaaba' yaam urloy. Orze' mbi la bgüiiy. Orze' by-ac yu nunu byanap la rzac yu dela coz. <sup>26</sup> Gaze' nu bzuu nez mi yu gyay yu'y. Orze' nam rab mi yu:

—Cue' chu'r lat gyedz ii —nam.

Bed mniiy nu Jesuuz nac mi Mesías biñ nu ca lo cuen  
nu co mbañ mbecy

<sup>27</sup> Despuees orze' bruu Jesuuz Galilea za num de yu nu rsya' lom par de gyedz nu yu' lo yu ni Cesarea ni Filipo. Nez zam bdugyi'm lo de yu nu rsya' lom. Orze' nam rab mi dey:

—¿Cyu rnii mbecy nu nac ya? —nam.

<sup>28</sup> Orze' na dey:

—Yu' mbecy rniyy nu ru Waa nu briib nis mbecy. Ze' yu' ga' dey rniyy nu ru Elías. Ze' yu' ga' dey rniyy nu ru tub yu nu gu' gulas nu mnii por cuen ni Ñgyoozh —na dey.

<sup>29</sup> Orze' nam rab mi dey:

—Ze' de ru, ¿cyu rnii der nu nacä? —nam.

Orze' na Bed rab yum:

—Ru nac ru Mesías, biñ nu ca lo cuen nu co mbañ de mbecy —nam.

<sup>30</sup> Orze' Jesuuz mniim lo dey nu cue' niiy lo ni tub la mbecy cyu nac mi.

Jesuuz mniim lo de yu nu rsya' lom nu gat mi

<sup>31</sup> Gaze' nu brugyi' rlyuum ni dey nu ub mi, biñ nu byac mbecy, rlagyi ñi gzac mi zañ lo coz deet. Nunu de yu bel ni de mbecy Israeel, nu de uz zub lo, nu de yu nu rlyuu leey ni Ñgyoozh, de yu ze' rlagyi ñi ne' dey mi. Nunu rlagyi ñi nu cut dey mi. Tees nañ chon dzi gyabañ mi. <sup>32</sup> Orze' naal la mniim de coz ze'. Orze' Bed gua nu reñ yum. Gaze' nu mniiy lom nu cue' ni nii. <sup>33</sup> Tees Jesuuz bish cyam bgüiiy lo de yu nu rsya' lom. Orze' fert mniim lo Bed. Orze' nam:

—¡Bruu chu lq ii nuras! Gun shcab nir wasaap ñi shcab ni Ñgyoozh, sinu shcab nir, nde' shcab ni mbecy zi'l —nam.

<sup>34</sup> Orze' bredz mi dela mbecy nu de yu nu rsya' lom. Orze' nam rab mi dey:

—Benu ca na mbecy rlagyi yu gac yu mbecy nu rsya' lo, orze' rlagyi ñi cue' gyicy cuen yu coz nu rlagyi ub yu. Nunu rlagyi ñi shet ic yu nu gzac ziy nu nac ya. Orze' rlagyi ñi gyicy yu gal nu rlagyi. <sup>35</sup> Gun yu nu rlagyi co nap ub, yu ze' gnit loy. Tees yu nu nit lo nu nac ya, nunu nu nac riidz nu sac nu bruu lo Ñgyoozh, yu ze' yu nu rishli gruu mbañ. <sup>36</sup> Gun ¿la rusub ni mbecy benu gyicy yu gan dela coz nu yu' gyishlombecy tees lar-

doo y dune'ñ? <sup>37</sup> Nunu ¿la coz gac cyish mbecy nu gyad lardooy? <sup>38</sup> Tees cyu zi'l mbecy nu gat lo nu nac ya nunu gat lo ga'y nu nac de riidz nu rnëe lo rgüii la mbecy nu wagyicy paa ni Ñgyoozh nunu de mbecy cyi nu yu' na, orze' ni' ya, biñ nu byac mbecy, gat lo nu nac de yu ze' ornu shuub dzi nu yapä nu gyel lily ni uza gal nu de anc yon —nam.

<sup>9</sup> Orze' na' Jesuuz rab mi dey:

—Ya rishli rnëe lo der nu yu' ca na mbecy nu yu' ii na la nu wat dey gal zac la dey nu cyid gyel gubier ni Ñgyoozh, nunu gabe nu dzi coz ily gac —nam.

Bdza nu na Jesuuz

<sup>2</sup> Ornu bbed tub shuup dzi, orze' Jesuuz gua nu reñ mi Bed, nu Santiag, nu Waa. Orze' gup mi too tub b icy gya num dey. Orze' ze' bdza nu nam lo dey. <sup>3</sup> Shab mi byaryal ñi. Tona' la byacaacy ñi. Caacy zir ñi byac n i gaze' nu caacy nu ricy de lo la yashtily nu yu' gyishlombecy. <sup>4</sup> Orze' ze' bruu zac Elías nu Moisees lo rgüii la de yu nu rsya' lom. Orze' bee dey riidz nu Jesuuz. <sup>5</sup> Orze' na Bed rab yu Jesuuz:

—Masht, ñdzi ga nap nu yu' dë ii! Na zäa dë chon ramad ni der: tub par ru nu tuuba' par Moisees nu tuuba' par Elías —nam.

<sup>6</sup> Ni mniiy, gun wagad lagy yu coz nu niiy, gun tona' la gudzib dey. <sup>7</sup> Orze' bruu zac tub za psoow ñi dey. Nunu lat za ze' zaab ti' mbecy. Orze' nam:

—Mi ii i'ñä nu tona' la rcä. Bzuub gyidag der nim —nam.

<sup>8</sup> Orze' sij zi'l ornu bri' lo dey wansaca' dey cyu' zir mbecy. Ze' Jesuuz zi'l bzaac dey.

<sup>9</sup> Gaze' nu gush nez num dey bet mi par gyi' b icy ze'. Na lat nu ya num dey, orze' pcach mi ru' dey nu cue' nii dey lo ni tub la mbecy de coz nu bzaac yu. Sinu gal ornu gyabañ Jesuuz, biñ nu byac mbecy, gaze' nu nii dey. <sup>10</sup> Orze' b icy yac dey pcach ru' dey. Tees bdugyi' dey lo losa'y lac yaruu nu gyabañ mi ze'. <sup>11</sup> Orze' na dey rab yum:

—¿Lagu de yu nu rlyuu leey ni Ñgyoozh rniyy nu Elías rlagyi ñi cyid yu loga la? Gaze' nu cyid Mesías, biñ nu ca lo cuen nu co mbañ mbecy —na dey.

<sup>12</sup> Orze' na Jesuuz rab mi dey:

—Laab rlagyi ñi cyid Elías loga nu gzu nap yu dela coz. Nunu bi cañ nu ya, biñ nu byac mbecy, rlagyi ñi gzac zi' nu zañ lo coz, nunu rlagyi ñi gyicy ñgya dey lo.

<sup>13</sup> Tees ya rnëe lo der nu Elías rishli bi biid yu nunu b icy nu dey yu dela coz a' nap nu mnii too dey nu gyicy nuy yu gal nu bi cañ nu gzac yu —nam.

Jesuuz b icy yac mi tub yu nguzh nu b icy ni nuras

<sup>14</sup> Na ornu bru'ñam gyi' b icy ze', ze' nu byeeñ de' zir de yu nu rsya' lom, orze' ze' bzaac mi nu tona' la mbecy zigy byatublaazh lo de yu ze'. Nunu gaza' de yu nu rlyuu leey ni Ñgyoozh yu'y zi ro dey riidz nu de yu nu rsya' lom. <sup>15</sup> Na cuanzir nu bzaac dey mi, orze' za nu la ic dey, nunu becha' dey lom carer mnii nuy mi ñgy-

oozh. <sup>16</sup> Orze' nam rab mi de yu nu rlyuu leey ni Ñgyoozh:

—¿La coz rgugyi' der lo dey? —nam.

<sup>17</sup> Orze' brusu tub mbecy lat de mbecy zigy ze' nay rab yum:

—Masht, ya yap du i'ñä nu b icy ni nuras lor. Bicy yu nu byagop yu. <sup>18</sup> Ca zi'l nu shet yaay yu ricy yu nu ricy ñi bi niy. Bdziñ la driib ru'y, nunu row yu lay yu, nunu rgyig yu. Ya mnëe lo de yu nu rsya' lor nu co chu dey yu, tees wangac ni dey —nay.

<sup>19</sup> Orze' na Jesuuz rab mi dey:

—¡A der mbecy nu yu' na! Dzi ga wagyicy cup der consuel lo. ¿La' zir be tiem rlag y ñi chesa du der? ¿La' zir be tiem rlag y ñi nu gage lo der? Da nu der yu nguzh rat ze' lo —nam.

<sup>20</sup> Gaze' nu gua nu dey yu nguzh ze' lom. Orze' ornu bzaac yu Jesuuz, orze' lueg la b icy nuras ze' nu b icy ñi bi niy. Wes saa lay rdudub lay mbish yu. Nunu driib bdziñ ru'y. <sup>21</sup> Gaze' nu na Jesuuz rab mi uz yu:

—¿La be la tiem rac nu ni rzac yu? —nam.

Orze' nay rab yum:

—Nese miiñ lay ni rzac yu. <sup>22</sup> Nunu zaab cya' la rshes saa nuras yu lo boo nunu rshet lag yuy lo nis par nu cut yuy. Tees benu gac gyicy ru la ñuu nur yu, gushni ñuu lag y de. Blocyuub de benu gac —nay.

<sup>23</sup> Orze' na Jesuuz rab mi yu:

—Yada' nu na'r: "Benu gac", na'r. Dela coz gac gyicya du yu nu ricy cup consuel —nam.

<sup>24</sup> Orze' lueg la brish ti uz yu nguzh ze'. Orze' nay:

—Ya ricy cupa consuel lor. Nunu blocyuub ya nu gyicy cup zirä consuel —nay.

<sup>25</sup> Orze' ornu Jesuuz bzaac mi nu byatublaazh de mbecy zigy lom, gaze' nu rdza'm ni nuras ze'. Orze' nam rab mi yu:

—Nuras nu ricy go' nunu nu ricy gop, ya ricya manhaar lor nu bruu chu loy ii. Nunu cue' ga' cush cyar cyid ru loy —nam.

<sup>26</sup> Orze' brish ti nuras ze', nunu b icy yu nu tona' la bi ily b icy ñi ni yu nguzh ze'. Gaze' nu bruu chuy. Bya añ la yu nguzh ze' bzeeñ yu gal mnii la de mbecy nu gut yu. <sup>27</sup> Tees Jesuuz bdu' yaam yaay bles sum yu. Orze' wes suy.

<sup>28</sup> Despuees ornu Jesuuz brim yu', gaze' nu de yu nu rsya' lom bdugyi' reñ la dey lom. Orze' na dey:

—¿Lagu wangac loo chy de nuras ze'? —na dey.

<sup>29</sup> Orze' nam rab mi dey:

—Nuras nu ni na wac ruu chuy i zi'l, sinu rlag y ñi ciyiñ mbecy lo Ñgyoozh nunu rlag y ñi nu ca dey ni ub yu nu cue' goy gyit lat nu zu bich dey nu nac Ñgyoozh. Orze' gaze' nu gac co chu dey nuras ze' —nam.

Jesuuz mnii ga'm tuuba' tir nu cut mbecy mi

<sup>30</sup> Gaze' nu bruum lugaar ze' gusam dela lo yu ni Galilea, nunu wangalagy mi nu gad lagy mbecy ca chesam, <sup>31</sup> gun blyuum ni de yu nu rsya' lom. Orze' nam rab mi dey:

—Ya, biñ nu byac mbecy, gu' dey ya yaa de mbecy. Orze' cut dey ya. Tees nu za' dzi chon gyabaña —nam.

<sup>32</sup> Tees wangyet lag dey cuen lac yaruu riidz ze'. Nunu gudzib dey nu cugyi' y lom.

### Cyu gac mbecy nu gya zir zu

<sup>33</sup> Gaze' nu brim gyedz Capernaum. Ornu gu'm nañ yu', orze' bdugyi'm lo dey. Orze' nam rab mi dey:

—¿La ridz ro der nu losa'r ornu yap na nez? —nam.

<sup>34</sup> Tees wannii la dey gun gyernez bee dey riidz nu losa'y nu ca na dey gac yu yu nu gya zir zu. <sup>35</sup> Gaze' nu gusub mi nunu bredz mi za' trocyup laa dey. Orze' nam rab mi dey:

—Benu ca na mbecy rlag yu gac yu yu nu gya zir zu, orze' rlag y ñi gyicy yu nu nac yu mbecy nu wagyicy ñi presis nunu gyicy yu de coz nu rlag y dela losa'y —nam.

<sup>36</sup> Orze' bdu' yaam tub yu nguzh mi'. Bzum yu lat dey. Gaze' nu bri yaam yu. <sup>37</sup> Orze' nam rab mi dey:

—Cyu zi'l yu nu shet ic nu gac yu tub yu nu na gal na yu nguzh mi' ii nu nac ya, orze' ni' zi'l shet ic yu nu gac nuy ya. Nunu yu nu shet ic nu gac nu ya, walab ne ya zi'l shet ic yu, sinu ni' shet ic yu ni biñ nu bzuu nez ya —nam.

### Yu nu wacha contr nin, yu ze' yu nu rza faboor ni den

<sup>38</sup> Orze' na Waa rab yum:

—Masht, de ya bzaac de tub mbecy bloo chuy nuras nu nac rishbeey nu bruu lor, tees mnëe de nu cue' nu ni gyicy yu gun wachesa nuy de ub na —nay.

<sup>39</sup> Orze' na Jesuuz:

—Cue ca der niy, gun sac ni tub la mbecy nu gyicy nusuriidz nu nac rishbeey nu bruu lo, se lueg la gac shiñ niyy ne. <sup>40</sup> Gun yu nu wacha contr nin, yu ze' yu nu rza faboor ni den. <sup>41</sup> Nunu cyu zi'l mbecy nu cuic mas ñuu tub taz nis go' der nu nac ru ne, biñ nu ca lo cuen nu co mbañ mbecy, rishli rnëe lo der nu yu ze' segur la gyad iy —nam—.

### Cue' lyuu mbecy ni losa'y nu gyicy yu cyi

<sup>42</sup> Cyu zi'l yu nu gyicy nu gnu yu nu na gal na tub yu nguzh nu ricy cup consuel lo, nap zir benu cyiigy dey tub gyita' ily nu rdugu yeñ yu. Gaze' nu shet lag dey yu lo nisyudoo par nu gat yu. <sup>43</sup> Benu tub yaar gyicy ñi nu gnur, nap zir pcyug ñi, gun nap zir nu gzur nu tu'nc yaar gaze' nu gyar gably nu rup laa yaar lo gyi nu rila wayu. <sup>44</sup> Lugaar ze' wat bya' nunu rila wayu gyi.

<sup>45</sup> Nunu benu gyi'r gyicy ñi nu gnur, nap zir pcyug ñi, gun nap zir nu gzur nu tu'nc tub gyi'r, gaze' nu gyet lag ru gably nu rup laa gyi'r lo gyi nu rila wayu. <sup>46</sup> Lugaar ze' wat bya' nunu rila wayu gyi. <sup>47</sup> Nunu benu tub urlor gyicy ñi nu gnur, orze' cor ñii, gun nap zir nu chu'r ze' nu riib ic Ñgyoozh nu tub zi urlor, gaze' nu gyet lag ru gably nu rup laa urlor. <sup>48</sup> Lugaar ze' nu wat bya' nunu rila wayu gyi.

<sup>49</sup> Gun dela mbecy go gyi too dey gal nu ricy zed nu rgoñ too la coz. <sup>50</sup> Tees benu zed ruu nu ri' niñ, orze' wacyiiñ ñi. Cue' zaan der nu ruu nu ri' ni zed ze' nañ lardoo der. Nunu nu gyel ri zu gu' dey nu losa'r —nam.

—¿A gac zaan losa' mbecy?

**10** Orze' bruu Jesuuz Capernaum zam lo de yu nu la Judea nunu lo de yu nu ri tub la' ga' du gyooow Jordaang. Orze' tona' la mbecy zigy byatublaazh dey lom. Gaze' nu blyuum ni dey tuuba' tir laab gal nu nil ricy mi. <sup>2</sup> Orze' bru'ña la be de mbecy fariseo nu gyicy dey preb mi. Gaze' nu na dey rab yum:

—¿A nap zuñ par lo leey ni Moisees nu zaan mbecy mñaay? —na dey.

<sup>3</sup> Orze' na Jesuuz rab mi dey:

—¿La coz mnii Moisees nu gyicy mbecy? —nam.

<sup>4</sup> Orze' na dey:

—Moisees bzaan yu nu co mbecy gyicy ni rishbeey. Orze' cyuu nuy mi —na dey.

<sup>5</sup> Gaze' nu na Jesuuz:

—Moisees ni pcaay leey ze' nu nac nu zed lo der.

<sup>6</sup> Tees nese nu bzub gyi' gyishlombecy "Ñgyoozh psa' lagy mi tub yu gyeey nu tub biñ mñaas. <sup>7</sup> Nde' nu de yu gyeey zeeñ yu uz yu nunu zeeñ yu ñaay par nu gyatublaazh yu nu mñaay. <sup>8</sup> Orze' lo rup laa dey gyac dey se tub zi'l mbecy", rniiñ. Nde' nu walaba' cyup dey nac yu, sinu se tub zi dey. <sup>9</sup> Nunu nde' nu ni tub la mbecy wac gyicy yu nu gla' losa' cyup mbecy, benu bi nac dey mbecy nu b icy tublaazh Ñgyoozh —nam.

<sup>10</sup> Despuees ornu ub zi lam rim nañ yu' nu de yu nu rsya' lom, orze' mnii dey lom nu shaal mi riidz ze'.

<sup>11</sup> Gaze' nu nam rab mi dey:

—Cyu zi'l la mbecy nu coy gyicy nu zaan yu mñaay, ze' chelaay nu tuuba' biñ mñaas, orze' yu ze' ricy yu cyi nu wangyicy paay nu mñaas logay. <sup>12</sup> Nunu benu biñ mñaas com gyicy nu zaan mi ñgyeem nunu chelaam tuuba' yu gyeey, mi ze' ricy mi cyi nu wangyicy paam nu ñgyee logam —nam.

### Jesuuz bdiiñ mi lo Ñgyoozh ni de yu nguzh mi'

<sup>13</sup> Orze' la be mbecy bru'ña nu dey de yu nguzh lo Jesuuz nu gal yaam dey. Orze' de yu nu rsya' lom rdza' dey ni de mbecy nu yad nu de yu nguzh ze'. <sup>14</sup> Tees ornu bzaac Jesuuz nu rdza' dey, orze' wangyu' lagy mi. Gaze' nu nam rab mi dey:

—Bzaan der gyecha' de yu nguzh lo. Cue' niir lo dey nu ruu chuy, gun lugaar ze' nu riib ic Ñgyoozh, nde' lugaar nu yu' mbecy nu na gal nu na de yu nguzh ii. <sup>15</sup> Ya rishli rnœ̄ lo der nu yu nu wazaan nu gyub ic Ñgyoozh gal nu ricy de yu nguzh ii, orze' wac chu'y ze' nu riib ic mi —nam.

<sup>16</sup> Gaze' nu bdu' yaam de yu nguzh ze'. Bri yaam yu. Bdiiñ mi lo Ñgyoozh ni.

### Tub mbecy guani'ñ guay lo Jesuuz

<sup>17</sup> Lat nu rash nez Jesuuz zam, bru'ña tub mbecy gusu tib yu lom. Orze' nay rab yum:

—Masht nap, ¿la ñuu coz rlagy ñi nu gyicya par nu cui mbañä tub la? —nay.

<sup>18</sup> Orze' na Jesuuz rab mi yu:

—¿La gu rnii ga' ru nu nap ya? Se cyu' zir nu nap sinu tub zi la Ñgyoozh. <sup>19</sup> Ru rad lagy ru de coz nu rcaa Ñgyoozh de mbecy nu gyicy yac dey. Cue' cut ru losa'r. Cue' gal ru mbecy nu wanchelaar. Cue' gyicy ru gubaan. Cue' riib ru gyidza too losa'r. Cue' gyicy ru gan tiñ nu nac gyel rguu. Pca lagy lo uz ru nunu pca lagy lo ñaar —nam.

<sup>20</sup> Orze' mbecy ze' nay rab yum:

—Tees masht, dela nde' bi b icy yacä ñii nese miiñ la —nay.

<sup>21</sup> Gaze' nu Jesuuz bgüiim loy nunu pcam yu. Orze' nam rab mi yu:

—Ru ricy falt tub coz nir. Yaa cut ru dela coz nu yu' nir. Gaze' nu tiñ ze' cuic ru ni de mbecy zi. Orze' gyibaa gad gyel nap nir. Nunu cyid ru cyid car ichä —nam.

<sup>22</sup> Tees ornu güeñ mbecy ze' nu ni mnii Jesuuz, orze' byashni bgüiyy. Orze' gush nez yu yay, gun tona' la yu' gyel nap niy. <sup>23</sup> Orze' Jesuuz bgüiim dub yub la lom. Gaze' nu na'm rab mi de yu nu rsya' lom:

—¡Dzi ga biigy nu chu' mbecy guani'ñ lat de mbecy nu riib ic Ñgyoozh! —nam.

<sup>24</sup> Ornu de yu nu rsya' lom güeñ dey nu ni mniim, za nu la ic dey. Gaze' nu na'm rab mi dey:

—¡Tona' la biigy nu chu' mbecy lat de mbecy nu riib ic Ñgyoozh! <sup>25</sup> A' biigy zir ded tub camey gyeegy gyi' tub gysishtiib gaze' nu chu' tub mbecy guani'ñ lat de mbecy nu riib ic Ñgyoozh —nam.

<sup>26</sup> Orze' dzi zir za nu ic de yu nu rsya' lom. Gaze' nu na dey:

—Benu ni, ¿cyu gac gruu mbañ beni? —na dey.

<sup>27</sup> Orze' Jesuuz bgüiim lo dey. Gaze' nu nam rab mi dey:

—Par de mbecy nde' coz nu rila wac, tees par Ñgyoozh walab ni, gun Ñgyoozh gac gyicy mi dela coz —nam.

<sup>28</sup> Orze' na Bed rab yum:

—Ze' dë ya bzeeñ dë dela coz nu yu' në dë nu yap ca dë ich ru —nay.

<sup>29</sup> Orze' na ga' Jesuuz:

—Ya rishli rnœ̄ lo der nu dela de yu nu bzeeñ yu', yu nu bzeeñ b icy, yu nu bzeeñ zan, yu nu bzeeñ ñaa, yu nu bzeeñ uz, yu nu bzeeñ iñ, yu nu bzeeñ yu ni nu nac ya nunu nu nac de riidz nu sac nu bruu lo Ñgyoozh, <sup>30</sup> orze' sac ni tub la dey ze' nu wayicy yu gan mas tub gaaynal tir sheñ zir de coz ze' gyishlombecy ii. Dey ze' gyicy yu gan mas tub gaaynal tir sheñ zir de yu'y, b icy yu, zan yu, ñaay, iñ yu, yu niy, nunu ni' gyicy yu gan nu gzac ziy. Nunu tiem nu yad par lo gad nu cui mbañ dey tub la. <sup>31</sup> Tees zigy de mbecy nu gya zir zu na, dey ze' gyac yu mbecy nu gash zir zu par lo. Ze' zigy mbecy nu gash zir zu na, de yu ze' gac dey yu nu gya zir zu par lo —nam.

### Mnii ga' Jesuuz nu cut mbecy mi

<sup>32</sup> Orze' Jesuuz rcam zam par Jerusaleeng. Ub mi Zub lom. Ze' par ich mi zaab de yu nu rsya' lom. Za nu la ic dey nunu rdzib dey lat nu za cay ich mi. Orze' gua nu

reñ mi de trocyup de yu nu bloo sum ze'. Gaze' nu brugy' rnii lo dey de coz nu gzac mi. <sup>33</sup> Orze' nam:

—De ru rzac der nu na rcan zan par Jerusaleeng.

Orze' ze' gu' dey ya, biñ nu byac mbecy, yaa de uz Zub lo, nu yaa de mbecy nu rlyuu leey nu bzeeñ Moisees.

Nii dey nu rlagy ñi nu gatañ nu yu' falt ne. Gaze' nu gu' dey ya yaa de mbecy yad. <sup>34</sup> Orze' gubdzaa dey ya, nunu coo yeñ dey lo, nunu gaaz dey ya nu cuart. Gaze' nu cut dey ya. Tees dzi chon gyabaña —nam.

### Santiag nu Waa bdiñ dey tub faboor lo Jesuuz

<sup>35</sup> Orze' becha' Waa nu Santiag, de iñ Zebedeo lom. Gaze' nu na dey rab yum:

—Masht, dë ya rlagy de nu gyicy ru ca na coz nu diñ de lor —na dey.

<sup>36</sup> Orze' na Jesuuz rab mi dey:

—¿La coz rlagy der gyicya du ru? —nam.

<sup>37</sup> Gaze' nu na dey rab yum:

—Bicy ñuu nu Zub dë cuit ru ze' nu gzburg ru nu gyel lily nir: tub dë par yaa beer, ze' tuuba' dë par yaa reg ru —na dey.

<sup>38</sup> Orze' na Jesuuz rab mi dey:

—De ru wagad lagy der la coz rgyiiñ ru. ¿A gagye der gzuub ru'r taz nu gzburg dey ru'? Nunu ¿a gagye der ded ru gyoow nu ya deda? —nam.

<sup>39</sup> Orze' na dey:

—Gagye dë —nay.

Gaze' nu nam rab mi dey:

—Rishli gaal zuub ru' der taz nu ya zuub ru' nunu ded der gyoow nu ya deda. <sup>40</sup> Tees par nu gzuub der par yaa bee o par yaa rega, nde' walab cuen ne ya nu ni gyicya du der; sinu de lugaar ze', nde' par de yu nu pcui Ñgyoozh —nam.

<sup>41</sup> Na ornu güeñ za' tii ga' de yu nu rsya' lom ze', orze' bdza' dey ni Santiag nu ni Waa. <sup>42</sup> Orze' Jesuuz bredz mi dey. Gaze' nu nam:

—De ru rad lagy der nu de mbecy nu ricy gyel gubier ni reña' lugaar, dzi ricy dey gyel lily niy nu de mbecy shni. De mbecy Zub lo zaab ricy lay mandaar dey.

<sup>43</sup> Tees lat de ru walab ni mod rlagy ñi. Ze' benu ca na der rlagy ru gac ru yu lily, orze' rlagy ñi nu gyicy ru coz nu rlagy de' zir losa'y. <sup>44</sup> Nunu benu ca na tub yu nu ri lat der rlagy yu gac yu mbecy Zub lo, orze' rlagy ñi gyicy yu de coz nu galagy ñi ni de' zir losa'y. <sup>45</sup> Gun ya, biñ nu byac mbecy, a' yapä nu gyicy mbecy coz nu rlagy, sinu par nu gyicya coz nu rlagy mbecy nunu par nu gatañ, gun grishañ nu gruu zigy mbecy lo cashtig —nam.

### Jesuuz b icyac mi tub mbecy lo ca'

<sup>46</sup> Gaze' nu bru'ña dem tub gyedz nu la Jericó. Ornu bruum Jericó nu de yu nu rsya' lom nu de mbecy zigy, orze' gyernez ze' Zub tub lo ca' rgyiiñ yu gun. Bar-timeo lay. Ze' uz yu lay Timeo. <sup>47</sup> Ornu güeñ yu nu laab Jesuuz Nazaret rded mi, orze' brugyi' rbish tiy. Orze' nay:

—Jesuuz nez Dabi, gushni ñuu lagy ya! —nay.

<sup>48</sup> Orze' zigy mbecy bdza' dey niy, nunu mnii dey nu cue' cush tiy. Tees orze' rbish ti ga' zir yu. Orze' nay:

—Jesuuz nez Dabi, gushni ñuu lagy ya! —nay.

<sup>49</sup> Gaze' nu gusu Jesuuz. Orze' nam:

—Bredz der yu —nam.

Gaze' nu bredz dey lo ca' ze'. Orze' na dey rab yuy:

—Briic baloor. Wes su gun rbedz mi ru —na dey.

<sup>50</sup> Orze' gush za laay shab yu par ich yu. Wes suy carer zay lo Jesuuz. <sup>51</sup> Orze' nam rab mi yu:

—¿La coz rlagy ru gyicya du ru? —nam.

Orze' na lo ca' ze' rab yum:

—Masht, ya rlagy nu zac nap la —nay.

<sup>52</sup> Orze' na Jesuuz:

—Yaa la ru na gun ru b icy cup ru consuel lo. Nde' nu byac ru —nam.

Orze' laab or la ze' byanap rzac yu nunu za cay ich Jesuuz par nez nu zam.

### Jesuuz gu'm Jerusaleeng

**11** Orze' bru'ña dey gyi' b icy ni ya Oliva. Bicy ze', nde' gaab ga Betfagé nu Betania, cyup gyedz nu ri gaab ga Jerusaleeng. Orze' Jesuuz bzuu nez mi cyup de yu nu rsya' lom nu cha ga dey lom. <sup>2</sup> Gaze' nu nam rab mi dey:

—Gua der gyedz nu ri gal dzu re. Laab chu' la der lat gyedz ze', orze' gyap der tub bur feñ ca cuñ ma: bañ nu nigul gyub la mbecy. Orze' shaagy der ma, cyid nur ma par ii. <sup>3</sup> Benu ca na mbecy niy lo der: “¿Lagu rshaagy der bur ze?” niiy, orze' nii der nu “Shuaan na cyiñ ma nim. Gaze' nu lueg la tush cya ga'm ma”, nii der —nam.

<sup>4</sup> Gaze' nu gush nez dey zay. Byap dey bur feñ ze' ca cuñ ma gyernez, ro' ni tub yu'. Gaze' nu pshaagy dey ma.

<sup>5</sup> Orze' na de mbecy nu yu' lugaar ze' rab yu dey:

—¿Lagu rshaagy der bur ze? —nay.

<sup>6</sup> Orze' mnii dey lo mbecy ze' gal nu mnii Jesuuz. Gaze' nu bzaan dey nu cha nu dey bur ze'. <sup>7</sup> Orze' gua nu dey ma lo Jesuuz. Orze' briib dey shab yu ich bur feñ ze'. Gaze' nu gutib Jesuuz ma. <sup>8</sup> Tona' la zigy mbecy pcuaay shab yu gyernez. Nunu yu' ga' dey pshi'ñ yu yaa yag nu nash ngush pcuaay gyernez. <sup>9</sup> Orze' dela de mbecy nu Zub lo lom nunu dela de mbecy nu zaab par ich mi brugyi' rbishti dey. Orze' na dey:

—Dzi ga zily nac ru! Ñgyoozh nac num ru biñ nu bzuu nez mi! <sup>10</sup> Ñgyoozh nap ricy num gyel gubier nu yad ni biñ nu bruu lat nez gyitoo bel nin Dabi! Dzi ga zily nac biñ nu gya zir zu! —na dey.

<sup>11</sup> Ornu gu' Jesuuz lat gyedz Jerusaleeng, orze' gu'm loli' ni yu' nu driib zily mbecy Ñgyoozh. Orze' bri' lom dutuub la loli' ze'. Orze' bruum zam par Betania nu de trocyup yu nu bi bloo sum ze', gun bi gudze.

### Jesuuz bzaa lagy mi ni tub ya las

<sup>12</sup> Tuuba' dzi, ornu bruum Betania, orze' briib nu ran mi. <sup>13</sup> Orze' bzaac mi tub ya las Zub ñi zet. Ta' lyag niñ. Gaze' nu gua güiim ben a wad uugy niñ gom. Tees or-

nu bru'ñam looñ se la la coz byap mi. Nomaas lyag zi'l ta' niñ, gun walab tiem nu rbic ñi uuggy.<sup>14</sup> Orze' nam rab mi ñii:

—¡Laab ru rila wowa' mbecy uuggy nir! —nam.  
Nunu güeñ de yu nu rsya' lom nu ni mniim.

### Jesuuz gu'm loli' ni yu' nu driib zily mbecy Ñgyoozh

<sup>15</sup> Gaze' nu brim Jerusaleeng. Orze' gu' ga'm loli' ni yu' nu driib zily mbecy Ñgyoozh brugyi' rboom de yu nu nguaa rut gal nu de yu nu rzii nañ yu' ze'. Nunu ptush cyam mez ni de yu nu rtich tiñ. Nunu ptush cya ga'm yashily ni de yu nu rut begy.<sup>16</sup> Nunu wansaana'm nu chesa nu mbecy la coz loli' ni yu' ze'.  
<sup>17</sup> Blyuum ni de mbecy. Orze' nam rab mi dey:

—Ñgyoozh nam lat riidz nim: "Yu' ne gruu lañ yu' nu gnii nu de lo la mbecy ya", nam. Ze' de ru ricy der nu nañ gal nu na tub blyuu ni gubaan —nam.

<sup>18</sup> Orze' güeñ de uz Zub lo nu de yu nu rlyuu leey ni Ñgyoozh. Orze' brugyi' nu ryub dey tub mod nu cut dey mi, gun rdzib dey lom, gun dela de mbecy zigy za nu ic dey de coz nu rlyuum.<sup>19</sup> Tees or becheñ, orze' bruu ga' Jesuuz gal nu de yu nu rsya' lom Jerusaleeng.

<sup>20</sup> Na or bza' yu tuuba' dzi bdeda' dey lo ya las ze'. Bzaac dey nu guwach ñi gashtal lyu lañ.<sup>21</sup> Orze' byea' lagy Bed coz nu mnii Jesuuz. Gaze' nu nay rab yum:

—Masht, ¡güii la! Guwach ya las nu bzaa lagy ru ni re —nay.

### Orze' nam rab mi dey:

—Bicy cup der consuel lo Ñgyoozh.<sup>23</sup> Ya rishli rneé lo der nu cyu zi'l mbecy nu nii lo bicy ii: "Bruu chu. Gua gyet lag ru lo nisyudoo", niiy, nunu cue' gyicy cyup ic yu sinu gyicy cup yu consuel nu gac coz nu niiy, orze' gac ñii.<sup>24</sup> Nde' nu ya rneé lo der nu la zi'l coz nu cyiñ der ornu rnii nu der Ñgyoozh, bicy cup der consuel nu gad ñi, gun orze' gad ñi.<sup>25</sup> Nunu lat nu zu der rnii nu der Ñgyoozh, bicy sulagy der ni losa'r benu rzi lagy ru loy, gun orze' ni' Ñgyoozh, uz der nu Zub gyibaa, gyicy sulagy mi de coz a' nap nu ricy der.<sup>26</sup> Tees benu de ru wayicy sulagy der ni losa'r, ni' Ñgyoozh uz der nu Zub gyibaa wayicy sulagy mi de coz a' nap nu ricy der —nam.

### De mbecy bdugyi'y lo Jesuuz ca bloom rishbeey

<sup>27</sup> Gaze' nu brii ga'm Jerusaleeng. Lat nu rded mi loli' ni yu' nu driib zily mbecy Ñgyoozh, de uz Zub lo gal nu de yu nu rlyuu leey ni Ñgyoozh nu de yu bel ni de mbecy Israeel bru'ña dey lom.<sup>28</sup> Orze' na dey rab yum:

—¿La na rishbeey ricy cup ru nu ricy ru de coz ii?

¿Cyu briic rishbeey nu ni ricy ru? —na dey.

### Orze' na Jesuuz rab mi dey:

—Ni' ya dugyi' tub coz lo der. Benu tush cya der ñii, orze' ni' ya neé lo der nu la na rishbeey ricy cupa nu ricya de coz ii.<sup>30</sup> ¿Cyu bzuu nez Waa nu biid yu nu briib nis yu mbecy? ¿A Ñgyoozh bzuu nez mi yu uti mbecy?

<sup>31</sup> Gaze' nu brugyi' ro dey riidz nu losa'y yu'y. Orze' na dey:

—Benu niin nu Ñgyoozh bzuu nez mi yu biid yu, orze' nii Jesuuz gab yu de ub na: "Ze' ¿lagu wancheña lagy der de riidz nu mniiy, beni?", gniiy.<sup>32</sup> Tees wac niin nu mbecy bzuu nez yuy biid yu —na dey.

Ni mnii dey, gun rdzib dey lo mbecy, gun dela mbecy b icy dey Waa par tub yu nu rishli rnii por cuen ni Ñgyoozh.<sup>33</sup> Orze' na dey rab yu Jesuuz:

—Wagad lagy de —na dey.

Orze' na Jesuuz rab mi dey:

—Ni' ya wanqe lo der la na rishbeey ricy cupa nu riçya de coz ii —nam.

### Riidz tiily ni moz a' nap

**12** Orze' brugyi' rnii Jesuuz lo de mbecy nu riidz tiily. Gaze' nu nam rab mi dey:

—Tub mbecy mnuuz yu tub nac lyucy urbyay. Bdu'y lo' dub yub la ru'ñ. Orze' bzaay tub zo nu dushij de urbyay ze'. Nunu bzaay tub ze' nu gya bzuub yu tub yu' nu bduñañ. Gaze' nu bzeeñ yuñ yaa mbecy nu nuuz dey coz cyaal. Gaze' nu gush nez yu zay tub lugaar zet.<sup>2</sup> Na ornu byap tiem nu dulag urbyay ze' na, orze' bzuu nez yu tub moz lo de yu nu mnuuz coz cyaal ze' par nu cha gyiy ca na de coz nu bruu lo de lyucy ze' nu bdugiyi.<sup>3</sup> Tees de yu ze' bdu' yaa dey moz ze' bgaaz dey yu, nunu se la la briic dey niy yay.<sup>4</sup> Orze' yu nu guni lyucy urbyay ze' bzeed yu tuuba' moz, tees ni' zi'l yu ze' ton'a la shiñ b icy nu dey yu. Pcad güii dey tooy. Orze' gud güii bish cyay.<sup>5</sup> Ze' bzeeda' yu nu guni lyucy urbyay ze' tuuba' moz. Orze' yu ze' biit dey yu. Ga ub ni laa bzeed yu zigy moz, nunu dela dey shiñ b icy nu dey yu. Yu'y bgaaz dey yu. Yu'y biit dey yu.

<sup>6</sup> 'Saca' zir mbecy nu rcyiiñ loy. Ze' i'ñ zi'l yu nu dzi rcay zu. Por fij gaze' nu bzeed yu i'ñ yu. Orze' mnii tooy: "Ca gaal lagy dey lo i'ñ na", mnii tooy.<sup>7</sup> Na ornu bru'ña i'ñ yu ze' nu nash lyucy urbyay ze', orze' na de yu nu mnuuz coz cyaal ze' rab yu losa'y: "Yu re gyiyeen nuy de gyel nap ni uz yu. Yaa der chan dut nay, gun orze' gyiyeen gyel nap nin", na dey.<sup>8</sup> Orze' bdu' yaa dey yu ze'. Biit yuy. Bloo dey yu lat lyucy urbyay ze'.

<sup>9</sup> Na ¿la coz gyicy yu nu guni lyucy urbyay ze' nu de yu nu mnuuz coz cyaal ze'? Chay cut yu dela yu nu mnuuz coz cyaal ze'. Orze' zeeñ yu lyucy urbyay ze' yaa reña' moz.<sup>10</sup> Walab gaal gabee wacsya' der riidz ni Ñgyoozh ze' nu rniiñ:

Gyita' nu mne' de biryu byac ñi gyita' nu ricy zir ñi presis.

<sup>11</sup> Nii tub coz nu ricy Ñgyoozh nunu ton'a la cyit par de ub na,  
rniiñ, —nam.

<sup>12</sup> Orze' ngulagy dey ngu' yaay mi, gun psa' lagy dey nu loy pcaam ornu mniim riidz tiily ze'. Tees rdzib dey lo de mbecy zigy. Orze' bruu chu dey lom. Gush nez dey zay.

### Riidz ni tiñ nu rte' mbecy por cuen ni gubier

<sup>13</sup> Gaze' nu bzuu nez dey la be mbecy fariseo nu la be mbecy ni Herodes par nu gyicy dey nu gadzam nu riidz

gun orze' gad mod nu cu' zi dey mi. <sup>14</sup> Bru'ña dey lom na. Gaze' nu na dey rab yum:

—Masht, dē ya rad lagya nu rniir nu rishli. Nunu ru wagyicy cuen ru de coz nu rnii mbecy, gun a' nac ru mbecy nu rcui, sinu rniir mod nu rlagy Ñgyoozh nu chu' den. Mnii lo de: ¿A gruu nap ñi nu riib na tiñ nu rbic dey ni César, yu nu riib ic de nasyoong, uti waruu nap ñi? ¿A rish na uti warish na? —na dey.

<sup>15</sup> Tees Jesuuz gud lagy mi nu nac dey mbecy rzuu lo. Orze' nam rab mi dey:

—¿Lagu rzu der caa ze' lq? Da nu der tub tiñ güii —nam.

<sup>16</sup> Gaze' nu gua nu dey tub tiñ lom. Orze' nam rab mi dey:

—¿Cyu nab ca lo tiñ ii nunu cyu nu la ca looñ? —nam.

Orze' na dey:

—Lo César, yu nu riib ic de nasyoong, gal nu nu lay —na dey.

<sup>17</sup> Gaze' nu nam rab mi dey:

—Beni briic der ni César de coz nu nac niy, nunu briic der ni Ñgyoozh de coz nu nac nim —nam.

Orze' tona' la za nu ic dey.

### Lac mod chu' mbecy ornu bi gut yu

<sup>18</sup> Gaze' nu bru'ña tub nac mbecy saduceo lom, de yu nu rnii nu wagyabañ de mbecy gut. Orze' na dey rab yum:

<sup>19</sup> —Masht, Moisees pcaay par dela den nu benu tub mbecy gat b icy yu nunu zeeñ yu mñaay, ze' sac iñ mi, orze' yu ze' rlagy ñi chelaay mñaay b icy yu par nu cuic yu iñ mi nu gyac ni b icy yu nu bi gut ze'. Orze' guul yuy. <sup>20</sup> Bzu gag yu mbecy nuy b icy yu. Orze' yu loga la pchelaay. Orze' gut yu nunu wancuic yu iñ mñaay.

<sup>21</sup> Orze' b icy cyup yu ze' pchelaa ga'y mi. Ze' guta'y nunu ni' zi' wancuic yu iñ mi. Orze' ni' zi' yu chon pchelaa ga'y nu biñ mñaay ze'. <sup>22</sup> Orze' ni' zi' za' gag yaa dey pchelaay mi. Tees ni tub la dey wancuic yu iñ mi. Por fij guta' la biñ mñaay ze'. <sup>23</sup> Or shuub dzi nu gyabaña' de mbecy gut, ¿ca na dey ze' gac mñaay biñ mñaay ze', gun za' gag yaa dey pchelaay mi? —na dey.

<sup>24</sup> Orze' na Jesuuz rab mi dey:

—De ru radza der gun wagyet lag der cuen de coz nu rnii lat riidz ni Ñgyoozh. Ni wagad lagy der la na coz nu gac gyicy mi. <sup>25</sup> Gun ornu gyabañ de mbecy nu bi gut, orze' wachelaa ga' dey, sinu chu' dey gal nu yu' de anc nu yu' gyibaa. <sup>26</sup> Ze' ni nu gyabañ mbecy, ¿walab gaal wacsya' der gyicy nu bzeeñ Moisees lac mod mnii nu Ñgyoozh yu ornu mniim lat tub yag nu rca gyi? Orze' nam rab mi yu: "Ya naç Ñgyoozh ni Abraham, naç Ñgyoozh ni Isaac, nunu naç Ñgyoozh ni Jacob", nam. <sup>27</sup> ¡Gun Ñgyoozh a' nac mi Ñgyoozh ni mbecy nu bya' lo la, sinu nac mi Ñgyoozh ni mbecy nu mbañ, mas bi gut yu! Nde' nu de ru radza der —na Jesuuz.

### Leey zab lo zir par de' zir leey

<sup>28</sup> Orze' bru'ña tub mbecy nu rlyuu leey ni Ñgyoozh. Yu ze' güeñ yu de riidz nu bee Jesuuz nu de mbecy sa-

duceo nunu bdu' cuen yu nu nap mniim. Orze' nay rab yum:

—¿Ca na leey ni Ñgyoozh nac ñii leey zab lo zir? —nay.

<sup>29</sup> Orze' na Jesuuz rab mi yu:

—Leey nu zab lo zir, nde': "De mbecy Israeel nap bzuub gyidag der. Ñgyoozh, Shuaan na, tub zi lam nac mi Ñgyoozh. <sup>30</sup> Orze' pca der Shuaan ru, biñ nu nac Ñgyoozh nir nu dutuub la lardoorn, nu dela gyel mbañ nir, nu dutuub la shcab nir, nu dela fers nir." <sup>31</sup> Nde' nu loga la. Ze' leey cyup nde': "Pca der losa'r gal nu rcar ub ru." Saca' zir leey nu zily zir nac par cyup leey ze' —na Jesuuz.

<sup>32</sup> Orze' mbecy ze' nay rab yum:

—Rishli, masht, dzi nap mniir nu zu tub zi Ñgyoozh. Sac cyu' zir Ñgyoozh. <sup>33</sup> Nunu nu caan Ñgyoozh nu dutuub la lardoorn, nu dutuub la shcab nin, nu dela gyel mbañ nin, nu dela fers nin, nunu caan losa'n gal nu rcaan ub na. De nde' ricy zir ñi presis gaze' de gun nu rzaay na lo Ñgyoozh gal nu dela de' zir gun nu ricy na lom —nay.

<sup>34</sup> Ornu güeñ Jesuuz nu dzi nap mniy gal nu rnii mbecy nu nap rad lagy, orze' nam rab mi yu:

—Ru walaba' nu dzi ricy falt par nu gyub ic Ñgyoozh ru —nam.

Orze' ni tuba' la mbecy wangash lagy yu nu ngugyi'y lom.

### Cyu nez nac Mesías

<sup>35</sup> Lat nu blyuu Jesuuz loli' ni yu' nu driib zily mbecy Ñgyoozh, orze' nam rab mi dey:

—¿Lagu rnii de yu nu rlyuu leey ni Ñgyoozh nu Mesías, biñ nu ca lo cuen nu co mbañ mbecy, gruum lat nez Dabi? <sup>36</sup> Gun Espiriit Yon ni Ñgyoozh pcaam uub la Dabi nu niy ornu nay:

Ñgyoozh nam rab mi Shuaan na:

"Gzub ru lugaar ni mbecy nu gya zir zu, par yaa bęe ii gashtal gyicy la nu gyicy ru gan losa' yuur", nam, na Dabi. <sup>37</sup> Orze' ub la Dabi mniy nu nac mi Shuaan yu. ¿Walab gaal gac gruu Mesías lat nez Dabi? —na Jesuuz.

Orze' dela de mbecy zig yet lagy dey rzuub gyidag yu coz nu rnii.

### Jesuuz mniim nu gyicy cuidad dey nu de mbecy fariseo gal nu de mbecy nu rlyuu leey

<sup>38</sup> Lat nu rlyuum ni dey, orze' nam:

—Cuidad der nu de mbecy nu rlyuu leey ni Ñgyoozh. Gun dey re yet lagy dey chesay nu shab duñ yu, nunu yet lagy dey nu rca lagy mbecy loy ornu rnii nu dey yu lat yagyi'. <sup>39</sup> Nunu gusht ni dey nu gzub yu lo yashily ni mbecy nu ricy ñi presis nañ yu' nu rsya' mbecy riidz ni Ñgyoozh, nunu yet lagy dey lugaar ni mbecy lily lat sa'.

<sup>40</sup> Tees rboo dey yu' byud gal nu gyel nap nim. Orze' par nu rsoow su dey lo de coz a' nap nu ricy nu dey byud ze', chi rnii nu dey Ñgyoozh. Nde' nu dey ze' cashtig ily zir gad ni dey —nam.

### Gun nu briic tub byud

<sup>41</sup> Jesuuz zub mi ro' ni yu' nu driib zily mbecy Ñgyoozh, gaab ze' nu ca alcansi nu rgu' dey gun. Zub mi rgüiim lo de mbecy nu rgu' tiñ nañ alcansi ze'. Orze' zigi de guani'ñ nu dru'ña ze' sheñ tiñ rgu' dey. <sup>42</sup> Orze' bru'ña tub byud nu dzi gyel zi zu. Pshet lag mi cyup sentab mi' nañ alcansi ze', tiñ nu dzi a' sac. <sup>43</sup> Orze' bredz Jesuuz de yu nu rsya' lom. Gaze' nu nam rab mi dey:

—Rishli gaal coz ily zir b icy byud re gaze' dela de' zir mbecy nu rgu' tiñ nañ alcansi ii. <sup>44</sup> Gun dela de guani'ñ, de coz nu brusub zi'l ni dey briic yu. Ze' byud re gyel zi zum. Briic mi dela tiñ nim. Dela tiñ nu rcyiiñ nim briic mi —nam rab mi dey.

### Jesuuz mniim nu dudily yu' nu driib zily mbecy Ñgyoozh

**13** Lat nu druu Jesuuz loli' ni yu' nu driib zily mbecy Ñgyoozh, orze' na tub yu nu rsya' lom rab yum: —¡Masht, güii dzi ga coz ily de gyita' nu gup yu' ii, nunu dzi ga coz ily de yu' ii! —nay.

<sup>2</sup> Orze' na Jesuuz rab mi yu:

—¿A rzac ru de yu' ily ii? Tees ii sac ni tub gyita' nu gyeeñ ñi too losa'ñ. Delañ dudily ñi —nam.

### Lac mod gad lagy mbecy ornu shuub dzi nu gya' lo dela coz

<sup>3</sup> Gaze' nu bruum zam too b icy ni ya Oliva, tub la' ga' duz ni yu' nu driib zily mbecy Ñgyoozh. Na ornu gusub mi na, orze' Bed, nu Santiaq, nu Waa, nu Ndrees, bdugyi' reñ dey lom. Gaze' nu na dey:

<sup>4</sup> —Mnii lo de, ¿gul gac de coz nu mniir ze'? Nunu ¿la na muesht gruu zac ornu gac dela coz ze'? —na dey.

<sup>5</sup> Orze' Jesuuz brugyi' rniim lo dey. Gaze' nu nam:

—Bzu der cuidad nis guu mbecy der, <sup>6</sup> gun tona' la zigy mbecy gruu zac yu nu gash yu nu la. "Ya Mesías, biñ nu ca lo cuen nu co mbañ mbecy", niiy. Orze' gyicy yu nu tona' la zigy mbecy gadza dey.

<sup>7</sup> Na ornu gyeñ der nu bi yu' gyel yuu gaab ga gal nu de ze' nu zet, cue' dzib der, gun nde' coz nu rlagy ñi nu gac. Tees gabee nigul shuub dzi nu gya' lo dela coz.

<sup>8</sup> Gun tub nac mbecy chu'y gyel yuu nu tub naca' mbecy. Nunu tub gubier chu'y gyel yuu nu tuuba' gubier. Grib duru zañ lugaar. Cyid cubiñ. Tees dela de nde' nu gzub zi'l gya'ñ nu gzac zi de mbecy.

<sup>9</sup> Tees de ru bzu der cuidad nu ub ru, gun gu' dey der yaa de fushtiz. Nunu gaaz dey der nañ de yu' nu rsya' mbecy riidz ni Ñgyoozh. Nunu cu' cyi dey der lo de mbecy nu riib ic nu lo de rey nu nac ya, gun orze' lyuu der de coz rishli ne lo dey. <sup>10</sup> Nunu rlagy ñi nu gyal de riidz nu sac ne lat de lo la nac mbecy anzir nu gya' lo dela coz. <sup>11</sup> Tees ornu cha nu dey der gu' dey der yaa de fushtiz, cue' sug ic der lac na riidz nu niir, sinu nii der de riidz nu rbic Espiriit Yon ni Ñgyoozh laab or la ze', gun riidz nu nii der, nde' walab riidz ni ub der, sinu riidz nu cuic Espiriit Yon ni Ñgyoozh, nii der. <sup>12</sup> Nunu de

mbecy cush cyay ich b icy yu gyicy yu nu gat yu. Ze' de mbecy nu yu' iñ cush cyay ich iñ yu. Nunu de yu feñ cush cya dey ich uz yu. Gyicy yu nu gat yu. <sup>13</sup> Nunu dela mbecy gazi lagy dey lo der nu nac ya. Tees yu nu gagye gashtal gat la, yu ze' yu nu co mbañ Ñgyoozh.

<sup>14</sup> 'Na Dañeel, yu nu mnii por cuen ni Ñgyoozh, bzeeñ yu riidz ni coz bag nu gyicy nu nit lo. Ornu zac der coz bag ze' chu'ñ ze' nu walab se'ñ, orze' de mbecy nu yu' lo yu ni Judea rlagy ñi ruu chu dey chay par logyi'. (Yu nu csya' de riidz ii rlagy ñi gyet lag yu cuen.) <sup>15</sup> Orze' yu nu zub too yu', walagy ñi nu gyet yu chu'y nañ yu' nu chagyiy coz nu cha nuy. <sup>16</sup> Yu nu ricy riiñ lat naa, cue' ga' cush cyay cha gyiy shab yu. <sup>17</sup> ¡Tees cuaa de biñ mñaa nu secyi zu! ¡Cuaa de biñ nu rgaagy mdoo tiem ze'! <sup>18</sup> Bdiiñ der lo Ñgyoozh nu cue' nu tiem rag shuub dzi nu ruu chu der. <sup>19</sup> Gun tiem ze' zac zi zir mbecy gaze' de tiem nu bded, gaal zi'l nu bzub gyi' dela coz nu psa' lagy Ñgyoozh. Nunu gzac zi zir dey tiem ze' gaze' de' zir tiem nu yad par lo. <sup>20</sup> Nunu benu Ñgyoozh wayicy shub mi tiem ze', ni tub la mbecy waruu mbañ yu. Tees gyicy shub mi tiem ze' par nu nac de mbecy nim nu bi pcuim.

<sup>21</sup> 'Orze' benu ca na mbecy niiy lo der: "Güii ii zu Mesías, o güii re rim", nii dey, cue' cheña lagy der.

<sup>22</sup> Gun gruu zac mbecy rguu nu niiy nu nac yu Mesías nunu gruu zac mbecy rguu nu niiy nu nac yu mbecy nu rnii por cuen ni Ñgyoozh. Lyuu dey zañ muesht, nunu gyicy dey zañ nusuriidz nu cha nu ic mbecy par nu gad mod nu guu dey mbecy. Mas gashtal de mbecy nu bi pcui Ñgyoozh guu dey benu gac. <sup>23</sup> ¡Tees de ru cuidad der! Gun tiem bi bzata ñii lo der.

### Cyid Jesuuz, biñ nu byac mbecy, tuuba' tir

<sup>24</sup> 'Na ornu ded tiem nu zac zi de mbecy ze', orze' gyet cow lo doo nunu beey wabica' ma yaa. <sup>25</sup> De bel nu ta' baa gyet lag ma, nunu de fers nu nash baa cueñ ñii. <sup>26</sup> Orze' despuees nde' zac dey ya, biñ nu byac mbecy, yapa' lat za. Zac dey nu gac gyicya' coz ily nunu tona' la lily na. <sup>27</sup> Gaze' nu zuu nezä de anc ne nu cha te'y de mbecy nu bi bducui nu yu' gashtal se tap la scyiñ ni gyishlombecy: gash ñi nese ze' nu blaazha' la nu zet ni gyishlombecy gashtal baa la.

<sup>28</sup> 'Psyä' der mod nu ricy ya las. Ornu bi rga'ñ nu driib lyag niñ, orze' bi neñ der nu bi yad tiem zig. <sup>29</sup> Ni' zi'l mod ornu zac der nu gac dela coz nu mneñ lo der, orze' bi neñ der nu ya, biñ nu byac mbecy, bi zü la nu yapa. <sup>30</sup> Ya rishli rnëe lo der nu de mbecy nu yu' tiem ze' walazh dey gat yu gal gac dela coz ze'. <sup>31</sup> Baa nuñ gyishlombecy ii, delañ ded niñ, tees riidz nu ya rnëe, nde' rila waded niñ.

<sup>32</sup> 'Tees dzi ze', nu or ze', se cyu la rad lagy. Ni de anc nu yu' gyibaa, ni ya, iñ Ñgyoozh, wagad lagya, sinu tub zi la Ñgyoozh, uz den rad lagy mi.

<sup>33</sup> 'Bicy cuidad der. Bzu der altant, gun wagad lagy der gul cyid tiem ze'. <sup>34</sup> Dela nde' nañ gal na tub mbecy nu bi zuu lay nu chay byaj. Anzir nu chay, bdu'y riiñ yaa de moz niy, nunu tub ga la dey nu tub ga riiñ nu gyicy yu. Orze' pcaay yu nu rña gyero' nu zuy altant

par ornu griy. <sup>35</sup> Nde' nu ni de ru bzu der altant, gun wagad lagy der gul yapä: ti or bi becheñ, ti or guzel rel, ti or gabee caas ru' zu, ti or za' yu. Wagad lagy der. <sup>36</sup> Cuidad nis gac der gal na tub mbecy nu nas. Wansu lily yu ornu gri shuaan yu. Cuidad der nis ni na der ornu ya yapä. <sup>37</sup> Nunu coz nu rnëe lo der, rnëe lo dela mbecy: nu zu der altant —na Jesuuz.

### Mbecy bloo ic dey lac mod cut dey Jesuuz

**14** Ornu ricy falt ru' cyup dzi par nu chu' sa' ni Pas, sa' nu row dey gyishtily nu sac lebadur, orze' de uz zub lo nu de yu nu rlyuu leey ni Ñgyoozh byub dey tub mod nu shet lag dey Jesuuz pres nu nac gyel rguu, gun orze' gyicy dey nu gat mi. <sup>2</sup> Orze' na dey rab yu losa'y:

—Walagy ñi nu shet yaan yu lat sa', gun nis gyach de mbecy —na dey.

### Tub biñ mñaa pcoom asecy too Jesuuz

<sup>3</sup> Lat nu rcyiñ Jesuuz Betania nañ yu' ni Simoo, yu nu gurat gyedz nu la lepra, lat nu zub mi lo mez, orze' bru'ña tub biñ mñaa nu tub lamet nu byaa nu gyita' nu la alabastro. Dza laa nañ ñi yu' asecy zguul. Du uub la asecy nu bruu nu tub lo gyish nu la nardo. Tona' la ñgyup sac ñi. Gaze' nu pcyug mi yeñ lamet ze'. Pcoom asecy ze' too Jesuuz. <sup>4</sup> Orze' yu' mbecy rdza' dey. Gaze' nu na dey rab yu losa'y:

—¿Lagu leew la mnit lom asecy zguul re? <sup>5</sup> Gun nde ñgyac nsa'y ñi ñgyup zir par chon gaaynal tiñ denario. Orze' tiñ ze' mbic mi ni de mbecy zi —na dey.

Nunu rdza' dey ni biñ mñaa ze'.

<sup>6</sup> Tees Jesuuz nam rab mi dey:

—Zaan der. ¿Lagu ricy seed der mi? Mi ii tona' la nap bicy num ya. <sup>7</sup> Gun mbecy zi dub laa tiem yu' lat der. La zi'l tiem nu galagy der gac gyicy ru coz nap nur dey. Tees ya walab dub laa tiem cyiñä lat der. <sup>8</sup> Mi ii ricy mi coz nu rac ricy mi. Driily ga lam asecy cuerp ne gun orze' zu lily mi ñii anzir nu cach dey ñi. <sup>9</sup> Ya rishli rnëe lo der nu ca zi'l lugaar ni gyishlombecy nu shaal dey ridz nu sac nu bruu lo Ñgyoozh, nii ga' dey coz nu bicy nu biñ mñaa ii ya par nu gyeza' lagy mbecy mi —na Jesuuz.

### Judas bish cyay ich Jesuuz

<sup>10</sup> Orze' Judas Iscariote, tub yu nu bruu lat de trocyup yu nu bloo su Jesuuz, bruuuy ze' zay lo de uz zub lo par nu gu' dzey mi yaa dey. <sup>11</sup> Na ornu güeñ de uz zub lo ze' nu mnii Judas nu ni gyicy yu, orze' bet lagy dey. Gaze' nu mnii dey nu segur la cyish yu niy. Orze' Judas byub yu mod nu gu' dzey mi yaa dey.

### Jesuuz bzeeñ mi mod nu gow nu dey losa'y

<sup>12</sup> Dzi loga la ni sa' nu row dey gyishtily nu sac lebadur, dzi nu rut dey shily ni sa' ni Pas, orze' na de yu nu rsya' lom rab yum:

—¿Ca rlagy ru nu chä dë zu yé coz nu gyicy na che sa' ni Pas? —na dey.

<sup>13</sup> Gaze' nu bzuu nez mi cyup dey. Orze' nam rab mi yu:

—Yaa der lat gyedz. Re dzeel der tub mbecy nu ya nu tub re' nis. Yu ze' cha ca der ich yu. <sup>14</sup> Ze' nu chu'y nañ yu', ze' nii der lo shuaan yu' ze': "Masht nam nu yap tuyi' lor ben ca na cuart ze' nu gow mi gyit nu gyicy mi che ni sa' ni Pas nu dë ya, mbecy nu rsya' lom", nii der. <sup>15</sup> Gaze' nu yu ze' lyuu tub cuart ily nu zub gya. Bi nguaa dela coz nu cyiñ nañ ñi nunu bi zu lily ñii. Ze' zu ye der nu dow den comid ni sa' ni Pas —nam rab mi dey.

<sup>16</sup> Gaze' nu bruu dey ze' ya dey lat gyedz. Guc ñi gal nu mnii Jesuuz. Gaze' nu ze' bzu ye dey comid ni sa' ni Pas.

<sup>17</sup> Na ornu becheñ na, orze' brim nu de trocyup yu nu bloo sum ze'. <sup>18</sup> Lat nu zub nu Jesuuz dey lo mez row num dey comid ze', orze' nam:

—Ya rishli rnëe lo der nu lo dela der gal nu nguaa der nu row nur ya ii, rusu tub der nu cush cyar ichä —nam.

<sup>19</sup> Orze' brugyi' ricy shni de yu nu rsya' lom ze'. Orze' tub ga la dey brugyi' rgugyi' dey lom. Orze' nay:

—¿Walab gaal ya? —nay.

<sup>20</sup> Orze' nam rab mi dey:

—Lo trocyup der nu rne'r gyishtily nir nañ tub zi'l gya'n nu ya, grusu tub der nu cush cyar ichä. <sup>21</sup> Gun ya, biñ nu byac mbecy, rishli gata gal nu pcaa de yu nu mnii por cuen ni Ñgyoozh. ¡Tees cuaa yu nu cush cya ich ya, biñ nu byac mbecy! Nap zir benu cue' ñgal yu nu ni gyicy ze' —nam.

<sup>22</sup> Na lat nu gabee nguaa dey row yu gyit, orze' Jesuuz gush mi tub gyishtily. Orze' briic mi gras ni Ñgyoozh nu nac ñii. Gaze' nu blew mi ñii briic mi ni dey. Orze' nam rab mi dey:

—Gush der nii, gun nii cuerpe ne —nam.

<sup>23</sup> Gaze' nu gusha'm tub taz nu yu' ñup urbyay. Orze' briica'm gras ni Ñgyoozh. Gaze' nu briica'm ñi nu go' dela dey. <sup>24</sup> Gaze' nu nam rab mi dey:

—Nu nii reñä nu dushu par nu gruu mbañ zigy mbecy. Nii reñä nu bzu nap ñi trat nu bicy nu Ñgyoozh mbecy. <sup>25</sup> Ya rishli rnëe lo der nu rila wado' ga' ñup ni urbyay gal do' la ñup cub ze' nu riib ic Ñgyoozh —nam.

### Jesuuz mniim nu ne' Bed mi

<sup>26</sup> Ornu blazh biil num dey tub salmo, gaze' nu bruu num dey yu' ze' za num dey bicy ni ya Oliva. <sup>27</sup> Gaze' nu nam rab mi dey:

—Dela der checa der nu gyicy cup ru consuel lo, gun ni rniiñ lat de riidz ni Ñgyoozh. Orze' nam: "Ya duta biñ nu rña shily. Orze' dela shily nim grush las ma", nam.

<sup>28</sup> Tees despuees nu gyabañä, orze' ya gya ga' lo der par Galilea —nam.

<sup>29</sup> Orze' na Bed rab yum:

—Mas dela dey checa dey nu gyicy cup dey consuel lor, tees ya rila wayeca —nay.

<sup>30</sup> Orze' na Jesuuz rab mi yu:

—Yä rishli rnęę lor nu laab rel na, anzir nu cuedz ngüel ru' cyup ma, ru chon tir niir nu a' yu' lor ya —nam.

<sup>31</sup> Tees Bed fert la zuy. Orze' nay:

—Mas gata dę ru, tees ya rila wanęę nu a' yu' lo ru —nay.

Orze' dela dey ni' zi'l mniiy.

### Jesuuz mnii num Ñgyoozh Getsemaní

<sup>32</sup> Orze' bruu num dey bicy ni ya Oliva za num dey tub lugaar nu la Getsemaní. Orze' nam rab mi dey:

—Bzub der ii lat nu ya cha neę dę Ñgyoozh —nam.

<sup>33</sup> Gaze' nu gua nu reñ mi Bed, nu Santiag, nu Waa. Orze' brugyi' ricy shnim, nunu ton'a la deet rac nañ lardoom. <sup>34</sup> Gaze' nu nam rab mi dey:

—Yä rlagy la gata nu shni rac nañ lardoo. Blez der ii, nunu bzu der altant nu ya —nam.

<sup>35</sup> Gaze' nu gua ga'm sñumiiñ par lo. Wes saa tiily mi lo yu. Orze' mnii num Ñgyoozh ben a wac gyicy mi nu cue' shuub or nu zac zim ze'. <sup>36</sup> Gaze' nu nam rab mi Ñgyoozh:

—Uza, ru gac gyicy ru dela coz. Orze' bloo chu taz nu rlagy ni zuub ru'. Tees cue' gac ñii gal nu rlagya, sinu gal nu rlagy ru —nam.

<sup>37</sup> Na ornu bish cyam lo dey, nguua nas dey. Orze' nam rab mi Bed:

—Simoo, ¿walab gaal nas ru? ¿Walab gaal ni tub or wangagyeer nzur altant? <sup>38</sup> Bzu der altant nunu mnii nu der Ñgyoozh, gun orze' cue' gyicy de coz cyi gan der. Gun nañ lardoos der rlagy der gyicy ru coz nap, tees cuerpi ni der waccyiñ ni —nam.

<sup>39</sup> Gaze' nu guam tuuba' tir mnii num Ñgyoozh gal nu mnii ga' zi'l mi nu loga. <sup>40</sup> Orze' bish cya ga'm tuuba' tir zam lo dey. Orze' ni' zi'l byap mi dey nguua nas yu, gun rsuun la pcaal dey tanta' nu yeed ñi. Orze' ni wangash lagy dey nu nii nu dey mi. <sup>41</sup> Gaze' nu guam tuuba' tir mnii num Ñgyoozh. Ornu bish cya ga'm byaj chon, orze' nam rab mi dey:

—¿Walab gaal gabee nas ru' der? ¿Walab gaal gabee zu lagy ru' der? Bi bded ni nu gas der na. Na byap or nu ya, biñ nu byac mbecy gu' dey ya yaa de mbecy cyi. <sup>42</sup> Wes su der yaa na, gun bi yad gaab yu nu cush cya icha —nam.

### Za nu dey Jesuuz pres

<sup>43</sup> Lat nu gabee rnii ru'm lueg la bru'ña Judas, tub yu nu bruu lat trocyup yu nu bi bloo sum ze'. Bru'ña yu nu zigy mbecy, nu nuu mandzicy, nu yu nu nuu garot, nu. Yad dey par mandaar ni de yu zub lo ni de uz, nu par mandaar ni de yu nu rlyuu leey ni Ñgyoozh, nu par mandaar ni de yu bel ni de mbecy Israeel. <sup>44</sup> Ze' Judas, yu nu bish cya ich mi, briic yu tub mod nu gad lagy dey cyu Jesuuz. Anzir bi mniiy: "Yu nu dąw chit lo ze', yu ze' nde'. Bdu' yaa der yu nunu nap ña der yu lat nu cha nu der yu", nay.

<sup>45</sup> Na ornu bru'ña Judas lo Jesuuz, orze' becha'y lom. Orze' nay rab yum:

—¡Masht! —nay.

Orze' bdow yu chit lom. <sup>46</sup> Orze' bdu' la yaa dey mi nu cha nu dey mi pres.

<sup>47</sup> Tees tub yu nu zu lat ze' bloo zay mandzicy niy nañ gyid yu'ñ. Orze' pcyug yu gyidag tub moz ni yu nu riib ic de uz. <sup>48</sup> Ze' Jesuuz nam rab mi de mbecy:

—¿Lagu yad tub der ya gal nu rza tub dey tub gubaan: nu mandzicy nu garot? <sup>49</sup> Gun de dzi la bri blyyu ni der loli' ni yu' nu driib zily mbecy Ñgyoozh, nunu wancu' yaa der ya nu ñgya nu der ya pres. Tees ni raac ñi par nu gyu' niñ gal nu bi pca lat riidz ni Ñgyoozh —nam.

<sup>50</sup> Orze' dela de yu nu rsya' lom bzeeñ dey mi, bruu chu dey lom zay. <sup>51</sup> Tees tub yu feñ gua cay ich mi. Tub la' li la negy mbish yu. Orze' bdu' yaa ga' dey yu.

<sup>52</sup> Tees yu ze' bruu za laay nañ negy ze' gush yu carer zay gyid yaagy lay.

### Jesuuz zam lo junt zub lo

<sup>53</sup> Gaze' nu gua nu dey Jesuuz lo yu nu riib ic de uz. Ze' byatublaazh dela de uz zub lo, nu de yu bel ni de mbecy Israeel, nu de yu nu rlyuu leey ni Ñgyoozh.

<sup>54</sup> Ze' Bed gua cay ich Jesuuz. Orze' zet zet zi'l zaab yu ich mi gashtal bri lay loli' ni uz nu riib ic ze'. Gal nañ ze' guay zub nuy de yu nu rña ze' bidz nuy dey gyi.

<sup>55</sup> De uz zub lo, nu de yu nu zu riiñ lo junt zub lo byub dey mod nu riib dey cyi too Jesuuz, gun orze' gad mod nu cut dey mi, tees rila wangad ni tub la mod ni dey.

<sup>56</sup> Gun zañ mbecy briib dey gyidza toom. Tees walab tub zi'l na riidz nu mnii dey. <sup>57</sup> Orze' yu' mbecy wes suy briib yu gyidza toom. Orze' nay:

<sup>58</sup> —De ya güeñ de nu nay: "Yä tilya yu' nu driib zily mbecy Ñgyoozh, yu' nu byaa nu yaa mbecy. Orze' nañ chon dzi shes su tuuba' yu' nu gya nu walab nu yaa mbecy", nay —na dey.

<sup>59</sup> Tees mas ni par walab tub zi'l na riidz nu rnii dey.

<sup>60</sup> Orze' yu nu riib ic de uz wes suy lat de mbecy.

Gaze' nu nay rab yu Jesuuz:

—¿A waniir lagu sac falt nir? ¿La ñuu cyi driib dey ic ru? —nay.

<sup>61</sup> Tees Jesuuz ri zi'l zum. Rila wanii lam. Ze' bdugyi' ga' yu riib ic ze' lom. Orze' na'y rab yum:

—¿A ru nac ru Mesías, i'ñ Ñgyoozh Yon? —nay.

<sup>62</sup> Orze' na Jesuuz rab mi yu:

—Laab ya nde'. Nunu ru zac ru ya, biñ nu byac mbecy, zuba yaa bee Ñgyoozh, biñ nu rac ricy de lo la coz ily. Nunu gzac der ya yapə lat za —nam.

<sup>63</sup> Orze' yu nu riib ic de uz ze' pshaa lay shab yu par nu gabe nu walab se'ñ mniim. Gaze' nu nay:

—¿La' zir be teshtig rlagy ni par yu ii? <sup>64</sup> De ru güeñ ru nu rzat ziy Ñgyoozh. ¿La ñuu rnii too der? —nay.

Orze' dela dey mniiy nu rlagy ni gat mi.

<sup>65</sup> Orze' yu' mbecy brugyi' rcoo yeñ yu lom. Nunu yu' dey psoow yu lom. Gaze' nu bdi dey mi. Orze' nay rab yum:

—¡Briic rasoo! ¿Cyu bdi ru? —rnii dey.

Nunu de yu nu rña yu' ni Ñgyoozh briich yaa dey lom.

### Bed mne'y Jesuuz

<sup>66</sup> Ze' Bed byeeñ yu loli' par gyi'. Orze' bru'ña tub criad ni yu riib ic de uz ze'. <sup>67</sup> Ornu bzaac ñi Bed zuy rbindz yu gyi, bgüiiñ loy. Gaze' nu nañ rab ñiy:

—Ni' ru rded nur Jesuuz Nazaret, ¿shiñ? —nañ.

<sup>68</sup> Tees Bed mniy nu walab. Orze' nay:

—A' yu' lo ya yu ze'. Ni wagad lagya la coz rniir —nay.

Gaze' nu bruuuy loli' guay par gyero'. Orze' bredz la nguel. <sup>69</sup> Ze' criad ze' bgüiiñ loy tuuba' tir. Gaze' nu brugyi' rniiñ lo de mbecy nu yu' ze'. Orze' nañ:

—Mi re tub biñ nu bruu lat de mbecy ze' —nañ.

<sup>70</sup> Tees Bed mnii ga'y nu walab. Na or guchi ga' sñuu nde', ze', orze' de yu nu nguaa ze' nay rab yuy:

—Wanted la nu ru bruur lat de mbecy ze', gun ru nac ru mbecy Galilea —na dey.

<sup>71</sup> Orze' Bed mniy nu Ñgyoozh shiñ gyicy num yu be-nu walab rishli rniiy. Orze' nay:

—¡Ñgyoozh rad lagy mi nu ya a' yu' lo cyu mbecy nu rnii der ze'! —nay.

<sup>72</sup> Nunu lueg la bredza' la nguel ru' cyup ma. Orze' byeza' la lagy Bed de riidz nu mnii Jesuuz ornu nam: "Anzir cuedz nguel ru' cyup ma, ru niir nu a' yu' lor ya chon tir", nam. Byeza' lagy yu nde', orze' brugyi' ruun yu.

### Jesuuz zum lo Pilato

**15** Laab bza' yu la tuuba' dzi, de uz zub lo, gal nu de yu bel ni de mbecy Israeel, nu de yu nu rlyuu leey ni Ñgyoozh, nu dela de mbecy nu zu riiñ ni junt zub lo byatublaazh dey beey riidz nu la gyicy nu dey Jesuuz. Gaze' nu pcyig dey mi za nuy mi. Bgu' dey mi yaa Poncio Pilato. <sup>2</sup> Orze' na Pilato rab yum:

—¿A ru nac ru rey ni de mbecy Israeel? —nay.

Orze' na Jesuuz rab mi yu:

—Laab ni gal nu ru mniir —nam.

<sup>3</sup> Orze' de uz zub lo ze' briib dey zañ cyi toom. <sup>4</sup> Gaze' nu na ga' Pilato rab yum:

—¿A wagniir? Güiñ ñuu la zañ cyi driib dey toor —nay.

<sup>5</sup> Tees Jesuuz rila wannium. Orze' za nu la ic Pilato zuy.

### Mnii dey nu Jesuuz rlagy ñi gat mi

<sup>6</sup> Na de ña'n la lat nu rzu' sa' ni Pas, orze' Pilato rlaay tub ga pres, ca zi'l na yu nu gnii mbecy nu dulaa. <sup>7</sup> Ze' yu' la be mbecy nañ yu' gyiib nu rboo lo lo gubier. De yu ze' biit dey mbecy lat nu gu' dey gyel yuu nu bish cyay ich gubier. Lat de mbecy ze' ri tub mbecy nu la Barrabás. <sup>8</sup> Orze' bru'ña dela de mbecy zigy, nunu mnii dey lo Pilato nu gyicy yu gal nu ricy zi'l yu lat sa' ze' de ña'n la. <sup>9</sup> Orze' na Pilato rab yu dey:

—¿A rlagy der laga yu nu nac rey ni de mbecy Israael? —nay.

<sup>10</sup> Gun Pilato gud lagy yu nu de uz zub lo bgu' dey Jesuuz yaay nu nac gyel saap lagy. <sup>11</sup> Tees de uz zub lo ze' bdu' dey lagy de mbecy zigy gun orze' laa dey

Barrabás lugaar nu laa dey Jesuuz. <sup>12</sup> Orze' Pilato nay rab yu dey:

—Beni, ¿la coz rlagy der gyicy du yu nu rnii der rey ni de mbecy Israael? —nay.

<sup>13</sup> Orze' dub ru' la dey rbish tiy:

—¡Cut ruy lo cruu! —na dey.

<sup>14</sup> Gaze' nu na Pilato rab yu dey:

—¿La ñuu coz a' nap b icy yu? —nay.

Tees dzi zir rbish ti dey. Orze' na dey:

—¡Cut ruy lo cruu! —na dey.

<sup>15</sup> Gaze' nu bla Pilato Barrabás, gun rlagyu ganap lagy de mbecy zigy loy. Orze' despuees b icy yu mandhaar nu gaaz dey Jesuuz. Gaze' nu bgu' mi yaa de soldad nu caa dey mi lo cruu.

<sup>16</sup> Orze' de soldad gua nu dey mi loli' ni yu' ze' nu riib ic gubier. (Nde' tub yu' nu la pretorio.) Orze' ze' b icy tublaazh dey dela de soldad. <sup>17</sup> Orze' bzuu dey mi tub negy bizat. Gaze' nu bel dey ya gyech bzaa dey tub coron nu bri dey toom. <sup>18</sup> Gaze' nu brugyi' ricy dey nu rnii nuy mi Ñgyoozh:

—¡Shnur, rey ni de mbecy Israael! —rnii dey.

<sup>19</sup> Nunu rshet dey toom nu tub yagyi, nunu rcoo yeñ dey lom, nunu rzu tib dey lom ricy dey nu dzi rca lagy dey lom. <sup>20</sup> Orze' despuees nu bguu bdzaa dey mi, bloo dey negy bizat nu zu yeñ mi ze'. Orze' bzuu dey mi laab shab mi. Gaze' nu bruu nu dey mi lugaar ze', za nu dey mi par nu caay mi lo cruu.

### Pcaa dey Jesuuz lo cruu

<sup>21</sup> Nez za dey bdzeel yu tub mbecy Cirene nu la Simoq. Yu ze' uz Alejandro nu Rufo. Bruuy ngush yeed yu. Ornu bdzeel yu de soldad, orze' por fers la pcaa dey yu nu cha nuy cruu ni Jesuuz.

<sup>22</sup> Gaze' nu za nu dey mi tub lugaar nu la Gólgota. Nde' tub riidz nu yaruuñ: Lugaar ni cyug too añ.

<sup>23</sup> Gaze' nu briic dey ñup urbay nu yu' can nu tub lo asecy nu la mirra go'm. Tees wango'm ñii. <sup>24</sup> Gaze' nu pcaa dey mi lo cruu. Orze' de soldad bloo dey cuen ben ca na dey dugiyi tub ga shab mi. Ni mod bleez dey shab mi.

<sup>25</sup> Tub gyiib gaa or napor pcaa dey mi lo cruu. <sup>26</sup> Lo gyicy cyim pcaa dey: "Rey ni de mbecy Israael", pcaa dey. <sup>27</sup> Pcaa dey mi lo cruu nu cyup gubaan, tub yu par yaa beem, ze' tuuba' y par yaa reg mi. <sup>28</sup> Orze' byu' niñ gal nu pcaañ lat de riidz ni Ñgyoozh ze' nu rniiñ: "Bicy dey mi par mbecy a' nap", rniiñ.

<sup>29</sup> Orze' de mbecy nu rded ze' rguu bdzaa dey mi. Rgyib la ic dey nu gyel rguu bdzaa. Orze' na dey:

—¡Jaj! Ru mniir nu nit lor yu' nu driib zily mbecy Ñgyoozh nunu nañ chon dzi shes sur ñii. <sup>30</sup> Na bloo mbañ ub ru na. Bet lo cruu —na dey.

<sup>31</sup> Ni' de yu zub lo ni uz nu de yu nu rlyuu leey ni Ñgyoozh rguu bdzaa dey mi. Rnii zi dey nim nu losa'y. Orze' na dey:

—Blo mbañ yu reña' mbecy. Tees ub yu wagac co mbañ yu. <sup>32</sup> Rlagy ñi nu gyet Mesías, biñ nu nac rey ni de mbecy Israael, lo cruu, gun orze' gzac na nunu cheña lagy na nu laab mi —na dey.

Orze' ni' zi'l de yu nu ca num lo cruuuz rguu bdzaa  
dey mi.

### Gut Jesuuz

<sup>33</sup> Orze' tub gyiib trocyup or widoo, bet cow dutuub  
la lo yu gal tub gyiib chon or gudze. Gaze' nu bzu yaa.

<sup>34</sup> Gaze' nu laab or ze' ye brish ti Jesuuz. Orze' nam:  
—Eloi, Eloi, ¿lema sabactani? —nam.

Riidz ze' yaruuñ: Ñgyoozh nę, Ñgyoozh nę, ¿lagu  
bzaan ru ya?

<sup>35</sup> Orze' la be de mbecy nu yu' ze', ornu güeñ dey nu  
brish tim, orze' na dey:

—Güii, yu re rbedz yu Elías, yu nu mnii por cuen ni  
Ñgyoozh —na dey.

<sup>36</sup> Orze' tub mbecy gush yu carer, psal yu tub coz nu  
chayo' nis lo ñup zii ni urbyay. Gaze' nu bzuub yuñ lo  
tub yagyi. Briic yuñ go'm. Orze' nay rab yu losa'y:

—Blez güiin ben a cyid Elías shet yuy lo cruuuz —nay.

<sup>37</sup> Tees Jesuuz brish tim stub nu ye. Orze' gut mi.

<sup>38</sup> Gaze' nu negy nu zaab gyero' ni lugaar yon nañ yu'  
nu driib zily mbecy Ñgyoozh pshaa la lañ gaal zi'l nu  
gush ñi gal ic lañ gal lo yu la. <sup>39</sup> Orze' yu nu riib ic de  
soldad, yu nu zu par lo Jesuuz, ornu bzaac yu nu lac  
gut mi, orze' nay:

—Rishli gaal biñ ii guc mi i'ñ Ñgyoozh —nay.

<sup>40</sup> Ni' yu' ga' la be biñ mñaa. Zet rgüii dem lo Jesuuz.  
Lat ze' ri Li, biñ nu bruu Magadán, nu Li ñaa Santiag  
mi' nu See, nu Salomé. <sup>41</sup> De mi ze' gua ca dem ich Je-  
suuz, nunu bzu bich dem nu nac mi lat nu gusam  
Galilea. De mi ze' nu zigy zir biñ mñaa bruu num mi  
Galilea bri nu dem mi gal Jerusaleeng.

### Pcach dey Jesuuz

<sup>42</sup> Na dzi ze', nde' dzi nu zu lily mbecy par sa' ni Pas.  
Nde' dzi birs anzir sab dzi nu zu lagy mbecy. Orze' or  
gudze <sup>43</sup> bru'ña See lo Pilato. Yad nu See yu nu guledz  
Arimatea. Nac yu tub mbecy lily nu zu riiñ lat junt Zub  
lo. Nunu nac yu tub yu nu rcyish lo lo gyel gubier ni  
Ñgyoozh. Orze' See guay lo Pilato bdiiñ yu cuerp ni Je-  
suuz loy. <sup>44</sup> Pilato za nu ic yu nu güeñ yu nu bi gut Jesuuz.  
Orze' bredz yu yu nu riib ic de soldad ze'. Orze'  
bdugiy' loy ben a bi gut mi. <sup>45</sup> Orze' ornu mnii yu nu  
riib ic ze' nu bi gut mi, orze' briic Pilato rishbeey nu  
cha nu See cuerp nim. <sup>46</sup> Orze' See wiyy tub sab fin.  
Gaze' nu pshet yu cuerp ni Jesuuz lo cruuuz. Gaze' nu  
ptiish yu sab ze' cuerp nim. Gaze' nu briy mi gyerbaa  
nu bduguuñ nañ gyita'. Gaze' nu psoow yu ru' baa ze'  
nu tub gyita' ily. <sup>47</sup> Li, biñ nu bruu Magadán, nu Li ñaa  
See bzaac dem ze' nu briy cuerp ni Jesuuz.

### Jesuuz byabañ mi

**16** Na ornu bded sab, dzi nu rzu lagy mbecy, orze'  
Li biñ nu bruu Magadán, nu Li ñaa Santiag, nu  
Salomé wii dem coz zguul nu cha coo dem cuerp ni Je-  
suuz. <sup>2</sup> Orze' noming napor, briib zi'l doo za dem ru'  
baa ze'. <sup>3</sup> Orze' lat nu za dem, ro dem riidz nu losa'm.  
Orze' na dem:

—¿Cyu ctuyub gyita' nu noow ru' baa par nu chu'n?  
—na dem.

<sup>4</sup> Tees ornu bru'ña dem ru' baa ze', bzaac dem nu bi  
bruu yub gyita' nu noow ru'ñ ze'. Ze' nde' tona' la gyi-  
ta' ily. <sup>5</sup> Ornu gu' dem nañ gyerbaa ze', orze' bzaac  
dem tub yu feñ zub yu par yaa bee. Zuy tub negy cacy  
duñ. Orze' tona' la gudzib dem. <sup>6</sup> Orze' yu feñ ze' nay  
rab yu dem:

—Cue' dzib der. De ru ryub der Jesuuz biñ nu bruu  
Nazaret, biñ nu biit dey lo cruuuz. Na bi byabañ mi.  
Saca'm ii. Bgüii der ze' nu bri dey mi. <sup>7</sup> Tees gua der  
gua niir lo de yu nu rsya' lom nu lo Bed nu bi ya gam  
lo dey par Galilea. Re zac der mi gal nu mniim —nay.

<sup>8</sup> Orze' de mi ze' gush dem carer bruu dem ru' baa  
ze' Yam. Nunu gush la bis nim nu gudzib mi. Ni wannii  
la dem lo ni tub la mbecy gun gudzib dem.

### Jesuuz bruu zac mi lo Li, biñ nu bruu Magadán

<sup>9</sup> Na ornu byabañ Jesuuz noming napor la, nu loga la  
bruu zac mi lo Li, biñ nu bruu Magadán, biñ nu bloo  
chum gagy nuras lo. <sup>10</sup> Orze' mi ze' gush nez mi za  
toom riidz lo de' zir de yu nu gusa nu Jesuuz. Zam lo  
dey lat nu yu' dey ruun dey nunu ricy shniy. <sup>11</sup> Tees or-  
nu güeñ dey nu mnii Li nu byabañ Jesuuz nunu bzaac  
mim, orze' wancheña lagy dey.

### Jesuuz bruu zaca'm lo de yu nu rsya' lom

<sup>12</sup> Despuees nde', orze' bruu saca'm lo cyup dey lat  
nu za dey ngush. Reña' nam byac mi. <sup>13</sup> Orze' bish cya  
dey gua nii dey lo de' zir de losa'y. Tees ni' de yu ze'  
wancheña lagy dey.

### Jesuuz bdu'm riiñ yaa de mbecy nu rsya' lom

<sup>14</sup> Despuees nde', orze' bruu zac mi lo de trotub yu  
nu bloo sum ze' lat nu nguua dey lo mez row yu gyit.  
Orze' pshuu num dey nu nac nu wancheña lagy dey  
nunu bicy cyiggy lardoo dey, gun wacheña lagy dey ni  
de yu nu bzaac nu bi byabañ mi. <sup>15</sup> Orze' nam rab mi  
dey:

—Gua der dutuub la gyishlombecy. Mnii der riidz nu  
sac nu bruu lo Ñgyoozh lo dela mbecy. <sup>16</sup> Yu nu gyicy  
cup consuel lo de riidz nu sac ze' nunu gzu nis yu, yu  
ze' gruu mbañ yu. Ze' yu nu wagyicy cup consuel, yu  
ze' waruu nap yu ornu ri beem niy nu nac cyiy. <sup>17</sup> Nunu  
de yu nu ricy cup consuel gac gyicy dey zañ coz par nu  
gabe nu laab coz ni Ñgyoozh rnii dey. Nu nac ya co chu  
dey nuras. Gnii dey riidz reña' mbecy. <sup>18</sup> Benu gan dey  
bily se la la gzac yu. Nunu mas go' dey benen se la la  
gyicy nuñ dey. Ornu griib yaa dey mbecy rat, orze' gy-  
ac dey —nam.

### Jesuuz gup mi gyibaa

<sup>19</sup> Orze' Shuaan na Jesuuz despuees nu mnii num  
dey, orze' pshup Ñgyoozh mi gyibaa. Orze' gusub mi  
par yaa beem. <sup>20</sup> Orze' de yu ze' bruu dey gusay,  
pshaal dey de riidz nu sac nu bruu lo Ñgyoozh dela lu-  
gaar. Nunu Shuaan na blocyuub mi dey, nunu bicy fert

mi de riidz nu rnii dey nu nac de nusuriidz ily nu ricy  
dey. Ni gac ñii.

# San Lucas

## Riidz nu loga la ni Luc

**1** Zigy mbecy gush dey riiñ nu caay de coz nu guc lat den <sup>2</sup> dub gal nu na de riidz nu bzeeñ de yu nu bzac urlo la de coz ze' nese nu bzub la gyi'ñ, de riidz nu bzeeñ de yu nu bzu riiñ nu tush las yu de riidz ze'. <sup>3</sup> Nde' nu ru, shi Tioj, como ya nap bdugyi' nu nac dela coz ze', orze' ya rzee nu nap benu caa dela coz ze' lo gyicy, tub ga la riidz nu lugaar niñ. Orze' zeedä ñii nir. <sup>4</sup> Gun orze' gad lagy ru nu rishli dela coz nu bdulyuu nir.

## Tub anc ni Ñgyoozh biid niiy nu gal Waa nu griib nis mbecy

<sup>5</sup> Orze' tiem nu guc Herodes rey ni de gyedz nu yu' lo yu ni Judea, bzu tub uz nu la Zacaří. Orze' yu ze' byeeñ yu lo tub nac uz nu rnii dey uz ni Abías. Ze' mñaay lam Bee. Gaza' mi ze' nac mi nez Aroong. <sup>6</sup> Orze' rup laa dey b icy dey coz nu se'ñ par lo Ñgyoozh. B icy dey dela coz nu mniim lo leey nim. Orze' ni tub la mbecy wan-gac nii dey nu yu' falt niy. <sup>7</sup> Tees sac i'ñ dey, gun Bee wangac chu' i'ñ mi. Nunu rup laa dey bi gubel yu.

<sup>8</sup> Orze' tub tiem de uz nu nac nu Zacaří briic dey sman niy. Orze' gaza' Zacaří bzuy riiñ lo Ñgyoozh. <sup>9</sup> Orze' de uz blooy cuen ich cushtom ni dey, nunu laaba' Zacaří bdugiyu nu chu'y nañ yu' nu driib zily mbecy Ñgyoozh, Shuaan na, par nu zu dzeeñ yaal yu. <sup>10</sup> Na lat nu rzu dzeeñ yaal yu, orze' dela mbecy nu rca Ñgyoozh lugaar ze' byatublaazh dey ich yu' ze' nu nii nu dey mi. <sup>11</sup> Orze' lat ze' bruu zac tub anc ni Ñgyoozh lo Zacaří gusuy par bee mez ze' nu Zub psi'ñ yaal. <sup>12</sup> Orze' ornu bzaac Zacaří anc ze', orze' lorgut lay. Orze' ton'a la gudzib yu. <sup>13</sup> Tees anc ze' nay rab yu Zacaří:

—Cue' dzib ru Zacaří, gun Ñgyoozh "O" mniim gush mi de riidz nu mniir lom, nunu mñaar, Bee, gaal mi tub mdoo. Ze' mdoo ze' co lar yu Waa. <sup>14</sup> Orze' ton'a la chesu cyit lagy ru nu nac yu, nunu zigy mbecy gyet lagy yu nu nac nu gal mdoo ze'. <sup>15</sup> Gun yu ze' gac yu tub yu lily par lo Ñgyoozh. Orze' rila wo'y ñup ni ur-byay. Ni wo'y mashcally. Ni wo'y ni tub la loñ. Nunu Espiriit Yon ni Ñgyoozh bi riib ic za' lam nañ lardooy nese anzir nu gal yu. <sup>16</sup> Orze' yu ze' gyicy yu nu zigy mbecy Israeel ca dey Ñgyoozh, Shuaan dey. <sup>17</sup> Orze' yu ze' chay riiñ ni Ñgyoozh anzir nu cyid Shuaan na. Fert gyicy yu riiñ nim gal nu b icy Elás, yu nu mnii por cuen nim. Gun orze' gyicy yu nu gyanap riidz ni de mbecy nuy i'ñ yu, nunu gyicy yu nu sya' de mbecy nu rnid ru'

lo de mbecy nap. Orze' ni mod gac par nu zu lily yu de mbecy par ornu cyid Shuaan na —na anc ze'.

<sup>18</sup> Orze' na Zacaří rab yu anc ze':

—¿Lac mod gad lagya nu gac ñii gal nu mniir? Gun ya dzi byabelä. Nunu ni' zi'l mñaä —nay. <sup>19</sup> Orze' na ga' anc ze':

—Ya nacä Gabrieel. Ya zu lo Ñgyoozh. Nunu mi ze' bzuu nez mi ya nu yap nee du ru nunu ricä nu gad lagy ru de riidz nap nu mneé ze'. <sup>20</sup> Orze' na, como wancheña lagy ru de riidz nu mneé lor, de riidz nu se-gur la gac, orze' nde' nu gyac ru mbecy gop. Wac niir gashtal shuub la dzi nu gyu' ni de riidz nu mneé —na anc ze'.

<sup>21</sup> Lat ze' yu' de mbecy rbez yu Zacaří ich yu'. Gush dey shcab ben lagu dzi blaay nañ yu' ni Ñgyoozh. <sup>22</sup> Na ornu bruuy nañ yu' ze', wangaca' niiy. Orze' gud lagy dey nu bde' loy nañ yu' ze', gun b icy yaay lo dey. Nunu ni la mod nay byeeñ yu. Wangaca' niiy.

<sup>23</sup> Na ornu pshuub dzi niy bruuy sman, orze' yay yu' y.

<sup>24</sup> Orze' despuees ni de nu nde', orze' gu' i'ñ mñaay Bee. Orze' nañ gaay beey wancyuu lam yu'm. Orze' mnii toom: <sup>25</sup> "Ni b icy nu Ñgyoozh ya, gun orze' na cue' güü naañ mbecy lo par nu sac i'ñä", mnii toom.

## Tub anc mniim nu gal Jesuuz

<sup>26</sup> Na ornu bi bza' shuup beey nu yu' i'ñ Bee, orze' Ñgyoozh bzeed mi Gabrieel, yu nu nac anc nim, zay Nazaret, tub gyedz nu ri lo yu ni Galilea. <sup>27</sup> Zay lo tub fiñ feñ nu nigul dzeel yu gyeey. Fiñ ze' lañ Li. Fiñ ze' bi gac nap niñ nu chelaañ See, tub mbecy nu bruu lat nez rey Dabi. <sup>28</sup> Orze' gu' anc ze' nu Zub ñi. Orze' nay rab yuñ:

—¡Shnur! —nay—. Ñgyoozh nac num ru, nunu ton'a la nap gyicy mi num ru —nay.

<sup>29</sup> Orze' ornu bzaac ñi anc ze', ton'a la deet gac nañ lardoõn nu nac riidz nu mniiy. Orze' gush ñi shcab ben lac mod yaruu riidz nu mniiy loñ. <sup>30</sup> Orze' na anc ze' rab yuñ:

—Li, cue' dzib ru, gun Ñgyoozh bi psa' lagy mi nu nap gyicy num ru. <sup>31</sup> Ru chu' i'ñ ru. Orze' gaal ru tub mdoo gyeey. Orze' co lar mi Jesuuz. <sup>32</sup> Mi ze' gac mi tub biñ lily. Nii dey nu "Mi ze' i'ñ Ñgyoozh biñ nu gya zir zu", nii dey. Orze' Ñgyoozh gyicy mi nu gac mdoo ze' nir rey lugaar ni gyitoo bel nim Dabi, <sup>33</sup> gun orze' gyub ic mi de nez Israeel tub la, nunu rila wayeca nu gyub ic mi den —na anc ze'.

<sup>34</sup> Orze' na ga' Li:

—¿Lac mod chu' i'ñä ze' rila nigul dzeelə biñ gyeey?  
—nañ.

<sup>35</sup> Orze' na ga' anc ze':

—Espiriit Yon ni Ñgyoozh gyet mi nu gac num ru.  
Nunu Ñgyoozh, biñ nu gya zir zu, ton'a' la coz ily gyicy  
mi lat nu gac num ru. Nde' nu mdoo nir nu gal gac mi  
mbecy yon, tub mbecy nu nii dey "I'ñ Ñgyoozh", nii  
dey. <sup>36</sup> Ni' nis ru, Bee, gaal mi tub mdoo mas byabel  
mi. Biñ nu rnii dey nu wagac chu' i'ñ, mi ze' bi bza'  
shuup beey nu yu' i'ñ mi, <sup>37</sup> gun Ñgyoozh gac gyicy mi  
dela coz —na anc ze'.

<sup>38</sup> Orze' na Li:

—Ya nacə tub fiñ feñ nu ricy de coz nu rlagy Ñgyoozh.  
Orze' Ñgyoozh gyicy num ya gal nu mniir  
—nañ.

Orze' laab nde' la bruu anc ze' yay.

### Li chañ cha güiiñ Bee

<sup>39</sup> Laab tiem ze' bruu Li ze' nu rcyiiñ ñi zañ carer tub  
gyedz nu ri tub logyi' ni Judea. <sup>40</sup> Na ornu bru'ñañ,  
orze' gu'ñ nañ yu' Zácarí. Orze' mnii nuñ Bee Ñgyoozh.  
<sup>41</sup> Na ornu güeñ Bee riidz nu mnii Li, orze' pcueñ mdoo  
nañ mi. Orze' briib ic za' la Espiriit Yon ni Ñgyoozh mi.

<sup>42</sup> Orze' ye la mniim:

—¡Nap zir gyicy nu Ñgyoozh ru gaze' de' zir biñ  
mñaa! ¡Nunu ni' zi'l nap gyicy num mdoo nir! <sup>43</sup> ¿Cyu  
guc ya par nu cyid güii ñaa Shuaanä ya? <sup>44</sup> Cuanzir nu  
güeñä nu mnii nur ya, orze' pcueñ mdoo nañä nu dzi  
bet lagy ñi. <sup>45</sup> Dzi nir nu guña lagy ru nu gyu' niñ gal  
nu mnii Ñgyoozh, Shuaan na —na Bee.

<sup>46</sup> Orze' na Li:

Ya gyabicä gyel mbecy ni Ñgyoozh nu dutuub la lar-  
doo.

<sup>47</sup> Tona' la yet lagyä nañ lardoo nu nac Ñgyoozh, biñ  
nu co mbañ ya.

<sup>48</sup> Gun mi ze' bdu' cuen mi ya, tub fiñ feñ nu ricy coz  
nu rlagy mi.

Bzaac mi nu nacə tub mbecy shni.

Orze' zigy mbecy nu yad par lo nii dem nu ya nacə  
tub fiñ feñ nu dzi ni.

<sup>49</sup> Gun Ñgyoozh, biñ nu gac gyicy dela coz, mi ze'  
tona' la coz ily ricy num ya.

¡Mi ze' tona' la yon mi!

<sup>50</sup> Dub laa tiem nap ricy num de mbecy nu rca lagy  
lom.

Tant de mbecy ze' nap ricy num, tant i'ñ dem nu gruu  
zac par lo nap gyicy num.

<sup>51</sup> Coz ily ricy mi nu nac nu dzi fert mi.

Mas la zi'l coz nu rboo ic mbecy le',  
tees ptush las mi dem.

<sup>52</sup> Mi ze' bloom riiñ nu zu biñ nu nac rey.

Tees laagy nañ mi de mbecy shni.

<sup>53</sup> Cuic mi coz nap gow mbecy ran gashtal dzaa la nañ  
dem.

Ze' mbecy guani'ñ,

zuu nez mi dem gyam ñgyi'ñ yaam.

Ni wabic lam coz nu gow dem.

<sup>54</sup> Blocyuub mi de mbecy Israeel, de biñ nu ricy coz nu  
rniim.

Nunu wanit lagy mi nu nap gyicy num dem  
par nu rashni lagy mi dem.

<sup>55</sup> Bicy num Abraham gal nu dela nez mi gal nu mniim  
lo de gyitoo bel ni den nu segur la gyicy mi.  
Ni mnii Li.

<sup>56</sup> Orze' Li pcyiiñ nuñ Bee tub chon beey. Orze' bruuñ  
yaañ yu'ñ.

### Gul Waa nu griib nis mbecy

<sup>57</sup> Na ornu pshuub dzi nu gaal Bee mdoo, orze' gul  
tub mdoo gyeey. <sup>58</sup> Orze' ornu de mbecy nu rcyiiñ num  
garee ga, gal nu dela famil nim bzaac dey nu nap bicy  
nu Ñgyoozh mi, orze' bet lagy dey nuy mi. <sup>59</sup> Orze' or-  
nu bza' shuñ dzi nu gul mdoo ze', orze' pcaa dey beey  
circunsision cuerپ ni mdoo ze'. Orze' bicy pee dey  
mboo la dey yu laaba' gal nu la uz yu, Zácarí. <sup>60</sup> Tees  
ñaa mdoo ze' nam:

—¡Cue'! Rlagy ñi loo lan ñi Waa —nam.

<sup>61</sup> Orze' na dey rab yum:

—Sac ni tub la famil nir nu ni lay —na dey.

<sup>62</sup> Orze' bicy yaa dey lo Zácarí par nu gad lagy dey lac  
rlagy yu gruu la mdoo niy. <sup>63</sup> Orze' bdiiñ yu tub la' yala  
nu caay loñ. Orze' dela mbecy tona' la za nu ic dey or-  
nu bzaac dey nu pcaay: "Yu ze' gruu lay Waa", pcaay.  
<sup>64</sup> Orze' laab or la ze' briib rishniy tuuba' tir. Orze' bru-  
gyi' ryabic yu gyel mbecy ni Ñgyoozh. <sup>65</sup> Orze' dela de  
mbecy nu yu' nuy garee tona' la gudzib dey. Orze' du-  
tuub la logyi' ni Judea bzu riidz de coz nu guc. <sup>66</sup> Orze'  
dela mbecy nu güeñ riidz ze' gush dey shcab nu nac  
ñii. Orze' na dey rab yu losa'y:

—¿Ben cyu gac yu nguzh ze'? —na dey—. Gun rishli  
gaal rabee nu ricy Ñgyoozh coz ily num yu —na dey.

<sup>67</sup> Orze' Espiriit Yon briib ic za' lam Zácarí, uz mdoo  
ze'. Orze' brugyi' rniiy por cuen ni Ñgyoozh. Orze' nay:

<sup>68</sup> ¡Rlagy ñi gyabic na gyel mbecy ni Shuaan na, biñ nu  
nac Ñgyoozh ni de mbecy Israeel!

Gun biid mi nu co mbañ mi dela mbecy nim.

<sup>69</sup> Bzoo nez mi tub biñ fert nu co mbañ de ub na.

Mi ze' laaba' nez Dabi, yu nu bicy de coz nu rlagy mi.

<sup>70</sup> Gulas mniim nu ni gyicy mi nu nac de riidz nu  
bzeeñ de yu nu mnii por cuen nim.

<sup>71</sup> Nunu mniim nu com de ub na yaa losa' yuun nu  
yaa de yu nu rzi lagy lon.

<sup>72</sup> Ni bicy mi par nu mniim nu nap gyicy num de too  
bel ni den.

Gun wannit lagy mi trat yon nim.

<sup>73</sup> Nunu trat ze', nde' riidz nu mniim lo gyitoo bel ni  
den Abraham nu segur la gyicy mi.

<sup>74</sup> Riidz ze' rniñ nu gyicy mi nu glan lo de losa' yuun,  
gun orze' wadzib la den gyicy den coz nu rniim,

<sup>75</sup> nunu gun orze' cuin lom como nac naa mbecy nu  
nac nim,

nunu mbecy nu bi byanap lom.

Orze' cuin lom dutuub la lo yun.

<sup>76</sup> Ze' ru, i'ñä, mbecy gnii dey nu ru nac ru tub yu nu  
gnii por cuen ni Ñgyoozh, biñ nu gya zir zu,

gun ru cha gar par lo Shuaan na.  
 Gyicy nap ru nañ lardoo de mbecy  
 gal nu ricy nap dey tub nez ornu ded tub yu lily.  
<sup>77</sup> Gun orze' gad lagy dela mbecy ni Ñgyoozh nu gyicy  
 sulagy mi de cyi dey.  
 Nunu co mbañ mi dey.  
<sup>78</sup> Gun Ñgyoozh ni den, nu nac nu tona' la rashni lagy  
 mi mbecy nim, nde' nu ni gyicy num dey.  
 Gyicy mi nu cyid biñ nu co mbañ mbecy gal nu driib  
 doo.  
<sup>79</sup> Orze' dzi ze' cuic mi yaa ni de mbecy nu yu' ze' nu  
 cow, de mbecy nu ca lo cuen nu gat,  
 gun orze' lyuuñ ni dey ca par gash yu par nu che ti ri  
 aña ni dey,  
 na Zácarí.  
<sup>80</sup> Orze' yu nguzh ze' zaab raly yu, nunu byafert yu  
 nu nac de coz ni Ñgyoozh. Orze' pcyiiñ yu tub lugaar  
 ub zi gashtal pshuub la dzi nu blyuuy ub yu lo de mbe-  
 cy Israeel.

### Gul Jesuuz

**2** Tiem ze' Augusto, yu nu riib ic de nasyoong, psh-  
 es nañ yu tub acta nu mniy lo dey nu cha boo dey  
 ña'n mbecy dutuub la lugaar nu riib ic yu. <sup>2</sup> Nde' tir lo-  
 ga la gua loo dey ña'n mbecy lat nu zu Cirenio riiñ nu  
 riib ic yu de gyedz nu yu' lo yu ni Siria. <sup>3</sup> Orze' dela  
 mbecy bya dey ledz yu nu cuic yu ña'n yu.  
<sup>4</sup> Nde' nu See bruuuy tub gyedz ni Galilea nu la  
 Nazaret. Orze' yay Beleeng, tub gyedz ni Judea, gun  
 gyedz ze' gul rey Dabi, nunu See nac yu nez Dabi.  
<sup>5</sup> Orze' ze' yay nu cuic yu ña'n yu. Nunu ya nuy Li, fiñ  
 nu bi ca lo cuen nu chelaay. Nunu fiñ ze' bi yu' iñ ñi.  
<sup>6</sup> Orze' lat nu rcyiiñ dey Beleeng, orze' pshuub dzi nu  
 gal mdoo. <sup>7</sup> Orze' ze' gul mdoo loga niñ. Orze' ptiish ñi  
 mdoo ze' negy. Orze' briñ mdoo ze' nañ tub cano, ze'  
 nu row bañcyug gyizh, gun wangada' lugaar nu ndri  
 dey nañ yu' ni mbecy.

### De anc gal nu de mbecy nu rña shily

<sup>8</sup> Na gaab ga Beleeng yu' la be mbecy nu rña shily.  
 Gua la rel rña dey shily niy lat gyish. <sup>9</sup> Orze' bruu zac  
 tub anc ni Ñgyoozh lo dey. Orze' pca yaa nu bruu lo  
 Ñgyoozh dub yub la ze' nu yu' dey. Orze' tona' la gudz-  
 ib dey. <sup>10</sup> Orze' na anc ze' rab yu dey:

—Cue' dzib der. Ya yap neq tub riidz nu tona' la nap.  
 Nu nac riidz ze' tona' la gyet lagy dela mbecy. <sup>11</sup> Dzi na  
 la gul tub mdoo ledz Dabi. Nunu mi ze' biñ nu co  
 mbañ der. Mi ze' nac mi Mesías, Shuaan na, biñ nu ca  
 lo cuen nu cyid. <sup>12</sup> Mod nu gad lagy der nu laab mi,  
 nde' nu gyap der mdoo ze' mbish mi negy rim nañ  
 cano ze' nu row bañcyug gyizh —na anc ze'.

<sup>13</sup> Orze' laab or la ze' bruu zac tub nac anc zigy nu  
 bruu gal gyibaa lo tuuba' anc ze'. Orze' ryabic dey gyel  
 mbecy ni Ñgyoozh. Orze' na dey:

<sup>14</sup> Rlagy fií gyabic mbecy gyel mbecy ni Ñgyoozh gal  
 gyibaa lugaar nu gya zir zu.

Ze' gyishlombecy ii rlagy ñi nu chu' dela mbecy nu  
 gyel ri zu, de mbecy nu gyedzu' lagy mi,  
 na de anc ze'.

<sup>15</sup> Na ornu de anc ze' ya dey gyibaa, orze' de yu rña  
 shily ze' na dey rab yu losa'y:

—Yaa chan Beleeng, cha güiñ de coz nu guc, de coz  
 nu mnii Ñgyoozh Shuaan den —na dey.

<sup>16</sup> Orze' bicy lal la dey zay. Na ornu bru'ña dey, orze'  
 bzaac dey Li, nu See, gal nu mdoo ze' rim nañ cano.

<sup>17</sup> Orze' ornu bzaac de yu nu rña shily ze' mdoo ze',  
 orze' byoo dey rishlo dela mbecy de coz nu mnii anc  
 ze'. <sup>18</sup> Orze' dela mbecy nu güeñ riidz nu mnii de yu nu  
 rña shily ze' gush dey shcab nu nac ñii. <sup>19</sup> Orze' Li pcaa  
 ic ñi dela riidz ze' nunu gush ñi shcab nu nac ñii.

<sup>20</sup> Orze' de yu nu rña shily ze' yay ryabic dey gyel mbe-  
 cy ni Ñgyoozh nu nac de coz nu güeñ dey nunu nu nac  
 de coz nu bzaac dey. Gun guc fií gal nu mnii de anc ze'  
 lo dey.

### Gua nu dey Jesuuz nañ yu' nu driib zily mbecy Ñgy- oozh

<sup>21</sup> Na ornu bza' shuñ dzi nu gul mi, orze' pcaa dey  
 beey nu la sircunsision cuerp nim. Orze' bloo la dey mi  
 Jesuuz. Bloo la dey mi gal nu mnii anc ze' lo Li anzir nu  
 chu' iñ ñi.

<sup>22</sup> Na ornu pshuub dzi nu gyicy dey gal nu rnii leey ni  
 Moisees par nu gyacaacy mbecy lo Ñgyoozh, orze' za  
 nu dey mdoo ze' Jerusaleeng par nu lyuu dey mi lo  
 Ñgyoozh, Shuaan na. <sup>23</sup> Ni bicy dey gun lat de riidz ni  
 leey ni Ñgyoozh Shuaan na bi cañ: "Dela de iñ gyeey  
 dey, benu mdoo loga la, orze' rlagy fií zu chu dey yu  
 nu gac yu ni Ñgyoozh, Shuaan na." <sup>24</sup> Orze' briic dey  
 tub gun gal nu bi cañ lo leey ni Ñgyoozh, Shuaan na.  
 Gun ze', nde' cyup begy o cyup culmbu feñ.

<sup>25</sup> Na tiem ze' zu tub mbecy nu la Simyoo  
 Jerusaleeng. Yu ze' tub mbecy nap, nunu tona' la rca  
 lagy yu lo Ñgyoozh, nunu blez yu par ornu shuub dzi  
 nu gruu mbañ de mbecy Israeel. Nunu Espiriit Yon ni  
 Ñgyoozh guc num yu, <sup>26</sup> nunu mniim loy nu wat yu  
 anzir nu gzac yu Mesías, biñ nu zuu nez Ñgyoozh nu  
 cyid. <sup>27</sup> Orze' mniim loy nu chay nañ yu' nu driib zily  
 mbecy Israeel Ñgyoozh. Orze' ornu de mbel ni Jesuuz  
 bru'ña nu dey mi nañ yu' ze' par nu gyicy dey gal nu  
 rniiñ lo leey, <sup>28</sup> orze' Simyoo bdu' yaay mdoo ze'. Orze'  
 briic yu gras ni Ñgyoozh. Orze' nay:

<sup>29</sup> Ñgyoozh, Shuaan de, na bi bicy yac ru nu de riidz  
 nu mniir nu segur la gyicy ru.

Na ya, yu nu ricy coz nu rnii, bi guti ye lagya nu gata.

<sup>30</sup> Gun ya bi bzaac urlø la biñ nu bzoo nez ru nu co  
 mbañ mbecy,

<sup>31</sup> biñ nu bzur nu bzaac lo de lo la mbecy.

<sup>32</sup> Mi ze' nam gal nu na tub yaa nu gyicy nu nap zac  
 de mbecy nu walab mbecy Israael.

Nunu nu nac mi ze' gabe gyel lily ni de mbecy nir, de  
 mbecy Israael,  
 na Simyoo.

<sup>33</sup> Orze' uz Jesuuz nu ñaam za nu la ic dey coz nu mnii Simyooz nu nac mi. <sup>34</sup> Orze' Simyooz bdiiñ yu lo Ñgyoozh ni dey. Orze' nay rab yu Li, ñaa Jesuuz:

—Mdoo ii bi zuu lam nu gyicy mi nu nit lo zigy mbecy Israeel nunu gyicy'a'm nu zigy dey gruu mbañ yu. Mi ii tub muesht nu bruu lo Ñgyoozh. Nunu zigy mbecy cha dey contr nim. <sup>35</sup> Gun orze' gabe coz nu rlagy zigy dey gyicy yu nañ lardooy. Tees de nu nde' gyicy nuñ ru gal nu ricy tub mandzicy ri'ñ nu gzub ñi gashtal nañ lar-door —na Simyooz.

<sup>36</sup> Nunu bzu ga' tub biñ mñaa nu rnii por cuen ni Ñgyoozh nu la An. Mi ze' i'ñ Fanuel, tub mbecy nez As-er. Mi ze' tona' la gubel mi. Dzi feñ mi pchelaam. Nunu gagyi ña'n pcyiiñ num ñgyeem. <sup>37</sup> Orze' gut yu. Ze' ochent zab tap ña'n rac nu byeeñ byud mi. Orze' mi ze' rila wancyuum nañ yu' nu driib zily de mbecy Israeel Ñgyoozh. Sinu dzi rel la briib zily mi Ñgyoozh. Nunu pcam ni ub mi nu wangow mi gyit nu rnii num Ñgyoozh. <sup>38</sup> Orze' laab or la ze' briic mi gras ni Ñgyoozh. Nunu bzat mi Jesuuz lo dela mbecy nu rbez nu co mbañ Ñgyoozh de mbecy Jerusaleeng.

### Bish cya dey Nazaret

<sup>39</sup> Na ornu bi b icy ac dey leey ni Ñgyoozh Shuaan na na, orze' bish cya dey yay Galilea. Ya dey gal ledz gaal yu, tub gyedz nu la Nazaret. <sup>40</sup> Orze' Jesuuz zaab raly zir mi, nunu yafert zir mi, nunu ral zir shcab nim. Nunu Ñgyoozh nap guc num mi.

### Jesuuz rim lugaar ze' nu driib zily mbecy Israeel Ñgyoozh

<sup>41</sup> Na de mbel ni Jesuuz de ña'n la rza dey Jerusaleeng rza dey sa' ni Pas. <sup>42</sup> Orze' ornu bi yu' Jesuuz tub ña'n trocyup, gua dey sa' ze' gal mod nu nil ricy dey. <sup>43</sup> Na ornu bi bded sa' ze', orze' gush nez dey yay. Ze' Jesuuz byeeñ gam Jerusaleeng. Nunu wangad lagy de mbel nim. <sup>44</sup> Guzii dey nu ya Jesuuz lat de' zir mbecy. Bi bza' tub dzi nu zu dey nez. Orze' brugyi' nu ryub dey mi lat de famil nim, nunu lat de mbecy nu yu' lom. <sup>45</sup> Tees wangyad mi ni dey. Orze' bish cya ga' dey yay laaba' Jerusaleeng nu yub dey mi.

<sup>46</sup> Na ornu bza' dzi chon, orze' byad mi ni dey zub mi nañ yu' nu driib zily mbecy Ñgyoozh nu de yu nu rlyuu leey ni de mbecy Israeel. Rzuub gyidag mi ni dey, nunu rgugyi'm lo dey. <sup>47</sup> Nunu dela de yu nu reñ de riidz nu rniim za nu la ic dey nu nac nu dzi lily rniim. <sup>48</sup> Ornu bzaac de mbel nim mi, za nu la ic dey. Orze' ñaam nañ rab ñim:

—Fiñ nguzh, ¿lagu ni b icy nur de? Uz ru nu ya tona' la deet guc nañ lardoq de nu ryub de ru —nam.

<sup>49</sup> Orze' na Jesuuz rab mi ñaam:

—¿Lagu ryub der ya? ¿A wagad lagy der nu ya rlagy ñi nu cuij nañ yu' ni Ñgyoozh uza? —nam.

<sup>50</sup> Tees wangyet lag dey cuen de coz nu mniim.

<sup>51</sup> Orze' Jesuuz bish cya ga'm num dey yam Nazaret. Ze' pcyiiñ mi nunu bzuub gyidag mi dela coz nu mnii dey. Orze' ñaam pcaa ic ñi dela coz nu guc ze'. <sup>52</sup> Orze'

Jesuuz zaab raly zir mi. Raly cuerpe nim, nunu ral shcab nim. Orze' Ñgyoozh bet lagy mi nu nac mi, nunu ni' zi'l mbecy bet lagy dey nu nac mi.

### Waa nu griib nis mbecy pshaal yu riidz nu bruu lo Ñgyoozh

**3** Na bi bza' tiiñ ña'n nu riib ic yu nu la Tiberio de nasyoong. Ze' Poncio Pilato byub ic yu Judea por cuen ni gubier. Nunu Herodes byub ic yu por cuen ni gubier Galilea. Nunu b icy yu, Lip, byub ica'y por cuen ni gubier Iturea nu Traconite. Nunu Lisanias byub ic yu por cuen ni gubier Abilinia. <sup>2</sup> Orze' Anás nu Caifás byub ic dey de uz Israeel. Orze' tiem ze' Ñgyoozh mni-im lo Waa, i'ñ Zazarí, tub lugaar ub zi. <sup>3</sup> Orze' Waa gusay dela lugaar nu ri gaab ga gyoow Jordaang. Orze' nay rab yu de mbecy:

—Mne' der dela cyi nu ricy ru nunu bzu nis der, gun orze' Ñgyoozh gyicy sulagy mi de cyi der —nay.

<sup>4</sup> Gun Isaías, yu nu mnii por cuen ni Ñgyoozh, laab Waa bzat yu ornu pcaa:

Zaab ti' tub mbecy rbish tiy tub lugaar ub zi.

Orze' nay:

“Nañ lardoo der nañ gal nu na tub nez.

Orze' b icy nap der nez ze' par ornu cyid Shuaan ru.

Pshaal der tub nez nu li par nu ded mi.

<sup>5</sup> Dela nez nu a' tub ru' gyicy tub ru' der ñii.

Nunu de ze' nu Zub b icy ily gyicy lacy der ñii.

Nunu de nez nu a' li gu' li der ñii.

Nunu dela de nez nu dzi wech zu, gyicy tub ru' der ñii.

<sup>6</sup> Orze' de lo la mbecy gzac dey biñ nu bzuu nez Ñgyoozh nu co mbañ den”,  
nay, na Isaías.

<sup>7</sup> Orze' tona' la mbecy zigy bruu dey nu yad yu par nu rlagy dey nu griib nis Waa dey. Orze' Waa nay rab yu dey:

—¡Der mbecy shiñ ricy! ¿Cyu mnii lo der nu gac gla der lo cashtig ily ni Ñgyoozh nu bi yad gaab? <sup>8</sup> Bicy der tub mod nu nap gabe nu bi mne' der de cyi nu ricy ru. Cue' gnii too der nu gla der ni de cashtig ze' nu nac nu rnii der: “De ub na nac naa nez gyitoo bel nin Abraham”, rnii der, gun ya rishli rneq lo der nu Ñgyoozh gac gyicy mi nu mas gashtal de gyita' ii gyac ñi nez Abraham. <sup>9</sup> Gun cashtig ni Ñgyoozh nañ gal na tub gyibag. Bi zu lily ñii par nu shi'ñ ñi dela yag gashtal lyu lañ. Dela yag nu wacuic uuggy nap gyl'ñ ñi. Orze' chañ lo gyl —na Waa.

<sup>10</sup> Orze' na de mbecy rab yu Waa:

—¿Lac mod gyicy de beni? —na dey.

<sup>11</sup> Orze' na Waa rab yu dey:

—Benu tub mbecy mbish cyup shab yu, orze' rlagy ñi cuic yu tub ni yu nu sac ni, nunu benu yu' nu row tub mbecy, orze' rlagya'ñ nu cuicaly' ñuu gow yu nu sac nu row —na Waa.

<sup>12</sup> Gaza' de yu nu rboo tiñ por cuen ni gubier Rom za ga' dey lo Waa par nu griib nis yu dey. Orze' na dey rab yu Waa:

—Masht, ze' dē ya, ¿la coz rlagy ñi nu gyicy dē? —na dey.

<sup>13</sup> Orze' Waa nay:

—Rlagy ñi nu co der tiñ gal nu ca lo cuen nu co der, nunu cue' nu sheñ zir co der —nay rab yu dey.

<sup>14</sup> Ni' zi'l de soldad nu yu' ze' bdugyi' ga' dey lo Waa. Orze' na dey:

—Ze' dē ya, ¿lac mod gyicy dē? —na dey.

Orze' na Waa rab yu dey:

—Cue' co der tiñ ni mbecy por fers la, nunu cue' riib der gyidza too dey. Bzu la der conform ca na la i der nu ricy ru gan —na Waa rab yu dey.

<sup>15</sup> Orze' de mbecy brugyi' rgyish lo dey nu zac lo dey tub coz ily, nunu brugyi' rgugyi' dey lo losa'y ben a walab Waa nac yu Mesías, biñ nu ca lo cuen nu cyid.

<sup>16</sup> Orze' Waa nay rab yu dey:

—Ya rishli griib nisä der nu nis, tees cyid tub biñ nu cuic Espiriit Yon ni Ñgyoozh ni mbecy, nunu cuic mi cashtig nu na gal nu na gyi ni dey. Mi ze' tub biñ nu gya zir zu par ya. Ya ni wayapä nu shagya gyid nu Zub gyid lab mi. <sup>17</sup> Mi ze' nam gal na tub mbecy nu bi zu lily nu tub yag ru' biiz par nu com dela mbigy trig, nunu gyicy tublaazh mi ñii par nu cu' choow mi nañ ye. Ze' de gyid ich ñi zeed mi ñii chañ lo tub gyi nu rila wayu —na Waa.

<sup>18</sup> Orze' ni mod nunu zañ zir mod Waa pshaal yu de riidz nu sac nu bruu lo Ñgyoozh lo de mbecy. <sup>19</sup> Orze' pshuu nuy Herodes, yu nu riib ic por cuen ni gubier nu nac nu gush yu Herodías, mñaa b icy yu Lip. Nunu yu' zir coz a' nap nu b icy yu. <sup>20</sup> Nunu shiñ zir b icy yu ornu b icy yu mandaar nu pshet lag mbecy Waa nañ yu' gyib.

### Bzu nis Jesuuz

<sup>21</sup> Tiem ze' ornu Waa griib nis yu de mbecy, orze' ni' zi'l Jesuuz briic yu nu winis mi. Na lat nu rnii num Ñgyoozh, orze' byaal la baa. <sup>22</sup> Orze' bruu zac Espiriit Yon ni Ñgyoozh nu na gal na tub beg. Orze' bet mi toom. Orze' zaab ti' Ñgyoozh. Gal gyibaa rniim. Orze' nam:

—Ru nac ru i'ñä nu tona' la rca, nunu tona' la yet lagya —na Ñgyoozh gashtal gyibaa.

### De gyitoo bel ni Jesuuz

<sup>23</sup> Ornu bzuub Jesuuz gyi' riiñ nu ricy mi, orze' yu'm ña'n gal rup tii. Orze' de mbecy guzii dey nu mi ze' i'ñ See. Ze' See yu ze' i'ñ Elí. <sup>24</sup> Orze' Elí guc yu i'ñ Matat. Orze' Matat guc yu i'ñ Leví. Orze' Leví guc yu i'ñ Melqui. Orze' Melqui guc yu i'ñ Janai. Orze' Janai guc yu i'ñ See. <sup>25</sup> Orze' See guc yu i'ñ Matatías. Orze' Matatías guc yu i'ñ Amós. Orze' Amós guc yu i'ñ Nau. Orze' Nau guc yu i'ñ Esli. Orze' Esli guc yu i'ñ Nagai. <sup>26</sup> Orze' Nagai guc yu i'ñ Maat. Orze' Maat guc yu i'ñ Matatías. Orze' Matatías guc yu i'ñ Semei. Orze' Semei guc yu i'ñ Josec. Orze' Josec guc yu i'ñ Judá. <sup>27</sup> Orze' Judá guc yu i'ñ Joanán. Orze' Joanán guc yu i'ñ Resa. Orze' Resa guc yu i'ñ Zorobabel. Orze' Zorobabel guc yu i'ñ Salatiel. Orze' Salatiel guc yu i'ñ Neri. <sup>28</sup> Orze'

Neri guc yu i'ñ Melqui. Orze' Melqui guc yu i'ñ Adi. Orze' Adi guc yu i'ñ Cosam. Orze' Cosam guc yu i'ñ Elmadam. Orze' Elmadam guc yu i'ñ Er. <sup>29</sup> Orze' Er guc yu i'ñ Jesuuz. Orze' Jesuuz guc yu i'ñ Eliezer. Orze' Eliezer guc yu i'ñ Joram. Orze' Joram guc yu i'ñ Matat.

<sup>30</sup> Orze' Matat guc yu i'ñ Leví. Orze' Leví guc yu i'ñ Simyoo. Orze' Simyoo guc yu i'ñ Judá. Orze' Judá guc yu i'ñ See. Orze' See guc yu i'ñ Jonam. Orze' Jonam guc yu i'ñ Eliaquim. <sup>31</sup> Orze' Eliaquim guc yu i'ñ Melea. Orze' Melea guc yu i'ñ Mena. Orze' Mena guc yu i'ñ Matata. Orze' Matata guc yu i'ñ Natán. <sup>32</sup> Orze' Natán guc yu i'ñ Dabi. Orze' Dabi guc yu i'ñ Isaí. Orze' Isaí guc yu i'ñ Obed. Orze' Obed guc yu i'ñ Booz. Orze' Booz guc yu i'ñ Sala. Orze' Sala guc yu i'ñ Naasón.

<sup>33</sup> Orze' Naasón guc yu i'ñ Aminadab. Orze' Aminadab guc yu i'ñ Admin. Orze' Admin guc yu i'ñ Arni. Orze' Arni guc yu i'ñ Esrom. Orze' Esrom guc yu i'ñ Fares. Orze' Fares guc yu i'ñ Judá. <sup>34</sup> Orze' Judá guc yu i'ñ Jacob. Orze' Jacob guc yu i'ñ Isaac. Orze' Isaac guc yu i'ñ Abraham. Orze' Abraham guc yu i'ñ Taré. Orze' Taré guc yu i'ñ Nacor. <sup>35</sup> Orze' Nacor guc yu i'ñ Serug. Orze' Serug guc yu i'ñ Ragau. Orze' Ragau guc yu i'ñ Peleg. Orze' Peleg guc yu i'ñ Heber. Orze' Heber guc yu i'ñ Sala. <sup>36</sup> Orze' Sala guc yu i'ñ Cainán. Orze' Cainán guc yu i'ñ Arfaxad. Orze' Arfaxad guc yu i'ñ Sem. Orze' Sem guc yu i'ñ Noé. Orze' Noé guc yu i'ñ Lamec.

<sup>37</sup> Orze' Lamec guc yu i'ñ Matusalén. Orze' Matusalén guc yu i'ñ Enoc. Orze' Enoc guc yu i'ñ Jared. Orze' Jared guc yu i'ñ Mahalaleel. Orze' Mahalaleel guc yu i'ñ Cainán. <sup>38</sup> Orze' Cainán guc yu i'ñ Enós. Orze' Enós guc yu i'ñ Set. Orze' Set guc yu i'ñ Adaang. Orze' Adaang guc yu i'ñ Ñgyoozh.

### Jesuuz guc preb mi

<sup>4</sup> Orze' Jesuuz brugyi' riib ic za' la Espiriit Yon ni Ñgyoozh mi. Gaze' nu bruum gashtal gyoow Jordaan zam. Orze' Espiriit Yon ni Ñgyoozh za num mi tub lugaar ub zi. <sup>2</sup> Ze' brim cyuu dzi. Orze' ze' b icy nuras preb mi. Dub laa lat nu brim ze' wangow lam gyit. Na despuees, orze' briib nu ran mi. <sup>3</sup> Orze' na nuras rab yum:

—Benu ru rishli gaal nac ru i'ñ Ñgyoozh, orze' mnii lo de gyita' ii nu gyac ni gyishtily —nay.

<sup>4</sup> Orze' Jesuuz nam rab mi nuras:

—Lat de riidz ni Ñgyoozh rniin: "Walab gyishtily zi'l gyicy ñi nu cui mbañ mbecy", rniiñ —nam.

<sup>5</sup> Gaze' nu nuras gua nuy mi tub ze' nu gya. Orze' nañ tub miiñ zi'l blyuuy dela lugaar ni gyishlombecy lom. <sup>6</sup> Orze' nay:

—Ya gyicya nu gac gyub ic ru dutuub la gyishlombecy ii, nunu gricä dela gyel nap nu yu' loñ nir. Ya bi guud ñi ne, nunu gac gricä ñii ni cyu zi'l mbecy nu rlagya.

<sup>7</sup> Ya gricä nde' nir benu zu tib ru lo nu griib zily ru ya —nay.

<sup>8</sup> Orze' Jesuuz nam rab mi nuras:

—Gun lat de riidz ni Ñgyoozh rniin: "Briib zily Shuaan ru, biñ nu nac Ñgyoozh nir, nunu se coz nu rlagy zi'l mi gyicy ru", rnii riidz nim —na Jesuuz.

<sup>9</sup> Gaze' nu za nu nuras mi par Jerusaleeng. Orze' pshup yum ze' nu gya zir ni yu' nu driib zily de mbecy Israeel Ñgyoozh. Orze' nay rab yu Jesuuz:

—Benu rishli gaal nac ru iñ Ñgyoozh, orze' bzut yeñ gashtal lo yu la re. <sup>10</sup> Gun lat de riidz ni Ñgyoozh rniiñ: Ñgyoozh cu'm riiñ yaa de anc nim nu ña dey ru, nunu wazaan dey nu shiñ gzac ru.

<sup>11</sup> Orze' lagy yaa dey ru, gun orze' cue' nu gad güii par ni gyi'r lo de gyita', rniiñ, nay.

<sup>12</sup> Orze' Jesuuz nam rab mi yu:

—Ni' zi'l rniiñ lat de riidz nim: "Cue' gyicy ru preb Ñgyoozh, Shuaan ru", rniiñ —na Jesuuz.

<sup>13</sup> Orze' nuras wangada' mod nu ñgyicy yu preb Jesuuz. Orze' bruu chuy lom par la be tiem.

### Jesuuz brugyi' ricy mi riiñ Galilea

<sup>14</sup> Orze' Jesuuz ya ga'm par lo de yu ni Galilea, nunu riib ic za' la Espiriit Yon ni Ñgyoozh mi. Orze' brush las riidz ni de coz nu b icy mi dela lugaar nu yu' gaab ga ze'. <sup>15</sup> Orze' rlyuum nañ de yu' nu rsya' de mbecy Israael riidz ni Ñgyoozh de ga la lugaar ze' nu rded mi. Nunu dela mbecy ryabic dey gyel mbecy nim.

### Jesuuz yam Nazaret

<sup>16</sup> Orze' Jesuuz yam Nazaret, gyedz ze' nu guul mi. Na ornu pshuub sab, dzi nu rzu lagy de mbecy Israael, orze' b icy mi gal mod nu nil ricy mi. Orze' gu'm nañ yu' ze' nu rsya' dey riidz ni Ñgyoozh. Gaze' nu wes sum nu lab mi riidz ni Ñgyoozh. <sup>17</sup> Orze' briic dey libr ni Isaías, tub yu nu rnii por cuen ni Ñgyoozh, par nu lab mi. Na ornu pshaal mi looñ, orze' byap mi ze' nu cañ nu rniiñ:

<sup>18</sup> Espiriit Yon ni Ñgyoozh Shuaana riib ic mi ya, gun bzum ya nu cha nee de riidz nu sac lo de mbecy zi.

Nunu bzuu nez mi ya par nu gyicya nu cue' gyub ic reña' coz nañ lardoo de mbecy.

Nunu bzuu nez mi ya nu gyicya nu zac de mbecy nu wacsac.

Nunu bzuu nez mi ya par nu gyicya nu gruu nap de mbecy nu rzac zi nu nac nu shiñ ricy nu de losa'y yu.

<sup>19</sup> Nunu bzuu nez mi ya nu nee lo dela mbecy nu bi pshuub ña'n nu nap gyicy nu Ñgyoozh dela mbecy, rniiñ, nam.

<sup>20</sup> Laab nde' la. Orze' Jesuuz ptub mi gyicy ze'. Orze' byabic mi fiñi ni yu nu zu riiñ nañ yu' ze'. Orze' gusub mi. Orze' mbi la bgüii de yu nu yu' nañ yu' ze' lom.

<sup>21</sup> Orze' brugyi' rniim. Orze' nam rab mi dey:

—Lat nu blaba de riidz ze' lo der, orze' byu' niñ —nam.

<sup>22</sup> Orze' dela mbecy nap mnii dey nu nac Jesuuz, nunu bet lagy dey de riidz cyit na nu mniim. Orze' na dey rab dey losa'y:

—Ze', ña walab yu ii iñ See? —na dey.

<sup>23</sup> Orze' na Jesuuz rab mi dey:

—Ya rad lagya nu segur la nii der tub riidz cyit. Riidz ze', nde': "Ru nac ru tub mbecy nu ricy guñaa. Orze' gyicy yac ru ub ru. Orze' gal nu b icy ru gyedz Caper-naum, ni' zi'l gyicy ru ledz ru ii", nii der lo. <sup>24</sup> Ya rishli rnee lo der nu ni tub la mbecy nu rnii por cuen ni Ñgyoozh, de mbecy ledz yu wagyicy cuen dey yu. <sup>25</sup> Gun rishli gaal tona' la yu' byud Israael tiem ni Elás, yu nu mnii por cuen ni Ñgyoozh, tiem nu wangyet gyey chon nañ nu. Nunu tona' la byan mbecy dutuub la lugaar ze'. <sup>26</sup> Tees Elás wanchay lo ni tub la byud nu yu' Israael, sinu guay lo tub byud nu rcyiiñ Sarepta. Nde' tub gyedz nu ri gaab ga Sidón. <sup>27</sup> Ni' zi'l tiem ni Eliseo, yu nu mnii por cuen ni Ñgyoozh, tona' la zigy de mbecy Israael gurat yu gyedz nu la lepra. Tees ni tub la dey wangyac yu. Nomaas byac tub mbecy nu la Naamán. Yu ze' tub mbecy nu bruu lo yu ni Siria —nam.

<sup>28</sup> Ornu güeñ dela mbecy nu nguua nañ yu' ze' de riidz nu mniim, orze' tona' la pcha' ic dey. <sup>29</sup> Orze' wes su dey, nunu gua nu dey Jesuuz por fers la par ru' gyedz ze'. Gaze' nu pshup dey mi too tub b icy ze' nu ri gyedz ze', gun b icy pee dey nu nshet lag dey mi gal ze' nu gya ni b icy ze', gal lo yu la. <sup>30</sup> Orze' bbed mi lat dey Yam.

### Tub mbecy nu b icy ni nuras byac yu

<sup>31</sup> Orze' Jesuuz yam tub gyedz nu ri lo yu ni Galilea nu la Capernaum. Orze' sab, dzi nu rzu lagy mbecy Israael, gu'm nañ yu' ze' nu rsya' de mbecy Israael riidz ni Ñgyoozh par nu lyuum ni dey. <sup>32</sup> Orze' de mbecy za nu la ic dey nu nac coz nu rniim, gun rlyuum ni dey gal nu rlyuu tub mbecy nu riib ic za' la.

<sup>33</sup> Na nañ yu' ze' ri tub mbecy nu b icy ni nuras. Orze' ye la rbish tiy. <sup>34</sup> Orze' nay rab yu Jesuuz:

—Bruu chu. ¿Lagu yad ru lat de, Jesuuz, biñ nu bruu Nazaret? ¿A yad ru par nu za' lor de ya? Ya rad lagya nu ru nac ru mbecy yon ni Ñgyoozh —nay rab yu Jesuuz.

<sup>35</sup> Orze' Jesuuz bdza'm ni nuras ze'. Orze' nam rab mi yu:

—Dzi chel, nunu bruu chu lo yu ii —nam.

Orze' nuras ze' mne'y mbecy ze' lo yu lo rgüii la dela mbecy. Orze' gaze' nu bruu chuy lo mbecy ze', nunu se la la b icy yu. <sup>36</sup> Orze' dela mbecy nu yu' ze' gudzib dey. Orze' na dey rab dey losa'y:

—¿Lac yaruu nu nii? ¡Mbacy ii ricy cup yu rishbeey, nunu ricy cup yu mod nu ricy yu mandaar gashtal nuras, nunu orze' druu chu dey lo mbecy! —na dey.

<sup>37</sup> Orze' lieg la bzu riidz ni de coz nu b icy Jesuuz dela lugaar nu yu' gaab ga.

### Jesuuz b icy yac mi ñaa gud Bed

<sup>38</sup> Orze' Jesuuz bruum nañ yu' ze' nu rsya' de mbecy riidz ni Ñgyoozh. Orze' yam yu' Simog. Ze' ñaa gud Simog riib rat mi. Tona' la pcaañ zig nim. Orze' mnish-baa dey lo Jesuuz nu nac mi. <sup>39</sup> Orze' gaze' nu gua Jesuuz bzaab tily mi lom. Orze' b icy mi mandaar nu gruu

zig ze'. Orze' bruu zig mi. Gaze' nu lueg la weshtem, nunu brugyi' rzu bich mi nu nac dey.

### Jesuuz bicy yac mi zañ mbecy rat

<sup>40</sup> Na ornu bi za doo na, orze' dela mbecy nu ricy cup famil ni nu rat zañ lo güii, orze' gua nu dey yu lo Jesuuz. Orze' mi ze' briib yaam too tub ga la dey. Gaze' nu byac dey. <sup>41</sup> Nunu bruu chu zañ nuras nu bicy ni mbecy nu yu' lat de mbecy rat ze'. Orze' nuras ze' rbish ti dey. Orze' na dey rab yu Jesuuz:

—Ru nac ru iñ Ngoozh! —na dey.

Orze' Jesuuz bdza'm ni de nuras ze'. Orze' wansaan mi nu nii zir dey, gun yu' lo dey mi nu nac mi Mesías, biñ nu ca lo cuen nu cyid.

### Jesuuz pshaal mi riidz ni Ngoozh Galilea

<sup>42</sup> Na or bza' yu tuuba' dzi na, orze' Jesuuz bruum lat gyedz zam tub lugaar ub zi. Orze' de mbecy brugyi' nu ryub dey mi. Orze' bru'ña dey ze' nu zum. Orze' bicy pee dey nu wazaan yu nu gruum lat dey. <sup>43</sup> Orze' nam rab mi dey:

—Tees ni' zi'l rlagy ñi cha shaala de riidz nap ni gyel gubier ni Ngoozh de reña' gyedz, gun par nde' bzuu nez Ngoozh ya —nam.

<sup>44</sup> Orze' Jesuuz gusam pshaal mi de riidz nu bruu lo Ngoozh nañ de yu' nu rsya' de mbecy riidz ni Ngoozh nu yu' de lo yu ni Judea.

### Jesuuz bredz mi tap de yu nu rub bel

**5** Guc ñi tub tiem nu Jesuuz brim ru' nisyudoo tub gyedz nu la Genesaret. Orze' de mbecy rcyi'ñ su laa dey mi, gun rlagy dey gyeñ dey de riidz ni Ngoozh nu rnii. <sup>2</sup> Orze' Jesuuz bzaac mi cyup barc zuñ ru' nisyudoo. Nat laa nañ ñi, gun de yu nu rub bel bruu dey nañ ñi nu za tiib dey gyish niy. <sup>3</sup> Orze' Jesuuz gu'm nañ tub barc ze'. Orze' barc ze', nde' barc ni Simoo. Gaze' nu mniim lo Simoo nu gyicy zet zir yu barc ze' par ru' nisyudoo. Orze' gusub mi, nunu brugyi' rlyuum ni mbecy gal nañ barc ze'. <sup>4</sup> Na ornu blazh blyuum ni dey na, orze' nam rab mi Simoo:

—Gua nu barc nir ze' nu gyi ni nisyudoo. Orze' ne'r gyish nir lo nis par nu cub ru bel —nam.

<sup>5</sup> Orze' na Simoo rab yum:

—Masht, gua la rel ricy dë riiñ nu rdub dë bel. Ze' ii rila wangad la ma ni dë. Tees na como ru mniir, orze' ya ne' gyish ne' lo nisyudoo —nam.

<sup>6</sup> Na ornu mne' dey gyish niy lo nisyudoo na, orze' tonia' la guud bel ni dey. Gashtal riñ la gyish ni dey tanta' nu yu' bel nañ ñi. <sup>7</sup> Gaze' nu bicy yaa dey lo losa'y, de yu nu yu' nañ reña' barc par nu cha locyuub dey yu. Gaze' nu gua nu de yu ze' barc niy. Orze' bdzaa la nañ rup laa barc ni dey nu yu' bel. Se nu ches ti zi' barc ni dey lo nisyudoo tanta' nu yu' ma nañ ñi. <sup>8</sup> Na ornu Bed bzaac yu de nu nde', orze' gusu tib yu lo Jesuuz. Orze' nay rab yum:

—Bruu chu lo Shuaana, gun ya nacä mbecy cyi —nam.

<sup>9</sup> Ni mniiy gun gudzib yu, nunu ni' zi'l gudziba' de' zir mbecy nu nac de bel zañ nu guud ze'. <sup>10</sup> Gaza' Santiag nu Waa, de iñ Zebedeo, gudzib dey. De yu ze' losa' Simoo. Orze' Jesuuz nam rab mi Simoo:

—Cue' dzib der, gun nese na la gal nu rub der bel, ni' zi'l te' der de mbecy, gun orze' cyid ca dey ichä —nam.

<sup>11</sup> Gaze' nu gua zeeñ dey de barc niy par lo yu bigy. Orze' ze' bzeeñ dey barc niy. Orze' za çä dey ich mi.

### Jesuuz bicy yac mi tub mbecy nu ta' tub lo gyedz nu la lepra cuerپ ni

<sup>12</sup> Tub dzi Jesuuz zam tub gyedz. Orze' ze' bru'ña tub mbecy nu rat tub lo gyedz nu la lepra. Na ornu bzaac yu Jesuuz, orze' wes saa tiily yu gashtal lo yu la. Orze' mnishbaay lo Jesuuz. Orze' nay rab yum:

—Benu rlagy ru, ru gac gyicy yac ru ya —nam.

<sup>13</sup> Orze' Jesuuz gul yaam yu. Orze' nam:

—Rlagya. Orze' na byac ru —nam.

Orze' lueg la mnit la gyedz ze' cuerپ niy. <sup>14</sup> Orze' na ga' Jesuuz rab mi yu:

—Cue' niir lo ni tub la mbecy, sinu gua lo uz cha lyur ub ru loy. Orze' cuic ru gun nu rlagy ñi par nu gacaacy ru par lo Ngoozh gal nu mni Moisees nu gyicy na, gun orze' gad lagy dela mbecy nu bi byac ru ni güii nu rat ru —nam.

<sup>15</sup> Mas ni mniim, tees de coz nu bicy mi bzu zir ñi. Nunu tonia' la mbecy zigy byatublaazh dey lom par nu zuub gyidag dey nim, nunu par nu gyicy yac mi de güii nu rat dey. <sup>16</sup> Tees Jesuuz bruu chum lo dey zam tub lugaar ub zi nu nii num Ngoozh.

### Jesuuz bicy yac mi tub mbecy chi

<sup>17</sup> Tub dzi Zub Jesuuz rlyuum ni de mbecy. Lat ze' nguaa la be mbecy fariseo nu de yu nu rlyuu leey ni Ngoozh. De yu ze' bruu dey dela lugaar ni Galilea, nu de lugaar ni Judea, gal nu de lugaar ni Jerusaleeng. Nunu rabee nu Ngoozh ricy mi coz ily nu nac Jesuuz nu nac nu bicy yac mi de mbecy rat. <sup>18</sup> Orze' bru'ña nu dey tub mbecy chi lom riib yu lo tub nuun. Bicy pee dey nu chu' nu dey mbecy chi ze' nañ yu' ze' nu Zub Jesuuz par nu cyish dey yu lom. <sup>19</sup> Tees wangad mod nu chu' nu dey mbecy chi ze', gun dzi yu' mbecy. Gaze' nu gup dey par too yu'. Gaze' nu blaat dey tub gyeegy lat de tej. Gaze' nu pshet dey nuun nu riib mbecy rat ze' lat de mbecy zigy ze' nu Zub Jesuuz. <sup>20</sup> Na ornu gud lagy mi nu ricy cup dey consuel lom na, orze' nam rab mi mbecy chi ze':

—Ru, de cyir bi byecy ñi —nam.

<sup>21</sup> Orze' de yu nu rlyuu leey ni Ngoozh, nu de mbecy fariseo brugyi' nu rnii too dey: "¿Cyu mbecy yu ii? ¿Lagu rnii coz nu za contr ni Ngoozh? Tub zi la Ngoozh gac gyicy sulagy mi de cyi nu ricy mbecy", rnii too dey.

<sup>22</sup> Tees Jesuuz gud lagy mi nu ni rnii too dey. Gaze' nu nam rab mi dey:

—¿Lagu ni rnii too der? <sup>23</sup> Dzi zir a' biigy par nu nee nu bi bicy sulagy de cyir gaze' nu nee wes su nunu

bza —nam—. <sup>24</sup> Tees ya neę lo yu re nu gyes suy nunu gzym, gun orze' gad lagy der nu ya, biň nu byac mbecy, ricy cupa rishbeey nu gyicy sulagya de cyi mbecy gyishlombecy ii —nam.

Gaze' nu nam rab mi mbecy chi ze':

—Ya neę du ru wes su, gush nuun nir nunu yaa yu'r —nam.

<sup>25</sup> Orze' lueg la wes suy lo rgüii la de mbecy zigy ze'. Orze' bdu' yaay nuun nu byub yu lo ze'. Orze' yay yu'y. Nunu ryabic yu gyel mbecy ni Ngoozh. <sup>26</sup> Orze' dela yu nu nguaa ze' za nu la ic dey. Orze' byabic dey gyel mbecy ni Ngoozh, nunu ton'a la gudzib dey. Orze' na dey:

—Dzi na bzaac na tub nusuriidz ily —na dey.

### Jesuuz bzum Leví nu gac nuy mi

<sup>27</sup> Ornu bded ni de nu nde', orze' bruu Jesuuz zam. Orze' bzaac mi tub yu nu rboo tiň por cuen ni gubier Rom. Yu ze' lay Leví. Zub yu ze' nu rboo dey tiň. Orze' na Jesuuz rab mi yu:

—Da ca icha —nam.

<sup>28</sup> Orze' wes suy. Bzeeň ga lay de yu nu nguaa nuy ze' za cay ich mi.

<sup>29</sup> Na despuees, orze' Leví bicy yu tub sa' ily yu'y nu nac Jesuuz. Nunu ze' nguaa ga' de yu nu rboo tiň por cuen ni gubier Rom, gal nu zigy zir de mbecy. Tublaazh la nguaa dey lo mez row dey gyit. <sup>30</sup> Tees de mbecy fariseo, gal nu de yu nu rlyuu ley ni Ngoozh, brugyi' nu zi ga la rnii dey nu de yu nu rsya' lo Jesuuz. Orze' na dey:

—¿Lagu row der, nunu lagu ro' der nis nu de mbecy nu rboo tiň por cuen ni gubier Rom, gal nu nu de mbecy cyi? —na dey.

<sup>31</sup> Orze' Jesuuz nam rab mi dey:

—Par de mbecy ruub walagy ñi doctoor, tees par de mbecy rat rlagy ñi. <sup>32</sup> Gal nu doctoor wagycy nuy mbecy ruub guňaa, ni' ya a' yapä nu redža mbecy nu sac cyi, sinu dredža de mbecy cyi par nu ne' dey de cyi —nam.

### De yu nu rsya' lo Jesuuz waca dey ni ub yu nu goy gyit

<sup>33</sup> Orze' na dey rab yu Jesuuz:

—De yu nu rsya' lo Waa rca dey ni ub yu nu cue' goy gyit lat nu rzu bich dey nu nac Ngoozh. Nunu cya' rnii nu dey mi. Nunu ni' zi'l ricy de yu nu rsya' lo de mbecy fariseo. Ze' de yu nu rsya' lo ru de dzi la row dey nunu ro' dey —na dey.

<sup>34</sup> Orze' Jesuuz nam rab mi dey:

—Ya na gal nu na tub nob. ¿Walab gaal gac ca de yu nu yu' lo fandang ni ub yu nu cue' goy gyit lat nu gabee rded nob lat dey? <sup>35</sup> Tees shuub tub dzi nu co mbecy nob ze' lat dey. Orze' gaze' nu gac ca dey ni ub yu nu cue' goy gyit par nu gyicy shni dey.

<sup>36</sup> Orze' Jesuuz mniim tub riidz tiily lo dey. Orze' nam:

—Gun mod nu bicy de gyitoo bel, nde' naň gal nu na tub negy gush. Ni tub la mbecy washi'ñ mi tub negy cub nu gad tub la' negy nu gyicy mi rumien negy

gush, gun nis gash beň negy cub ze'. Orze' gyicy ñi nsha negy cub ze'. Nunu negy cub ze' wagypa ñi negy gush ze'. <sup>37</sup> Nunu mod nu ricy de gyitoo bel, nde' naň gal nu na tub gyid gush nu rgu' choow dey ñup ni urbyay. Ni tub la mbecy wac cu' choow dey ñup ni urbyay cub naň gyid gush, gun nis cyich ñiň. Orze' shu dela ñup ni urbyay ze', nunu nit lo gyid ze'. <sup>38</sup> Nde' nu rlagy ñi cu' choow dey ñup ni urbyay cub naň gyid cub, gun orze' rup laaň wanit lom. <sup>39</sup> Nunu ni tub la yu nu ro' ñup ni urbyay gush walagy yu go'y ñup ni urbyay cub, gun rnii dey nu "Nap zir ro' ñup ni urbyay gush", rnii dey —nam.

### De yu nu rsya' lo Crisht rcyug dey za' ni trig sab, dzi nu rzu lagy mbecy

6 Na tub dzi sab, dzi nu rzu lagy mbecy Israeel,

6 orze' Jesuuz bded mi nu de yu nu rsya' lom lat tub nac trig. Orze' de yu nu rsya' lom brugyi' nu rcyug dey za' ni trig ze'. Gaze' nu brugyi' nu rzuub dey ñi nu yaay. Orze' gaze' nu bdow dey ñi. <sup>2</sup> Orze' la be mbecy fariseo na dey rab yu Jesuuz:

—¿Lagu ricy de ru riiň nu a' yad ñi nu gyicy mbecy dzi nu rzu lagy den? —na dey.

<sup>3</sup> Orze' na Jesuuz rab mi dey:

—¿Walab gaal nigul sya' der lat de riidz ni Ngoozh ze' nu rniiň de coz nu bicy Dabi lat nu byan yu nu de losa'y nu gusa nuy? <sup>4</sup> Orze' gu' dey naň yu' ni Ngoozh. Bloo dey de gyishtily nu nguaa ze'. Nde' de uz nu zu riiň lo Ngoozh zi'l gac gow yuň. Tees Dabi bdow yu gyishtily ze', nunu briica'y gow de yu nu gusa nuy —nam—. <sup>5</sup> Gun ya, biň nu byac mbecy, riib ică sab, dzi nu rzu lagy mbecy —nam.

### Jesuuz bicy yac mi tub mbecy yaa gush beň

<sup>6</sup> Na tuuba' dzi sab, dzi nu rzu lagy mbecy, orze' gu'm naň yu' ze' nu rsya' mbecy riidz ni Ngoozh. Orze' brugyi' rlyuum ni dey, nunu naň yu' ze' ri tub mbecy nu gush beň tub la' yaa beey. <sup>7</sup> Orze' la be de yu nu rlyuu leey ni Ngoozh, gal nu la be mbecy fariseo psiiň dey nim, ben a gyicy yac mi mbecy rat ze' sab, dzi nu rzu lagy mbecy, gun dzi ga gad tub mod nu riib dey cyi ic mi. <sup>8</sup> Tees Jesuuz gud lagy mi la coz rnii too dey. Orze' nam rab mi mbecy nu gush beň yaa ze':

—Wes su. Da lo gashtal gazel ii —nam.

Orze' mbecy nu gush beň yaa ze' wes suy. <sup>9</sup> Orze' Jesuuz nam rab mi de' zir de mbecy:

—Na ya dugyi' tub coz lo der. ¿Ca na coz nu nap zuň par lo leey ni Moisees nu gyicy na sab, dzi nu rzu lagy mbecy? ¿A nap nu gyicy na coz nap, o ti nap nu gyicy na coz a' nap? ¿A nii tub dzi nu gloo mbaň naa mbecy, o ti nii tub dzi nu gnit lon mbecy? —nam.

<sup>10</sup> Orze' bgüiim lo de yu nu yu' lom. Gaze' nu nam rab mi mbecy yaa gush beň ze':

—Bzaab yaar lo —nam.

Orze' mbecy ze' bzaab yaay lom. Orze' byanap la yaay. <sup>11</sup> Ze' de' zir de mbecy ton'a la pcha' ic dey. Orze' brugyi' nu ro dey riidz ben lac mod gyicy nu dey mi.

### Jesuuz pcuim trocyup aposht nim

<sup>12</sup> Orze' laab tiem ze' Jesuuz zam tub logyi' nu nii num Ñgyoozh. Orze' gua la rel nu rim ze' rnii num Ñgyoozh. <sup>13</sup> Na ornu bza' yu na, orze' bredz mi de yu nu rsya' lom. Orze' lat de yu ze' bloo sum trocyup dey. Orze' bloo lam dey aposht. <sup>14</sup> Orze' nii nu la de trocyup de yu nu bloo sum ze'. Gush lañ: Simoo, yu nu bloo lam Bed, nu b icy yu Ndrees, nu Santiag, nu Waa, nu Lip, nu Bartol, <sup>15</sup> nu Mateo, nu Tomaas, nu Santiag, iñ Alfeo, nu Simoo, yu nu nac partid nu la celote, <sup>16</sup> nu Judas, b icy Santiag, nu Judas Iscariote, yu nu bish cya ich mi.

### Jesuuz rlyuum ni zigy mbecy

<sup>17</sup> Orze' Jesuuz bruum logyi' bet mi nu de yu nu bloo sum ze'. Gaze' nu gucua dem tub ze' nu lacy. Orze' ze' bi nguaa zigy de yu nu rsya' lom. Nunu nguaa zigy zir mbecy, de yu nu bruu lo yu ni Judea, nu de yu nu bruu Jerusaleeng, nu yu nu bruu Tiro nu Sidón, cyup gyedz nu ri ru' nisyudoo. Dela dey ze' yad dey par nu zuub gyidag dey de riidz nu rnii Jesuuz, nunu par nu gyicy mi nu nit de güii nu rat dey. <sup>18</sup> Nunu ni' zi'l b icy yac mi de mbecy nu b icy ni nuras. <sup>19</sup> Nde' nu dela de mbecy rlagy dey nu gal yaa dey Jesuuz, gun gyicy yac mi dey nu nac fers nu gruu nim.

### Dzi ni de mbecy

<sup>20</sup> Gaze' nu Jesuuz bgüiim lo de yu nu rsya' lom. Gaze' nu nam rab mi dey:

—Dzi ni de ru mbecy nu gyel zi zu, gun de ru gzac ru lo gyel gubier ni Ñgyoozh.

<sup>21</sup> 'Dzi ni de ru mbecy nu ran na, gun orze' gad nu gyel ni der.

'Dzi ni de ru mbecy nu ruun na, gun par lo orze' gyig y der.

<sup>22</sup> 'Dzi ni der ornu rzi lagy mbecy lo der, nunu ornu cyuu nu dey der, nunu ornu rnii zi dey ni der, nunu ornu rnii dey nu nac der mbecy a' nap nu nac ya, biñ nu byac mbecy. <sup>23</sup> Orze' tona' la bet lagy der dzi ze', nunu gal brich la gyi' der lo yu, gun gyibaa gyad tub i der nu tona' la coz ily, gun ni' zi'l mod de gyitoo bel ni den pshet zi dey de mbecy nu rnii por cuen ni Ñgyoozh.

<sup>24</sup> 'Tees cuaa de ru mbecy guaniñ, gun bi b icy der gusht ni der!

<sup>25</sup> 'Nunu cuaa de ru mbecy nu dza nañ, gun par lo gyan der!

'Nunu cuaa de ru mbecy nu dzi rigy na, gun par lo gun der nu gyicy shnir!

<sup>26</sup> 'Cuaa ga' der ornu dela mbecy ryabic dey gyel mbecy nir, gun ni' zi'l de too bel ni dey byabic dey gyel mbecy ni de mbecy nu mnii fals por cuen ni Ñgyoozh gulas!

### Jesuuz rlyuum ni de mbecy nu ca dey de losa' yuuy

<sup>27</sup> 'Tees ya rneé lo der mbecy nu rzuub gyidag ne ya: Pca der losa' yuuy, nunu nap b icy nu der de yu nu rzi

lagy lor. <sup>28</sup> Nunu nap mnii der ni de yu nu shiñ rnii rab de ru. Nunu bdiiñ der lo Ñgyoozh ni de yu nu rnii zi ni der. <sup>29</sup> Benu tub mbecy shet yu zig tub la' ya lor, orze' zaaba' der tub la' ga' loy nu shet yu. Nunu benu ca na mbecy rbooy chicyet ni der, orze' briic la niy, nunu briica' yaag ru niy. <sup>30</sup> Nunu benu ca na mbecy cyiñ yu la coz lor, orze' cuic ru ñii niy. Nunu benu ca na mbecy rbooy la coz nir, orze' cue' niir loy nu gyabic yu nir. <sup>31</sup> Nunu b icy nu der de' zir mbecy gal mod nu rlagy ub der nu gyicy nu dey der.

<sup>32</sup> 'Nunu benu de ru ca zi'l der de yu nu rca zi'l ru, ¿a dzi coz ilya' ricy der rziir? Gun mas gashtal de mbecy cyi rca dey losa'y benu ni' rca losa'y ub yu. <sup>33</sup> Nunu benu nap gyicy der nu de mbecy nu nap zi'l gyicy nu ru, ¿a nde' la nu dzi coz ilya' ricy der, rziir? Gun mas gashtal de mbecy cyi ni ricy dey. <sup>34</sup> Nunu benu rbic der de coz nu rboo mbecy nu rzii der nu gyabica'y nir, ¿a dzi coz ilya' ricy der rziir? Gun ni' zi'l de mbecy cyi rbica' dey de coz rboo losa'y. Nunu rgyish lo dey nu gyabica' losa'y niy. <sup>35</sup> Orze' pca der losa' yuuy, nunu nap b icy nu der dey, nunu briic der coz nu co losa'r. Nunu cue' cyish lo der nu gyabic yu ni tub la coz nir. Orze' gyad tub i der nu tona' la coz ily. Nunu orze' gyac der iñ Ñgyoozh, biñ nu gya zir zu. Gun mi ze' nap mi num de mbecy nu sac graseer, gal nu de mbecy a' nap. <sup>36</sup> Guc der mbecy nu rashni lagy losa', gal nu Ñgyoozh uz der rashni lagy mi mbecy.

### Cue' nii mbecy nu yu' falt ni losa'y

<sup>37</sup> 'Cue' nii der nu yu' falt ni losa'r, gun orze' Ñgyoozh waniim ti yu' falt ni der. Cue' nii der nu rlagy ñi nu cha losa'r lo cashtig, gun orze' Ñgyoozh waniim nu de ru rlagy ñi char lo cashtig. Bicy sulagy der ni losa'r. Orze' Ñgyoozh gyicy sulagya'm ni der. <sup>38</sup> Briic der coz nu galagy losa'r, gun orze' Ñgyoozh cuica'm de coz nu galagy der. Nunu cuic za' lam ñii ni der. Gun dub gal nu gyicy nu der losa'r, dub ni gyicy num de ru —nam.

<sup>39</sup> Orze' Jesuuz mniim tub riidz tily lo dey. Orze' nam: —¿Walab gaal gac tub lo ca' lyuuuy nez ni tuuba' mbecy lo ca'? ¿A walab orze' rup laa dey gyet lag yu nañ tub zi'l gyeegy? <sup>40</sup> Sac ni tub yu nguzh scuel nu zily zir nac yu par moscuel niy. Tees ornu lazh sya' dey, orze' gaze' nu saap yu moscuel niy.

<sup>41</sup> 'De ru na der gal na mbecy nu rgu' cuen toop mi' nu ri urlo losa', ze' yabicy nu ri urlo ub der, nde' wagicy cuen der ñii. <sup>42</sup> Ze' benu ri tub yabicy urlo der, ze' wayicy cuen ru ñii, ¿orze' lagu rnii ga' der lo losa'r: "Doo urlor, gun lqo toop mi' ze'", rnii ga' der? ¿A mbecy rzuu lo! Bloo yabicy ily nu ri urlor loga la, gun orze' nap zir zac ru cor toop mi' nu ri urlo losa'r.

### Jesuuz rlyuum ni de mbecy nu dub gal nu na mbecy dub ni na coz nu ricy yu

<sup>43</sup> 'Sac ni tub la yag nap nu cuic ñi uugy shiñ na, nunu ni' sac tub yag a' nap na nu cuic ñi uugy nap. <sup>44</sup> Tub ga la yag rad lagy den la nañ nu nac de uugy nu rbic ñi, gun tub ya gyech wac cuic ñi urlas mni. Nunu ni' tub

gyish gyech wac cuic ñi urbyay.<sup>45</sup> Benu tub mbecy nap, yu ze' rniiy coz nap, gun coz nap yu' nañ lardooy. Benu tub mbecy a' nap, rniiy coz a' nap, gun yu' coz a' nap nañ lardooy. Dub gal lac na coz nu yu' nañ lardooy dub ni na coz nu rniiy.

**Jesuuuz rlyuum ni de mbecy nu rlagy ñi gyicy yac dey nu de riidz ni Jesuuuz par nu zu fert dey**

<sup>46</sup>'¿Lagu rnii der ya, "Shuaanä, Shuaanä", rnii der ze' wagiyic der gal nu rnëe? <sup>47</sup>Benu tub mbecy cyid yu lo, nunu gyeñ yu riidz nu rnëe, nunu gyicy yac yuñ, orze' ya rnëe lor la nay. <sup>48</sup>Orze' yu ze' nay gal na tub mbecy nu bzaa tub yu'. Gyi bduuñ yu simient niñ. Orze' bzuub yu simient niñ lo gyita'. Na ornu bet gyey, orze' guuly gyoow. Orze' bdugyiñ ich yu' ze'. Tees wangyes saañ, gun nap byaañ. <sup>49</sup>Tees dela mbecy nu rzuub gyidag coz nu rnëe, ze' wayicy dey gal nu rnëe, de yu ze' nay gal na tub mbecy nu bzaa tub yu'. Ze' ni wansu lay simient niñ. Na ornu bet gyey, orze' guuly gyoow. Orze' bdiñ yeeñ yu' ze'. Orze' wes saañ. Orze' mnit lo dutuub la yu' ze' —na Jesuuuz.

**Jesuuuz bicy yac mi tub moz ni tub yu nu riib ic tub gaynal soldad Rom**

**7** Na ornu blazh mniim lo de mbecy, orze' zam tub gyedz nu la Capernaum. <sup>2</sup>Orze' ze' rcyiiñ tub mbecy nu riib ic tub gaynal soldad Rom. Ze' zu tub moz ni yu nu dzi rcay. Orze' moz ze' mbish rat yu. Se nu gat zi'l yu. <sup>3</sup>Na ornu mbecy nu riib ic ze' güeñ yu riidz nu rnii mbecy ni de coz nu ricy Jesuuuz, orze' bzuu nez yu la be yu bel ni de mbecy Israeel nu cha nishbaa dey lo Jesuuuz, gun orze' cham gyicy yac mi moz niy. <sup>4</sup>Orze' de yu bel ze' gua dey mnishbaa dey lo Jesuuuz. Orze' na dey rab yum:

—Yad ñi nir nu locyuub ru mbecy ze', <sup>5</sup>gun dzi rcay de mbecy Israeel. Nunu laab yu bicy yu nu byaa yu' nu rsya' dë riidz ni Ñgyoozh —na dey.

<sup>6</sup>Orze' Jesuuuz za num dey par yu' mbecy nu riib ic ze'. Na ornu bi ya gaab dem ze' nu Zub yu'y, orze' yu nu riib ic ze' bzuu nez yu amig niy nu cha nii dey lo Jesuuuz. Orze' na dey rab yu Jesuuuz:

—Jesuuuz, yu nu riib ic de soldad mniim nu yap neeñ lor nu walagy yu gyicy seed yu ru, gun wangyap yu nu char yu'y. <sup>7</sup>Nunu nde' nu ni wancyiid cheel ub yu ru. Nomaas nu nii zi'l ru nu gyac moz niy. Orze' gyac yu nay. <sup>8</sup>Gun ni' yu ze' ricy yu de coz nu rnii de yu nu gya zir zu par ub yu, nay. Nunu ni' yu' ga' soldad nu gash zir zu par ub yu, nay. Na ornu niy lo tub yu nu chay, orze' chay. Na ornu rbedz yu tuuba'y nu chay loy, orze' rzay. Na ornu rniiy lo moz niy nu gyicy yu tub riiñ niy, orze' ricy yuñ —na amig ni yu nu riib ic ze'.

<sup>9</sup>Na ornu güeñ Jesuuuz de riidz ze', tonal la za nu ic mi. Orze' bish cyam bgüiim lo de mbecy nu za ca ich mi. Orze' nam rab mi dey:

—Ya rishli rnëe lo der nu lat de mbecy Israeel nigul gyapa ni tub la mbecy nu ricy cup consuel lo gal nu na consuel nu ricy cup yu ii —nam.

<sup>10</sup>Orze' de amig ze' niy bish cyay yay. Na ornu bri dey na, orze' bi byac moz ni yu nu riib ic tub gaynal soldad ze'.

**Jesuuuz bicy mi nu byabañ i'ñ tub byud**

<sup>11</sup>Na ornu bded de nu nde' na, orze' Jesuuuz zam tub gyedz nu la Naíñ. Orze' de yu nu rsya' lom, gal nu zigy de mbecy za nu dey mi. <sup>12</sup>Na cuanzir nu brim ru' gyedz na, orze' bzaac mi nu yad de mbecy nu yad cach dey añ. Añ ze', yu ze' tub zi lay zuy ni ñaay. Nunu ñaay, mi ze' tub byud. Orze' zigy mbecy gyedz ze' yad nu dey añ ze'. <sup>13</sup>Na ornu Shuaan na bzaac mi, orze' gushni lagy mim. Orze' nam rab mim:

—Cue' gun ru —nam.

<sup>14</sup>Orze' becha'm lo gyiñ ni añ ze'. Orze' gul yaam ñii. Orze' de mbecy nu za nu gyiñ ze' guchu' ri la dey. Orze' na Jesuuuz rab mi añ ze':

—Yu feñ, ya rnëe du ru: "¡Wes su!" —nam.

<sup>15</sup>Orze' mbecy nu gut ze' gusub yu nañ gyiñ ze'.

Orze' brugyi' rniiy. Orze' Jesuuuz byabic mi yu ni ñaay.

<sup>16</sup>Orze' dela mbecy nu bzaac de nde' tonal la gudzib dey. Orze' brugyi' nu ryabic dey gyel mbecy ni Ñgyoozh. Orze' na dey:

—Bi bruu zac tub yu lily nu rnii por cuen ni Ñgyoozh lat de ub na —na dey.

Orze' rnii ga' dey:

—Ñgyoozh yad mi nu locyuub mi de mbecy nim —na dey.

<sup>17</sup>Orze' brush las de coz nu bicy Jesuuuz par dutuub la lo de yu ni Judea gal nu de lugaar nu yu' gaab ga.

**Waa nu driib nis mbecy rzuu nez yu mbecy nu cha nuy rasooj lo Jesuuuz**

<sup>18</sup>Orze' mnii de yu nu rsya' lo Waa nu driib nis mbecy dela coz nu ricy Jesuuuz. Orze' bredz yu cyup de yu ze'.

<sup>19</sup>Orze' bzuu nez yu de yu ze' nu cha tugiñ dey lo Shuaan na Jesuuuz ben a laab mi biñ nu ca lo cuen nu cyid, o ti cuez dey nu cyid reña'm. <sup>20</sup>Orze' de yu ze' za dey lo Jesuuuz. Na ornu bru'ña dey na, orze' na dey rab yum:

—Waa nu driib nis mbecy bzuu nez yu dë ya nu yap tugiñ lor ben a laab ru biñ nu ca lo cuen nu cyid, o ti lez dë nu cyid reña'm —na dey.

<sup>21</sup>Orze' laab or la ze' bicy yac mi zigy mbecy rat. Ricy yac mi mbecy nu rzac zi nu nac güii. Nunu ii rboochum nuras nu bicy ni mbecy. Nunu ricy mi nu zigy lo ca' rzac yu. <sup>22</sup>Gaze' nu lueg la mniim lo cyup yu nu bzuu nez Waa ze'. Orze' nam:

—Yaa nii der lo Waa dela coz nu bzaac der, gal nu dela coz nu güeñ der. Nii der nu de lo ca' bi rzac dey. Ze' de mbecy coj rac rza nap la dey. Ze' de mbecy rat nu ta' gyedz nu la lepra bi byac dey. Ze' de mbecy go' bi reñ dey. Nunu de mbecy nu bi gut byabañ dey. Nunu dunii de riidz nu sac ni Ñgyoozh lo de mbecy zi.

<sup>23</sup>Dzi ni mbecy nu wayeca nu ricy cup consuel lo —nam.

<sup>24</sup> Na ornu bi ya de yu ze' na, orze' Jesuuz bzat mi Waa lo de mbecy zigy. Orze' nam:

—Ornu gua der gua güiir Waa tub lugaar ub zi, <sup>25</sup> ¿la nay guzii der? ¿O ti guzii der nu nac yu mbecy nu ricy cyup ic, gal nu na tub yagyi nu rguul bi par re par ii la guzii der? <sup>26</sup> Ze' benu walab, orze' <sup>27</sup> ¿la na tub mbecy gua güiir der? <sup>28</sup> A gua güiir der tub mbecy nu zu negy cyit na? Walab, gun rad lagy der nu yu nu zu negy cyit na, nunu zu baay, yu ze' rcyiñ yu yu' rey. <sup>29</sup> ¿Orze' la gaal na tub mbecy nu gua güiir der? <sup>30</sup> A gua güiir der tub yu nu rnii por cuen ni Ñgyooozh? Laab, como ya rneq lo der nu gua güiir der tub mbecy nu zily zir nac gaze' de yu nu mnii por cuen ni Ñgyooozh. <sup>31</sup> Gun laab Waa rzt riidz ni Ñgyooozh ze' nu rniiñ:

Ñgyooozh nam rab mi biñ nu ca lo cuen nu cyid: Ya zuu neq yu nu nii por cuen neq nu cha gay lor, gun orze' zu lily yu nez nu char, nam.

Ni rnii riidz ni Ñgyooozh. <sup>32</sup> Gun ya rishli rneq lo der nu ni tub la mbecy a' zily zir nac yu gaze' Waa par lo Ñgyooozh. Tees yu nu gash zir zu lat de yu nu gyub ic Ñgyooozh, yu ze' gya zir zuy par Waa —nam.

<sup>33</sup> Orze' dela mbecy mas mbecy nu rboo tiñ por cuen ni gubier Rom, ornu güeñ dey de riidz nu mnii Jesuuz, orze' mnii dey nu mod nu rlagy Ñgyooozh, nde' mod nu laab ñi. Gun anzir Waa briic yu nu zu nis dey. <sup>34</sup> Tees de mbecy Fariseo, gal nu de yu nu rlyuu leey ni Ñgyooozh, wangalagy dey nu ndriib nis Waa dey, ca nu bzu chu dey mod nu rlagy Ñgyooozh nu gyicy num dey.

<sup>35</sup> Orze' na ga' Jesuuz:

—¿La ñuu tub coz nu saapa de mbecy nu yu' tiem na? <sup>36</sup> ¿La ñuu na dey? <sup>37</sup> Na dey gal nu na yu nguzh nu nguaa rgyit lat yagyi'. Orze' ye la rbish ti dey nguaay. Orze' na dey rab yu losa'y: "Blaq dë di gyel cyit nu bdzi. Tees wangulgyi' der. Na ornu bdulru' dë tub di nu shni za, ni wanguun der", na dey. <sup>38</sup> Gun de mbecy nu yu' na wangalagy dey ni tub la mod. Gun Waa biid yu wangow nap yu. Nunu wango'y ñup. Orze' de ru rnii der nu tub nuras b icy ni yu. <sup>39</sup> Ze' ornu ya, biñ nu byac mbecy bri, orze' ya rdaw la zi'l coz, nunu rdo' la zi'l ñup. Orze' rnii der nu nacä mbecy row shaad, nunu nacä mbecy ro' ñup, nunu nacä amig ni de mbecy bdune', nunu nacä amig ni de yu nu rboo tiñ por cuen ni gubier Rom. <sup>40</sup> Ni tub la mod wangyet lagy der. Tees rabee nu de mod nu psa' lagy Ñgyooozh, nde' mod nap, nu nac nu gruu nap ñi —nam.

### Jesuuz zam yu' tub mbecy fariseo nu la Simoo

<sup>41</sup> Orze' tub mbecy fariseo bredz yu Jesuuz nu cha tom gyit yu'y. Orze' guam yu'y. Na ornu bi zub mi lo mez na, <sup>42</sup> orze' bru'ña tub biñ mñaa lom. Orze' mi ze' tub biñ nu rcyiñ gyedz ze', nunu nac mi mbecy a' nap. Orze' gud lagy mi nu Jesuuz za tom gyit yu' mbecy fariseo ze'. Orze' bru'ña num tub bas nu byaa nu gyita' nu la alabastro. Ze' nañ bas ze' dza laa nu yu' nis zguul. <sup>43</sup> Orze' gusub tiily mi yeñ gyi' Jesuuz. Ruun mi. Gaze' nu rcoom nis urlom gyi' Jesuuz. Orze' gaze' nu rcuiigy mi ñii nu gyich ic mi. Lat ze' pca ru' biñ mñaa ze' gyi'm. Orze' pcoo ga'm asecy zguul ze' gyi' Jesuuz.

<sup>44</sup> Na ornu mbecy fariseo, yu nu bredz Jesuuz nu guam yu' ze', bzaac yu de coz nu b icy biñ mñaa ze', orze' nay nañ lardooy: "Benu rishli gaal mbecy ii nac yu tub yu nu rnii por cuen ni Ñgyooozh, orze' gad lagy yu la na biñ mñaa nu gul mi yu. Mi re tub biñ mñaa a' nap", rnii tooy. <sup>45</sup> Orze' na Jesuuz rab mi mbecy fariseo ze':

—Simoo, ya rlagya neq tub coz lor —nam.

Orze' na mbecy fariseo ze' rab yu Jesuuz:

—Mnii lo, masht —nam.

<sup>46</sup> Orze' na Jesuuz:

—Cyup mbecy zaab yu tiñ ni tub mbecy nu rbic tiñ nu rboo losa'. Tub yu zaab yu gaay gaynal tiñ plat. Ze' tuuba'y zaab yu cyaal gaynal tiñ plat. <sup>47</sup> Orze' como rup laa dey wangac gyabic yu tiñ ze', orze' yu nu rbic tiñ ze' b icy sulagy yu diñ rup laa dey. Na mnii lo Simoo: ¿ca na de yu ze' rca zir dey yu nu rbic tiñ ze'? —nam.

<sup>48</sup> Orze' na Simoo:

—Ya rzeq nu mbecy nu coz ily zir b icy sulagy yu ni ze', yu ze' rca zir yu yu nu briic tiñ ze' co dey —nam.

Orze' na Jesuuz rab mi yu:

—Laab ni gal nu mniir —nam.

<sup>49</sup> Orze' lat nu rgüiim lo biñ mñaa ze', orze' na Jesuuz rab mi Simoo:

—¿A rzac ru biñ ii? Ya, ornu gu' nañ yu'r, orze' wan-cuic ru nis nu dibä gyi'. Ze' biñ mñaa ii bdiib mi gyi' nu nis urlom, nunu pcuiigy mi ñii nu gyich toom. <sup>50</sup> Ru ni wanca ru'r ya, tees biñ mñaa ii nese nu gu'm nañ yu' ii wan-checam nu rca ru'm gyi' —nam—.

<sup>51</sup> Ni wancoor asecy toq, tees mi ii pcoom asecy zguul gyi'. <sup>52</sup> Nde' nu ya rneq lor nu Ñgyooozh gyicy sulagy mi dela cyi zañ nu b icy mi, gun tona' la rcam ya. Tees benu Ñgyooozh gyicy sulagy mi de cyi ñuu zi ni tub mbecy, orze' yu ze' beñ zi rcay ya —nam.

<sup>53</sup> Orze' nam rab mi biñ mñaa ze':

—Ñgyooozh bi b icy sulagy mi de cyir —nam.

<sup>54</sup> Orze' de yu nu nguaa num lo mez brugyi' nu ro dey riidz nu losa'y. Orze' na dey:

—¿Cyu mbecy yu ii? Mas gashtal cyi mbecy ricy sulagy yu —na dey.

<sup>55</sup> Orze' nam rab mi biñ mñaa ze':

—Ru bruu mbañ ru nu nac nu b icy cup ru consuel lo. Na yaa nu dub gusht la —nam.

### De biñ mñaa nu rlocyuub Jesuuz

<sup>56</sup> Na ornu bded de nu nde' na, orze' Jesuuz gusam de gyedz, gal nu de ranch. Orze' pshaal mi de riidz nu sac ni gyel gubier ni Ñgyooozh. Nunu de trocyup de aposht gusa nu dey mi. <sup>57</sup> Nunu ni' la be de biñ mñaa gusa num mi. Lat ze' ri Li nu bruu tub gyedz nu la Magadán. Jesuuz bloo chum gag y nuras lo mi ze'.

<sup>58</sup> Nunu ni' zi'l ri Wan, mñaa Cuza. Cuza yu ze' yu nu riib ic asunt ni Herodes. Nunu ri ga' Susan lat ze', gal nu zañ zir biñ mñaa. Orze' de biñ mñaa ze' rlocyuub dem Jesuuz, gal nu de yu nu rsya' lom. Rlocyuub dem Jesuuz nu nac de coz nu rad ni dem.

### Riidz tiily ni de mbigy

<sup>4</sup>Tona' la zañ mbecy bruu dey ledz yu za dey lo Jesuuz. Orze' tona' la mbecy zigy byatublaazh dey lom. Orze' brugyi' rniim nu riidz tiily. Orze' nam:

<sup>5</sup>—Tub mbecy bruuuy zay za nuuz yu mbigy. Lat nu rtich yu de mbigy ze', yu'ñ bet lag ñi ru' gyernez. Orze' mbecy bded yu bzuub gyi'y tooñ. Nunu bru'ña chigiyñ bdow ma ñii. <sup>6</sup>Ze' yu' ga'ñ bet lag ñi lo yu las ru' nu ri gyita' par nañ. Orze' ornu briib ñi na, orze' guwach ñi, gun a' lyup lo yu. <sup>7</sup>Ze' yu' ga'ñ bet lag ñi lat gyech. Orze' gyech tublaazh la guuly ñi nu de ya mni ze'. Orze' pcyig ñi de ya mni ze'. <sup>8</sup>Ze' yu' ga'ñ bet lag ñi lo yu nap. Briib ñi nunu guuly ñi. Orze' tona' la cosech nap briic ñi. Gashtal tub gaynal mbigy briic tub ga mbigy nu bdunuuz —nam.

Orze' na ga'm:

—Mbecy nu Zub gyidag rlagy ñi gyicy yu nu gyet lag yu cuen! —nam.

### La gyi' rniim nu riidz tiily

<sup>9</sup>Orze' de yu nu rsya' lom bbugyi' dey lom lac yaruu de riidz tiily ze'. <sup>10</sup>Gaze' nu nam rab mi dey:

—Ñgyoozh briic mi nu gad lagy de ru de coz ni gyel gubier nim, de coz nu wagad lagy mbecy gulas. Ze' de' zir mbecy ya shaalq lo dey nu riidz tiily. Gun orze' mas zac dey, tees wayu' loy, nunu mas gyeñ dey, tees wayet lag dey cuen —nam.

### Jesuuz rniim lac yaruu de riidz tiily ze'

<sup>11</sup>Orze' nam:

—Orze' na ya ñeq lo der lac yaruu de riidz tiily ze'. Orze' de mbigy ze' nañ gal na riidz ni Ñgyoozh. <sup>12</sup>Orze' de mbigy nu bet lag ru' gyernez, nde' nañ gal nu na mbecy nu reñ de riidz ni gyel gubier ni Ñgyoozh. Rnii mbecy riidz ze' lo dey, tees orze' dru'ña nuras rbooy de riidz ze' nañ lardooy dey, gun orze' cue' nu cheña lagy dey niñ. Orze' cue' nu gruu mbañ dey. <sup>13</sup>Ze' mbigy nu bet lag lo yu las ru' nu ri gyita' par nañ, nde' nañ gal nu na de mbecy nu reñ de riidz ze'. Orze' lugue la "O" rniiy nunu yet lagy yu. Tees a' fert yu par nu wacshet riidz ze' sheñ lyuñ nañ lardooy. Orze' la be zi'l dzi ragyeey. Tees ornu shuub dzi nu gac preb dey, orze' wagyeey dey. <sup>14</sup>Ze' de mbigy nu bet lag lat de ya gyech ze', nde' nañ gal nu na mbecy nu rzuub gyidag de riidz ze'. Tees como mbecy ze' dzi zuy shcab ni de coz ni gyishlombecy, nunu como rlag yu gyicy yu gusht niy, orze' de nde' rsoow ñi lo de riidz ze'. Orze' nde' nu wacuic riidz ze' cosech nañ lardooy mbecy ze'. <sup>15</sup>Ze' de mbigy nu bet lag lo yu nap ze', nde' mbecy nu rzuub gyidag de riidz ze' nu lardooy. Orze' b icy yac dey niñ. Orze' briic ñi cosech nap nañ lardooy dey —nam.

### Riidz tiily ni candiil

<sup>16</sup>Orze' na ga' Jesuuz:

—Ni tub la mbecy wacaa dey gyi tub candiil nu riijy ñi nañ tub la coz, o nañ tub nuun, sinu zuub dey ñi se'ñ,

gun orze' cuic ñi yaa lo de yu nu chu' nañ yu'. <sup>17</sup>Ni' zi' rac nu de riidz nu bruu lo Ñgyoozh. Gun dela de riidz ngach nim gyicy mi nu gad lagy de mbecy, nunu dela de riidz nu wagad lagy dey, shaal mi ñii lo dey.

<sup>18</sup>'Orze' nap bzuub gyidag der, gun yu nu ricy cup sheñ, sheñ zir gad niy. Ze' yu nu sac ni, gashtal coz miñ nu rnii tooy nu gyicy cup yu gruuñ niy —nam.

### Bru'ña de famil ni Jesuuz

<sup>19</sup>Orze' bru'ña ñaam, nu de b icy mi. Tees wangac ñgyecha' dey lo Jesuuz, gun dzi yu' mbecy lom. <sup>20</sup>Orze' tub mbecy byooy rishlo Jesuuz. Orze' nay rab yum:

—Ñaar nu de b icy ru yu' dey gashtal ich yu' re, nunu rlagy dey zac yu ru —nay.

<sup>21</sup>Orze' na Jesuuz rab mi yu nu byoo rishlom ze':

—Yu nu reñ de riidz ni Ñgyoozh nunu "O" rniiy nu rzuub gyidag yuñ, orze' de yu ze' nac dey b icya nu ñaq —nam.

### Jesuuz mniim lo gyey bi nu gariñ

<sup>22</sup>Tub dzi Jesuuz gu'm nañ tub barc nu de yu nu rsya' lom. Orze' nam rab mi dey:

—Yaa der chan gal naa tub la' ga'uzu ru' nisyudoo —nam.

Orze' gu' dey nañ barc ze' za dey. <sup>23</sup>Na lat nu za dey na, orze' Jesuuz gugyt mi nas mi. Orze' sij la bru'ña tub gyey bi ily. Orze' brugyi' nu rzu'nis nañ barc ze'. Orze' byarishdzidz nañ barc ze'. <sup>24</sup>Gaze' nu gua cueen dey mi. Orze' na dey rab yum:

—Masht, masht, bi rnit lo den lo nis! —na dey.

Gaze' nu weshtem. Gaze' nu b icy mi mandaar lo bi, nu lo de nguuly lo nis. Orze' guri bi. Nunu se ri zu la byac. <sup>25</sup>Gaze' nu nam rab mi de yu nu rsya' lom:

—¿La bzaac der? ¿Lagu wagycy cup der consuel lo? —nam.

Orze' tona' la za nu ic dey nunu gudzib dey. Orze' na dey rab yu losa'y:

—¿Ze' cyu mbecy nac mi ii? Mi ii ricy mi mandaar mas gashtal lo bi nu lo nisyudoo, nunu rzuub gyidag ñi nim —na dey.

### Jesuuz ricy yac mi tub mbecy nu b icy ni nuras

<sup>26</sup>Orze' bri dem tub la' ga' ru' nisyudoo, tub lugaar nu la Gerasa nu ri par lo Galilea. <sup>27</sup>Na laab bruu la Jesuuz nañ barc na, orze' bruu za la tub mbecy yad yu. Bruuy par lat gyedz. Yu ze' tub mbecy nu b icy ni nuras. Orze' becha'y lo Jesuuz. Nunu dzi bi rac tiem nu wacsuy shab yu. Nunu walab nañ yu' rcyiñ yu, sinu lat de blyuu nu rcach dey añ rcyiñ yu. <sup>28</sup>Na ornu bzaac yu Jesuuz, orze' gusu tib yu lom. Orze' dub ru' la nuras ze' rbish tiy. Gaze' nu nay rab yu Jesuuz:

—¿La ryub ru yad ru lo Jesuuz, i'ñ Ñgyoozh, biñ nu zi'ly zir nac? ¡Ya rnishbaq lor nu cue' shet zir ya! —nay.

<sup>29</sup>Ni mniiy, gun Jesuuz mniim lo nuras ze' nu gruchuy lo mbecy ze'. Yad nu tona' la guzañ ña'n nu ni ricy nuy mbecy ze'. Nunu de mbecy rcyig dey gyi'y nu yaay nu caden. Tees rshi'ñ rshi'ñ lay caden. Orze'

nuras ze' ricy yu nu rza mbecy ze' lugaar ub zi. <sup>30</sup> Orze' na Jesuuz rab mi nuras ze':

—¿La lar? —nam.

Gaze' nu nay rab yum:

—Yā lā bee miily —nay.

Ni mniiy gun dzi zigy yu b icy niy mbecy ze'. <sup>31</sup> Orze' de nuras ze' mnishbaa dey lom nu cue' zeed mi dey ze' nu cow. <sup>32</sup> Gun lugaar ze' rded row tub nac cuch zigy. Orze' nuras ze' mnishbaa dey lo Jesuuz nu cuic mi rish-beey nu chu' dey nañ de cuch ze'. Orze' gaze' nu briic mi rishbeey ni dey nu chu' dey nañ de cuch ze'.

<sup>33</sup> Gaze' nu bruu chu dey lo mbecy ze'. Orze' gu' dey nañ de cuch ze'. Orze' de cuch ze' rzab la de ma bzu ti-ily ma par gyoow. Orze' bet lag de ma lo nisyudoo. Orze' gut de ma lo nis.

<sup>34</sup> Orze' de yu nu rña de cuch ze' gush dey carer ya niyy de coz nu guc lo de mbecy nu yu' lat gyedz, gal nu lo de mbecy nu yu' ngush. <sup>35</sup> Gaze' nu bruu dey yad güiyy de coz nu guc. Na ornu bru'ña dey ze' nu Zub Je-suuz na, orze' bzaac dey mbecy nu b icy ni nuras ze' Zub yu yeñ gyi'm. Zuy shab yu, nunu byanap la shcab niy. Orze' tona' la gudzib dey. <sup>36</sup> Orze' dela de mbecy nu bzaac coz nu guc ze' mniy dey lo de mbecy zigy ze' lac mod byac mbecy nu b icy ni nuras ze'. <sup>37</sup> Orze' dela de mbecy nu yu' lo yu ni Gerasa brugyi' rnishbaa dey lo Jesuuz nu ruum ledz dey, gun tona' la rdzib dey lom. Orze' Jesuuz gu'm nañ barc zam. <sup>38</sup> Orze' yu nu b icy ni nuras ze' mnishbaay lom nu cha num yu. Orze' Jesuuz nam rab mi yu:

<sup>39</sup> —Yaa lo de famil nir. Orze' gyoor rishlo dey de coz nu b icy Ñgyoozh num ru —nam.

Orze' mbecy ze' gush nez yu yay. Byooy rishlo dela mbecy nu yu' gyedz ze' de coz nu b icy Ñgyoozh num yu.

### I'ñ Jairo nu biñ mñaa nu gul shab Jesuuz

<sup>40</sup> Na ornu Jesuuz bru'ñam tub la' ga' ru' nisyudoo na, orze' de mbecy zigy nu yu' ze' tona' la bet lagy dey ornu bru'ñam lo dey. Gun dela dey yu' dey rbez yum.

<sup>41</sup> Orze' bru'ña tub mbecy nu la Jairo. Yu ze' riib ic yu nañ yu' nu rsya' mbecy riidz ni Ñgyoozh. Orze' gugiytiili yu yeñ gyi' Jesuuz. Gaze' nu mnishbaay lom nu cham yu'y. <sup>42</sup> Gun zu tub zi la i'ñ yu, tub fiñ mñaa ña'n trocyup. Orze' fiñ ze' rat ñi. Se nu gat zi'l lañ. Orze' rlagy yu nu gyicy yac mi ñii.

Orze' Jesuuz za num yu, nunu tona' la mbecy zigy za nu dey mi gal rcyi'ñ su la dey mi. <sup>43</sup> Orze' lat de mbecy ze' ri tub biñ mñaa nu bi bza' trocyup ña'n nu rshu reñ mi. Nunu mniit mi dela tiñ nim lo doctoor, tees ni tub la dey wangac ñgyicy yac dey mi. <sup>44</sup> Orze' biñ mñaa ze' becha'm par ich Jesuuz. Orze' gul yaam ru' shab mi. Orze' laab or la ze' guca reñ ze'. <sup>45</sup> Orze' Jesuuz nam:

—¿Cyu gul yaa yā? —nam.

Orze' dela mbecy mniy dey nu walab dey gul yaay mi. Orze' na Bed rab yum:

—Masht, de mbecy dub yub la rcyi'ñ su dey ru —nam.

<sup>46</sup> Tees Jesuuz bzu fert mi. Orze' nam:

—Ca zi na mbecy gul yaa yā. Gun gud lagya, nu nac nu bruu fers né —nam.

<sup>47</sup> Orze' ornu gud lagy biñ mñaa ze' nu waca' cach lom lo Jesuuz, orze' za laam gusu tib mi lom. Nunu rash la bis mi. Orze' mniim lo de mbecy zigy ze' la gyi' nu gul yaam shab Jesuuz. Nunu mniy ga'm nu byac mi laab or la ze'. <sup>48</sup> Gaze' nu na Jesuuz rab mi biñ mñaa ze':

—Biñ mñaa, ru byac ru gun b icy cup ru consuel lo. Orze' dub gusht la yaa —nam.

<sup>49</sup> Lat nu gabee rnii ru' Jesuuz nu biñ mñaa ze', orze' bru'ña tub mbecy nu biid nu rasqo, yu nu bruu gashtal yu' Jairo, yu nu riib ic ze'. Orze' nay rab yu Jairo:

—I'ñ ru bi guut ñi. Orze' cue' ga' gyicy seed zir ru masht —nay.

<sup>50</sup> Tees Jesuuz güeñ mi nu ni mniy lo Jairo. Orze' nam rab mi Jairo:

—Cue' dzib ru. B icy cup zi'l consuel lo. Orze' i'ñ ru gyac ñi —nam.

<sup>51</sup> Na ornu bru'ñam yu' Jairo na, orze' wansaana'm nu chu' zir mbecy nañ yu' ze' nu mbish fiñ nguzh ze'. Nomaas gu' num Bed nu Santiag, nu Waa, gal nu uz fiñ nguzh ze' gal nu ñaañ. <sup>52</sup> Orze' dela mbecy nu nguaa ze' ricy shni dey, nunu ruun dey nu nac fiñ nguzh ze'. Orze' nam rab mi dey:

—Cue' gun der. Fiñ nguzh ii nu nas zi'l ñi. Walab nu guut ñi —nam.

<sup>53</sup> Orze' brugyi' nu rigy nu ñaañ dey mi, gun gud lagy dey nu gut fiñ nguzh ze'. <sup>54</sup> Orze' bdu' yaam yaañ. Gaze' nu ye la mniim. Orze' nam rab mi ñii:

—;Fiñ nguzh, weshte! —nam.

<sup>55</sup> Orze' byabañ fiñ nguzh ze'. Orze' lueg la weshteñ. Orze' Jesuuz b icy mi mandaar nu cuic dey coz nu goñ.

<sup>56</sup> Orze' de mbel ni fiñ nguzh ze' za nu la ic dey. Tees Jesuuz bdu'm riiñ yaa dey nu cue' la nii dey lo ni tub la mbecy de coz nu guc ze'.

### Jesuuz bzuu nez mi de trocyup aposht nu cha shaal yu de riidz nu sac ni Ñgyoozh

<sup>9</sup> Orze' Jesuuz bredz mi trocyup de yu nu rsya' lom nu gyatublaazh dey lom. Orze' briic mi rishbeey nu co chu dey nuras, nunu gyicy yac dey mbecy rat. Nunu b icy mi nu cyiiñ dey nu gyicy dey ñi. <sup>2</sup> Orze' bzuu nez mi dey nu cha dey cha shaal yu de riidz ni gyel gibier ni Ñgyoozh, nunu par nu gyicy yac dey de mbecy rat. <sup>3</sup> Orze' nam rab mi dey:

—Cue' cha nu der ni tub la coz nu cyiiñ ni der par nez. Cue' cha nu der yangar. Cue' cha nu der moraal. Ni cue' cha nu der gyit. Ni cue' cha nu der tiñ. Shab nu zu zi'l der cha nur. Cue' cha nu der reña' shab ru. <sup>4</sup> Ca zi'l ze' nu chu' der nañ yu', orze' ze' cyiiñ der gashtal gruu la der lugaar ze'. <sup>5</sup> Ca zi'l ze' nu washet ic dey nu chu' der nañ yu', orze' ornu gruu der lugaar ze', orze' cyib der yu gyedz nu ta' gyid lab ru par nu gabe nu a' nap b icy dey —nam.

<sup>6</sup> Orze' gush nez dey zay de lugaar nu yu' gaab ga ze'. Pshaal dey riidz ni Ñgyoozh, nunu b icy yac dey de mbecy rat.

### Gut Waa nu driib nis mbecy

<sup>7</sup> Orze' rey Herodes güeñ yu coz nu gac nu nac Jesuuz. Orze' tona' la pcan shcab niy. Gun yu' mbecy nu rniiy nu Waa nu driib nis mbecy byabañ yu. <sup>8</sup> Ze' yu' ga'y rniiy nu yu ze' Elías, yu nu mnii por cuen ni Ñgyoozh. Ze' yu' ga' dey rniiy nu yu ze' ca zi na de yu nu mnii por cuen ni Ñgyoozh nu gu' gulas. Na byabañ yu, rnii dey. <sup>9</sup> Tees Herodes nay:

—Ganca laab ya bicya mandaar nu pcyug dey too Waa. ¿Ze' cyu mbecy nac yu ze' beni? Ya reñä nu rnii mbecy zañ coz nu ricy yu —nay.

Nde' nu Herodes byub yu zañ mod nu gac zac yu Je-suuz.

### Jesuuz bgoow mi gaay miily mbecy

<sup>10</sup> Na ornu bi bri de yu nu rsya' lom na, orze' mnii dey lom de coz nu b icy dey. Gaze' nu gua nu reñ mi dey tub gyedz nu la Betsaida. <sup>11</sup> Na ornu gud lagy de mbecy zigy na, orze' za ca dey ich mi. Orze' Jesuuz pcueez mi dey. Orze' mniim riidz ni gyel gubier ni Ñgyoozh lo dey. Nunu b icy yac mi zañ mbecy rat.

<sup>12</sup> Na ornu bi rdze na, orze' de trocyup de yu nu rsya' lom becha' dey lom. Orze' na dey rab yum:

—Bzuu nez de mbecy ii nu cha yub dey posad niy, nunu cha yub dey coz nu goy. Cha dey de gyedz gal nu de ranch nu yu' gaab ga ii, gun ii tub lugaar ub zi —na dey.

<sup>13</sup> Orze' na Jesuuz rab mi dey:

—Briic de ru coz nu gow dey —nam.

Orze' na dey rab yum:

—A' ricy cup d e sheñ. Nomaas ricy cup d e gaay zi gyishtily nu cyup bel. ¿A rlag yu nu ch a z i zir d e de coz nu gow dey? —na dey.

<sup>14</sup> Gun nac gaay miily de mbecy ze'. Orze' na ga' Jesuuz rab mi dey:

—Mnii der lo de mbecy nu gzub dey bee cyaal gaynal ga dey tub ga se' —nam.

<sup>15</sup> Orze' ni b icy dey. Orze' de mbecy gacua dey.

<sup>16</sup> Orze' bdu' yaam gaay gyishtily ze' nu cyup bel ze'. Orze' bgüiim par baa nunu briic mi gras ni Ñgyoozh nu nac ñii. Gaze' nu blew mi ñii. Nunu briica'm ñii ni de yu nu rsya' lom nu cyez dey ni de mbecy zigy. <sup>17</sup> Orze' dela mbecy bdow gyel la dey. Nunu ii pte' dey trocyup ru' chicyiw de coz nguzh nu brusub ze'.

### Bed mniy nu Jesuuz nac mi Mesías

<sup>18</sup> Tub dzi bzub Jesuuz ub zi lam mnii num Ñgyoozh. Nomaas de yu nu rsya' lom yu' nu dey mi. Orze' nam rab mi dey:

—¿Cyu rnii mbecy nu nac ya? —nam.

<sup>19</sup> Orze' na dey:

—Yu' mbecy nu rniiy nu ru Waa nu driib nis mbecy. Ze' yu' ga' dey rniiy nu ru Elías. Ze' yu' ga' dey rniiy nu ru tub yu nu mnii por cuen ni Ñgyoozh gulas. Ze' na byabañ yu, rnii dey —nay.

<sup>20</sup> Orze' nam rab mi dey:

—Ze' de ru, ¿cyu rnii der nu nac a? —nam.

Orze' na Bed rab yum:

—Ru nac ru Mesías, biñ nu bzuu nez Ñgyoozh nu cyid —nay.

### Jesuuz mniim lo de yu nu rsya' lom nu gat mi

<sup>21</sup> Tees Jesuuz tona' la nap bdu'm riiñ yaa dey nu cue' nii dey de riidz ze' lo ni tub la mbecy. <sup>22</sup> Gaze' nu nam rab mi dey:

—Ya, biñ nu byac mbecy, rlag y ni nu zac z i zañ lo coz deet. Nunu de yu bel ni de mbecy Israeel, nu de uz Zub lo, nu de yu nu rlyuu leey ni Ñgyoozh gne' dey ya. Orze' cut mbecy ya. Orze' dzi chon, orze' gyabaña —nam rab mi de yu nu rsya' lom.

<sup>23</sup> Orze' na Jesuuz rab mi dela mbecy:

—Benu ca na mbecy rlag yu nu gac yu mbecy nu rsya' lo, orze' rlag y ni nu cue' gyicy cuen yu coz nu rlag y ub yu. Nunu rlag y ni nu shet ic yu nu zac ziy de dzi la nu nac ya. Orze' rlag y ni nu gyicy yu gal nu rlag y. <sup>24</sup> Gun yu nu rlag y co nap ub, yu ze' gnit loy. Tees yu nu nit lo nu nac ya, yu ze' yu nu rishli gruu mbaña. <sup>25</sup> ¿Gun la rusub ni mbecy, benu gyicy yu gan dela coz ni gyishlombecy, ze' ub yu gnit loy? <sup>26</sup> Tees cyu zi'l mbecy nu gat lo nu nac ya, nunu gat loo ga'y nu nac de riidz nu rn e lo dey, orze' ni' ya, biñ nu byac mbecy, gat lo nu nac de yu ze', ornu shuub dzi nu yapa nu gyel lily ne, gal nu gyel lily ni Ñgyoozh uza, gal nu gyel lily ni de anc yon. <sup>27</sup> Gun ya rishli rn e lo der nu la be de mbecy nu yu' lat der ii na wat dey gashtal zac la dey gyel lily ni Ñgyoozh —nam.

### Bdza nu na Jesuuz

<sup>28</sup> Na ornu bded shuñ dzi na, orze' Jesuuz gua nu reñ mi Bed, nu Santiag, nu Waa. Orze' gup mi num dey too tub b icy nu nii num Ñgyoozh. <sup>29</sup> Na lat nu rnii num Ñgyoozh na, orze' bdza nu na lom. Nunu shab mi byacaacy ni. Ryal lañ tanta' nu caacy ni. <sup>30</sup> Orze' sij la bruu zac cyup mbecy bee nu dey mi riidz. De yu ze' Moisees gal nu Elías. <sup>31</sup> Nunu bzu yaa lo dela dey. Orze' bee nu dey Jesuuz riidz nu lac mod gat mi Jerusaleeng. <sup>32</sup> Orze' lat ze' Bed nu de' zir de losa'y gush pcaa dey. Tees orze' briish dey yaa. Nunu bzaac dey gyel lily ni Jesuuz gal nu cyup de yu nu yu' num ze'. <sup>33</sup> Ornu bruu chu cyup de yu ze' lo Jesuuz, orze' Bed nay rab yum:

—¡Masht, dzi ga nap nu yu' de ii! Na zaq d e chon ramad ni der: tub par ru, tuuba' par Moisees, nu tuuba' par Elías —nay.

Gun Bed wangad lagy yu la coz niiy. <sup>34</sup> Na lat nu rniiy na, orze' bruu zac tub za. Orze' psoow ni dey. Orze' tona' la gudzib dey ornu psoow za ze' dey. <sup>35</sup> Orze' lat za ze' zaab ti' mbecy nu rnii. Orze' nam:

—Mi ii i'ñä nu bzu ch y. Bzuub gyidag der nim —nam.

<sup>36</sup> Na ornu bi bded nu güeñ dey nu mnii mbecy ze' na, orze' bzaac dey Jesuuz ub zi lam zum. Orze' guchu' ri la dey. Orze' wanii la dey lo ni tub la mbecy de coz nu bzaac dey.

### Jesuuz b icy yac mi tub yu nguzh nu b icy ni nuras

<sup>37</sup> Na or bza' yu tuuba' dzi na, orze' bruum par too bi cy, bet mi par gyi'. Orze' bruu zac zigy mbecy nu gua cheel dey mi. <sup>38</sup> Orze' lat de mbecy zigy ze' ri tub mbe cy. Orze' ye la rbish tiy. Orze' nay:

—Masht, gyicy ru tub faboor nur ya nu güiir i'ñq, gun tub zi yu ii ne zuy. <sup>39</sup> Gun nuras rgu' yaay yu, nunu ricy yu nu rbish tiy. Nunu ii ricy yu nu ricy ni bi niy. Nunu driib bdziñ ru'y. Tona' la shiñ ricy nuy yu, nunu walagy yu nu ruu chuy loy ne. <sup>40</sup> Ya mnishbaq lo de yu nu rsya' lor nu co chu dey yu, tees wangac ni dey —nay.

<sup>41</sup> Orze' na Jesuuz rab mi dey:

—A der mbecy nu yu' na! !Dzi ga wagiyicy cup der consuel lo! !Dzi ga mnu shcab ni der! ?La' zir be tiem rlag y ni nu chesa du der? ?La' zir be tiem rlag y ni nu gagye lo der? —nam.

Gaze' nu nam rab mi uz yu nguzh ze':

—Da nu yu nguzh nir lo —nam.

<sup>42</sup> Na ornu yu nguzh ze' zay lo Jesuuz na, orze' nuras ze' mne'y yu nguzh ze' lo yu. Orze' b icy yu nu ricya'ñ bi niy. Tees Jesuuz bdza'm ni nuras ze'. Orze' b icy yac mi yu nguzh ze'. Orze' byabic mi yu ni uz yu. <sup>43</sup> Orze' dela mbecy tona' la za nu ic dey nu nac de coz ily nu ricy Ngoozh.

### Jesuuz rnii ga'm tuuba' tir nu cut mbecy mi

Lat nu yu' dey za nu ic yu nu nac de coz nu b icy mi, orze' nam rab mi de yu nu rsya' lom:

<sup>44</sup> —Bzuub gyidag der coz nu nee lo der, nunu cue' nit lag y der ni. Ya, biñ nu byac mbecy, gu' dey ya yaa de mbecy —nam.

<sup>45</sup> Tees de yu ze' wangyet lag dey cuen de coz nu mniim. Gun Ngoozh wansaan mi nu ñgyet lag dey cuen. Nunu gudzib dey nu ñgugyi' y lom lac yaruu de riidz ze'.

### Cyu gac mbecy nu gya zir zu

<sup>46</sup> Na de yu nu rsya' lom brugyi' nu ro zi dey riidz ben ca na dey gyac yu yu nu gya zir zu. <sup>47</sup> Na ornu gud lag y Jesuuz nu ni mnii dey na, orze' bdu' yaam tub yu nguzh bzum yu lat dey. <sup>48</sup> Orze' nam rab mi dey:

—Cyu zi'l yu nu shet ic nu gac tub mbecy nu na gal nu na yu nguzh ii nu nac ya, orze' ni' zi'l shet ic yu nu gac nuy ya. Nunu yu nu shet ic nu gac nu ya, walab ne ya zi'l shet ic yu nu gac nuy, sinu ni' zi'l shet ic yu nu gac nuy Ngoozh, biñ nu bzuu nez ya. Gun mbecy nu gash zir zu lat de ru, yu ze' yu nu ricy zir ni presis —nam.

### Yu nu wacha contr ni Jesuuz, yu ze' yu nu rza faboor nim

<sup>49</sup> Orze' na Waa rab yum:

—Masht, de ya bzaac de tub mbecy nu bloo chuy nuras nu nac rishbeey nu bruu lor, tees mne'e de nu cue' nu ni gyicy yu, gun wachesa nuy de ub na —nay.

<sup>50</sup> Orze' na Jesuuz rab mi yu:

—Cue' ca der niy, gun yu nu wacha contr nin, yu ze' yu nu rza faboor nin —nam.

### Jesuuz bdza'm ni Santiag nu Waa

<sup>51</sup> Na ornu bi rgaab nu shuub dzi nu chup Jesuuz gyibaa, orze' Jesuuz bi zuu lam ca na nu zum. Orze' gush nez mi zam par Jerusaleeng. <sup>52</sup> Orze' bzuu nez mi mbecy nu cha ga dey lom nu cha nu dey rasoo tub lugaar ni Samaria. Gun orze' gzu lily dey ornu grim. <sup>53</sup> Tees de mbecy Samaria wangalagy dey nu cuez mi lat dey, gun gud lag y dey nu par Jerusaleeng rsaap mi nu zam. <sup>54</sup> Na ornu bzaac Santiag nu Waa nu ni ricy dey na, orze' na dey:

—Shuaana, ?a walagy ru gyicy na mandaar nu gyet gyi nu gruuñ baa, gun orze' gnit loñ de yu ze'? —na dey.

<sup>55</sup> Orze' bish cya Jesuuz bdza'm ni dey. <sup>56</sup> Orze' lueg la za dey tuuba' gyedz.

### De mbecy nu ngulagy cha ca ich Jesuuz

<sup>57</sup> Na lat nu zaab za dem nez na, orze' na tub mbecy rab yum:

—Shuaana, ya rlagya cha du ru ca zi'l ze' nu char —nay.

<sup>58</sup> Orze' na ga' Jesuuz rab mi yu:

—De bez ricy cup ma blyuu ni ma. Ze' de chigiyñ ricy cup ma teez ma. Tees ya, biñ nu byac mbecy, a' ricy cu pa ni tub lugaar mi' par nu gabishq zu lagya —nam.

<sup>59</sup> Orze' Jesuuz nam rab mi tuuba'y:

—Da ca icha —nam.

Orze' yu ze' nay rab yum:

—Shuaana, ?a wazaan ru lezq gashtal gat uza? Orze' gaze' nu cha ca ich ru —nay.

<sup>60</sup> Orze' na Jesuuz rab mi yu:

—Bzaan nde' par de mbecy nu na gal nu na mbecy gut nu cach dey losa' gut yu. Ze' ru char cha shaal ru riidz ni gyel gubier ni Ngoozh —nam.

<sup>61</sup> Orze' tuuba'y nay rab yum:

—Shuaana, ya rlagya cha ca ich ru. Nomaas ?a waza an ru nu gya yu' gya nee du de famil ne Ngoozh? —nay.

<sup>62</sup> Orze' na Jesuuz rab mi yu:

—Yu nu bi driib yaa ich yaa arad, ze' despuees cush cyay güiyy par ich yu, orze' yu ze' wac chu'y ze' nu riib ic Ngoozh —nam.

### Jesuuz bzuu nez mi setent Zub cyup mbecy

**10** Na despuees ni de nu nde' na, orze' Shuaan na Jesuuz pcuim setent Zub cyup mbecy. Orze' bzuu nez mi dey nu cha ga dey lom cyup ga dey tub ga gyedz o tub ga lugaar, ze' nu rlag y ni nu cham. <sup>2</sup> Orze' nam rab mi dey:

—De mbecy nu yu' ii na na dey gal na tub cosech. Rishli cosech tona' la sheñ ni. Tees de mbecy nu gyicy riiñ loñ ñuu zi dey. Nde' nu bdiiñ der lo Ngoozh Shuaan cosech ze' nu gzeed zir mi de mbecy nu te' cosech ze'. <sup>3</sup> Orze' gua der. Na der gal nu na shily nu

zuu nezə nu cha lat lob. <sup>4</sup> Cue' cha nu der gyish gyit nir, nunu cue' cha nu der bay tiñ nir. Ni cue' cha nu reñ der gyid lab ru. Nu ca gyi' zi'l der cha nur. Nunu cue' chi glaa der nez nu nii nur losa'r ñgyoozh. <sup>5</sup> Na ornu chu' der nañ tub yu', orze' nii nur de mbecy ze' ñgyoozh. Orze' nii der: "Ñgyoozh zeed mi gyel ri zu lat der", niir. <sup>6</sup> Benu nañ yu' ze' rcyiiñ mbecy nu wagyet lagy gyel yuu, orze' gyu' niñ gal nu mnii der. Tees benu walab ni, orze' wayu' niñ gal nu mnii der. <sup>7</sup> Orze' laab yu' la ze' gri der. Orze' la zi'l coz nu yu' ni de mbecy nu yu' ze' gow der nunu go' der. Gun yu nu ricy riiñ yad ñi niy nu gyad iy. Nunu cue' gri der reñ reñ la yu'. <sup>8</sup> Na ornu gru'ña der tub gyedz ze' nu shet ic dey nu cyiiñ der na, orze' gow der la zi'l coz nu cuic dey. <sup>9</sup> Orze' gyicy yac der de mbecy rat nu yu' ze'. Orze' nii der lo dey: "Sñuu ga cyid gyel gubier ni Ñgyoozh lat der", nii der. <sup>10</sup> Ze' benu gru'ña der tub gyedz ze' nu washet ic dey nu cyiiñ ru, orze' cha der lat cay. Orze' nii der: <sup>11</sup> "¡Mas gashtal de yu gyedz nu yu' gyedz ni der nu ta' gyid lab dē dib dē ñii par nu gabe nu a' nap b icy der! Tees nap gad lagy der nu sñuu ga cyid gyel gubier ni Ñgyoozh lat der", niir. <sup>12</sup> Ya nee lo der nu ornu shuub dzi nu gri bee Ñgyoozh ni dela mbecy, dzi zir cashtig ily cuic mi ni de mbecy gyedz ze' gaze' ni de mbecy Sodoma.

### De gyedz nu wansuub gyidag ni Jesuuz

<sup>13</sup> '¡Cuua de ru mbecy gyedz Corazín! ¡Nunu cuua ga' de ru mbecy Betsaida! Gun benu ñgyicy ya nusuriidz lat de mbecy nu yu' gyedz Tiro nu lat de mbecy nu yu' gyedz Sidón gal nu b icya lat de ru, orze' bi gulas mne' dey de cyi nu ricy yu. Orze' nzu dey shab cuiñ yu, nunu ncoo dey di'ñ tooy par nu gabe nu ñgyac dey mbecy shni. <sup>14</sup> Tees ya rnëe lo der ornu shuub dzi nu gri bee Ñgyoozh ni de mbecy, cashtig ily zir cuic mi ni de ru gaze' ni de mbecy nu yu' gyedz Tiro nu Sidón. <sup>15</sup> Ze' de ru mbecy gyedz Capernaum, ¿a rlagy der chup der gal gyibaa? Tees gyet lag der gal ze' nu blaazha' zir gyi ni gabily.

<sup>16</sup> 'Yu nu rzuub gyidag ni de ru ni' zi'l rzuub gyidag yu ne ya. Nunu yu nu rzu chu de ru ni' zi'l rzu chuy ya. Nunu yu nu rzu chu ya, ni' zi'l rzu chuy Ñgyoozh, biñ nu bzuu nez ya —nam.

### Orze' bish cya de setent Zub cyup mbecy ze'

<sup>17</sup> Orze' setent Zub cyup mbecy ze' gua dey riiñ. Na ornu bish cya dey na, orze' tona' la bet lagy dey. Orze' na dey:

—¡Shuaan de, gashtal de nuras rzuub gyidag yu ni de ornu rnëe du de yu nu nac ru! —na dey.

<sup>18</sup> Orze' na Jesuuz:

—Tees ya bzaacä nuras nu nay gal nu na tub gyi ni guzii nu bruuy gyibaa bet lag yu. <sup>19</sup> Ya b icya nu de ru cyiiñ der nu zar too bily nu too gune, nunu se la la zac der. Nunu b icya nu gyicy der gan dela losa' uuur mas tona' la fert yu. Nunu se la la coz zac der. <sup>20</sup> Orze' cue' gyet lagy der nu nac nu rzuub gyidag de nuras ni der,

sinu bet zir lagy der gun bi ca nu la der lat de mbecy nu bi ya gyibaa —nam.

### Jesuuz yet lagy mi

<sup>21</sup> Laab or la ze' Jesuuz tona' la yet lagy mi nu nac Espiriit Yon ni Ñgyoozh. Orze' nam:

—Ñgyoozh uzä, biñ nu nac Shuaan gyibaa gal nu gyishlombecy, ya drica' gras nir gun ru b icy ru nu gad lagy de yu nu na gal nu na mdoo de coz nu pcach ru lo de yu nu yu' shcab ni, nu lo de yu nu yet lag cuen. Ni b icy ru gun nde' coz nu rlagy ru —nam rab mi Ñgyoozh.

<sup>22</sup> Orze' nam:

—Ñgyoozh uzä bdu'm riiñ ya nu gyub icä dela coz. Nunu ni tub la mbecy wad lagy yu cyu ya, i'ñ Ñgyoozh. Nomaas Ñgyoozh uzä, mi ze' rad lagy mi. Nunu ni' zi'l wagad lagy dey cyu nac Ñgyoozh, uzä. Nomaas ya i'ñ mi rad lagya. Nunu ni' zi'l de mbecy nu ricä nu gad lagy cyu nac mi, de yu ze' gad lagy dey cyu nac mi —nam.

<sup>23</sup> Orze' gaze' nu bish cyam lo de yu nu rsya' lom.

Orze' mnii gareñ lam lo dey. Orze' nam:

—Dzi ni de mbecy nu zac dela coz nu de ru rzac ru.

<sup>24</sup> Gun zigy de mbecy nu mnii por cuen ni Ñgyoozh, gal nu zigy de rey ngulagy dey nzac yu de coz nu de ru rzac ru, tees wansac dey. Nunu ngulagy dey ñgyeñ yu de coz nu reñ de ru, tees wangyeñ dey —nam.

### Riidz tiily ni mbecy nap nu guledz Samaria

<sup>25</sup> Orze' tub mbecy nu rlyuu leey ni Ñgyoozh gua niy lo Jesuuz ben a wad tub mod nu riib yu cyi ic mi. Orze' nay rab yum:

—Masht, ¿lac mod rlagy ñi gyicya par nu gad nu cui mbaña tub la? —nay.

<sup>26</sup> Orze' Jesuuz nam rab mi yu:

—¿La coz ca lo leey ni Moisees? ¿Lac mod yaruu leey ze' rziir? —nam.

<sup>27</sup> Orze' na mbecy ze' rab yum:

—Pca Shuaan ru, biñ nu nac Ñgyoozh nir, nu dutuub la lardoor nu dela gyel mbañ nir, nu dela fers nir, gal nu dela shcab nir. Nunu pca losa'r gal nu rcar ub ru —nay.

<sup>28</sup> Orze' na Jesuuz rab mi yu:

—Nap rnii ru. Benu ni gyicy ru, orze' gad nu cui mbañ ru —nam.

<sup>29</sup> Orze' mbecy ze', como rlagy yu gyicy yu nu gabe nu nap yu par lo Ñgyoozh, orze' nay rab yu Jesuuz:

—¿Cyu nac losa'? —nay.

<sup>30</sup> Orze' na Jesuuz rab mi yu:

—Bzu tub mbecy. Orze' bruuy gyedz Jericó yay par Jerusaleeng. Orze' nez nu yay bdzeel yu gubaan. Orze' de gubaan ze' bgo la dey tooy. Orze' bloo dey dela suuy. Dela shab yu, dela bloo dey. Gaze' nu bdi su dey yu. Orze' gaze' nu ya dey. Se nu gat zi'l yu bzeeñ de gubaan ze' ya dey. <sup>31</sup> Ze' yad nu laab zi'l nez ze' bded tub uz. Tees ornu bzaac yu mbecy nu mbish ze', orze' zet byach yu ze' nu mbish mbecy nu guud güi ze'.

Orze' yaa lay.<sup>32</sup> Orze' ni' zi'l bru'ña tub mbecy nez Leví lugaar ze'. Ni' yu ze' nac yu tub yu nu ricy riiñ nañ yu' nu driib zily mbecy Ñgyoozh. Na ornu bzaac yu mbecy nu mbish ze', orze' zeta' byach yu ze' nu mbish yu ze'. Orze' yaa ga' lay.<sup>33</sup> Tees ornu bded tub mbecy Samaria nez ze', orze' bzaac yu nu mbish mbecy ze'. Orze' gushni lagy yuy.<sup>34</sup> Orze' becha'y lo mbecy ze'. Gaze' nu b icy nuy mbecy ze' guñaa. Orze' briily yu asecy nu ñup ni urbyay ze' nu guud güii ni mbecy ze'. Gaze' nu ptiish yu negy ze' nu guud güii ni mbecy ze'. Orze' briib yu mbecy ze' ich bañcyug niy. Orze' ya nuy yu nañ tub yu', ze' nu rgyiiñ mbecy posad. Orze' laab yu bgüii yu.<sup>35</sup> Na tuuba' dzi na, orze' mbecy Samaria ze' blooy cyup tiñ briic yu ni shuaan yu' ze'. Orze' nay rab yuy: "Nap zi'l güiir mbecy ii. Nunu benu gyicy zir yu gasht, orze' ya rishq ornu cush cya", nay.<sup>36</sup> Ze' orze' na, ¿ca na lo chon de mbecy ze' b icy nuy yu nu guud güii ze' gal mod nu rlagy ñi nu gyicy mbecy nu losa'y?

—nam.

<sup>37</sup> Orze' na yu nu rlyuu leey ze' rab yu Jesuuz:  
—Yu nu gushni lagy mbecy nu guud güii ze' —nay.  
Orze' na Jesuuz rab mi yu:  
—Orze' gua nunu ni' zi'l gyicy ru —nam.

### Jesuuz guam yu' Mart nu Li

<sup>38</sup> Orze' ya Jesuuz. Gaze' nu bru'ñam tub gyedz. Gyedz ze' rcyiiñ tub fiñ mñaa nu la Mart. Orze' mniiñ lo Jesuuz nu chu'm nañ yu' niñ.<sup>39</sup> Ze' bily ñii lañ Li. Orze' gusub ñi yeñ gyi' Jesuuz par nu zuub gyidag ñi de riidz nu rlyuum.<sup>40</sup> Orze' Mart rcha' ic ñi nu nac nu dzi yu' riñ ricy ñi. Orze' becha'ñ lo Jesuuz. Orze' nañ:

—Shuaana, ¿a wagyicy cuen ru nu bilya dela riiñ bzeeñ ñi nu gyicya ub zi? Mnii loñ nu locyuub ñi ya —naañ.

<sup>41</sup> Orze' na Jesuuz rab mi Mart:

—Mart, Mart ton'a' la rsug ic ru nunu deet rac nañ lardoor nu nac zañ coz.<sup>42</sup> Tees tub zi coz nu ricy ñi pre-sis. Ze' Li pcuiñ tub coz nu nap zir par nu gyicy ñi. Nunu se cyu la gac co niñ —nam.

### Jesuuz rlyuum ni de mbecy lac mod nii nu dey Ñgyoozh

**11** Tub tir Jesuuz zab mi rnii num Ñgyoozh tub lu-gaar. Na ornu blazh mnii num Ñgyoozh na, orze' na tub yu nu rsya' lom:

—Shuaan dë, blyuu në dë lac mod nëe du dë Ñgyoozh gal nu Waa blyuuy ni de yu nu rsya' loy —nay rab yum.

<sup>2</sup> Orze' Jesuuz nam rab mi yu:

—Ornu nii nu der Ñgyoozh, orze' i mod nii der: Ñgyoozh, uz dë, rlagy ñi ca lagy dë lor.

Dë ya rdiñ dë nu cyid gyel gubier nir lat dë.

<sup>3</sup> Tub dzi ga cuic ru de coz nu rlagy ñi nu daw dë.

<sup>4</sup> Bicy sulagy në dë ni de coz ci yu ricy dë, gal nu dë ya ricy sulagya' dë ni de yu nu shiñ ricy nu dë ya.

Nunu cue' zaan ru nu gyet lag dë lo preb

—nam.

<sup>5</sup> Orze' na ga' Jesuuz rab mi dey:

—Gyicy peen zu tub amig ni ca na de ru. Orze' char loy tub guzeel rel. Orze' niir loy: "¿A zu ru? Ya yapä lor ben a sac chon gyishtily nir cuic ru lo. <sup>6</sup> Gun saa la bri tub amig në nu guay byaj. Ze' ya rila sac coz në nu ricä gow yu", niir. <sup>7</sup> Orze' amig ze' nir nii ga'y gab yu ru gal ri zi'l yu nañ yu'. Orze' niiy: "Cue' gyicy seed ru ya, gun ro' në noow ñi, nunu ya nu de yu nguzh në bi rib das dë lo nuun. Nde' nu wayeshtë nu ricä la coz nir", niiy.

<sup>8</sup> Orze' ya nëe lor nu mas wayeshtey nu cuic yu coz nu rlagy ru par nu nac yu amig nir, tees ca ni gaal cuic yu dela coz nu cyiiñ nir nu nac nu zaab rgyiiñ lar loy.

<sup>9</sup> Nde' nu ya rneq lo der: Bdiiñ der lo Ñgyoozh, gun Ñgyoozh cuic mi de coz nu cyiiñ ni der. Byub der ñii, gun orze' gyad ñi ni der. Mnii nu der mi, gun orze' shaal mi ro' ni der. <sup>10</sup> Gun cyu zi'l mbecy nu rgyiiñ gad ñi niy. Nunu cyu zi'l mbecy nu ryub gyad yuñ. Nunu cyu zi'l mbecy nu rnii num shaal mi ro' niy.

<sup>11</sup> ¿Walab gaal grusu tub mbecy lat der nu cuic yu tub bily ni iñ yu ornu rgyiiñ yu tub bel loy?<sup>12</sup> O ¿walab gaal grusu tub mbecy nu cuic yu tub gune ni iñ yu ornu rgyiiñ yu nguu gyid loy?<sup>13</sup> Gunca de ru nac der mbecy a' nap rad lagy der lac mod rbic ru coz nap ni iñ ru, ze' yegar Ñgyoozh, uz den, biñ nu Zub gyibaa, wabic mi Espiriit Yon ni de yu rgyiiñ lom —na Jesuuz rab mi de yu nu rsya' lom.

### Mbecy rnii dey nu Jesuuz ricy mi coz ily nu nac nuras

<sup>14</sup> Tub tiem Jesuuz bloo chum nuras, gun nuras ze' b icy yu nu byagop tub mbecy. Na ornu nuras bruu chuy lo yu nu byagop ze', orze' yu ze' brugyi' rniyi. Orze' de mbecy nu yu' ze' za nu la ic dey nu nac nde'. <sup>15</sup> Ze' yu' ga' mbecy nu rniyi:

—Beelzebé, yu nu riib ic de nuras, yu ze' b icy yu nu cyiiñ yu ii nu co chuy de' zir de nuras —na dey.

<sup>16</sup> Ze' yu' ga' mbecy nu byub yu tub mod par nu gyicy yu nu gadzam. Mniiy lom nu cuic mi tub muesht baa.

<sup>17</sup> Tees gud lagy mi de coz nu rnii too dey. Orze' nam rab mi dey:

—Benu tub nac mbecy dulew dey nu chucooy laab nu losa' zi'l yu, orze' rila wazu dey. Nunu benu tub famil chucooy laab nu losa' zi'l yu, orze' ni' zi'l wazu dey.<sup>18</sup> Nunu benu de nuras dulew yu nunu chuc oo dey laab nu losa' zi'l yu, orze' ni' zi'l wazu dey, sinu nit lo dey. Ni rneq gun de ru rnii der nu ya rlo chü nuras nu nac rishbeey ni Beelzebé, yu nu riib ic de nuras.<sup>19</sup> Tees benu ni, orze' cyu briic rishbeey ni de losa'r nu ni ricy yu. Nde' nu de losa'r ricy dey nu rabee nu radza der.

<sup>20</sup> Gun benu ya gac loo chü nuras nu nac coz ily nu ricy Ñgyoozh nu nac ya, orze' nde' yaruuñ nu bi bri gyel gubier ni Ñgyoozh lat der.

<sup>21</sup> Gun benu tub mbecy fert zu tañ yu nu rñay yu'y, orze' de coz nu yu' choow nañ yu'y nguaa segur ñi.

<sup>22</sup> Tees benu ru'ña tuuba' mbecy nu fert zir, orze' yu ze' gyicy yu gan yu. Orze' coy dela gyiib dañ nu rgyish loy lo ze'. Nunu gyash yu dela coz nu ricy cup yu.

<sup>23</sup>'Gun yu nu waya faboor nē, yu ze' zay contr nē. Nunu yu nu walocyuub yā nu tē' de mbecy, yu ze' tush las yu dey —nam—.

### Nuras nu bish cya lugaar ni tuuba' tir

<sup>24</sup>'De ru na der gal na tub mbecy ornu druu chu nuras loy. Orze' nuras ze' rzay tub lugaar wach. Rded yu ryub yu tub lugaar ze' nu zu lagy yu. Na ornu wagad lugaar ze', orze' rnii tooy: "Nap zir cush cyan laaba' ze' nu bruun", rnii tooy. <sup>25</sup>Na ornu griy na, orze' gyap yu mbecy ze' nay gal nu na tub yu' nu nat laa nañ. Nunu se cyudz la zu nañ ñi nu bdulyuub. <sup>26</sup>Orze' chay nu cha te'y tub gagya' nuras nu shiñ zir ricy gaze' ub yu. Orze' chu' dey nañ mbecy ze' cyiiñ yu. Orze' mbecy ze' yashiñ zir na mod nu nay gaze' nu loga —nam.

### Chesu cyit lagy na nu rishli

<sup>27</sup>Lat nu mnii Jesuuz de riidz ze', orze' bruu zac tub biñ mñaa lat de mbecy zigy ze'. Orze' nam rab mi Jesuuz:

—jDzi ni biñ mñaa, biñ nu bgaal ru, nunu briic mi nu gugy ru! —nam.

<sup>28</sup>Orze' na Jesuuz:

—jDzi zir dzi ni mbecy benu zuub gyidag yu de coz nu rnii Ñgyoozh nunu gyicy yac yu niñ! —nam.

### De mbecy fariseo rgyiiñ dey tub nusuriidz

<sup>29</sup>Na lat nu rde' de mbecy zigy lo Jesuuz na, orze' brugyi' rniim lo dey. Orze' nam:

—Dzi ga a' nap de mbecy nu yu' na. Rgyiiña' dey tub muesht ni nusuriidz lo, tees yā waricā ñii ni dey. No-maas muesht ni Jonás, yu nu mnii por cuen ni Ñgyoozh, nde' zi'll muesht nu gad ni de yu ze'. <sup>30</sup>Tees gal nu Jonás guc yu tub muesht ni de mbecy gyedz Nínive, nde' nu ni' zi'll yā, biñ nu byac mbecy, gacā tub muesht ni de mbecy nu yu' tiem na. <sup>31</sup>Ornu shuub dzi nu ri bee Ñgyoozh ni dela mbecy nu yu' tiem na, orze' biñ mñaa nu riib ic tub nasyoong nu ri par yaa been, ornu güiin par ze' nu driib doo, gaza'm gyes sum niim nu yu' cyi der, mbecy nu yu' na. Gun mi ze' zet zir bruum biid mi nu bzuub gyidag mi de coz nu mnii Salomoong. Nunu yā, biñ nu zu ii na, gya zir zu gaze' Salomoong. <sup>32</sup>Nunu ornu shuub dzi nu ri bee Ñgyoozh ni dela mbecy, orze' dela mbecy nu yu' gyedz Nínive gyes su ga' dey nu nii dey nu yu' cyi der mbecy nu yu' tiem na. Gun de mbecy Nínive mne' dey cyiy ornu güeñ dey de riidz ni Ñgyoozh nu pshaal Jonás lo dey. Nunu yā biñ nu zu ii na, gya zir zu gaze' Jonás —nam—.

### Jesuuz rlyuum ni de mbecy nu urlo mbecy, nde' nañ gal nu na tub candiil

<sup>33</sup>'Ni tub la mbecy wacaay gyi tub candiil nu riiy ñi tub lugaar ngach. Ni wariiy ñi nañ tub cajoo, sinu zuub yuñ se'ñ, gun orze' cuic ñi yaa lo de mbecy nu rzu' nañ yu'. <sup>34</sup>Urlor, nde' nañ gal na tub candiil nu rbic yaa nañ shcab nir. Orze' benu gyicy ru coz nap nu urlor, orze'

gzu yaa nañ dutuub la shcab nir. Tees benu gyicy ru coz cyi nu urlor, orze' cow la zu nañ shcab nir. <sup>35</sup>Orze' b icy cuidad, gun dzi ga walab yaa yu' nañ shcab nir, sinu zu cow la nañ shcab nir. <sup>36</sup>Tees benu dutuub la nañ shcab nir yu' yaa nunu benu sac ni ñumiiñ ze' nu cow, orze' naal la zac ru dela coz, gal nu rzac ru ornu tub candiil rbic ñi yaa —nam.

### Jesuuz rniim nu gyicy cuidad dey nu de mbecy fariseo gal nu de mbecy nu rlyuu leey ni Ñgyoozh

<sup>37</sup>Na ornu blazh mnii Jesuuz de nu nde' na, orze' tub mbecy fariseo bredz yu Jesuuz nu cham yu'y nu gow mi gyit. Orze' gu'm nañ yu' gusub mi lo mez. <sup>38</sup>Na ornu bzaac yu nu wanaam gal mod nu rnii leey ni dey anzir nu gom gyit, orze' za nu la ic yu. <sup>39</sup>Orze' nam rab mi yu:

—De ru mbecy fariseo ich zi'l taz rgyiib der, nunu ni' zi'l ricy der nu gya'n. Ze' par nañ lardoo der dza laa yu' coz a' nap nu ricy der. Yu' ga' gyel gubaan nu ricy der. <sup>40</sup>iMbecy ton! ¿A wagad lagy der laab biñ nu bzaa nañ ñi, laab mi bzaam par ich ñi? <sup>41</sup>Benu cuic der coz nu yu' nir ni de mbecy zi, orze' caacy nañ lardoors.

<sup>42</sup>'jCuaa de ru mbecy fariseo! Gun mas lo tii nac loow comid, rboo reñ der tub nac ñii nu rbic der ni Ñgyoozh. Ni ricy der nu menta, nu rud, nunu nu de' zir gyish loow comid. Tees wagyicy cuen der mod nu rlagy ñi par nu chu' den par lo Ñgyoozh, nunu ni waca der mi. De nde' rlagy ñi gyicy der, nunu walagy ñi laa yaa der de' zir coz nap nu bi ricy der.

<sup>43</sup>'jCuaa de ru mbecy fariseo! Gun yet lagy der gzub der lo yashily ni mbecy zub lo nañ yu' nu rsya' mbecy riidz ni Ñgyoozh. Nunu yet lagy der ornu mbecy ca lagy dey lo der ornu nii nu dey der lat yagi'.

<sup>44</sup>'jCuaa de ru! Na der gal nu na baa ni añ nu wacabee ca ri. Orze' de mbecy rded dey par ich ñi, tees wagad lagy dey ti rded dey tooñ —nam.

<sup>45</sup>Orze' na tub yu nu rlyuu leey ni Ñgyoozh rab yum:  
—Masht, ornu ni rnii, orze' ni' zi'l rnii zi ga'r ni de yā —nay.

<sup>46</sup>Orze' nam rab mi yu:

—Ni' zi'l cuaa de ru mbecy nu rlyuu leey ni Ñgyoozh! Gun rzuub der yuu ich mbecy. Ni wagyee ni tub la mbecy nu guy yuu ze'. Ze' de ru walagy der locyuub der losa'r nu guy yuu ze' ni nu tub mbiz ru.

<sup>47</sup>'jCuaa de ru! Ricy zig der ru' baa ni de yu nu mnii por cuen ni Ñgyoozh, de yu nu gu' gulas. Tees na der gal nu na de gyitoo bel ni der, gun de yu ze' biit dey de yu nu mnii por cuen ni Ñgyoozh. <sup>48</sup>Orze' rabee nu gal gaa la na der gal nu na gyitoo bel ni der. Gun de yu ze' biit yu de yu nu mnii por cuen ni Ñgyoozh. Ze' de ru ricy zig der ru' baa ni dey.

<sup>49</sup>'Nde' nu como Ñgyoozh rad lagy mi dela coz, orze' mniim: "Yā gzuu nezā yu nu gnii por cuen nē, nunu gzuu nezā de aposht. Tees yu' nu cut dey yu. Nunu yu' ga' nu shet zi dey yu", nam. <sup>50</sup>Nde' nu Ñgyoozh zeed mi cashtig too de mbecy nu yu' na nu nac dela yu nu mnii por cuen nim nu biit mbecy nese nu bzub gyi' gyishlombecy. <sup>51</sup>Nese nu biit dey Abeel, gashtal nu biit

dey Zacaří, yu nu biit dey loli' ni yu' ni Ňgyoozh par gazel ni mez nu rcuaa der gun lom nu yu' yon nim. Orze' Ňgyoozh zeed mi cashtig ni de mbecy nu yu' tiem na nu nac nu gut dela de yu ze'.

<sup>52</sup>;Cuaa de ru, mbecy nu rlyuu leey ni Ňgyoozh! De ru ricy cup der mod nu cuic der nu gad lagy de mbecy de coz nu rishli. Per walab tub lo zi'l nu walagy der gad lagy ru de coz nu rishli, sinu ni' zi'l wazaan der nu gad lagy de' zir mbecy —nam.

<sup>53</sup> Na ornu mniim de nu nde', orze' de yu nu rlyuu leey, nu de mbecy fariseo tona' la bdza' dey. Orze' brugyi' nu ricy seed dey mi nu rgugyi' dey zañ lo coz lom.

<sup>54</sup> Bicy dey preb mi ben a wad mod nu riib dey cyi toom.

### Jesuuz rlyuum ni de mbecy nu gyicy cuidad dey nu de mbecy rzuu lo

**12** Orze' tona' la mbecy zigy bde' dey lo Jesuuz.  
Bee miily la dey bde' dey lom gashtal rzuub la gyi' dey losa'y. Orze' Jesuuz nu loga la brugyi' rniim lo de yu nu rsya' lom. Orze' nam rab mi dey:

—Cuidad der nu lebadur ni de mbecy fariseo. Lebadur ze', nde' gyel rzuu lo ni dey. <sup>2</sup> Gun dela coz nu walagy dey nu gad lagy mbecy, ca ni gaal gad lagy mbecy par lo. Nunu sac ni tub coz nu cach dey nu wad lagy mbecy par lo. <sup>3</sup> Gun la zi'l riidz nu ro der rel gyeñ mbecy ñi or widoo. Nunu la zi'l riidz dze ga nu ro der nañ yu' nir, gyeñ de mbecy nu zaab ti' riidz ze' gal too yu' —nam—.

### Cyu lo rlagy ñi nu dzib na

<sup>4</sup>'De ru mbecy, ya rnëe lo der nu cue' dzib der lo de mbecy nu rut cuerپ ni losa', tees wac nu la' zir gyicy yu. <sup>5</sup> Tees ya rnëe lo der nu cyu lo rlagy ñi nu dzib der. Rlagy ñi nu dzib der lo biñ nu gac cut cuerپ ni der, nunu despuees orze' ne'm ñii gabily. Orze' gudzib zir der lo mi ze'.

<sup>6</sup>'¿A walab nu rut dey gaay chigyiñ mi' par cyup sentab mi'? Nunu Ňgyoozh ni wagnit lagy mi ni tub ma. <sup>7</sup> Ze' yegar de ru. Ňgyoozh rad lagy mi la be gyich too der. Delañ ngab ñi nim. Nde' nu cue' dzib der, gun de ru sac zir der gaze' de chigyiñ zigy ze'.

### Benu mbecy cach ru'y Jesuuz lo losa'y, orze' ni' zi'l mi ze' cach ru'm yu lo Ňgyoozh

<sup>8</sup>Ya nee lo der nu benu tub mbecy niiy nu naca Shuaan yu lo losa'y, orze' ni' zi'l ya, biñ nu byac mbecy, nee lo de anc zigy ni Ňgyoozh nu yu' gyibaa nu nac yu ne. <sup>9</sup> Tees de mbecy nu rcach ru' ya lo de mbecy, orze' ni' ya cach ru' ga' dey lo de anc ni Ňgyoozh.

<sup>10</sup>Orze' cyu zi'l mbecy nu nii zi ne ya, biñ nu byac mbecy, orze' Ňgyoozh gyicy sulagy mi niy. Tees de yu nu nii zi ni Espiriit Yon nim, de yu ze' wayicy sulagy mi ni dey.

<sup>11</sup> Yu' nu gu' dey der yaa de yu nu riib ic nañ yu' nu rsya' de mbecy Israael riidz ni Ňgyoozh. Ze' yu' ga' nu gu' dey der yaa feez. Nunu yu' ga' nu gu' dey der yaa

de fushtiz. Ornu ni gyicy nu dey der, orze' cue' sug ic der nu lac mod gyicy ru par nu gabe nu sac falt nir. Ni cue' sug ic der la na riidz nu niir. <sup>12</sup> Gun ornu shuub or nu nii der ze', orze' Espiriit Yon ni Ňgyoozh lyuum ni der lac mod niir —nam.

### Gyel nap dzi cyup riidz niñ

<sup>13</sup> Orze' bruu su tub mbecy lat de mbecy zigy. Orze' nay rab yu Jesuuz:

—Masht, mnii lo bicya nu cuic yu gyel nap nu ya bdugyi ornu gut uza —nay.

<sup>14</sup> Orze' na Jesuuz rab mi yu:

—Ru mbecy, ¿cyu bicy nu ya naca feez nu lewa gyel nap ni de ru? —nam.

<sup>15</sup> Orze' nam rab mi de mbecy:

—Bicy cuidad der nu nac de lo la gyel ye rzac. Gun mbecy walab nu nac nu ricy cup dey zañ lo coz, nde' gyicy ñi nu cui mbañ yu —nam.

<sup>16</sup> Orze' mniim tub riidz tiily lo dey. Orze' nam:

—Bzu tub mbecy guani'ñ. Tona' la sheñ cosech rte'y lo yu niy. <sup>17</sup> Orze' brugyi' nu rnii tooy: "¿Ze' na lac mod gyicya? Saca' la ca lugaar nu du' choowä cosech ne", mnii tooy. <sup>18</sup> Orze' mnii ga' tooy: "Ya bi gud lagya lac mod gyicya. Tilya de ye ne. Orze' zaña ziru nu zily zir. Gun orze' nañ ze' du' choowä dela cosech ne, nunu dela coz nu ricy cupa. <sup>19</sup> Orze' nee nañ lardoo: Dzi ga nap. Bdu' choowä zañ coz nu cyiñ ne par zañ ña'n. Na gac zu lagya. Gac daw. Gac do'. Nunu gac gyicya gusht ne." Ni mnii tooy. <sup>20</sup> Orze' na Ňgyoozh rab mi yu: "¡Mbacy ton! Laab rel na gat ru. Ze' de coz nu bdu' choow ru, orze' ¿cyu ni gyeñ ñi?" <sup>21</sup> Orze' ni mod zac mbecy benu cyañañ yu gyel nap niy par ub zi'l yu, tees sac coz nu sac niy par lo Ňgyoozh —nam.

### Jesuuz rlyuum ni de mbecy nu Ňgyoozh zum altant ni de iñ mi

<sup>22</sup> Despuees orze' Jesuuz nam rab mi de yu nu rsya' lom:

—Cue' sug ic der nu nac de coz nu gow der par nu cui mbañ der. Ni cue' csug ic der nu nac shab ru.

<sup>23</sup> Gun dzi zir sac nu cui mbañ der gaze' de coz nu gow der. Nunu cuerپ ni der sac zir ñi gaze' shab ru. <sup>24</sup> Güii der mod nu ricy de byac. Ni wagnuuz ma. Nunu ni wagte' ma. Nunu sac ye ni ma. Mas ni, tees Ňgyoozh rgoow mi de ma. ¡Ze' yegar de ru sac zir der gaze' de chigyiñ! <sup>25</sup> ¿Ca na de ru nu nac nu dzi rsug ic der gac tuuñ zir der lo yur, mas ñuu se tub or? <sup>26</sup> Ze' benu wac gyicy der de coz mi' ze', ¿lagu dzi rsug ic der nu nac de' zir coz?

<sup>27</sup> Güii lac mod raly de ya gyee. Ni wagiyicy ñi riiñ. Ni wagri'ñ iily. Mas ni, tees ya rnëe lo der nu rey Salomoong, mas tona' la guani'ñ yu, tees wansuy negy nu nsaap ñi gal nu na de gyee ze'. <sup>28</sup> Benu Ňgyoozh rtiish mi de gyish nu nash ngush na, ze' ina gyañ lo gyi nañ yo, nde' nu segur la tiish mi de ru mbecy nu wagiyicy cup consuel lom. <sup>29</sup> Nde' nu cue' dzi csug ic der chesar nu yub ru de coz nu gow der o nu go'r. <sup>30</sup> Gun dela de

coz ze' rsug ic de mbecy ni gyishlombecy. Tees de ru zu Ñgyoozh, uz der. Nunu mi ze' bi rad lagy mi la coz galagy ñi ni der.<sup>31</sup> Orze' bzub lo der nu nac gyel gubier ni Ñgyoozh. Orze' mi ze' cuic mi dela coz nu galagy ñi ni der —nam—.

### Jesuuz rlyuum ni de mbecy nu nap zir nu gyicy dey de coz nu sac ñi gyibaa

<sup>32</sup>'Der mbecy nu na gal nu na shily nę, cue' dzib der. Sac zig der. Tees Ñgyoozh, uz na, yet lagy mi nu gyicy mi nu gyub ic nu der mi lugaar ze' nu riib ic mi.<sup>33</sup> Orze' biit der de coz nu yu' nir. Orze' nu tiñ nu gad ni der ze' cuic der ni mbecy zi. Orze' b icy der nu gad tub nerbid tiñ nu yu' gyibaa ni der, gun wayaguush ñi. Pcyaañ der gyel nap nir gyibaa ze' nu rila walaazh ñi. Ze' ni wayu' gubaan nu coy ñi, ni bigyich wac nit lo ma ñii.<sup>34</sup> Gun lugaar ze' nu rcaañ der gyel nap nir, ze' lugaar nu ric la añ ni der lo —nam—.

### Rlagy ñi nu zu lily der

<sup>35</sup>'Rlagy ñi nu gac der tub mbecy nu lily gaa la zu. Na der gal na tub mbecy nu bi bzu lily yu. Bzuy shab yu, nunu bi pcaay gyi candiil niy.<sup>36</sup> Nunu rlagy ñi gyicy der gal nu ricy de moz nu rbez yu patroq niy nu griy nu guay lo fandang. Na ornu griy, gnii nuy de moz niy. Orze' lueg la shaal dey ro' niy.<sup>37</sup> Dzi ni de moz benu patroq niy gyap yu dey zu ga lagy yu ornu griy. Ya rishli rnęe lo der nu laab patroq ze' gyicy yu nu gzub dey lo mez. Orze' patroq niy zu lily yu nu saay gya'n nu gow dey gyit.<sup>38</sup> Dzi ni de moz ze' benu patroq niy gyap yu dey zu ga lagy yu mas guzeel rel riy, o mas bi rza' yu riy.<sup>39</sup> Na gad lagy der de nu nii. Benu shuaan tub yu' gad lagy yu la or ru'ñia gubaan, orze' wazaan yu nu chu'y nañ yu'y nu coy suuy.<sup>40</sup> Orze' ni' zi'l de ru rlagy ñi nu gac der tub mbecy nu lily zu. Gun ya, biñ nu byac mbecy, yapä or nu a' sa' la lagy der ya —nam.

### Riidz ni cyup moz

<sup>41</sup> Orze' Bed nay rab yu Jesuuz:

—Shuaan dę, riidz tiily nu mniir lo dę ze', ¿a nde' par de ya zi'l, uti nde' par dela mbecy? —nay.

<sup>42</sup> Orze' Jesuuz nam rab mi yu:

—¿Ca na moz nu ricy paa, nu moz nu yu' shcab ñi? Yu ze' bdu' patroq niy riñ yaay nu gyub ic yu de' zir moz nu yu' niy, par nu cuic yu nu gow de yu ze' or niñ.<sup>43</sup> Dzi ni moz ze' benu gyap patroq niy yu ornu griy nu ricy yu gal nu mniiy loy.<sup>44</sup> Ya rishli rnęe lo der nu patroq niy cu'y riñ yaay nu gyub ic yu dela coz niy.<sup>45</sup> Tees benu moz ze' nac yu mbecy a' nap, orze' nii tooy nu wari gyiily patroq niy. Orze' cugyi' gyicy ras nuy de losa' moz yu. Mñaa gyeey la gyicy ras nuy. Gow yu nunu go'y, nunu gzug yu.<sup>46</sup> Orze' gri patroq niy tub dzi nu a' sa' la lagy yu. Griy tub or nu wagad lagy lay. Orze' tona' la cashtig ily cuic yu ni moz ze'. Gyicy yu gal nu ricy nu dey mbecy wagyicy paa.

<sup>47</sup>'De moz nu rad lagy de coz nu rlagy patroq ni, tees wacsu lily yu de coz nu rniiy, ni wacsuub gyidag yu niy,

orze' yu ze', cuic dey cashtig niy. Orze' zañ golp gad niy.<sup>48</sup> Ze' de moz nu wagad lagy de coz nu rlagy patroq ni, ni' zi'l yad ñi nu gad cashtig niy, orze' ornu cuic dey cashtig niy, orze' ñuu zi zir golp gad niy. Gun de mbecy nu briic Ñgyoozh sheñ ni, orze' ni' zi'l niim nu gyabic yu sheñ. Nunu yu nu sheñ bgu' Ñgyoozh yaa, orze' yu ze' cyish lo zir Ñgyoozh loy nu gyicy yu zañ zir coz.

### Jesuuz ricy mi nu rla' losa' mbecy

<sup>49</sup>'Ya yapä nu gyicya nu ri bee Ñgyoozh ni dela mbecy nu yu' gyishlombecy. Gyicy mi gal nu ricy gyi. Bicy na nu bi rca gyi ze', orze' tona' la gyet lagya.<sup>50</sup> Nunu ya rlagy ñi nu tona' la gzac zi. Nunu tona' la deet gac nañ lardoq gashtal gded la nu gzac zi.<sup>51</sup> ¿A rnii too der nu ya yapä nu gyicya nu nap chu' mbecy nu losa'y gyishlombecy? Walab nu gyicya nu nap chu' dey, sinu gyicya nu chuc oo dey nu losa'y.<sup>52</sup> Gun na par lo gaay mbecy laab nu famil zi'l ni dey chuc oo. Chon yu chay contr ni cyup yu. Ze' cyup yu chay contr ni chon yu.

<sup>53</sup> Gun yu' mbecy gush nu chay contr ni i'ñ yu yu gyey. Ze' yu ze' chay contr ni uz yu. Ze' yu' ga' biñ mñaa nu cham contr ni i'ñ mi fiñ mñaa. Ze' fiñ ze' chañ contr ni ñaañ. Ze' yu' ga' biñ mñaa nu cham contr ni shis mi. Ze' fiñ ze' chañ contr ni ñaa gud ñi —nam.

### De muesht ni tiem

<sup>54</sup> Orze' na ga' Jesuuz rab mi de mbecy:

—Ornu de ru rzac der nu yad za par ze' nu rza doo, orze' rnii der nu gyet gyey. Nunu ni raac ñi.<sup>55</sup> Ze' ornu bi druuñ par yaa reg na ornu güiin par ze' nu rza doo, orze' rnii der nu bi yad tiem zig. Nunu ni raac ñi.

<sup>56</sup> ¡Mbecy rzu' lo! Benu rad lagy der muesht nu ta' baa, gal nu muesht nu yu' lo yu, ¿se lagu wagad lagy der la tiem yu' der beni? —nam rab mi dey.

### Bicy der rishnap nu losa'r

<sup>57</sup> Orze' na ga'm rab mi dey:

—¿Lagu wagnii too der par ub ru ben ca na nu nap?

<sup>58</sup> Orze' benu ca na tub losa'r rlag yu cu'y cyir nu cha nuy ru lo de fushtiz, orze' bzu altant nu gyicy ru rishnap nur yu lat nu gabee cuic ñi tiem nir. Gun orze' cue' cha nuy ru lo feez. Gun benu wayicy ru nde', orze' feez ze' gu'y ru yaa de yu nu rña yu' gyiib. Orze' de yu nu rña yu' gyiib shet lag dey ru nañ.<sup>59</sup> Ya rnęe lor nu waruur nañ gashtal cuua lar dela tiñ nu nii dey —nam.

### Tona' la ricy ñi presis nu ne' mbecy cyi nu ricy yu

**13** Orze' laab tiem ze' la be mbecy gua güii dey Jesuuz. Orze' byoo dey rishlom nu Pilato bicy yu nu gut la be mbecy Galilea. Orze' gukan reñ de mbecy ze' nu reñ bañcyug nu briic dey gun lo Ñgyoozh.

<sup>2</sup> Orze' na Jesuuz rab mi dey:

—¿A rnii too der nu de mbecy nu gut ze' dzy zir nac yu mbecy cyi par de' zir mbecy Galilea, nunu nde' nu ni bzac dey?<sup>3</sup> Ya rnęe lo der nu walab. Nunu benu de ru wane' der dela cyi nu ricy der, orze' ni' de ru gat

der. <sup>4</sup> ¿La coz rnii der nu nac tiiñ zu chon mbecy nu gut ornu bet lag tub yu' gly too dey tub gyedz nu la Siloé? ¿A rash der shcab nu de yu ze' dzi zir b icy dey coz cy gaze' de' zir mbecy nu rcyiiñ Jerusaleeng? <sup>5</sup> Ya rnœe lo der nu walab, nunu benu de ru wane' der de cyi nu ricy ru, orze' ni' zi'll gat der —nam.

### Riidz tiily ni ya las nu wacuic uugy

<sup>6</sup> Orze' Jesuuz mniim tub riidz tiily lo dey. Orze' nam:

—Bzu tub mbecy. Bzub tub ya las niy. Bzub ñi lat lyucy urbyay niy. Orze' gua güiib ben a ta' uugy niñ. Tees wangyap yu ni tub uugy niñ. <sup>7</sup> Orze' nay rab yu moz niy nu ricy riiñ lat naa ze': "Güii. Bza' chon ña'n zaab ryap la rgüii ya las ii nu ryuba uugy niñ. Tees rila wagyapa uugy niñ. Orze' na pshi'ñ ñi. ¿Gun lagu leew la ricy seed ñi lat naa?" nay. <sup>8</sup> Tees yu nu ricy riiñ ze' nay rab yu patroq niy: "Patroq, bzaan Zub ñi stub ña'n. Orze' glaä yu gyi'ñ. Gaze' nu du' abon gyi'ñ. <sup>9</sup> Benu ni, orze' cyup ridz cuic ñi uugy. Ze' benu wabic ñi uugy, orze' nap zir gyi'ñ ñi", nay —nam.

### Jesuuz b icy yac mi tub biñ mñaa sab

<sup>10</sup> Tub tiem, tub sab, dzi nu rzu lagy mbecy, orze' Jesuuz rim nañ tub yu' nu rsya' de mbecy Israeel riidz ni Ñgyoozh rlyuum ni de mbecy. <sup>11</sup> Nunu ze' ri tub biñ mñaa nu bi bza' tiiñ zu chon ña'n rat mi. Gun bi b icy ni nuras mi, nunu b icy yu nu brong mi. Orze' rila wangac ñgyu' lim. <sup>12</sup> Na ornu Jesuuz bzaac mi biñ mñaa ze', orze' bredz mi biñ mñaa ze'. Orze' nam:

—Biñ mñaa, bi byac ru ni güii nu rat ru —nam.

<sup>13</sup> Orze' gaze' nu gul yaam biñ mñaa ze'. Orze' laab or la ze' byu' li cuerpa ni biñ mñaa ze'. Orze' brugyi' nu ryabic mi gyel mbecy ni Ñgyoozh. <sup>14</sup> Tees yu nu riib ic nañ yu' ze' guzi lagy yu, gun Jesuuz b icy yac mi biñ mñaa ze' sab, dzi nu rzu lagy mbecy. Orze' nay rab yu de' zir de mbecy nu yu' ze':

—Yu' tub shuup dzi nañ tub sman par nu gyicy na riñ. Orze' lat de dzi ze' cyid der par nu gyicy yac mbecy der. Tees dzi nu rzu lagy mbecy, cue' cyid der par nu gyicy yac mbecy der —nay.

<sup>15</sup> Orze' na Jesuuz rab mi dey:

—Der mbecy rzuu lo, ¿de ru walab gaal washaagy der tor nir o bur nir sab, dzi nu rzu lagy mbecy, par nu cha nu der ma nu go' ma nis? <sup>16</sup> Ze' biñ mñaa ii, mi ii nez Abraham, nunu bi bza' tiiñ zu chon ña'n nu pcyiig nuras biñ mñaa ii nu güii nu rat mi. Orze' beni ¿a wac gyagy biñ mñaa ii ni güii nu rat mi sab, dzi nu rzu lagy mbecy? —nam.

<sup>17</sup> Ornu ni mnii Jesuuz, orze' de losa' yuum tona' la gut lo dey. Tees de' zir de mbecy tona' la bet lagy dey nu nac de coz ily nu ricy mi.

### Riidz tiily ni mbigy urnishtas

<sup>18</sup> Orze' na ga' Jesuuz:

—¿La na gyel gubier ni Ñgyoozh? ¿La ñuu coz saapa nu gyel gubier nim? <sup>19</sup> Gyel gubier ni Ñgyoozh rac ñi gal nu rac nu tub mbigy ya urnishtas nu rnuuz mbecy

lo yu niy. Orze' gaze' nu raly ñi gashtal gyac lañ tub yag ily mas gashtal de chigyiñ rzaa ma teeze ma lat yaañ —nam.

### Riidz tiily ni lebadur

<sup>20</sup> Gaze' nu na ga'm:

—¿La ñuu coz saapa nu gyel gubier ni Ñgyoozh?

<sup>21</sup> Gyel gubier ni Ñgyoozh nañ gal nu na lebadur nu gush tub biñ mñaa. Bdu'm ñii lat chon nac arin, gun orze' lebadur ze' cshup ñi dela cub zañ ze' —nam.

### Jesuuz rlyuum ni de mbecy nu ñuu zi mbecy gash dey nez ni Ñgyoozh

<sup>22</sup> Na nez nu yam par Jerusaleeng na, orze' blyuum ni de mbecy dela gyedz gal nu dela ranch nu yu' nez nu zam. <sup>23</sup> Orze' gaze' nu bruu su tub mbecy. Orze' nay rab yum:

—Shuaanä, ¿a ñuu zi mbecy gruu mbañ yu? —nay.

Gaze' nu nam rab mi yu:

<sup>24</sup> —Bicy der fers nu chu' der ro' shii, gun ya nee lor tona' la zigy mbecy galagy dey chu'y, tees wac chu' dey. <sup>25</sup> Orze' yu guyu' gyeshtey nunu soow yu ro'. Orze' de ru, de mbecy nu yu' par ich gnii der:

"Shuaanä, pshaal ro' ne", nii der. Tees yu guyu' ze' gnii ga'y gab yu de ru: "Ya wagad lagya ca bruu der", niiy.

<sup>26</sup> Gaze' nu nii ga' de ru: "Ze' ¿lagu ni rnii ru? Ze' de ya tublaazh la bdaw du de ru gyit. Nunu tublaazh la bdo' du de ru. Nunu laab ru blyuur ne de lat cay ledz de", nii der. <sup>27</sup> Orze' yu guyu' ze' nii ga'y gab yu der: "Ya bi mneé lo der nu wagad lagya ca bruu der. Orze' bruu chu der lo, der mbecy nu shiñ ricy", niiy gab yu de ru. <sup>28</sup> Orze' ze' gun der nunu siigy lay der ornu zac der Abraham, nu Isaac, nu Jacob, gal nu de' zir de yu nu mnii por cuen ni Ñgyoozh yu' dey ze' nu riib ic mi. Ze' ii de ru bi zu chu der par ich. <sup>29</sup> Gun cyid mbecy nu gruu gaza' dela lugaar ni gyishlombecy nu gzub dey lo mez nu gow dey gyit ze' nu riib ic Ñgyoozh. <sup>30</sup> Orze' la be de mbecy nu gash zir zu na, de yu ze' gyac yu yu nu gya zir zu par lo, nunu la be de mbecy nu gya zir zu na, de yu ze' gyac yu yu nu gash zir zu par lo —nam.

### Jesuuz ricy mi sentiir nu nac mbecy Jerusaleeng

<sup>31</sup> Gaze' nu bru'ña la be de mbecy fariseo. Orze' na dey rab yu Jesuuz:

—Gua la ru, gun Herodes rlag yu cut yu ru —na dey.

<sup>32</sup> Gaze' nu nam rab mi dey:

—Gua der gua niir lo mbecy rguu ze' nu na gal nu ina ya loo chü nuras nu b icy ni mbecy, nunu gyicy yaca mbecy rat. Orze' widz na, gya' lo de riiñ nu ricya.

<sup>33</sup> Rlag y ni zab za la nez dzi na, nu ina, nu widz na. Gun walab se'ñ nu gat tub mbecy nu rnii por cuen ni Ñgyoozh reña' lugaar par Jerusaleeng.

<sup>34</sup> 'A der mbecy Jerusaleeng! Rut der de mbecy nu rnii por cuen ni Ñgyoozh. Nunu rgoow gyita' der de mbecy nu rzeed Ñgyoozh lat der. Zañ tir ngulagya ñgyicy tublaazh der gal nu ricy tub gyid ornu ricy tublaazh ma dzich ni ma nañ lowe' ma. Tees de ru

wangalagy der. <sup>35</sup> Na ledz der gyiyeeñ ub ziñ. Gun ya nē lo der nu wazaca' la der ya gashtal shuub la dzi nu nii der: "Dzi ga zily nac biñ nu bzuu nez Ñgyoozh Shuaan na, biñ nu cyid lo den", nii der —na Jesuuz.

### Jesuuz bicy yac mi tub mbecy nu gu' gyi

**14** Guc ñi tub tiem, tub sab, dzi nu rzu lagy mbecy, orze' Jesuuz guam gua tom gyit yu' tub yu Zub lo ni de mbecy fariseo. Nunu ze' yu' la be mbecy fariseo nu rgu' cuen ga dey mi ben lac mod gyicy mi. <sup>2</sup> Nunu ri ga' tub mbecy nu yu' gyi. <sup>3</sup> Orze' Jesuuz bdugyi'm lo de yu nu rlyuu leey ni Ñgyoozh gal nu lo de mbecy fariseo. Orze' nam rab mi dey:

—¿A nap zuñ lo leey ni Moisees nu gyicy yac na mbecy rat sab, dzi nu rzu lagy mbecy, uti a' nap? —nam.

<sup>4</sup> Tees dey ze' wanii lay. Gaze' nu gul yaam mbecy rat ze'. Orze' gaze' nu bicy yac mi yu. Orze' gaze' nu bzuu nez mi yu yay yu'y. <sup>5</sup> Gaze' nu nam rab mi de mbecy fariseo:

—Benu ca na de ru gyet lag tub i'ñ der nañ tub zo, o tub tor ni der gyet lag ma, orze' ¿a walab co der ma, mas sab, dzi nu rzu lagy mbecy? —nam.

<sup>6</sup> Orze' de yu ze' rila wannii dey.

### De yu nu ca lo cuen nu cha lo fandang

<sup>7</sup> Ornu Jesuuz bzaac mi de mbecy nu ya tow gyit ryub dey lugaar ni mbecy zab lo lo mez nu zab dey, orze' gaze' nu briic mi consef ni dey. Orze' nam rab mi dey:

<sup>8</sup> —Ornu cuedz mbecy de ru nu cha der lo fandang, orze' cue' zab der se' mbecy zab lo, gun dzi ga gru'ña tub mbecy nu lily zir na gaze' ru. <sup>9</sup> Orze' gru'ña mbecy nu bredz rup laa der gal nu mbecy lily ze'. Orze' niyy gab yu ru: "Ze' nu zab ru gac cuic ru nu zab yu lily ii", niyy gab yu ru. Orze' ru gruu gyel mbecy nir, nunu chesub ru se' mbecy zaab ich zir. <sup>10</sup> Lugaar nu gyicy ru nde', orze' i mod gyicy ru: Ornu cuedz dey ru nu char fandang, orze' ornu ru'ñar, orze' zab ru se' mbecy nu zaab ich zir. Gun ornu ru'ñaa mbecy nu bredz ru ze', orze' niyy gab yu ru: "Mbecy, ru char zab ru se' mbecy zab lo zir", niyy gab yu ru. Orze' ornu gyicy ru nde', orze' de' zir mbecy nu nguaa lo mez ze' ca lagy dey lor.

<sup>11</sup> Gun yu nu ricy zily ub, yu ze' gruu gyel mbecy niy. Ze' yu nu ricy gyel gyidz ni, yu ze' gyed gyel mbecy niy —nam.

<sup>12</sup> Orze' nam rab mi mbecy nu bredz mi nu cha tom gyit yu' ze':

—Ornu cuic ru cui o che nu gow mbecy, orze' cue' cuedz ru amig nir. Ni cue' cuedz ru de b icy ru. Ni cue' cuedz ru de uz ru. Ni cue' cuedz ru de yu guani'ñ lat losa'r. Gun benu ni gyicy ru, orze' ni' zi'l de yu ze' cuedz dey ru nu cha tor gyit yu'y. Orze' ni mod gyad ir. <sup>13</sup> Lugaar nu gyicy der nde', orze' i mod gyicy ru. Ornu gyicy ru tub sa', orze' cuedz ru de mbecy zi nu cyid dey lor. Cuedz ru mbecy nu wagac za, nunu cuedz ru mbecy coj, nunu cuedz ru mbecy lo ca'. De yu ze' cuedz ru.

<sup>14</sup> Dzi ni der benu ni gyicy ru. Gun de yu ze' waca'

gyabic dey ir. Tees ru gyad ir ornu shuub dzi nu gyabañ de mbecy nap.

### Riidz tiily ni fandang

<sup>15</sup> Na ornu güeñ tub yu nu bzub nu Jesuuz lo mez de coz ze', orze' nay rab yum:

—Dzi ni de mbecy nu cha tow gyit lo sa' ze' nu riib ic Ñgyoozh! —nay.

<sup>16</sup> Orze' Jesuuz nam:

—Bzu tub mbecy. Orze' bicy yu tub sa' ily. Orze' bredz yu zigy mbecy nu chay lo sa' ze'. <sup>17</sup> Na ornu pshuub or na, orze' bzuu nez yu tub moz niy nu cha niyy lo de mbecy nu ca lo cuen nu cha lo sa' ze'. Orze' nay: "Da der, gun dela coz bi zu lily ñii", nay. <sup>18</sup> Orze' dela dey mnii dey rishto' lo. Orze' mbecy nu guay lo loga la ze' nay: "Ya wac cha, gun saa la wi tub nac yu. Nde' nu ya cha güüñ ñii. Orze' bicy sulagy nē, gun wac cha", nay. <sup>19</sup> Ze' tuuba'y nay: "Wac cha, gun saa la wi gaay nez tor. Orze' na cha gyicya preb ma ben a nap ricy ma riiñ. Orze' bicy sulagy nē, gun wac cha", nay. <sup>20</sup> Ze' tuuba'y nay: "Wac cha, gun saa la pcheläa. Nde' nu wac cha", nay. <sup>21</sup> Orze' gaze' nu moz ze' bish cyay yay. Ornu briy na, orze' mniyy dela nde' lo patroo niy. Orze' patroo niy tona' la guzi lagy yu. Gaze' nu nay rab yu moz niy ze': "Dzach ru gua lat cay, gal nu de nez mi' nu riib lat gyedz. Orze' cyid nur de mbecy zi, nu de mbecy nu wagac za, nu mbecy lo ca', gal nu mbecy coj", nay. <sup>22</sup> Na ornu bi rac la be or, orze' moz ze' nay rab yu patroo niy: "Na bi bicya dela coz nu mniir, nunu gabee gad ru' lugaar nu gzub mbecy benu cyid yu", nay. <sup>23</sup> Orze' patroo ze' nay rab yu moz niy: "Gua de nez zu gal nu de nez las nu riib ngush. Orze' niir lo reña' mbecy nu cyid dey, gun orze' chu' zir mbecy gashtal dzaa la nañ yu' nē. <sup>24</sup> Gun ya rneę nu ni tub la mbecy nu mneę nu cyid nu loga la wow yu de coz nu bzu ye", nay —nam.

### Lac mod cha ca mbecy ich Crisht

<sup>25</sup> Orze' tona' la zigy mbecy za ca dey ich Jesuuz.

Orze' bish cyam bgüiim lo dey. Orze' nam rab mi dey:

<sup>26</sup> —Benu ca na mbecy cyid cay icha, ze' benu rca zir yu uz yu, o ñaay, o mñaay, o i'ñ yu, o b icy yu, o zan yu, o ub yu gaze' ya, orze' yu ze' rila wangyap yu nu gac yu mbecy nu rsya' lo. <sup>27</sup> Cyu zi'l mbecy nu washet ic nu gzac zi nu nac ya, nunu benu washet ic yu nu gyicy yu gal nu ya rlaga, orze' yu ze' ni' zi'l wangyap yu nu gac yu mbecy nu rsya' lo. <sup>28</sup> Orze' benu ca na de ru rlaga der zaar tub yu' gya, orze' ¿a walab nu loga la rlaga ñi nu zab ru cor cuen ben a gal tiñ nir par nu gya' lo yu' ze'? <sup>29</sup> Tees benu de ru gzu zi'l der simient niñ, ze' waza' lo der ñii, orze' ornu gzac de mbecy, orze' cugyi' gubdzaa dey der. <sup>30</sup> Orze' nii dey: "Yu re nu bzuub zi'l yu gyi' yu' niy per wangac nza' loy ñi", nii dey. <sup>31</sup> O benu tub rey chay nu chu'y gyel yuu nu tuuba' rey, orze' ¿a walab nu loga la rlaga ñi nu nii tooy ben a zu tii miily soldad niy lo tub gal miily soldad nu chucoo nuy ze'? <sup>32</sup> Ze' benu wazuy lo gyel yuu ze', orze' ornu gabee

zet ru' zu tuuba' rey nu chucoo nuy ze', orze' gzuu nez  
yu tub moz niy nu niyi lo tuuba' losa'y nu cue' gyicy yu  
gyel yuu.<sup>33</sup> Orze' ni' zi'l de ru. Benu washet ic der nu  
zeeñ der de coz nu ricy cup der, orze' wangyap der gac  
ru mbecy nu rsya' lo —nam—.

### Ornu zed ruu nu ri' niñ, orze' wacyiiñ ñi

<sup>34</sup>'Zed, nde' nap ricy ñi benu yu' nu ri' niñ. Tees benu  
zed ze' ruu nu ri' niñ, ¿orze' lac mod chu' ga' nu ri' niñ  
tuuba' tir?<sup>35</sup> Orze' rila wacyiiñ ñi. Ni wacyiiñ ñi nu gyicy  
nap ñi yu. Nunu ni wacyiiñ ñi par abon. Orze' nap zir  
nu ne' dey ñi. Yu nu Zub gyidag, rlagy ñi gyicy yu nu  
gyet lag yu cuen —nam.

### Riidz tiily ni shily nu bdune'

**15** Dela yu nu rboo tiñ por cuen ni gubier Rom, gal  
nu reña' mbecy bdune' becha' dey lo Jesuuz par  
nu zuub gyidag dey de coz nu rnium.<sup>2</sup> Ze' de mbecy  
fariseo gal nu de yu nu rlyuu leey ni Ñgyoozh rnid ru'  
dey nu nac mi. Orze' na dey:

—Yu re rnii nuy mbecy cyi nunu row nuy dey gyit  
—na dey.

<sup>3</sup> Orze' Jesuuz mniim riidz tiily lo dey. Orze' nam:

<sup>4</sup>—Benu ca na de ru zu tub gaynal shily nir, se' dune'  
tub ma, orze' ¿a walab zeeñ der nobent zuub gaa ma  
ngush? Orze' gaze' nu cha der cha yub der tub bañ nu  
bdune' ze' gashtal gyad la ma.<sup>5</sup> Na ornu gyad ma na,  
orze' tona' la gyet lagy der. Orze' riib yeñ der ma gya  
nur ma.<sup>6</sup> Na ornu rir yu'r na, orze' cha te'r de amig nir  
gal nu de mbecy nu yu' gaab ga. Orze' nii der gab ru  
dey: "Bet lagy der nur ya, gun ya byadä shily ne, bañ  
nu bdune'", nii der.<sup>7</sup> Ya rishli rnëe lo der, cyit zir rac gy  
ibaa nu nac tub mbecy cyi ornu rne'y dela cyi nu ricy  
yu, gaze' nu nac nobent Zub gaa mbecy nap nu walagy  
ñi nu ne' cyi nu ricy yu.

### Riidz tiily ni biñ mñaa nu byad tiñ nu bdune' ni

<sup>8</sup>'Gyicy peen nu tub biñ mñaa nu ricy cup tii tiñ plat.  
Orze' dune' tub ñi nim. Orze' ¿la coz gyicy mi? Nu loga  
la caam gyi candiil nim. Orze' gaze' nu lyyub mi nañ  
yu' nim. Orze' nap yub mi ñii gashtal gyad lañ.<sup>9</sup> Na or  
nu gyad ñi nim na, orze' cuedz mi dela amig nim, gal  
nu dela mbecy nu yu' gaab ga. Orze' niim gab mi dey:  
"Tona' la yet lagya gun bi byadä de tiñ nu bdune' ne",  
niim.<sup>10</sup> Orze' ya rnëe lo der nu tona' la yet lagy de anc  
ni Ñgyoozh nu nac tub mbecy cyi nu rne'y de cyi nu ricy  
yu —nam.

### Riidz tiily ni yu feñ nu gudza

<sup>11</sup> Orze' Jesuuz mniim tuuba' riidz tiily lo dey. Orze'  
nam:

<sup>12</sup>—Zu tub mbecy. Zu cyup iñ yu. Orze' yu mi' ze'  
nay rab yu uz yu: "Tat, cuic ru gyel nap nir nu ya dugy  
i", nay. Orze' yu ze' blew yu gyel nap ze' niy lat de iñ  
yu.<sup>13</sup> Na ornu bi rac la be tiem, orze' yu mi' ze' biit yu  
dela coz nu bdugiy. Orze' gush nez yu za nuy tiñ ze'  
tub lugaar zet. Gashtal tuuba' nasyoong zay. Orze' ze'

mniit ton yu dela tiñ niy.<sup>14</sup> Na ornu blazh mniit yu dela  
tiñ niy, orze' biid tub cubiñ ily lugaar ze'. Orze' brugyi'  
rded yu gyel ran.<sup>15</sup> Orze' gua yub yu riiñ lo tub mbecy  
guledz. Orze' yu ze' bzuu nez yuy chay ranch niy nu  
cha ñay cuch.<sup>16</sup> Orze' yu mi' ze' ngulagy yu ñgyow yu  
gyid ich zaa nu row cuch ze' par nu dzaa nañ yu. Tees  
ni tub la mbecy wancuic yu nde' gow yu.<sup>17</sup> Laab nde'  
la orze' mnii tooy: "De moz nu rcyiiñ lo uzä rad nu row  
dey gashtal drusuba' lañ. Ze' ya se nu gat zi'lä gyel  
ran.<sup>18</sup> Nde' nu na nap zir cush cyä gya yu' uzä. Orze'  
nëe loy: Tat, ya guch ñii ne lo Ñgyoozh, nunu guch ñii  
ne lo ru.<sup>19</sup> A' yada'ñ nu nii dey nu nacä iñ ru. Orze' na  
bicy nu ya gal nu ricy nur de moz nir, nëe lo uzä", rnii  
tooy.<sup>20</sup> Orze' gaze' nu gush nez yu yay lo uz yu.

'Na ornu gabee zet yay, orze' uz yu bzaac yuy. Orze'  
gushni lagy yuy. Gaze' nu gush nez yu zay za cheel  
yuy. Orze' bdu' yaay yeñ yu. Orze' bdoy chit loy.

<sup>21</sup> Orze' yu feñ ze' nay rab yu uz yu: "Tat, guch ñii ne lo  
Ñgyoozh, nunu guch ñii ne lo ru. A' yada'ñ ne nu nii  
dey nu nacä iñ ru", nay.<sup>22</sup> Gaze' nu uz yu bicy yu man  
daar lo de moz niy. Orze' nay rab yu de moz niy:  
"Dzach der, gua gyii der negy nu cyit zir na. Orze' zuu  
der yu negy ze'. Nunu rii ga' der tub bi' yaay. Nunu caa  
der gyid lab gyi'y.<sup>23</sup> Orze' gua tee der chigud, bañ feñ  
nu reñ zir par lo dela ma. Orze' gyicy na sa'.<sup>24</sup> Gun  
iñä ii nay gal nu na tub mbecy nu bi gut. Tees na  
byabañ yu. Guc yu mbecy bdune'. Tees na byad yu",  
nay. jOrze' brugyi' nu ricy dey sa'!

<sup>25</sup>'Orze' lat ze' iñ yu yu gush ze' riy lat naay. Orze'  
bish cyay yay. Na ornu yay bi rgaab ro' na, orze' güeñ  
yu nu rlaa musiic. Nunu rulgyi' mbecy.<sup>26</sup> Orze' bredz  
yu tub moz nu ri lo sa' ze'. Orze' bdugyi' loy la coz rac.

<sup>27</sup> Orze' moz ze' nay rab yu: "Bi bri bicy ru. Orze' uz ru  
bicy yu mandaar nu cut dey tub chigud, bañ feñ nu  
reñ zir par lo dela ma. Gun bicy ru bri nap yu, nunu bri  
ruub yu", na moz ze' rab yu yu gush ze'.<sup>28</sup> Orze' yu  
gush ze' tona' la guzi lagy yu. Orze' wangalagy yu  
ñgyu'y yu'. Orze' gaze' nu uz yu bruuy nu mnishbaay  
loy nu chu'y yu'.<sup>29</sup> Orze' nay rab yu uz yu: "Ru rad lagy  
ru nu bi guzañ ña'n nu ya ricya riiñ nir. Nunu rila  
wangyicya nu wazuub gyidagañ nir. Tees ru rila wancuic  
ru ni tub chiib feñ par nu ñgyicya sa' nu de amig ne.

<sup>30</sup> Tees lugaar nu ni ñgyicy nur ya, per ca yu re biit ru

chigud, bañ feñ nu reñ zir par nu gyicy ru sa' nu briy.

Ze' yu re mniit ton yu tiñ nir lo de biñ congal", nay.

<sup>31</sup>'Orze' na ga' uz yu rab yu: "A uza, ru dub laa tiem  
nac nur ya, nunu dela coz nu ricy cupa, nde' coz nir.

<sup>32</sup> Tees na dzi nap nu gyicy na sa' nu gyet lagy na, gun  
bicy ru nay gal nu na tub mbecy nu bi gut. Tees na  
byabañ yu. Bi bdune'y, tees na byada'y", nay.

### Riidz tiily ni moz nu shiñ bicy

**16** Orze' na ga' Jesuuz rab mi de yu nu rsya' lom:

—Bzu tub mbecy guaniñ. Nunu bzu tub moz  
nu byub ic de coz niy. Orze' bruu zu tub mbecy briib yu  
cyi ic moz ze' nu rniit ton yu gyel nap ni patroq niy.

<sup>2</sup> Orze' gaze' nu patroq niy ze' bredz yu moz niy. Orze'  
nay rab yu: "¿La ñuu riidz zaab nu rnii dey nir? Zeed

cuen ru lo de riiñ nu ricy ru, gun na waca' gac ru moz ne", nay. <sup>3</sup> Orze' moz ze' bzub yu gush yu shcab: "¿Lac mod gyicy na? Gun patroq nin blooy riiñ yaan. Ze' sac fers nin nu gyicy na riiñ ngush, nunu gat loon benu chesan diñ na gun. <sup>4</sup> Na la bi rad lagy na la coz gyicy na. Gun orze' gad cyu nu cuic yu' chu'n ornu shuub dzi nu wayicya'n riiñ." Ni mnii tooy. <sup>5</sup> Orze' bredz yu tub ga yu nu zaab tiñ ni patroq niy. Gaze' nu nay rab yu yu nu bru'ña loga la: "¿La be zaab ru ni patroq ne?", nay.

<sup>6</sup> Orze' yu nu bru'ña loga la ze' nay rab yuy: "Ya zaaba gal rub tii zu tap gaynal litr asecy niy", nay. Orze' na moz nu riib ic ze' nay rab yuy: "Ii gyicy nu ta' de nu zaab ru. Gaze' nu Zub ru zaar tuuba' nu niiñ nu zaab ru tiiñ zu tub gaynal litr asecy", nay. <sup>7</sup> Na ornu blazh mniiy lo yu ze' na, orze' nay rab yu tuuba' yu nu zaab ni patroq niy ze': "Ze' ru, ¿la be zaab ru?", nay. Orze' yu ze' nay rab yu yu nu riib ic ze': "Tub gaynal bult trig", nay. Orze' na moz nu riib ic ze': "Ii gyicy nu ta' de nu zaab ru. Orze' zaar tuuba' gyicy nu niiñ nu zaab ru ochent bult trig", nay. <sup>8</sup> Orze' patroq niy ze' mniiy nu dzi lily na moz niy par nu dzi bzuy altant. Gun de mbecy nu ricy mod ni cualcyer la mbecy gyishlombecy ii, de yu ze' dzi zir zu dey altant gaze' de mbecy nu ricy mod nu rishli.

<sup>9</sup> Ya doo rishlor lac mod gyicy nur de gyel nap nir nu yu' gyishlombecy ii. Gyicy nur ñii tub mod par nu gad amig nir. Gun orze' ornu lazh de gyel nap nir, orze' gad mbecy nu nap nii nuy ru ze' nu cyiñ ru tub la.

<sup>10</sup> Gun yu nu ricy paa nu ñumiiñ, orze' ni' zi'l ricy paay nu sheñ. Nunu yu nu wagyicy paa nu ñumiiñ, ni' zi'l wagyicy paay nu sheñ. <sup>11</sup> Orze' benu wac gyicy cup mbecy consuel lo der nu nac gyel nap ni gyishlombecy ii, ¿orze' walab gaal gac gyicy cup Ñgyoozh consuel lo der nu nac gyel nap nu rishli? <sup>12</sup> Nunu benu wayicy paa der nu suu reña' mbecy, orze' se cyu la cuic la coz nir.

<sup>13</sup> Gun ni tub la mbecy nu ricy riiñ wagyicy yu riiñ ni cyup patroq niy. Gun benu ni, orze' ga zi lagy yu lo tub yu. Ze' tuuba'y cay yu. O nu gyicy paay nuy tub yu. Ze' güii naañ yu lo tuuba'y. Orze' wac zu bich mbecy nu nac Ñgyoozh, nunu ni' zi'l wac zu bich yu nu nac de gyel nap nu yu' gyishlombecy ii laab tub zi'l tiem —nam.

<sup>14</sup> Na ornu güeñ de mbecy fariseo de coz ze' na, como dzi rca dey tiñ, orze' bgubdzaa dey Jesuuz. <sup>15</sup> Orze' na Jesuuz:

—De ru lo mbecy zi'l ricy der nu dzi nap ru. Tees Ñgyoozh rad lagy mi la coz yu' nañ lardoo der. Gun de coz nu rzii mbecy nu tona' la sac, par lo Ñgyoozh rila a' sac ñi —nam—.

### Riidz ni gyel gubier ni Ñgyoozh

<sup>16</sup> Nese gulas gashtal pshuub la tiem ni Waa nu driibnis mbecy, de mbecy rshaal dey de riidz ni leey ni Moisees, gal nu de riidz ni de yu nu mnii por cuen ni Ñgyoozh. Tees nese tiem ze' rshaal dey de riidz nu sac ni gyel gubier ni Ñgyoozh. Nde' nu na zigy mbecy ricy dey fers par nu chu'y ze' nu riib ic Ñgyoozh.

<sup>17</sup> Tees a' biigy zir nit lo baa nu gyishlombecy ii, gaze' nu ricy falt nu gyu' ni tub coz mi' ni leey.

### ¿A gac zaan losa' mbecy?

<sup>18</sup> Benu tub mbecy coy gyicy rishbeey nu zaan yu mñaay, ze' chelaay tuuba' biñ mñaas, orze' yu ze' ricy yu cyi. Nunu yu nu chelaa biñ mñaas nu bzaan ñgyee ze' ni' zi'l ricy yu cyi.

### Riidz ni mbecy guani'ñ gal nu Lázaro

<sup>19</sup> Bzu tub mbecy guani'ñ. Nunu tona' la negy ñgyup rzuy. Nunu de dzi la rzu baay. <sup>20</sup> Ze' bzu ga' tub mbecy zi nu la Lázaro. Bzu laa gyedz dutuub la cuerpi ny. Nunu rzub yu ro' ni guani'ñ ze'. <sup>21</sup> Yu ze' rgyish loy nu mas ñuu de coz nguzh nu yet lag lo yu nu goy. Nunu gal de che' yecha' ma rle' ma ze' nu ta' gyedz niy. <sup>22</sup> Orze' pshuub dzi nu gut mbecy zi ze'. Orze' anc ya nuy yu ze' nu ri gyitoo Abraham. Ni' zi'll yu guani'ñ ze' gut yu. Orze' pcach dey yu.

<sup>23</sup> Orze' lat nu ri mbecy guani'ñ ze', ze' nu rza mbecy gut, orze' pshes nañ ic yu bgüiiy zet. Orze' bzaac yu Abraham nu Lázaro yu' dey tublaazh. <sup>24</sup> Orze' brish ti nuy Abraham. Orze' nay: "¡Uza Abraham, gushni ñuu lagy ya! Orze' zuu nez ru Lázaro nu cyid yu lo, gun sal yu too mbiz yu lo nis. Orze' gyicy yu nu gyag lyudza, gun tona' la rzac zi lo gyi ii", nay. <sup>25</sup> Orze' na Abraham rab yuy: "Uza, b icy nu gyeza' lagy nu ru dzi gusht bzur lat nu gabee mbañ ru. Ze' Lázaro ii dzi shni pcyiñ yu. Orze' na ya ricä consuel niy ii. Ze' ru rzac zir. <sup>26</sup> Ze' tuuba' coz, ri tub gyerlas ily cyaal nez par ze' nu ru rir. Orze' benu ca na tub mbecy nu ri ii galagy yu chay par ze' nu ru rir, orze' wac. Nunu ni' zi'l de yu nu ri ze' nu ru rir waca' cyid dey par ii", na Abraham.

<sup>27</sup> Orze' na yu guani'ñ ze': "Beni orze' ya nishbaa lor uza Abraham nu zuu nez ru Lázaro chay yu' uza. <sup>28</sup> Gun zu gaay bicya. Orze' nii Lázaro lo dey nu gyicy ciudad dey ub yu, gun orze' cue' nu gyed dey lugaar ii ze' nu rzac zi mbecy", nay. <sup>29</sup> Orze' na Abraham: "De yu ze' bi ricy cup dey de riidz nu bzeeñ Moisees, nu de riidz nu bzeeñ de yu nu mnii por cuen ni Ñgyoozh. Orze' rlagy ñi nu gyicy cuen dey fi", nay. <sup>30</sup> Orze' na yu guani'ñ ze': "Laab ni uza Abraham, tees benu tub mbecy gut gyabañ yu nunu gruu zac yu lat dey, orze' ne' dey dela ci yu ricy yu", nay. <sup>31</sup> Tees Abraham nay: "Benu wayicy cuen dey de riidz ni Moisees gal nu de riidz ni de yu nu mnii por cuen ni Ñgyoozh, orze' ni' zi'l waguugy lardoo dey mas tub mbecy gut gyabañ yu", nay —na Jesuuz.

### Cue' lyuu mbecy ni losa'y nu gyicy yu cyi

<sup>17</sup> Orze' Jesuuz nam rab mi de yu nu rsya' lom:

—Dub laa tiem yu' coz a' nap nu ricy ñi nu ricy mbecy cyi. ¡Tees cuaa mbecy nu ricy yu nu gyicy de losa'y cyi! <sup>2</sup> Nap zir benu cyiig dey tub gyita' gyech yeñ yu. Orze' shet lag dey yu lo nisyudoo. Nap zir nde' gaze' nu gyicy yu nu gyicy tub yu shni cyi. <sup>3</sup> ¡Orze' b icy cuidad der!

'Benu tub losa'r ricy Yu cyi, orze' shuu nur Yu. Tees benu ne'y de cyi nu ricy Yu, gyicy sulagy ru niy.<sup>4</sup> Mas tub gagy tir gyicy Yu coz nu walab se'ñ nuy ru nañ tub dzi, nunu benu tub ga ga' tir cyid Yu lor nunu niyy nu wayicya'y de coz nu b icy nuy der ze', orze' gyicy sulagy der niy —nam.

### Coz ily gac gyicy na nu nac nu gyicy cup na consuel

<sup>5</sup> Orze' de Yu nu bloo su Shuaan na Jesuuz na dey rab yum:

—Locyuub ru dę nu fert zir gyicy cup dę consuel lor —na dey.

<sup>6</sup> Orze' Shuaan na Jesuuz nam:

—Benu de ru ricy cup der consuel lo mas ñuu mi', gal nu na mbigy urnishtas, orze' gac nii der lo yag ily ii nu gruu lyañ nu chañ gal lo nisyudoo. Orze' ze' gzub ñi, gnii der. Orze' yag ii gyicy ñi gal nu de ru niir —nam—.

### Mod nu yad ñi nu gyicy moz

<sup>7</sup>'Gyicy pee lan nu zu tub moz ni ca na tub de ru. Orze' ricy Yu riiñ rla'y Yu, o nu rñay shily. Na ornu riy Yu' or gudze nu guay lat naay, wanii gaal der: "Gyeed Zub ru gor gyit", niir.<sup>8</sup> Walab nu ni nii der, sinu niir: "Bzu lily, gun gyicya che. Orze' zu bich ru nu nac ya lat nu rdaw nunu rdø'. Ornu lazh daw ya, orze' gow ru, nunu go'r", niir.<sup>9</sup> Ni' zi'l waric na gras ni moz benu gyicy zi'l Yu gal nu yad ñi nu gyicy Yu.<sup>10</sup> Ni' zi'l de ru, ornu glazh gyicy der gal nu mnii Ñgyoozh nu gyicy der, orze' niir: "Gur moz zi'l nac dę. Wangyicy dę coz ily. Noamaas b icy dę gal nu yad ñi nu gyicy dę", nii der —nam.

### Jesuuz b icy yac mi tii mbecy nu gurat güii lepra

<sup>11</sup> Orze' nez nu ya Jesuuz par Jerusaleeng, bded mi lo de Yu nu ri ru' bzaa ni Samaria, gal nu lo de Yu ni Galilea.<sup>12</sup> Ornu brim ru' tub gyedz mi', orze' bdzeel mi tii mbecy nu rat tub lo güii nu la lepra. Orze' zet Yu' dey<sup>13</sup> rbish ti nu dey mi. Orze' na dey:

—Jesuuz, masht, gushni ñuu lagy dę ya! —na dey.

<sup>14</sup> Orze' ornu Jesuuz bzaac mi dey, orze' nam:

—Gua der lo uz rlyuur ub ru, gun orze' gad lagy Yu nu bi byac der —nam.

Orze' nez nu za dey byac dey ni güii ze'.<sup>15</sup> Orze' tub Yu nu gurat ze', ornu gud lagy Yu nu byac Yu, orze' bish cyay gua ga'y lo Jesuuz. Orze' ye la rniiy nu ryabic Yu gyel mbecy ni Ñgyoozh.<sup>16</sup> Orze' gugyit tiily Yu gal lo Yu la yeñ gyi' Jesuuz nu rbic Yu gras nim. Yu ze' nac Yu mbecy Samaria.<sup>17</sup> Orze' Jesuuz nam:

—¿Walab gaal walab tii mbecy byac Yu? ¿Ca za se gaa de mbecy ze'?<sup>18</sup> ¿A saca' zir Yu nu rbic gras ni Ñgyoozh gaze' mbecy ii? Ni q' nac Yu mbecy guledz —nam.

<sup>19</sup> Orze' nam rab mi mbecy ze':

—Wes su, nunu yaa. Ru bi byac ru par nu b icy cup ru consuel lo —nam.

### ¿Lac mod cyid gyel gubier ni Ñgyoozh?

<sup>20</sup> Orze' la be mbecy fariseo bbugyi' dey lo Jesuuz ben gul cyid gyel gubier ni Ñgyoozh. Orze' nam rab mi dey:

—Mod nu cyid gyel gubier ni Ñgyoozh, nde' walab mod nu zac mbecy.<sup>21</sup> Wac nii mbecy nu par ii zuñ, o par re zuñ. Gun bi zu gyel gubier ni Ñgyoozh lat de ru —nam.

<sup>22</sup> Orze' nam rab mi de Yu nu rsya' lom:

—Shuub dzi ornu de ru galagy der gzac der tub dzi nu ya, biñ nu byac mbecy, gzy lat der, tees or la ze' wazaca' der ya.<sup>23</sup> Gun gruu zac mbecy nu nii dey: "Ii zum", o "Re zum", nii dey. Tees cue' cha güii der, nunu ni cue' cha ca der ich dey.<sup>24</sup> Gun gal nu rzu gyi ni guzii baa nu ricy ñi nu rzu yaa rup chu la' gaa la, orze' ni mod gyicy ya, biñ nu byac mbecy, ornu shuub dzi nu yapa.<sup>25</sup> Tees nu loga la rlagy ñi nu gzac zi. Nunu rlagy ñi nu gzu chu de mbecy nu Yu' tiem na ya.<sup>26</sup> Gal nu guc tiem ni Noé, orze' ni' zi'l mod gac ornu ya, biñ nu byac mbecy, yapa tuuba' tir.<sup>27</sup> Tiem ze' de mbecy nu bdow zi'l dey, nunu go'y, nunu pchelaa dey. Ni b icy dey gashtal ornu pshuub dzi nu gu' Noé nañ barc. Na ornu bru'ña gyey, orze' dela dey gut Yu.<sup>28</sup> Nunu ni' zi'l guc tiem ni Lot. De mbecy row dey, nunu ro' dey. Rzii dey la coz, nunu rut dey la coz. Rnuuz dey la coz, nunu rzaa dey Yu'.<sup>29</sup> Tees ornu bruu Lot lat gyedz Sodoma, orze' bet gyey gyi gal nu asufre. Orze' dela dey gut Yu.<sup>30</sup> Ni' zi'l gac ornu ya, biñ nu byac mbecy, gruu zacä tuuba' tir.

<sup>31</sup> 'Orze' dzi ze' Yu nu zub too Yu', cue' nu gyet Yu nu coy suuy nu Yu' nañ Yu' anzir nu ruu chuy. Nunu ni' zi'l Yu nu ricy riiñ lat naa, cue' ga' cush cyay gyay Yu'y.

<sup>32</sup> Byeza' lagy der mñaa Lot.<sup>33</sup> Gun Yu nu rlagy co nap ub, Yu ze' gnit loy. Tees Yu nu shet ic nu gat, Yu ze' gruu nap Yu.

<sup>34</sup> 'Tees ya rnęe lo der nu rel ze' cyup mbecy riib Yu laab lo tub zi'l nuun nas Yu. Orze' tub Yu gruu gyishlombecy ii nu gyay. Orze' tuuba'y gyiyeeñ Yu.<sup>35</sup> Na cyup biñ mñaa cam rom iiñ gyech. Orze' tub mi gruum gyishlombecy ii nu gyam. Ze' tuuba'm gyiyeeñ mi.<sup>36</sup> Na cyup mbecy riy ricy Yu riiñ lat naay. Orze' tub Yu gruu gyishlombecy ii nu gyay. Ze' tuuba'y gyiyeeñ Yu —nam.

<sup>37</sup> Orze' na de Yu nu rsya' lom rab yum:

—¿Ca gac de coz ze' Shuaan dę? —na dey.

Gaze' nu nam rab mi dey:

—Ze' nu nguaa de cuerpa gut, ze' gyatublaazh dela lyash —nam.

### Riidz tiily ni byud nu guam lo feez

**18** Orze' Jesuuz mniim tub riidz tiily lo dey, gun orze' glyuum ni dey nu zaab nii nu laa dey Ñgyoozh, nunu cue' shi'ñ dey baloor.<sup>2</sup> Orze' nam:

—Tub gyedz bzu tub feez. Orze' ni wanchib lay lo Ñgyoozh, ni wanca lagy Yu lo mbecy.<sup>3</sup> Nunu laab gyedz ze' bzu tub byud. Orze' b icy cup mi tub gyel cha'

ic. Orze' zaab rza lam lo feez ze' nu rgyiiñ mi loy nu gyicy nuy losa' yuum gal nu yad ñi. <sup>4</sup> Orze' bi guzañ tiem feez ze' wangalagy yu locyuub yum. Orze' despuees mnii tooy: "Mas ya wacchibä lo Ñgyoozh nunu ni waca lagya lo mbecy, <sup>5</sup> tees como byud ii wachecam nu ricy seed mi ya, orze' ya locyuubäm nu gad gyel fushtiz nim, gun orze' cue' nu zaab cyid lam. Gun benu zaab cyid lam, orze' gyicy mi nu lazh fers ne", mnii tooy —na Jesuuz.

<sup>6</sup> Orze' na ga' Jesuuz:

—De ru zuub gyidag der de coz nu mnii feez a' nap ze'. <sup>7</sup> Beni, ¿walab gaal wabic Ñgyoozh gyel fushtiz ni de mbecy nu bi pcuim, de mbecy nu dzi rel la rnii num? Walab nu dzi tuñ laam. <sup>8</sup> Ya rnëe lor nu dzach cuic mi gyel fushtiz ni dey. Tees ornu ya, biñ nu byac mbecy, yapä tuuba' tir, ¿a gyapä mbecy nu ricy cup consuel lo gyishlombecy ii? —nam.

Riidz tiily ni mbecy fariseo gal nu mbecy nu rboo tiñ  
por cuen ni gubier Rom

<sup>9</sup> Orze' mniim tuuba' riidz tiily ii lo la be mbecy nu ricy nu nac mbecy nap, ze' rgüii naañ yu lo de' zir losa'y.

<sup>10</sup> Orze' nam:

—Cyup mbecy guay nañ yu' ze' nu driib zily mbecy Ñgyoozh par nu nii nu dey mi. Tub yu nac yu tub mbecy fariseo. Ze' tuuba'y nac yu tub mbecy nu rboo tiñ por cuen ni gubier Rom. <sup>11</sup> Orze' mbecy fariseo ze' bzuy mnii nuy Ñgyoozh. Orze' nay: "Ñgyoozh, ya rica gras nir, gun ya walab nu na gal nu na de' zir mbecy. A' naca gubaan. A' naca mbecy shiñ ricy. A' naca mbecy nu ricy cyi nu biñ mña. Ni a' naca mbecy nu na gal nu na mbecy ii, yu nu rboo tiñ por cuen ni gubier. <sup>12</sup> Ya rca ne nu cue' daw gyit cyup tir nañ tub sman par nu rzu bichä nu nac ru. Nunu lo tii coz nu ricya gan, rloo tuub ñi nu drica' nir", nay. <sup>13</sup> Tees mbecy nu rboo tiñ por cuen ni gubier ze' zet bzuy. Ni wangalagy yu shes nañ loy nu güiyy par baa, sinu pshet yu lyush yu. Orze' nay: "¡Ñgyoozh, gushni ñuu lagy ya, gun ya naca mbecy cyi!" nay.

<sup>14</sup> Orze' na ga' Jesuuz:

—Ya rnëe lo der nu mbecy nu rboo tiñ por cuen ni gubier ze', Ñgyoozh b icy sulagy mi niy. Orze' yay. Ze' mbecy fariseo ze', Ñgyoozh wangyicy sulagy mi niy. Gun cyu zi'l mbecy nu ricy zily ub yu, yu ze' gruu gyel mbecy niy. Ze' yu nu ricy gyel gyidz ni, yu ze' gyed gyel mbecy niy —nam.

Jesuuz bdiiñ mi lo Ñgyoozh ni de yu nguzh mi'

<sup>15</sup> Orze' la be mbecy bru'ña nu dey yu nguzh mi' lo Jesuuz par nu gal yaam dey. Na ornu bzaac de yu nu rsya' lom, orze' brugyi' rdza' dey ni de mbecy nu yad nu de yu nguzh mi' ze'. <sup>16</sup> Orze' Jesuuz bredz mi dey. Orze' nam rab mi dey:

—Bzaan der nu gyecha' de yu nguzh mi' lo. Cue' niir lo dey nu ruu chuy. Gun lugaar ze' nu riib ic Ñgyoozh, nde' lugaar nu yu' mbecy nu na gal nu na de yu nguzh ii. <sup>17</sup> Ya rishli rnëe lo der nu yu nu wazaan nu gyub ic

Ñgyoozh gal nu ricy de yu nguzh ii, orze' wac chu'y ze' nu riib ic mi —nam.

Tub mbecy guani'ñ guay lo Jesuuz

<sup>18</sup> Orze' tub yu nu riib ic lat de mbecy Israeel nay rab yu Jesuuz:

—Masht nap, ¿la ñuu coz rlagy ñi nu gyicya par nu cui mbaña tub la? —nay.

<sup>19</sup> Orze' na Jesuuz rab mi yu:

—¿Lagu rnii ga' ru nu nap ya? Ze' cyu zir nu nap, sinu tub zi la Ñgyoozh. <sup>20</sup> Ru bi rad lagy ru de coz nu rnii Ñgyoozh nu gyicy yac ru. Cue' gal ru mbecy nu wanchelaar. Cue' cut ru losa'r. Cue' gyicy ru gubaan. Cue' riib ru gyidza too losa'r. Pca lagy lo uz ru, nunu pca lagy lo ñaar —nam.

<sup>21</sup> Orze' yu nu riib ic ze' nay rab yum:

—Dela nde' bi b icy yacä ñi nese miiñ la —nay.

<sup>22</sup> Na ornu güeñ mi nde', orze' nam rab mi yu:

—Tees ru ricy falt se tub coz nir nu gyicy ru. Yaa cut ru dela coz nu yu' nir. Gaze' nu tiñ ze' cuic ru ni de mbecy zi. Orze' gyibaa gyad gyel nap nir. Gaze' nu cyid ru cyid car ichä —nam.

<sup>23</sup> Tees ornu güeñ mbecy ze' nu ni mnii Jesuuz, orze' tona' la b icy shniy, gun tona' la guani'ñ yu. <sup>24</sup> Na ornu bzaac Jesuuz nu dzi ricy shniy, orze' nam:

—¡Dzi ga biigy nu chu' mbecy guani'ñ lat de mbecy nu riib ic Ñgyoozh! <sup>25</sup> A' biigy zir ded tub camey gyeegy gyi' tub gyishtiib, gaze' nu chu' tub mbecy guani'ñ lat de mbecy nu riib ic Ñgyoozh —nam.

<sup>26</sup> Orze' de mbecy nu güeñ ze' na dey rab yum:

—Beni, ¿cyu gac gruu mbañ, beni? —na dey.

<sup>27</sup> Gaze' nu nam rab mi dey:

—Coz nu wagac gyicy mbecy, tees Ñgyoozh gac gyicy mi ñii —nam.

<sup>28</sup> Orze' na Bed rab yum:

—Shuaan de, de ya bzeeñ de dela coz nu yu' ne de nu yap ca de ich ru —nay.

<sup>29</sup> Orze' na ga'm rab mi yu:

—Ya rishli rnëe lo der nu cyu zi'l mbecy nu bzeeñ la coz ni nu nac gyel gubier ni Ñgyoozh, orze' de yu ze' sheñ zir gyad niy. De yu nu bzeeñ yu', yu nu bzeeñ mña, yu nu bzeeñ b icy, yu nu bzeeñ uz, yu nu bzeeñ i'ñ, o la zi'l coz nu bzeeñ dey, <sup>30</sup> tees sheñ zir gad niy gyishlombecy ii, nunu tuuba' lo yu ze' gad nu cui mbañ yu tub la —nam.

Mnii ga' Jesuuz nu cut mbecy mi

<sup>31</sup> Orze' Jesuuz gua nu reñ mi trocyup de yu nu rsya' lom. Orze' nam rab mi dey:

—Na gyan par gyedz Jerusaleeng, gun orze' gyu' niñ ni dela coz nu pcaa de yu nu mnii por cuen ni Ñgyoozh nu gzac ya, biñ nu byac mbecy. <sup>32</sup> Gun gu' dey ya yaa mbecy yad. Nunu de yu ze' gubdzaa dey ya. Nunu gab zi dey ya. Nunu co yeñ dey lo. <sup>33</sup> Orze' gaaz dey ya nu cuart. Gaze' nu cut dey ya. Tees ornu za' dzi chon, orze' gyabaña —nam.

<sup>34</sup> Orze' de yu ze' rila wangyet lag dey cuen de nu nde'. Ni wangad lagy dey de coz nu mniim. Tees de coz ze', nde' coz nu wangac gyet lag dey cuen.

### Jesuuz b icy ac mi tub mbecy lo ca'

<sup>35</sup> Ornu bi rgaab Jesuuz tub gyedz nu la Jericó, orze' nez nu zam, ze' Zub tub mbecy lo ca' nu rgyiiñ yu gun.

<sup>36</sup> Na ornu güeñ yu nu dzi rded mbecy zigy loy, orze' bdugyi'y ben la coz rac. <sup>37</sup> Orze' mniim dey nu Jesuuz, biñ nu bruu Nazaret, yad mi lugaar ze'. <sup>38</sup> Orze' brugyi' rbish tiy. Orze' nay:

—¡Jesuuz, nez Dabi, gushni ñuu lagya! —nay.

Orze' de mbecy nu yad lo bdza' dey niy, gun orze' gariy. Tees orze' rbish ti ga' zir yu. Orze' na ga'y:

—¡Jesuuz, nez Dabi, gushni ñuu lagya! —nay.

<sup>40</sup> Gaze' nu gusum. Orze' mniim dey nu cha tee dey lo ca ze'. Na ornu bru'ñay lom na, orze' nam rab mi yu:

<sup>41</sup> —¿La coz rlagy ru gyicy du ru? —nam.

Orze' na lo ca' ze' rab yum:

—Shuaana, rlagy nu zac nap la —nay.

<sup>42</sup> Orze' na Jesuuz rab mi yu:

—¡Na gac gzac ru! Byac ru nu nac nu b icy cup ru consuel lo —nam.

<sup>43</sup> Orze' laab or la ze' lo ca' ze' brugyi' rzac yu. Orze' za cay ich Jesuuz, nunu ryabic yu gyel mbecy ni Ñgyoozh. Nunu ni' zi'l dela mbecy nu bzaac de coz nu guc ze' ryabic dey gyel mbecy ni Ñgyoozh.

### Jesuuz bdzeel mi Zaqueo

<sup>19</sup> Orze' Jesuuz gu'm gyedz Jericó. Orze' brugyi' nu rded mi gyedz ze'. <sup>2</sup> Laab gyedz ze' zu tub mbecy nu la Zaqueo. Yu ze' riib ic yu de mbecy nu rboo tiñ por cuen ni gubier Rom. Nunu tona' la guani'ñ yu.

<sup>3</sup> Orze' yu ze' rlagy yu zac yu Jesuuz, tees wangac gun dzi yu' mbecy. Nunu Zaqueo dzi shub yu. <sup>4</sup> Nde' nu gush yu carer zay par lo. Orze' par nu rlagy yu gad mod nu gzac yum, orze' gup yu lo tub yag garee ze' nu ded mi. <sup>5</sup> Na ornu bded Jesuuz gyi' yag ze', orze' pshes nañ lom bgüiim par ic. Orze' nam:

—Zaqueo, dzach ru bet, gun na rlagy gyeche yu'r —nam.

<sup>6</sup> Orze' Zaqueo dzach bet yu. Orze' dub gal rii la lag yu mniim nu gyam yu'y. <sup>7</sup> Na ornu bzaac de mbecy na, orze' dela dey brugyi' rnii zi dey ni Jesuuz. Orze' mniim dey nu a' nap ricy mi, gun cyiñ mi lo tub mbecy cyi.

<sup>8</sup> Orze' Zaqueo wes suy. Orze' nay rab yu Shuaan na Jesuuz:

—Shuaana, lo dela coz nu yu' ne, ya gricä cyaal ni de mbecy zi, nunu benu ya b icy gubaanä coz ni ca na tub mbecy, orze' tap tant gyabica niy —nay.

<sup>9</sup> Orze' na Jesuuz:

—Dzi na gruu mbañ de mbecy nu yu' yu' ii. Nunu gaza' mbecy ii nac yu nez Abraham. <sup>10</sup> Gun ya, biñ nu byac mbecy, yapä gyishlombecy par nu yuba de mbecy nu bdune', nunu par nu gloo mbaña dey —nam.

### Riidz tiily ni tiñ

<sup>11</sup> Orze' de mbecy ze' rzuub gyidag dey de coz nu rnii Jesuuz. Orze' brugyi' rnii tub riidz tiily lo dey, gun lugaar ze' gaab ga Jerusaleeng, nunu de mbecy ze' mnii too dey nu laab or la ze' cyid gyel gubier ni Ñgyoozh.

<sup>12</sup> Orze' nam rab mi dey:

—Bzu tub mbecy. Orze' yu ze' famil ni rey. Orze' mbecy ze' bruuy zay tub lugaar zet. Zay gashtal tuuba' nasyoong par nu gac yu rey ni de mbecy nu yu' lugaar ze'. Orze' grii ga'y ledz yu ze' nu bruuy. <sup>13</sup> Orze' anzir nu chay, orze' bredz yu tii moz niy. Orze' bzeeñ yu tub nac gaa la tiñ yaa tub ga dey. Orze' nay rab yu dey:

"Gyicy der daljëz nu de tiñ nu bricä ni der ii gal shuub la dzi nu cush cyä tuuba' tir", nay rab yu de moz niy.

<sup>14</sup> Na lugaar ze' nu zay nu gac yu rey ze', de mbecy ze' wangyet lagy dey yu. Orze' bzoo nez dey la be mbecy nu chay lo rey ze' nu cha niiy: "Dë ya walagy dë nu mbecy ii gac yu rey ne de", na dey.

<sup>15</sup> 'Tees yu ze' gu'y nu gac yu rey. Gaze' nu bish cya ga'y briy ledz yu. Na ornu briy na, orze' bredz yu de moz niy, de yu nu bzeeñ yu tiñ yaa ze', par nu gad lag yu la be b icy tub ga dey gan. <sup>16</sup> Orze' bru'ñia mbecy loga la. Orze' nay: "Tiñ nu bzeeñ ru lo, nde' byañ ñii. Byac ñi tii tant", nay. <sup>17</sup> Orze' rey ze' nay rab yu: "Nap tona' la b icy ru. Ru nac ru tub moz nap. Par nu ru b icy paar nur ñumiñ, orze' nde' nu gyicya nu ru gyub ic ru tii gyedz", na rey ze'. <sup>18</sup> Orze' bru'ñia tuuba'y. Orze' nay: "Shuaana, byañ tiñ nir. Byac ñi gaay tant", nay. <sup>19</sup> Orze' na rey ze' rab yu moz niy: "Ya gyicya nu ru gyub ic ru gaay gyedz", nay.

<sup>20</sup> 'Orze' bru'ñia tuuba'y. Orze' nay: "Shuaana, ii yap du tiñ nir. Bdu' choowä ñii nañ tub bay. <sup>21</sup> Gun ya gudzibä lor, gun ru nac ru mbecy cyig y lardoo, gun ru gyash ru coz nu walab nir, nunu ru rte'r ze' nu walab ru rnuuz ru", nay. <sup>22</sup> Orze' rey ze' nay: "Moz a' nap, nu nac riidz nu rniir ya nee nu yu' falt nir. Benu rad lag yu nu nacä mbecy cyig y lardoo, benu rad lag yu nu gyashä coz nu walab ne, benu rad lag yu nu rte' ze' nu walabä mnuuza, <sup>23</sup> ¿orze' lagu wancha nur tiñ ne nañ banc? Orze' ornu ya nri yu', orze' ñgyabic ru ne nu i'ñ ñi", na rey ze'. <sup>24</sup> Orze' na ga' rey ze' rab yu de' zir mbecy nu yu' lugaar ze': "Bloo der tiñ niy. Orze' briic der ñii ni yu nu b icy gan tii tant", nay. <sup>25</sup> Orze' na dey: "Shuaan de, yu ze' bi ricy cup yu tii tant", na dey.

<sup>26</sup> Orze' na rey ze' rab yu dey: "Tees ya rnæe lo der nu yu nu ricy cup sheñ, sheñ zir gad niy. Tees yu nu sac ni, gashtal coz miiñ nu ricy cup yu gruuñ niy. <sup>27</sup> Na de losa' yuu, de yu nu wangalagy nu gacä rey ni ze', da nu der yu ii. Orze' biit der yu ii lo rgüiñ la", nay —na Jesuuz.

### Jesuuz gu'm Jerusaleeng

<sup>28</sup> Na ornu blazh mniim de coz ze' na, orze' gush neza'm zam par Jerusaleeng. <sup>29</sup> Orze' bru'ñam tub lugaar gaab ga tub gyedz nu la Betfagé nu tuuba' gyedz nu la Betania. Lugaar ze' gaab ga b icy ni Ya Oliva.

Orze' ze' bzuu nez mi cyup de yu nu rsya' lom nu cha ga dey lom.<sup>30</sup> Orze' nam rab mi dey:

—Gua der gal gyedz mi' nu ri par lo ze'. Orze' ornu gru'ña der lugaar ze', orze' gyap der tub bur ca cuñ ma, bañ nu nigul gyub la mbecy. Orze' shaagy der ma. Gaze' nu cyid nu der ma.<sup>31</sup> Benu ca na mbecy niiy lo der: "¿Lagu rshaagy der bur ze'?" niiy, orze' nii der, "Shuaan na cyiñ ma nim", nii der —nam.

<sup>32</sup> Orze' de yu nu rsya' lom gua dey, nunu byap dey bur ze' gal nu mnii Jesuuz. <sup>33</sup> Na lat nu rshaagy dey bur ze', orze' na yu nu guni ma rab yu dey:

—¿Lagu rshaagy der bur ze'? —nay.

<sup>34</sup> Orze' de yu ze' nay:

—Shuaan cyiñ ma nim. Nde' nu rshaagy de ma —na dey.

<sup>35</sup> Orze' gaze' nu za nu dey ma lo Jesuuz. Gaze' nu briib dey shab yu ich ma. Orze' pshup dey mi ich ma.

<sup>36</sup> Orze' lat nu zaab za lam, orze' de mbecy rcuaa dey shab yu nez nu zam. <sup>37</sup> Na ornu bru'ñam gaab ga ze' nu gyet nez par gyi' bicy ni Ya Oliva, orze' dela mbecy nu za ca ich mi brugyi' nu rbish ti dey nu yet lag yu. Nunu ii ryabic dey gyel mbecy ni Ñgyoozh nu nac de nusuriidz nu bzaac dey nu bicy mi. <sup>38</sup> Orze' na dey:

—;Dzi ni biñ nu bzuu nez Ñgyoozh nu gac rey ni den! ¡Dela anc nu yu' gyibaa nap zu lagy dey! ¡Rlagy ñi gyabic den gyel mbecy ni Ñgyoozh, biñ nu gya zir zu! —na dey.

<sup>39</sup> Orze' la be mbecy fariseo nu yu' lat de mbecy zigy ze' na dey rab yu Jesuuz:

—Masht, bdza' ni de mbecy nu yad ca ich ru —na dey.

<sup>40</sup> Orze' nam rab mi dey:

—Ya nę̄ lo der nu benu de yu ii gari dey nu cush tiy, orze' gashtal de gyita' ii cush tiñ —nam.

<sup>41</sup> Na ornu bi rgaab rim Jerusaleeng, orze' bgüim par lat gyedz. Orze' ruun mi nu nac de mbecy ze'. <sup>42</sup> Orze' nam:

—;Dzi ga nap bicy na nu ru gyet lag ru cuen ni de riidz nu cuic gyel ri zu dzi na! Tees wagyet lag ru cuen ni de riidz ze'. Orze' wac zac ru gyel ri zu. <sup>43</sup> Na cyid tub dzi nu gri lo' de losa' yuur. Orze' soow dey dela nez nu ruu der. Orze' dub yub la shet yaa dey ru. <sup>44</sup> Orze' gnit lo za' la dey ru. Cut dey de mbecy ledz ru. Nunu ni tub gyita' wazeeña' dey ñi too losa'ñ. Ni zac ru, gun wan-cu' lor Ñgyoozh ornu biid mi nu co mbañ mi ru —na Jesuuz.

### Jesuuz bzu nap mi yu' nu driib zily de mbecy Israeel Ñgyoozh

<sup>45</sup> Na ornu blazh nde' na, orze' gaze' nu gu' Jesuuz nañ yu' nu driib zily mbecy Israeel Ñgyoozh. Orze' brugyi' rboom de mbecy nu nguaa rut nañ yu' ze'. <sup>46</sup> Orze' nam rab mi dey:

—Lat de riidz ni Ñgyoozh rniiñ: "Yu' nę̄ gruu lañ yu' nu gnii nu mbecy ya. Ze' de ru ricy der ñii nu nañ gal na tub blyuu ni gubaan", rniiñ —nam.

<sup>47</sup> Orze' de dzi la Jesuuz rlyuum ni de mbecy nañ yu' nu driib zily dey Ñgyoozh. Orze' de yu zub lo ni uz, gal

nu de yu nu rlyuu leey, gal nu de yu zub lo ni de mbecy gyedz, gusa dey nu ryub dey lac mod cut dey mi.

<sup>48</sup> Tees wangad mod nu ni ñgyicy dey, gun dela mbecy nap rzuub gyidag dey ni de coz nu rniiim.

### De mbecy bdugyi'y lo Jesuuz ca bloom rishbeey

**20** Tub dzi Jesuuz rim nañ yu' nu driib zily mbecy Ñgyoozh. Rlyuum ni de mbecy nunu rshaal mi de riidz nu rbic gyel mbañ. Gaze' nu bru'ña de yu nu riib ic de uz, nu de yu nu rlyuu leey ni Ñgyoozh, gal nu de yu bel ni de mbecy Israeel. <sup>2</sup> Gaze' nu na dey rab yum:

—¿La na rishbeey ricy cup ru nu ricy ru de coz ii? ¿Cyu briic rishbeey ze' nir? —na dey.

<sup>3</sup> Orze' na ga' Jesuuz:

—Ni' zi'l ya dugyi' ga' tub coz lo der. Mnii lo: <sup>4</sup> ¿Cyu bzuu nez Waa nu guay briib nis yu mbecy? ¿A Ñgyoozh bzuu nez mi yu, uti mbecy? —nam.

<sup>5</sup> Orze' brugyi' nu ro dey riidz nu losa'y. Orze' na dey: "Benu niin nu Ñgyoozh bzuu nez mi yu biid yu, orze' niiy: ¿Lagu wancheña lagy der de riidz nu mniiy, beni?, niiy. <sup>6</sup> Nunu wac niin nu mbecy bzuu nez dey yu, gun dzi ga cut mbecy de ub na nu gyita', gun dela dey rzu fert dey nu Waa mniiy por cuen ni Ñgyoozh", na dey. <sup>7</sup> Orze' nde' nu mnii dey nu wangad lagy dey cyu bzuu nez Waa nu griib nis yu mbecy. <sup>8</sup> Orze' Jesuuz nam rab mi dey:

—Benu ni, ni' ya wanę̄ la rishbeey ricy cupa nu ricya de nu nii —nam.

### Riidz tiily ni moz a' nap

<sup>9</sup> Gaze' nu lueg la Jesuuz brugyi' rniiim nu riidz tiily lo de mbecy. Orze' nam rab mi dey:

—Bzu tub mbecy nu mnuuz tub nac lyucy urbyay. Gaze' nu briic yu nu nde' par coz cyaal ni tuuba' mbecy. Gaze' nu gush nez yu zay byaj tuñ tiem. <sup>10</sup> Na ornu byap tiem nu dulag urbyay ze' na, orze' bzuu nez yu tub moz niy lo de yu nu gush coz cyaal ze' par nu cha gyiy ca na de coz nu bruu lo de lyucy urbyay ze', ca na nu dugiy. Tees de yu ze' bgaaz dey moz ze' nunu dzi lay bzuu nez dey yu yay. <sup>11</sup> Orze' gaze' nu yu nu guni lyucy urbyay ze' bzeed yu tuuba' moz niy. Tees ni' zi'l yu ze' mnii zi dey niy, nunu bgaaz dey yu, nunu ni' zi'l dzi lay bzuu nez dey yu yay. <sup>12</sup> Gaze' nu bzeeda' yu nu guni lyucy urbyay ze' tuuba' moz. Orze' yu ze' pcad güii dey yu, nunu bloo dey yu lat lyucy urbyay ze'.

<sup>13</sup> 'Laab nde' la, orze' na yu nu guni lyucy urbyay ze': "Ze' na, ¿lac gyicya? Orze' ya zeeda' iñä nu dzi rca nu chay lo dey. Ca gaal lagy dey loy, gun yu re iñä", nay.

<sup>14</sup> Tees ornu de yu ze' bzaac dey iñä yu nu guni lyucy urbyay ze', orze' na dey rab yu losa'y: "Yu re gyeñ nuy gyel nap ni uz yu. Yaa der chan dut nay, gun orze' gyeñ gyel nap ze' ni den", na dey. <sup>15</sup> Orze' bdu' yaa dey yu ze'. Bloo dey yu lat lyucy urbyay ze'. Orze' biit dey yu.

'¿Na lac gyicya nu guni lyucy urbyay ze' nu de yu nu mnuuz coz cyaal ze' rsa' lagy der? <sup>16</sup> Na chay cut yu

dela yu nu mnuz coz cyaal ze'. Orze' zeeñ yu lyucy urbyay ze' yaa reña' mbecy —nam rab mi dey.

Na ornu güeñ dey de coz nu mniim ze', orze' na dey:  
—¡Cue' nu ni gac ñii! —na dey.

<sup>17</sup> Orze' Jesuuz bgüiim lo dey. Orze' nam rab mi dey:  
—Beni lac mod yaruu de riidz ni Ñgyoozh ze' nu rni-  
iñ:

Gyita' nu mne' biryu,  
byac ñi gyita' nu ricy zir ñi presis  
rniiñ. <sup>18</sup> Cyu zi'l mbecy nu gyes saa lo gyita' ze', orze'  
gzug lay. Ze' benu gyita' ze' gyet lag ñi too ca na mbe-  
cy, orze' gyagyez la mbecy ze' —nam.

<sup>19</sup> Orze' de uz zub lo gal nu de yu nu rlyuu leey ni  
Ñgyoozh ngulagy dey ngu' yaa dey Jesuuz laab or la  
ze', gun gud lagy dey nu lo dey pcaam ornu mniim ri-  
idz tiily ze'. Tees wancu' yaa dey mi, gun rdzib dey lo  
de mbecy.

#### Riidz ni tiñ nu rte' mbecy por cuen ni gubier

<sup>20</sup> Orze' psiiñ dey ni Jesuuz. Orze' bzuu nez dey la be  
mbecy nu chay lom. Orze' mbecy ze' b icy dey tub mod  
nap par lo Jesuuz, tees gal nu bdu' cuen zi'l dey mi ben  
a wad mod nu gu' dey mi yaa de yu nu riib ic por cuen  
ni gubier. <sup>21</sup> Orze' na dey rab yum:

—Masht, dę ya rad lagy dę nu de coz nu rniir gal nu  
de coz nu rlyuur, nde' coz rishli, nunu wagiyicy cuen ru  
la na tub ga mbecy, sinu rlyuur mod nu rlagy Ñgyoozh  
nu chu' den nu rishli. <sup>22</sup> ¿A gruu nap ñi nu griib den tiñ  
nu rbic dey ni yu nu riib ic de nasyoong, uti waruu nap  
ñi? —na dey.

<sup>23</sup> Tees Jesuuz bi gud lagy mi nu walab nu dutuub la  
lardoo dey rniiy lom. <sup>24</sup> Orze' nam rab mi dey:

—Blyuu der tub tiñ lo. ¿Cyu nab ca lo tiñ ii? Nunu  
¿cyu nu la ca looñ? —nam.

Orze' na dey:

—Lo César, yu nu riib ic de nasyoong, gal nu nu lay  
—na dey.

<sup>25</sup> Gaze' nu nam rab mi dey:

—Briic der ni yu nu riib ic de nasyoong coz nu nac  
niy. Nunu briica' der ni Ñgyoozh coz nu nac nim  
—nam.

<sup>26</sup> Orze' wangad mod nu riib dey cyi ic mi nu nac de  
coz nu mniim lo dela mbecy, sinu se za nu zi'l ic dey  
yu'y. Orze' wannii ga' la dey.

#### Lac mod chu' mbecy ornu bi gut yu

<sup>27</sup> Gaze' nu gua la be mbecy saduceo gua güii dey Je-  
suuz. Na de mbecy saduceo rnii dey nu ornu gat mbe-  
cy, orze' wayabañ dey. Orze' nde' nu bdugyi' dey lo Je-  
suuz. Orze' na dey rab yum:

<sup>28</sup> —Masht, Moisees pcaay par dela den nu benu tub  
mbecy gat b icy yu, nunu zeeñ yu mñaay, ze' sac i'ñ mi,  
orze' mbecy ze' rlagy ñi chelaay mñaay b icy yu nu gut  
ze' par nu cuic yu i'ñ mi por cuen ni b icy yu nu gut  
ze', na Moisees. <sup>29</sup> Orze' bzu gag ymbecy nuy b icy yu.  
Orze' yu loga la guud mñaay. Orze' gut yu nunu  
wangyeeñ i'ñ yu ni mñaay. <sup>30</sup> Orze' yu cyup ze' pchelaa

ga'y mi. Orze' ni' zi'l guta'y, nunu wangyeeñ i'ñ yu ni  
biñ mñaay ze'. <sup>31</sup> Orze' ni' zi'l yu chon pchelaa ga'y nu  
biñ mñaay ze'. Orze' za' gag ylaa dey pchelaay mi. Tees  
wangyeeñ i'ñ ni tub la dey nim. <sup>32</sup> Laab nde' la, orze'  
biñ mñaay ze' guta'm. <sup>33</sup> Na ornu shuub dzi nu gyabañ  
de mbecy gut, ¿ca na dey ze' gac mñaay biñ mñaay ze'?  
Gun za' gag ylaa dey pchelaay mi —na dey.

<sup>34</sup> Orze' na Jesuuz rab mi dey:

—Gyishlombecy ii de yu gyeey, nu de biñ mñaay  
rchelaa dey losa'y. <sup>35</sup> Tees de yu gyeey nu de biñ mñaay  
nu yad ñi nu gyabañ gri dey tuuba' lo yu, de yu ze'  
wachelaa ga' dey. <sup>36</sup> Gun orze' wata' dey, sinu chu' dey  
gal nu yu' de anc, nunu gyac dey i'ñ Ñgyoozh nu nac  
nu gyabañ dey. <sup>37</sup> Gun laab Moisees b icy yu nu bi gud  
lagy na nu gyabañ de mbecy nu bi gut lat de riidz nu  
bzeeñ yu ni yag nu rca g yi ze'. Lat de riidz ze' mnii Moi-  
sees nu Shuaan na nac mi Ñgyoozh ni Abraham, nac  
mi Ñgyoozh ni Isaac, nunu nac mi Ñgyoozh ni Jacob,  
rniiñ. <sup>38</sup> Gun Ñgyoozh a' nac mi Ñgyoozh ni mbecy nu  
bi bya' lo la, sinu nac mi Ñgyoozh ni mbecy nu gabee  
zu, gun par mi ze' dela mbecy gabee zu dey —na Jesu-  
uz.

<sup>39</sup> Orze' la be de mbecy nu rlyuu leey ni Ñgyoozh nu  
yu' ze' na dey:

—Masht, ton a' la nap mniir —na dey.

<sup>40</sup> Gun wancuica' dey baloor nu ngugyi' zir yu lom.

#### Cyu nez nac Mesías

<sup>41</sup> Orze' Jesuuz nam rab mi dey:

—¿Lagu rnii dey nu Mesías, biñ nu ca lo cuen nu cyid,  
gruum lat nez Dabi? <sup>42</sup> Gun laab Dabi mniiy tub riidz lo  
libr ni Salmos. Orze' nay:

Ñgyoozh nam rab mi Shuaan,

Gzub ru lugaar ni mbecy nu gya zir zu, par yaa bee ii,

<sup>43</sup> Gashtal gyicy la nu gyicy ru gan losa' yu ur, nam,  
na Dabi. <sup>44</sup> Orze' ¿lac mod gruu Mesías lat nez Dabi,  
benu ub la Dabi rniiy rab yum: "Shuaan", rniiy?

#### Jesuuz mniim nu gyicy cuidad dey nu de mbecy nu rlyuu leey

<sup>45</sup> Orze' dela de mbecy yu' dey rzuub gyidag yu ni Je-  
suuz. Orze' nam rab mi de yu nu rsya' lom:

<sup>46</sup> —Cuidad der nu de mbecy nu rlyuu leey ni Ñgy-  
oozh. Gun de yu ze' yet lagy dey chesay nu shab duñ  
yu, nunu yet lagy dey nu rca lagy mbecy loy ornu rnii  
nu dey yu lat yagi'. Nunu gusht ni dey nu gzub yu lo  
yashily ni de mbecy nu ricy ñi presis nañ yu' nu rsya'  
mbecy riidz ni Ñgyoozh. Nunu yet lagy dey lugaar ni  
de mbecy lily ze' nu yu' sa'. <sup>47</sup> Tees rboo dey yu' byud.  
Orze' par nu rsoow su dey lo de coz a' nap nu ricy nu  
dey byud ze', orze' chi rnii nu dey Ñgyoozh. Nde' nu  
cashtig ily zir gad ni dey —nam.

#### Gun nu briic tub byud

<sup>21</sup> Orze' Jesuuz zum rgüiim lo de mbecy guani'ñ  
lat nu rgu' dey tiñ gun nañ alcansi. <sup>2</sup> Gaze' nu

bzaac mi nu pshet lag tub byud nu dzi gyel zi zu cyup sentab mi' nañ alcansi ze'. <sup>3</sup>Orze' nam:

—Ya rishli rnęe lo der nu byud re mas gyel zi zum, tees sheñ zir briic mi gaze' de' zir mbecy. <sup>4</sup>Gun dela mbecy rbic yu tiñ nu drusub zi'l niy. Ze' byud re gyel zi zum. Tees briic mi dela tiñ nu rcyiñ nim par nu cui mbañ mi —na Jesuuz.

### Jesuuz mniim nu dudily yu' nu driib zily mbecy Ñgyoozh

<sup>5</sup>Orze' la be de yu nu rsya' lo Jesuuz ro dey riidz nu losa'y nu nac yu' nu driib zily mbecy Ñgyoozh. Rnii dey nu tona' la cyit na de gyita' nu gup ñi, nunu rnii ga' dey nu cyit na lo gyita' nu bdudii nu gun nu briic mbecy. Orze' na Jesuuz rab mi dey:

—Shuub tub dzi nu de yu' nu rzac der ii dudily ñi. Ni tub gyita' wayeñ ñi too losa'ñ, sinu delañ nit loñ —nam.

### Jesuuz mniim lac mod gad lagy mbecy ornu shuub dzi ni gyishlombecy

<sup>7</sup>Orze' de yu nu rsya' lom bducki' dey lom. Orze' na dey rab yum:

—Masht, mnii lo de. ¿Gul gac de coz nu mniir ze'? Nunu ñla na muesht gruu zac ornu bi zuu lañ nu gac de coz ze'? —na dey.

<sup>8</sup>Orze' na Jesuuz rab mi dey:

—Bzu der cuidad nis guu mbecy der, gun tona' la zigy mbecy gruu zac yu nu gash yu nu la. Nii dey nu "Ya naca mi ze'", niyi. Nunu nii ga' dey nu "Na bi pshuub tiem", niyi. Tees cue' cha ca der ich yu. <sup>9</sup>Na ornu gyeñ der nu yu' gyel yuu, orze' cue' dzib der, gun nde' coz nu rlagy ñi nu gac nu loga la. Mas ni, tees walab nu bi pshuub la dzi ze' —nam.

<sup>10</sup>Orze' na ga'm:

—Gun tub nac mbecy chu'y gyel yuu nu tub naca' mbecy. Nunu tub gubier chu'y gyel yuu nu tuuba' gubier. <sup>11</sup>Grib duru ily. Nunu cyid cubiñ. Nunu chu' güii zañ lugaar ni gyishlombecy. Nunu baa gruu zac coz nu dzib mbecy. Nunu tona' la muesht ily gruu zac.

<sup>12</sup>Tees anzir nu gac de coz ze', orze' shet yaa dey de ru. Nunu shet zi dey der. Orze' cha nu dey der nañ yu' nu rsya' de mbecy riidz ni Ñgyoozh. Orze' ze' gri bee dey ni der. Gaze' nu ne' dey der nañ yu' gyiib. Nunu cu' cyi dey der lo yu nu riib ic por cuen ni gubier gal nu lo de rey nu nac ya. <sup>13</sup>Gun orze' gad mod nu gzat der ya lo dey. <sup>14</sup>Orze' bicy der tub mod nu cue' zu lily der ben lac mod niir anzir nu char lo dey. <sup>15</sup>Gun ya gricä riidz nu gnii der. Orze' par nu dzi nap gnii der, orze' rila wad mod nu gnii de losa' yuu der nu walab ni gal nu nii der. <sup>16</sup>Tees zigy mbecy cush cya dey ich der. Gaza' uz der, nu b icy ru, nu de famil ni der, nu de amig nir, dela de yu ze' cush cya dey ich ru. Orze' cut dey ca na de ru. <sup>17</sup>Nunu dela mbecy gazi lagy dey lo der nu nac ya. <sup>18</sup>Tees de ru ni tub gyich too der wadune'ñ. <sup>19</sup>Orze' bzu fert der, gun orze' ni mod gad nu gruu mbañ der.

<sup>20</sup>'Ornu gzac der nu dub yub la ru' gyedz Jerusaleeng bi bri lo' soldad, orze' gad lagy der nu sñuu ga gnit loñ. <sup>21</sup>Orze' de yu nu yu' lo yu ni Judea, rlagy ñi nu ruu chu dey par logyi'. Nunu de yu nu yu' lat gyedz Jerusaleeng rlagy ñi nu ruu dey lat gyedz ze'. Ze' de yu nu ricy riiñ lat naa walagy ñi nu gyay par lat gyedz.

<sup>22</sup>Gun tiem ze', nde' tub tiem nu cuic Ñgyoozh cashtig, gun orze' gyu' niñ gal nu bi cañ lat de riidz ni Ñgyoozh. <sup>23</sup>¡Cuaa de biñ mñaa nu segyi zu tiem ze'! Nunu, ¡cuaa ga' de biñ nu rgaagy mdoo tiem ze'! Gun tona' la gzac zi mbecy lugaar ii. Nunu Ñgyoozh tona' la cashtig ily cuic mi ni de mbecy ii. <sup>24</sup>Yu' mbecy nu gat nu mandzicy. Nunu yu' ga' mbecy nu cha nu dey pres de ga la ze' ni gyishlombecy. Orze' de mbecy nu walab mbecy Israel gzuub gyi' dey gyedz Jerusaleeng gal shuub la dzi nu gya' lo tiem nu briic Ñgyoozh ni dey.

### Cyid Jesuuz tuuba' tir

<sup>25</sup>'Orze' gruu zac muesht lo doo, nu lo beey, gal nu lo de bel nu ta' baa. Nunu dela mbecy nu yu' lo yu laz la consuel ni dey. Nunu dzib dey nu dzi siigy nisyudoo gal nu de nguuly loñ. <sup>26</sup>Orze' de mbecy csuun ñi dey nu dzib dey ornu gash dey shcab de coz nu gac gyishlombecy. Nunu gashtal dela fers nu nash baa cueñ ñii. <sup>27</sup>Orze' gaze' nu gzac dey ya biñ nu byac mbecy yapa lat za. Gzac dey nu gac gyicya coz ily. Nunu tona' la lily na. <sup>28</sup>Ornu cugyi' nu gac dela coz ze', orze' briic der baloor, nunu pshes nañ too der, gun sñuu ga bi gla der lo de coz a' nap —nam.

<sup>29</sup>Orze' gaze' nu Jesuuz mniim tub riidz tiily lo dey. Orze' nam:

—Bdu' cuen der mod nu ricy ya las o ca zi'l na yag.

<sup>30</sup>Ornu bi rga'ñ nu driib lyag niñ, orze' de ru bi rad lagy der nu bi yad tiem zig. <sup>31</sup>Orze' ni' zi'l mod, ornu gzac der nu gac de coz ze', orze' gad lagy der nu sñuu ga cyid gyel gubier ni Ñgyoozh.

<sup>32</sup>Ya rishli rnęe lo der nu dela coz ze' gac ñii anzir nu gat dela mbecy nu yu' tiem ze'. <sup>33</sup>Baa nuñ gyishlombecy ii, delañ ded niñ, tees riidz nu ya rnęe, nde' rila waded niñ.

<sup>34</sup>'Bicy cuidad der nis zaan der nu gyacyig lardoo der nu nac de bis, nu nac nu gzugy der, nu nac nu sugic der, nu nac coz ni gyishlombecy ii. Gun orze' sij zi'l gruu zac dzi ze' <sup>35</sup>gal nu ricy tub caa. Gun gruu zac ñi lo dela mbecy nu yu' gyishlombecy. <sup>36</sup>Orze' bzu der altant, nunu mnii nu der Ñgyoozh dub laa tiem, gun orze' gad tub mod nu cue' gzac der lo dela coz nu gac ze', nunu orze' gac gyecha' der lo ya, biñ nu byac mbecy —nam.

<sup>37</sup>Orze' Jesuuz rlyuum ni de mbecy orwi doo nañ yu' nu driib zily dey Ñgyoozh. Ze' or yecheñ, orze' rzam too b icy nu la b icy ni Ya Oliva. <sup>38</sup>Orze' ornu rza' yu, orze' dela mbecy rza dey nañ yu' nu driib zily dey Ñgyoozh par nu rzuub gyidag dey de coz nu rniim.

### Mbecy bloo ic dey lac mod cut dey Jesuuz

**22** Orze' tiem ze' bi rgaab chu' sa' nu gow dey gy-ishtily nu sac lebadur. Sa' ze', nde' rnii dey sa' ni Pas. <sup>2</sup> Orze' de uz zub lo, gal nu de yu nu rlyuu leey ni Ñgyoozh ryub dey mod nu cut dey Jesuuz, tees rdzib dey lo mbecy.

<sup>3</sup> Orze' nuras gu'y nañ lardoo Judas, tub yu nu bruu laab lat de trocyup yu nu bloo sum ze'. Yu ze' lay Judas Iscariote. <sup>4</sup> Orze' yu ze' guay lo de uz zub lo, gal nu lo de yu nu riib ic nañ yu' nu driib zily mbecy Ñgyoozh. Orze' mniiy lo dey nu lac mod gyicy yu nu gu'y Jesuuz yaa dey. <sup>5</sup> Orze' de yu ze' tona' la bet lagy dey. Orze' mniy lo dey nu cyish dey tiñ ni Judas. <sup>6</sup> Orze' Judas "O" nay. Orze' brugyi' ryub yu tub mod nu nap nu gu'y Jesuuz yaa de yu nu rzi lagy lom. Byub yu tub mod nu cue' nu gad lagy de mbecy zigy.

### Jesuuz bzeeñ mi mod nu gow nu dey losa'y

<sup>7</sup> Orze' pshuub dzi ni sa' nu row dey gyishtily nu sac lebadur. Dzi ze' rut dey shily ni sa' ni Pas. <sup>8</sup> Orze' bzuu nez mi Bed nu Waa nu cha dey tub riiñ. Orze' nam rab mi dey:

—Gua der gun zu lily ru nu gyicy den che ni sa' ni Pas —nam rab mi dey.

<sup>9</sup> Orze' na dey rab yum:

—Ca rlagy ru nu chä dë nu gzu lily dë? —na dey.

<sup>10</sup> Orze' nam rab mi dey:

—Ornu chu' der lat gyedz, orze' ze' dzeel der tub mbecy nu ya nu tub re'nis. Orze' ich yu ze' cha ca der gal grii lay yu' ze' nu chu'y. <sup>11</sup> Orze' niir gab ru shuaan yu' ze': "Masht mniim nu yap tuyi' lor ben ca na cuart nu gow mi gyit nu gyicy mi che ni sa' ni Pas nu dë ya, mbecy nu rsya' lom", niir. <sup>12</sup> Orze' gaze' nu yu ze' lyuuuy tub cuart ily nu zub gya. Orze' ze' bi nguaa dela coz nu cyiiñ nañ ñi. Orze' ze' zu ye der nu dow den comid ni sa' ni Pas —nam rab mi dey.

<sup>13</sup> Gaze' nu de yu ze' gua dey lat gyedz. Orze' bzaac dey nu guc ñi gal nu mniij Jesuuz. Orze' ze' bzu ye dey nu gyicy dey che ni sa' ni Pas.

<sup>14</sup> Na ornu byap or nu gyicy mi che na, orze' gusub mi lo mez nu de aposht nim. <sup>15</sup> Orze' nam rab mi dey:

—Ya tona' la rlagya nu gyicy du de ru che ni sa' ni Pas ii anzir nu ya gata! <sup>16</sup> Ya rnëe lo der nu ya rila wayica' che du de ru gashtal shuub la dzi nu gyicya ñii mod nu rlagy ñi ze' nu riib ic Ñgyoozh —nam.

<sup>17</sup> Gaze' nu gush mi tub taz. Orze' brugyi' rbic mi gras ni Ñgyoozh nu nac ñii. Orze' nam rab mi de yu nu rsya' lom:

—Gush der nu nii, nunu briic der nu go' tub ga losa'r. <sup>18</sup> Ya rishli rnëe lo der nu rila wado' ga' ñup ni urbyay gal do' la ñup cub ze' nu riib ic Ñgyoozh —nam.

<sup>19</sup> Gaze' nu gusha'm tub gyishtily. Orze' briic mi gras ni Ñgyoozh nu nac ñii. Gaze' nu blew mi ñii briic mi ni dey. Orze' nam rab mi dey:

—Nii cuerp né nu ricä nu gat par nu gruu mbañ der. Mod ii gyicy der par nu gyeza' lagy der ya —nam.

<sup>20</sup> Orze' ornu blazh nu bdow dey, orze' ni' zi'l b icy mi nu tub taz ñup urbyay. Orze' nam rab mi dey:

—Nii tub trat cub nu gyicy Ñgyoozh nu de mbecy nu nac nu shu reña. Nunu shu reña par nu gruu mbañ de ru. <sup>21</sup> Tees laab lo mez nu zuba ii na, zub yu nu cush cya icha. <sup>22</sup> Tees ya, biñ nu byac mbecy, gata, gun nde' coz nu rlagy Ñgyoozh nu gzacä. Tees jcuaa yu nu cush cya icha!

<sup>23</sup> Orze' de yu nu rsya' lom brugyi' nu rgugyi' dey lo losa'y ben ca na dey cush cyay ich mi.

### Cyu yu nu gya zir zu

<sup>24</sup> Orze' de yu nu rsya' lom bee dey riidz nu losa'y ben ca na yu nu gya zir zu. <sup>25</sup> Orze' na Jesuuz rab mi dey:

—Lat de mbecy nu a' yu' lo Ñgyoozh, de rey ricy yu mandaar de mbecy ledz yu, nunu rnii dey "Patroq" par mbecy nu ricy mandaar, rnii dey. <sup>26</sup> Tees lat de ru wal-ab ni mod rlagy ñi gyicy der, sinu lat de ru yu nu gya zir zu gal gaa la zuy nu de yu feñ. Nunu yu nu riib ic rlagy ñi gyicy yu gal nu ricy de moz. <sup>27</sup> Orze' ¿ca na yu nu gya zir zu: yu nu gzub lo mez o ti yu nu csaa gya'n? Yu nu gzub lo mez, yu ze' gya zir zuy. Tees ya rdedä lat der rzu bichä nu nac der.

<sup>28</sup> 'De ru guc nur ya lat nu bzac deeta. <sup>29</sup> Nde' nu ya gyicya nu gyub ic de ru gal nu gyicy Ñgyoozh nu gyub ic ya. <sup>30</sup> Nunu de ru gow der gyit nunu go' der nis ze' nu gyub icä. Nunu gzub der lo yashily nu gri bee der ni trocyup nac nez mbecy Israeel —nam.

### Jesuuz mniim nu ne' Bed mi

<sup>31</sup> Gaze' nu nam rab mi Simoq:

—Simoo, nuras bdiñ yu rishbeey nu gyicy yu preb de ru. Cyib yu der gal nu rgyib dey trig. <sup>32</sup> Tees ya mnish-baa lo Ñgyoozh nu nac ru, gun orze' cue' nu checar nu gyicy cup ru consuel lo. Nunu ru ornu cush cyar lo, orze' locyuub ru de' zir de bicy ru nu fert zir gyicy cup dey consuel lo —nam.

<sup>33</sup> Orze' Simoq nay rab yum:

—Shuaanä, ya bi zu la ca na nu zu. Chä du ru nañ yu' gyiib. Mas gashtal gata du ru —nay.

<sup>34</sup> Orze' Jesuuz nam rab mi yu:

—Bed, ya nëe lor nu laab rel na anzir nu cuedz nguel, orze' ru niir nu a' yu' lor ya chon tir —nam.

### Bi yad gaab tiem nu zac zim

<sup>35</sup> Orze' gaze' nu Jesuuz bdugyi'm lo dey. Orze' nam:

—Ornu ya bzuu neza de ru nu char riiñ, mas sac gyish gyit ni der, mas sac nerbid tiñ ni der, mas sac reña' gyid lab der, tees ¿a yu' coz nu bicy falt ni der? —nam.

Orze' na dey:

—Se la la coz bicy falt né dë —na dey.

<sup>36</sup> Orze' nam:

—Tees na reña' mod gyicy der. Benu mbecy ricy cup yu gyish gyit niy, orze' cha nuy ñi. Ni' zi'l benu ricy cup

yu nerbid tiñ, orze' cha nuy ñi. Nunu benu tub mbecy sac mandzicy niy, orze' rlagy ñi cut yu chacyet niy. Orze' gad tiñ nu ziy mandzicy niy.<sup>37</sup> Gun ya rnée lo der nu rlagy ñi nu gyu' niñ gal nu bi cañ lat de riidz ni Ñgyoozh nu nac ya. Rniiñ: "Briib cuen dey mi lat de mbecy a' nap", rniiñ. Tees dela coz nu bi cañ nu nac ya rlagy ñi nu gyu' niñ —nam.

<sup>38</sup> Orze' na dey:

—Shuaan dë, ii mbish cyup mandzicy —na dey.

Orze' nam rab mi dey:

—Beñ nde' —nam.

### Jesuuz mnii num Ñgyoozh Getsemaní

<sup>39</sup> Orze' gaze' nu Jesuuz gush nez mi zam. Laab gal mod nu nil ricy mi, zam b icy ni Ya Oliva. Orze' de yu nu rsya' lom za ca dey ich mi.<sup>40</sup> Na ornu bru'ñam lugaar ze', orze' nam rab mi dey:

—Mnii nu der Ñgyoozh, gun orze' cue' nu gyicy de coz cyi gan der —nam.

<sup>41</sup> Orze' bruu chum lo dey. Nu rnii gal nu tuñ nu zaan na tub gyita' ni tuñ bruu chum lo dey. Orze' gusu tib mi nu mnii num Ñgyoozh.<sup>42</sup> Orze' nam:

—Ñgyoozh uza, benu gac, bloo chu taz nu rlagy ñi nu gzuub ru'. Tees cue' gac ñii gal nu rlagy ya, sinu gal nu rlagy ru —nam.

<sup>43</sup> Orze' lat nu rnii num Ñgyoozh, orze' bet tub anc nu bruu gyibaa par nu cuic yu fers nim.<sup>44</sup> Orze' par nu tonal la deet rac nañ lardoom, orze' fert zir mnii num Ñgyoozh. Orze' nis nu rlag lom, nde' nañ gal nu nadzuj reñ yet ñi lo yu.

<sup>45</sup> Na ornu blazh mnii num Ñgyoozh, orze' zam ze' nu nguaa de yu nu rsya' lom. Na ornu bru'ñam lo dey, orze' nguaa nas dey, gun rsuun lañ dey nu dzi ricy shni dey.<sup>46</sup> Orze' nam rab mi dey:

—¿Walab gaal nguaa nas der? Wesh te der nunu mnii nu der Ñgyoozh, gun cue' nu gyicy de coz cyi gan der —nam.

### Za nu dey Jesuuz pres

<sup>47</sup> Lat nu gabee rnii Jesuuz zum, orze' bru'ñam mbecy zigy. Orze' Judas, tub yu nu bruu lat trocyup de yu nu bloo sum ze', yu ze' Zub lo dey. Orze' becha'y lom nu bdoi chit lom.<sup>48</sup> Tees Jesuuz nam rab mi yu:

—Judas, ¿a nu nac tub chit gu'r ya, biñ nu byac mbecy, yaa de yu nu rzi lagy lo? —nam.

<sup>49</sup> Na ornu bzaac de yu nu yu' nu Jesuuz de coz nu bici nu dey mi, orze' na dey rab yum:

—Shuaan dë, ¿a shet yaa de yu nu mandzicy? —na dey.

<sup>50</sup> Orze' tub de yu ze' pcam güiiy tub moz ni yu nu riib ic de uz. Orze' pcyug yu gyidag beey.<sup>51</sup> Orze' na Jesuuz:

—Bzaan nu nde' —nam rab mi yu.

Gaze' nu gul yaam gyidag nu guud güii ni moz ze'. Orze' b icy mi nu byanapa'lñ.<sup>52</sup> Orze' gaze' nu nam rab mi de yu Zub lo ni uz, gal nu de yu nu rña nañ yu' nu

driib zily mbecy Ñgyoozh, gal nu de yu bel ni de mbecy Israeel, de yu nu yad teem ze'. Orze' nam:

—¿Lagu yad tub der ya gal nu rza tub dey tub gubaan: nu mandzicy nu garot?<sup>53</sup> Gun de dzi la bri du der nañ yu' nu driib zily mbecy Ñgyoozh. Tees ni wancu' yaa der ya. Tees na pshuub or nu gyicy der gal nu rlagy ru, tub or nu riib ic nuras —nam rab mi dey.

### Bed mniiy nu a' yu' loy Jesuuz

<sup>54</sup> Gaze' nu za nu dey Jesuuz pres par yu' yu nu riib ic de uz. Orze' Bed zet zet zi'l zaab yu za cay ich mi.<sup>55</sup> Na gazel la lol'i ni yu' ze' nguaa gyi. Orze' ze' nguaa de mbecy rbidz dey gyi. Na ornu bru'ñam Bed, orze' gusuba'y lat dey.<sup>56</sup> Na ornu bzaac tub criad nu Zub yu rbidz yu gyi ze', orze' mbi la bgüiim loy. Orze' nam:

—Fiñ ii laaba' Jesuuz re rded nuñ —nam.

<sup>57</sup> Tees Bed mniiy nu walab. Orze' nay rab yu criad ze':

—Biñ mñaa, ni a' yu' lo ya yu ze' —nay.

<sup>58</sup> Na guchi ga' zi'l nu mnii criad ze', orze' bzaac tuba'y Bed. Orze' nay rab yu Bed:

—Ru laab losa'r yu re —nay.

Orze' Bed nay:

—Walab. Walab losa' ya yu re —nay.

<sup>59</sup> Tub or gaal guc nu ni mniy nu Bed, orze' na tuba'y:

—Wanted la nu yu ii nac nuy yu re. Gun gaza' yu ii nac yu mbecy Galilea —nay.

<sup>60</sup> Orze' Bed nay:

—Walab. Ni wagad lagya la coz rniir —nay rab yuy.

Orze' laab or la ze', lat nu gabee rnii ru' Bed, orze' bredz nguel.<sup>61</sup> Orze' Shuaan na Jesuuz bish cyam bgüiim lo Bed. Orze' Bed byeza' lagy yu de riidz nu mnii Jesuuz loy ornu nam: "Dzi na, anzir nu cuedz nguel, orze' ru niir nu a' yuor lor ya chon tir", nam.

<sup>62</sup> Gaze' nu bruu Bed ze' zay. Nunu tonal la zi ruun yu zay.

### De mbecy bgubdzaa dey Jesuuz

<sup>63</sup> Orze' de yu nu rña Jesuuz rgubdzaa dey mi, nunu ii rgyi su dey mi.<sup>64</sup> Orze' psoow dey lom. Orze' na dey rab yum:

—Mnii ben cyu bdi ru! —na dey.

<sup>65</sup> Nunu zañ zir coz mnii dey nu rab zii dey mi.

### Jesuuz zam lo junt Zub lo

<sup>66</sup> Na ornu bza' yu tuuba' dzi na, orze' byatublaazh de yu bel ni de mbecy Israeel, gal nu de yu Zub lo ni uz, gal nu de yu nu rlyuu leey ni Ñgyoozh. Gaze' nu za nu dey Jesuuz lat junt Zub lo. Orze' bdugyi' dey lom. Gaze' nu na dey rab yum:

<sup>67</sup> —Mnii lo de, ¿a laab ru Mesías? —na dey.

Orze' nam:

—Ze' benu neñ nu laaba, ze' de ru wayeña lagy der.

<sup>68</sup> Nunu benu dugyi' lo der ni wanii der.<sup>69</sup> Tees na bi yad shuub or nu ya, biñ nu byac mbecy, chesuba par yaa bee Ñgyoozh, biñ nu gac gyicy dela coz —nam.

<sup>70</sup> Orze' dela dey bdugyi'y lom. Orze' na dey rab yum:  
—Orze' ḫa laab ru nac ru i'ñ Ngoozh beni? —na dey  
rab yum.

Orze' nam rab mi dey:

—Laab der rnir nu ya nacə —nam.

<sup>71</sup> Gaze' nu na dey:

—¿La' zir be teshtig rlagy ñi par yu ii? Gun de ub na  
gueñ gyidag lan de riidz nu briib ru' ub yu —na dey.

### Jesuuz zum lo Pilato

<sup>23</sup> Orze' dela mbecy wes su dey. Gaze' nu za nu  
dey Jesuuz lo Pilato. <sup>2</sup> Na ornu bru'ña dey loy,  
orze' brugyi' nu driib dey cyi toom. Orze' na dey:

—De ya byap də yu ii ricy yu nu radza de mbecy  
ledzə. Nunu rniiy nu walagy ñi nu rish də tiñ nu rboo  
dey por cuen ni yu nu riib ic de nasyoong. Nunu ricy yu  
ub yu nu nac yu Mesías. Nunu nac yu rey ricy yu —na  
dey.

<sup>3</sup> Orze' Pilato nay rab yum:

—A ru nac ru rey ni de mbecy Israeel? —nay.

Orze' nam rab mi yu:

—Laab ni gal nu ru mniir —nam.

<sup>4</sup> Orze' gaze' nu Pilato mniiy lo de yu Zub lo ni uz, gal  
nu lo de mbecy. Orze' nay:

—Ya wangyap la ni tub la falt ni mbecy ii —nay.

<sup>5</sup> Tees de mbecy fert la zu dey. Orze' na dey:

—Yu ii ricy yu nu deet rac ledz də nu nac coz nu rlyuy.  
Nu loga la ni b icy yu Galilea. Na ga' ni' zi'l ricy yu lo  
de yu ni Judea ii —na dey.

### Jesuuz zam lo Herodes

<sup>6</sup> Ornu Pilato gueñ yu de nu nde', orze' bdugyi'y lo  
dey ben a nac mi mbecy Galilea. <sup>7</sup> Na ornu gud lag yu  
nu laab mi mbecy Galilea, orze' bzuu nez yum zam lo  
Herodes, gun yu ze' riib ic yu Galilea por cuen ni gu-  
bier Rom, nunu tiem ze' ryi Jerusaleeng. <sup>8</sup> Orze'  
Herodes tonal la bet lag yu ornu bzaac yu Jesuuz, gun  
bi rac tiem rlag yu gzac yum, gun gueñ yu de coz nu  
rnii mbecy nu ricy mi. Orze' rgyish loy nu rlag yu zac  
yu tub nusuriidz nu gyicy mi. <sup>9</sup> Orze' zañ coz bdugyi'y  
lom. Tees Jesuuz rila wannium. <sup>10</sup> Ni' zi'l ze' yu' de uz  
zub lo gal nu de yu nu rlyuu leey ni Ngoozh. Orze'  
bzu fert dey, nunu briib zir dey cyi toom. <sup>11</sup> Orze'  
Herodes gal nu de soldad niy shiñ b icy nu dey mi.  
Orze' bigy nu naañ dey mi. Orze' ptiish dey mi tub ne-  
gy fin. Orze' bzuu nez dey mi tub tira' nu zam lo Pilato.  
<sup>12</sup> Orze' dzi ze' Herodes nu Pilato b icy dey rishnap nu  
losa'y. Ze' anzir rzi lag yu dey lo losa'y.

### Mnii dey nu Jesuuz rlag y ñi gat mi

<sup>13</sup> Orze' Pilato b icy tublaazh yu de uz Zub lo, gal nu  
de yu bel ni de mbecy Israeel, gal nu de mbecy gyed  
ze'. <sup>14</sup> Orze' nay:

—De ru yad nu der mbecy ii lo, nunu mnii der nu ricy  
yu nu radza mbecy. Tees ya bdugyi' biigya loy lo rgüii  
la der, nunu wangyapə ni tub la falt ni yu nac cyi nu  
briib der tooy. <sup>15</sup> Nunu ni' zi'l Herodes wangyap yu falt

niy. Nde' nu ptush cyay yu yad yu lo. Gun yu ii sac la  
cyi nu b icy yu nu gyicy ñi nu yad ñi nu gat yu. <sup>16</sup> Orze'  
nde' nu ya grica cashtig niy. Orze' gaze' nu glaa yu  
—nay rab yu de mbecy.

<sup>17</sup> Na de ña'n la, lat nu rzu' sa' ni Pas, Pilato rlag y ñi  
laay tub pres par nu gyicy yu nu gyet lag y de mbecy.

<sup>18</sup> Tees orze' dela dey dub ru' lay rbish tiy. Orze' na  
dey:

—Biit yu! ¡Orze' glaar Barrabás! —na dey.

<sup>19</sup> Gun Barrabás mne' dey yu nañ yu' gyiib par nu bi-  
cy yu nu byach mbecy, nunu par nu biit yu mbecy.

<sup>20</sup> Tees Pilato rlag yu nu glaay Jesuuz. Orze' gaze' nu  
mniy lo de mbecy tuuba' tir. <sup>21</sup> Tees orze' de mbecy dzi  
zir ye rbish ti dey. Orze' na dey:

—Cut ruy lo cruzzi! Cut ruy lo cruzzi! —na dey rab yu  
Pilato.

<sup>22</sup> Orze' Pilato tir chon la mniy lo de mbecy. Orze'  
nay:

—La ñuu coz a' nap b icy yu? Ya wangyapə ni tub la  
cyi nu b icy yu nu gyicy ñi nu yad ñi nu gat yu. Orze' ya  
grica cashtig niy. Orze' gaze' nu glaa yu —nay.

<sup>23</sup> Tees de mbecy ze' rzaab rbish ti la dey nu rnii dey  
nu gat mi lo cruzzi. Orze' par nu tanta' rbish ti dey,  
orze' nde' nu "O" mnii Pilato. <sup>24</sup> Orze' Pilato pshet ic yu  
nu gyicy yu gal mod nu mnii dey. <sup>25</sup> Gaze' nu blaay yu  
nu mnii mbecy. Yu ze' yu nu b icy nu byach mbecy  
nunu yu nu biit mbecy. Orze' bgu'y Jesuuz yaa dey par  
nu gyicy dey ca na nu rlag y dey.

### Pcaa dey Jesuuz lo cruzzi

<sup>26</sup> Na ornu za nu dey Jesuuz nu caa dey mi lo cruzzi,  
orze' nez nu za dey bdzeel dey tub mbecy Cirene nu la  
Simoo. Yu ze' bruuy ngush yeed yu. Orze' pshet yaa  
dey yu. Orze' briib dey cruzzi nim yeñ yu. Orze' b icy  
dey nu guy cruzzi ze' cha cay ich Jesuuz.

<sup>27</sup> Nunu tonal la mbecy zig yu ca ich mi. Nunu lat  
dey yu' zig yu' biñ mñaa. Ruun dem nunu rbish tim za ca  
dem ich mi nu nac nu tonal la ricy shni dem nu nac Je-  
suuz. <sup>28</sup> Orze' Jesuuz bgüim lo de biñ mñaa ze'. Orze'  
nam:

—Der biñ mñaa Jerusaleeng, cue' gun der nu nac ya,  
sinu biiñ der nu nac ub der nunu nu nac i'ñ der. <sup>29</sup> Gun  
shuub dzi nu nii mbecy: "Dzi ni biñ mñaa nu wanchu'  
i'ñ. Dzi ni biñ mñaa nu wangaal mdoo. Nunu ni' zi'l dzi  
ni biñ mñaa nu wangaag mdoo", nii dey. <sup>30</sup> Orze' cu-  
gyi' de mbecy nu nii gab yu de b icy: "¡Bish cya too  
de!", nii, nunu nii ga' dey gab yu de b icy miñ: "¡  
pcach de ya!" nii. <sup>31</sup> Gun benu ni mod ricy dey nu yag  
ca', orze' dzi zir gyicy dey ornu cha wach ñi —nam.

<sup>32</sup> Nunu za nu ga' dey cyup mbecy nu b icy cyi par nu  
caa dey yu tublaazh nu Jesuuz lo cruzzi. <sup>33</sup> Na ornu  
bru'ña dey lugaar nu la Calavera, orze' pcaa dey Jesu-  
uz lo cruzzi. Nunu pcaa ga' dey cyup mbecy cyi ze' lo  
cruzz. Tub yu pcaa dey yu par yaa beem. Ze' tuuba'y  
pcaa dey yu par yaa reg mi. <sup>34</sup> Orze' na Jesuuz rab mi  
Ngoozh:

—Ngoozh uzə, b icy sulagy ni dey, gun wagad lag y  
dey dey coz nu ricy yu —nam.

Orze' de soldad bloo dey suert par nu cyez dey shab mi lat losa'y. <sup>35</sup> Orze' de mbecy yu' dey rgüiiy lom. Nunu gal de fushtiz bgubdzaa dey mi. Orze' na dey:

—Bloo mbañ yu reña' mbecy. Na rlagya'ñ nu co mbañ yu ub yu benu rishli gaal nac yu Mesías, biñ nu bloo zu Ñgyoozh —na dey.

<sup>36</sup> De soldad ni' zi'l bgubdzaa dey mi. Orze' becha' dey lom nunu briic dey ñup zii go'm. <sup>37</sup> Orze' na dey rab yum:

—jBenu ru nac ru rey ni de mbecy Israeel, bloo mbañ ub ru! —na dey.

<sup>38</sup> Ze' par too cruuze' pcaa dey tub yala nu ta' letr. Orze' rniiñ: "Yu ii rey ni de mbecy Israeel", rniiñ.

<sup>39</sup> Na tub yu nu ca cuit mi mnii ziy nim. Orze' nay rab yum:

—Benu ru nac ru Mesías, biñ nu ca lo cuen nu cyid, orze' bloo mbañ ub ru, nunu bloo mbaña' dë ya —nay.

<sup>40</sup> Tees tuuba' losa'y bdza'y niy. Orze' nay rab yuy:

—¿A wacchib ru lo Ñgyoozh? Gun bi ta' den laaba' lo cashtig. <sup>41</sup> Gun de ub na yad ñi nu gzac zin, gun na drish na de coz nu b icy na. Tees yu ii rila wangyicy yu coz a' nap —nay rab yu losa'y.

<sup>42</sup> Orze' na ga'y rab yu Jesuuz:

—Jesuuz, gyeza' lagy ru ya, ornu cugyi' nu gyub ic ru de mbecy nir —nay.

<sup>43</sup> Orze' Jesuuz nam rab mi yu:

—Ya rishli rnęe lor nu dzi na bi ri nur ya gyibaa —nam.

### Gut Jesuuz

<sup>44</sup> Orze' tub gyiib trocyup or widoo, orze' bet cow duub la lo yu gashtal gyiib chon or gudze. Orze' bzu yaa. <sup>45</sup> Ni doo wancuic ñi yaa. Ze' negy nu zaab lugaar yon ni yu' nu driib zily mbecy Ñgyoozh pshelañ. Cyaal, cyaal lañ guc ñi. <sup>46</sup> Orze' Jesuuz ye la brish tim. Orze' nam rab mi Ñgyoozh:

—jUzä, byash lardoo! —nam.

Na ornu blazh mniim nde', orze' gut mi.

<sup>47</sup> Na ornu bzaac yu nu riib ic de soldad Rom de coz nu guc na, orze' brugyi' ryabic yu gyel mbecy ni Ñgyoozh. Orze' nay:

—Rishli gaal yu ii nac yu mbecy nu sac falt ni —nay.

<sup>48</sup> Orze' dela mbecy zigy nu yu' lugaar ze', ornu bzaac dey nu ni guc, orze' gush nez dey zay. Rgyich yaa dey lyush yu. <sup>49</sup> Tees dela mbecy nu yu' lo Jesuuz, nunu gaza' de biñ mñaas, biñ nu za ca ich mi nese nu bruum Galilea, orze' de yu ze' byeeñ gay lugaar ze'. Orze' zet yu' dey rgüiiy de coz nu guc ze'.

### Pcach dey Jesuuz

<sup>50</sup> Bzu tub mbecy nu la See. Yu ze' bruuy tub gyedz ni Judea nu la Arimatea. Nunu nac yu tub mbecy nap. Nunu ricy yu mod nu se'ñ. Nunu yu ze' nac yu tub yu nu zu riiñ lat de junt zab lo ni de mbecy Israeel. <sup>51</sup> Yu ze' rgyish loy lo gyel gubier ni Ñgyoozh, nunu wangyicy yu tub zi'l riidz nu de yu nu gu' junt ze' ben lac mod ñgyicy nu dey Jesuuz. <sup>52</sup> Orze' gush nez yu guay lo Pilat

to bdiiñ yu cuerpe ni Jesuuz. <sup>53</sup> Na ornu bi pshet yu cuerpe nim lo cruuze, orze' ptiish yu cuerpe nim ze' tub sab nu byaa nu lino. Gaze' nu briy ñi nañ tub gyerbaa cub nu bduguuñ nañ tub gyita'. Gyerbaa ze' nigul cui la añ. <sup>54</sup> Nde' guc ñi dzi byer or gudze. Dzi ze' rzu lily dey par nu zu lagy dey sab.

<sup>55</sup> Orze' de biñ mñaas nu guca ich Jesuuz nese nu bruum Galilea gua nu dem See par ru' baa ni Jesuuz. Orze' bzaac dem lac mod briy cuerpe nim. <sup>56</sup> Na ornu bri dem yu' na, orze' bzu lily dem coz zguul gal nu coz nu coo dem cuerpe ni Jesuuz.

Orze' ornu pshuub dzi sab, orze' bzu lagy dem gal nu rniiñ lo leey nu gyicy dem.

### Jesuuz byabañ mi

**24** Nomina, dzi loga ni sman, orze' de biñ mñaas ze' napor la za dem ru' baa ni Jesuuz. Za nu dem coz zguul nu bzu lily dem ze'. <sup>2</sup> Na ornu bru'ña dem ru' baa ze' na, orze' bzaac dem nu saca' gyita' nu noow ru' baa ze' se'ñ. <sup>3</sup> Orze' gu' dem gyeegy ni baa ze'. Orze' bzaac dem nu saca' cuerpe ni Shuaan na Jesuuz. <sup>4</sup> Orze' pcan shcab ni dem yu'm. Orze' wagad lagy dem lac gyicy mi. Orze' sij la bruu zac cyup mbecy. Orze' gusu dey garee lom. Ze' zu dey negy cacy iily la. <sup>5</sup> Tona' la gudzib dem. Orze' gusab tiily la dem gal lo yu la. Orze' de mbecy ze' nay rab yu dem:

—¿Lagu ryub der tub biñ mbañ lat de añ ii? <sup>6</sup> Gun mi ze' saca'm ii, sinu bi byabañ mi. Bicy der nu gyeza' lagy der de coz nu mniim lat nu gusam Galilea. <sup>7</sup> Mniim nu rlagy ñi nu gu' dey ub mi, biñ nu byac mbecy, yaa de mbecy cyi. Orze' de yu ze' rlagy ñi caa dey mi lo cruuze. Orze' nu za' dzi chon, orze' gyabañ mi, nam —na de mbecy shab cacy ze'.

<sup>8</sup> Orze' gaze' nu de mi ze' byeza' lagy dem de riidz nu mniim Jesuuz. <sup>9</sup> Orze' bruu dem ru' baa ze' bish cya dem yam. Orze' byoo dem rishlo de trotub de aposht, gal nu lo de' zir mbecy de coz nu guc. <sup>10</sup> De biñ nu bya too riidz ze', mi ze' Li, biñ nu bruu Magadán, nu Wan, gal nu Li ñaa Santiag, gal nu de' zir de biñ mñaas. Orze' mniim dem riidz ze' lo de aposht. <sup>11</sup> Tees de yu ze' guzii dey nu riidz ton zi'l rnii dem. Orze' wancheña lagy dey.

<sup>12</sup> Orze' mas ni, tees Bed gush yu carer zay ru' baa ni Jesuuz. Na ornu bru'ñay na, orze' bgüiiy nañ gyerbaa ze'. Orze' bzaac yu se sab zi'l nim mbish ñi. Orze' bish cyay yay par yu'. Nunu za nu la ic yu nu nac de coz nu guc.

### Jesuuz bruu zaca'm lo cyup de yu nu rsya' lom

<sup>13</sup> Orze' laab dzi ze' cyup de yu nu rsya' lom za dey tub gyedz nu la Emaés. Gyedz ze' riñ tub nu rnii trotub miily metr nu ruun Jerusaleeng ru'ñan gyedz ze'. <sup>14</sup> Na nez nu za dey, orze' ro dey riidz nu nac dela coz nu guc. <sup>15</sup> Na lat nu ro dey riidz na, orze' laab Jesuuz becha'm lo dey. Orze' gaze' nu za num dey tublaazh. <sup>16</sup> Orze' mas bzaac dey mi, tees wangyu' lo dey mi.

<sup>17</sup> Orze' nam rab mi dey:

—¿La riidz ro der yad ru? —nam.

Orze' guca dey nu ricy shniy. <sup>18</sup> Orze' tub yu nu rsya' lom ze' lay Cleofas. Orze' nay rab yum:

—¿A tub zi la ru mbecy nu pcyiiñ Jerusaleeng nu wagad lagy de coz nu sa guc ze'? —nam.

<sup>19</sup> Orze' na ga' Jesuuz:

—La coz guc? —nam.

Orze' na ga'y:

—De coz ni Jesuuz, biñ nu bruu Nazaret. Mi ze' guc mi tub biñ nu rnii por cuen ni Ñgyoozh. Ñgyoozh, gal nu dela mbecy b icy dey Jesuuz par tub mbecy nu ton'a la coz ily ricy nunu ton'a la coz ily rnii. <sup>20</sup> Orze' de uz zub lo gal nu de fushtiz ledz na bgu' dey mi yaa mbe-cy, gun orze' gyicy dey nu gat mi lo cruu. <sup>21</sup> Tees d e ya brish lo de nu mi ze' nac mi biñ nu co mbañ de mbecy Israeel. Tees na bi bza' chon dzi nu gut mi. <sup>22</sup> Tees la be de biñ mñaa nu nac nu de ya b icy mi nu za du la ic de. Gun cas ru' zu gua dem ru' baa ni Jesuuz. <sup>23</sup> Na ornu wangyap dem cuerpe ni Jesuuz, orze' bish cya dem yam. Orze' mnii dem nu bruu zac la be anc lo dem. Orze' anc ze' mniy nu Jesuuz mbañ mi. <sup>24</sup> Orze' gaze' nu gua la be de losa' gal ru' baa ze'. Orze' bzaac yu nu ni gaal ni zu, gal nu mnii de biñ mñaa ze'. Tees wansaca' dey Jesuuz —na dey.

<sup>25</sup> Orze' na Jesuuz:

—¡Dzi ga cyig too der! ¡Dzi ga gyee cheña lagy der de riidz ni de yu nu mnii por cuen ni Ñgyoozh! <sup>26</sup> ¿Wal-ab gaal walagy ñi nu zac zi Mesías anzir nu gyam lo gyel lily nim? —nam rab mi dey.

<sup>27</sup> Orze' gaze' nu brugyi' nu rshaal mi dela se' lat riidz ni Ñgyoozh ze' nu rzaat ñi ub mi. Gush lam de riidz nu bzeeñ Moisees. Orze' yad mi dela libr nu pcaa de yu nu mnii por cuen ni Ñgyoozh rshaal mi lo dey.

<sup>28</sup> Na ornu bri dey gyedz nu rsaap dey ze', orze' Jesuuz b icy lam nu zu ga zi'l mi. <sup>29</sup> Tees de yu ze' pcueez dey mi nu gyeeñ mi num dey. Orze' na dey rab yum:

—Byeeñ la nu de ya, gun na bi gudze. Sñuu ga gyecheñ —na dey.

Orze' Jesuuz gu'm nañ yu' par nu gyeñ num dey.

<sup>30</sup> Na ornu bi nguaa dem lo mez na, orze' bdu' yaam gysishtily. Orze' briic mi gras ni Ñgyoozh nu nac ñii. Orze' blew mi ñii briic mi ni dey. <sup>31</sup> Orze' or la ze' de yu ze' byaal la urlo dey. Orze' byu' lo dey mi. Orze' mi ze' mnit mi lo dey. <sup>32</sup> Orze' na dey rab yu losa'y:

—¿A walab nu nap zu lagy na nez nu yap na ornu mniim lo den, nunu ornu pshaal mi riidz ni Ñgyoozh lon? —na dey.

<sup>33</sup> Orze' wancuez la dey, sinu gush nez la dey yay Jerusaleeng. Na ornu bri dey na, orze' ze' byap dey za' trotub la de yu nu rsya' lom yu' tublaazh dey nu de' zir de losa'y. <sup>34</sup> Orze' na de yu nu rsya' lom rab yu de yu nu bri ze':

—Rishli ni gaal Shuaan na byabañ mi, gun bruu zac mi lo Simoo —na dey.

<sup>35</sup> Orze' de yu nu bri ze' byoo dey rishlo dey nu la coz bzaac dey nez. Nunu mnii ga' dey lac mod byu' lo dey mi ornu psug mi gysishtily.

### Jesuuz bruu zac mi lo de yu nu rsya' lom

<sup>36</sup> Na lat nu gabee yu' dey rniiy de coz ze', orze' bruu zaca' Jesuuz lat dey. Orze' mnii num dey Ñgyoozh.

Orze' nam:

—Gyel ri zu briñ lat der —nam.

<sup>37</sup> Orze' de yu nu rsya' lom ton'a la gudzib dey. Bis guzii dey mi. <sup>38</sup> Orze' Jesuuz nam rab mi dey:

—¿Lagu rdzib der? ¿Lagu wacheña lagy der nu ya nu nde? <sup>39</sup> Güii der ya nunu güii der gyi'. Laab ya nu nde'. Güii der ya, nunu gul yaa der ya. Bis a' ricy cup ñi cuerpe niñ gal nu rzac der nu na ya —nam.

<sup>40</sup> Orze' ornu blazh mniim de nde', orze' blyuum yaam lo dey gal nu gyi'm. <sup>41</sup> Orze' de yu ze' gabee wacheña lagy dey ti laab mi, tanta' nu yet lagy dey, nunu tanta' nu za nu ic dey. Orze' Jesuuz nam rab mi dey:

—¿A yu' ñuu la coz ni der don? —nam rab mi dey.

<sup>42</sup> Orze' briic dey tub la' bel nu guuy lo boo gom.

<sup>43</sup> Orze' gush mi ñii. Orze' bdom ñii lo rgüii dela dey.

<sup>44</sup> Orze' gaze' nu nam rab mi dey:

—Coz nu bzaca, nde' mnœ̄ lo der lat nu gabee gusa du der. Orze' dela coz nu cañ lo leey ni Moisees, nu dela coz nu cañ lat de riidz ni de yu nu mnii por cuen ni Ñgyoozh, gal nu dela coz nu cañ lo libr ni salmos nu nac ya, dela riidz ze' byu' niñ —nam.

<sup>45</sup> Orze' b icy mi nu gyet lag dey cuen de riidz ni Ñgyoozh. <sup>46</sup> Orze' nam rab mi dey:

—Bi cañ nu ya, Mesías, biñ nu ca lo cuen nu cyid. Cañ nu rlagy ñi gata. Tees ornu za' dzi chon, orze' gyabaña'. <sup>47</sup> Nunu rniiñ nu de mbecy rlagy ñi cha shaal dey riidz ni Ñgyoozh lo dela mbecy nu nac ya. Nii dey nu rlagy ñi ne' mbecy dela cyi nu ricy yu, gun orze' Ñgyoozh gyicy sulagy mi ni dey. Gash dey Jerusaleeng. Orze' cha dey dutuub la gyishlombecy nu cha shaal dey riidz ze'. <sup>48</sup> Orze' de ru nac der teshtig ni de coz nu guc ze'. <sup>49</sup> Orze' ya gzuu nez Espiriit Yon ni Ñgyoozh nu cyid mi lat der gal nu Ñgyoozh uz na bi mne' ic mi nu cuic mim ni der. Tees de ru gyeñ der gyedz Jerusaleeng ii gashtal gyicy la Ñgyoozh gyibaa nu cyiiñ der. Orze' gaze' nu gruu der char —nam.

### Jesuuz gup mi gyibaa

<sup>50</sup> Orze' gaze' nu Jesuuz bruu num dey gyedz Jerusaleeng. Guam num dey gal Betania. Orze' ze' psh-es nañ yaam bdiiñ mi lo Ñgyoozh nu locyuub mi dey.

<sup>51</sup> Orze' lat nu ni b icy mi bruu chum lo dey. Gaze' nu gup mi gyibaa yam. <sup>52</sup> Na ornu blazh nu briib zily dey mi, orze' bish cya dey yay par Jerusaleeng. Nunu ton'a la bet lagy dey yay. <sup>53</sup> Nunu de dzi la yu' dey nañ yu' nu driib zily de mbecy Ñgyoozh nu ryabic dey gyel mbecy nim.

# San Juan

Biñ nu la riidz ni Ñgyoozh byac mi mbecy gyishlombe-  
cy

**1** Nese anzir nu gya gyishlombecy, biñ nu la riidz ni Ñgyoozh nil bi zum. Mi ze' nac num Ñgyoozh, nunu nac mi Ñgyoozh. **2** Nunu nil bi zum nu Ñgyoozh nese anzir nu gya gyishlombecy. **3** Dela coz nu psa' lagy Ñgyoozh, mi ze' bicy mi ñii. Nunu ni tub la coz wansa' lagy Ñgyoozh benu walab nu nac mi ze'. **4** Mi ze' nac mi biñ nu rbic gyel mbañ nu rishli. Nunu gyel mbañ ze' nañ gal nu na tub yaa nu ricy ñi nu gyal shcab ni de mbecy. **5** Ze' yaa ze' bzu laañ ze' nu cow, nunu de ze' nu cow ze' rila wangyicy ñi gan nu nsoow ñi lo yaa ze'.

**6** Bzu tub mbecy, yu nu bzuu nez Ñgyoozh. Yu ze' lay Waa nu driibnis mbecy. **7** Biid yu par nu cuic yu nu gad lagy de mbecy nu cyu biñ nu na gal nu na yaa ze', gun orze' de yu nu gzuub gyidag de riidz nu niiy, orze' de yu ze' gyicy cup dey consuel lom nu nac de riidz nu mniyi. **8** Yu ze' walab biñ nu na gal nu na yaa ze', sinu Ñgyoozh bzuu nez mi yu biid yu par nu cuic yu nu gad lagy mbecy cyu nac mi ze'. **9** Gun biñ nu nac yaa nu rishli ze' bi yad mi par nu cuic mi nu gad lagy dela mbecy.

**10** Laab biñ nu la riidz ni Ñgyoozh ze' brim gyishlombecy. Nunu mas Ñgyoozh psa' lagy mi dela coz ni gyishlombecy nu nac mi, tees de mbecy ni gyishlombecy wangyu' lo dey mi. **11** Brim ledz mi tees de mbecy nu yu' ledz mi wannii dey "O" nim. **12** Dela mbecy nu "O" mniyi nim nunu bicy cup dey consuel lom, orze' de yu ze' briic mi mod ni dey nu gyac yu i'ñ Ñgyoozh. **13** Walab nu byac dey i'ñ Ñgyoozh par nu gul dey ni tub biñ mñaa, nunu walab nu byac dey i'ñ Ñgyoozh par nu nac coz nu rlagy ca na tub mbecy, sinu byac dey i'ñ Ñgyoozh gal nu ub mi bicy mi.

**14** Nunu biñ nu la riidz ni Ñgyoozh ze' byac mi mbecy gyishlombecy, nunu pcyiñ mi lat den. Nunu ton'a' la gugy nam num de ub na. Nunu rniiim dub ub la coz rishli. Nunu de ub na bi bzaac na gyel lily nim, gyel lily nu yad ñi nu gad ni biñ nu tub zi zu ni uz. **15** Waa bzat yum. Orze' ye la mniyi:

—Mi ze' biñ nu bzat̄ ornu mn̄ē lo der nu biñ nu yad par ich̄a gya zir zum gaze' ya, gun mi ze' nil bi zum anzir nu gal ya —nay.

**16** Par nu nac nu dzi gugy nam, zaab nap la ricy num de ub na. **17** Gun briic Ñgyoozh leey ni den nu nac Moises. Ze' nu nac Jesuuz, nap ricy num de ub na nunu blyuum de coz rishli nim lo den. **18** Ni tub la mbecy

wacsac dey Ñgyoozh. Tees i'ñ mi, biñ nu tub zi zu nim, nac num mi. Mi ze' briic mi nu gad lagy na la nam.

**Waa nu driibnis mbecy rniiy cyu nac Jesucrisht**

**19** Nii de coz nu mniyi Waa ornu de fushtiz ni de mbecy Israael bzuu nez dey de uz gal nu la be de mbecy nu bruu lat nez Levita nu yu' Jerusaleeng nu cha dey cu-gyi'y lo Waa. Orze' na dey rab yu Waa:

—¿Cyu nac ru? —na dey.

**20** Orze' Waa naal la mniyi lo dey cyu nac yu. Orze' nay:

—Yā walab Mesías, biñ nu ca lo cuen nu co mbañ mbecy —nay.

**21** Orze' bdugyi' ga' dey loy:

—¿Ze' cyu gaal nac ru beni? ¿A walab Elías, yu nu mniyi por cuen ni Ñgyoozh, nac ru beni? —na dey.

Orze' na ga' Waa:

—Walab yu ze' nacā —nay.

Orze' na ga' dey:

—¿A walab ru yu nu rnii por cuen ni Ñgyoozh nu ca lo cuen nu cyid? —na dey.

Orze' na Waa:

—Walab —nay.

**22** Orze' na ga' dey:

—¿Cyu nac ru beni? Gun rlagy ñi nu gya du de rasoo lo dey nu bzuu nez de yā nu yapā. ¿Cyu nac ub ru? Mniyi beni —na dey.

**23** Orze' na Waa rab yu dey:

—Yā nacā tub mbecy, tub yu nu bzat Isaías, yu nu mniyi por cuen ni Ñgyoozh ornu nay: "Zaab ti' tub mbecy rbish tiy tub lugaar ub zi. Orze' nay: Bicy nap der nañ lardoor gal nu ricy nap der tub nez nu ded tub yu lily, gun bi cyid Shuaan den", na Isaías —na Waa.

**24** Na de yu nu bzuu nez de mbecy fariseo nu gua tuyi'y lo Waa, **25** orze' na dey rab yu Waa:

—Ze' benu a' nac ru Mesías, biñ nu ca lo cuen nu co mbañ mbecy, ni a' nac ru Elías, ni a' nac ru yu nu rnii por cuen ni Ñgyoozh, ze' ¿lagu rbic ru nu zu nis mbecy beni? —na dey.

**26** Orze' na Waa rab yu dey:

—Yā driibnisā mbecy nu nis, tees lat de ub na zu tub mbecy nu a' yu' lo der. **27** Mi ze' cyid mi par lo ya, tees ya wangyapā nu shaagya ni gyid nu Zub gyid lab mi —nay.

**28** Dela de coz ii guc ñi tub lugaar ni tub gyedz nu la Betania, par tub la' ga' ru' gyroow Jordaan. Nde' lu-gaar ze' nu driibnis Waa de mbecy.

### Jesuuz nam gal nu na tub shily nu gac gun lo Ñgyoozh

<sup>29</sup> Na tuuba' dzi orze' bzaac Waa Jesuuz nu yad mi loy. Orze' nay:

—Güii der, re yad tub mbecy nu na gal nu na tub shily nu gac gun lo Ñgyoozh. Mi ze' cyib mi cyi de mbecy nu yu' gyishlombecy. <sup>30</sup> Mi ze' biñ nu bzata lo der ornu ya mneę: "Biñ nu yad par ich ya, gya zir zum gaze' ya, gun mi ze' nil bi zum anzir nu gal ya", mneę. <sup>31</sup> Wangad lagya cyu nac mi, tees ya yapä nu griib nisä mbecy nu nis gun par nu cu' lo de mbecy Israael mi cyu nac mi —nay.

<sup>32</sup> Nii riidz nu mnii Waa ornu nay:

—Ya bzaacä Espiriit Yon ni Ñgyoozh nam gal nu na tub begy bet mi. Bruum gal gyibaa. Gusub mi too mi ze'. <sup>33</sup> Ya gabee wangyu' lom cyu nac mi. Tees Ñgyoozh, biñ nu bzuu nez ya nu griib nisä mbecy nu nis, nam rab mi ya: "Ornu gzac ru nu gyet Espiriit Yon ne too tub mbecy, orze' mi ze' biñ nu cuic Espiriit Yon ze' ne ni de mbecy", nam. <sup>34</sup> Ya bi bzaacä de coz ze'. Nde' nu ya nacä teshtig nu mi ze' nac mi i'ñ Ñgyoozh —na Waa.

### De yu nu psya' loga la lo Jesuuz

<sup>35</sup> Na orze' tuuba' dzi, orze' Waa laab lugaar ze' zuy nu cyup de yu nu rsya' loy. <sup>36</sup> Na ornu bzaac yu nu bd-ed Jesuuz, orze' nay:

—Güii der. Re rded tub mbecy nu na gal na tub shily nu gac gun lo Ñgyoozh —nay.

<sup>37</sup> Na ornu güeñ cyup de yu nu rsya' loy de riidz ze', orze' za dey za cay ich Jesuuz. <sup>38</sup> Orze' Jesuuz bish cyam, nunu bzaac mi nu yad dey. Orze' nam rab mi dey:

—¿La coz ryub der? —nam.

Orze' na dey rab yum:

—Masht, ¿ca rcyiñ ru? —na dey.

<sup>39</sup> Orze' na Jesuuz rab mi dey:

—Yaa der chan gun cha güiir ca rcyiñä —nam.

Orze' gush nez dey za nuy mi. Orze' bzaac dey ca rcyiñ mi. Orze' byeeñ nu dey mi gua la nu gudze ze', gun bi yu'n tub gyiib tap or gudze ornu bri num dey ze'.

<sup>40</sup> Tub de yu nu güeñ ni Waa, yu nu gua ca ich Jesuuz, lay Ndrees bicy yu Simoq Bed. <sup>41</sup> Orze' lueg la gua yub yu bicy yu Simoq. Orze' nay rab yub:

—Dē ya bi bdzeel dē Mesías, bin nu ca lo cuen nu co mbañ den —nay.

(Mesías, nde' tub zi'l yaruuñ nu Crisht.)

<sup>42</sup> Orze' lueg la za nuy Simoq lo Jesuuz. Orze' Jesuuz mbi la bgüiim loy. Orze' nam rab mi yu:

—Ru lar Simoq i'ñ Waa. Tees na loo la ru Cefas. (Cefas nu Bed tub zi'l nu yaruu riidz ze'. Nde' gyita').

### Jesuuz bredz mi Lip nu Natanael

<sup>43</sup> Na tuuba' dzi, orze' Jesuuz mnii ic mi gyam tub lugaar ni Galilea. Orze' ze' bdzeel mi Lip. Orze' nam rab mi yu:

—Da, da ca ichä —nam.

<sup>44</sup> Na Lip nac yu tub mbecy gyedz nu la Betsaida.

Laab ze' ledz Ndrees nu Bed. <sup>45</sup> Orze' Lip guay gua yub yu Natanael. Na ornu bdzeel yuy, orze' nay rab yuy:

—Na bi bdzeel dē biñ nu bzat Moisees lo de gyicy ze' nu ca leey ni Ñgyoozh. Laab mi ze' biñ nu bzat de yu nu mnii por cuen ni Ñgyoozh. Mi ze' Jesuuz i'ñ See. Ze' ledz mi, nde' Nazaret —na Lip.

<sup>46</sup> Orze' na ga' Natanael:

—¿Walab gaal gac gruu ñuu la coz nap gyedz Nazaret? —na Natanael.

Orze' na Lip rab yuy:

—Da güiir ben a walab —nay.

<sup>47</sup> Na ornu Jesuuz bzaac mi nu byagaab Natanael lom, Orze' nam:

—Güii, ii yad tub mbecy nu rishli gaal nac mbecy Israael, tub yu nu sac gyel rguu nañ lardoo —nam.

<sup>48</sup> Orze' Natanael bdugyi'y lom:

—¿Lac bicy ru? ¿Lagu nu gud lagy ru lac mbecy na? —nay.

Orze' na Jesuuz rab mi yu:

—Ya bzaacä ru lat nu gusub ru gyi' yalas anzir nu cuedz Lip ru —nam.

<sup>49</sup> Orze' na Natanael rab yum:

—Masht, ru nac ru i'ñ Ñgyoozh. Ru nac ru rey nu nac Shuaan de mbecy Israael —nay.

<sup>50</sup> Orze' Jesuuz nam rab mi yu:

—¿A ricy cup ru consuel lo nu nac zi'l nu mneę nu bzaacä ru nu gusub ru gyi' yalas? Coz ily zir gzac ru par lo gaze' coz nu bzaac ru na —nam.

<sup>51</sup> Orze' na ga'm rab mi dey:

—Ya rishli rnęe lo der nu gzac der nu gyal gyibaa, nunu gzac der nu chup gyet la de anc ni Ñgyoozh lo ya, biñ nu byac mbecy —nam.

### Gu' tub fandang tub gyedz nu la Caná

<sup>2</sup> Na ornu bi bza' chon dzi nu yu' fandang tub gyedz nu la Caná lo yu ni Galilea. Laab lat ze' ri ñaa Jesuuz. <sup>2</sup> Nunu ni' zi'l mnii ga' dey lo Jesuuz nu lo de yu nu rsya' lom nu cha dey lo fandang ze'. <sup>3</sup> Na ornu blazh ñup ni urbyay nu go' dey, orze' na ñaa Jesuuz rab mim:

—Blazh ñup ni urbyay —nam.

<sup>4</sup> Orze' na ga' Jesuuz rab mi ñaam Li:

—Ña, ¿lagu rniir riidz ze' lo? Nigul shuub dzi nu gzac mbecy de gyel lily né —nam.

<sup>5</sup> Orze' na ga' ñaam rab mi de moz nu yu' lo fandang ze':

—Bicy der la zi'l coz nu gniiñ —nam.

<sup>6</sup> Na, ze' nguaa ga' shuup re' nu byaa nu gyita'. Nañ re' ze' rgu' de mbecy Israael nis par nu rnaa dey nunu par nu rgyiib dey la coz gal nu rnii leey ni dey. Ze' tub ga de re' ze' rzu' tub cyaal gaynal, o tub setent litr nis nañ ni. <sup>7</sup> Orze' na Jesuuz rab mi de moz ze':

—Bdu' der nis nañ de re' re gal dzaa lañ —nam.

Orze' de yu ze' pchaa dey ñi gal ru' lañ. Orze' nis ze' byac ñi ñup ni urbyay. <sup>8</sup> Orze' na ga'm rab mi dey:

—Na bda' der nis ii gua nu der go' yu nu riib ic lo fandang —nam.

Orze' gua nu dey ñi go' yu nu riib ic ze'. <sup>9</sup> Orze' yu nu riib ic ze' b icy yu preb nis nu byac ñup ni urbyay ze', sinu wangad lagy lay ca bruuñ. Tees de moz nu bda' nis ze' gud lagy dey ca bruuñ. Orze' yu nu riib ic ze' bredz yu yu nu nac nob ze'. <sup>10</sup> Orze' nay rab yuy:

—Dela mbecy nu loga la rbic dey ñup nap ni urbyay go' de mbecy nu rde' lo fandang. Na ornu dzi bi go' shaad dey ñup nap ze', orze' rbic dey de ñup corient go' dey. Ze' ru bzeeñ ru ñup nap gashtal na rbic ru go' dey —nay.

<sup>11</sup> Nde' nusuriidz nu b icy mi nu loga la tub gyedz nu ri lo yu ni Galilea nu la Caná. Ze' blyuum gyel lily nim lo de mbecy, nunu de yu nu rsya' lom b icy cup zir dey consuel lom.

<sup>12</sup> Na ornu bded ze', orze' bruum Caná gush nez mi zam nu ñaam, gal nu de b icy mi, gal nu de yu nu rsya' lom za num dey par Capernaum. Ze' pcyiiñ mi la be dzi.

### Jesuuz bzu nap mi yu' nu driib zily de mbecy Israeel Ñgyoozh

<sup>13</sup> Na ornu sñuu ga shuub dzi nu chu' de mbecy Israeel sa' ni Pas, orze' Jesuuz yam par Jerusaleeng.

<sup>14</sup> Na ornu brim Jerusaleeng, orze' gu'm lol' ni yu' nu driib zily de mbecy Israeel Ñgyoozh. Orze' byap mi de mbecy nu rut tor, nu shily, gal nu begy ni de mbecy. Nunu byapa'm de mbecy nu nguaa lo mez nu rchaa tiñ ni de mbecy nu bruu reña' lugaar. <sup>15</sup> Na ornu bzaac mi de coz ze', orze' bzaam tub chicot nu duu lyaar. Orze' nu nde' pcyuu num dey, nu tor niy, gal nu shily niy. Bloom dey ich lo' ni yu' ze'. Orze' ptush las mi tiñ ni de yu nu rchaa tiñ ze' nunu blaagy yaam mez ni dey. Orze' brush las tiñ ni dey. <sup>16</sup> Ze' de yu nu rut begy ze' nam rab mi dey:

—Blooo der de bañcyug ii lugaar ii. Cue' gyicy der yu' ni Ñgyoozh uzä par tub yagyi' —nam.

<sup>17</sup> Orze' de yu nu rsya' lom byeza' lagy dey ze' nu rniñ lat riidz ni Ñgyoozh: "Yä rzu fertä nu nac yu'r gashtal wagagyee ga' la", rniiñ.

<sup>18</sup> Orze' de yu Zub lo ni de mbecy Israael bdugyi' dey lom:

—¿La ñuu muesht lyuur lo d e par nu gabe nu ricy cup ru rishbeey nu ricy ru de coz ii? —na dey.

<sup>19</sup> Orze' na ga'm rab mi dey:

—Ptily der yu' ni Ñgyoozh ii. Orze' yä zu napä ñii nañ chon dzi tuuba' tir gal nu nañ —nam.

<sup>20</sup> Orze' na de mbecy Israael rab yum:

—Cyyu Zub shuup ña'n gu' dey b icy yu riiñ, gaze' nu bya' lo yu' ni Ñgyoozh ii. Ze' ru na'r nu nañ chon zi dzi bi gzu nap ru ñii —na dey.

<sup>21</sup> Tees yu' ni Ñgyoozh nu bzat Jesucrisht, nde' cuerpnim. <sup>22</sup> Tees ornu byabañ mi, orze' de yu nu rsya' lom byeza' lagy dey nu bi mniim nu ni gac ñii. Orze' guña lagy dey de riidz ni Ñgyoozh gal nu de riidz nu mnii Jesuuz.

Jesuuz rad lagy mi la na nañ lardoo dela mbecy

<sup>23</sup> Lat nu Jesuuz rded mi Jerusaleeng, lat sa' ni Pas, ton a' la zigy mbecy b icy cup dey consuel lom nu nac de nusuriidz nu b icy mi. <sup>24</sup> Tees Jesuuz wangyicy cup mi consuel lo dey gun gud lagy mi lac mod na dela mbecy. <sup>25</sup> Ni tub la mbecy walagy ñi nu nii dey lom mod nu na de mbecy, gun ub mi rad lagy mi la na nañ lardoo dela dey.

### Nicodemo beey riidz nu Jesuuz

<sup>3</sup> Bzu tub mbecy fariseo lay Nicodemo. Nac yu tub mbecy nu zu riiñ lat de mbecy Israeel. <sup>2</sup> Orze' tub rel guay gua güiijy Jesuuz. Orze' nay rab yum:

—Masht, d e yä rad lagy d e nu Ñgyoozh bzuu nez mi ru yad ru par nu lyuur ni de mbecy, gun ni tub la mbecy wac gyicy dey de nusuriidz nu ricy ru ze' benu walab Ñgyoozh nac num yu.

<sup>3</sup> Orze' na Jesuuz rab mi yu:

—Yä rishli rnëe lor nu ni tub la mbecy wazac yu lo gyel gubier ni Ñgyoozh benu wal yu tuuba' tir —nam.

<sup>4</sup> Orze' bdugyi' Nicodemo lom:

—¿Par lac mod gyicy tub mbecy gush nu gal yu tuuba' tir? ¿Walab gaal gac chu' tub mbecy gush nañ ñaay par nu gal yu tuuba' tir? —nay.

<sup>5</sup> Orze' na ga' Jesuuz rab mi yu:

—Yä rishli rnëe lor nu ni tub la mbecy wazac yu lo gyel gubier ni Ñgyoozh benu wal yu lat nis, nunu benu wal yu nu nac Espiriit Yon ni Ñgyoozh. <sup>6</sup> Ornu tub mbecy ral yu ni ñaay, orze' mbecy zi'l naç yu. Tees benu tub mbecy gal yu nu nac Espiriit Yon ni Ñgyoozh, orze' ni Ñgyoozh nac yu. <sup>7</sup> Cue' cha nu ic ru nu rnëe lor nu rlagy ñi nu gal der tuuba' tir. <sup>8</sup> Gush ñuu shcab mod nu ricy bi. Ca zi'l lugaar druuñ. Reñ ru rsiigy ñi, tees wagad lagy der ca druuñ, nunu wagad lagy der ca par chañ. Ni' zi'l wagad lagy mbecy lac mod rac nu ral yu nu nac Espiriit Yon ni Ñgyoozh.

<sup>9</sup> Orze' na ga' Nicodemo rab yu Jesuuz:

—¿Ze' lac mod gac de coz nu rniir ze'? —nay.

<sup>10</sup> Orze' na Jesuuz:

—Gunca ru nac ru tub moscuel Zub lo ni de mbecy Israael, ¿ze' a wagad lagy ru de coz ze'? <sup>11</sup> Yä rishli rnëe lo der de coz nu rad lagy d e, nunu d ric d e rasoo ni de coz nu bzaac d e. Ze' ni tub la der wagnii der "O" nu de riidz nu rnëe d e. <sup>12</sup> Ze' benu wacheña lagy der ornu rnëe de coz nu rac gyishlombecy ii, ze' yegar benu nee ga' de coz nu rac gyibaa cheña ga' lagy der.

<sup>13</sup> Ni tub la mbecy nigul chup yu gyibaa, sinu tub zi

yä, biñ nu byac mbecy, brüü gyibaa brj gyishlombecy ii. <sup>14</sup> Gal nu Moisees pcaay tub bily gyiib lo tub yag.

Orze' pshes su dey yag ze' lat nu gusa de too bel nin tub lugaar ub zi, ni' zi'l yä, biñ nu byac mbecy, rlagy ñi nu caa dey yä lo tub yag nu she su dey ñi. <sup>15</sup> Gun orze' de yu nu gyicy cup consuel lo, orze' de yu ze' gad gyel mbañ nu tub la ni dey —nam—.

### Ñgyoozh rcam dela mbecy

<sup>16</sup>'Gun Ñgyoozh tona' la rcam de ru mbecy nu yu' gyishlombecy ii. Nde' nu gal briic lam ya i'ñ mi nu tub zi zu nim ni der. Gun orze' de mbecy nu gyicy cup consuel lo, de yu ze' wanit lo dey, sinu gad nu cui mbañ dey tub la. <sup>17</sup> Gun Ñgyoozh wanseed mi ya, biñ nu nac i'ñ mi, gyishlombecy ii par nu niim nu yu' falt ni de mbecy, sinu par nu co mbañ mi dey nu nac ya.

<sup>18</sup>'Cyu zi'l mbecy nu gyicy cup consuel lo ya, i'ñ Ñgyoozh, de yu ze' wanii Ñgyoozh ti yu' falt niy. Tees de yu nu wayicy cup consuel lo, Ñgyoozh bi mniim nu yu' falt ni dey nu nac nu wangyicy cup dey consuel lo ya, i'ñ mi nu tub zi zu nim. <sup>19</sup>Rnii Ñgyoozh nu yu' falt ni dey gun ya, biñ nu lyuu yaa ni coz rishli lo de mbecy, yapä gyishlombecy ii, tees de mbecy bet zir lagy dey ze' nu cow, gaze' ze' nu yu' yaa ni coz rishli par nu nac nu shiñ ricy dey. <sup>20</sup>Ca zi'l na mbecy nu shiñ ricy, yu ze' wagyet lagy yu ze' nu yu' yaa ni coz rishli, nunu wagyecha'y ze' nu yu' yaa ni coz rishli par nu walagy dey gyu' bee de coz cyi nu ricy dey. <sup>21</sup>Tees ca zi'l na mbecy nu ricy coz nu laab ñi, yu ze' yecha'y ze' nu yu' yaa ni coz rishli, gun de coz nap nu ricy yu, nde' coz nu bruu lo Ñgyoozh —na Jesuuz.

### Waa nu driibnis mbecy bdzeela'y Jesuuz tuuba' tir

<sup>22</sup>Na, despuees ornu bded de nu nde', orze' Jesuuz gush nez mi za num de yu nu rsya' lom par de lo yu ni Judea. Ze' pcyiñ mi num dey la be dzi. Orze' briic mi nu bzu nis mbecy. <sup>23</sup>Ni' zi'l Waa rded yu driib nis yu mbecy tub gyedz nu la Enín garee ga gyedz nu la Salim, gun lugaar ze' yu' sheñ nis. Orze' de mbecy rza dey loy. Orze' rbic yu nu zu nis dey. <sup>24</sup>Gun tiem ze' Waa nigul gyet lag yu nañ yu' gyiib.

<sup>25</sup>Na, la be de yu nu rsya' lo Waa, bee zi dey riidz nu tuuba' mbecy Israeel gyi' nu nac nu lac mod gyacaacy de mbecy par lo Ñgyoozh. <sup>26</sup>Orze' gua too dey rishlo Waa. Orze' na dey rab yuy:

—Masht, yu nu byeeñ nu ru tub la' ga'uzu ru' gyroow Jordaang, laab yu nu bzat ru lo de, yu ze' driib nis yu mbecy. Nunu dela mbecy rza dey loy —na dey.

<sup>27</sup>Orze' na ga' Waa rab yu dey:

—Ni tub la mbecy wac gyicy yu tub riiñ ni Ñgyoozh benu walab Ñgyoozh bdu'm ñii yaay nu gyicy yuñ. <sup>28</sup>De ru bi güeñ der nu naal la mnęe lo der nu ya walab Mesías, biñ nu ca lo cuen nu co mbañ mbecy, sinu ya nacä tub yu nu bzuu nez Ñgyoozh nu chä ga lo par mi ze'. <sup>29</sup>Ya na gal nu na tub amig ni tub yu nu nac nob. Biñ nu nac ni nob ze', mi ze' par yu nu nac nob ze'. Mi ze' walab par amig niy. Ze' yu nu nac amig niy, tonal la yet lagy yu ornu reñ yu nu zaab ti' y rniyi. Ni' zi'l na ya tonal la yet lagy ya nu nac de coz nu rniir lo, gal nu yet lagy de amig ni nob ze'. <sup>30</sup>Gun mi ze' yagya zir zum. Ze' ya nu yagash zir zu —na Waa—.

### Biñ nu bruu gyibaa

<sup>31</sup>'Biñ nu bruu lo Ñgyoozh, mi ze' gya zir zum par dela mbecy. Ze' de ub na, mbecy nu bruu gyishlombecy ii, nac naa ni gyishlombecy. Orze' rnii den de coz nu rac gyishlombecy. Tees biñ nu bruu gyibaa, mi ze' gya zir zum par dela mbecy. <sup>32</sup>Mi ze' rniim de coz nu bzaac mi, gal nu de coz nu güeñ mi, tees se ñuu zi zi mbecy "O" rnii nu nac de coz nu rniim. <sup>33</sup>Tees de mbecy nu "O" rnii ni de coz nu rniim, yu ze' ricy dey nu gabe nu par ub yu, de riidz nu rnii Ñgyoozh, nde' riidz rishli. <sup>34</sup>Ze' biñ nu bzuu nez Ñgyoozh, mi ze' rniim riidz ni Ñgyoozh, gun Ñgyoozh briic za' lam Espiriit Yon nim ni mi ze'. <sup>35</sup>Ñgyoozh, uz na, tonal la rcam i'ñ mi, Jesuuz, nunu bicy mi nu mi ze' gyub ic mi dela coz. <sup>36</sup>De yu nu gyicy cup consuel lo i'ñ mi, de yu ze' cui mbañ dey tub la. Tees de yu nu wazuub gyidag nim, de yu ze' wad nu cui mbañ dey. Sinu Ñgyoozh zeed mi cashtig ily nim too dey —na Waa.

### Jesuuz bdzeel mi tub biñ mñaa Samaria

**4** De mbecy fariseo güeñ dey nu zigy zir de mbecy nu za ca ich Jesuuz, gaze' de yu nu za ca ich Waa. Nunu rbic zir mi nu zu nis mbecy gaze' Waa. <sup>2</sup>Mas walab ub la Jesuuz driib nis mi mbecy, sinu de yu nu rsya' lom rbic dey nu zu nis mbecy. <sup>3</sup>Na ornu gud lagy Jesuuz de nu nde', orze' bruum lo yu ni Judea, orze' yam par de lo yu ni Galilea.

<sup>4</sup>Na ze' nu yam rlagy ñi nu ded mi lo de yu ni Samaria. <sup>5</sup>Orze' bru'ñam tub gyedz nu la Sicar nu ri lo yu ni Samaria. Gyedz ze' gare ga ri tub nac yu nu briic Jacob ni i'ñ yu See. <sup>6</sup>Lugaar ze' Zub zo nu rnii dey, "Zo ni Jacob." Ze' gusub Jesuuz nu rzu lagy mi gun gutsiñ mi nu tuñ bzam nez. Nde' tub or widoo. <sup>7</sup>Orze' de yu nu rsya' lom bzeeñ dey mi. Orze' za dey lat gyedz nu za zii dey coz nu gow yu. Orze' bru'ñam tub biñ mñaa Samaria, bru'ñam ru' zo ze' nu za gyiim nis. Orze' na Jesuuz rab mi biñ mñaa ze':

—Doo ñuu nis nir dø' —nam.

<sup>9</sup>Orze' na biñ mñaa ze' rab mi Jesuuz:

—Ru nac ru tub mbecy Israeel. Ze' ya nacä tub biñ mñaa Samaria. Orze' žlagu rgyiñ ru nis go'r lo? —nam.

Gun de mbecy Israeel wagac gyicy dey ni tub la coz nu mbecy Samaria, gun a' nap yu' dey.

<sup>10</sup>Orze' na ga' Jesuuz rab mi biñ mñaa ze':

—Bi bicy na nu ru gad lagy ru la na coz nu rbic Ñgyoozh, nunu bicy na nu gad lagy ru cyu nac ya, nu rdiña nis dø' lor, orze' ru cyiñ ru nis lo ya go'r. Orze' ya ricä nis nu rbic gyel mbañ nu rishli nu go'r.

<sup>11</sup>Orze' biñ mñaa Samaria ze' nam rab mi Jesuuz:

—Ze' ru, ni a' nur la nu par nu cor nis, gun zo ii gyi ri nis nañ ñi. Ze' ru, ¿ca cor nis nu cuic gyel mbañ ze' ne?

<sup>12</sup>Gyitoo bel ne de Jacob bzeeñ mi zo ii ne de ya. Nunu laab ii go'm nis gal nu de i'ñ mi nu de bañcyug nim. ¿Walab gaal lily zir na ru gaze' gyitoo bel ne de ze'? —na biñ mñaa ze'.

<sup>13</sup> Orze' na Jesuuuz:

—Dela de mbecy nu go' nis ii, wayeca nu cuigy zir dey nis. <sup>14</sup> Ze' de mbecy nu go' nis nu ya gricä, de mbecy ze' rila wabigya' dey nis. Gun nis nu ya gricä, nde' gyicy ñi nu gyac nañ lardoo dey gal na tub ze' nu driib nis. Nis ze' gyicy ñi nu cui mbañ dey tub la —nam.

<sup>15</sup> Orze' na biñ mñaa ze' rab mi Jesuuuz:

—Beni, orze' cuic ru nis ze' dø' gun cue' ga' nu cuigya' ñii nunu cue' ga' gyap gyij ñii ii —na biñ mñaa ze'.

<sup>16</sup> Orze' na ga' Jesuuuz:

—Yaa, ya te ñgyeer, nunu cyid nur yu ii —na Jesuuuz.

<sup>17</sup> Orze' na ga' biñ mñaa ze':

—Sac ñgyee ya —nam.

Orze' na ga' Jesuuuz:

—Ru gaal rishli rniir nu sac ñgyeer, <sup>18</sup> Gun bi bzu gaay ñgyeer. Ze' yu nu zu ga' na, yu ze' walab ñgyeer. Ru rishli mniir lo nu sac ñgyeer —nam.

<sup>19</sup> Ornu biñ mñaa ze' güeñ mi nu nde', orze' nam rab mi Jesuuuz:

—Na bet lagä cuen nu ru nac ru tub biñ nu rnii por cuen ni Ñgyoozh. <sup>20</sup> De gyitoo bel ne dë, de biñ Samaria, briib zily dem Ñgyoozh too b icy ii. Ze' de ru rnii der nu gal Jerusaleeng rlagy ñi nu riib zily mbecy Ñgyoozh, rnii der —na biñ mñaa ze'.

<sup>21</sup> Orze' na Jesuuuz rab mi biñ mñaa ze':

—Biñ mñaa, guña ñuu lagy riidz nu rnëe. Shuub tub dzi nu de mbecy griib zily dey Ñgyoozh, uz den. Orze' walagya'ñ nu cyid dey too b icy ii, ni nu gya dey Jerusaleeng. <sup>22</sup> De ru mbecy Samaria wagad lagy der la na biñ nu driib zily ru. Tees de ya mbecy Israeel rad lagy de la na biñ nu driib zily de, gun lat de mbecy Israeel gruu mod par nu gruu mbañ mbecy. <sup>23</sup> Tees shuub dzi, nunu na la nde' ornu de mbecy nu rishli gaal griib zily Ñgyoozh uz na gyicy dey ñi tub mod nu rishli, mod nu rlagy Espiriit Yon ni Ñgyoozh, gun nde' mod nu rlagy Ñgyoozh uz na. Nde' mod nu rlagy mi nu gyicy de yu nu griib zily mi. <sup>24</sup> Gun Ñgyoozh nac mi Espirit, nunu de yu nu griib zily mi rlagy ñi nu gyicy dey ñi tub mod nu rishli, tub mod nu rlagy Espiriit Yon nim —nam.

<sup>25</sup> Orze' na biñ mñaa ze' rab mi Jesuuuz:

—Rad lagya nu cyid Mesías, biñ nu pcui Ñgyoozh nu co mbañ mi den. Laab mi ze' lam Crisht. Ornu mi ze' cyid mi, orze' shaal mi dela coz lo de —nam.

<sup>26</sup> Orze' na ga' Jesuuuz:

—Mi ze' nac ya, biñ nu rnii nu ru na la —nam.

<sup>27</sup> Laab or la ze' bri de yu nu rsya' lom. Orze' za nu la ic dey nu Jesuuuz rom riidz nu tub biñ mñaa. Tees ni tub la dey wancuic yu baloor nu ngugyi'lo biñ mñaa ze' la coz rlagy mi, o nu ngugyi' dey lo Jesuuuz ben lagu ro num biñ mñaa ze' riidz. <sup>28</sup> Orze' biñ mñaa ze' bzeeñ ga lam re' nim. Yam lat gyedz. Orze' nam rab mi de mbecy:

<sup>29</sup> —Da der gun cha güiir tub biñ gyeey nu mniim dela coz nu b icy. ¿Ben a chii la a walab mi ze' Mesías? —na biñ mñaa ze'.

<sup>30</sup> Orze' bruu de mbecy lat gyedz ze' za dey lo Jesuuuz.

<sup>31</sup> Lat nu ya biñ mñaa ze', orze' de yu nu rsya' lo Jesuuuz rnishbaa dey lom nu gow mi gyit. Orze' na dey:

—Masht, bdow mas ñuu mi' —na dey.

<sup>32</sup> Orze' nam rab mi dey:

—Ya ricy cupa coz nu daw. Tees de ru wagad lagy der la coz nde' —nam.

<sup>33</sup> Orze' de yu nu rsya' lom brugyi' rgugyi' dey lo losa'y. Orze' na dey:

—¿Walab gaal bi biid nu ca na mbecy coz nu gow mi? —na dey.

<sup>34</sup> Orze' na ga' Jesuuuz rab mi dey:

—Ornu gyicya coz nu rlagy Ñgyoozh, biñ nu bzuu nez ya, nunu ornu gza' lo riiñ nim, orze' nde' nañ gal na de coz nu daw. <sup>35</sup> De ru mbish tub riidz nu rnii der: "Gabee ricy falt ru' tap beey par nu te'n cosech", rnii der. Ze' ya rnëe lo der nu güiir lo de mbecy nu yad ii. Na dey gal nu na tub nac gyel. Güiir la nañ. Bi gac niñ nu dude' cosech, gun bi zu lily dey nañ lardooy nu gyicy cup dey consuel lo —na Jesuuuz—.

<sup>36</sup> 'Gun de yu nu cha te' cosech ze', bi gyad iy, nunu cosech nu rte' dey ze', nde' de mbecy par nu cui mbañ dey tub la, gun orze' de yu nu rnuuz, gal nu de yu nu rte' tublaazh la gyet lagy dey. <sup>37</sup> Nii tub riidz nu rishli nu rnii mbecy: "Tub yu rnuuz yu. Ze' tuuba'y rte'y."

<sup>38</sup> Ya bzuu neza der nu gua te'r lat tub nac gyel ze' nu wangyicy la der riiñ. Ze' reña' dey b icy yu riiñ lat gyel ze'. Ze' de ru byash der cosech nu nac riiñ nu b icy reña' dey —nam rab mi de yu nu rsya' lom.

<sup>39</sup> Na, tonal' la zigy de mbecy Samaria nu yu' gyedz ze' b icy cup dey consuel lo Jesuuuz nu nac nu mnii biñ mñaa ze' lo dey. Orze' nam: "Mi ze' mniim lo dela coz nu b icya", nam. <sup>40</sup> Na ornu bru'ña de mbecy Samaria lom, orze' mnishbaa dey lom nu gyiyeeñ mi num dey. Orze' byeeñ num dey cyup dzi. <sup>41</sup> Orze' zigy zir mbecy b icy cup dey consuel lo Jesuuuz nu nac de riidz nu mniim. <sup>42</sup> Orze' na dey rab yu biñ mñaa ze':

—Na ricy cup dey consuel lo Jesuuuz walab nu nac riidz nu mnii zi'l ru, sinu nu nac nu güeñ gyidag la de. Nunu rishli gud lagy de nu mi ii nac mi biñ nu co mbañ de mbecy nu yu' gyishlombecy —na dey rab yu biñ mñaa ze'.

Jesuuuz b icy yac mi i'ñ tub yu nu zu riiñ ni gubier

<sup>43</sup> Na ornu bded ni cyup dzi ze', orze' bruu Jesuuuz Samaria nu yam par lo de yu ni Galilea. <sup>44</sup> Gun laab ub mi mniim nu tub yu nu rnii por cuen ni Ñgyoozh waca lagy de mbecy ledz yu loy, nam. <sup>45</sup> Na ornu brim lo de yu ni Galilea, orze' de mbecy nu yu' de lugaar ze' nap b icy nu dey mi, gun bi bya dey sa' ni Pas Jerusaleeng. Nde' bi bzaac dey de coz nu b icy mi lat sa' ze'.

<sup>46</sup> Orze' Jesuuuz bish cyam zam Caná, tub gyedz nu ri lo yu ni Galilea. Laab lugaar ze' nu b icy mi nu byac nis ñup ni urbyay. Na zu tub mbecy nu zu riiñ ni gubier. Ze' i'ñ yu mbish rat yu Capernaum. <sup>47</sup> Yu ze', ornu güeñ yu nu bruum Judea nu brim Galilea, orze' guay mnishbaay lom nu cham yu'y nu gyicy yac mi i'ñ yu,

gun bi zuu lay nu gat yu. <sup>48</sup> Orze' Jesuuz nam rab mi yu nu zu riiñ ze':

—De ru wagicy cup der consuel lo benu wazac der muesht o nusuriidz —nam.

<sup>49</sup> Orze' na yu nu zu riiñ ze' rab yu Jesuuz:

—Jesuuz, yaa chan gun nis gat i'ñä —nay.

<sup>50</sup> Orze' na Jesuuz rab mi yu:

—Yaa la gun i'ñ ru mbañ yu —nam.

Orze' mbecy ze' guña lagy yu de riidz nu mnii Jesuuz. Orze' yay. <sup>51</sup> Na nez nu yay, orze' gua cheel de moz ni yu. Orze' na dey:

—i'ñ ru mbañ yu! —na dey.

<sup>52</sup> Orze' bdugyi'y lo dey ben la or brugyi' nu zesus nap lagy i'ñ yu. Orze' na dey rab yuy:

—Naag, tub gyiib tub or gudze, orze' bruu zig yu —na dey.

<sup>53</sup> Orze' byeza' lagy yu nu laab or ze' mnii Jesuuz loy. Ornu nam: "I'ñ ru gruu mbañ yu", nam.

Orze' b icy cup dey consuel lom nu dela famil niy.

<sup>54</sup> Nde' nusuriidz cyup nu b icy Jesuuz despuees nu bruum lo yu nu la Judea ornu zam par lo de yu ni Galilea.

### Jesuuz b icy yac mi tub mbecy chi Betzata

<sup>5</sup> Despuees ni de nu nde', orze' de mbecy Israeel gu' dey tub sa'. Orze' Jesuuz yaa ga'm par Jerusaleeng. <sup>2</sup> Na Jerusaleeng, garee ga ze' nu ca tub gyero' ily nu la ro' ni shily, ze' ri tub gyel. Gyel ze' lañ benu nu riidz hebreo, orze' lañ Betzata. Ze' ru' gyel ze' ca gaay coredoor. <sup>3</sup> Ze' nañ de coredoor ze' nguaa zigy mbecy rat. Ze' nguaa lo ca', nguaa mbecy coj, nguaa ga' mbecy chi. Ze' nguaa dey lo yu ze'. <sup>4</sup> Ze' nguaa rbe dey gun gul gul yet tub anc ni Ñgyoozh nu rcueñ suy ni gyel ze', gun yu rat nu gyicy gan nu gyet loñ loga la, ornu rcueñ ñii, orze' yu ze' gyac yu ni cualcyer la güii nu ricy cup yu. <sup>5</sup> Lat de yu rat ze' ri tub yu nu bi bza' gal rub tiiñ zu chon ña'n nu rat yu. <sup>6</sup> Ornu Jesuuz bzaac mi yu, orze' como gud lagy mi nu bi rac ña'n mbish rat yu, orze' nam rab mi yu:

—¿A rlagy ru gyac ru? —nam.

<sup>7</sup> Orze' na yu rat ze':

—Wagad cyu nu locyuub ya nu gyeta lo nis re ornu rcueñ suñ. De tir la ornu rcueñ suñ, ornu ricy pëe nu gyeta, orze' ricy reña' dey gan ya nu yet yu loñ —nay.

<sup>8</sup> Orze' na Jesuuz rab mi yu:

—Wesh te nunu byash da' nir nunu bza —nam.

<sup>9</sup> Orze' lueg la byac yu, nunu byash yu da' niy, nunu brugyi' rzay. Ze' dzi ze', nde' sab dzi nu rzu lagy mbecy. <sup>10</sup> Orze' de yu zub lo ni de mbecy Israeel na dey rab yu nu byac ze':

—Na dzi sab, dzi nu rzu lagy mbecy. Zañ contr ni leey nin nu gya nur da' nir —na dey.

<sup>11</sup> Orze' na yu nu gurat ze' rab yu dey:

—Yu nu b icy yac ya nay rab yu ya: "Byash da' nir nunu bza", nay rab yu ya —na yu rat ze'.

<sup>12</sup> Orze' na ga' dey rab yu yu nu gu rat ze':

—¿Cyu mbecy nu mnii lor nu gyash ru da' nir, nunu bza? —na dey rab yu yu gurat ze'.

<sup>13</sup> Tees yu nu gurat ze' wangad lagy yu cyu nac biñ nu b icy nu byac yu, gun Jesuuz mnit mi lat de mbecy zigy nu yu' lugaar ze'.

<sup>14</sup> Na despuees, orze' byap Jesuuz yu nu gurat ze' lolí ni yu' nu driib zily de mbecy Israeel Ñgyoozh. Orze' nam rab mi yu:

—Güii na, ru bi byac ru. Cue' ga' gyicy ru coz cyi, nis shiñ zir gzac ru par lo —nam rab mi yu.

<sup>15</sup> Orze' yu gurat ze' bruu chuy lo Jesuuz nu za tooy rishlo de yu zub lo ni de mbecy Israeel nu Jesuuz b icy yac mi yu. <sup>16</sup> Gyi' nde' brugyi' nu zaab mbecy ich Jesuuz: gyi' nu b icy yac mi tub mbecy sab, dzi nu rzu lagy mbecy Israeel. <sup>17</sup> Orze' Jesuuz nam rab mi dey:

—Ñgyoozh, uzä, zaab ricy lam riiñ. Nde' nu ni' ya ricya riiñ —nam.

<sup>18</sup> Nu nac riidz ze', orze' de mbecy Israeel bzu fert zir dey nu cut yu Jesuuz, gun walab tub lo zi'l nu nac nu zam contr ni leey ni dzi sab, dzi nu rzu lagy mbecy, sinu ni' zi'l nu b icy mi nu gal gaa la nac mi nu Ñgyoozh ornu mniim nu Ñgyoozh nac mi uz mi.

### Gyel fushtiz ni Jesuuz

<sup>19</sup> Orze' na Jesuuz rab mi dey:

—Ya rishli rnëe lo der nu ya biñ nu nac i'ñ Ñgyoozh wac gyicya ni tub la coz nu nac shcab zi'l ne, sinu ricya coz nu rzaca nu ricy Ñgyoozh uzä. Gun la zi'l coz nu ricy Ñgyoozh uzä ni' zi'l ricy ya i'ñ mi. <sup>20</sup> Gun Ñgyoozh uzä rcam ya, biñ nu nac i'ñ mi, nunu rlyuum lo de coz nu ricy mi; nunu coz ily zir lyuum nu gyicya gun orze' cha nu ic der. <sup>21</sup> Gal nu Ñgyoozh uzä gyicy mi nu gyabañ de añ nu bi gut nunu cuic mi nu cui mbañ dey, ni' zi'l ya, i'ñ mi, ricä gyel mbañ ni cyu zi'l nu galagya. <sup>22</sup> Gun Ñgyoozh, uzä, wari beem ni ni tub la mbecy ni de cyi nu ricy dey, sinu nde' bzeeñ mi yaa ya, i'ñ mi, nu gri beeñ ni de mbecy. <sup>23</sup> Gun orze' dela mbecy ca lagy dey lo ya, gal nu rca lagya' dey lo Ñgyoozh uzä. De yu nu waca lagy lo ya, ni' zi'l waca lagy dey lo Ñgyoozh uzä, biñ nu bzuu nez ya.

<sup>24</sup> Ya rishli rnëe lo der nu de yu nu gzuub gyidag de riidz nu ya rnëe, nunu gyicy cup dey consuel lo biñ nu bzuu nez ya, orze' de yu ze' cui mbañ yu tub la. Wanee nu yu' falt niy, sinu bi bded loy lo lugaar ze' nu yu' mbecy gut. Bi guud nu cui mbañ dey tub la. <sup>25</sup> Ya rishli rnëe lo der nu shuub tub tiem, nunu tiem ze', nde' bi guush ñi nese na la, ornu gyeñ gyidag de yu nu na gal nu na añ de riidz nu nee ya, i'ñ Ñgyoozh, orze' de yu nu gyeñ de riidz ze' gad nu cui mbañ dey. <sup>26</sup> Gun gal nu Ñgyoozh uzä ricy mi nu cui mbañ de mbecy, nde' nu ni' zi'l ya, i'ñ mi b icy mi nu gyicya nu cui mbañ de mbecy. <sup>27</sup> Nunu briic mi rishbeey nee nu gri beeñ ni de mbecy, gun ya naca biñ nu byac mbecy. <sup>28</sup> Cue' cha nu ic der nu nac de riidz ii, gun shuub dzi nu dela de añ gyeñ dey nu zaab ti' ornu gnëe. <sup>29</sup> Orze' gruu dey gyerbaa niy. Orze' de yu nu nap b icy, gyabañ dey par nu cui mbañ yu. Ze' de yu nu shiñ b icy gyabañ dey par nu gyay lo cashtig.

### Jesuuz gri beem ni mbecy mod nu se'ñ

<sup>30</sup> 'Wac gyicyä ni tub la coz nu gruu ic zi'lä. Tees gri bëe ni mbecy gal nu reñä nu rnii Ñgyoozh, uzä. Nunu coz nu gnëe ornu gri bëe, nde' coz nu se'ñ, gun ya walab nu ricyä coz nu rlagy ubä, sinu ricyä coz nu rnii uzä, biñ nu bzuu nez ya nu yapa. <sup>31</sup> Benu laab ubä cha faboor ne, orze' wacyiiñ riidz nu rnëe. <sup>32</sup> Tees zu tuuba' biñ nu rza faboor ne, nunu rad lagya nu riidz nu rnii, nde' coz rishli. <sup>33</sup> Na de ru bzuu nez der mbecy nu cha tugi'y lo Waa nu driib nis mbecy, nunu de riidz nu mnii yu ze', nde' coz rishli. <sup>34</sup> Ze' ya, walab nu rlagy ñi tub mbecy nu chay faboor ne, tees ya rzata Waa lo der gun dzi ga gruu mbañ der. <sup>35</sup> Yu ze' nay gal nu na tub candiil par nu cuic ñi yaa. De ru bet lagya der yaa ze' la be zi'l dzi. <sup>36</sup> Tees yu' coz nap zir cuic ñi nu gad lagya der cyu nacä gaze' de riidz nu mnii Waa. De coz nu ricyä, laab de coz nu mnii Ñgyoozh lo nu gyicyä, de nde' ricy ñi nu gabe cyu nacä, nunu gyicy ñi nu gabe nu mi ze' bzuu nez mi ya nu yapa. <sup>37</sup> Nunu ni' Ñgyoozh, uzä, biñ nu bzuu nez ya rnii cyu nacä. Ze' de ru rila wangyeñ der de riidz nu rnii, nunu rila wanchu' lo der mi.

<sup>38</sup> Nunu wancheti riidz nim nañ lardoos der, gun wangyicy cup der consuel lo ya, biñ nu bzuu nez mi. <sup>39</sup> De ru nap rsya' der riidz ni Ñgyoozh gun rash der shcab nu lat de riidz ze' gyap der riidz nu gyicy ñi nu cui mbañ der tub la. Ze' lat de riidz ze' rzat ñi ya. <sup>40</sup> Ze' de ru walagya der cyid ru lo par nu gad gyel mbañ ze' ni der.

<sup>41</sup> 'A' ricy ñi presis ne nu gyabic mbecy gyel mbecy ne. <sup>42</sup> Tees rad lagya la na der nunu rad lagya nu waca der Ñgyoozh nañ lardoos. <sup>43</sup> Gun ya yapa por mandaar ni Ñgyoozh uzä. Ze' de ru wacshet ic der nu chü' lat der. Tees benu ru'ña reña' mbecy nu mandaar ni ub zi'l yu, orze' rshet ic der nu chu'y lat der. <sup>44</sup> De ru, lat de ub zi'l ru, driib zily der losa'r. Rila wagyb der mod par nu Ñgyoozh zi'l griib zily mi der. Benu ni gyicy der, ¿lac mod gyicy cup der consuel lo? <sup>45</sup> Cue' nii too der nu ya du' cyi der lo Ñgyoozh uzä. Yu nu rgu' cyi der lo Ñgyoozh, nde' Moisees, yu nu bzeeñ leey nu rgyish lo der lo. <sup>46</sup> Gun benu de ru ñgyeña lagya der ni de riidz nu bzeeñ Moisees ze', orze' ni' zi'l ñgyeña lagya der ne. <sup>47</sup> Tees como wancheña lagya der ni de riidz nu bzeeñ Moisees, orze' lac mod cheña ga' lagya der de riidz nu rnëe ya —nam.

### Jesuuz briic mi nu gow gaay miily mbecy

**6** Na despuees ni de nu nde', orze' Jesuuz zam tub la' ga' ru' nisyudoo ni Galilea. Laab nde' nisyudoo ni Tiberias. <sup>2</sup> Orze' zigy mbecy za ca dey ich mi, gun bzaac dey de nusuriidz ily nu bicy mi nu de mbecy rat ze'. <sup>3</sup> Orze' Jesuuz gup mi too tub bicy. Orze' gusub mi nu de yu nu rsya' lom. <sup>4</sup> Na tiem ze' bi rgaab tub sa' ni de mbecy Israeel nu la sa' ni Pas. <sup>5</sup> Na ornu bri' lom, orze' bzaac mi nu tonal' la zigy mbecy bde' dey lom. Orze' nam rab mi Lip:

—¿Ca chan cha gyiin coz nu gric na gow dela de mbecy ii? —nam.

<sup>6</sup> Ni mniim ben la gnii Lip, gun ub mi bi rad lagya mi la na coz nu gyicy mi. <sup>7</sup> Orze' na Lip rab yum:

—Ni nu sac i moz ni cyup gaynal dzi wal ñii nu gad coz nu gow dey mas ñuu ga —nay.

<sup>8</sup> Orze' brusu tub dey lat de yu nu rsya' lom, yu nu la Ndrees, yu ze' laab bicy Simoo Bed. Orze' nay rab yu Jesuuz:

<sup>9</sup> —Ii zu tub yu nguzh nuuy gaay gysishtily nu byaa nu arin ni sebada, nunu nuuy cyup bel. ¿Par ca gal laa nde' lat de mbecy zigy? —nay.

<sup>10</sup> Orze' na ga'm rab mi yu:

—Mnii der lo dela mbecy nu gzub dey —nam.

Lugaar ze' tona' la nash gyizh ca'. Orze' gucua dey loñ. Nac tub gaay miily yu gyeey lat de mbecy nu gucua lugaar ze'. <sup>11</sup> Orze' Jesuuz gush mi de gysishtily ze'. Orze' briic mi gras ni Ñgyoozh. Orze' briic mi ñii nu dugyeez ñi lat de mbecy nu nguaa ze'. Ni' zi'l bicy mi nu de bel ze' nu dugyeez ma lat dey dub gal nu galagya ñi ni tub ga dey. <sup>12</sup> Na ornu blazh bdow dey, orze' na Jesuuz rab mi de yu nu rsya' lom:

—Gua te' der de coz nu brusub gun cue' nu nit loñ —nam.

<sup>13</sup> Orze' de yu ze' brugyi' rte' dey de gysishtily nguzh nu brusub ni gaay gysishtily sebada ze'. Orze' bdu' dey ñi nañ trocyup chicyiw nunu bdzaa lañ. <sup>14</sup> Ornu bzaac de mbecy nu nguaa ze' nusuriidz nu bicy Jesuuz nu de gysishtily ze', orze' na dey rab yu losa'y:

—Rishli gaal mi ii nac mi tub biñ nu rnii por cuen ni Ñgyoozh. Mi ii nac mi biñ nu rnii por cuen ni Ñgyoozh nu ca lo cuen nu cyid gyishlombecy —na dey.

<sup>15</sup> Tees Jesuuz gud lagya mi nu rlagy dey nu zeeñ yum rey por fers la. Orze' bruum lat dey zam ub zim too tub bicy.

### Jesuuz bzam lo nis

<sup>16</sup> Na ornu becheñ, orze' de yu nu rsya' lo Jesuuz bet dey par ru' nisyudoo. <sup>17</sup> Orze' gu' dey nañ tub barc. Orze' bded dey lo nisyudoo par nu cha dey par Caper-naum. Na ornu bi bet rel nap la, orze' gaal zi nigul ru'ña Jesuuz lo dey. <sup>18</sup> Laab or ze' tona' la fert bru'ña tub bi ily, nunu tonal' la ricy ñi nu rzup nguuly lo nisyudoo ze'. <sup>19</sup> Na ornu dzi bi psaa dey barc ze' lo nis nu rnii tub gaay o shuup miily metr, orze' bzaac dey Jesuuz nu rzam lo nis, nunu yagaab mi lo dey. Orze' tona' la gudzib dey. <sup>20</sup> Orze' nam rab mi dey:

—¡Yä nu nde! ¡Cue' dzib der! —nam.

<sup>21</sup> Orze' de yu ze' pshet ic dey nu chu'm nañ barc ze'. Orze' sij la bri dey gashtal lugaar ze' nu rsaap dey chay.

### De mbecy ryub dey Jesuuz

<sup>22</sup> Na ornu bza' yu tuuba' dzi, orze' de mbecy nu byeeñ tub la' ga' dzu ru' nisyudoo brugyi' rnii too dey. Gud lagya dey nu za ga de yu nu rsya' lo Jesuuz nañ tub zi barc nu zu lugaar ze'. Nunu gud lagya dey nu de yu ze' wancheña nu dey Jesuuz. <sup>23</sup> Ze' lat ze' bri reña' barc. Barc ze' bruuñ gyedz Tiberias. Briñ gaab ga lugaar ze'

nu bdow dey gyishtily despuees ornu Shuaan na Jesuz briic mi gras ni Ñgyoozh.<sup>24</sup> Na ornu de mbecy zigy ze' bzaac dey nu sac Jesuuz lugaar ze' gal nu de yu nrasya' lom, orze' ni' zi'l de mbecy ze' gu' dey nañ barc. Orze' za dey za yub yum par Capernaum.

### Jesuuz nac mi gyishtily nu rbic gyel mbañ nu rishli

<sup>25</sup> Na ornu bri de mbecy zigy ze' tub la' ga' ru' nisyudo, orze' bdzeel dey Jesuuz. Orze' na dey rab yum: —Masht, ¿gul brir lugaar ii? —na dey.

<sup>26</sup> Orze' na Jesuuz rab mi dey:

—Ya rishli rnęe lo der nu de ru ryub der ya par nu nac nu bricę nu bdow der nu byel la nir. Walab par nu bet lag der cuen de nusuriidz nu bicky. <sup>27</sup> Cue' gyicy der riñ par de coz nu gow der gyishlombecy ii, gun nde' wazu tuuñ ñi; sinu bicky der riñ par de coz nu gow der nu gyicy ñi nu cui mbañ der tub la. Nde' coz nu gric ya, biñ nu byac mbecy. Gun de nusuriidz nu ricya, nde' tub sey nu briic Ñgyoozh nę par nu gabe nu laab ñi de riidz nu rnęe —nam.

<sup>28</sup> Orze' na dey rab yum:

—¿Ca na coz nu rlagy ñi nu gyicy de par nu gyicy de coz nu rlagy Ñgyoozh? —na dey.

<sup>29</sup> Orze' na ga' Jesuuz rab mi dey:

—Coz nu rlagy Ñgyoozh nu gyicy der, nde' nu gyicy cup der consuel lo ya, biñ nu bzuu nez mi —na Jesuuz.

<sup>30</sup> Orze' na dey rab yu Jesuuz:

—¿La ñuu nusuriidz lyuur lo de par nu gzac de, gun orze' gyicy cup de consuel lor? ¿La ñuu na coz nu gyicy ru?<sup>31</sup> Gun de gyitoo bel ni den bdow dey tub lo gyishtily nu la maná. Nde' bruuñ gal gyibaa lat nu gusa dey de lugaar ub zi, gal nu rniiñ lat riidz ni Ñgyoozh: "Ñgyoozh briic mi gyishtily nu bruu gyibaa gow dey", rniiñ —na dey.

<sup>32</sup> Orze' na Jesuuz rab mi dey:

—Ya rishli rnęe lo der nu walab Moisees briic yu gyishtily nu bruu gyibaa nu gow dey, sinu Ñgyoozh, uza, briic mi ñii. Ze' na Ñgyoozh, uza, mi ze' rbic mi gyishtily nu rishli nu bruu gyibaa nu gow der. <sup>33</sup> Gun gyishtily nu rbic Ñgyoozh ze', nde' gyishtily nu bruu gyibaa bet ñi gyishlombecy ii, nunu rishli rbic ñi nu cui mbañ de mbecy gyishlombecy ii —nam.

<sup>34</sup> Orze' na dey rab yum:

—Jesuuz, cuic ru gyishtily nu rniir ze' daw de de Dzi la —na dey.

<sup>35</sup> Orze' na Jesuuz rab mi dey:

—Ya nacä gyishtily nu rbic gyel mbañ ze'. Yu nu gyecha' lo, yu ze' rila wariiba' nu gyan yu nañ lardooy. Nunu de yu nu gyicy cup consuel lo rila wariiba' nu cuigy dey nis nañ lardooy. <sup>36</sup> Tees ya bi mnęe lo der nu mas rzac der ya, tees wayicy cup der consuel lo. <sup>37</sup> Dela de yu nu rbic Ñgyoozh nę yecha' dey lo. Nunu de yu nu gyecha' lo waloo chü dey. <sup>38</sup> Gun ya walab nu bryu gyibaa par nu yapa nu gyicya coz nu rlagy uba, sinu yapa nu gyicya coz nu rlagy Ñgyoozh, uza, biñ nu bzuu nez ya. <sup>39</sup> Nunu biñ nu bzuu nez ya ze' rlagy mi nu ni gyicya nu cue' zaanä nu dune' ni tub la mbecy nu briic mi ne, sinu gyicya nu gyabañ de mbecy nu bi gut ornu

laab nde' la nu shuub dzi nu ded ni gyishlombecy.

<sup>40</sup> Gun coz nu rlagy Ñgyoozh, uza, nde' nu dela mbecy nu cu' lo ya, iñ mi, nunu gyicy cup dey consuel lo, orze' cui mbañ dey tub la; nunu gyicya nu gyabañ de mbecy nu bi gut ornu laab nde' la nu shuub dzi nu ded ni gyishlombecy —nam.

<sup>41</sup> Orze' la be de mbecy Israel brugyi' rnii deet dey nu nac Jesuuz, par nu mniim: "Ya nacä gyishtily nu bruu gyibaa betä gyishlombecy ii", nam. <sup>42</sup> Nunu na ga' dey:

—¿A walab yu ii, yu nu nac iñ See? De ub na yu' lo den uz yu, nunu yu' lo den ñaay. Güi la rnii ga'y na. Nay nu gyibaa bruuy bet yu gyishlombecy ii —na dey.

<sup>43</sup> Orze' na ga' Jesuuz rab mi dey:

—Cue' nii deet der lat losa'r. <sup>44</sup> Ni tub la mbecy wac gyecha' dey lo benu walab Ñgyoozh uza biñ nu bzuu nez ya, rniiñ nañ lardooy dey nu gyecha' lo. Nunu gyicya nu gyabañ yu ornu shuub dzi nu ded ni gyishlombecy. <sup>45</sup> Gun ca tub riidz lat de riidz nu bzeeñ de yu nu mnii por cuen ni Ñgyoozh. Orze' rniiñ: "Ñgyoozh rlyuum ni dela mbecy", rniiñ. Nde' nu dela de yu nu rzuub gyidag de riidz ni Ñgyoozh uza, nunu rsya' dey lom, de yu ze' gyecha' dey lo.

<sup>46</sup> Nde' nu walab nu ca na tub mbecy bi bzaac yu Ñgyoozh uza; sinu tub zi la ya, biñ nu bruu lom rzacäm. <sup>47</sup> Ya rishli rnęe lo der nu cyu zi'l yu nu gyicy cup consuel lo, yu ze' bi guud nu cui mbañ yu tub la. <sup>48</sup> Gun ya nacä gyishtily nu cuic gyel mbañ ni mbecy. <sup>49</sup> De gyitoo bel ni de ru bdow dey gyishtily nu la maná nu briic Ñgyoozh lat nu gusa dey de lugaar ub zi, tees gut dey. <sup>50</sup> Tees gyishtily nu ya rzata lo der, nde' gyishtily nu bruu gyibaa. Mbecy nu gow gyishtily ze' wat yu. <sup>51</sup> Ya nacä gyishtily nu cuic gyel mbañ: gyishtily nu bruu gyibaa. De yu nu gow gyishtily ze', cui mbañ yu tub la, nunu gyishtily nu ya gricä ni dey, nde' laab cuerpe ne. Ricä ñii, gun orze' de mbecy gyishlombecy gad nu cui mbañ dey —nam.

<sup>52</sup> Orze' la be de mbecy Israel brugyi' nu ro zi dey riidz nu losa'y. Orze' na dey:

—¿Lac mod gyicya' yu ii par nu cuic yu cuerpe niy dow den? —na dey.

<sup>53</sup> Orze' na Jesuuz rab mi dey:

—Ya rishli rnęe lo der benu wow der cuerpe ne ya, biñ nu byac mbecy, nunu benu wo' der reña, orze' wad nu cui mbañ der. <sup>54</sup> Cyu zi'l mbecy nu gow cuerpe ne nunu go'y reña, yu ze' bi guud nu cui mbañ yu tub la, nunu gyicya nu gyabañ yu ornu laab nde' la nu shuub dzi nu ded ni gyishlombecy. <sup>55</sup> Gun cuerpe ne, nde' tub comid nu rishli gaal. Ze' reña, nde' tub nis nu rishli gaal nu go' dey. <sup>56</sup> Gun de yu nu gow cuerpe ne nunu go'y reña, de yu ze' cyiñ du yu, nunu de yu ze' cyiñ nuy ya.

<sup>57</sup> Ñgyoozh uza, biñ nu bzuu nez ya, mbañ mi, nunu ya mbaña par nu nac mi ze'. Nde' nu ni' zi'l mod de yu nu gow cuerpe ne, cui mbañ yu nu nac ya. <sup>58</sup> Gyishtily nu ya rzata lo der, nde' gyishtily nu bruu gal gyibaa. Gyishtily nu rnęe ii, nii wasaap ñi gyishtily nu la maná nu bdow de gyitoo bel ni den. Mas bdow dey de gyishtily ze',

tees gut dey. Ze' de yu nu gow gyishtily nu ya rnęe, de yu ze' cui mbañ dey tub la —nam.

<sup>59</sup> De nii coz nu blyuu Jesuuz ni de mbecy nu byatublaazh nañ yu' nu rsya' de mbecy Israael riidz ni Ngoozh Capernaum.

### Riidz nu gyicy nu cui mbañ mbecy tub la

<sup>60</sup> Na zigy de yu nu rsya' lom, ornu güeñ dey de nde', orze' na dey rab yu losa'y:

—De riidz nu mniim ii, dzi ga biigy. ¿Cyu gagye nu gyeñ de nu nde? —na dey.

<sup>61</sup> Na ornu gud lagy Jesuuz nañ lardoom nu rnii deet dey nu nac nde', orze' nam rab mi dey:

—¿A nu nac de riidz nu mnęe ii, nde' nu wangyu' lagy der? <sup>62</sup> ¿Ze' la gyicya' der benu gzac ru nu ya, biñ nu byac mbecy, nu chupa gyibaa, ze' nu pcyiñña nu loga? <sup>63</sup> Espiriit Yon ni Ngoozh, mi ze' gyicy mi nu cui mbañ de mbecy gun de mbecy gyishlombecy se la la cyiññ dey par nu gyicy dey nu cui mbañ yu. Tees de riidz nu mnęe lo der ii, nii coz nu bruu lo Espiriit Yon ni Ngoozh. Nunu mi ze' gyicy mi nu cui mbañ dey.

<sup>64</sup> Tees gabee yu' la be mbecy lat der nu wagyicy cup consuel lo —nam.

Gun Jesuuz nil bi gud lagy mi nese anzir nu cuim dey nu ca na de yu nu wayicy cup consuel lom, nunu bi gud lagya'm ca na yu nu gu'm yaa mbecy rzi lagy.

<sup>65</sup> Orze' na ga'm:

—Nde' nu ya bi mnęe lo der nu ni tub la mbecy wac gyecha' dey lo, benu walab Ngoozh niim nañ lardooy.

<sup>66</sup> Par nu nac de riidz ze', zigy de yu nu rsya' lom bya ich yu nunu wanchesaa nu ga' dey mi. <sup>67</sup> Orze' na Jesuuz rab mi de trocyup yu nu rsya' lom:

—Ze' de ru, ¿a ni' rlagy der ruu chur lo? —nam.

<sup>68</sup> Orze' na Simoq Bed:

—Shuaan de, ¿ze' cyu lo cha de beni? De riidz nu ru rniir, nde' riidz nu gyicy ñi nu cui mbañ de tub la.

<sup>69</sup> Nunu de ya bi ricy cup de consuel lor, nunu bi rad lagy de nu ru nac ru biñ yon nu bruu lo Ngoozh —na Bed.

<sup>70</sup> Orze' na ga' Jesuuz rab mi dey:

—¿A walab nu pcui de trocyup de ru? Ze' lo trocyup der, tub yu nac yu tub mbecy ni nuras —nam.

<sup>71</sup> Lat nu mniim de riidz ii, orze' bzat mi Judas, iññ Simoq Iscariote, gun mas Judas nac yu tub de trocyup yu nu rsya' lom, tees yu ze' yu nu bgu' Jesuuz yaa mbecy nu rzi lagy.

### De bicy Jesuuz wagyicy cup dey consuel lom

<sup>72</sup> Despuees ni de nu nde', orze' gusam de lugaar ni Galilea. Orze' wangalagy mi ñgyes sam Judea, gun lugaar ze' rded de yu zub lo ni de mbecy Israael ryub yum par nu cut dey mi. <sup>2</sup> Na tiem ze' bi yad shuub dzi nu chu' de mbecy Israael tub sa' nu la sa' ni ramad.

<sup>3</sup> Orze' na de bicy mi rab yum:

—Cue' gyiyeen ru ii. Gush nez yaa par lo de yu ni Judea, gun orze' de yu nu rsya' lor zac dey de coz ily nu

ricy ru. <sup>4</sup> Gun ni tub la mbecy wayicy yu coz ngach be-nu rlagy yu nu nap cu' lo mbecy yu. Como bi ricy ru de coz ily, orze' rlagy ñi nu lyuur de coz nu ricy ru lo dela mbecy ni gyishlombecy —na dey.

<sup>5</sup> Gun gashtal de bicy mi wangyicy cup dey consuel lom. <sup>6</sup> Orze' na Jesuuz rab mi dey:

—Gaal zi nigul shuub tiem né nu chü' Jerusaleeng.

Ze' par de ru la zi'l tiem nde' coz nu nap. <sup>7</sup> De mbecy ni gyishlombecy wac gazi lagy dey lo de ru, tees lo ya rzi lagy dey, gun naal la ricya nu rabee nu de coz nu ricy dey, nde' coz a' nap. <sup>8</sup> De ru yaa der sa', gun ya waya na, gun gaal zi nigul shuub tiem né nu gyä —nam.

<sup>9</sup> Ornu blazh mniim de riidz ze', orze' byeeñ gam Galilea.

### Jesuuz yam sa' ni ramad

<sup>10</sup> Na despuees ornu bi gush nez de bicy mi nu ya dey sa' ze', orze' gush neza' ub mi yam. Nomaas walab nu suelt la yam, sinu yam tub mod nu dze ga. <sup>11</sup> Na de mbecy zub lo ni de mbecy Israael byub dey mi lat sa'. Orze' na dey rab yu losa'y:

—¿Ca rded yu ze' na? —na dey.

<sup>12</sup> Na lat de mbecy zigy brugyi' ro dey riidz dze ga nu rzat dey mi. Yu' dey nay: "Yu ze' nac yu tub mbecy nap." Tees yu' ga' dey rniiy: "Yu ze' walab mbecy nap yu, sinu ricy yu nu radza mbecy", na dey.

<sup>13</sup> Nunu ni tub la mbecy wansat dey mi ye ga la nu nac nu rdzib dey lo de yu zub lo ni de mbecy Israael.

<sup>14</sup> Na ornu bi guzeel sa', orze' gu' Jesuuz lol'i ni yu' nu driib zily de mbecy Israael Ngoozh. Orze' brugyi' rlyuum ni dey. <sup>15</sup> Orze' ton'a la za nu ic de yu zub lo ni de mbecy Israael:

—¿Lac bicy yu ii nu gud lagy yu ni de coz nu rniiy, gun wanchay scuel? —na dey.

<sup>16</sup> Orze' na Jesuuz rab mi dey:

—Riidz nu rlyuu, nde' walab riidz nu bruu nañ shcab ni uba, sinu nde' riidz nu bruu lo Ngoozh, biñ nu bzuu nez ya. <sup>17</sup> Cyu zi'l mbecy benu shet ic yu nu gyicy yu coz nu rlagy Ngoozh, orze' gad lagy yu benu riidz nu rlyuu, nde' bruuñ lo Ngoozh, o nu rlyuu riidz nu rlagy ub zi'l la. <sup>18</sup> Gun benu mbecy nu rnii nu shcab ni ub zi'l, yu ze' ni rniiy gun rlag yu nu gyabic mbecy gyel mbecy niy. Ze' yu nu ryub gyel mbecy par yu nu bzuu nez yu, yu ze' coz nu rniiy, nde' coz nu rishli, nunu sac la gyel rguu nañ lardooy.

<sup>19</sup> ¿A walab nu rishli nu Moisees bzeeñ yu leey yaa dey? Tees ni tub la der wagyicy yac der niñ. Orze' ¿ze' lagu ryub der mod nu cut ru ya? —nam.

<sup>20</sup> Orze' na la be de mbecy zigy ze' rab yum:

—¡Ru bicy ni nuras ru! ¿Ze' cyu nu rlagy cut ru ze' beni? —na dey.

<sup>21</sup> Orze' na ga' Jesuuz rab mi dey:

—Dela de ru za nu ic der nu nac tub zi coz nu bicya sab, dzi nu rzu lagy mbecy Israael. <sup>22</sup> Tees Moisees pcaaay der nu caar beey sircunsision cuerpa ni de yu nguzh ni der. Mas sab, dzi nu rzu lagy mbecy Israael, rcaa der beey ni sircunsision cuerpa ni yu nguzh ni der, como nde' coz nu pcaa Moisees der nu gyicy ru. Tees

nde' walab coz nu bzuub Moisees gyi'ñ, sinu nde' coz nu nil ricy de gyitoo bel ni den.<sup>23</sup> Benu de ru rcaar beey sircunsision cuerp ni yu nguzh ni der mas sab, dzi nu rzu lagy mbecy, par nu cue' chu' falt ni der nu leey ni sircunsision nu bzeeñ Moisees, orze' ḷlagu rzi lagy der lo gyi' nu b icy yacā dutuub la cuerp ni tub mbecy rat, sab, dzi nu rzu lagy mbecy Israeel?<sup>24</sup> Cue' nii too der la na tub coz tub nu rgüii zi'l der looñ. Ornu nii too der la na tub coz, orze' b icy der mod nu se'ñ.

### Jesuuz rniim ca ledz mi

<sup>25</sup> Na la be de mbecy nu yu' Jerusaleeng, orze' brugyi' rgugyi' dey lo losa'y:

—¿Ze' a walab yu ii yu nu ryub dey mod nu cut yu ze'?<sup>26</sup> ¡Güii ñuu! Lo rgüii la mbecy rniiy. Nunu ni tub la mbecy wagnii dey nu yu' falt niy. ¿Posib a walab nu rad lagy de fushtiz nu rishli gaal nu yu re nac yu Mesías?

<sup>27</sup> Tees ornu cyid Mesías, orze' ni tub la mbecy wad lagy dey ca gruum. Ze' yu ii rad lagy den ca ledz yu —na dey.

<sup>28</sup> Na tiem ze' zu Jesuuz loli' ni yu' nu driib zily de mbecy Ñgyoozh, nunu rlyuum ni dey. Orze' brugyi' ye ga la rniim:

—Laab ni yu' lo der ya, nunu rad lagy der ca bruu! Tees walab nu yapā nu nac nu rlagy ub zi'l la, tees biñ nu bzuu nez ya, mi ze' nac mi biñ nu ricy paa, nunu mi ze' a' yu' lo der mi.<sup>29</sup> Tees ya yu' lom, gun ya bruu lom, nunu mi ze' bzuu nez mi ya yapā —nam.

<sup>30</sup> Yu' mbecy ngulagy dey ñgya nu dey mi pres, tees ni tub la dey wanshet yaay mi gun nigul shuub tiem nu ni gyicy nu dey mi.<sup>31</sup> Tees zigy mbecy b icy cup dey consuel lom. Orze' na dey:

—Ornu cyid Mesías, ¿walab gaal gyicy zir mi nusuridz, gaze' gal nu ricy yu ii? —na dey.

### De mbecy fariseo b icy pee dey nu shet lag yu Jesuuz pres

<sup>32</sup> Na ornu güeñ de mbecy fariseo de riidz nu bee de mbecy dze ga nu nac Jesuuz, de yu ze' gal nu de yu zub lo ni de uz bzuu nez dey la be de yu nu rña nañ yu' ni Ñgyoozh nu cha nu dey mi pres.<sup>33</sup> Orze' nam rab mi dey:

—Gabee chesa du de ru se la be dzi. Orze' gruu lat der nu gyā lo biñ nu bzuu nez ya nu yapā.<sup>34</sup> De ru yub der ya, tees wayada' ni der, gun wac cha der lugaar ze' nu ya gya.

<sup>35</sup> Na de yu zub lo ni de mbecy Israeel brugyi' ro dey riidz nu losa'y. Orze' na dey:

—¿Ze' ca cha ga' yu ii nu wayada'y ni den? ¿Walab gaal chay lat de mbecy Israeel nu rcyiiñ reña' nasy-oong nu cha lyuu ni de mbecy nu walab mbecy Israeel?<sup>36</sup> ¿Lac yaruu de riidz nu rniiy: "Yub der ya, tees wayada' ni der, gun wac cha der lugaar ze' nu ya gya", nay? —na dey.

Nañ lardoo mbecy gyac ñi gal nu na ze' nu driib nis; nis ze', nde' nis ni gyel mbañ

<sup>37</sup> Laab nde' la dzi nu bded ni sa' ze'; nde' dzi nu ricy zir ñi presis. Orze' dzi ze' wes su Jesuuz. Orze' ye la mniim:

—Benu ca na der rbigy ru nis nañ lardoor, orze' da der lo. Ya gricā nis go' der.<sup>38</sup> Nde' gal nu rniiñ lat de riidz ni Ñgyoozh. Rniiñ nu de yu nu gyicy cup consuel lo, grib nis nu cuic gyel mbañ nañ lardoo dey, rniiñ —nam.

<sup>39</sup> Na nis nu bzat Jesuuz ze', nde' Espiriit Yon ni Ñgyoozh, biñ nu cuic Ñgyoozh ni de yu nu gyicy cup consuel lom, gun tiem ze' Ñgyoozh nigul cuic mi Espiriit Yon nim ni mbecy, gun Jesuuz nigul cush cyam nu gyam lo gyel lily nim.

### Byac cyup nac de mbecy

<sup>40</sup> Na lat ze' yu' la be mbecy. Ornu güeñ dey de riidz ze', orze' na dey:

—Segur la yu ii nac yu nu mnii por cuen ni Ñgyoozh, yu nu ca lo cuen nu cyid —na dey.

<sup>41</sup> Ze' yu' ga' dey nay:

—Laab mi ii nac mi Mesías, biñ nu ca lo cuen nu combañ de ub na —na dey.

Tees yu' ga' dey nay:

—Walab, gun Mesías walab Galilea ca lo cuen nu gruum —na dey.—<sup>42</sup> ¿A walab nu rniiñ lat de riidz ni Ñgyoozh nu Mesías gruum lat de nez rey Dabi, nunu gal mi Beleeng, laab lugaar ze' nu gul rey Dabi? —na dey.

<sup>43</sup> Orze' de mbecy byacyup nac dey nu nac Jesuuz.

<sup>44</sup> Yu' dey ngulagy yu ñgya nuy mi pres, tees ni tub lay wancu' yaay mi.

<sup>45</sup> Orze' bish cya de yu nu rña nañ yu' ni Ñgyoozh nu yay lo de mbecy fariseo, gal nu lo de uz zub lo. Orze' na de yu ze' rab yu de yu nu rña ze':

—¿Lagu wancyiid nu der Jesuuz? —na dey.

<sup>46</sup> Orze' na ga' de yu nu rña ze':

—Rila wagrusu ni tub la mbecy nu gniiy gal nu rnii yu ze'! —na de yu nu rña ze'.

<sup>47</sup> Orze' na ga' de mbecy fariseo rab yu dey:

—¿A ni' zi'l de ru bi bguu ga'y der?<sup>48</sup> Guncar ni tub la de fushtiz ni den, ni de mbecy fariseo wacheña lagy dey nu nac yu Mesías.<sup>49</sup> Tees de mbecy nu a' yu' lo leey nu bzeeñ Moisees, de yu ze' cuic Ñgyoozh cashtig ni dey —na dey.

<sup>50</sup> Ze' ri tub mbecy fariseo nu la Nicodemo lat dey. Yu ze' yu nu gua güii Jesuuz anzir. Orze' nay rab yu dey:

<sup>51</sup> —Gun lo leey nu bzeeñ Moisees ni den rniiñ nu wac niin nu yu' falt ni tub mbecy anzir nu gyeñ na de coz nu rniiy, nunu anzir nu gad lagy na de coz nu b icy yu —nay.

<sup>52</sup> Orze' na ga' dey rab yu Nicodemo:

—¿Walab gaal gaza'r nac ru mbecy Galilea? Nap psya' lat de riidz ni Ñgyoozh, gun orze' gad lagy ru nu

rila waruu ni tub yu nu rnii por cuen ni Ñgyoozh Galilea —na dey.

<sup>53</sup> Orze' tub ga la mbecy ya dey yu'y.

### Tub biñ mñaa nu byu' bee nu reña' yu gyeey

8 Tees Jesuuz pcam zam par too b icy ni ya Oliva.

<sup>2</sup> Na or nu bza' yu tuuba' dzi, orze' bish cyam yam loli' ni yu' nu driib zily de mbecy Ñgyoozh. Orze' brugyi' rde' mbecy lom. Orze' gusub mi nunu brugyi' nu rlyuum ni dey.

<sup>3</sup> Orze' de yu nu rlyuu leey nu bzeeñ Moisees, gal nu de' zir mbecy fariseo, gua nu dey tub biñ mñaa lo Jesuuz par nu byu' beem nu yu gyeey nu walab ñgyeem. Orze' bzu dey mi gazel de mbecy ze'. <sup>4</sup> Orze' na dey rab yu Jesuuz:

—Masht, biñ mñaa ii bdub dey mi lat nu gycaal la yu' num yu gyeey, yu nu walab ñgyeem. <sup>5</sup> Ornu Moisees bzeeñ yu leey ni den, orze' nay nu rlagy ñi nu gow gyita' den biñ mñaa nu na gal nu na mi ii gal gat lam. Ze' ru, ¿la ñuu niir? —na dey.

<sup>6</sup> Ni b icy dey par nu bzu dey tub caa ni Jesuuz, gun orze' gad mod nu griib dey cyi ic mi. Orze' Jesuuz gusab tiily mi. Orze' brugyi' rcaam lo yu nu mbiz mi. <sup>7</sup> Lat nu zu dey rgugyi'y lom, orze' wes sum. Orze' nam rab mi dey:

—Ca na de ru, mbecy nu wangyicy coz cyi, orze' pshet der gyita' biñ mñaa ii loga la —na Jesuuz.

<sup>8</sup> Orze' gusab tiilya'm tuuba' tir. Orze' brugyi' rcaa ga'm letr lo yu. <sup>9</sup> Na ornu güeñ dey riidz ze', orze' brugyi' tub ga, tub ga dey druu chuy. Brugyi' druu chu de yu gush loga la. Gaze' nu brugyi' druu chu de yu feñ. Orze' se Jesuuz zi'l byeeñ mi nu biñ mñaa nu gabee zum lugaar ze'. <sup>10</sup> Orze' wes su Jesuuz. Orze' nam rab mi biñ mñaa ze':

—Biñ mñaa, ¿ca za de yu ze' na? ¿A sac ni tuba' la mbecy nu niyy nu yu' falt nir? —na Jesuuz.

<sup>11</sup> Orze' na biñ mñaa ze' rab mi Jesuuz:

—Sac ni se tuba' la dem —na biñ mñaa ze'.

Orze' na ga' Jesuuz:

—Ni' yá wanęe nu yu' falt nir. Na yaa yu'r, nunu cue' ga' gyicy ru cyi —na Jesuuz.

### Jesuuz rniim ca bruum nunu ca gyam

<sup>12</sup> Orze' na Jesuuz rab mi de mbecy ze':

—Yá nacä yaa nu rbic nu gyal shcab ni de mbecy gyishlombecy. Yu nu cyid ca ich yá, yu ze' gad yaa ze' niy nu gyicy ñi nu cui mbañ yu. Nunu rila a' nac yu mbecy nu wagad lagy de coz nu rlagy Ñgyoozh —nam.

<sup>13</sup> Orze' na de mbecy fariseo rab yum:

—Ru laab ub zí'l ru rzat ru ub ru, nde' nu se la la cyiñ de riidz nu rniir —na dey.

<sup>14</sup> Orze' na ga' Jesuuz rab mi dey:

—Mas laab ubä rztat ubä, tees riidz nu rnęe nde' riidz nu rishli. Gun rad lagya ca brüy, nunu rad lagya ca gyä. Ze' de ru wagad lagy der ca brüy, nunu ni wagad lagy der ca gyä. <sup>15</sup> De ru rnii too der ben lac na tub mbecy mod nu ricy mbecy gyishlombecy. Ze' yá, a' nii

tqo ti yu' falt ni ni tub la mbecy. <sup>16</sup> Tees benu yá nii tqo nu yu' falt ni tub mbecy, orze' nde' coz rishli, gun walab ub zí gyicyä ñii, sinu nu Ñgyoozh uza, biñ nu bzuu nez yá, mi ze' nac num yá ornu gyicyä de nde'. <sup>17</sup> Gun bi cañ lat leey nu bzeeñ Moisees ni der nu rniiñ: "Benu cyup mbecy tub zí'l riidz rnii dey, orze' nde' riidz nu cyiñ", rniiñ. <sup>18</sup> Ze' na, yá rnęe por cuen ne. Nunu uza, biñ nu bzuu nez yá, mi ze' biñ cyup nu rnii por cuen ne —nam.

<sup>19</sup> Orze' na ga' dey rab yu Jesuuz:

—¿Ze' ca zu uz ru beni? —na dey.

Orze' na ga' Jesuuz rab mi dey:

—De ru a' yu' lo der yá. Yegar uza chu' lo ga' der mi. Gun ze' benu gyu' lo der yá, orze' ni' zí'l gyu' lo der uza —nam.

<sup>20</sup> De nii riidz nu mnii Jesuuz lat nu rlyuum ni de mbecy ze' nu zub yu' nu driib zily de mbecy Ñgyoozh. Laab lugaar ze' nu ca alcansi ni tiñ gun ze' zum. Tees ni tub la mbecy wancu' yaa dey mi ñgya nuy mi pres, gun nigel shuub dzi nu ni gyicy nu dey mi.

### Jesuuz rniim nu wac gya dey ledz mi

<sup>21</sup> Orze' Jesuuz na ga'm rab mi dey:

—Yá grüy lat der nu gyä. Orze' de ru yub der yá, tees de ru gat der lat nu gabee nac der mbecy cyi. Nunu wac gya der ze' nu yá gyä —nam rab mi dey.

<sup>22</sup> Orze' na ga' de yu zub lo ni de mbecy Israeel:

—¿Lac yaruu de riidz ii niy nu wac gyan ze' nu gyay? ¿Walab gaal nu cut yu ub yu? —na dey.

<sup>23</sup> Orze' na ga' Jesuuz rab mi dey:

—De ru nac ru ni gyishlombecy ii. Ze' yá nacä ni gyibaa, gun de ru ledz ru gyishlombecy ii. Ze' yá walab ii ledzä. <sup>24</sup> Nde' nu yá mnęe lo der nu gat der lat nu gabee nac der mbecy cyi. Gun gat der lat nu gabee nac der mbecy cyi benu wacheña lagy der nu yá nacä biñ nu mnęe nu nacä.

<sup>25</sup> Orze' na dey rab yu Jesuuz:

—¿Ze' ru, cyu nac ru beni? —na dey.

Orze' na ga'm rab mi dey:

—Yá bi mnęe lo der nese nu loga la cyu nacä. <sup>26</sup> Yu' tona' la coz nu gac neę nu nac de ru, nunu yu' tona' la cyi nu gac griiba ic der, tees tub lo zí'l riidz nu mnii biñ nu bzuu nez yá, nde' gnęe lo de ru, mbecy nu yu' gyishlombecy ii. Nunu mi ze' rniim riidz nu rishli —na Jesuuz.

<sup>27</sup> Lat de riidz nu mnii Jesuuz, bzat mi Ñgyoozh uz mi, tees wangyet lag dey cuen. <sup>28</sup> Orze' nam rab mi dey:

—Ornu caa der yá, biñ nu byac mbecy, lo tub ya cruz, orze' gad lagy der nu yá nacä biñ nu mnęe nu nacä. Nunu ni' zí'l gad lagy der nu walab nu rnęe nu nac ub zí'l la, sinu rnęe tub lo zí'l coz nu blyuu Ñgyoozh uza né nu gnęe. <sup>29</sup> Gun Ñgyoozh, biñ nu bzuu nez yá, nac num yá. Mi ze' wansaan mi yá nu chesä ub zí gun dub laa tiem ricyä coz nu mi ze' yet lagy mi.

<sup>30</sup> Ornu mnii Jesuuz de riidz ze', orze' zigy mbecy b icy cup dey consuel lom.

De yu nu "O" rnii coz ni Ñgyoozh gal nu de yu nu "O"  
rnii ni de coz cyi

<sup>31</sup> Orze' na Jesuuz rab mi de yu zub lo ni de mbecy Israeel, de yu nu b icy cup consuel lom:

—Benu de ru zaab gyicy paa la der nu de riidz nu rnēe, orze' rishli gaal nac der yu nu rsya' lo. <sup>32</sup> Orze' gad lagy der ca na nu coz rishli. Orze' nu nac coz rishli ze' gla der —nam.

<sup>33</sup> Orze' na dey rab yu Jesuuz:

—Dē ya nac dē nez Abraham, nunu rila nigul gac dē moz ni ni tub la mbecy. ¿Lac yaruu ga' nde' nu rniir nu gla dē? —na dey.

<sup>34</sup> Orze' na ga' Jesuuz rab mi dey:

—Ya rishli rnēe lo der nu de mbecy nu ricy coz cyi, yu ze' nac yu moz ni de cyi. <sup>35</sup> Tub moz ni mbecy, a' nac yu famil ni mbecy tees yu nu nac i'ñ mbecy nac yu famil niy par tub la. <sup>36</sup> Benu ya i'ñ Ñgyoozh gyicya nu gla der ni de cyi, orze' rishli gaal dulaa der lo cyi. <sup>37</sup> Rad lagya nu de ru nac ru nez Abraham, tees rlagya der cut ru ya, gun wayicy cuen der de riidz nu rnēe. <sup>38</sup> Ya rnēe de coz nu rad lagya lat nu gusa du Ñgyoozh uzā. Ze' de ru ricy der de coz nu blyuu uz der nir —nam.

<sup>39</sup> Orze' na dey rab yum:

—Abraham, yu ze' nac yu uz dē! —na dey.

Orze' na ga' Jesuuz rab mi dey:

—Bi b icy na nu rishli gaal nu nac der i'ñ Abraham, orze' ñgyicy der gal nu b icy yu. <sup>40</sup> Tees ya rnēe de coz rishli lo der, de riidz nu güeñā ni Ñgyoozh, tees rlagya der cut ru ya. ¡Abraham rila wangyicy yu ni tub la coz gal nu rlagya de ru gyicy ru nur ya! <sup>41</sup> De ru gal gaa la ricy der nu uz ru —nam.

Orze' na dey rab yum:

—Dē ya a' nac dē gyid lab. Dē ya ricy cup dē tub zi uz dē. Mi ze' Ñgyoozh —na dey.

<sup>42</sup> Gaze' nu na Jesuuz rab mi dey:

—Benu rishli gaal ñgyac der i'ñ Ñgyoozh, orze' nca der ya, gun ya lo Ñgyoozh bruñ yapa. Nunu walab nu yapa nu nac coz nu rlagya ub zi'l la, sinu Ñgyoozh bzuu nez mi ya nu yapa. <sup>43</sup> ¿Lagu wagac gyet lag der cuen de riidz nu rnēe? Nde' gun walagy der nu zuub gyidag der de riidz nu rnēe. <sup>44</sup> Gun uz der, nde' ub la nuras.

Nunu de ru na der gal nu na yu ze'. Orze' rlagya der gyicy ru coz nu gyicy ñi nu gyet lag yu. Gun nuras b icy yu nu gut mbecy nese nu loga la. Nunu rila wagchay faboor ni coz rishli, gun rila wagniyy nu rishli. Ornu rguuy, ni ricy yu gun ni nay, gun nac yu mbecy rguu. Nunu nac yu cyoong de mbecy rguu. <sup>45</sup> Tees como ya rnēe de coz rishli lo der, nde' nu wacheña lagy der de riidz nu rnēe. <sup>46</sup> ¿Ca na de ru gac gyicy ru nu gabe ca na cyi nu b icya? Ze' benu ya rnēe coz rishli, orze' ¿lagu wacheña lagy der de coz nu rnēe? <sup>47</sup> Yu nu bi nac mbecy ni Ñgyoozh, yu ze' rzuub gyidag yu riidz nim. Ze' de ru par nu a' nac der mbecy nim, nde' nu wacsuub gyidag der nim —na Jesuuz.

Jesuuz nil bi zum nese anzir nu gzu Abraham

<sup>48</sup> Orze' na ga' de mbecy Israeel rab yum:

—¿A walab nu ricy cup dē rasoo ornu rnēe dē nu nac ru mbecy Samaria, nunu b icy ni nuras ru? —na dey.

<sup>49</sup> Orze' na ga' Jesuuz rab mi dey:

—Walab nu b icy ni nuras ya. Tees driib zilya Ñgyoozh uzā. Ze' de ru rgüii naañ der lo. <sup>50</sup> Walab nu rlagya nu gyabic mbecy gyel mbecy nē, tees zu tub biñ nu rlagya nu gyabic mbecy gyel mbecy nē ya, nunu mi ze' zam faboor nē. <sup>51</sup> Ya rishli rnēe lo der nu cyu zi'l mbecy nu zuub gyidag riidz nu rnēe, yu ze' rila wat yu —nam.

<sup>52</sup> Orze' na ga' de mbecy Israeel:

—Na gaal rishli rad lagy dē nu b icy ni nuras ru. Abraham gut yu, nunu de yu nu mnii por cuen ni Ñgyoozh guta' dey. Ze' ru na'r nu cyu zi'l mbecy nu gzuub gyidag de riidz nu rniir, de yu ze' mniir nu wat dey.

<sup>53</sup> ¿A rsa' lagy ru nu zily zir nac ru gaze' gyitoo bel ni den Abraham? Yu ze' gut yu. Nunu guta' de yu nu mnii por cuen ni Ñgyoozh. ¿Orze' cyu rsa' lagy ru nac ru beni? —na dey.

<sup>54</sup> Orze' na ga' Jesuuz rab mi dey:

—Benu griib zilya uba, orze' se la la sac nde'. Tees biñ nu driib zilya, mi ze' uzā, biñ nu de ru rniir nu nac Ñgyoozh nir. <sup>55</sup> De ru rila wancu' lo der mi, tees ya bi bdu' lom. Bi b icy na nu neq nu wantu' lom, orze' naca tub mbecy rguu gal nu na de ru. Tees ya rishli gaal bdu' lom, nunu rzuub gyidaga de riidz nu rniim. <sup>56</sup> Gyitoo bel ni der Abraham ton'a' la bet lag yu, gun briish loy nu zac yu dzi nu gruu zaca gyishlombecy ii, nunu ornu bzaac yu dzi ze', orze' bet lag yu —nam.

<sup>57</sup> Orze' na ga' de mbecy Israeel rab yum:

—Ru, gaal zi nigul shuub ru cyaal gaynal ña'n, ze' na'r nu bi bzaac ru gyitoo Abraham —na dey.

<sup>58</sup> Orze' na ga' Jesuuz rab mi dey:

—Ya rishli rnēe lo der nu ya nil bi zu nese anzir nu gal Abraham gyishlombecy ii —nam rab mi dey.

<sup>59</sup> Orze' brugyi' rte' dey gyita' nu gow gyita' dey mi gal gat lam. Tees wansac dey ca gush mi. Orze' bruum lol'i' ni yu' nu driib zily mbecy Ñgyoozh zam.

Jesuuz b icy nap mi urlo tub lo ca'

<sup>9</sup> Lat nu za Jesuuz tub nez, orze' bzaac mi tub mbecy lo ca' nu nil nay nese nu gul yu. <sup>2</sup> Orze' na de yu nu rsya' lom:

—Masht, ¿ca na dey yu' cyiy nu b icy ñi nu byaca' lo yu re nese ornu gul yu? ¿A nu nac cyi ub yu uti nu nac cyi de mbel niy? —na dey.

<sup>3</sup> Orze' na ga' Jesuuz rab mi dey:

—Ni walab nu nac cyi ub yu byaca' loy, nunu ni walab nu nac cyi de mbel niy, sinu byaca' loy par nu gabe nu la na riiñ nu ricy Ñgyoozh nu nac yu re. <sup>4</sup> Lat nu gabee cuic ñi tiem, rlagya ñi nu gyicy den de coz nu rlagya Ñgyoozh, biñ nu bzuu nez ya, gun shuub tiem nu waca' gyicy den coz nu rlagya mi. <sup>5</sup> Lat nu gabee rcyiñä gyishlombecy ii, ya na gal nu na tub yaa nu rbic nu gad lagy de mbecy ni de coz rishli ni Ñgyoozh —na Jesuuz.

<sup>6</sup> Na ornu blazh mniim de riidz ze', orze' pshu nis ru'm lo yu. Orze' b icy biñ mi ñuu mi' yu. Orze' bdaab mi biñ ze' ru' iz lo ca' ze'. <sup>7</sup> Orze' nam rab mi yu:

—Gua cyib ru ru' iz ru ru' zo ni Siloé —nam rab mi yu.

(Benu shaal na riidz ni Siloé ze', orze' yaruuñ: Bzuu nez.)

Orze' lo ca' ze' gua tiib yu ru' iz yu. Orze' gush nez yu yay, nunu bi rzac yu. <sup>8</sup> Orze' na de mbecy nu yu' nuy gaab ga gal nu de yu nu rzac nu rgyiiñ yu gun, orze' na dey rab yu losa'y:

—¿A walab yu ii yu nu rzub nu rgyiiñ gun? —na dey.

<sup>9</sup> Yu' ga' dey rniiy:

—Laab yu re nde' —na dey.

Ze' yu' ga' dey nay:

—Walab yu nde; nomaañ nu rlyu nu ni' zi'l nay gal nu na yu nu rgyiiñ gun ze' —na dey.

Tees, orze' na yu nu guc lo ca' ze':

—Laab ya nde' —nay.

<sup>10</sup> Orze' na ga' de mbecy ze':

—¿Ze' lac guc nu rac rzac ru na? —na dey.

<sup>11</sup> Orze' na ga' yu nu guc lo ca' ze' rab yu dey:

—Tub mbecy nu la Jesuuz bzaay biñ. Orze' bdaab yuñ ru' izä. Orze' nay rab yu ya: "Gua cyib ru ru' iz ru ru' zo ni Siloé", nay rab yu ya. Orze' gua ru' zo ze'. Na cuanzir nu blazh bdibä ru' izä, orze' brugyi' rzaca —na yu nu guc lo ca' ze'.

<sup>12</sup> Orze' na ga' dey rab yuy:

—¿Ze' ca zu mbecy ze' na? —na dey.

Orze' na ga' yu nu guc lo ca' ze':

—Wagad lagya ca zay —nay.

De mbecy fariseo fert la rgugyi'y lo yu nu guc lo ca' ze'

<sup>13</sup> Orze' gua nu dey yu nu guc lo ca' ze' lo de mbecy fariseo. <sup>14</sup> Ze' dzi nu bzaa Jesuuz biñ nu b icy yac mi mbecy lo ca' ze', nde' sab, dzi nu rzu lagy mbecy Israeel. <sup>15</sup> Orze' de mbecy fariseo bdugyi' dey loy, ben lac mod byanap ur loy. Orze' nay rab yu dey:

—Yu ze' bdaab yu biñ ru' izä. Orze' gua tibañii. Orze' na rzaca —nay.

<sup>16</sup> Orze' la be de mbecy fariseo na dey:

—Yu nu b icy coz ii, yu ze' walab mbecy ni Ñgyoozh, gun wagyicy yac yu nu leey ni sab, dzi nu rzu lagy mbecy Israeel —nay.

Ze' yu' ga' dey nay:

—Ze' benu nac yu mbecy cyi, orze' ¿lac mod gac gyicy yu de nusuriidz gal nu na nu nde'? —na dey.

Orze' byac cyup nac dey. <sup>17</sup> Orze' na ga' dey rab yu yu nu guc lo ca' ze':

—¿La ñuu niir par nu nac yu ze', como b icy nap yu ursor? —na dey.

Orze' na ga' yu nu guc lo ca' ze':

—Yu ze' nac yu tub yu nu rnii por cuen ni Ñgyoozh —nay.

<sup>18</sup> Tees de yu zub lo ni de mbecy Israeel wancheña lagy dey nu guc yu mbecy lo ca', ze' na rzac yu, gashtal bredz la dey de mbel niy. Orze' guña lagy dey nu yu ze'

guc yu lo ca'. <sup>19</sup> Na ornu bru'ña de mbel ni lo ca' ze', orze' bdugyi' de mbecy ze' lo dey. Orze' nay:

—¿A laab yu ii nac yu i'ñ der? De ru rnii der nu ca' loy ornu gul yu. Ze' benu ni, ¿lac guc? ¿Lagu nu rzac yu na? —na dey.

<sup>20</sup> Orze' na de mbel ni lo ca' ze':

—Rad lagy de nu yu ii nac yu i'ñ de, nunu nese nu gul laay ca' loy. <sup>21</sup> Tees wagad lagy de lac guc nu rzac yu. Ni wagad lagy de cyu b icy nap urloy. Bdugyi' der loy ben. Bi nu ña'n yu ii. Gac niiy por cuen ni ub yu —na de mbel ni yu ze'.

<sup>22</sup> Ni mnii de mbel niy par nu gudzib dey lo de yu zub lo ni de mbecy Israeel, gun de yu ze' bi psaap dey riidz nu cyu zi'l mbecy nu gniy nu Jesuuz nac mi Mesías, orze' wazaana' dey nu chu'y lat de mbecy ornu rsya' dey riidz ni Ñgyoozh. <sup>23</sup> Nde' nu ni mnii de mbel niy, ornu na dey: "Bdugyi' der loy. Bi nu ña'n yu ii", na dey.

<sup>24</sup> Orze' de yu zub lo ni de mbecy Israeel bredzä' dey yu nu guc lo ca' ze'. Orze' na dey rab yuy:

—Mnii lo de rishli gaal ni Ñgyoozh. De ya rad lagy de nu yu ze' nac yu tub mbecy cyi —na dey.

<sup>25</sup> Orze' na yu nu guc lo ca' ze' rab yu dey:

—Wagad lagya ti nac yu mbecy cyi o ti a' nac yu. Tees tub coz nu rad lagya, nde' nu gucä lo ca', tees na rzaca —nay.

<sup>26</sup> Orze' na ga' dey rab yu yu nu guc lo ca' ze':

—¿Lac mod b icy nuy ru? ¿Lac b icy yu ornu b icy yac yu ursor? —na dey.

<sup>27</sup> Orze' na ga' yu nu guc lo ca' ze':

—Ya bi mnée lo der, tees wangyicy cuen der de riidz nu mnée. ¿Lagu rlagy der nu nee lor tuuba' tir? ¿Walab gaal ni' de ru rlagy der sya'r loy? —na yu nu guc lo ca' ze'.

<sup>28</sup> Orze' brugyi' rsuriidz dey yu. Orze' na dey:

—Ru nac ru tub yu nu rsya' lo mbecy ze'. Ze' de ya naca yu nu rsya' lo gyitoo Moisees. <sup>29</sup> De ya rad lagy de nu Ñgyoozh mnii num Moisees, tees mbecy ze', ni wagad lagy de ca ledz yu —na dey.

<sup>30</sup> Orze' na ga' yu nu guc lo ca' ze':

—¿Cha du ic na de coz nu rnii der! De ru wagad lagy der ca brruy, tees b icy yac yu urlo. <sup>31</sup> De ub na nap rad lagy den nu Ñgyoozh wayicy cuen mi de coz nu rnii de mbecy cyi; tees ricy cuen mi de mbecy nu rca lagy lom gal nu de yu nu ricy coz nu rlagy mi. <sup>32</sup> Gaal zi nu bzub gyi' gyishlombecy nigul gyeñ den nu gruu su tub mbecy nu gyicy yac yu urlo tub mbecy lo ca' nu nil nay nese ornu gul laay. <sup>33</sup> Ze' benu walab lo Ñgyoozh bruy, orze' wac ñgyicy yu ni tub la coz —na yu nu guc lo ca' ze'.

<sup>34</sup> Orze' na ga' dey rab yuy:

—Ru nese nu gul laar nil nac ru mbecy cyi. Ze' na, ¿a rlagy ru rlyuur ne de ya? —na dey.

Orze' pcyuu nu dey yu lugaar ze'.

De mbecy nu wagad lagy nañ lardoo

<sup>35</sup> Na ornu Jesuuz güeñ mi nu pcyuu nu dey yu nu guc lo ca' ze', orze' byub mi yu. Na ornu byad yu nim, orze' nam rab mi yu:

—¿A ricy cup ru consuel lo biñ nu byac mbecy?

—nam.

<sup>36</sup> Orze' na yu nu guc lo ca' ze':

—Jesuuz, mnii l̄o cyu nde', gun orze' gyicy cupa consuel loy —nay.

<sup>37</sup> Orze' na ga' Jesuuz rab mi yu:

—Bi bzaac ru cyu nde'. Nde' ya, biñ nu rnii nur na —nam.

<sup>38</sup> Orze' nay rab yu Jesuuz:

—Shuaana, ya gyicy cupa consuel lor —nay.

Orze' guzu tib yu lom.

<sup>39</sup> Orze' na Jesuuz rab mi yu:

—Ya yapa gyishlombecy ii par nu cui de mbecy, gun orze' de lo ca' gad lagy dey. Ze' de mbecy nu rzac gaca' lo dey —nam.

<sup>40</sup> Orze' la be de mbecy fariseo nu yu' garee ga güeñ dey de riidz nu mniim. Orze' na dey rab yum:

—¿Walab gaal gaza' de ub na nac na lo ca'? —na dey.

<sup>41</sup> Orze' na Jesuuz rab mi dey:

—Benu de ru nac der mbecy lo ca', orze' sac falt ni der, tees gun rnii der nu rzac ru, nde' nu gabee yu' falt ni der —nam.

### Jesuuz nam gal nu na tub yu nu rña shily

10 Orze' na Jesuuz:

—Tees ya rishli rn̄eñ nu de yu nu wayu' par gyero' ni chicyer ni shily, ze' chu'y par reña' lugaar ni chicyer, yu ze' nac yu tub gubaan, nunu nac yu mbecy a' nap. <sup>2</sup> Tees yu nu rzu' par gyero' ni chicyer ni shily, yu ze' nac yu yu nu rña ma. <sup>3</sup> Gun yu nu ca gyero' ni chicyer ze' rshaal yu ro' ze' ornu ru'ña yu nu rña de shily ze'. Orze' shily ze' reñ ma nu zaab ti' y rniy. Orze' rbedz yu ma tub ga la ma niy nu nu la ma. Orze' rbooy ma nañ chicyer ze'. <sup>4</sup> Na ornu bi blazh bruu dela ma, orze' yu nu rña ma rzay par lo ma. Orze' de shily ze' za ca ma ich yu gun yu' lo ma ti' y ornu rniy. <sup>5</sup> Tees de ma ze' wacha ca ma ich mbecy nu a' yu' lo ma, sinu druu chu ma loy, gun a' yu' lo ma ti' y, gun nac yu mbecy a' yu' lo ma —nam.

<sup>6</sup> Jesuuz mniim de riidz tiily ze' lo dey, tees wangyet lagy dey cuen lac yaruuñ.

### Jesuuz nac mi biñ nu nap rña shily

<sup>7</sup> Orze' nde' nu Jesuuz mnii ga'm tuuba' tir:

—Ya rishli rn̄eñ lo der: ya na gal nu na gyero' ni chicyer ze' nu rzu' de shily. <sup>8</sup> Dela de yu nu biid lo zir gaze' ya, mas mnii dey nu nac yu yu nu rña shily, guc dey gubaan, nunu guc dey mbecy a' nap. Tees de shily wangyicy cuen ma dey. <sup>9</sup> Ya na gal na gyero' ni chicyer ze'. De yu nu chu' gyero' ze', gruu mbañ yu. De yu ze' na dey gal nu na shily: nu rzu' ma nañ chicyer, nunu druu ga' ma, nunu rad gyizh nu row ma.

<sup>10</sup> De gubaan ryiid yu par nu gyicy zi'l yu gubaan, nunu par nu cut yu, nunu par nu nit loy; tees ya yapa par nu grica gyel mbañ ni der, nunu par nu gyicy cup za' la der ñii.

<sup>11</sup> 'Ya na gal nu na tub biñ nu nap rña shily. Ze' biñ nu nap rña shily ze', shet ic mi nu gat mi nu nac de shily ze'. <sup>12</sup> Benu tub moz nu ryash ni nu rña de shily, ze' nde' walab fis niy, nunu shily ze' walab niy ma, ze' benu zac yu nu yad tub lob, orze' zeeñ gay de shily ze'. Gash yu carer gyay. Orze' lob ze' shet ru' ma de shily ze', nunu tush las ma de ma. <sup>13</sup> Orze' moz ze' gruu chuy lo de shily ze', gun nu nac tiñ zi'l ricy yu riiñ, walab nu rcay de ma.

<sup>14</sup> 'Ze' ya naç biñ nu nap rña de shily. Gal nu ya yu lo de ma ne, nunu yu' lo ga' de ma ya, <sup>15</sup> ni' zi'l Ngoozh uz̄a yu' lom ya, nunu ni' zi'l ya yu' lo Ngoozh uz̄a. Nunu ya shet ic̄a nu gata nu nac de shily ne.

<sup>16</sup> Nunu yu' ga' shily ne: bañ nu sac lat tub nac de bañ nu yu' ii. Ni' de ma ze' rlagy ñi nu cha te' ma. Orze' de ma ze' zuub gyidag de ma ne nunu gyac se tub nac zi'l de ma. Orze' gyac se tub zi'l ya biñ nu rña ma.

<sup>17</sup> Ngoozh uz̄a rcam ya gun shet ic̄a nu gata, gun orze' cush cȳa nu gyabaña' tuuba' tir. <sup>18</sup> Ni tub la mbecy wac cut yu ya, benu wazaana. Tees nde' coz nu bruu nañ lardo ub la nu shet ic̄a nu cut mbecy ya, nunu ricy cupa' rishbeey nu zaana nu cut mbecy ya, nunu ricy cupa' rishbeey nu gyabaña' tuuba' tir. Nde' riiñ nu bdu' Ngoozh uz̄a yaa —na Jesuuz.

<sup>19</sup> Orze' byac cyup nac de mbecy Israeel tuuba' tir nu nac de riidz nu mniim ze'. <sup>20</sup> Yu' zigy mbecy nu rnii dey:

—Cue' gyicy cuen der yu, gun bicy ni nuras yu. Orze' guloc yu —na dey.

<sup>21</sup> Tees yu' ga' mbecy nu rnii dey:

—Benu tub mbecy gyicy ni nuras yu, rila wac niiy gal nu rnii yu ii. <sup>22</sup> Walab gaal gac gyicy nap tub nuras urlo tub mbecy lo ca'? —na dey.

### De mbecy Israeel wangyicy cuen dey Jesuuz

<sup>22</sup> Na ornu pshuub tiem nu bri nu rag, orze' gu' dey tub sa' Jerusaleeng par nu gyicy dey nu gyeza' lagy mbecy tiem nu bzu chu dey yu' par nu griib zily dey Ngoozh. <sup>23</sup> Orze' rded Jesuuz tub lugaar ni yu' ze' nu la coredoor ni Salomoong. <sup>24</sup> Orze' de mbecy Israeel bri lo' la dey mi. Orze' na dey rab yum:

—Ze' ñla be ru' tiem gyicy ru nu wad lagy de? Naal la mnii l̄o d̄e tub tir zi'l benu ru nac ru Mesías, biñ nu ca lo cuen nu co mbañ d̄e ya —na dey.

<sup>25</sup> Orze' na Jesuuz rab mi dey:

—Ya bi mn̄eñ lo der, tees wancheña lagy der. De coz nu mnii Ngoozh nu ricya, nde' rlyuuñ nu nac Mesías.

<sup>26</sup> Tees de ru wacheña lagy der de coz nu rn̄eñ, gun a' nac der shily ne. <sup>27</sup> De shily ne ryu' lo ma ti' ornu rn̄eñ. Nunu ya yu' lo de ma ne. Nunu de ma ze' ryiid ca ma icha. <sup>28</sup> Gyicya nu cui mbañ de ma tub la, nunu rila wanit lo de ma. Nunu se cyu la gac co za de ma yaa. <sup>29</sup> Ngoozh uz̄a, biñ nu briic de ma ne, mi ze' zily zir nac mi par de' zir mbecy. Nunu ni tub la mbecy wac co dey ma yaam. <sup>30</sup> Ya nu Ngoozh uz̄a tub zi'l nu nac d̄e —nam.

<sup>31</sup> Orze' de mbecy ze' pte' ga' dey gyita' nu shet dey nim. <sup>32</sup> Orze' nam rab mi dey:

—Bicya zañ de coz nap nu bruu lo Ñgyoozh lo rgüii la der. ¿A nu nac ca na de coz ze' rgoow gyita' der ya? —nam.

<sup>33</sup> Orze' na ga' de mbecy rab yum:

—Walab nu rgoow gyita' dë ru nu nac ca na tub coz nap nu ricy ru, sinu rgoow gyita' dë ru nu nac nu mnii zir ni Ñgyoozh, gun ru mbecy zi'l nac ru, tees ricy ru nu nac ru Ñgyoozh —na dey.

<sup>34</sup> Orze' na Jesuuz rab mi dey:

—Lat de riidz nu bzeeñ Ñgyoozh ni der, Ñgyoozh nam rab mi de mbecy: "De ru nac der de ñgyoozh", nam. <sup>35</sup> Rad lagy den de coz nu rnii riidz ni Ñgyoozh, nu rila wagruu fals ñi. Ñgyoozh bloo lam de mbecy "De ñgyoozh": de yu nu bri riidz nim lo. <sup>36</sup> Ze' Ñgyoozh b zum ya, nunu bzuu nez mi ya yapä gyishlombecy ii. Benu ni, Ɂlagu rnii der nu ya rnëe zi ni Ñgyoozh nu nac nu mneé nu nacä i'ñ mi? <sup>37</sup> Benu wagyicä de coz nu bruu lo Ñgyoozh, uzä, orze' cue' cheña lagy der de coz nu rnëe. <sup>38</sup> Tees benu ricyä de coz ze', mas wacheña lagy der ne, tees guña lagy der ni de coz nu ricyä, gun tub tir zi'l gad lagy der nu ya tub zi'l nacä du Ñgyoozh, uzä, nunu Ñgyoozh, uzä, tub zi'l nac mi nu ya —nam.

<sup>39</sup> Orze' tub tira' ngulagy dey ngu' yaay mi nu ñgya nu dey mi pres. Tees blam yaa dey zam.

<sup>40</sup> Orze' Jesuuz bish cyam za ga'm tub la' ga' ru' gyooow Jordaang. Orze' pcyiñ mi ze'. Ze' lugaar nu gusa Waa briib nis yu mbecy anzir. <sup>41</sup> Zigy mbecy bde' dey lom. Orze' na dey:

—Waa wangyicy yu ni tub la nusuriidz, tees dela coz nu mniiy nu nac mbecy ii, nde' coz rishli —na dey.

<sup>42</sup> Orze' zañ mbecy b icy cup dey consuel lo Jesuuz lugaar ze'.

### Gut Lázaro

**11** Bzu tub mbecy rat: yu nu la Lázaro. Yu ze' tub mbecy Betania, gyedz ze' nu rcyiñ Li nu bily ñii Mart. <sup>2</sup> Laab Li ze', fiñ ze' nu pc oo asecy zguul gyi' Shuaan den Jesuuz. Orze' pcuiig y ñi gyi'm nu gyich ic ñi. Fiñ ze' zan Lázaro, yu nu gurat ze'. <sup>3</sup> Orze' rup laa deñ nu bily ñii bzeed ñi tub rasoo lo Jesuuz. Orze' na rasoo ze':

—Shuaan de, amig nir riib rat ñi —na rasoo ze'.

<sup>4</sup> Na ornu güeñ Jesuuz rasoo ze', orze' nam:

—Tees güii ze' walab nu za' loñ yu tub tir zi'l, sinu gush güii ze' par nu gabe nu dzi lily na Ñgyoozh, nunu ni' zi'l par nu gabe gye lily ne ya, i'ñ mi —nam.

<sup>5</sup> Na Jesuuz ton'a la guzañ lagy mi Mart, gal nu bily ñii Li, gal nu Lázaro. <sup>6</sup> Tees ornu bri rasoo nu riib rat Lázaro, orze' byeeñ mi se cyup dzi lugaar ze' nu rcyiñ mi ze'. <sup>7</sup> Na ornu bded cyup dzi ze', orze' nam rab mi de yu nu rsya' lom:

—Yaa ga' der gyan Judea tuuba' tir —nam.

<sup>8</sup> Orze' na de yu nu rsya' lom:

—Masht, Ɂa walab nu sa ñuu, de mbecy Israeel b icy pee dey ngoow gyita'y ru gashtal ñgyat lar? ɁWalab gaal rlagy ru gya ga'r tuuba' tir? —na dey.

<sup>9</sup> Orze' na Jesuuz:

—¿A walab rishli nu trocyup or nde' yu' yaa nañ tub dzi? Benu ca na tub mbecy rded yu ze' nu yu' yaa, orze' waglagy gyi'y, gun rzac dey ya, biñ nu rbic yaa lo de mbecy gyishlombecy ii. <sup>10</sup> Tees benu rded yu rel, orze' rlagy gyi'y, gun sac yaa nu gzac yu.

<sup>11</sup> Orze' na ga'm:

—Lázaro, amig ni den, gush pcaal yu, tees na cha gun cueeñä yu —nam.

<sup>12</sup> Orze' na ga' de yu nu rsya' lom:

—Shuaan de, benu nas yu, Ɂorze' yaruuñ nu gruu nap yu shiñ? —na dey.

<sup>13</sup> Tees riidz ni Jesuuz yaruuñ nu gut Lázaro, tees de yu nu rsya' lom guzii dey nu mniim nu nas zi'l yu.

<sup>14</sup> Orze' Jesuuz naal la mniim lo dey. Orze' nam:

—Gut Lázaro. <sup>15</sup> Tees nu nac de ru yet lagyä nu sacä loy, gun orze' gyicy cup der consuel lo. Yaa der chan lo cuerpa —nam.

<sup>16</sup> Orze' Tomaas, yu nu rnii dey cuach, nay rab yu de' zir de yu nu rsya' lo Jesuuz:

—Yaa der cha dun masht nin, gun orze' gat den tublaazh dun mi —nay.

**Jesuuz nac mi biñ nu gyicy nu gyabañ mbecy nunu cui mbañ dey**

<sup>17</sup> Na ornu bri Jesuuz Betania, orze' briic mbecy nu gad lagy mi nu bi gut Lázaro nunu bi bza' tap dzi nu ri cuerpa niy gyerbaa. <sup>18</sup> Betania, nde' tub chon miily metr nu zet riñ nu Jerusaleeng. <sup>19</sup> Nunu zigy de mbecy Israael za güii dey Mart nu Li nu cuic dey consuel ni deñ nu nac nu gut zan ñi. <sup>20</sup> Na ornu güeñ Mart nu bi zaab riidz nu bi yeed Jesuuz, orze' za cheel ñim. Tees Li byeeñ ñi yu'. <sup>21</sup> Orze' na Mart rab ñi Jesuuz:

—Shuaanaq, b icy na nu zur ii, orze' cue' ñgyat zanaq.

<sup>22</sup> Tees rad lagyä nu mas na, Ñgyoozh gyicy mi la zi'l coz nu cyiñ ru lom —naañ.

<sup>23</sup> Orze' na ga' Jesuuz rab mi Mart:

—Zan ru gyabañ yu tuuba' tir —nam.

<sup>24</sup> Orze' na ga' Mart:

—Bi rad lagyä nu gyabañ ñi ornu gyabañ de añ ornu shuub dzi nu gya' lo gyishlombecy ii —naañ.

<sup>25</sup> Orze' na ga' Jesuuz rab mi ñii:

—Ya nacä biñ nu gyicy nu gyabañ de añ, nunu nacä biñ nu gyicy nu cui mbañ de mbecy. Orze' cyu zi'l mbecy nu gyicy cup consuel lo, mas gat yu, tees cui mbañ yu. <sup>26</sup> Cyu zi'l mbecy nu gabee mbañ, benu gyicy cup yu consuel lo, orze' yu ze' rishli gaal wata'y. ɁA rzeña lagy der de nu nde' Mart? —nam.

<sup>27</sup> Orze' na ga' Mart:

—Laab Shuaanaq, rzeña lagyä nu ru nac ru Mesías, i'ñ Ñgyoozh, biñ nu ca lo cuen nu cyid gyishlombecy ii —naañ.

### Biiñ Jesuuz ru' baa ni Lázaro

<sup>28</sup> Na ornu blash mnii Mart de riidz ze', orze' bish cyañ yaañ. Orze' dze ga bredz ñi bily ñii Li. Orze' nañ:

—Masht bi yeed gaab mi nunu rbedz mi ru nu char lom —naañ.

<sup>29</sup> Na ornu güeñ Li riidz ze', orze' lueg la wes suñ zañ lo Jesuuz. <sup>30</sup> Ze' Jesuuz gaal zi nigul chu'm ru' gyedz, sinu gabee zum lugaar ze' nu bdzeel mi Mart. <sup>31</sup> Na de mbecy ze' nguaay yu' Li nu rbic dey consuel niñ. Ornu bzaac dey nu dzach wes suñ zañ, orze' za ca dey ich niñ, gun mnii too dey nu zañ nu gun ñi ru' baa ni zan ñi.

<sup>32</sup> Na ornu bru'ña Li lugaar ze' nu zu Jesuuz, orze' cuanzir nu bzaac ñim, orze' bdugiyiñ yee lañ yeñ gyi'm. Orze' nañ:

—Shuaan de, b icy na nu zur ii, orze' cue' ñgyat zana —nañ.

<sup>33</sup> Na ornu bzaac Jesuuz nu dzi ruun Li gal nu de mbecy nu bru'ña nuñ, orze' tona' la shni guc añ nim nunu gyi la byash lagy mi. <sup>34</sup> Orze' nam rab mi dey:

—¿Ca lugaar pcach der yu? —nam.

Orze' na ga' dey:

—Shuaan de, da güiir —na dey.

<sup>35</sup> Orze' biiñ Jesuuz. <sup>36</sup> Orze' na de mbecy Israeel:

—¡Güiñ ñuu la! ¡Razañ lagy yu Lázaro! —na dey.

<sup>37</sup> Tees yu' de mbecy ze' nay:

—Yu ii b icy yu nu rzac mbecy lo ca'. ¿A walab nu ñgyac ñgyicy yu tub mod nu cue' ñgyat Lázaro? —na dey.

### Byabañ Lázaro

<sup>38</sup> Orze' Jesuuz tona' la shni guc añ nim tuuba' tir. Orze' zam ru' baa. Baa ze', nde' tub blyuu. Nunu psoow dey ru'ñ nu tub gyita' ily. <sup>39</sup> Orze' na Jesuuz:

—Byash der gyita' re —nam.

Orze' na Mart, zan yu nu gut ze':

—Shuaan de, dzi bi byafert ti' gun bi rac tap dzi nu pcach de ñii —nañ.

<sup>40</sup> Orze' na ga' Jesuuz rab mi ñii:

—¿A walab bi mnëe lor, benu gyicy cup ru consuel lo, orze' gzac ru gyel lily ni Ñgyoozh? —nam.

<sup>41</sup> Orze' byash dey gyita' ze'. Orze' Jesuuz bgüiim par baa. Orze' nam:

—Ñgyoozh uza, ya drica gras nir gun güeñ ru de coz nu mnëe. <sup>42</sup> Rad lagya nu dub laa tiem reñ ru de riidz nu rnëe, tees ya ni rnëe gun nde' coz nap par de mbecy nu yu' ii, gun orze' cheña lagy dey nu ru bzuu nez ru ya —nam.

<sup>43</sup> Na ornu blazh mniim de riidz ze', orze' brish tim.

Orze' nam:

—¡Bruu ze' Lázaro! Da ii —nam.

<sup>44</sup> Orze' Lázaro bryuy, tees gabee nag yaay nu gyi'y nu negy nu ptiish dey yu gal nu bay nu mbish loy.

Orze' na Jesuuz:

—Pshaagy der yu, gun orze' gac gyay —nam.

### De mbecy psaap dey riidz nu cut dey Jesuuz

<sup>45</sup> Zigy de mbecy nu gua nu Li, ornu bzaac dey de coz nu b icy Jesuuz, orze' b icy cup dey consuel lom. <sup>46</sup> Tees yu' ga' mbecy bish cya dey lo de mbecy fariseo nu byoo dey rishloy de coz nu b icy Jesuuz. <sup>47</sup> Orze' de mbecy fariseo, nu de yu zub lo ni de uz, gal nu de yu nu riib ic ni junt zub lo, orze' na dey:

—¿La ñuu coz gyicy den na? Gun mbecy ze' dzi guañ nusuriidz ricy yu. <sup>48</sup> Benu zaan den nu ni gyicy zir yu, orze' dela mbecy gyicy cup dey consuel loy. Orze' cyid de soldad Rom nu nit lo dey yu' yon ni den gal nu de ledz na —na dey.

<sup>49</sup> Tees lat dey brusu tub yu nu la Caifás. Yu ze' yu nu riib ic de uz ña'n ze'. Orze' nay rab yu dey:

—De ru rila wagad lagy der. <sup>50</sup> Ni wagad lagy der ca na nu nap zir par de ru. Nap zir nu gat tub zi mbecy par lo dela mbecy gaze' nu nit lo dela losa'n: de mbecy Israael —nay.

<sup>51</sup> Tees Caifás walab nu mniy riidz nu bruu ic ub zi' yu, sinu mniy por cuen ni Ñgyoozh ornu mniy nu Jesuuz gat mi par de mbecy Israael, como nac yu yu nu riib ic de uz ña'n ze'. <sup>52</sup> Nunu walab nu nac mbecy Israael zi'l gut mi, sinu ni' zi'l gut mi par nu nac dela mbecy ni Ñgyoozh nu yu' dela lugaar ni gyishlombecy, gun orze' gyac se tub nac zi'l dey. <sup>53</sup> Gush ñi nese dzi ze' nu psaap dey riidz nu cut dey Jesuuz.

<sup>54</sup> Orze' Jesuuz wanchesha ga'm suelt la lat de mbecy Israael. Orze' bruum lo de yu ni Judea zam tub lugaar ub zi ni tub gyedz nu la Efraín. Orze' ze' pcyiiñ mi nu de yu nu rsya' lom.

<sup>55</sup> Na ornu se ñuu ga shuub dzi nu chu' de mbecy Israael sa' ni Pas, orze' zigy de mbecy nu yu' reña' gyedz ya dey par Jerusaleeng, gun orze' gyicy dey coz nu gyicy nu gyacaacy dey par lo Ñgyoozh anzir nu chu' sa' ze'. <sup>56</sup> Orze' brugyi' rded dey ryub yu Jesuuz, nunu rgu-gyi' dey lo losa'y lugaar ze' nu driib zily dey Ñgyoozh. Orze' na dey:

—¿La ñuu rnii too der? ¿A cyid yu sa' o ti wayid yu? —na dey.

<sup>57</sup> Orze' de yu zub lo ni de uz, gal nu de mbecy fariseo, orze' mnii dey lo de mbecy ben ca na dey rad lagy yu ca zu Jesuuz. Orze' rlagy ñi cha too dey rishlo dey gun orze' cha nu dey mi pres.

### Tub biñ mñaa pcoom asecy zguul gyi' Jesuuz

**12** Jesuuz guam Betania shuup ru' dzi anzir nu chu' sa' ni Pas. Betania ze' nu pcyiiñ Lázaro, yu nu b icy mi nu byabañ ze'. <sup>2</sup> Orze' de mbecy nu yu' ze' bzu ye dey tub che nu gow nuy mi. Ze' Mart psaañ gya'n. Nunu gaza' Lázaro riy lat de yu nu nguaa lo mez nu gyicy che ze'. <sup>3</sup> Orze' Li bru'ña nuñ chon gaynal gram tub lo asecy zguul nu la nardo nu tona' la ñgyup sac. Orze' pcooñ nde' gyi' Jesuuz. Orze' pcuiig yí asecy ze' nu gyich ic ñi. Orze' bzu laa nu zguul dutuub la nañ yu' ze'. <sup>4</sup> Ze' zu Judas Iscariote, tub yu nu rsya' lom. Laab yu ze' yu nu bgu' Jesuuz yaa de yu nu rzi lagy lom. <sup>5</sup> Orze' nay:

—¿Lagu wansa'y asecy zguul re nu sac i mbecy ni chon gaynal dzi? Gun orze' gad tiñ nu gric na ni de mbecy zi —nay.

<sup>6</sup> Tees Judas ni mniy, gun nac yu gubaan walab par nu nac nu rcay de mbecy zi. Nunu bzuy riiñ nu ri yaay nerbid nu rgu' dey tiñ ni dey. Nunu yu' nu rboo dzey tiñ ze' par ub zi'l yu. <sup>7</sup> Orze' na Jesuuz:

—Cue' gyicy zeed ru fiñ ii, gun bi bzu lily ñii asecy ii par nu duzu cuerp né par ornu shuub dzi nu cach dey ya. <sup>8</sup> Ya walab nu tuñ cyiñä lat der, tees de mbecy zi zaab yu' la dey lat der —nam.

### Nu bza' lo dey nu cut yu Lázaro

<sup>9</sup> Zigy de mbecy nu zu riiñ ni de mbecy Israeel güeñ dey nu zu Jesuuz Betania. Orze' gua dey ze' walab tub lo zi'l nu za güii dey mi sinu ni' zi'l par nu za güii dey Lázaro, yu nu b icy mi nu byabañ ze'. <sup>10</sup> Orze' de yu Zub lo ni de uz bza' lo dey nu ni' cut dey Lázaro, <sup>11</sup> gun par nu nac yu ze' zigy de mbecy Israeel druu chu dey lo de uz par nu ricy cup dey consuel lo Jesuuz.

### Gu' Jesuuz ru' gyedz Jerusaleeng

<sup>12</sup> Orze' tuuba' dzi de mbecy zigy nu gua sa' ni Pas güeñ dey nu bi yeed Jesuuz par Jerusaleeng. <sup>13</sup> Orze' blag dey de yaa ya gyiñ. Orze' za cheel dey mi. Nunu rbish ti dey. Orze' na dey:

—Dzi ga zily nac Ñgyoozh! Ñgyoozh nac num ru, biñ nu bzuu nez mi! Ñgyoozh nac num ru, biñ nu nac rey ni de ub na, mbecy Israeel! —na dey.

<sup>14</sup> Orze' guud tub bur mi' ni Jesuuz. Orze' byub mi ma gal nu rniiñ lat de riidz ni Ñgyoozh. Rniiñ:

<sup>15</sup> Cue' dzib der, mbecy nu yu' gyedz Sión.

Güii der. Re yad rey ni der.

Riib mi tub bur mi', rniiñ.

<sup>16</sup> Tiem ze' de yu nu rsya' lom wangyet lag dey cuen de nu nde'. Tees ornu Jesuuz bish cyam lo gyel lily nim, orze' byeza' lagy dey nu de riidz ni Ñgyoozh mniiñ nu ni zac mi nunu mniiñ nu ni gyicy nu mbecy mi.

<sup>17</sup> Na gaza' de mbecy nu bzaac ornu Jesuuz bredz mi Lázaro nu ruuy gyerbaa niy nunu b icy mi nu byabañ yu, de yu ze' mnii dey lo mbecy coz nu bzaac yu.

<sup>18</sup> Nde' nu zigy mbecy gua cheel dey mi, gun güeñ dey nu b icy mi nusuriidz ze'. <sup>19</sup> Orze' na de mbecy fariseo rab dey losa'y:

—Na bi bzaac der nu rila wada' mod ni den. Güii der. Dela mbecy za ca dey ich yu —na dey.

### La be mbecy griego rlagy dey go nuy Jesuuz riidz

<sup>20</sup> Na lat de mbecy nu gua Jerusaleeng nu briib zily dey Ñgyoozh lat sa', lat de yu ze' ri la be mbecy griego.

<sup>21</sup> Orze' de yu ze' becha' dey lo Lip. Yu ze' nac yu tub mbecy Betsaida, tub gyedz nu ri lo yu ni Galilea. Orze' na dey rab yuy:

—De ya rlagy de neé du Jesuuz —na dey.

<sup>22</sup> Orze' Lip gua niyi lo Ndrees. Orze' rup laa dey gua nii dey lo Jesuuz. <sup>23</sup> Orze' nam rab mi dey:

—Bi rshuub tiem nu ya, biñ nu byac mbecy, gri lo gyel lily ne. <sup>24</sup> Ya rishli rnée lo der nu benu tub mbigy trig wayet lag ñi lo yu nu nit loñ, orze' laab tub zi'l mbigy nac ñii. Tees benu nit loñ, orze' cuic ñi zañ cosech.

<sup>25</sup> Yu nu rash shcab nu ricy ñi presis nu cui mbañ gyishlombecy ii, yu ze' gat yu. Tees yu nu rash shcab nu a' ricy ñi presis nu cui mbañ gyishlombecy ii, yu ze'

gad nu cui mbañ yu tub la. <sup>26</sup> Gun benu ca na tub mbe cy rlagy yu nu gyicy yu gal nu rnée, orze' rlagy ñi nu cyid cay icha. Orze' ze' nu ya zü, laaba' ze' gzuy. Nunu Ñgyoozh, uza, gyicy mi nu gya gzuy.

### Jesuuz rniiim lo dey nu gat mi

<sup>27</sup> ¡Na deet rac nañ lardoo! ¿Per la ñuu coz neé? ¿A gneé: "Uza, bloo chu de coz nu gzaca na"? ¡Tees laab par gyi' nde' nu yapä gyishlombecy ii! <sup>28</sup> Uza b icy nu gyed gyel mbecy nir —nam.

Orze' zaab ti' nu mnii Ñgyoozh gashtal gyibaa. Orze' nam:

—Bi b icy nu bruu zac gyel mbecy ne, nunu gyicya nu gruu zac zir ñi par lo —nam.

<sup>29</sup> Orze' de mbecy zigy nu yu' ze' güeñ dey nu zaab ti' ze'. Orze' yu' dey nu rniiy nu nde' guzzi. Ze' yu' ga' dey nu mniy ni nde' tub anc nu mnii nuy Jesuuz.

<sup>30</sup> Orze' Jesuuz nam rab mi dey:

—Walab nu nac ya nde' nu zaab ti' rnii sinu par nu nac de ru. <sup>31</sup> Na bi pshuub tiem nu gyu' bee nu dzi a' nap de mbecy nu yu' gyishlombecy ii. Nunu na Ñgyoozh gyicy mi gan nuras, yu nu riib ic gyishlombecy ii.

<sup>32</sup> Tees ornu caa dey ya lo cruu, orze' laab ya gyicya nu gyecha' dela mbecy lo —nam.

<sup>33</sup> Ni mod mniim par nu briic mi nu gad lagy dey nu lac mod gat mi. <sup>34</sup> Orze' na de mbecy zigy ze' rab yum:

—De ub na rad lagy na nu lat de riidz ni leey ni den rniiñ nu Mesías, biñ nu ca lo cuen nu co mbañ mbecy, cui mbañ mi tub la, rniiñ. Benu ni, orze' žlagu rniiñ nu ru, biñ nu byac mbecy, caa dey ru lo cruu, rniiñ? Orze' žca na biñ nu byac mbecy nac ru beni? —na de mbecy ze'.

<sup>35</sup> Orze' na ga' Jesuuz rab mi dey:

—Ya, biñ nu rlyuu yaa, gabee chesa ry' sñuu la be dzi lat der. Orze' zaab za la der lat nu gabee yu' yaa gun orze' cue' gyet cow ni der. Gun de mbecy nu rded ze' nu cow wagad lagy dey ca par gash yu. <sup>36</sup> Orze' b icy cup der consuel lo ya, biñ nu rlyuu yaa, lat nu gabee rdeda lat der, gun orze' nac der mbecy nu rded ze' nu yu' yaa —nam.

Na ornu blazh mniim de riidz ze', bruum lat dey nunu guam pcach lom ni dey.

### De mbecy wangyicy cup dey consuel lo Jesuuz

<sup>37</sup> Mas Jesuuz b icy mi zañ nusuriidz ily lo dey, tees wangyicy cup dey consuel lom, <sup>38</sup> gun orze' byu' niñ gal nu pcaa Isaías, yu nu mnii por cuen ni Ñgyoozh. Orze' nay:

Ñgyoozh, ¿cyu guña lagy ni de riidz nu mnée?

Nunu ¿Cyu gac gyet lag cuen de coz ily nu gac gyicy ru?

na Isaías.

<sup>39</sup> Nde' nu wangac ñgyeña lagy dey, gun ni' zi'l pcaa Isaías:

<sup>40</sup> Ñgyoozh nam: "Ya psowa urlo dey.

Gun orze' cue' gac zac dey nu urloy.

Nunu b icy nu guton shcab ni dey.

Gun orze' cue' gac gyet lag dey cuen,  
nis cush cya dey lo.

Orze' gyicy napə dey", na Ñgyoozh.

<sup>41</sup> De riidz ii mnii Isaías gun bzaac yu gyel lily ni Jesuuz  
nunu laab mi ze' bzat yu lat de riidz nu bzeeñ yu.

<sup>42</sup> Mas ni tees zigy de mbecy Zub lo ni de mbecy Is-  
raeel b icy cup dey consuel lo Jesuuz. Tees wangyicy  
dey nu ñgyad lagy de losa'y gun rdzib dey lo de mbecy  
fariseo gun dzi ga cyuu nu dey yu nañ yu' nu rsya' dey  
riidz ni Ñgyoozh. <sup>43</sup> Gun dzi zir yet lagy dey nu grib zily  
mbecy dey gaze' nu grib zily Ñgyoozh yu.

### Jesuuz rniiñ nu lac na de mbecy

<sup>44</sup> Orze' Jesuuz ye la mniim. Orze' nam:

—Cyu zi'l mbecy nu ricy cup consuel lo ya, walab ti lo  
ya zi'l ricy cup yu consuel, sinu ni' zi'l ricy cup yu con-  
suel lo Ñgyoozh, uza, biñ nu bzuu nez ya. <sup>45</sup> Nunu  
mbecy nu rzac ya, ni' zi'l rad lagy yu la na biñ nu bzuu  
nez ya. <sup>46</sup> Ya yapə gyishlombecy ii par nu lyuu yaa, gun  
orze' dela mbecy nu gyicy cup consuel lo, de yu ze'  
wagyiyeeñ yu ze' nu cow. <sup>47</sup> Tees cyu zi'l mbecy nu  
gyeñ de riidz nu rnēe, ze' wazuub gyidag yuñ, walab  
ya nee nu yu' falt niy. Gun walab nu yapə nu nee nu  
yu' falt ni de mbecy ni gyishlombecy, sinu yapə par nu  
gloo mbañə dey. <sup>48</sup> Yu nu walagy gac nu ya, nunu yu  
nu wayicy cuen de riidz nu rnēe, de yu ze' bi zu tub coz  
nu gyicy ñi nu gyu' bee nu yu' falt ni dey. Gun de riidz  
nu ya mnēe, nde' gyicy ñi nu gyu' bee nu yu' falt ni dey.  
Ornu shuub dzi nu gya' lo gyishlombecy. <sup>49</sup> Gun ya wal-  
ab nu rnēe por cuen ni uba, sinu rnēe de riidz nu mnii  
Ñgyoozh, uza, biñ nu bzuu nez ya nu gnēe, nunu gnēe  
ñii mod nu mniim lo. <sup>50</sup> Nunu rad lagy ya nu de coz nu  
rnii Ñgyoozh, uza, nde' gyicy ñi nu cui mbañ mbecy  
tub la. Bi güeñ der beni nu de coz nu mnēe, mnēe ñii  
lo der gal nu pcaam ya nu nee.

### Jesuuz rgyiib mi gyi' de yu nu rsya' lom

Anzir nu shuub dzi nu chu' sa' ni Pas, orze' bi  
**13** gud lagy Jesuuz nu bi pshuub or nim nu ruum  
gyishlombecy nu gyam lo Ñgyoozh uz mi. Nunu dub  
laa tiem pcam de mbecy nu b icy cup consuel lom gy-  
ishlombecy ii. Nunu ni laa b icy mi gashtal pshuub la  
dzi nim.

<sup>2</sup> Na Jesuuz gusub mi nu gyicy mi che nu de yu nu  
rsya' lom. Orze' nuras bi b icy yu nu mnii too Judas Is-  
cariote iñ Simoo nu cushion cyay ich mi. <sup>3</sup> Ze' Jesuuz gud  
lagy mi nu Ñgyoozh briic mi fers nim nu gac gyicy mi  
dela coz. Nunu gud lagy mi nu lo Ñgyoozh bruum.  
Nunu gud lagy mi nu cushion cyam nu gyam lo Ñgyoozh.  
<sup>4</sup> Orze' Jesuuz wes sum ze' nu Zub mi ricy mi che. Orze'  
bloom shab mi nu riib par ich. Orze' gush mi tub negy  
nu cuiig y mi dey. Orze' brim ñii nañ mi. <sup>5</sup> Orze' bdu'm  
nis nañ tub casuel. Orze' brugyi' nu rgyiib mi gyi' tub  
ga de yu nu rsya' lom, nunu pcuiig y mi gyi' dey nu ne-  
gy nu bri nañ mi ze'.

<sup>6</sup> Na ornu bdugyi Bed nu cyib mi gyi'y, orze' nay rab  
yum:

—Shuaan na, ¿walab gaal ru cyib ru gyi' ya? —nay.

<sup>7</sup> Orze' na Jesuuz rab mi yu:

—Na na la wagyet lag ru cuen de coz nu ricy du ru,  
tees par lo, orze' gyet lag ru cuen —nam.

<sup>8</sup> Orze' na ga' Bed:

—¡Mas lac ru' ya washet icä nu ru cyib ru gyi'! —nay.

Orze' nam rab mi yu:

—Ze' benu wadiba gyi'r, orze' wac gac ru mbecy ne  
—nam.

<sup>9</sup> Orze' na ga' Simoo Bed:

—¡Ze' benu ni, orze' cue' nu gyi' zi'lā cyib ru, sinu ni'  
zi'l ya gal nu too! —nay.

<sup>10</sup> Orze' na Jesuuz rab mi yu:

—Cyu zi'l mbecy nu bi blaagy, yu ze' walagy ñi nu cy-  
ib yu de' zir lugaar ni cuer p niy. No maas gyi' zi'l yu  
rlagy ñi nu cyib yu, gun dutuub la cuer p niy bi byaca-  
cy ñi. Ze' de ru bi byacaacy der, tees walab dela der  
—nam.

<sup>11</sup> Jesuuz mniim nu walab dela dey byacaacy yu, gun  
bi gud lagy mi nu ca na yu nu cushion cya ich mi.

<sup>12</sup> Na ornu blazh nu bdiib mi gyi' dey, orze' bzu ga'm  
shab mi nu riib par ich ze'. Orze' bish cya ga'm nu  
gusub mi lo mez tuuba' tir. Orze' nam:

—De ru, ¿a bet lag der cuen coz nu b icy du der ii na?

<sup>13</sup> De ru rnii der nu ya nacä moscuel numu nacä Shuaan  
der. Nunu laab ni gal nu de ru rniir nu nacä. <sup>14</sup> Tees co-  
mo ya nacä moscuel ni der, nunu nacä Shuaan der, se  
ya bdbä gyi' der, nde' nu ni' de ru rlagy ñi nu cyib tub,  
cyib tub zi'l der gyi' losa'r. <sup>15</sup> Nii tub mod nu blyuu ni  
der, gun orze' ni' zi'l mod gyicy nu der losa'r: gal nu ya  
b icy du de ru. <sup>16</sup> Ya rishli rnēe lo der, nu ni tub la moz  
walab nu zily zir nac yu gaze' patroq niy. Nunu ni tub  
la mbecy nu rza nu rasoo walab nu zily zir nac yu gaze'  
yu nu rzuu nez yu. <sup>17</sup> Na como bi gyet lag der cuen de  
coz ii, orze' dzi ni der benu gyicy der gal nu ya mnēe.

<sup>18</sup> 'Walab nu rzata dela de ru, gun rad lagy ya la na lar-  
doo de mbecy nu bi pcuij. Tees rlagy ñi nu gyu' niñ gal  
nu rnii lat de riidz ni Ñgyoozh ze' nu rniiñ: "Tub mbe-  
cy nu bdow nu ya gyishtily, mbecy ze' cushion cyay ichä",  
rniiñ. <sup>19</sup> Ya tiem nee de riidz ii lo der, anzir nu gac ñii,  
gun orze' ornu gac ñii, de ru cheña lagy der nu ya  
nacä biñ nu nacä. <sup>20</sup> Ya rishli rnēe lo der, benu ca na  
tub mbecy cueez yu tub yu nu gzuu neza nu gyiyeñ  
nuy yu, orze' ni' zi'l cueez yu ya nu gyiyeñ du yu.  
Nunu cyu zi'l mbecy nu cueez ya, ni' zi'l cueez yu Ñgy-  
oozh biñ nu bzuu nez ya nu yapə —nam.

### Jesuuz mniim nu Judas cushion cyay ich mi

<sup>21</sup> Na ornu blazh mnii Jesuuz de riidz ze', orze' tona'  
la deet guc nañ lardoom. Orze' naal la mniim lo dey.  
Orze' nam:

—Ya rishli nee lo der nu lat de ru gruu tub mbecy nu  
cushion cya ichä —nam.

<sup>22</sup> Orze' de yu nu rsya' lom, brugyi' nu rgüii tub, rgüii  
tub zi'l dey lo losa'y, gun wagad lagy dey cyu rnii.

<sup>23</sup> Cuit Jesuuz gusub ya, tub yu rsya' lom, nu gyicy dum  
che. Laab ya yu nu dzi razañ lagy mi. <sup>24</sup> Orze' Simoo

Bed briic yu nu gad lagya nu rlag yu nii nuy ya. Orze' nay:

—Bdugyi' lom ben ca na den rzat mi —nay.

<sup>25</sup> Orze' byagaab zirə lo Jesuuz. Orze' mnēe:

—Shuaan dē, ¿cyu nde'? —mnēe.

<sup>26</sup> Orze' na Jesuuz:

—Ya salə tub la' gyishtily. Orze' yu nu gricə ñii ni ze' orze' yu ze' nde' —nam.

Na ornu blazh mniim de riidz ze', orze' psal mi tub la' gyishtily. Orze' briic mi ñii ni Judas, yu nu nac i'ñ Simoq Iscariote. <sup>27</sup> Nunu cuanzir gush Judas gyishtily ze', orze' nuras gutib ic yu nañ lardooy. Orze' na Jesuuz rab mi yu:

—Na bicy lal gua gyicy ru ca na coz nu gyicy ru —nam.

<sup>28</sup> Tees ni tub la de yu nu nguaa lo mez ze' wangyet lag dey cuen lagu nu ni mniim gugy mi Judas. <sup>29</sup> Gun Judas nac yu yu nu riib ic nerbid tiñ. Orze' la be de yu nu nguaa ze' mnii too dey nu Jesuuz mniim lo Judas nu cha ziyy coz nu cyiiñ par sa'. O benu walab ni, orze' nu cha leez yu la tub coz lat de mbecy zi, na dey.

<sup>30</sup> Orze' laab gush la Judas gyishtily ze'. Orze' bruuy zay. Nde' tub or bi rel.

### Jesuuz bzeeñ mi tub riiñ cub nu gyicy mbecy nim

<sup>31</sup> Na despuees ornu bi bruu Judas nu zay, orze' na Jesuuz:

—Na bi pshuub dzi ne ya, biñ nu byac mbecy, nu gabe nu dzi lily na, nunu nu nac ya gabe nu dzi lily na Ñgyoozh uza. <sup>32</sup> Nunu benu gabe nu dzi lily na Ñgyoozh nu nac ya, orze' ni' zi'l Ñgyoozh gyicy mi nu gabe gyel lily ne ya, nunu bi gyicy gyiily lam ñii. <sup>33</sup> De ru, yu nu na gal nu na i'ñña, walaba' nu tuñ tiem cyiiñ du der. De ru yub der ya, tees ni' zi'l rnēe lo der na gal nu mnēe lo de mbecy Israeel: "Wac gya der ze' nu ya gya."

<sup>34</sup> Ya greeña tuuba' riiñ cub nu gyicy der: nu ca tub, ca tub zi'l der losa'r. Gal nu ya rca de ru, ni' zi'l gyicy der nu ca tub, ca tub zi'l der losa'r. <sup>35</sup> Ze' benu de ru ca tub, ca tub zi'l der losa'r, orze' dela mbecy gad lagy dey nu de ru nac der mbecy nu rsya' lo —nam.

### Jesuuz mniim nu Bed cach ru'y mi

<sup>36</sup> Orze' na Simoq Bed rab yu Jesuuz:

—Shuaan dē, ¿ze' ca char? —nay.

Orze' na Jesuuz:

—Na na la wac cyid car ichə ze' nu ya gya. Tees par lo gac cyid car ichə —nam.

<sup>37</sup> Orze' na Bed rab yum:

—Shuaan dē, ¿lagu wac yap cə ich ru na la? ¡Ya bi zu la ca na nu zy, mas gatə nu nac ru! —nay.

<sup>38</sup> Orze' na ga' Jesuuz rab mi yu:

—¿A rishli gaal bi zur nu gat ru par nu nac ya? Ya rishli rnēe lor nu anzir nu cuedz ngüel, orze' chon tir niir nu a' yu' lor ya —nam.

Jesuuz nac mi biñ nu glyuu nez nin par nu gyan lo Ñgyoozh

**14** Orze' na ga'm rab mi dey:

—Cue' zaan der nu gac deet nañ lardoor. Bicy cup der consuel lo Ñgyoozh, nunu ni' zi'l bicy cup der consuel lo ya. <sup>2</sup> Gun lugaar ze' nu rcyiiñ Ñgyoozh uza, tona' la yu' lugaar par nu cyiiñ mbecy. Ze' benu walab ni, orze' ya bi mnēe lo der. Nde' nu ya gya gya. Gun zu napə lugaar nu cyiiñ der. <sup>3</sup> Nunu despuees ornu bi ya, nunu bi bzu napə lugaar nu cyiiñ der, orze' yapə tuuba' tir par nu gya du der, gun orze' cyiiñ der laab lugaar ze' nu ya cyiñña. <sup>4</sup> De ru bi rad lagy der ca par gash ru nez par nu gri der ze' nu ya gya —nam.

5 Orze' na Tomaas rab yu Jesuuz:

—Shuaana, wagad lagy dē ca gyar. Yegar nu gad lagya' dē ca par riib nez nu ya ze' —nay.

6 Orze' na ga' Jesuuz rab mi dey:

—Ya nacə biñ nu rlyuu nez nu gya mbecy lo Ñgyoozh, nunu nacə biñ nu rnii coz rishli ni Ñgyoozh, nunu nacə biñ nu gyicy nu cui mbañ de mbecy. Gun wac gri ni tub la mbecy lo Ñgyoozh benu walab nu nac ya. <sup>7</sup> Como de ru bi yu' lo der ya, nde' nu ni' zi'l bi yu' lo der Ñgyoozh uza. Nunu nese na la bi yu' lo der mi. Nunu bi bzaac der mi —nam.

8 Orze' na Lip rab yu Jesuuz:

—Shuaana, blyuu Ñgyoozh uz ru lo dē. Orze' bi guuc la —nay.

9 Orze' na ga' Jesuuz:

—Lip, gula be la tiem rded du de ru. ¿Walab gaal gabee a' yu' lor ya? Cyu zi'l mbecy nu rzac ya, yu ze' bi bzaac yu Ñgyoozh uza. ¿Lagu rniir nu lyuu Ñgyoozh uza lor? <sup>10</sup> ¿A wacheña lagy ru Lip nu ya tub zi'l nacə nu Ñgyoozh uza, nunu Ñgyoozh uza tub zi'l nac mi num ya? —nam rab mi Lip.

Orze' na ga'm:

—De riidz nu mnēe lo der na, nde' walab riidz nu bloo ic ya zi'l, sinu Ñgyoozh uza, biñ nu rcyiiñ nañ lardooy, mi ze' ricy mi de coz ily nu rlag y mi. <sup>11</sup> Guña lagy der nu ya tub zi'l nacə nu Ñgyoozh uza, nunu Ñgyoozh uza tub zi'l nac mi nu ya. Benu wacheña lagy der nu nac de riidz nu rnēe zi'l la, orze' guña lagy der mas ñuu nu nac de coz ily nu ricya. <sup>12</sup> Ya rishli rnēe lo der nu cyu zi'l mbecy nu gyicy cup consuel lo, ni' zi'l gac gyicy yu de coz ily nu ya ricya, nunu coz ilya' zir gac gyicy yu, gun ya gya lo Ñgyoozh uza. <sup>13</sup> Nunu dela coz nu cyiñ der lo par nu nac der mbecy nu ricy cup consuel lo, orze' gyicya ñii, gun orze' gabe gyel lily ni Ñgyoozh uza nu nac ya, i'ñ mi. <sup>14</sup> Gyicya la zi'l coz nu cyiñ der lo nu nac nu ricy cup der consuel lo.

### Jesuuz mniim nu zeed mi Espiriit Yon ni Ñgyoozh nu gac num dey

<sup>15</sup> 'Benu de ru rca der ya, orze' gzuub gyidag der de coz nu rnēe nu gyicy der. <sup>16</sup> Orze' ya nee du Ñgyoozh uza nu gzeed mi tuuba' biñ nu glocyuub de ru. Nunu mi ze' cyiiñ num der tub la. <sup>17</sup> Mi ze' Espiriit Yon, biñ nu

glyuu de coz rishli ni Ñgyoozh. De mbecy nu riib ic gyishlombecy wazaan dey nu cuez mi loy. Gun wacsac dey mi. Nunu a' yu' lo dey mi. Tees de ru yu' lo der mi, gun mi ze' nac num de ru, nunu rcyiiñ mi nañ lardoo der.

<sup>18</sup> 'Yä wazeeñ gä de ru ub zir nu wad cyu nu glocyuub der. Sinu yapä lo der tuuba' tir. <sup>19</sup> Nañ tub mi' zi'l tiem de mbecy ni gyishlombecy wazaca' dey ya. Tees de ru gzac der ya. Nunu par nu nac nu ya cui mbaña, nde' nu de ru cui mbañ der. <sup>20</sup> Ornu shuub dzi nu ya yapa, orze' de ru gad lagy ru nu ya tub zi'l nacä nu Ñgyoozh uza, nunu de ru nac nu der ya. Ze' ya nac du de ru.

<sup>21</sup> Cyu zi'l mbecy nu "O" nii ni de riidz nu ya rnëe, nunu gyicy yac yu niñ, yu ze' yu nu rca ya. Nunu cyu zi'l mbecy nu rca ya, Ñgyoozh uza rca ga'm yu. Nunu ni' ya rca yu. Nunu gyicyä nu gad lagy yu nu nac du yu.

<sup>22</sup> Orze' na Judas (reña' Judas, walab Judas Iscariote):

—Shuaan dë, ¿lagu gyicy ru nu gad lagy de ya, ze' wayicy ru nu gad lagy de mbecy ni gyishlombecy?

<sup>23</sup> Orze' na ga' Jesuuz:

—Cyu zi'l mbecy nu rca ya, yu ze' ricy yac yu nu de riidz nu rnëe. Nunu Ñgyoozh uza rcam yu. Nunu ya nu Ñgyoozh uza cha de loy nu cyiiñ du de yu. <sup>24</sup> Cyu zi'l mbecy nu waca ya, de yu ze' wagiyicy yac yu nu de riidz nu ya rnëe. Tees de riidz ne, nde' walab riidz nu bruu ic ya zi'l, sinu nde' riidz nu bruu lo Ñgyoozh uza, biñ nu bzuu nez ya nu yapa.

<sup>25</sup> 'Yä rnëe dela de riidz ii lo der lat nu gabee zu lat der. <sup>26</sup> Tees Espiriit Yon, biñ nu gzeed Ñgyoozh uza nu glocyuub de ru nu nac ya, mi ze' biñ nu lyuu ni der dela coz, nunu gyicy mi nu gyeza' lagy der dela riidz nu mnëe lo der.

<sup>27</sup> 'Ornu bi gyä, orze' gzeeña gyel ri zu nañ lardoo der. Gyel ri zu ni ub la gricä ni der, nunu walab nu gricä ñii mod nu rbic de mbecy ni gyishlombecy ii. Cue' zaan der nu gac deet nañ lardoor, nunu cue' dzib der. <sup>28</sup> De ru bi güeñ der nu bi mnëe nu gyä. Tees ya yapa cyiiñ du der tuba' tir. Bi b icy na nu de ru rca der ya, orze' cyit ni der ornu gad lagy ru nu ya gyä lo Ñgyoozh uza, gun mi ze' gya zir zum gaze' ya. <sup>29</sup> Ya tiem rnëe de coz ii lo der, anzir nu gac ñii, gun orze' ornu gac ñii, cheña lagy der de coz nu mnëe.

<sup>30</sup> 'Yä watuuñ du' zir der nu riidz ii, gun bi yad nuras, yu nu riib ic gyishlombecy ii. Tees yu ze' se la la cyiiñ yu par ya. <sup>31</sup> Tees ni rlagy ñi nu gac, gun orze' gad lagy de mbecy ni gyishlombecy nu ya rca Ñgyoozh uza nunu gad lagy dey nu ricyä de coz nu mniim lo.

Orze' nam:

—Wes su der yaa chan, gun gruun ii —nam.

Jesuuz nac mi lyucy urbyay nu rishli

**15** Orze' na ga' Jesuuz:

—Ya nacä biñ nu na gal nu na lyucy urbyay nu rishli. Ze' Ñgyoozh uza ricy mi riiñ nu lyucy ze'. <sup>2</sup> Nunu de ru na der gal nu na yaa lyucy ze'. Benu ca na tub yaa lyucy ze' wacuic ñi urbyay, orze' cyug mi ñii. Nunu de yaañ nu rbic urbyay dugyug loñ par nu gyanap zir ñi par nu cuic zir ñi urbyay. <sup>3</sup> Tees de ru bi byanap der

nu nac de riidz nu rnëe lo der. <sup>4</sup> Bicy der nu cyiiñ nur ya gal nu ya rcyiiñ du de ru. Gun tub yaa lyucy urbyay, wabic ñi urbyay benu ub zi'l ñi. Tees cuic ñi urbyay benu nash ñii cyong lyucy ze'. Ni' zi'l nu de ru, wac gyicy ru coz nu rlagy Ñgyoozh benu walab nu rcyiiñ nu der ya.

<sup>5</sup> 'Yä nacä biñ nu na gal nu na lyucy urbyay. Ze' de ru nac der yaañ. Ornu tub mbecy rcyiiñ nuy ya, nunu ornu ya rcyiiñ du yu, orze' yu ze' yu nu dzi ricy riiñ ni Ñgyoozh. Gun benu walab nu nac ya, orze' se la gac gyicy der. <sup>6</sup> Cyu zi'l mbecy nu nac reñ nu ya, yu ze' gdune'y. Gzac yu gal nu rzac tub yaa yag ornu rziñ. Orze' gyicy tublaazh dey yaañ. Orze' ne' dey ñi lo gyi.

<sup>7</sup> 'Benu de ru gyicy der nu cyiiñ nur ya, nunu benu riidz nu rnëe nde' checañ ic der, orze' la zi'l coz nu cyiñ der lo, orze' gad ñi ni der. <sup>8</sup> Ñgyoozh uza gruu zac gyel lily nim ornu de ru gyicy der zañ coz nu rlagy mi. Nunu ni mod gaze' nu rishli gyac der yu nu rsya' lo. <sup>9</sup> Nunu ya rca de ru gal nu Ñgyoozh uza rcam ya. Cue' dily lo der lo de coz nu rlagyä nu nac nu rca de ru. <sup>10</sup> Benu gzuub gyidag der de coz nu rnëe nu gyicy ru, orze' "O" nii der ni de coz nu rlagyä nu nac nu rca der. Gyicy der gal nu ricyä gun ya bzuub gyidaga ni Ñgyoozh uza, nunu "O" mnëe ni de coz nu rlagy mi nu nac nu rcam ya.

<sup>11</sup> 'Ni mnëe lo der, gun orze' gyet lagy der gal nu yet lagyä. Nunu bded ru' ga' la nu gyet lagy der. <sup>12</sup> Coz nu rnëe lo der nu gyicy ru nde' nu ca tub, ca tub zi'l der losa'r gal nu ya rca de ru. <sup>13</sup> Benu tub mbecy "O" niiy nu gat yu nu nac amig niy, orze' yu ze' rca zir yu amig niy par de' zir mod nu gac cay amig ze'. <sup>14</sup> De ru nac der amig ne benu gyicy der de coz nu ya rnëe nu gyicy der. <sup>15</sup> Ya wanee ga' nu de ru nu nac der moz ne, gun tub moz wagad lagy yu la na coz nu ricy patroo niy. Sinu ya rnëe nu de ru nac ru amig ne, gun ya bi mnëe lo der dela coz nu mnii Ñgyoozh uza lo. <sup>16</sup> De ru walab nu pcui der ya, sinu ya pcui de ru nunu bdu' riiñ yaa der nu gyicy der gan zañ de coz nu rlagy Ñgyoozh, coz nu wanit lo. Orze' Ñgyoozh, uza, cuic mi dela coz nu ciñ der lom nu nac ya. <sup>17</sup> Orze' nii coz nu rnëe lo der nu gyicy ru: Nu ca tub, ca tub zi'l der losa'r.

**De mbecy ni gyishlombecy rzi lagy dey lo Jesuuz gal nu lo de yu nu rsya' lom**

<sup>18</sup> 'Como de mbecy ni gyishlombecy gazi lagy dey lo de ru, bicy der nu gad lagy ru nu lo ya guzi lagy dey loga la. <sup>19</sup> Bi b icy na nu de ru ñgyac der mbecy ni gyishlombecy, orze' de mbecy ni gyishlombecy nca dey de ru gal nu rca dey de' zir losa'y. Tees ya pcui de ru lat de mbecy ni gyishlombecy, nunu nde' nu de mbecy ni gyishlombecy rzi lagy dey lo der. Gun a' naca' der ni gyishlombecy. <sup>20</sup> Bicy der nu gyeza' lagy ru nu ya mnëe lo der: "Sac ni tub moz nu gya zir zuy par patroo niy", mnëe lo der. Como yu' mbecy nu bzab dey ich ya, nde' nu ni' zi'l gzab dey ich de ru. Nunu como yu' mbecy nu bzuub gyidag dey de riidz nu ya mnëe, orze' gzuub gyidaga' dey ni de riidz nu gnii de ru. <sup>21</sup> Tees gzab dey

ich der nu nac ya, gun a' yu' lo dey Ñgyoozh, biñ nu bzuu nez ya.

<sup>22</sup>'Bicy na nu cue' nu ya nyapa nu mnęe lo dey, orze' sac la falt ni dey nu nac nu zaab dey ich den. Tees na wac nii dey nu sac falt ni dey nu nac de coz nu ricy dey.

<sup>23</sup>Cyu zi'l mbecy nu rzi lagy lo ya, ni' zi'l rzi lagy yu lo Ñgyoozh uza. <sup>24</sup>Bicy na nu cue' ñgyicya zañ nusuriidz lat dey, coz nu rila nigul gyicy ni tub la mbecy, orze' sac la falt ni dey. Tees na bi bzaac dey de coz nu bicya ze'. Mas ni tees rzi lagy dey lo nunu rzi lagya' dey lo Ñgyoozh, uza. <sup>25</sup>Tees ni mod rlagy ñi gac ñii par nu gyu' ni de riidz nu bi ca lat leey nu bzeeñ Ñgyoozh ni dey. Ze' rniiñ: "Rzi lagy dey lo mas sac la la gyi'."

<sup>26</sup>'Tees ya zeeda Espiriit Yon lo der, biñ nu glocyuub de ru. Mi ze' biñ nu gnii de coz rishli ni Ñgyoozh nunu mi ze' biñ nu gruu lom. Ornu cyid mi, mi ze' gniim lo der cyu nacä. <sup>27</sup>Nunu ni' de ru gnii der cyu nac ya gun nac nu der ya nese nu loga la nu brugyi' ricya riiñ ni Ñgyoozh.

<sup>16</sup>'Ya bzata de riidz ii lo der par nu cue' checa der nu gyicy cup ru consuel lo. <sup>2</sup>Gun wabica' dey lu-gaar nu gyatublaazh der nu dey nañ yu' nu rsya' dey riidz ni Ñgyoozh. Nunu shuub dzi nu benu ca na tub mbecy cut yu de ru, orze' rash yu shcab nu gyicy yu nde' lo Ñgyoozh. <sup>3</sup>Ni mod ricy dey gun a' yu' lo dey Ñgyoozh uza nunu ni' a' yu' lo dey ya. <sup>4</sup>Tees ya bzata de riidz ii lo der gun orze' ornu shuub dzi nu gac ñii, orze' gyeza' lagy der de riidz nu mnęe lo der.

### De coz nu gyicy Espiriit Yon ni Ñgyoozh

'Ya walab nu mnęe de riidz ii lo der nese nu loga la nu brugyi' nu rsya' der lo, gun nese tiem ze' bi nac du ya de ru. <sup>5</sup>Tees na bi gya lo Ñgyoozh, biñ nu bzuu nez ya. Tees ni tub la der wacugyi'r lo ca gya. <sup>6</sup>Nomaas ca nu ricy shni der ornu mnęe de riidz ii lo der. <sup>7</sup>Tees ya rishli rnęe lo der nu nap zir nu gya par de ru, gun ze' benu waya, orze' Espiriit Yon, biñ nu glocyuub de ru, wayid mi lo der. Tees benu gya, orze' ya zuu nezäm cyid mi lo der. <sup>8</sup>Ornu mi ze' cyid mi, orze' naal la cuic mi nu gad lagy mbecy nu yu' cyiy, nunu cuic mi nu gad lagy dey nu gac gyanap dey lo Ñgyoozh, nunu cuic mi nu gad lagy dey nu Ñgyoozh ri beem ni dela mbecy nu nac cyi dey. <sup>9</sup>Cuic mi nu gad lagy dey nu yu' cyiy gun wagyicy cup dey consuel lo. <sup>10</sup>Cuic mi nu gad lagy dey nu gac gyanap dey gun ya gya lo Ñgyoozh uza, nunu wazaca' der ya. <sup>11</sup>Nunu cuic mi nu gad lagy dey nu gri beem ni de mbecy gun nuras, yu nu riib ic gyishlombecy ii, bi mnii Ñgyoozh nu gyay lo cashtig.

<sup>12</sup>'Yu' ru' zañ coz nu rlagyä nęe lo der, tees na na la ni wagyee ga' der. <sup>13</sup>Ornu cyid Espiriit Yon ni Ñgyoozh, biñ nu rnii de coz rishli, orze' mi ze' gyoom rishlo der dela coz rishli ni Ñgyoozh. Walab nu gniim nu nac shcab ni ub zi'l mi, sinu gniim de coz nu gnii Ñgyoozh lom. Nunu cuic mi nu gad lagy der ni de coz nu gac par lo. <sup>14</sup>Mi ze' gyicy mi nu gyabic mbecy gyel mbecy nę, gun de riidz nu ya gneé lom, laaba' nde' gniim lo de ru. <sup>15</sup>Gun dela coz nu rad lagy Ñgyoozh uza, ni' zi'l

ya rad lagya de coz ze'. Nde' nu ya mnęe lo der nu de riidz nu nęe lo Espiriit Yon, laaba' nde' gniim lo de ru.

<sup>16</sup>'Nañ tub miiñ zi'l, orze' wazaca' der ya. Tees nañ tub miiña' zi'l, orze' gzaca' der ya —nam.

### Mas gyicy shni dey tees gyanap zu lagy dey

<sup>17</sup>Orze' la be de yu nu rsya' lom bee nu dey losa'y ri-idz. Orze' na dey:

—¿Lac yaruu de riidz ze' nu nam nu nañ tub miiñ zi'l, orze' wazaca' den mi; tees nañ tub miiña' zi'l, orze' bi gzaca' den mi, gun gyam lo Ñgyoozh, uz mi, nam?

<sup>18</sup>¿Lac yaruu de riidz ze' nu nañ tub miiñ? Rila wac yet lag na cuen de coz nu mniim —na dey.

<sup>19</sup>Orze' Jesuuz guud lagy mi nu rlagy dey cugyi'y lom. Orze' nam rab mi dey:

—Ya bi mnęe lo der nu nañ tub miiñ zi'l orze' wazac der ya. Orze' nañ tub miiña' zi'l, orze' bi gzaca' der ya, mnęe. ¿A walab riidz nu mnęe ze', rgugyi' der lo losa'r?

<sup>20</sup>Ya rishli rnęe lo der nu de ru gun ru nunu gyicy shni der. Ze' de mbecy ni gyishlombecy cyit ni dey. De ru gyicy shni der tees gruu gyel shni zu lagy ze' ni der nunu yet lagy der. <sup>21</sup>Ornu tub biñ mñaa bi rac ye nim nu gaal mi mdoo, orze' ricy shnim gun bi pshuub or nim. Tees ornu bi bded nu gul mdoo nim, orze' nit lagy mi nu gutow nim gun cyit nim nu bri mdoo lom gyishlombecy ii. <sup>22</sup>Ni' zi'l de ru. Ricy shni der na. Tees ya cush cyä nu yap güüj der par lo. Orze' gyel ni lardoo der nu yet lagy ru. Nunu ni tub la mbecy wacgyicy dey nu checa der nu yet lagy ru. <sup>23</sup>Ornu shuub dzi ze', orze' wugyi' ga' der lo.

'Ya rishli rnęe lo der nu Ñgyoozh, uza, cuic mi la zi'l coz nu cyiñ der lom nu nac ya. <sup>24</sup>Nunu mas gal dzi na ni tub la coz nigul cyiñ der lom nu nac ya. Bdiiñ der lom nunu gad ñi ni der gun orze' dub gal rii la lagy der yet lagy ru.

### Jesuuz bicy mi gan gyishlombecy

<sup>25</sup>'Ya bi mnęe lo der de coz ii mod ni riidz tiily. Tees shuub dzi nu wanęe ga' lo der nu riidz tiily, sinu naal la gneé lo der nu nac de coz ni Ñgyoozh, uza. <sup>26</sup>Ornu shuub dzi ze', orze' wanęe lo der nu ya diñä coz nu rlagy der lom, sinu ub la de ru cyiñ der coz ze' lom nu nac ya, <sup>27</sup>gun ub la Ñgyoozh, uza, rcam der. Rciam der gun de ru rca ga' der ya nunu guña lagy der nu ya bruü lom. <sup>28</sup>Ya bruü lo Ñgyoozh, uza, yapa gyishlombecy ii. Na ya grüü gyishlombecy ii par nu gyä lo Ñgyoozh, uza —nam.

<sup>29</sup>Orze' na ga' de yu nu rsya' lom rab yum:

—Na gaal naal la rniir. Walab nu riidz tiily rniir. <sup>30</sup>Na gaal gud lagy dę nu ru rad lagy ru dela coz. Ni walagy ñi nu cugyi' mbecy lor par nu gad lagy ru la na coz nu rlagy yu. Nde' gyicy ñi nu cheña lagy dę nu ru bruur lo Ñgyoozh —na dey.

<sup>31</sup>Orze' na ga' Jesuuz rab mi dey:

—¿A nde' nu gal na guña lagy der? <sup>32</sup>Na bi pshuub or, nunu na la nde', ornu de ru grush las der tub ga lar nu nez nir. Nunu gzeen ga der ya ub zi. Tees walab ub

zi gyiyeeñä gun Ñgyoozh, uza, gac num ya.<sup>33</sup> De la ridz ii rneq lo der gun cheti ri añ ni der nu nac nu tub zi'l nac der nu ya. Gyishlombecy ii, de ru gzac zi der. Tees briic der baloor. Ya bi bicya gan gyishlombecy —nam.

### Jesuuz rnii num Ñgyoozh nu nac de yu nu rsya' lom

**17** Na ornu blazh mnii Jesuuz dela de riidz ze', orze' bgüüm par gyibaa. Orze' nam:

—Ñgyoozh, uza, bi pshuub or ne na. Bicy nu gabe gyel lily ne ya, i'ñ ru, gun orze' ya gyicya nu gabe gyel lily ni ru.<sup>2</sup> Gun ru briic ru rishbeey ne nu gyub icä dela mbecy. Gun orze' gyicya nu cui mbañ dela de yu nu briic ru ne tub la.<sup>3</sup> Nunu mod nu cui mbañ dey tub la, nde' nu nac nu cu' lo dey ru, biñ nu tub zi la nac, Ñgyoozh rishli, nunu cu' lo dey ya, Jesucrisht, biñ nu bzuu nez ru.

<sup>4</sup> Ya bicya nu gabe gyel lily nir gyishlombecy ii. Na bi bza' lo de riiñ nu bdu'r yaa.<sup>5</sup> Nde' nu, Ñgyoozh, uza, gyabica'r gyel lily ne ornu grí lor, gyel lily nu b icy cupa lor nil nese anzir nu gzub gyi' gyishlombecy.

<sup>6</sup> De mbecy nu bloo sur lat de mbecy nu yu' gyishlombecy ii par nu cuic ru dey ne, de yu ze' bi bricä nu gad lagy dey nu cyu nac ru. Nil nac de yu ze' nir. Ze' na de yu ze' bric ru ne. Nunu de yu ze' bzuub gyidag dey de riidz nu rniir,<sup>7</sup> nunu na bi gud lagy dey nu dela coz nu briic ru ne, nde' bruuñ lor.<sup>8</sup> Ya bi mnqe lo dey de coz nu mniir lo, nunu de yu ze' "O" mnii dey. Nunu bi gud lagy dey nu rishli gaal lo ru bruy. Nunu guña lagy dey nu ru bzuu nez ru ya.

<sup>9</sup> Na ya rdiñä lor nu nac dey. Walab nu rdiñä lor nu nac de mbecy ni gyishlombecy. Tees rdiñä par de yu nu briic ru ne, gun nac dey nir.<sup>10</sup> Dela mbecy nu nac ne, ni' nac yu nir. Nunu de yu nu nac nir, ni' nac dey ne. Nunu nu nac de yu ze' rabee de gyel lily ne.<sup>11</sup> Ya wacyiiñ tuña' gyishlombecy ii. Tees de yu ze' gyiyeeñ yu gyishlombecy ii lat nu ya yapa cyiiñ du ru. Ñgyoozh, uza, biñ yon, mña de yu nu briic ru ne nu mod fert nu ricy cup ru, gun orze' rishli gaal tub zi'l gac dey nu losa'y gal nu tub zi'l nac ya nu ru.<sup>12</sup> Lat nu pcyiiñ du dey gyishlombecy ii, ya mña dey nu nac tub mod fert nu bruu lor. Mña de yu nu briic ru ne. Nunu ni tub la dey wantune'y, sinu tub zi yu nu nil bi ca lo cuen nu dune'. Gun orze' gyu' niñ gal nu rniiñ lat de riidz nir.

<sup>13</sup> Na ya bi yapa lor. Tees ya rneq de riidz ii lor lat nu gabee rcyiiñä gyishlombecy ii, gun orze' dub gal rii la lagy dey gyet lagy yu gal nu ya yet lagya.<sup>14</sup> Ya bi bricä nu gad lagy dey de riidz nir. Tees de mbecy ni gyishlombecy rzi lagy yu lo dey gun a' zu dey shcab gal nu zu de mbecy nu yu' gyishlombecy ii shcab, como ni' zi'l ya a' zu de shcab ze'.<sup>15</sup> Walab nu rdiñä lor nu cor dey lat de mbecy nu yu' gyishlombecy ii, sinu rdiñä lor nu ñia nap ru dey nu cue' shiñ gyicy nu yu nu rnii dey nuras a' nap dey.<sup>16</sup> Gal nu ya a' zu shcab nu zu de mbecy nu yu' gyishlombecy ii, ni' zi'l de yu ii a' zu ga' dey shcab ze'.<sup>17</sup> Bzu chu dey par nu gzu bich yu nu nac ru zi'l. Ni bicy nu nac de riidz nu rishli. Gun de riidz nir, nde' coz rishli.<sup>18</sup> Gal nu ru bzuu nez ru ya lat de mbecy

nu yu' gyishlombecy ii, ni' zi'l ya gzuu nez dey chay lat de mbecy ze'.<sup>19</sup> Nunu par nu nac de yu ii ricya ubä par tub mbecy nu rzu bich nu nac ru zi'l, gun orze' ni' zi'l de yu ii gyac dey mbecy nu rzu bich nu nac ru zi'l. Ni gyicy dey nu nac de riidz rishli nir.

<sup>20</sup> Ya walab nu rdiñä lor par nu nac de yu ii zi'l, sinu ni' zi'l rdiñä lor par nu nac de yu nu gyicy cup consuel lo ornu gyeñ dey de riidz nu nii de yu ii.<sup>21</sup> Ñgyoozh, uza, ya rdiñä lor nu dela de yu ii, tub zi'l gac dey nu losa'y. Ni' zi'l tub zi'l gac yu nu de ub na gal nu ru tub zi'l nac ru nu ya nunu ya tub zi'l naca du ru. Nunu tub nac zi'l dey gac yu nu losa'y, gun orze' de mbecy nu yu' gyishlombecy cheña lagy dey nu ru bzuu nez ru ya yapa gyishlombecy ii.<sup>22</sup> Bicya nu gabe nu nac dey mbecy nu lily na gal nu ru bicy ru nu gabe gyel lily ne ya, gun orze' tub zi'l nac dey nu losa'y gal nu de ub na tub zi'l nac naa.<sup>23</sup> Ya tub zi'l naca du dey, nunu ru tub zi'l nac ru nur ya, gun orze' wayicy falt par ni ñuu miiñ nu tub zi'l gac dey nu losa'y, gun orze' de mbecy nu yu' gyishlombecy ii gad lagy dey nu ru bzuu nez ru ya, nunu ton'a la rcar de yu ii gal nu rca ga'r ya.

<sup>24</sup> Ñgyoozh, uza, ru briic ru de yu ii ne, nunu ya rlagya nu cyiiñ dey ze' nu ya cyiiñä, gun orze' gzac dey de gyel lily ne: gyel lily nu briic ru ne. Gun ru rcar ya nese anzir nu bzub gyi' gyishlombecy.<sup>25</sup> Ñgyoozh, uza, ru biñ nu dzi nap. De mbecy nu yu' gyishlombecy ii a' yu' lo dey ru. Tees ya yu' lo ru. Nunu ni' zi'l de yu ii rad lagy dey nu ru bzuu nez ru ya nu yapa lat dey.<sup>26</sup> Ya bi bricä nu gad lagy dey nu cyu nac ru, nunu gric zirä nu gad lagy dey par lo, gun orze' mod nu ru rcar ya, laaba' mod ze' ca dey losa'y. Nunu laab ya tub zi'l naca du dey —na Jesuuz rab mi Ñgyoozh.

### Bdub dey Jesuuz

**18** Na ornu bded nu mnii Jesuuz de riidz ze', orze' bruum nu de yu nu rsya' lom lugaar ze' nunu zam tub la' ga' gyerlas nu la Cedrón. Ze' ri tub nac yag mni. Ze' gu' Jesuuz lat ñi nu de yu nu rsya' lom.<sup>2</sup> Na Judas, yu nu bish cya ich mi, ni' yu' loy lat de yag mni ze', gun zañ tir byatublaazh Jesuuz nu de yu nu rsya' lom lugaar ze'.<sup>3</sup> Orze' Judas bru'ña nuy tub nac soldad Rom gal nu cyup chon de mbecy nu rña nañ yu' nu driib zily de mbecy Israel Ñgyoozh. De yu ze' güay par mandaar ni de yu zub lo ni de uz gal nu de mbecy fariseo. Orze' dela de yu ze' zu tañ dey. Nuu dey candil, nunu nuu ga' dey yag nu zub gyi lo.<sup>4</sup> Tees Jesuuz bi gud lagy mi dela coz nu gzac mi. Orze' bruum lat de yu nu rsya' lom. Orze' nam rab mi dey:

—¿Cyu ryub der? —nam.

<sup>5</sup> Orze' na dey rab yum:

—Tub mbecy Nazaret, yu nu la Jesuuz, yu ze' ryub de —na dey.

Orze' na ga' Jesuuz:

—Ya nu nde' —nam.

Orze' Judas, yu nu bish cya ich mi, gaza'y zuy lat de yu ze'.<sup>6</sup> Na ornu mnii Jesuuz: "Ya nu nde'", nam, orze' dela dey bya ich yu nunu wes saa la dey lo yu.<sup>7</sup> Orze' na ga' Jesuuz rab mi dey:

—¿Ze' cyu gaal ryub der? —nam.  
 Orze' na ga' dey:  
 —Mbacy Nazaret. Yu nu la Jesuuz —na dey.  
<sup>8</sup> Orze' na ga'm rab mi dey:  
 —Ya bi mnęe lo der nu ya nde'. Ze' benu ya ryub der, orze' bzaan der nu gya de yu ii —nam.  
<sup>9</sup> Tees mniim de riidz ze' par nu gyu' niñ gal nu mniim nu gac niñ ornu mniim: "Ñgyoozh, uza, ya wansaana ndune' ni tub la de yu nu briic ru ne", nam. <sup>10</sup> Orze' Simoo Bed nuuy tub mandzicy. Orze' bloo zay niñ nunu pshi'ñ yu gyidag bee tub moz ni uz nu riib ic de' zir de uz. Moz ze' lay Malco. <sup>11</sup> Orze' Jesuuz nam rab mi Bed:  
 —Dzach ru bri mandzicy ze' se'ñ. Taz nu gzuub Ñgyoozh, uza, ru', ¿walab gaal wanee "O" nu do' niñ?  
 —nam.

**Gua nu de soldad Jesuuz lo Anás**

<sup>12</sup> Orze' de soldad Rom ze' gal nu de yu nu riib ic dey gal nu de yu nu rña yu' nu driib zily mbacy Ñgyoozh, de yu ze' pcyiig dey yaa Jesuuz. Orze' za nu dey mi pres. <sup>13</sup> Nu loga la gua nu dey mi lo Anás. Gun Anás nac yu uz gud Caifás, yu nu byub ic de uz ña'n ze'. <sup>14</sup> Orze' laab Caifás nac yu yu nu byoo rishlo de yu nu riib ic de mbacy Israeel. Mniiy nu nap zir nu gat tub zi mbacy gaze' nu gat dela de mbacy.

**Bed mniiy nu a' yu' loy Jesuuz**

<sup>15</sup> Orze' Simoo Bed gal nu tuuba' losa'y nu rsya' lo Jesuuz gua ca dey ich mi. Ze' yu nu riib ic de uz ze' nap yu' loy tuuba' yu nu rsya' lom ze'. Orze' gu'y nu Jesuuz loli' ni yu' ni uz nu riib ic ze'. <sup>16</sup> Tees Bed byeēñ gay par ich ze' nu ca ro'. Orze' laab yu nu nap yu' lo uz ze' bish cyay nu gua nii nuy fiñ mñaa nu zu riiñ nu rshaal ro' ze'. Nunu b icy yu nu gu' Bed loli' ze'. <sup>17</sup> Orze' na fiñ nu rshaal ro' ze' rab niñ Bed:  
 —¿A gaza' ru nac ru tub mbacy nu rsya' lo mi re?  
 —nañ.

Orze' na Bed rab yuñ:  
 —Walab —nay.

<sup>18</sup> Como dzi rag, orze' de moz gal nu de yu nu rña ze' pcuua dey gyi. Orze' dub yub la yu' dey nu rbidz dey ni. Orze' gaza' Bed riy lat de yu ze' nu rbidz yu gyi ze'.

**Yu nu riib ic de uz ze' rgugyi'y lo Jesuuz**

<sup>19</sup> Na yu nu riib ic de uz brugyi' nu rgugyi'y lo Jesuuz nu nac de yu nu rsya' lom gal nu nu nac de coz nu blyuum ni de mbacy. <sup>20</sup> Orze' Jesuuz nam rab mi yu:  
 —Ya lo nu loo la mnęe lat dela mbacy. Dub laa tiem blyuu ni de mbacy nañ de yu' nu rsya' mbacy riidz ni Ñgyoozh gal nu nañ yu' ze' nu driib zily dey mi. Nunu ze' nu yatublaazh de mbacy, ze' rlyuu ni dey. Ya ni tub la coz wannęe ngach. <sup>21</sup> ¿Orze' lagu rgugyi'r lo? Bdugyi' lo de mbacy nu bzuub gyidag de coz nu mnęe, nunu de yu ze' gyrooy rishlor ni de coz nu mnęe. De yu ze' rad lagy dey de coz nu mnęe —nam.

<sup>22</sup> Ornu ni mniij Jesuuz, orze' tub yu nu rña ze' pshet yu tub yaa nim. Orze' nay rab yum:

—¿A ni na riidz nu rlagy ni nu niir gab ru yu nu riib ic de uz? —nay.  
<sup>23</sup> Orze' na Jesuuz rab mi yu:  
 —Benu shiñ mnęe, orze' mnii lo de mbacy nu yu' ii la na coz nu mnęe. Ze' benu laab ni gal nu mnęe, ¿orze' lagu pshet ru ne? —nam.  
<sup>24</sup> Orze' gal nag zi'l mi bzuu nez Anás mi zam lo Caifás, yu nu riib ic de uz.

**Bed pcach ru'y Jesuuz tuuba' tir**

<sup>25</sup> Dub laa lat de nde', laab ze' gabee zu Bed nu rbidz yu gyi. Orze' na dey rab yu Bed:  
 —¿A walab gaza' ru nac ru tub yu nu rsya' lo mbacy re? —na dey.  
 Orze' Bed pcach ru'y. Orze' nay:  
 —Walab ya nde' —nay.  
<sup>26</sup> Na ze' zu tub moz ni yu nu riib ic de uz ze'. Yu ze' nac yu famil ni mbacy nu pshi'ñ Bed gyidag ze'. Orze' nay rab yu Bed:  
 —Gaza' ru bzaaca nu mbacy ze' lat de yag mni ze', ¿shiñ? —nay.  
<sup>27</sup> Orze' Bed pcach ru'y mi tuuba' tir. Orze' laab or la ze' bredz nguel.

**Jesuuz zum lo Pilato**

<sup>28</sup> Na or bi bza' yu, orze' bruu dey lo Caifás. Orze' za nu dey Jesuuz par ro' riiñ ni yu nu riib ic por cuen ni Rom. Ze' de yu nu riib ic lat de mbacy Israeel wanchu' dey nañ yu' riiñ, gun walagy dey nu gabag yu par lo Ñgyoozh, gun orze' gac gyicy dey che de coz nu row dey lat sa' ni Pas. <sup>29</sup> Orze' bruu Pilato gua niiy lo dey. Orze' nay:  
 —¿La cyi driib der ic mbacy ii? —nay.  
<sup>30</sup> Orze' na dey:  
 —De ya wayap du de yu lor benu walab nu b icy yu coz cyi —na dey.  
<sup>31</sup> Orze' na Pilato rab yu dey:  
 —Laab de ru yaa nu der yu nu gri bee der niy gal nu rniiñ lo leey ni der —nay.  
 Orze' na ga' dey:  
 —Tees par lo leey a' ricy cup de rishbeey nu gyicy de nu gat ni tub la mbacy —na dey.  
<sup>32</sup> Ni guuc ni par nu byu' niñ gal nu mnii Jesuuz ornu mniim lac mod gat mi. <sup>33</sup> Orze' Pilato bish cyay gu'y nañ yu' riiñ tuuba' tir. Orze' bredz yu Jesuuz nu cugyi'y lom. Orze' nay:  
 —¿A ru nac ru rey ni de mbacy Israeel? —nay.  
<sup>34</sup> Orze' na Jesuuz rab mi yu:  
 —¿A nde' coz nu mnii too ub lar nu cugyi'r lo? Uti ¿a bzat reña' mbacy ya lor? —nam.  
<sup>35</sup> Orze' na Pilato:  
 —¿Walab gaal rnii toor nu ya nacä mbacy Israeel? Laab de mbacy ledz ru nunu de uz zub lo, de yu ze' bgu' dey ru yaa. Na niir la coz b icy ru —nay.  
<sup>36</sup> Orze' na gal Jesuuz:  
 —Ya walab nu riib icä gal mod nu riib ic de rey nu yu' gyishlombecy ii. Gun benu ni, orze' de mbacy ne chu-

coo dey par nu cue' gu' dey ya yaa de mbecy Israeel. Tees ya walab nu riib icä gal mod nu ricy de rey nu yu' gyishlombecy ii —nam.

<sup>37</sup> Orze' na Pilato rab yum:

—¿A nac ru tub rey, beni? —nay.

Orze' na Jesuuz:

—Laab ni gal nu ru mniir nu ya nacä rey. Gyi' nde' nu yapä gyishlombecy ii. Orze' ii gulä, gun orze' rnëe de coz rishli. Cyu zi'l mbecy nu yet lagy de coz rishli, de yu ze' rzuub gyidag yu ne ya —nam.

<sup>38</sup> Orze' na Pilato:

—¿Ca' zir na de coz rishli? —nay.

### Mbecy rbish ti dey nu gat Jesuuz

Na ornu blazh bdugyi' Pilato lom, orze' bruuuy ich yu' tuuba' tir nu zay lo de mbecy zigy. Orze' nay rab yu' dey:

—Ya wagyapa ni tub la cyi nu b icy mbecy ii —nay.

<sup>39</sup> Tees de ru ricy cup ru tub cushtom nu ya gläa tub pres lat sa' ni Pas. ¿Ze' na a rlagy der nu gläa rey ni de ru, mbecy Israael? —nay.

<sup>40</sup> Orze' dela dey dub ru' lay rbrish tiy. Orze' na dey:

—¡Yu ze' cue' laar yu! ¡Blaa Barrabás! —na dey.

Ze' Barrabás guc yu tub gubaan.

**19** Orze' Pilato b icy yu mandaar lo de soldad nu cha nu dey Jesuuz nunu b icy yu mandaar nu gaaz dey mi. <sup>2</sup> Orze' de soldad ptel dey yaa ya gyech. Orze' bzaa dey tub coron nu briy toom. Orze' bzuu dey mi tub negy bizat. <sup>3</sup> Orze' byagaab dey lom. Orze' na dey:

—¡Shnu ru, rey ni de mbecy Israael! —na dey.

Nunu brugyi' rshet dey yalom.

<sup>4</sup> Orze' bish cya Pilato lo de mbecy zigy tuuba' tir.

Orze' nay rab yu dey:

—Güii der na, ya yap du yu lo der na gun orze' gad lagy der nu ya wagyapa ni tub la cyi nu b icy yu —nay.

<sup>5</sup> Orze' bru'ña nu dey Jesuuz lo de mbecy zigy. Gabee ri coron gyech ze' toom nunu gabee zum negy bizat ze'. Orze' na ga' Pilato:

—¡Güii der, ii zu mbecy ii! —nay.

<sup>6</sup> Na ornu bzaac de yu zub lo ni de uz gal nu de yu nu rña nañ yu' nu driib zily mbecy Ñgyoozh, orze' brugyi' rbish ti dey. Orze' na dey:

—¡Cut ruy lo cruuuz! ¡Cut ruy lo cruuuz! —na dey.

Orze' na ga' Pilato rab yu dey:

—Laab de ru gua nu der yu nu caa der yu lo cruuuz.

Ze' ya, ya wagyapa ni tub la cyi nu b icy yu —nay.

<sup>7</sup> Orze' na ga' de mbecy zigy:

—De ya ricy cup dë tub leey. Nunu por leey la ze', yu ze' rlagy ñi gat yu, gun b icy yu ub yu nu nac yu i'ñ Ñgyoozh —na dey.

<sup>8</sup> Na ornu güen Pilato riidz ze', orze' gudzib zir yu.

<sup>9</sup> Orze' bish cyay gu'y nañ yu' riiñ tuuba' tir. Orze' bdugyi' lo Jesuuz. Orze' nay rab yum:

—Ze' ¿ca gaal ledz ru? —nay.

Tees Jesuuz wannii lam. <sup>10</sup> Orze' na Pilato rab yum:

—Ze' ¿a wanii gaal ru lo beni? ¿A wagad lagy ru nu ya ricy cupä rishbeey nu cäa ru lo cruuuz? Nunu ni' zi'l ricy cupä rishbeey nu gläa ru —nay.

<sup>11</sup> Orze' na Jesuuz rab mi yu:

—Ru rila a' ricy cup ru rishbeey nu la gyicy nur ya ze' benu walab Ñgyoozh briic mi ñii nir. Nde' nu cyi ily zir zaab yu nu bgu' ya yaar gaze' ru —nam.

<sup>12</sup> Nese or la ze' Pilato byub yu tub mod nu laay Jesuuz. Tees de mbecy zigy ze' brish ti nu zir dey yu. Orze' na dey:

—¡Ze' benu yu ze' glaar yu, orze' ru a' nac nur César, yu nu riib ic de nasyoong! ¡Gun cyu zi'l mbecy nu ricy yu nu nac yu rey, yu ze' zay contr ni César! —na dey.

<sup>13</sup> Ornu güen Pilato de riidz ze', orze' mniiy nu cha nu dey Jesuuz ich yu' riiñ ze'. Orze' gusub yu ze' nu riib ic dey, tub lugaar nu la Gabata benu nu riidz hebreo. Riidz ze' yaruuñ: Lugaar ze' nu bdu' dey gyita' lo yu.

<sup>14</sup> Nde' tub or widoo tub dzi anzir ni sa' ni Pas. Orze' na Pilato rab yu de mbecy Israael:

—¡Ii zu rey ni der na! —nay.

<sup>15</sup> Orze' brish ti dey:

—¡Biit yu! ¡Biit yu! ¡Cut ruy lo cruuuz! —na dey.

Orze' na Pilato:

—¿Walab gaal rlagy der nu dutä rey ni der lo cruuuz? —nay.

Orze' na de uz zub lo:

—¡Dë ya a' ricy cup dë rena' rey sinu César zi'l! —na dey.

<sup>16</sup> Orze' Pilato bgu'y mi yaa dey par nu cut dey mi lo cruuuz. Orze' za nu dey mi.

### Caa dey Jesuuz lo cruuuz

<sup>17</sup> Orze' bruu Jesuuz lugaar ze' za num cruuuz nu cam lo. Orze' bru'ña tub lugaar nu la Gólgota benu nu riidz hebreo. Riidz ze' yaruuñ: Lugaar ni cyug too añ.

<sup>18</sup> Ze' pcaa dey mi lo cruuuz gal nu cyupa' mbecy. Tub ga dey cay tub la' ga' cuit mi. <sup>19</sup> Orze' Pilato b icy yu mandaar nu zaa dey tub nac letr. Orze' pcaa dey ñi too cruuuz nim. Orze' letr ze' riiñ: "Jesuuz, yu nu bruu Nazaret, rey ni de mbecy Israael", riiñ. <sup>20</sup> Orze' zigy mbecy Israael psya' dey de riidz nu rnii de letr ze' gun lugaar ze' nu pcaa dey mi lo cruuuz ze' garee ga ru' gyedz. Ze' letr ze' bzaa dey ñi nu riidz hebreo, nu riidz latii, gal nu riidz griego. <sup>21</sup> Orze' de uz zub lo ni de mbecy Israael, bish cya dey nu gua niy lo Pilato. Orze' na dey:

—Cue' nhaar "Rey ni de mbecy Israael", sinu nap zir nu caa "Yu nu rnii nu nac rey ni de mbecy Israael" —na dey.

<sup>22</sup> Orze' na Pilato:

—Bi cañ ca nu nu cañ —nay.

<sup>23</sup> Despues ornu bi pcaa de soldad Jesuuz lo cruuuz, orze' byash dey shab mi, nunu orze' tap nac ñii b icy dey nu dugyi tub gay. Orze' gush dey negy duñ nu ca yeñ mi. Nde' tub negy nu tub zily la zuñ gal yeñ mi nu gal yeñ gyi' lam ornu bbugab ñi. Sac la ze' nu bbugib ñi. <sup>24</sup> Orze' na de soldad rab yu losa'y:

—Nap zir cue' shaan ñi sinu loon suert ni losa'n ben ca na den dugyin ñi —na dey.

Ni guuc ñi par nu byu' niñ gal nu rniiñ lat de riidz ni Ñgyoozh: "Bleez dey shabä lat losa'y. Bloo dey suert ni losa'y ben ca nay dugiy negy duñ nu pcaa yeña", rniiñ lat riidz ni Ñgyoozh. De nde' coz nu bicy de soldad.

<sup>25</sup> Na garee ze' nu zu cruuuz nu ca Jesuuz, ze' zu ñaam, gal nu bily ñaam, nu Li mñaa Cleofas, gal nu Li biñ nu bruu Magadán. <sup>26</sup> Orze' Jesuuz bzaac mi ñaam nu zum garee ga nu ya, tub yu nu rsya' lom. Laab ya, yu nu dzi razañ lagy mi. Orze' nam rab mi ñaam:

—Ña, yu nu zu ze', bicy yu par tub iñ ru —nam.

<sup>27</sup> Orze' nam rab mi ya, yu nu rsya' lom ze':

—Biñ nu zu ze', bicy mi par tub ñaar —nam.

Orze' nese laab or la ze' byashä biñ mñaa ze' nu ya dum yu'.

### Jesuuz gut mi

<sup>28</sup> Na despuees ni de nu nde', orze' Jesuuz bi gud lagy mi nu bi bza' lom de riiñ nu biid mi. Orze' par nu gyu' niñ gal nu rniiñ lat de riidz ni Ñgyoozh, orze' nam:

—Rbigyä nis —nam.

<sup>29</sup> Orze' ze' zu tub teg yu' ñup zii nañ ñi. Orze' psal dey tub coz nu chayo' nis lo ñup ze'. Pcyiig dey ñi lo tub lo yag nu la hisopo. Orze' pcaa dey ñi ru'm.

<sup>30</sup> Orze' go'm ñup ze'. Orze' nam:

—Bya' loñ —nam.

Orze' gusab tiily toom. Orze' gut mi.

### Tub soldad mne'y yag too lyuch cuit Jesuuz

<sup>31</sup> Nde' tub dzi anzir ni sa' ni Pas. Ze' de mbecy Zub lo ni de mbecy Israeel walagy dey ca añ lo cruuuz dzi sab, dzi nu rzu lagy mbecy, gun dzi ze', nde' tub dzi da.

Orze' gua nishbaa dey lo Pilato nu gyicy yu mandaar lo soldad nu cha dey cyicy yu gyi' de yu nu ta' lo cruuuz ze' par nu gyel gyet de añ ze' lo cruuuz. <sup>32</sup> Orze' gua de soldad ze'. Pcyicy dey gyi' yu nu bru'ña dey lo loga la.

Gaze' nu pcyicya' dey gyi' yu nu ca lo cruuuz, cruuuz nu zu tub la' ga' cuit Jesuuz. <sup>33</sup> Tees ornu bru'ña dey lo Jesuuz, orze' bzaac dey nu bi gut mi. Orze' nde' nu wancyicya' dey gyi'm.

<sup>34</sup> Tees tub de soldad mne'y tub yag too lyuch lat rit lyush mi. Orze' lueg la bruu reñ nunu bruu nis. <sup>35</sup> Laab ya, yu nu rnii de coz nu guc ii, nde' coz nu bzaac urlq la. Nunu rnëe coz rishli. Laab ya rad lagyä nu coz nu rnëe, nde' coz rishli. Ni mnëe gun orze' ni' de ru cheña lagy der. <sup>36</sup> Dela coz ii ni guuc ñi par nu byu' niñ gal nu rniiñ lat de riidz ni Ñgyoozh ze' nu rniiñ: "Ni tub rit mi wacyicy dey", rniiñ. <sup>37</sup> Ze' tub se' ga' lat riidz ni Ñgyoozh rniiñ: "De mbecy güii dey lo biñ nu mne' dey yag too lyuch nañ", rniiñ.

### Pcach dey Jesuuz

<sup>38</sup> Despuees ni de nu nde', orze' See, tub yu nu bruu Arimatea, bdiiñ yu rishbeey lo Pilato nu cha nuy cuerpr ni Jesuuz. Ze' yu ze' ni' nac yu tub yu nu rsya' lom. Tees dze ga rsya'y lom nu nac nu rdzib yu lo de yu Zub lo ni

de mbecy Israeel. Orze' Pilato briic yu rishbeey. Orze' See gua nuy cuerpr nim. <sup>39</sup> Orze' Nicodemo, yu nu gua bee riidz nu Jesuuz nu loga la tub rel, yu ze' bru'ña nuy tub nu rnii gal rup tii cyl coz zguul. Coz zguul ze' nde' tub lo bid nu la mirra gu' can nu tub lo gyez ni yag nu la áloe. <sup>40</sup> Orze' laab de yu ze' gua nu dey cuerpr ni Jesuuz. Orze' ptiish dey cuerpr ze' negy. Lo negy ze' ta' de coz zguul. Bicy dey mod nu rlagy ñi gal nu na cushion ni de mbecy Israael ornu rcach dey añ. <sup>41</sup> Gaab ga ze' nu pcaa dey mi lo cruuuz, ze' ri tub nac yag mni. Nunu lat yag mni ze' ca tub gyerbaa cub nu nigul cui la añ. <sup>42</sup> Orze' ze' bri dey cuerpr ni Jesuuz, gun gyerbaa ze' garee ga cañ nunu sñuu ga shuub dzi nu rzu lagy de mbecy Israael.

### Jesuuz byabañ mi

<sup>20</sup> Na noming, dzi loga ni sman, gabee caas ru' zu, gua Li nu bruu Magadán ru' baa ni Jesuuz. Orze' bzaac ñi nu bi bdugyash gyita' nu rsoow ru' baa ze'.

<sup>2</sup> Orze' gush ñi carer yaañ lo Simoq Bed, gal nu lo ya tuuba' yu nu rsya' lo Jesuuz, yu nu dzi razañ lagy mi ze'. Orze' nañ rab ñi de:

—;Blo dem cuerpr ni Shuaan den nañ gyerbaa za nu dem! Na ¿cyu cuic rasoo ca bicy dem ñii? —nañ.

<sup>3</sup> Orze' Bed gal nu ya za de za güii ru' baa ze'. <sup>4</sup> Orze' rup laa de brush de carer za, tees ya bded lo lo Bed. Orze' bru'ña ru' baa loga la. <sup>5</sup> Orze' bzaab tiilya nu bgüii nañ gyerbaa ze'. Ze' bzaacä se sab zi'l nim nguaañ. Tees wanchu' nañ gyerbaa ze'. <sup>6</sup> Orze' par ichä bru'ña Simoq Bed. Orze' lueg la gu'y nañ gyerbaa ze'. Nunu ni' zi'l bzaac yu sab ze' nguaañ. <sup>7</sup> Nunu bzaaca'y negy nu ptiish dey too Jesuuz nguaa reñ ñi nu sab nim nunu nap nach cyup ñi nguaañ. <sup>8</sup> Orze' gaze' nu ni' zi'l gu' ga' ya; mas laab ya bru'ña loga la ru' gyerbaa ze'. Orze' bzaacä de nu nde'. Orze' guña lagyä nu byabañ mi. <sup>9</sup> Tees de ya gabee nigul gyet lag de cuen lac yaruu de riidz ni Ñgyoozh nu rniiñ nu mi ze' rlagy ñi nu gyabañ mi. <sup>10</sup> Orze' bish cya de yaq de par yu'.

<sup>11</sup> Orze' Li ze' gusuñ ruun ñi par ich ro' ni gyerbaa ze'. Lat nu ruun lañ ze', orze' bzaab tiily ñi bgüiiñ nañ gyerbaa ze'. <sup>12</sup> Orze' bzaac ñi cyup anc nañ gyerbaa ze'. Zu dey negy cacy. Zub dey ze' nu gubish cuerpr ni Jesuuz. Tub yu Zub yu ze' nu gubish toom. Ze' tuuba'y Zub yu par ze' nu gubish gyi'm. <sup>13</sup> Orze' de anc ze' nay rab yu Li:

—Biñ mñaa, ¿la gyi', lagu ruun ru? —na dey.

Orze' na Li:

—Gun za nu mbecy Shuaana, nunu wagad lagya ca bicy dem mi —nam.

<sup>14</sup> Na ornu blazh mniiñ de riidz ze', orze' bish cyañ bgüiiñ par ich ñi. Orze' bzaac ñi nu zu Jesuuz. Tees wangyu' loñ ti laab mi. <sup>15</sup> Orze' na Jesuuz rab mi ñii:

—Biñ mñaa, ¿la gyi', lagu ruun ru? ¿Cyu ryub ru? —nam.

Orze' mnii tooñ nu nde' tub mbecy nu ricy riiñ lat de ya mni nu nash ze'. Orze' nañ:

—Ze' benu ru gua nur cuerpr nim, orze' mnii lo ca bicy ru ñii, gun orze' ya cha gyi cuerpr ze' —nañ.

<sup>16</sup> Orze' na Jesuuz rab mi ñii:

—¡Li! —nam.

Orze' bish cyañ bgüiiñ lom. Orze' mnii nuñ mi nu ri-idz hebreo:

—Rabuni! —nañ.

Riidz ze', nde' yaruuñ moscuel. <sup>17</sup> Orze' na Jesuuz rab mi ñii:

—Bzaan yaa ya, gun gaal zi nigul gyä lo Ñgyoozh uzä. Tees na yaa niir lo de bicyä nu bi gyä ga' lo biñ nu nac uza, gal nu uz der: lo biñ nu nac Ñgyoozh ne, gal nu Ñgyoozh ni de ru —nam.

<sup>18</sup> Orze' Li nu bruu Magadán gush nez ñi yaa tooñ rishlo de yu nu rsya' lom. Mniiñ lo dey nu bzaac ñi Shuaan den. Nunu mnii ga'ñ lo dey de coz nu mniim looñ.

### Jesuuz bruu zac mi lo de yu nu rsya' lom

<sup>19</sup> Na ornu bi becheñ ni laab dzi loga ni sman ze', orze' byatublaazh de yu nu rsya' lom nañ tub yu'. Nunu nicy psoow dey ro' nu nac nu rdzib dey lo de yu zub lo ni de mbecy Israel. Orze' Jesuuz bru'ñam gusum lat dey. Orze' nam rab mi dey:

—¡Gyel ri zu briñ lat der! —nam.

<sup>20</sup> Ornu blazh mniim riidz ze', orze' blyuum yaam lo dey nunu blyuu ga'm rit lyush mi lo dey. Orze' tona' la bet lagy dey nu bzaac dey Shuaan den. <sup>21</sup> Orze' na ga' Jesuuz rab mi dey tuuba' tir:

—¡Gyel ri zu briñ lat der! Gal nu Ñgyoozh uzä bzuu nez mi ya yapa gyishlombecy ii, nde' nu ni' zi'l ya gzuu nezä der char lat de mbecy nu yu' gyishlombecy —nam.

<sup>22</sup> Orze' blaam lo dey. Orze' nam:

—Na ricä Espiriit Yon ni Ñgyoozh nu gac num der.

<sup>23</sup> Benu de ru gyicy sulagy ru cyi ca na tub mbecy, orze' Ñgyoozh gyicy sulagy mi niy. Ze' benu wayicy sulagy der ni dey, orze' ni' Ñgyoozh wayicy sulagy mi ni de yu ze' —nam.

### Jesuuz blyuum ze' nu guud güii nim lo Tomaas

<sup>24</sup> Na lo trocyup de yu nu rsya' lom, tub yu nde' Tomaas, yu nu rnii dey cuach. Orze' yu ze' sac yu lat dey ornu bru'ñam Jesuuz. <sup>25</sup> Despuees, orze' de' zir de losa'y nu rsya' lom byoo dey rishloy coz nu bzaac dey. Orze' na dey:

—Bi bzaac dë Shuaan den —na dey.

Tees Tomaas nay rab yu dey:

—Tees benu wazacä ze' nu guud güii ni yaam nu bzub bey nunu benu wane' mbiza ze' nu guud güii ze' nim, nunu benu wane' yaä ze' nu guud güii ni rit lyush mi, orze' rila wayeñä lagyä de riidz nu rnii der —nam.

<sup>26</sup> Na ornu bza' shuñ dzi na, orze' byatublaazha' de yu nu rsya' lom laaba' nañ yu' ze'. Orze' gaza' Tomaas riy lat dey. Nunu ni zi'l noow nicy de ro' ni yu' nu yu' dey. Orze' bru'ñam Jesuuz gusum lat dey. Orze' nam:

—¡Gyel ri zu briñ lat der! —nam.

<sup>27</sup> Orze' nam rab mi Tomaas:

—Tomaas, mne' mbiz ru lo ryää ii, nunu güii la na yää. Bzaab yaar lo nunu mne' yaa ru' rit lyushä. Cue' gac ru mbecy nu wacheña lagy, sinu gac mbecy nu zeña lagy —nam.

<sup>28</sup> Orze' na Tomaas rab yum:

—¡Ru nac ru Shuaanä nunu nac ru Ñgyoozh ne! —nay.

<sup>29</sup> Orze' na Jesuuz rab mi yu:

—¿A guña lagy ru na par nu bzaac lar ya? Dzi ni de mbecy nu rzeña lagy sinu wacsac lay —nam.

### La gyi' pcaa Waa de riidz ii

<sup>30</sup> Jesuuz zañ tona' la nusuriidz bacy mi lo rgüii la de yu nu rsya' lom nunu de nu nde' wanca ga'ñ lo gyicy ii.

<sup>31</sup> Tees de nu nii pcañ lo gyicy ii gun orze' cheña lagy der nu Jesuuz nac mi Mesías, biñ nu ca lo cuen nu cyid co mbañ mbecy, nunu nac mi i'ñ Ñgyoozh. Nunu par nu nac nu gyicy cup der consuel lom orze' cui mbañ der.

### Jesuuz bruu zac mi lo gagy de yu nu rsya' lom

<sup>21</sup> Na despuees ni de nu nde', orze' bru'ñam Jesuuz lo de ya yu nu rsya' lom tuuba' tir ru' nisyudoo ni Tiberias. Orze' i mod gac ñii. <sup>2</sup> Orze' ze' yu' tublaazh la be de yu nu rsya' lom. Ze' zu Simög Bed, nu Tomaas, yu nu rnii dey cuach, gal nu Natanael, yu nu bruu Caná, tub gyedz nu ri lo yu ni Galilea, gal nu ya nu biciya Santiag, dë ya nu nac i'ñ Zebedeo, gal nu se cyup mbecy nu rsya' lo Jesuuz. <sup>3</sup> Orze' na Simög Bed rab yu de' zir de:

—Ya chä guuz bel —nay.

Orze' na dey rab yu Bed:

—Ni' dë ya chä du ru —na dey.

Orze' brush nez dë za. Orze' gu' dë nañ tub barc. Gua la rel byub dë bel tees ni tub ma wangad ma. <sup>4</sup> Na ornu bi brugyi' nu bi yad nu rza' yu, orze' bru'ñam Jesuuz gusub mi ru' nisyudoo. Tees dë ya, yu nu rsya' lom, wangyu' lo dë mi. <sup>5</sup> Orze' nam rab mi dë:

—Der yu feñ, ¿a wangad la bel ni der? —nam.

Orze' mnëe dë:

—Rila wangad ma —mnëe dë.

<sup>6</sup> Orze' na ga' Jesuuz rab mi dë:

—Orze' mne' der gyish ze' par bee barc gun orze' gad ma ni der —nam.

Orze' mne' dë gyish ze' lo nis, nunu par nu tona' la zañ bel gu' ma nañ gyish ne dë, orze' ni wagaca' nu loo dë ñii lo nis nu cshup dë ñii nañ barc. <sup>7</sup> Orze' ya, yu nu rsya' lo Jesuuz nu dzi razañ lagy mi ze', mnëe lo Bed:

—¡Laab Jesuuz, biñ nu nac Shuaan den! —Mnëe.

Laab güeñ la Simög Bed nu laab mi ze' Shuaan den, orze' bzuy shab yu gun a' zuy shab yu. Orze' bet lay lo nis zay. <sup>8</sup> Orze' de' zir dë ya, losa'y, gal ri zi'l dë nañ barc rgayü tuñ la dë gyish nu yu' bel ze'. A' zet zaab barc lo nis. Nu rnii tub gaynal gaal metr nu zet nu zaab ñi lo nis. <sup>9</sup> Na ornu brüü dë nañ barc par lo yu bigy, orze' bzaac dë nu bi nguua gyi nunu riib tub bel loñ.

Nunu nguaa ga' gyishtily. <sup>10</sup> Orze' na Jesuuz rab mi dę:

—Da nu der la be bel, bañ nu sa bdub der na —nam.

<sup>11</sup> Orze' Simoq Bed gu'y nañ barc. Bdu' yaay gyish nu yu' de bel ze'. Bga' yu tuñ lay ñi za nuy ñi par ru' nisyudo. Dza la nañ ñi yu' du ub bel ily la. Yu' tub gaynal nu Zub chon bel ze' nac ma. Mas tona' la bel zañ yu' nañ gyish ze', tees wanshaañ. <sup>12</sup> Orze' na Jesuuz rab mi dę:

—Gyeed der gun gyicy ru siily —nam.

Tees ni tub la dę wanric dę baloor nu ndugyi' dę lom ben cyu nac mi, gun gud lagy dę nu laab mi, nde' Shuaan dę. <sup>13</sup> Orze' Jesuuz becha'm lo dę. Orze' bdu' yaam gyishtily ze'. Briic mi ne dę. Orze' ni' zi'l b icy num de bel ze'.

<sup>14</sup> Orze' nde' tir chon nu bzaac dę Jesuuz despuees ornu bi byabañ mi.

### Jesuuz bee num Simoq Bed riidz

<sup>15</sup> Na ornu blazh b icy dę siily, Jesuuz nam rab mi Bed:

—Simoq, i'ñ Jonás, ¿a rca zir ru ya, gaze' gal mod nu rca de' zir de yu ii ya? —nam.

Orze' na Bed:

—Laab Shuaana, ru rad lagy ru nu rcə ru —nay.

Orze' na ga' Jesuuz:

—Orze' mña de mbecy nu nac shily ne —nam.

<sup>16</sup> Orze' mnii ga'm tir cyup la loy. Orze' nam:

—Simoq, i'ñ Jonás, ¿a rca zir ru ya, gaze' gal mod nu rca de' zir de yu ii ya? —nam.

Orze' na ga' Bed rab yum:

—Laab Shuaana, ru rad lagy ru nu rcə ru —nay.

Orze' na ga' Jesuuz:

—Orze' mña de mbecy nu nac shily ne —nam.

<sup>17</sup> Orze' na ga'm rab mi yu tir chon la:

—Simoq, i'ñ Jonás, ¿a rcar ya? —nam.

Orze' tona' la b icy shni Bed gyi' nu bdugyi'm chon tir loy ornu nam: "¿A rcar ya?" nam. Orze' nay rab yum:

—Shuaana, ru rad lagy ru dela coz. Nunu rad lagy ru nu ya rcə ru —nay.

Orze' na ga' Jesuuz.

—Mña de mbecy nu nac shily ne. <sup>18</sup> Ya rishli rnęe lor nu lat nu gufeñ ru, bzur shab ru nunu guar ca zi'l lu-gaar nu rlagy ru char. Tees ornu gyaguush ru, orze' zaab yaar lo tuuba' mbecy. Orze' yu ze' gzuuy ru shab ru. Orze' yu ze' cha nuy ru lugaar ze' nu walagy ru char —nam.

<sup>19</sup> Na ornu mnii Jesuuz de riidz ze', nde' par nu gyicy mi nu gabe lac mod gruu zac gyel lily ni Ngoozh nu nac nu gat Bed. Orze' na ga'm rab mi Bed:

—¡Da ca ichä! —nam.

### Yu nu dzi razañ lagy Jesuuz

<sup>20</sup> Na ornu bish cya Bed bgüiiy par ich yu, orze' bzaac yu ya, yu nu dzi razañ lagy Jesuuz ze'. Laab ya yu nu bzub cuit mi ornu b icy dę che düm, nunu bdugyi' lom: "Shuaana, ¿ca na yu nu cush cya ich ru ze'?" <sup>21</sup> Na ornu bzaac Bed ya, orze' bdugyi' lo Jesuuz. Orze' nay:

—Shuaan dę, se yu re, ¿la zac yu? —nay.

<sup>22</sup> Orze' na Jesuuz rab mi yu:

—Ze' benu ya rlagyä, orze' yu re gabee mbañ yu ornu yapä tuuba' tir. Ru, ¿la nu ricy ñi nir? Nomaas nu da ca zi'l ichä —nam.

<sup>23</sup> Orze' bzu riidz lat dela de yu nu rsya' lom nu ya wata. Tees walab nu mnii Jesuuz nu wata. Coz nu mniim nde': "Ze' benu ya rlagyä, orze' yu re gabee mbañ yu ornu yapä tuuba' tir. Ru, ¿la nu ricy ñi nir?", mniim.

<sup>24</sup> Nunu laab ya, yu nu mnii de riidz ii. De riidz ii pcaä lo gyicy; nunu rad lagy dę nu nde' coz rishli nu mnęe.

<sup>25</sup> Jesuuz zañ zir coz b icy mi. Nunu benu tub ga la de coz ze' ncaañ lo gyicy, ya rzęe nu ni wal gyishlombecy nu chu' de gyicy ze', benu nca delañ.

# Hechos

Jesuuz mniim nu cuez dey Espiriit Yon ni Ñgyooozh

**1** Shi Tioj, gyicy nu pcaaq loga la, lo gyicy ze' pcaaq dela coz nu b icy Jesuuz gal nu de coz nu blyuum nese nu bzuub mi g yi' de riiñ nu b icy mi <sup>2</sup> gal pshuub la dzi nu gup mi gyibaa. Anzir nu gyam gyibaa, orze' nu nac Espiriit Yon ni Ñgyooozh mniim lo de yu nu p cuim nu gac aposht de coz nu gyicy dey. <sup>3</sup> Lat cyuu dzi despuées ornu bi byabañ mi nu gut mi, zañ tir bruu zac mi lo dey. Nu mod ze' briic mi nu gad lagy dey nu mbañ mi. Lat nu bruu zac mi, orze' bzat mi gyel gubier ni Ñgyooozh lo dey. <sup>4</sup> Ornu gabee rded nu ru'm dey, orze' mniim lo dey nu cue' ruuy Jerusaleeng. Gaze' nu nam rab mi dey:

—Cuez der gashtal cuic la Ñgyooozh biñ nu bi mniim nu segur la cuic mi ni der. Ya bi mnęe lo der nu ni gyicy mi, gun <sup>5</sup> Waa rishli nu nis zi'l briib nis yu mbecy, tees na de ru gal nu bgo nis too der ornu bzu' nis ru nu nis, ni' zi'l sñuu ga gyet Espiriit Yon ni Ñgyooozh lat der nu cyiñ num espiiriit ni der —nam.

## Jesuuz gup mi gyibaa

<sup>6</sup> Na lat nu yu' tublaazh dey nuy mi, orze' bdugyi' dey lom. Gaze' nu na dey:

—Shuaan de, ¿a na pshuub tiem nu gzu nap ru lat de mbecy Israeel gal nu bzuuñ gulas? —na dey.

<sup>7</sup> Gaze' nu na Jesuuz rab mi dey:

—Walab cuen ni de ru nu gad lagy ru ca dzi o ca tiem nu gyicy Ñgyooozh de coz nu bzeeñ mi nu gac cuen ni ub zi'l mi. <sup>8</sup> Tees ornu Espiriit Yon nim gyet mi lat der, orze' gyicy mi nu cyiñ der nu gzat ru ya lat de mbecy nu yu' Jerusaleeng, lat de mbecy nu yu' dutuub la lo yu ni Judea, lat de mbecy nu yu' dutuub la lo yu ni Samaria, nunu dela lugaar nu byazet zir ni gyishlombecy —nam.

<sup>9</sup> Despuées ornu blazh mnii Jesuuz de nde', orze' lo rgüii la dey wes nañ mi yam gyibaa. Byoow mi lat tub nac za yam. Orze' wangaca' zac dey mi. <sup>10</sup> Lat nu yu' dey ta' loy baa rgüii yu yam, orze' bruu zac cyup mbecy shab caacy gusuy lo dey. <sup>11</sup> Gaze' nu nay rab yu dey:

—Der mbecy Galilea, ¿lagu ni yu' der rgüii baa? Laab Jesuuz bruum lat der yaam gyibaa. Tees ni' zi'l mod gal nu bzaac der yam ni' zi'l mod zac der ornu cyid mi tuuba' tir —na de anc ze'.

## Pcui dey Matías par nu gac yu losa' Aposht

<sup>12</sup> Bicy nu la Bicy ni Ya Oliva, ze' yu' dey. Bicy ze' gaab ga byeeñ fi nu Jerusaleeng, tub la be metr nu ca lo cuen ni leey ni dey nu rac rza mbecy sab dzi nu rzu lagy mbecy Israeel. Gaze' nu gush nez dey yay par lat gyedz Jerusaleeng. <sup>13</sup> Ornu bri dey lat gyedz, orze' gup dey gal shily cyup ni yu' ze', ze' nu rzu' dey. Ze' ri Bed, Santiag, Waa, Ndrees, Lip, Bartol, Mateo, Santiag iñ Alfeo, Simoo, yu nu nash leey Caneneo, nu Judas, b icy Santiag. Dela de yu ze' yu' ze'. <sup>14</sup> Nunu zaab rnii nu laa dey Ñgyooozh nu tub zi'l shcab: gaza' de biñ mñaa yu'm lat ze', gaza' Li ñaa Jesuuz, nunu gaza' de b icy Jesuuz.

<sup>15</sup> Na ornu bded la be dzi, orze' byatublaazh dey. Byatublaazh nu rnii tub gaynal Zub gal de mbecy ni Crisht. Orze' wes su Bed. Gaze' nu nay rab yu dey:

<sup>16</sup> —Der b icy na, Espiriit Yon ni Ñgyooozh bi mniim lo Dabi nu caay de coz nu b icy Judas, yu nu blyuu Jesuuz lo de yu nu gua num pres. Rlagy ñi gac ñii gal nu bi cañ. <sup>17</sup> Ni' Judas guc yu tub losa' de aposht. Gaza' y bdugiy riiñ, laab riiñ nu bdugyi de ya. <sup>18</sup> Tees despuées nu b icy yu coz cyi nu bgu'y Jesuuz yaa de yu nu rzi lagy lom, orze' laab nu tiñ nu byash niy ze' wiyy tub lugaar ze' nu biit yu ub yu. Orze' bet lag yu tub lugaar gya. Bzu tooy lo yu. Orze' briich ñi nañ yu. Orze' bruu za dela coz nu yu' nañ yu. <sup>19</sup> Orze' ornu dela de mbecy nu yu' Jerusaleeng gud lagy dey coz nu guc lugaar ze', orze' bloo la dey ñi Lugaar ni Reñ. Benu nu riidz dey, orze' Acéldama lañ. <sup>20</sup> Gun Dabi bi pcaay coz nu gac lugaar ni Judas lo libr ni Salmo, ze' nu mniiy:

Yu'y gyac fi gal nu na tub lugaar ub zi nu sac la mbecy.

Orze' waruu su ga' la mbecy nu cyiñ yu nañ ñi, nay. Orze' nay tuuba' lugaar ni libr ze':

Orze' tuuba' mbecy gyub ic yu riiñ nu bdugiy, na Dabi.

<sup>21</sup> Na lat na ii yu' mbecy nu gusa nu de ub na dub laa lat nu gusa dun Shuaan na Jesuuz. <sup>22</sup> Brugyi' rded nu dey de ub na nese dzi nu briic Waa nu zu nis mi, gash-tal dzi nu yaa lam gyibaa. Na rlagy ñi nu chu' ca na tub dey lat na par nu niiy nu bzaac den nu byabañ mi —na Bed.

<sup>23</sup> Orze' bloo su dey cyup mbecy. Tub yu lay See, laab yu ze' lay Barsabás, nunu laab yu lay Jusht. Bloo su dey yu ze' nu tuuba' mbecy nu la Matías. <sup>24</sup> Gaze' nu brugyi' rnii nu dey Ñgyooozh. Orze' na dey:

—Ñgyoozh, ru rad lagy ru la na lardoo dela mbecy. Na lo cyup de yu ii, blyuu lo dē ca na dey bi pcuiir  
25 par nu gac yu aposht. Chu'y lo Judas. Gun Judas nu  
nac nu b icy yu coz a' nap, orze' bzeeñ yu riiñ nu zuy  
par nu yay lugaar ze' nu byap yu gyay —na dey.

26 Gaze' nu bloo dey suert ben ca na de yu ze' chu'y.  
Orze' Matías bruu suert niy nu chu'y lat de trotub  
aposht ze'. Yu ze' gu'y lugaar ni Judas.

### Bet Espiriit Yon ni Ñgyoozh

2 Ornu pshuub dzi ni sa' nu la Pentecostés, dela de  
mbecy ni Crisht yu' dey tublaazh la tub se' zi'l.  
2 Orze' dereument la brugyi' rzig yaa. Gal rac nu yad  
tub bi ily ni rac. Nunu dutuub la nañ yu' ze' nu nguaa  
dey bzig y. 3 Orze' bruu zac gal nu na lyush gyi na bruu  
zac. Gul ñii tub ga la dey. 4 Orze' dela dey gutib ic za' la  
Espiriit Yon ni Ñgyoozh dey, nunu brugyi' rnii dey riidz  
reña' mbecy. Dub gal lac na riidz nu briic Espiriit Yon ni  
Ñgyoozh nu nii dey dub ni mod mniyi.

5 Tiem ze' zañ mbecy Israeel nu zu shcab nu nac de  
coz ni Ñgyoozh yu'y Jerusaleeng. Zañ lugaar ni gy-  
ishlombecy bruu dey. 6 Ornu bzig y, orze' tona' la  
mbecy zigy byatublaazh yu. Nunu guton la dey yu'y,  
gun tub ga la de mbecy ni Crisht ze' brugyi' rniiy riidz  
de mbecy nu bde' ze'. 7 Dela mbecy bdzo'w laa dey,  
nunu za nu la ic dey. Orze' nay:

—Güii ñuu! Ze' ña walab mbecy Galilea nac dela  
mbecy nu rnii ii? 8 Ze' ñlac guc nu rac rnii dey de riidz  
guledz tub ga la den? 9 Gun ii yu' mbecy nu bruu zañ  
lugaar. Yu' mbecy nu bruu Partia, yu nu bruu Media,  
yu nu bruu Elam, yu nu bruu Mesopotamia, yu nu  
bruu Judea, yu nu bruu Capadocia, yu nu bruu Ponto,  
yu nu bruu Asia, 10 yu nu bruu Frigia, yu nu bruu Pan-  
filia, yu nu bruu Egipto, yu nu bruu de lugaar ni Libia  
nu yu' par lo Cirene. Dela ze' bruu de mbecy nu yu' ii.  
Nunu gaza' de mbecy nu bruu Rom nu rciyiñ laab ii.  
Yu' de yu nu nac mbecy Israeel nese nu gul laa dey,  
nunu yu' ga' de yu nu byac mbecy Israeel. 11 Nunu  
gaza' mbecy nu bruu Creta, mbecy nu bruu Arabia.  
12 Dela ze' bruu tub nac ga den, tees dela den reñ na coz  
ily ni Ñgyoozh nu riidz na! —na dey.

12 Dela mbecy bdzo'w laa dey, nunu guton la dey  
yu'y. Se nu rgugyi' zi'l dey lo losa'y yu'y:

—Ze' ñlac yaruu de nu nii? —rnii dey.

13 Tees yu' ga' mbecy canu rgubdzaa dey. Orze' nay:  
—Ni ricy dey gun rzug yu! —na dey.

### Bed mniyi lo de mbecy zigy

14 Orze' wes su Bed nu de' zir de trotub aposht gaze'  
nu brugyi' ye la rniiy. Orze' nay:

—De ru mbecy Israeel, gal nu dela de ru mbecy nu  
yu' gyedz Jerusaleeng, rlag y ñi gad lagy der de coz nu  
rac ii, nunu nap bzuub gyidag der de coz nu neé. 15 De  
mbecy ii walab nu rzug y dey gal nu rnii too de ru. Gyib  
gaa zi or napor yu'n na. Walab i or gzug y mbecy.

16 Sinu na ricy yac ñi coz nu pcaa Joeel, yu nu mnii por  
cuen ni Ñgyoozh. Ñgyoozh nam:

17 Ornu bi yad lazhiem,  
ya ricā Espiriit nē ni de lo la mbecy.  
Orze' dela de yu nguzh ni dey,  
gal nu dela de fiñ nguzh ni dey,  
gnii dey por cuen neé.

De yu feñ gyicya nu de' lo dey de coz nu gac.  
Nunu de yu bel lat pcaa dey ricā nu gad lagy yu de  
coz nu gac.

18 Laab tiem ze' ricā Espiriit Yon nē ni yu nu ricy coz  
nu rnē,

nunu ricā'm ni de biñ mñaa nu ricy de coz nu rnē.

Orze' gnii dey por cuen neé.

19 Ya gyicya zañ coz ily baa.  
Ze' lo yu gyicya coz par nu gad lagy mbecy la tiem.  
Shu reñ; grib gyi; nunu grib dzeeñ nan.

20 Gyet cow lo doo.

Ze' lo beey gyet ña gal na reñ.

Dela nde' gac ñii anzir nu shuub dzi nu bi pcui  
par nu gyicy ya gyel fushtiz nē.

Dzi ze' tona' la dzi ily.

Nunu dzi ze' tona' la cyit gac.

21 Nunu dela mbecy nu nish baa lo nu gloo mbañā  
dey,  
de yu ze' gruu mbañ yu,  
nam. Ni pcaa Joeel gulas.

22 'De ru mbecy Israeel, bzuub gyidag der de coz nu  
neé na. Ñgyoozh naal la briic mi nu gad lagy der nu Je-  
suuz, biñ nu pcyiñ Nazaret, bdu' gyim riiñ ni Ñgyoozh  
nu nac de coz ily nu b icy mi lat de ru. Ñgyoozh b icy mi  
nu b icy Jesuuz zañ coz ily. B icy mi nusuriidz. B icy mi  
zañ coz par nu gad lagy der cyu nac mi. 23 Tees Ñgy-  
oozh nil nese gulas bi mne' ic mi, coz nu gyicy mi.

Nunu bi gud lagy mi nu gyet lag mi yaa der. Orze' de  
ru gua nu der mi pres. Gaze' nu b icy der nu de mbecy  
nu wagiy yac de leey ni Ñgyoozh biit dey mi lo cruu.

24 Tees Ñgyoozh b icy mi nu byabañ mi. Bloom mi lat de  
mbecy gut, gun ze' nu yu' mbecy gut wac soow ñi lom.

25 Gun Dabi laab mi bzat yu ornu pcaay:

Ya rad lagya nu zaab zu gala Ñgyoozh lo.

Zub mi par yaa bëe,  
gun orze' mas lac ru' wagiy yac deet mbecy nuy ya.

26 Nde' nu tona' la gusu cyit lagya,

nunu mneé riidz nu rnii mbecy nu zu cyit lagy.

Nunu drish lo lo Ñgyoozh nu nac cuerp nē.

27 Gun ru wazaan ru nu gyiyeñ lardoo lat de mbecy  
gut.

Ni wazaan ru nu gadz cuerp ni mbecy yon nir.

28 Ru mniir lo mod nu gyicya par nu cui mbañā.

Ya tona' la chesu cyit lagya, gun nac nur ya,  
pcaa Dabi.

29 'Der b icy na, naal la za de riidz ii. Gyitoo bel ni den  
Dabi gut yu. Orze' pcach dey yu. Nunu baa niy rzac  
den ñi mas gal dzi na. 30 Tees Dabi guc yu tub mbecy  
nu mnii por cuen ni Ñgyoozh. Gud lag yu nu Ñgyoozh  
mnii por cuen ni waded la nu lat ca na tub nez yu, ruu biñ nu  
pcum nu gac Shuaan den gal nu ub yu guc yu rey nu  
byub ic den. 31 Nde' nu Dabi gud lag yu coz nu gyicy  
Ñgyoozh. Mnii por cuen ni waded la nu lat ca na tub nez yu, ruu biñ nu  
pcum nu co mbañ de mbe-

cy nim gat mi. Orze' gyabañ mi. Mniy nu lardoom wayiyeñ ñi lugaar ze' nu ryeeñ de mbecy gut, nunu mniy nu cuerp nim wadz ñi. <sup>32</sup> Mi ze' laab Jesuuz. Bicy Ñgyoozh nu byabañ mi, nunu dę ya bzaac urlę la de nde'. <sup>33</sup> Na Ñgyoozh bicy mi nu zub mi ze' nu zub biñ zub lo zir par dela. Zub mi par yaa beem. Orze' Ñgyoozh Uz mi briic mi Espiriit Yon nim ni mi ze'. Gal nu mniim, ni bicy mi. Na dela coz nu rzac der ii, nunu dela coz nu reñ der ii, dela nii bruuñ gal lom. <sup>34</sup> Gun Dabi walab ub yu gup yu gyibaa gal nu gup Jesuuz. Sinu ub lay mniy ornu nay:

Ñgyoozh nam rab mi Shuaan na:

Bzub par yaa bee, se' mbecy zub lo zir,

<sup>35</sup> Lat nu gyicya nu gyicy ru gan de losa' yuur, nam, na Dabi.

<sup>36</sup> 'Nde' nu dela mbecy Israeel rlagy ñi nu gad lagy dey nu Jesuuz, biñ nu biit dey lo cruuz, Ñgyoozh bicy mi nu nac mi Shuaan den, nunu nac mi biñ nu bloo sum nu co mbañ den —na Bed.

<sup>37</sup> Ornu güeñ de mbecy de riidz ze', orze' tona' la bicy dey sentiir nañ lardooy. Gaze' nu na dey rab yu Bed nu de' zir de aposht:

—Der bicy na, ¿la coz rlagy ñi nu gyicy dę? —na dey.

<sup>38</sup> Orze' na Bed rab yu dey:

—Mne' der dela de cyi nu ricy ru, nunu dela der bzu nis der par nu gabe nu nac der mbecy ni Jesucrisht, gun orze' gyicy sulagy Ñgyoozh de cyi der, nunu gaze' nu cuic mi Espiriit Yon nim ni der. <sup>39</sup> Gun Ñgyoozh bi mniim nu segur la cuic mi Espiriit Yon nim ni de ru nu ni de i'ñ ru nu chu' par lo, nu ni dela de mbecy nu yu' zet, de yu nu bi blousum —na Bed.

<sup>40</sup> Dela nde' mniy, nunu zañ zir riidz mniy lo dey. Briic yu consef ni dey. Nunu mniy lac gyicy dey. Orze' i mod mniy:

—Bicy der nu glar ni cashtig nu cuic Ñgyoozh ni de mbecy a' nap nu yu' na —nay.

<sup>41</sup> Orze' de yu nu "O" mnii ni de riidz nu mnii Bed, dela dey bzu nis yu. Dzi ze' chon miily mbecy brugyi' ricy cup yu consuel lo Jesuuz, reñ de yu nu nil bi ricy cup consuel lom. <sup>42</sup> Orze' dela dey fert la zu dey shcab nu nac de coz nu rlyuu de aposht. Nunu yatublaazh dela dey nu ro nuy losa'y riidz. Nunu yatublaazh dela dey ricy yu che nu losa'y gal mod nu bzeeñ Crisht. Nunu yatublaazh dey nii nuy Ñgyoozh. De nde' coz nu zaab bicy la dey.

### Mod nu gu' de mbecy loga la ni Crisht

<sup>43</sup> Dela de mbecy za nu ic dey nu nac de coz nu bicy de aposht, gun de aposht bicy dey zañ coz ily. Nunu zañ nusuriidz bicy dey. <sup>44</sup> Dela de yu nu ricy cup consuel lo Crisht ze' tona' la nap byap riidz ni dey nu losa'y. Nunu dela dey rlew yu de coz nu cyiñ lat de losa'y. <sup>45</sup> Rut dey de coz nu yu' niy. Orze' rlew dey ñuu ga tiñ nu losa'y dub gal lac tant nu cyiñ ni tub ga dey. <sup>46</sup> Orze' de dzi la yatublaazh dey nañ yu' nu driib zily mbecy Ñgyoozh, nunu yatublaazha' dey yu' losa'y nu ricy dey che tublaazh gal mod nu bzeeñ Crisht. Nap zu lagy dey. Nunu dub gal ri lagy dey bicy yu de nde'.

<sup>47</sup> Ryabic dey gyel mbecy ni Ñgyoozh. Nunu dela reña' mbecy, nap yu' nuy dey. Nunu Ñgyoozh tub dzi ga rcyaañ zir mi mbecy nu ricy cup consuel lo Crisht.

### Tub mbecy coj byac yu

**3** Tub dzi Bed nu Waa rca dey zay par ic tublaazh la.

Za dey ze' nu zub yu' nu driib zily mbecy Ñgyoozh. Bi yu'n tub gyiib chon or gudze. Nde' or nu rnii nu mbecy Ñgyoozh. <sup>2</sup> Orze' tub mbecy nu nil coj la ornu gul, de dzi la rza nu mbecy yu. Rzuub dey yu gyero' nu la Ro' Cyit Na. Laab ro' ni yu' nu driib zily dey Ñgyoozh. Rza nu dey mbecy coj ze' rzuub dey yu ze' par nu rgyi-iñ yu gun lo de mbecy nu rzu' nañ yu' ze'. <sup>3</sup> Na ornu bzaac yu Bed nu Waa nu se nu chu' zi'l dey nañ yu' ze', orze' bdiiñ yu gun lo dey. <sup>4</sup> Orze' rgüii dey loy. Gaze' nu na Bed rab yu:

—Bgüii lo dę —nay.

<sup>5</sup> Orze' mbecy coj ze' mbi la bgüiy lo dey, gun psa' lagy yu nu la zi coz cuic dey niy. <sup>6</sup> Tees Bed nay rab yuy:

—Rila sac tiñ ne nu ricä nir, tees coz nu ricy cupä gac ricä nir. Nu rishbeey ni Jesucrisht, biñ nu pcyiñ Nazaret, ya rnęe du ru wes su nunu bza —nay.

<sup>7</sup> Gaze' nu bdu' yaa Bed yaa bee mbecy coj ze' pshes suy yu. Orze' lueg la byanap lab yu, nunu byanap yeñ gyi'y. <sup>8</sup> Orze' rzab lay wes suy, nunu brugyi' lay rzay. Gaze' nu gu' nuy dey nañ yu' nu driib zily mbecy Ñgyoozh. Rza lay, nunu yes nañ yu, nunu brugyi' ryabic yu gyel mbecy ni Ñgyoozh. <sup>9</sup> Orze' dela de mbecy zigy bzaac dey nu rac rzay, nunu ryabic yu gyel mbecy ni Ñgyoozh. <sup>10</sup> Se nu za nu zi'l ic dey, nunu bdzo'w laa dey nu nac coz nu gac nu yu' ze', gun byu' lo dey yu nu laab yu nu rzub rgyiñ gun gyero' nu la Ro' Cyit Na ni yu' nu driib zily mbecy Ñgyoozh.

### Coz nu mnii Bed ru' coredoor nu la "Coredoor ni Salomoong"

<sup>11</sup> Ze' mbecy nu gac coj ze' waglaa ga' la yaay Bed nu Waa. Nunu dela de mbecy za nu la ic dey. Nunu orze' lueg la byatublaazh dey par ru' tub coredoor ni yu' nu driib zily mbecy Ñgyoozh. Coredoor ze' lañ Coredoor ni Salomoong. <sup>12</sup> Ornu bzaac Bed de nde', orze' nay rab yu dela mbecy:

—Der mbecy Israeel, ¿lagu dzi za nu ic der nu nac nii? ¿Lagu dzi rgüii der lo dę? Walab nu dzi rgyiñ de ub zi'l dę, nunu walab nu dzi nac dę dę Ñgyoozh, walab nde' nu rac rza mbecy ii. <sup>13</sup> Ñgyoozh, biñ nu gac nu de gyitoo bel ni den, Abraham, Isaac nu Jacob, laab mi ze' ricy zily mi I'ñ mi Jesuuz tiem na. De ru bgu' der mi yaa de mbecy nu riib ic. De ru mnii zi der nim mas tiem nu ngulagy Pilato nlaay mi. <sup>14</sup> Mi ze' biñ yon, biñ nu sac cyi, tees de ru mne' der mi. Lugaar nu nii der nu ndulaa mi ze', ca tub yu nu rut mbecy mnii der nu dulaay.

<sup>15</sup> Orze' biit der mi ze', biñ nu rbic gyel mbañ. Tees Ñgyoozh bicy mi nu byabañ mi. <sup>16</sup> Laab nu nac Jesuuz ze', byanap gyi' mbecy ii, gun dę ya ricy cup dę consuel lom. Nunu yu ii, yu nu nil rzac der, nunu yu' lo der

yu. Nu nac nu ricy cup de consuel lom, nde' nu byac nap lay lo rgüii la dela der.

<sup>17</sup>'Der b icy na, ya rad lagya nu de ru gal nu de yu nu riib ic ni der, ornu biit der Jesuuz, rishli gaal wangyet lag nap der cuen coz nu b icy ru. <sup>18</sup> Ni g uc gun byu' ni de coz nu gulas bi mnii Ñgyoozh nu nac de yu nu mnii por cuen nim. Mniim nu Mesías, biñ nu ca lo cuen nu co mbañ mbecy rlag y ñi nu zac zim. <sup>19</sup> Nde' nu na mne' der dela de coz cyi nu ricy ru. "O" mnii der ni Ñgyoozh, gun orze' cyib mi dela cyi der. Gun orze' gyicy mi nu cyid tiem nu gad nu zu lagy der nañ lardoor como nac num der. <sup>20</sup> Nunu zeed mi Jesuuz. Mi ze' Mesías, biñ nu nil nese gulas bi bloo sum par de ru. <sup>21</sup> Mi ze' rlag y ñi cyiñ mi gyibaa gal shuub la dzi nu gzu nap Ñgyoozh dela coz gal nu bi mnii de mbecy nu bloo sum nu mnii por cuen nim gulas. <sup>22</sup> Gun Moisees nay rab yu de gyitoo bel ni den: "Ñgyoozh, Shuaan den, gzeed mi t u uba' mbecy nu nii por cuen nim gal nu bzeed mi ya. Mbecy ze' laab lat losa' zi'l der gruu. Rlag y ñi zuub gyidag der dela coz nu gniyi. <sup>23</sup> Cyu zi'l mbecy nu wazu ub gyidag ni mbecy nu nii por cuen nim ze', dela dey zu chum yu, nunu nit lom yu", na Moisees.

<sup>24</sup>'Dela de yu nu mnii por cuen ni Ñgyoozh, gaal zi gush ñi nese Samueel, nu de' zir dey, dela de yu ze' bi mnii dey coz nu rac tiem na. <sup>25</sup> Yaa de ru gyiyeen dela gyel nap nu mnii Ñgyoozh nu segur la cuic mi: de coz nu mniim lo de yu nu mnii por cuen nim nu nii dey. Nunu yaa de ru gyiyeen dela gyel nap ni trat nu b icy Ñgyoozh num de gyitoo bel ni den, ornu nam rab mi Abraham: "Nu nac nez ru cyid gyel nap lat dela mbecy nu yu' gyishlombecy", nam. <sup>26</sup> Orze' ornu b icy mi nu byabañ I'ñ mi, nu loga la bzeed mi mi ze' nu cyid mi lat de ru nu gyicy mi coz nap num der. Ni b icy mi gun orze' tub ga la der gruur lo de coz cyi nu ricy ru —na Bed.

### Bed nu Waa chay lo de yu lily

**4** Lat nu zu Bed nu Waa, rniiy lo de mbecy zigy, orze' bru'ña de uz ni de mbecy Israeel, nunu bru'ña de yu nu rña yu' nu driib zily mbecy Ñgyoozh, nunu bru'ña de mbecy saduceo. <sup>2</sup> Pcha' ic dey, gun blyuu Bed ni de mbecy nu Jesuuz byabañ mi. Nunu nde' cuic ñi nu gad lagy de mbecy nu gyabañ dela mbecy gut. <sup>3</sup> Orze' bdu' yaa dey Bed. Mne' dey yu nañ yu' gyiib. Orze' gal ze' byeeñ yu gal tuuba' dzi, gun bi gudze. <sup>4</sup> Ze' zigy mbecy nu güeñ de riidz nu mnii Bed, b icy cup dey consuel lo Jesuuz. Orze' byañ dey. Nu rnii tub gaay miily dey byac yu orze'.

### De mbecy zigy mnii nu dey Ñgyoozh

<sup>5</sup> Orze' tuuba' dzi byatublaazh zigy mbecy Zub lo ni de mbecy Israeel. Yu' de yu nu riib ic de mbecy Israeel. Yu' ga' de yu bel ni dey. Yu' de yu rlyuu leey ni mbecy Israeel. <sup>6</sup> Byatublaazh dey Jerusaleeng nu Anás, yu nu riib ic de uz ni de mbecy Israeel, nu Caifás, nu Waa, nu Alejandro, nu de' zir de yu nu nac famil ni yu nu riib ic de uz ze'. <sup>7</sup> Orze' bzuu nez dey mbecy nu cha tee dey

Bed nu Waa. Orze' bzuu dey yu lat dey. Orze' na dey rab yuy:

—¿Lac g uc nu rac ricy der nii?, o ¿cyu briic rishbeey nu ni gyicy der? —na dey.

<sup>8</sup> Orze' Espiriit Yon ni Ñgyoozh riib ic za' lam nañ lardo Bed. Orze' nay rab yu dey:

—De ru, yu nu riib ic ledz na, gal nu de ru yu bel, <sup>9</sup> benu rgugyi' der par nu nac coz nap nu b icy de nu mbecy coj ze', nunu par nu gad lagy der lac mod byac yu, <sup>10</sup> orze' ya ric a nu gad lagy de ru gal nu dela mbecy Israael nu nu nac rishbeey ni Jesucrisht, biñ nu pcyiñ Nazaret, byac yu ii, nunu nde' nu zuy lat dela der ii na la. Laab mi ze' biñ nu pcaa der lo cruzzi. Tees Ñgyoozh b icy mi nu byabañ mi. <sup>11</sup> Jesuuz nam gal nu na tub gyita'. Ze' de ru nar gal na biryu. Gyita' ze' mne' der ñii, tees na byac ñi gyita' Zub lo zir. <sup>12</sup> Nu nac Jesucrisht zi'l gac ruu mbañ den, gun Ñgyoozh wansat mi ni tuba' la mbecy gyishlombecy ii lo den nu co mbañ de ub na —na Bed.

<sup>13</sup> Orze' de mbecy nu zu riiñ ze' tona' la za nu ic yu, ornu bzaac dey nu wachib la Bed nu Waa mniim, mas nac dey mbecy cualcyer la. A' yu' lo dey gyicy. Tees de mbecy nu zu riiñ ze' byu' lo dey yu nu nac yu mbecy nu gusa nu Jesuuz. <sup>14</sup> Tees wangaca' nii dey gun bzaac dey mbecy nu byac ze'. Zuy nu Bed nu Waa. <sup>15</sup> Orze' bzuu nez dey Bed nu Waa nu ruu dey lat de mbecy ze'. Orze' brugyi' ro nu dey losa'y riidz. <sup>16</sup> Orze' na dey:

—¿Lac gyicy tun dey? Dela mbecy nu yu' Jerusaleeng gad lagy dey nu b icy dey nusuriidz ze' nunu wac niin nu walab ni. <sup>17</sup> Tees par nu cue' gad lagy zir mbecy de riidz nu rnii dey, rlag y ñi nu gyicy den mandaar lo dey nu bee na zi'l par lo rila cue' ga' nii dey nu nac Jesuuz —na dey.

<sup>18</sup> Orze' bredz dey Bed nu Waa. Orze' mnii dey lo dey nu rila cue' ga' nii dey, nunu cue' lyuu dey nu nac Jesuuz. <sup>19</sup> Orze' na Bed nu Waa rab yu dey:

—Gush der shcab ben ca na nu nap zir par lo Ñgyoozh: a nu zuub gyidag de ni de ru uti nu zuub gyidag de nim. <sup>20</sup> Gun wac checa de nu zat de de coz nu bzaaca, gal nu de riidz nu güeña —na dey.

<sup>21</sup> Orze' fert zir mnii dey lo Bed nu lo Waa nu cue' ni gyicy dey. Orze' blaa dey yu. Wangad la mod nu mbic dey cashtig ni dey, gun dela mbecy ryabic dey gyel mbecy ni Ñgyoozh par nu nac de coz nu bzaac dey, <sup>22</sup> gun mbecy nu byac nu mod ni nusuriidz ze', yu ze' bded cyuu ña'n yu'y.

<sup>23</sup> Cuanzir nu blaa dey Bed nu Waa, orze' bish cya ga' dey zay lo de losa'y. Orze' briic dey nu gad lagy de yu ze' de coz nu mnii de uz ni de mbecy Israeel, gal nu de yu bel ni dey. <sup>24</sup> Ornu güeñ dey nde', orze' mnii nu dey Ñgyoozh tublaazh la. Orze' na dey rab yum:

—Shuaan de, ru nac ru biñ nu psa' lagy baa nu gyishlombecy, nu nisyudoo, nu dela coz. <sup>25</sup> Ru mniir ornu Espiriit Yon nir pcaaam gyitoo bel ne de Dabi, yu nu b icy dela coz nu mniir, ornu mniiy:

—Lagu dzi guzi lagy de mbecy nu walab mbecy Israael?

¿Lagu b icy mod ton par nu gyicy yu gan Ñgyoozh?

<sup>26</sup> De rey nu de yu nu zu riiñ bi bzu lily dey nu chucooy nu Ñgyoozh.

Byatublaazh dey nu zay contr nim,  
nunu zay contr ni biñ nu bloo sum,  
na Dabi.

<sup>27</sup> Gun laab Herodes nu Poncio Pilato byatublaazh  
dey gyedz ii nuy de mbecy nu walab mbecy Israeel, gal  
nu de mbecy Israeel par nu cha dey contr ni Jesuuz. Je-  
suuz nac mi biñ Yon nu b icy yac dela coz nu ru mniir.  
Jesuuz nac mi Mesías, biñ nu ca lo cuen nu co mbañ  
mbecy. <sup>28</sup> Tees byatublaazh dey gun b icy yu dela coz  
nu bi bloo ic ru nu gac. Ru bloo ic ru nde', gun ru ricy  
cup ru mod nu ni gyicy ru, nunu nde' mod nu rlagu ru.  
<sup>29</sup> Orze' ru, Ñgyoozh, bdu' cuen ni nu rnii zi dey ne de,  
nunu doo baloor ne de par nu wadzib la de nee de ri-  
idz nu ruu lor. <sup>30</sup> Gun orze' gyicy ru nu gzac dela mbecy  
nu dzi coz ily gyicy ru. Ricy yac ru de mbecy rat, nunu  
ricy ru nusuriidz nu nac Jesuuz, biñ Yon nu b icy yac  
dela coz nu mniir —na dey rab yu Ñgyoozh.

<sup>31</sup> Ornu blazh mnii nu dey Ñgyoozh, orze' b icy mi nu  
briib duru lugaar ze' nu byatublaazh dey ze'. Orze' Es-  
piriit Yon nim gutib ic za' lam nañ lardoo tub ga la dey.  
Orze' brugyi' nu wachib la dey rniiy de riidz nu bruu lo  
Ñgyoozh.

<sup>32</sup> Dela de mbecy nu b icy cup consuel lo Crisht b icy  
dey tub zi'l shcab. Ni tub la mbecy wangyicy yu nu de  
coz niy, nde' coz par ub zi'l yu. Orze' dela coz nac ñii ni  
delay. <sup>33</sup> Nunu fert la bzat de aposht nu byabañ Crisht  
lo de mbecy. Nunu Ñgyoozh briic mi de gyel nap ni  
dela dey. <sup>34</sup> Sac ni tub mbecy lat dey nu ricy falt la coz  
niy. De yu nu mbish yu ni, biit yu yu niy. Ze' de yu nu  
zub yu', biit yu yu'y. Orze' gua nu dey tiñ nu guud niy.  
<sup>35</sup> Orze' bzeeñ dey ñi yaa de aposht. Orze' bleez dey de  
tiñ ze' ni de mbecy dub gal lac ga lagy tub ga dey.

<sup>36</sup> Ni mod b icy tub mbecy nu la See. Yu ze' nez Leví.  
Gul yu Chipre, tees de aposht bloo la dey yu Bernabee.  
Riidz ze' yaruuñ: Yu nu rbic consuel. <sup>37</sup> Mbish tub nac  
yu niy. Orze' biit yu yu ze' niy. Orze' gua zeeñ yu tiñ  
yaa de aposht.

### Cyi nu b icy Ananías nu Safira

**5** Ze' zu tub mbecy nu la Ananías. Mñaay lam Safi-  
ra. Orze' biit dey tub nac yu niy. <sup>2</sup> Pcaa chuy tub  
nac tiñ par ub yu. Orze' bzeeñ yu de' zir tiñ ze' yaa de  
aposht. Nunu gud lagy mñaay dela coz nu b icy yu.

<sup>3</sup> Orze' na Bed rab yuy:

—Ananías, walab se'ñ nu bzaan ru nu nuras gyicy yu  
nu guur Espiriit Yon ni Ñgyoozh ornu pcaa chur ñuu  
tiñ ni yu nir par ub ru. <sup>4</sup> Anzir nu cut ru yu ze', orze' nac  
ñii coz nir. Na ornu biit ru ñii, ni' zi'l tiñ nu guud nir ze'  
nac ñii coz nir. Orze' ¿lagu ni mnii toor nu bguur? Ru  
bguur Ñgyoozh. Walab mbecy bguur —na Bed.

<sup>5</sup> Orze' cuanzir nu güeñ Ananías de riidz ze', orze'  
wes saa lay lo yu, nunu gut lay. Orze' dela mbecy, ornu  
gud lagy dey nu gut yu, dela dey gudzib yu. <sup>6</sup> Orze'

wes su la be yu feñ. Orze' ptiish dey yu negy. Orze' za  
nu dey yu nu cach yuy.

<sup>7</sup> Na ornu bi bi bded nu bza' chon or, orze' bru'ña  
mñaay tees wangad lagy mi la guc. <sup>8</sup> Orze' na Bed rab  
yum:

—Mnii ben ¿a rishli a nde' dela tiñ nu guud ornu biit  
der yu nir? —nay.

Orze' nam:

—Laab nde' dela tiñ nu guud —nam.

<sup>9</sup> Orze' na Bed rab yum:

—¿Lagu b icy der preb Espiriit Yon ni Ñgyoozh nu  
ñgyeer? Bzuub gyidag rzigy gyi' de yu nu yeed nu gua  
cach ñgyeer. Bi yeed dey ro' ii, nunu ni' zi'l cha nu dey  
ru —nay.

<sup>10</sup> Orze' lieg la wes saa ga' lam garee la lo Bed. Orze'  
gut lam. Orze' bru'ña de yu feñ ze'. Bzaac dey nu  
mbish mi gut mi. Orze' za nu' la dey mi. Pcatch dey mi  
laab cuit ñgyeem. <sup>11</sup> Orze' dela de mbecy ni Crisht nu  
de' zir de mbecy, ornu güeñ dey nu ni guc, orze' tona'  
la gudzib dey.

### Nusuriidz ni de aposht

<sup>12</sup> Na orze' de aposht b icy dey zañ nusuriidz, nunu bi-  
cy dey zañ coz nu za nu ic mbecy. Orze' dela mbecy nu  
ricy cup consuel lo Crisht byatublaazh dey tub lugaar  
nu la Coredoor ni Salomoong. <sup>13</sup> Ni tub la de mbecy nu  
a' ricy cup consuel lo Crisht walagy yu chu'y lat dey,  
tees dela mbecy gyedz mnii nap yu ni dey. <sup>14</sup> Orze' dzi  
zir ryañ de mbecy nu ricy cup consuel lo Ñgyoozh: tant  
yu gyeey nunu tant biñ mñaa. Orze' tona' la mbecy zi-  
gy byac. <sup>15</sup> Par nu nac de coz nu b icy de aposht, orze'  
nde' nu de mbecy gua nu dey de mbecy rat gyernez.  
Orze' brish dey yu lo nuun nu lo da', gun ornu ded Bed  
ben a wal mas ñuu sheñ yu de mbecy rat ze'. <sup>16</sup> Nunu  
tona' la bru'ña de mbecy zigy nu yu' de gyedz nu ri  
gaab ga Jerusaleeng. Gua nu dey de mbecy rat, nunu  
gua nu dey de mbecy nu b icy ni nuras. Nunu dela dey  
byac yu.

### De aposht rzac zi

<sup>17</sup> Orze' gusaap lagy yu nu riib ic de uz ni mbecy Is-  
rael, gal nu de yu nu nac nuy, de yu nu nac nu leey ni  
de mbecy saduceo. Orze' b icy dey tub zi'l riidz nu shiñ  
gyicy nu dey de aposht. <sup>18</sup> Orze' pshet yaa dey de  
aposht. Gua nu dey yu yu' gyiib. <sup>19</sup> Tees laab rel ze'  
bru'ña tub anc ni Ñgyoozh. Orze' pshaal yu ro' ni yu'  
gyiib ze'. Orze' blooy dey par ich yu'. Orze' nay rab yu  
dey:

<sup>20</sup> —Gua der ze' nu driib zily de mbecy Ñgyoozh.  
Orze' shaal der lo de mbecy de riidz nu rnii lac mod  
gyicy de mbecy ni Crisht —nay.

<sup>21</sup> Orze' de aposht b icy yac dey gal nu mnii anc ze'.  
Or bza' yu tuuba' dzi, orze' gua dey ze' nu Zub yu' nu  
driib zily de mbecy Ñgyoozh. Orze' brugyi' rlyuu dey ni  
de mbecy.

Na yu nu riib ic de uz nu de' zir losa'y bredz dey de  
yu bel nu zu riiñ ni junt Zub lo nu gyatublaazh dey.

Orze' bzeed dey rasoo lo de yu nu rña ro' gyiib ze' nu coy de aposht nu cha nuy yu lo dey. <sup>22</sup> Tees ornu bru'ña de yu nu za nu rasoo ro' gyiib, orze' wangyada' de aposht ni dey. Orze' bish cya ga' dey yay lo de mbecy nu yu' junt ze'. Orze' nay rab yu dey:

<sup>23</sup> —Ornu bru'ña dę ro' gyiib, orze' noow nicy lañ. Nunu yu' de yu nu rña ro' ze'. Tees ornu pshaal dę ro', orze' bzaac dę nu saca' ni tuba' la mbecy ze' nañ ñi —na dey.

<sup>24</sup> Na ornu güeñ yu nu riib ic de yu nu rña yu' ze', nunu ornu güeñ de uz zub lo, orze' brugyi' rash dey shcab nu la zi coz yad ñi nu gac par lo. <sup>25</sup> Gaze' nu bru'ña tub mbecy. Orze' nay rab yu dey:

—Güii der, de mbecy nu mne' der nañ yu' gyiib, yu'y loli' ni yu' nu driib zily den Ñgyoozh. Rlyuu dey ni de mbecy —nay.

<sup>26</sup> Orze' tub yu nu riib ic de mbecy nu rña yu' nu driib zily mbecy Ñgyoozh nu de yu nu rña yu' ze' gua tee dey de aposht. Gua nu dey yu lo de yu nu zu riiñ ni junt ze'. Tees walab por fers la gua nu dey yu, gun rdzib dey lo de mbecy zigy nis shet dey gyita' too dey.

<sup>27</sup> Orze' bicy dey nu gu' de aposht nañ yu' ze'. Bzu dey yu par ze' nu ta' lo de mbecy nu yu' junt ze'. Orze' yu nu riib ic de uz nay rab yu de aposht:

<sup>28</sup> —Dę ya fert pcaq dę der nu cue' lyuu der ni de mbecy nu nac mbecy ze', tees jna güii la bicy der! De ru ptush las der riidz, nunu rlyuu der dutuub la Jerusaleeng. Nunu de ru rlagy ru gyicy ru nu dę ya yu' falt ne' nu gut yu —na dey.

<sup>29</sup> Orze' na Bed nu de' zir de aposht:

—Rlagy ñi nu zuub gyidag dę ni Ñgyoozh walab ni mbecy. <sup>30</sup> Ñgyoozh, biñ nu briib zily de gyitoo bel ni den, bicy mi nu byabañ Jesuuz, biñ nu biit der ornu pcaa der mi lo cruu. <sup>31</sup> Orze' Ñgyoozh bicy zily mi mi ze'. Gusub mi par yaa bee Ñgyoozh. Byac mi biñ nu riib ic, nunu biñ nu rboo mbañ de mbecy, gun orze' gad mod nu ne' de mbecy Israel de coz cyi nu ricy yu. Nunu gyicy sulagy Ñgyoozh de cyi nu ricy dey. <sup>32</sup> Dę ya rnęe de coz nu bzaac dę lo de mbecy. Ni ricy dę nu nac Espiriit Yon ni Ñgyoozh, biñ nu briic Ñgyoozh ni de yu nu rzuub gyidag nim —na dey.

<sup>33</sup> Na ornu güeñ de yu nu yu' junt ze' de riidz nu mnii de aposht, orze' tona' la guzi lagy dey. Orze' ngulagy dey ñgyut yu de aposht. <sup>34</sup> Tees lat de mbecy ze' ri tub yu nu la Gamaliel. Guc yu mbecy fariseo. Guc yu tub mbecy nu rlyuu leey ni Ñgyoozh. Nunu dela mbecy pca lagy dey loy. Orze' yu ze' wes suy lat de mbecy nu yu' junt ze'. Orze' pcaay de mbecy nu co chu dey de aposht tub miiñ. <sup>35</sup> Orze' nay rab yu de mbecy nu yu' junt ze':

—De ru mbecy Israel, cuidad der nu nac coz nu rlagy ru gyicy nur de mbecy ii. <sup>36</sup> Rad lagy der nu bi rac tiem bruu zac Teudas. Mniy nu nac yu tub mbecy lily. Nunu tub tap gaynal mbecy gusa nu dey yu. Tees biit mbecy yu, nunu brush las de yu nu gusa nuy. Orze' guca de coz nu bicy yu. <sup>37</sup> Orze' despuees bruu zaca' Judas, yu nu gul Galilea. Tiem ze' bruu ña'n de mbecy. Ni' yu ze' gusa nu mbecy yu. Tees biita' mbecy yu,

nunu brush lasa' de yu nu gusa nuy. <sup>38</sup> Orze' ni' zil' rac na. Orze' ya rdoo rishlo der nu cue' shiñ gyicy nu der de yu ii. Blaa der dey, gun benu coz nu rboo ic ub zil' dey o benu coz nu ricy dey, nde' coz ni mbecy zil', orze' nit loñ. <sup>39</sup> Tees benu nde' coz nu bruu lo Ñgyoozh, orze' rila wac nit lo der ñii. Cuidad der nis cha der contr ni Ñgyoozh —nay.

Orze' de mbecy nu yu' junt ze' bicy yac dey nu consef ni Gamaliel. <sup>40</sup> Orze' bredz dey de aposht. Gaze' nu bgaaz dey yu. Gaze' nu pcaa dey yu nu rila cue' ga' nii dey nu nac Jesuuz. Gaze' nu blaa dey yu. <sup>41</sup> Orze' bruu de aposht lo de mbecy nu gu' junt ze'. Orze' tona' la bet lagy dey, gun Ñgyoozh bicy mi nu byap dey nu gzac ziy, nunu byap dey nu bruu gyel mbecy ni dey nu nac Jesuuz. <sup>42</sup> Nunu de dzi la zaab rlyuu la dey ni de mbecy ze' nu zub yu' nu driib zily de mbecy Ñgyoozh, gal nu nañ yu' ni mbecy, nunu zaab rshaal la dey lo de mbecy de riidz nu sac ni Jesuuz, biñ nu ca lo cuen nu co mbañ mbecy.

#### De mbecy ni Crisht bloo su dey yu nu locyuub de aposht

**6** Laab tiem ze', ornu bi ryañ zir de mbecy nu ricy cup consuel lo Crisht, orze' de mbecy Israel nu rnii griego nu de mbecy Israel nu rnii hebreo, riidz guledz, bdza' dey ni losa'y. De mbecy nu rnii griego mnii dey nu wagyicy paa mbecy ornu rgyeez dey de coz nu gow byud nu yu' lat dey. <sup>2</sup> Orze' trocyup de aposht ze' bredz dey de mbecy nu ricy cup consuel lo Crisht. Orze' na dey rab yu dey:

—Walab se'ñ nu checa dę nu neę de riidz ni Ñgyoozh par nu lyuu dę ni der nu lac mod gyicy nu der de coz nu gow de mbecy. <sup>3</sup> Orze' de ru bicy na, laab lat der bloo su gag yu gyeey, de yu nu rca lagy der lo. Rlagy ñi mbecy nu riib ic za' la Espiriit Yon ni Ñgyoozh nañ lardo, nunu rlagy ñi mbecy nu yu' shcab ni. Orze' dę ya dę' de riiñ ze' yaa dey. <sup>4</sup> Ze' dę ya, dub laa tiem neę dę' de Ñgyoozh, nunu shaal dę de riidz nim —na dey.

<sup>5</sup> Orze' dela mbecy bet lagy dey riidz nu mnii de aposht ze'. Orze' bloo su dey Shteb, tub mbecy nu tona' la fert ricy cup consuel lo Crisht. Nunu riib ic za' la Espiriit Yon ni Ñgyoozh nañ lardooy. Gush lañ: Lip, nu Proc, nu Nicanor, nu Timón, nu Parmenas, nu Lyaa, tub mbecy nu gul Antioquía. De uz yu walab mbecy Israel, tees ub yu gush yu leey ni mbecy Israel. Dela yu ze' bloo su dey. <sup>6</sup> Orze' de mbecy gua nu dey yu lo de aposht. Orze' de aposht briib yaay too tub ga dey, nunu mnii nu dey Ñgyoozh nu nac dey.

<sup>7</sup> Orze' zaab drush las la de riidz ni Ñgyoozh. Orze' tona' la byañ de mbecy nu ricy cup consuel lo Crisht Jerusaleeng. Gashtal zigy de uz ni de mbecy Israel bicy cup dey consuel lo Crisht.

#### Bdu' yaa mbecy Shteb

<sup>8</sup> Orze' yu nu la Shteb ze', tona' la nap bicy nu Ñgyoozh yu nunu dzi rcyiñ yu nu gyicy yu coz nu rlagy mi. Bicy yu zañ nusuriidz, nunu zañ coz nu za nu ic mbecy

bicy Yu. <sup>9</sup> Tees Yu' la be mbecy nu gua contr niy. Yu' mbecy nu bruu lat de mbecy nu rza nañ Yu' nu rsya' de mbecy riidz ni Ñgyoozh, Yu' nu la Yu' ni De Mbecy nu Bdulaa Yaa. Yu' mbecy nu bruu Cirene, Yu' mbecy nu bruu Alejandría, Yu' mbecy Cilicia. Yu' ga' mbecy nu bruu lo de Yu nu la Asia. Orze' brugyi' ro zi dey riidz nu Shteb. <sup>10</sup> Tees Espiriit Yon ni Ñgyoozh pshaal mi shcab ni Shteb. Par nu tona' la nap mniiy, wangaca' la nii de mbecy nu radzay. <sup>11</sup> Orze' briish dey ni mbecy par nu riib Yu cyi fals ic Shteb. Orze' na de mbecy ze':

—De ya güeñä nu Shteb rniiy riidz nu za contr ni Moisees, nu riidz nu za contr ni Ñgyoozh —na dey.

<sup>12</sup> Ni mod pcha' dey ic de mbecy. Pcha' dey ic de Yu bel, nunu pcha' dey ic de Yu nu rlyuu leey ni Ñgyoozh. Orze' gua dey lo Shteb pshet yaa dey Yu. Gua nu dey Yu lo de Yu nu Yu' junt zub lo ze'. <sup>13</sup> Gaze' nu gua nu dey la be de mbecy nu briib cyi fals ic Shteb. Orze' na dey:

—Mbecy ii zaab rnii lay riidz nu za contr ni Yu' yon nu driib zily den Ñgyoozh, nunu rniiy riidz nu za contr ni leey nu bzeeñ Moisees. <sup>14</sup> Gun güeñ de nu mniiy nu Jesusuz, tub mbecy nu pcyiiñ Nazaret, tily Yu yu' yon ni Ñgyoozh nin, nunu rchaay de cushtom nu bzeeñ Moisees ni de gyitoo bel —na dey.

<sup>15</sup> Orze' dela mbecy nu nguaa lat junt ze' bgüii dey lo Shteb. Orze' bzaac dey nu rgüii gal nu rgüii tub anc.

**7** Yu nu riib ic de uz ni de mbecy Israeel nay rab Yu Shteb:

—¿A laab rishli? —nay.

<sup>2</sup> Orze' na Shteb rab Yu de mbecy zigy:

—De ru bicky gal nu de ru uzä bzuub gyidag der ne. Ñgyoozh, biñ nu zily zir nac, bruu zac mi lo gyitoo bel nin Abraham, lat nu pcyiiñ Yu Mesopotamia, anzir nu chay cyiiñ Yu Harán. <sup>3</sup> Orze' nam rab mi yu: "Bzeeñ famil nir, nunu bzeeñ ledz ru. Gua lo Yu nu ya lyuu lor", nam. <sup>4</sup> Orze' bruu Abraham lo de Yu ni Caldea. Zay ciyiñ Yu Harán. Na ornu gut uz Yu, orze' Ñgyoozh bicky mi nu yad Yu de lugaar ii ciyiñ Yu. Ledz na ii pcyiiñ Yu.

<sup>5</sup> Tees Ñgyoozh wancuic mi ni tub lugaar ganiy. Ni ñuu miiñ Yu wancuic mi niy. Tees mniim nu segur la cuic mi de lugaar ii ganiy. Mniim nu segur la nu de lugaar ii gac niy, nunu gac ni de nez Yu par lo, mas tiem ze' sac i'ñ Yu. <sup>6</sup> Nii coz nu mnii Ñgyoozh lo Abraham: "De nez ru rcyiiñ Yu tub lugaar nu walab ledz Yu. Gac Yu moz ni mbecy por fers la. De mbecy lugaar ze' tona' la shiñ gyicy nu dey Yu lat tap gaynal na'ñ. <sup>7</sup> Tees ya ricä cashtig ni de Yu nu shiñ gyicy ze'. Gaze' nu gruu de nez ru lugaar ze', nunu ca dey ya ii", nam. <sup>8</sup> Orze' Ñgyoozh bicky mi tub trat nu Abraham, nunu mniim nu rlagy ñi ca beey nu la circunsision cuerpa ni de Yu gyeey par nu gabe nu nac nuy trat ze'. Orze' gaze' nu gul Isaac, i'ñ Yu. Ornu bza' shuñ dzi nu gul Isaac, orze' pcaay beey circunsision cuerpa niy. Orze' despuees Isaac pcaay beey circunsision cuerpa ni i'ñ Yu Jacob. Jacob pcaay beey circunsision cuerpa ni trocyup i'ñ Yu: laab lo de Yu ze' guch trocyup nac nez de mbecy Israael.

<sup>9</sup> Tees de i'ñ Yu bicky saap lagy dey ich bicky Yu See. Orze' biit dey Yu. Orze' mbecy wii dey Yu. Byac Yu moz por fers la ni tub mbecy Egipto. Tees Ñgyoozh gusa num Yu. <sup>10</sup> Nunu Ñgyoozh bloo nap mi Yu lat dela gyel deet nu bzac Yu. Ornu bru'ñay lo Faraón, Yu nu riib ic Egipto, orze' Ñgyoozh bicky mi nu gud lagy Faraón nu nap Yu, nunu Yu' shcab niy. Orze' Faraón bdu'ñ yaañ yaay nu gyub ic Yu lo dela Yu ni Egipto, nunu gyub ic Yu nañ Yu' y.

<sup>11</sup> Na biid cubiñ lo dela de Yu ni Egipto nu lo de Yu ni Canaán. Tona' la bzac zi mbecy nu nac cubiñ ze'. Wangad coz nu gow de gyitoo bel ni den. <sup>12</sup> Ornu Jacob güeñ Yu nu Yu' trig Egipto, bzuu nez Yu de i'ñ Yu, de Yu nu nac gyitoo bel ni den, nu cha dey ze'. Nde' byaj loga la nu gya dey. <sup>13</sup> Byaj cyup See mniiy lo de bicky Yu cyu nac Yu. Orze' gud lagy Faraón cyu nez nac See. <sup>14</sup> Orze' See bzeed Yu rasoo lo uz Yu, nunu lo dela famil niy. Mniiy nu cha dey gashtal Egipto. Chon gal ruub gaay dey nac Yu. <sup>15</sup> Orze' Jacob guay Egipto. Ze' gut Yu nu dela too bel ni den. <sup>16</sup> Orze' despuees gua nu dey cuerpa ni See, gal nu cuerpa ni Jacob par Siquem. Pcaay dey ñi nañ tub gyeeg ni blyuu nu wii Abraham par la be pezh lo de nez Hamor.

<sup>17</sup> Na or bi pshuub dzi nu gyicy yac Ñgyoozh ni de riidz nu mniim lo Abraham, orze' tona' la byañ de nez na Egipto. <sup>18</sup> Orze' reña' mbecy gutib ic Yu Egipto. Yu ze' wanchu' loy See. <sup>19</sup> Bguuy de nez den. Shiñ bicky nuy dey. Pcaay de nez den por fers la nu ne' dey de mdoo gyeey nu sa gul ni dey, gun orze' gat Yu. <sup>20</sup> Orze' tiem ze' gul Moisees. Tona' la bet lagy Ñgyoozh Yu. Nañ chon beey bguul dey Yu yu' uz Yu. <sup>21</sup> Ornu bloo chu dey Yu, orze' byash i'ñ Faraón Yu. Bicy i'ñ ñiy. Bguul ñiy gal i'ñ lañ. <sup>22</sup> Orze' de mbecy blyuu dey ni Moisees dela shcab lily ni de mbecy Egipto. Orze' Moisees byac Yu tub mbecy nu tona' la lily na. Coz ily bicky Yu, nunu coz ily mniiy.

<sup>23</sup> Na ornu Moisees Yu' tub ña'n cyuu, orze' mnii tooy nu cha güiyy la ricy de losa'y, de mbecy Israael.

<sup>24</sup> Orze' bzaac Yu nu shiñ ricy tub mbecy Egipto nu tub losa'y. Orze' pcay Yu. Orze' bicky gal gay nu mbecy Egipto ze'. Orze' biit yuy. <sup>25</sup> Psa' lagy Yu nu de losa'y ñyet lag dey cuen nu Ñgyoozh gyicy mi nu laab Yu co nap Yu de losa'y yaa de mbecy Egipto. Tees wangyet lag dey cuen. <sup>26</sup> Na tuuba' dzi bzaac Yu nu rucoo tub mbecy Israael laab nu losa'y. Bicy peey nu ñgyicy Yu nu ganap lagy dey lo losa'y. Orze' nay rab Yu dey: "¡Bzub gyidag der! De ru bicky ru losa'r. ¿Lagu shiñ ricy nur losa'r?" nay. <sup>27</sup> Orze' Yu nu shiñ ricy nu losa' ze' bzuub yaay Moisees par cuit Yu. Orze' nay rab yuy: "Se cyu la briib riiñ ic ru nu gyub ic ru de ya, nunu par nu gri beer ne de. <sup>28</sup> Ze' na, ¿a cuta'r ya gal nu biit ru mbecy Egipto ze' naag?" nay.

<sup>29</sup> Na ornu güeñ Moisees nde' na, orze' bruu chuy Egipto. Orze' gua yat Yu. Guay pcyiiñ Yu lo de Yu nu la Madián. Ze' pchelaay. Orze' gul cyup i'ñ gyeey Yu. <sup>30</sup> Na ornu bza' cyuu ña'n, orze' bruu zac tub anc loy lat lyush gyi nu rcañ tub yag tub lugaar ub zi gaab ga bicky Sinaí. <sup>31</sup> Tona' la za nu ic Yu par nu nac coz nu bzaac Yu.

Orze' byagaab yu lo yag ze' par nu zac nap zir yuñ. Orze' güeñ yu nu rnii Ñgyoozh.<sup>32</sup> Orze' nam: "Yä naca Ñgyoozh ni de gyitoo bel nir: Ñgyoozh ni Abraham, Ñgyoozh ni Isaac, Ñgyoozh ni Jacob", nam. Orze' gush bis yu nu gudzib yu nu nac de coz nu bzaac yu. Orze' wancuica'y baloor nu ngüiiy lo yag ze'.<sup>33</sup> Orze' na Ñgyoozh rab mi yu: "Bloo gyid lab ru, gun ze' nu zur ze', ze' lugaar yon.<sup>34</sup> Yä rzaca nu dzi rzac zi de mbecy ne Egipto, nunu reña nu rzuub ti' dey. Nde' nu ya bi beta na, par nu gloo mbañä dey. Da, gun ya zuu neza ru gyar par Egipto", na Ñgyoozh rab mi Moisees.

<sup>35</sup> 'Moisees, bdiily lo de mbecy Israeel loy. Mnii dey: "Se cyu la b icy nu ru gyub ic ru de ya, nunu ri beer ne de", mnii dey. Ze' Moisees Ñgyoozh bzuu nez mi yu nu gyub ic yu dey, nunu par nu co nap yu dey. Ni b icy mi nu nac anc nu bruu zac lat yag nu pca gyi ze'.<sup>36</sup> Orze' laab Moisees gua nuy de mbecy ornu bruu dey Egipto. Bicy yu nusuriidz, nunu b icy yu coz nu za nu ic mbecy. Bicy yu de nde' Egipto, gal nu ru' nisyudoo ña, gal nu de lugaar ub zi de nez nu gusa dey cyuu ña'n.<sup>37</sup> Laab Moisees mniiy gug yu de mbecy Israeel: "Ñgyoozh gzuu nez mi tub mbecy nu nii por cuen nim gal nu bzuu nez mi ya. Mbecy ze' gruuuy lat nez de ru", na Moisees.<sup>38</sup> Moisees, yu ze' yu nu gusa lat de mbecy zigy, de mbecy Israeel, lugaar ub zi. Gusa nuy de gyitoo bel ni den, nunu gusa nuy anc, yu nu mnii loy too b icy Sinaí. Laab yu gush yu riidz ni Ñgyoozh, riidz nu rnii lac mod cyiiñ den. Orze' bzeeñ yuñ par de ub na.

<sup>39</sup> De gyitoo bel bdiily lo dey loy. Wansuub gyidag dey niy. Bzu chu dey yu, nunu b icy pee dey mbish cya ga'y par Egipto.<sup>40</sup> Nde' nu na dey rab yu Aroong: "Bzaa la be ñgyoozh nu cha gam par lo den, gun wagad lagy den la bzac Moisees, yu nu bloo de ub na Egipto", na dey.<sup>41</sup> Gaze' nu bzaa dey tub nab mod nu na tub biser. Orze' biit dey bañcyug. Pshu dey reñ ma looñ. Tona' la bet lagy dey coz nu bzaa dey nu yaay.<sup>42</sup> Orze' Ñgyoozh bruum lat dey. Nunu bzaan mi nu gyicy ñgyoozh dey de bel baa. Nde' coz nu bi ca lo libr ni de mbecy nu mnii por cuen ni Ñgyoozh. Orze' rniiñ:

Ñgyoozh nam:

De ru mbecy Israeel, walab lo ya biit der bañcyug nu pshur reñ lat cyuu ña'n nu gusa der de lugaar ub zi.

<sup>43</sup> Sinu biit der bañcyug nañ yu' ni ñgyoozh nu la Moloc,

tub ñgyoozh nu gusa nu der tiem ze'.

Nunu biit der bañcyug lo nab bel baa, tub ñgyoozh ni der nu la Refán.

De nde' nab nu bzaa der.

Bicy der ñii par ñgyoozh ni der.

Orze' ya zuu neza der gal lugaar nu zeta' zir par Babilonia,

nam, ni pcaa de mbecy nu mnii por cuen nim.

<sup>44</sup> De gyitoo bel ni den b icy cup dey tub yu' negy ze' nu pca dey Ñgyoozh lat nu gusa dey de lugaar ub zi. Yu' ze' byaañ mod nu mnii Ñgyoozh lo Moisees. Mod nu bzaac yu, ni mod bzaa dey ñi.<sup>45</sup> Ornu gusa nu dey Josué, orze' za nu dey yu' negy ze' lugaar ze' nu bloo

dey yu yaa reña' mbecy, de mbecy nu bloo chu Ñgyoozh. Orze' lo de yu ze' byeeñ yu' negy ze' gal pshuub la tiem ni Dabi.<sup>46</sup> Dabi b icy mod nu nap b icy nu Ñgyoozh yu. Orze' bdiiñ yu rishbeey lo Ñgyoozh nu zay tub yu' par ub mi, laab biñ nu briib zily Jacob.<sup>47</sup> Tees Salomoong, yu ze' bzaay yu' ze' ni Ñgyoozh.<sup>48</sup> Tees mi ze', biñ nu zily zir nac wac cyiiñ mi nañ yu' nu rzaa mbecy. Nde' nu ni mnii de yu nu mnii por cuen nim ornu nay:

<sup>49</sup> Ñgyoozh nam:

"Gyibaa, ze' nañ gal nu na tub yashily nu zuba riib ica dela coz.

Ze' gyishlombecy ii nañ gal nu na tub coz nu zub g yi'.

¿La na yu' nu zaa der ne?

¿Ca zu tub lugaar nu zu lagya?

<sup>50</sup> ¿A walab ya bzaa dela coz ii?"

mniim, na de yu nu mnii por cuen nim.

<sup>51</sup> ¡Dzi ga cyigy too der! ¡Lardoo der nañ gal nu na lardoo tub mbecy nu a' yu' lo Ñgyoozh! Na der gal nu na tub mbecy go' par lo de riidz ni Ñgyoozh. De ru nar gal na' zil de gyitoo bel nir. Dub laa tiem ricy der coz nu za contr ni Espiriit Yon ni Ñgyoozh.<sup>52</sup> Sac ni tub mbecy nu mnii por cuen ni Ñgyoozh nu wansheed zi de gyitoo bel ni der. Tees biit dey dela mbecy nu mnii nu cyid biñ Yon, biñ nu ricy yac dela coz nu rnii Ñgyoozh. Orze' na de ru bish cya der ich biñ yon ze', nunu biit der mi.<sup>53</sup> Laab de ru mbecy nu byeeñ leey ni Ñgyoozh yaa, leey nu bzeeñ de anc, tees wagyicy yac der niñ —na Shteb.

### Biit dey Shteb

<sup>54</sup> Ornu de mbecy nu yu' junt ze' güeñ dey de riidz nu mnii Shteb, orze' tonal' la guzi lagy dey, nunu psiig lay dey loy.<sup>55</sup> Tees Espiriit Yon ni Ñgyoozh briib ic za' lam nañ lardoo Shteb. Orze' bgüiiy par gyibaa, nunu bzaac yu gyel lily ni Ñgyoozh, nunu bzaac yu Jesuuz zum par yaa bee Ñgyoozh.<sup>56</sup> Orze' nay:

—Güii der! Ya rzaca ryaal baa, nunu biñ nu byac mbecy zum par yaa bee Ñgyoozh —nay.

<sup>57</sup> Orze' de mbecy psoow dey gyidag yu, nunu brish ti dey. Orze' bgo la dey too Shteb.<sup>58</sup> Orze' bruu nu dey yu lat gyedz. Orze' bgoow gyita' dey yu par nu gat yu. De mbecy nu mnii nu bzaac nu shiñ b icy Shteb ze' bzeeñ dey shab yu nu ña tub yu feñ nu la Saulo.

<sup>59</sup> Orze' de mbecy fert la yu' dey rgoow gyita' y Shteb lat nu rnii nuy Ñgyoozh. Orze' nay:

—Jesuuz, Shuaana, byash espiiriit ne —nay.

<sup>60</sup> Orze' gusu tib yu. Gaze' nu ye la mniy. Orze' nay:

—Shuaana, cue' cuic ru cashtig ni dey nu nac coz nu ricy yu —nay.

Na ornu mniy nde', orze' gut lay.

### Bded zi mbecy ni Crisht

**8** Nunu Saulo bet lagy yu nu biit dey Shteb.

Laab dici ze' de mbecy nu ricy cup consuel lo Crisht Jerusaleeng brugyi' nu tonal' la rzac zi dey. Orze' dela dey brush las yu par dela lugaar ni Judea nu dela

lugaar ni Samaria. Nomaas de aposht zi'l wancyuu dey Jerusaleeng. <sup>2</sup> Tees la be mbecy nu ton'a' la rca lagy lo Ñgyoozh, de yu ze' pcach dey Shteb, nunu ton'a' la b icy dey sentiir. <sup>3</sup> Tees Saulo mbicy peey nu nit loy dela mbecy nu ricy cup consuel lo Crisht. Gaza' yu' gaza' yu' la rzu'y. Bgatu tuñ lay mñaa gyeey la de yu nu ricy cup consuel lo Crisht par nu cha nuy dey nañ yu' gyiib.

### Pshaal dey riidz ni Ñgyoozh Samaria

<sup>4</sup> Na de mbecy nu ricy cup consuel lo Crisht brush las dey zay dela lugaar. Za shaal dey riidz ni Crisht. <sup>5</sup> Orze' Lip guay gyedz nu la Samaria. Lo de mbecy ze' pshaal yu riidz ni Crisht. <sup>6</sup> De mbecy zigy dzi nap b icy cuen dey de riidz nu mnii Lip. Bzuub gyidag dey riidz nu mniiy, nunu bzaac dey de nusuriidz nu b icy yu. <sup>7</sup> Nunu zigy mbecy nu b icy ni nuras byac yu. De nuras ton'a' la rbish tiy. Orze' bruu chuy lo dey. Zañ mbecy chi, gal nu zañ mbecy coj byac yu. <sup>8</sup> Nunu de mbecy Samaria ton'a' la guciyit lagy dey.

<sup>9</sup> Na laab gyedz ze' rcyiñ tub mbecy nu la Simqo. Bi rac tiem rguuy de mbecy Samaria nu fis gyel tu' niy. Mniiy nu ton'a' la mbecy lily nac yu. <sup>10</sup> Dela mbecy nu yu' gyedz ze' dzi nap b icy cuen dey de riidz nu rniiy gush lañ de yu shni gashtal de yu lily. Mnii dey:

—Simqo nac yu biñ ni Ñgyoozh nu dzi cyiñ nu gyicy coz ily —rnii dey.

<sup>11</sup> Tona' la b icy cuen de mbecy yu gun dzi gulas rguuy dey nu fis gyel tu' niy. <sup>12</sup> Tees ornu b icy cup de mbecy consuel lo de riidz nap ni gyel gubier ni Ñgyoozh nunu de riidz nap ni Jesucrisht, de riidz nu mnii Lip, orze' bzu nis dey. Bzu nis de yu gyeey nunu bzu nisa' de biñ mñaa. <sup>13</sup> Ni' Simqo b icy cup yu consuel lo Crisht. Ornu bzu nis yu, orze' gua cay ich Lip dela lugaar ze' nu zay, nunu ton'a' la gua nu ic yu ornu bzaac yu nu ricy Lip nusuriidz, gal nu de' zir de coz ily.

<sup>14</sup> Na de aposht nu yu' Jerusaleeng güeñ dey nu de mbecy Samaria gush dey de riidz ni Ñgyoozh. Orze' bzuu nez dey Bed nu Waa nu chay lo dey. <sup>15</sup> Na ornu bru'ña dey, mnii nu dey Ñgyoozh nu nac de mbecy nu ricy cup consuel lo Crisht. Bdiiñ dey lo Ñgyoozh nu cuic mi Espiriit Yon nim ni dey, <sup>16</sup> gun Espiriit Yon ni Ñgyoozh nigul gyicy nim ni tub la dey. Nomaas nu bi bzu nis zi'l dey par nu gabe nu nac yu mbecy ni Crisht.

<sup>17</sup> Orze' Bed nu Waa gul yaa dey de mbecy ze', nunu Ñgyoozh briic mi Espiriit Yon nim ni dey.

<sup>18</sup> Na Simqo bzaac yu nu Ñgyoozh briic mi Espiriit Yon nim ni de mbecy ornu gul yaa de aposht dey. Orze' mniy nu cuic yu tiñ ni Bed nu ni Waa. <sup>19</sup> Orze' nay:

—Gyicy ru nu gac gyicy ya nde', gun orze' cyu zi'l mbecy nu gal yaa Ñgyoozh cuic mi Espiriit Yon nim niy —nay.

<sup>20</sup> Orze' na Bed rab yu Simqo:

—¡Ru nu dela tiñ nir gyar gabily! Gun ru rnii toor nu gac zir coz nu cuic Ñgyoozh. <sup>21</sup> Riiñ nu ricy de ya nii rila wac gyicy ru ñii, gun a' nap lardoor par lo Ñgyoozh.

<sup>22</sup> Orze' mne' coz a' nap nu rlagy ru gyicy ru ze' nunu bdiiñ lo Ñgyoozh ben a gyicy sulagy mi nir par nu nac

coz nu psa' lagy ru nañ lardoor. <sup>23</sup> Gun ya rad lagya nu ru dza laa nañ lardoor yu' coz lya nunu coz cyi riib ic ñi ru —nay.

<sup>24</sup> Orze' na Simqo rab yu Bed nu Waa:

—Bdiiñ lo Ñgyoozh nñ nu cue' gzaca de coz nu mniir ze' —nay.

<sup>25</sup> Na ornu Bed nu Waa pshaal dey de coz nap nu b icy Jesuuz num dey, nunu mnii dey riidz ni Ñgyoozh, orze' bruu dey Samaria ya dey par Jerusaleeng. Lat nu ya dey, zañ tir pshaal dey de riidz nu sac nu bruu lo Ñgyoozh de gyedz nu yu' lo yu ni Samaria.

<sup>26</sup> Orze' tub anc ni Ñgyoozh mniy lo Lip. Orze' nay:

—Bzu lily, nunu gua par yaa been ornu güiin ze' nu driib doo par ze' nu riib nez nu za par Gaza —nay.

Laab nez nu za ze' rded ñi tub lugaar ub zi. <sup>27</sup> Orze' Lip bzu lily yu. Orze' zay. Na laab nez nu zay ze' bdzeel yu tub mbecy Etiopía. Yu ze' nac yu mbecy capoo. Tona' la riiñ ily zuy. Nac yu tesorer ni biñ mñaa nu nac rey ni de mbecy Etiopía. Yu ze' guay Jerusaleeng par nu riib zily yu Ñgyoozh, tees <sup>28</sup> bi bish cyay yay par ledz yu. Zub yu nañ caret niy rsya'y libr ni Isaías, tub yu nu mnii por cuen ni Ñgyoozh.

<sup>29</sup> Orze' na Espiriit Yon ni Ñgyoozh rab mi Lip:

—Becha' lo caret re, nunu cue' gyazet ru looñ —nam.

<sup>30</sup> Orze' ornu becha' Lip lo caret ze', orze' güeñ yu nu rlab mbecy ze' riidz ni libr ni Isaías, yu nu mnii por cuen ni Ñgyoozh. Orze' nay rab yu mbecy ze':

—¿A yet lag ru cuen de riidz nu rlab ru? —nay.

<sup>31</sup> Orze' na mbecy ze' rab yu Lip:

—¿Lac gyicya gyet laga cuen, ze' sac cyu yu nu shaal lo? —nay.

Orze' mniy lo Lip nu chu'y nañ caret nu gzub nuy yu.

<sup>32</sup> Na ze' nu rlab yu lo riidz ni Ñgyoozh ze' rniiñ:

Mi ze' nam gal na tub shily nu za nu dey lo mbecy par nu cut yu ma.

Mi ze' nam gal nu tub shily nu wanii la ma ornu rshi'ñ mbecy gyich ma.

Ni tub riidz wannim.

<sup>33</sup> Mbecy b icy gyidz dey mi, nunu wangyicy dey gyel fushitz nuy mi.

Ni tub la mbecy wac zat dey nez mi,

gun bza' lo dey lo yum, rniiñ.

<sup>34</sup> Orze' mbecy nu zu riiñ ze' nay rab yu Lip:

—Mnii lo cyu mbecy rzat yu nu mnii por cuen ni Ñgyoozh lat nu pcaay riidz ii. ¿A laab ub yu rzat yu uti reña' mbecy? —nay.

<sup>35</sup> Orze' Lip brugyi' rniiy. Gush yu nu loga la ze' nu blab mbecy ze' lo libr ni Isaías. Orze' mniy dela riidz nap ni Crisht. <sup>36</sup> Na lat nu zaab za dey nez, bru'ña dey tub lugaar ze' nu yu' nis. Orze' na yu nu zu riiñ ze' rab yu Lip:

—Ii yu' nis. ¿A wac zu nisa? —nay.

<sup>37</sup> Orze' na Lip rab yuy:

—Gac zu nis ru, benu ru ricy cup ru consuel lo Crisht nu dutuub la lardoor —nay.

Orze' nay rab yu Lip:

—Yá zeña lagya nu Jesucrisht nac mi I'ñ Ñgyoozh —nay.

<sup>38</sup> Orze' yu nu zu riiñ ze' mnii nuy mbecy nu rsaa caret ze' nu chesuy. Na orze' bruuuy nañ caret za nuy Lip tublaazh la par lo nis. Orze' Lip briib nis yuy. <sup>39</sup> Na ornu bruuuy lo nis, orze' Espiriit Yon ni Ñgyoozh byash mi Lip za num yu. Mbecy nu zu riiñ ze' wansaaca'y Lip tuuba' tir, tees lat nu zaab zay nez, tona' la zu cyit lagyu. <sup>40</sup> Na Lip gud lagy yu nu zuy tub gyedz nu la Azoto. Orze' zay gaza' gyedz la pshaal yu de riidz nu sac nu bruu lo Ñgyoozh gashtal bru'ña lay tub gyedz nu la Cesarea.

### Saulo byac yu mbecy ni Crisht

**9** Laab tiem ze' Saulo gabee mniiy nu cut yu de mbecy nu ricy cup consuel lo Shuaan den. Orze' guay lo mbecy nu riib ic de uz. <sup>2</sup> Lo yu ze' blooy tub gyicy ni rishbeey nu cha nuy lo de mbecy nu rza nañ yu' nu rsya' mbecy Israeel riidz ni Ñgyoozh, de yu nu yu' Damasco. Orze' nu gyicy ze' ricy cup yu rishbeey nu gya nuy de yu nu gush nez cub ni Crisht par Jerusaleeng. Tant yu gyeey nunu tant biñ mñaa gya nuy.

<sup>3</sup> Na nez nu zay, ornu birgaab Damasco, orze' sij la bet tub yaa. Bruuñ gashtal baa bet ñi dub yub la lo Saulo. <sup>4</sup> Orze' wes saay lo yu. Orze' güeñ yu nu zaab ti' tub mbecy rnii. Orze' nam rab mi yu:

—Saulo, Saulo, ¿lagu rsheed zir yá? —nam.

<sup>5</sup> Orze' na Saulo:

—¿Cyu ru Shuaana? —nay.

Orze' na ga' biñ nu zaab ti' nu rnii ze'.

—Yá nacá Jesuuz, biñ nu ru rsheed zir. <sup>6</sup> Weshte. Gu' lat gyedz. Ze' nii mbecy la coz rlagy ñi nu gyicy ru —nam.

<sup>7</sup> Orze' de yu nu za nuy wagnii la dey, gun tona' la gudzib dey, gun güeñ dey nu rnii mbecy, tees wansac yu ni tub la mbecy. <sup>8</sup> Orze' Saulo weshtey. Na ornu pshaal yu urloy na, orze' wangac zac yu ni tub la coz. Orze' bdu' yaa dey yaay za nu dey yu par Damasco. <sup>9</sup> Chon dzi wangac zac yu. Chon dzi nde' rila wangoy gyit, nunu rila wango'y nis.

<sup>10</sup> Ze' Damasco zu tub mbecy nu ricy cup consuel lo Crisht, yu nu la Ananías. Orze' Shuaan den bruu zac mi loy. Orze' nam rab mi yu:

—Ananías! —nam.

Orze' na Ananías:

—Ii zu, Shuaana —nay.

<sup>11</sup> Orze' na Shuaan den rab mi yu:

—Wes su. Gua tub cay nu la Cay nu Li. Orze' yu' Judas ze' cugyi'r tub mbecy nu ledz Tarso, yu nu la Saulo. Zuy rnii nuy yá. <sup>12</sup> Orze' mod ni pcaal bde' tub mbecy nu la Ananías loy. Gal yaay yu gun orze' zac yu tuuba' tir —nam rab mi Ananías.

<sup>13</sup> Orze' Ananías nay rab yum:

—Zañ mbecy rnii coz nu ricy yu ze' lo. Zañ coz a' nap b icy nuy de mbecy nir nu yu' Jerusaleeng. <sup>14</sup> Orze' na briy Damasco nu rishbeey nu bruu lo mbecy nu riib

ic de uz par nu gya nuy dela mbecy nu rzat ru pres —na Ananías.

<sup>15</sup> Orze' na Shuaan den rab mi yu:

—Gua gun yá bloo sú yu nu gyicy yu riiñ né, nunu zat yu yá lo de mbecy. Zat yu yá lo de mbecy nu walab mbecy Israeel. Nunu zat yu yá lo de mbecy nu zu riiñ. Nunu zat yu yá lo de mbecy Israeel. <sup>16</sup> Laab ub la lyuu loy dela coz nu gzac ziy nu nac yá —nam.

<sup>17</sup> Orze' gua Ananías. Gu'y nañ yu' ze'. Gul yaay Saulo. Orze' nay rab yuy:

—Bicya Saulo, Shuaan den Jesuuz, biñ nu bruu zac lor nez nu yad ru, bzuu nez mi yá nu yapá lor, gun orze' zac ru tuuba' tir, nunu gac ru mbecy nu gyub ic za' la Espiriit Yon ni Ñgyoozh nañ lardoo —nam.

<sup>18</sup> Orze' lueg la tub coz nu na gal na gyid ich bel bruuñ urlo Saulo bet lag ñi. Orze' brugyi' rzac yu tuuba' tir. Orze' wes suy, nunu bzu nis yu. <sup>19</sup> Na ornu bdoy gyit, orze' guud fers niy. Orze' Saulo byeeñ yu la be dzi nu de yu nu ricy cup consuel lo Crisht, de yu nu yu' Damasco.

### Saulo rshaal yu riidz ni Crisht Damasco

<sup>20</sup> Orze' lueg la za Saulo yu' ze' nu rsya' de mbecy Israeel riidz ni Ñgyoozh, nunu brugyi' nu rshaal yu de coz ni Crisht. Orze' nay:

—Mi ze' nac mi i'ñ Ñgyoozh —nay.

<sup>21</sup> Dela mbecy nu güeñ ze' tona' la za nu ic dey. Orze' na dey:

—¿A walab yu ii mbecy nu gusa pshet zi de mbecy nu rzat Jesuuz Jerusaleeng? Nunu ¿a walab nu yad yu ii par nu cha nuy dey pres, nunu gu'y dey yaa de yu Zub lo ni uz? —na dey.

<sup>22</sup> Tees niga niga byanap zir rshaal Saulo de riidz ni Crisht. Tona' la nap blyuuy nu Jesuuz nac mi Mesías, biñ nu ca lo cuen nu co mbañ mbecy. Ni wangaca' la nii de mbecy Israeel nu yu' Damasco nu radzay.

### Briib dze Saulo

<sup>23</sup> Ornu bza' la be dzi, byatublaazh de mbecy Israeel, nunu psaap dey riidz nu cut dey Saulo. <sup>24</sup> Tees mbecy mnii dey loy de coz nu rlagy dey gyicy nuy yu. Dzi rel la mña dey de ro' nu druu mbecy ru' gyedz, gun rlagy dey cut yuy. <sup>25</sup> Orze' de mbecy nu ricy cup consuel lo Crisht bri dey yu nañ tub chicyiw ily. Pshet dey yu par ich lo' ni gyedz ze' rel. Ni mod briib dzey.

### Ornu Saulo briy Jerusaleeng

<sup>26</sup> Na ornu Saulo briy Jerusaleeng, b icy peey nu ñgyac nuy de mbecy nu ricy cup consuel lo Crisht, tees wancheña lagy dey nu ricy cup yu consuel lom, nunu rdzib dela dey loy. <sup>27</sup> Orze' Bernabee blocyuub yuy. Gua nuy yu lo de aposht. Orze' pshaal yu lo dey nu bzaac Saulo Shuaan den gyernez, nunu mnii num yu. Mnii yu Saulo wacchib lay bzat yu Crisht lat de mbecy Damasco. <sup>28</sup> Orze' Saulo byeeñ nuy dey, nunu gusay dutuub la lat gyedz Jerusaleeng. Wacchib lay rzat yu Crisht lat de mbecy. <sup>29</sup> Orze' bee nuy de mbecy Israeel

riidz, de yu nu rnii riidz griego. Nunu ptub su losa' dey nu riidz. Tees de mbecy ze' mbicy pee dey nu ňgyut dey yu.<sup>30</sup> Tees ornu gud lagy de b icy na, orze' gua nu dey Saulo par Cesarea. Orze' bzuu nez dey yu yay Tarso.

<sup>31</sup> Orze' dela de mbecy ni Crisht nu yu' lo de yu ni Judea, gal nu lo de yu ni Galilea, gal nu lo de yu ni Samaria, bi yu' gyel ri zu lat dey, nunu byafert zir dey nañ lardooy. Nunu Espiriit Yon ni ňgyoozh blocyuub mi dey nu byañ zir yu lat nu gusa dey nu p ca lagy dey lo ňgyoozh.

### Bed gusay Lida nu Jope

<sup>32</sup> Ze' Bed gusay lat de mbecy ni Crisht. Guay lat de mbecy ni Crisht nu yu' Lida. <sup>33</sup> Ze' bdzeel yu tub mbecy nu la Eneas. Yu ze' tub mbecy chj. Bi bza' shuñ ña'n nu wagac gyeshtey. Orze' Bed nay rab yuy:

<sup>34</sup> —Eneas, Jesucrist gyicy yac mi ru. Weshte, nunu byash da' nir —nay.

Orze' lueg la weshte Eneas. <sup>35</sup> Orze' dela mbecy nu yu' Lida, nunu dela mbecy nu yu' lo de yu ni Sarón byac dey mbecy nu ricy cup consuel lo Shuaan den ornu bzaac dey nu byac yu ze'.

<sup>36</sup> Na zu tub biñ mñaa nu la Tabita nu ricy cup consuel lo Crisht. Benu nu riidz griego, orze' lam Dorcas. Rcyiiñ mi tub gyedz nu la Jope. Dub laa lat nu bzu biñ mñaa ze' gyishlombecy, b icy mi coz nap. Blocyuub mi de mbecy zi. <sup>37</sup> Laab tiem ze' gush güiim gut mi. Orze' blaagy dey mi. Gaze' nu briish dey mi nañ tub yu'. Shily cyup nu Zub gya briish dey mi. <sup>38</sup> Na Jope gaab ga riñ nu Lida. Orze' ornu güeñ de yu nu ricy cup consuel lo Crisht, de yu nu yu' Jope nu ri Bed Lida, orze' bzuu nez dey cyup mbecy nu cha nuy rasqo nu gyicy lal Bed chay lo dey.

<sup>39</sup> Orze' Bed bzu lily yu za nuy dey. Na ornu briy lu-gaar ze' na, orze' gup nu dey yu nañ yu' cyup shily nu Zub gya ze'. Orze' dela de byud bde' dem loy nu ruun dem. Nunu blyuu dem dela yaag, nu dela negy nu bzaac Dorcas ornu bzum gyishlombecy loy. <sup>40</sup> Orze' Bed bloo chuy dem par ich yu'. Orze' gusu tib yu mnii nuy ňgyoozh. Orze' bgüiy lo biñ mñaa gut ze'. Orze' nay rab yum:

—Tabita, weshte! —nay.

Orze' mi ze' mbi bgüim loy. Ornu bzaac mi Bed, orze' weshtem. Gusub mi. <sup>41</sup> Orze' Bed bdu' yaay yaam blocyuub yum. Gaze' nu wes sum. Orze' bredz mbecy de yu nu ricy cup consuel, gal nu de byud. Orze' blyuy mi lo dey nu mbañ mi. <sup>42</sup> Orze' bzu laa riidz ni de coz nu b icy yu dutuub la gyedz Jope. Nunu zañ mbecy b icy cup dey consuel lo Shuaan den. <sup>43</sup> Orze' Bed byeeñ yu Jope zañ dzi. Ze' pcyiiñ nuy tub mbecy, tub yu nu rcuugy gyid bañcyug, tub yu nu la Simqo.

### Bed nu Cornelio

**10** Zu tub mbecy nu rcyiiñ Cesarea, yu nu la Cornelio. Yu ze' yu nu riib ic tub gaynal soldad Rom. Byub ic yu tub nac soldad nu la Mbecy Italia. <sup>2</sup> Yu ze'

tona' la pcaa ic yu de coz ni ňgyoozh. Pca lagy yu lom nu dela famil niy. Zañ gun briic yu ni de mbecy zi lat de mbecy Israael, nunu zaab rnii nu laay ňgyoozh. <sup>3</sup> Orze' tub dzi, tub gyiib chon or gudze, bruu zac tub anc ni ňgyoozh loy. Orze' nay rab yuy:

—Cornelio! —nay.

<sup>4</sup> Orze' mbi la bgüii Cornelio lo anc ze' gun gudzib yu.

Orze' nay:

—¿La coz rac shuaana? —nay rab yu anc.

Orze' na anc rab yu Cornelio:

—Ñgyoozh mniim nu nap ornu güeñ mi nu rnii nur mi, nunu ornu rzac mi de gun nu rbic ru ni de mbecy zi. <sup>5</sup> Orze' na zuu nez ru la be mbecy chay Jope nu cyid nuy tub mbecy nu la Simqo. Laab yu ze' yu nu la Bed. <sup>6</sup> Yu ze' rcyiiñ yu nu tub mbecy nu la laaba' Simqo, tub yu nu rcuugy gyid bañcyug. Rcyiiñ yu ru' nisyudoo —na anc ze'.

<sup>7</sup> Na ornu bruu chu anc lo Cornelio. Orze' bredz Cornelio cyup yu nu ricy riiñ nañ yu' yu tub soldad. Soldad ze' tub yu nu dzi rcaa ic de coz ni ňgyoozh, nunu nac yu mbecy nu ricy zi'l coz nu rlagy Cornelio. <sup>8</sup> Orze' mniim lo dey de coz nu guc. Gaze' nu bzuu nez yu dey zay par Jope.

<sup>9</sup> Na tuuba' dzi, lat nu de mbecy ze' zaab zay nez, sñuu ga zi'l ri dey Jope, orze' Bed gup yu too yu' tub or wi doo par nu nii nuy ňgyoozh. <sup>10</sup> Orze' brugyi' ran yu. Rlagy yu goy gyit. Na lat nu rduzu ye de coz nu goy, ňgyoozh b icy mi nu bruu zac tub coz loy mod ni p caal. <sup>11</sup> Bzaac yu nu byaal baa. Orze' bet tub coz nu na gal nu na tub negy cuadrad nag se' tap la scyiñ niñ yet ñi par lo yu. <sup>12</sup> Orze' lo negy ze' nguaa de lo la bañcyug nu ricy cup tap g yi': gaza' de lo la nez bily nu de lo la chigiñ. <sup>13</sup> Orze' na ňgyoozh rab mi Bed:

—Bed, wes su. Biit de bañcyug ze' gow ru —nam.

<sup>14</sup> Orze' na Bed:

—Cue' Shuaanq. Ya rila wadaw de coz bag nu rlyuu leey ni Moisees, nunu rila wadaw coz nu a' yad ñi nu daw —nay.

<sup>15</sup> Orze' na ga' ňgyoozh rab mi yu tuuba' tir:

—Benu ya ňgyoozh b icy caacya la coz, orze' cue' niir nu nde' bag nañ —nam.

<sup>16</sup> Chon tir guc de coz ze'. Orze' lueg la negy ze' gu-pa'ñ baa. <sup>17</sup> Orze' Bed gush yu shcab nañ lardooy ben lac yaruu de coz nu bruu zac loy. Laab or la ze' byad yu' ni Simqo ni de mbecy nu bzuu nez Cornelio. Guchu' dey ro'. <sup>18</sup> Orze' rbish ti dey nu b bugyi' y ben a zu tub yu nu la Simqo, laab yu ze' yu nu la Bed, lo de mbecy nu yu' ze'.

<sup>19</sup> Na Bed gabee rash yu shcab par nu gyet lag yu cuen lac yaruu de coz nu bruu zac loy. Orze' Espiriit Yon ni ňgyoozh nam rab mi yu:

—Bzuub gyidag. Zu chon mbecy nu ryub dey ru.

<sup>20</sup> Orze' na bzu lily laa. Bet la. Cue' gyicy cyup ic ru nu cha nur dey, gun ya bzuu nez dey —nam.

<sup>21</sup> Orze' Bed bet yu. Zay lo de yu ze'. Orze' nay rab yu dey:

—Ya yu nu ryub der ze'. ¿La riñ yad der lo? —nay.

<sup>22</sup> Gaze' nu na dey:

—Cornelio, yu nu riib ic tub gaynal soldad, bzuu nez yu də ya yapə. Yu ze' tub mbecy nap. Rca lagy yu lo Ñgyoozh. Nunu dela de mbecy Israeel nap rnii dey niy. Tub anc ni Ñgyoozh mniiy loy nu cuedz yu ru char yu', gun orze' gac gyeñ yu coz nu rlagy ru niir —na dey.

<sup>23</sup> Orze' Bed mniiy nu chu' dey nañ yu', nunu mniiy nu gyeche dey ze'. Orze' tuuba' dzi bzu lily Bed nu za nuy dey, nunu la be de bicy na nu yu' Jope za nuy yu.

<sup>24</sup> Orze' gal tuuba' dzi bri dey Cesarea. Ze' blez Cornelio, nu de famil niy, nu de yu nu tonal' la amig niy. Tub lac laa de yu ze' bredz yu. <sup>25</sup> Na ornu Bed bru'ñay ro' Cornelio, orze' Cornelio za cheel yuy. Orze' gusu tib yu loy nu driib zily yuy. <sup>26</sup> Tees Bed pshes suyu. Orze' nay:

—Wes su gun ni' ya nacə mbecy gal nu na ru —nay.

<sup>27</sup> Orze' Bed zaab ro lay riidz nu Cornelio lat nu ya dey nañ yu'. Ornu gu'y nañ yu', orze' bzaac yu nu yu' zigy mbecy nu byatublaazh nañ yu' ze'. <sup>28</sup> Orze' na Bed rab yu dey:

—De ru nap rad lagy der nu leey ni de mbecy Israael wazaan ñi nu gac nu dey mbecy nu walab mbecy Israael. Nunu wac nu cha zaab lo dey loy. Tees Ñgyoozh blyuum ne nu cue' nee lo ni tub mbecy nu nac yu mbecy bdune' o nu nac yu mbecy nu a' yad ñi nu cha zaab lo lo. <sup>29</sup> Orze' ornu bredz ru ya, wannęe deetə, sinu lueg la yapə. Tees na rlagya gad lagya la gyi' bredz ru ya —nay.

<sup>30</sup> Orze' na Cornelio rab yu Bed:

—Gutap dzi ya zu yu'. Orze' i la or pcə ubə nu cue' dəw gyit lat nu mnęe du Ñgyoozh. Orze' bruu zac tub mbecy shab ryal lo. <sup>31</sup> Orze' nay rab yu ya: "Cornelio, Ñgyoozh reñ mi coz nu rniir lom, nunu mniim nu dzi nap ornu rzac mi de gun nu rbic ru ni de mbecy zi.

<sup>32</sup> Nde' nu na zuu nez ru moz chay Jope nu cha teey tub mbecy nu la Simoo, laab yu ze' yu la Bed. Yu ze' rcyiñ yu yu' tub mbecy nu la laaba' Simoo, tub yu nu rcuugy gyid bañcyug. Rcyiñ yu ru' nisyudoo", na anc ze'. <sup>33</sup> Orze' ya lueg la bzuu nezə dey nu biid teey ru. Nunu nap ñuu bicy ru nu yad ru. Na byatublaazh də ii, nunu Ñgyoozh zum lat də, nunu rlagy də gyeña dela coz nu pcaa Shuaan den ru nu niir lo də —nay.

### De riidz nu mnii Bed yu' Cornelio

<sup>34</sup> Orze' brugyi' rnii Bed. Orze' nay:

—Na gaal bet lagə cuen nu rishli Ñgyoozh tub zi'l mod ricy num dela mbecy. <sup>35</sup> Tees Ñgyoozh gyash mi mbecy mas cyu zi'l nez yu benu ca lagy dey lom, nunu gyicy dey coz nu se'ñ. <sup>36</sup> De ru rad lagy der nu Ñgyoozh bzeed mi rasoo ni de nez mbecy Israael. Mniim nu nu nac Jesucrisht, biñ nu nac Shuaan dela mbecy, chu' gyel ri zu nañ lardoo dey. <sup>37</sup> De ru rad lagy ru la coz guc dutuub la lugaar nu yu' de mbecy Israael. Coz ze' brugyi'ñ lo de yu ni Galilea, despuees nu briib nis Waa de mbecy, nunu pshaal yu de riidz ni Ñgyoozh. <sup>38</sup> De ru rad lagy ru de coz ni Jesuuz, biñ nu pcyiñ Nazaret. Rad lagy de ru nu pcui Ñgyoozh mi, nunu briic Ñgyoozh Espiriit Yon nim ni Jesuuz. Ñgyoozh bicy mi nu cyiñ mi

nu gyicy mi coz ily dela lugaar nu gusam. Bicy mi coz nap, nunu bicy yac mi de mbecy nu bicy ras nu nuras. De nde' bicy mi gun Ñgyoozh nac num mi. <sup>39</sup> Nunu de ya rnęe də nu bzaac də dela coz nu bicy mi ledz mbecy Israael, nunu dela coz nu bicy mi Jerusaleeng. Pcaa dey mi lo cruzzi. Ni mod biit dey mi. <sup>40</sup> Tees ornu bza' dzi chon nu gut mi, orze' Ñgyoozh bicy mi nu byabañ mi, nunu bicy mi nu bruu zac mi lat də ya. <sup>41</sup> Walab dela mbecy bzaac dey mi, sinu de ya zi'l, yu nu bi pcui Ñgyoozh nu gnęe də lo de mbecy de coz nu guc, de ya bzaac dəm. Bdaw du dəm gyit, nunu bdo' də nis dəm despuees ornu byabañ mi. <sup>42</sup> Orze' pcaam də ya nu shaal də de riidz nu sac nu bruu lo Ñgyoozh lo de mbecy, nunu pcaam də ya nu nee də nu segur la mi ze' nac mi biñ nu bloo su Ñgyoozh par nu ri beem ni dela mbecy mbañ, nunu par nu ri beem ni dela mbecy nu bi gut. <sup>43</sup> Dela yu nu mnii por cuen ni Ñgyoozh bi bzat dey mi. Mnii dey nu dela mbecy, de yu nu gyicy cup consuel lom, gyicy sulagy Ñgyoozh de cyi nu bicy dey. Par nu nac Jesucrist gyicy sulagy mi ni dey —na Bed.

### Espiriit Yon ni Ñgyoozh bicy nim de yu nu walab mbecy Israael

<sup>44</sup> Lat nu gabee rnii Bed de riidz ze', orze' Espiriit Yon ni Ñgyoozh bicy nim tub ga la de yu nu rzuub gyidag de riidz nu rniiy. <sup>45</sup> De mbecy Israael nu ricy cup consuel lo Crisht, de yu nu za nu Bed, tonal' la za nu ic dey ornu bzaac dey nu Espiriit Yon ni Ñgyoozh ni' bicy nim de mbecy nu walab mbecy Israael. <sup>46</sup> Gud lagy dey nu bicy ni Espiriit Yon ni Ñgyoozh dey, gun mnii dey riidz reña' mbecy, nunu ryabic dey gyel mbecy ni Ñgyoozh. <sup>47</sup> Orze' na Bed:

—De mbecy nu yu' ii byac ni Espiriit Yon ni Ñgyoozh gal nu guca' zi'l nu de ub na. Orze' ¿cyu gac ca ni dey nu cue' zu nis dey? —nay.

<sup>48</sup> Orze' Bed pcaay mbecy nu griib nis yu dey par nu gabe nu nac dey mbecy ni Jesucrist. Orze' de mbecy ze' mnishbaa dey lo Bed nu gyiyeñ nuy dey la be dzi.

### Bed pshaal yu lo de mbecy ni Crisht nu yu' Jerusaleeng la guc

**11** Orze' de aposht nu de' zir bicy na nu yu' lo yu ni Judea güeñ dey nu ni' yu' mbecy nu walab mbecy Israael nu guña lagy dey de riidz nu bruu lo Ñgyoozh. <sup>2</sup> Orze' ornu bri Bed Jerusaleeng, de yu nu rlagy caa beey sircunsision cuerpo ni mbecy nu walab mbecy Israael mnii zi dey niy. <sup>3</sup> Orze' na dey rab yuy:

—¿Lagu gua güiir de mbecy nu walab mbecy Israael? ¿Lagu bdow nur dey gyit? —na dey.

<sup>4</sup> Orze' Bed pshaal yu dela coz nu guc gal ze' nu bzub la gyi' de coz nu bzac yu. <sup>5</sup> Orze' nay:

—Ya bri Jope. Orze' lat nu mnęe du Ñgyoozh, orze' bicy mi nu bde' tub coz lo. Ya bzaacə nu yet tub coz nu na gal na negy cuadrad ily. Za' tap la scyiñ niñ nag yet ni. Bruuñ baa bet ni gashtal lo. <sup>6</sup> Orze' mbi la bgüii nañ ni. Orze' bzaacə de bañcyug nu Zub tap gyi'. Bzaacə de

bañ gyish. Bzaacä de lo la mni bily. Nunu bzaacä de chigyiñ. <sup>7</sup> Orze' güeñ nu mnii Ñgyoozh. Orze' nam rab mi ya: "Bed, wes su. Biit de ma ze' gow ru", nam. <sup>8</sup> Orze' Mnëe lom: "Cue' Shuaanä. Rila wagdaw de coz bag nu rlyuu leey ni Moisees, nunu rila wagdaw coz nu a' yad ñi nu daw", rugyam. <sup>9</sup> Orze' Ñgyoozh mnii ga'm tuuba' tir gal gyibaa. Orze' nam: "Benu ya, Ñgyoozh, b icy caacyä la coz, orze' ru cue' niir nu nde' coz bag", nam. <sup>10</sup> Ni b icy mi chon tir. Orze' despuees bish cya ga' negy ze' gup ñi baa tuuba' tir. <sup>11</sup> Orze' lueg la bru'ña chon mbecy yu' ze' nu rcyiiñä. Mbecy nu rcyiiñ gal Cesarea bzuu nez yu de mbecy ze' nu yad yub dey ya. <sup>12</sup> Orze' Espiriit Yon ni Ñgyoozh mniim lo nu cue' gyicy cyup icä nu wayä du dey. Ni' shuup de b icy na nu yu' ii gua nu dey ya par Cesarea. Orze' dela de gy' nañ yu' ni Cornelio. <sup>13</sup> Mniiy nu bzaac yu tub anc nañ yu'y. Orze' anc ze' mniiy loy: "Bzuu nez tub mbecy chay Jope cha tey tub mbecy nu la Simoo. Laab yu ze' yu nu la Bed. <sup>14</sup> Yu ze' gniy de riidz lor. Nu nac riidz ze' gruu mbañ ru nu dela famil nir", nay. <sup>15</sup> Orze' na ornu brugyi' rneé lo dey, orze' Espiriit Yon ni Ñgyoozh b icy nim dey gal nu b icy mi nu de ub na nu loga. <sup>16</sup> Orze' byea' lagya tub coz nu mnii Shuaan den ornu nam: "Waa briib nis yu de ru nu nis, tees ya zeeda Espiriit Yon nu gyicy nim der", nam. <sup>17</sup> Orze' benu Ñgyoozh rbic mi ni de mbecy nu walab mbecy Israeel laaba' coz nu briic mi ni de ub na ornu b icy cup na consuel lo Shuaan den, orze' ¿cyu guc ya nu ca ni Ñgyoozh nu cue' ni gyicy mi? —na Bed.

<sup>18</sup> Na ornu güeñ de mbecy nde', orze' guca dey nu rnii ziy ni Bed, nunu byabic dey gyel mbecy ni Ñgyoozh. Orze' na dey:

—Orze' beni ni' zi'l briic Ñgyoozh ni de mbecy nu walab mbecy Israeel mod nu ne' dey dela coz c yi nu ricy yu gun orze' cui mbañ dey tub la —na dey.

### De mbecy ni Crisht nu yu' Antioquia

<sup>19</sup> De mbecy nu ricy cup consuel lo Crisht brush las dey ornu bzac ziy tiem nu gut Shteb. Yu'y zay gashtal Fenicia. Yu'y zay gashtal Chipre. Yu' ga'y zay gashtal Antioquia. Pshaal dey de riidz nu bruu lo Ñgyoozh lo de mbecy Israeel zi'l. <sup>20</sup> Ze' la be mbecy Chipre, nu la be mbecy Cirene, de yu nu ricy cup consuel lo Crisht, bri dey tub gyedz nu la Antioquia. Ze' pshaal dey de riidz nu sac ni Shuaan den Jesuuz lo gaza' de mbecy nu walab mbecy Israeel. <sup>21</sup> Tona' la blocyuub Ñgyoozh dey, nunu tona' la mbecy zigy b icy cup dey consuel lo Shuaan den, nunu g uc nu dey mi.

<sup>22</sup> Na ornu güeñ de mbecy nu ricy cup consuel lo Crisht nu yu' Jerusaleeng de coz nu g uc, orze' bzeed dey Bernabee gal Antioquia. <sup>23</sup> Na ornu briy, orze' bzaac yu nu tona' la bet lagy yu, nunu fert la mniy lo dey nu gyicy paay nu Shuaan den nu dutuub la lardooy dey. <sup>24</sup> Na Bernabee nac yu mbecy nap. Espiriit Yon ni Ñgyoozh briib ic za' lam nañ lardooy. Nunu fert la b icy cup yu consuel lo Ñgyoozh. Orze' zigy mbecy ze' brugyi' nu ricy cup dey consuel lo Shuaan na.

<sup>25</sup> Orze' Bernabee guay Tarso nu yub yu Saulo. <sup>26</sup> Na ornu byad yu na, orze' gua nuy yu par Antioquia. Nañ tub ña'n rup laa dey byatublaazh yu nu de mbecy nu ricy cup consuel lo Crisht nunu blyuu dey ni tub nac mbecy zigy. Antioquia, ze' bzub gyi'ñ nu rnii dey "Mbecy ni Crisht" de yu nu ricy cup consuel lo Crisht.

<sup>27</sup> Tiem ze' bruu la be mbecy nu mnii por cuen ni Ñgyoozh Jerusaleeng. Za dey par Antioquia. <sup>28</sup> Tub mbecy nu la Agabo wes suy lat de mbecy zigy. Orze' Espiriit Yon ni Ñgyoozh blocyuub mi yu, nunu mniy nu sñuu ga cyid tub cubiñ ily dutuub la gyishlombecy. Cubiñ ze' biid ñi, ornu Clau byub ic yu de nasyoong.

<sup>29</sup> Orze' dela de mbecy ni Crisht mne' ic dey nu zeed yu ñuu tiñ nu locyuub yu de b icy yu nu yu' lo de yu ni Judea. Dub gal lac nu gagye tub ga dey, dub ni bzeed dey. <sup>30</sup> Orze' ni b icy dey. Orze' bzuu nez dey Bernabee nu Saulo nu byazeñ yu gun ze' yaa de yu bel nu riib ic de mbecy ni Crisht nu yu' lo de yu ni Judea.

### Gut Santiag nunu guti Bed yu' gyiib

**12** Tiem ze' Herodes, tub yu nu riib ic de mbecy Israael, brugyi' rsheed ziy la be mbecy ni Crisht.

<sup>2</sup> Pcaay mbecy nu cut yu Santiag b icy Waa, nu mandziy. <sup>3</sup> Na ornu bzaac yu nu tona' la bet lagy mbecy Israael nu biit yu Santiag, orze' psheta' yaay Bed. Ni g uc tub sa' nu row dey gyishtily nu sac lebadur. <sup>4</sup> Na ornu bded nu bdu' yaay Bed, mne'y yu nañ yu' gyiib. Ze' bgu' dey yu yaa tap nac soldad. Tap ga soldad lo tub nac yu. De yu ze' mña dey yu. Herodes mniy tooy nu cha nuy Bed lo de mbecy zigy, de mbecy Israael or ded sa' ze'. <sup>5</sup> Orze' guti Bed yu' gyiib, tees de mbecy ni Crisht fert la mnii nu dey Ñgyoozh nu nac yu.

### Ñgyoozh bloom Bed nañ yu' gyiib

<sup>6</sup> Tub dzi anzir nu co ic Herodes nu cha nuy Bed lo de mbecy, na or guzel rel, orze' nas la Bed lat cyup soldad nu rñay ze'. Nag yu nu cyup caden. Nunu zu cyapa' soldad ro' gyiib ze'. <sup>7</sup> Orze' derepent la bruu zac tub anc ni Ñgyoozh lo Bed. Orze' dutuub la nañ yu' ze' bzu yaa. Orze' gul yaa anc ze' cuit yu. Orze' brish yaa. Orze' nay rab yuy:

—Bicy lal! ¡Weshte! —nay.  
Orze' lueg la bet lagy caden nu nag yeñ yaa Bed.  
<sup>8</sup> Orze' na anc rab yuy:  
—Bicy nicy sinch nir, nunu pcaa g yi' gyid lab ru —nay.

Orze' ni b icy Bed. Orze' na anc:

—Bzuu yeñ shab ru. Orze' cyid car ichä —nay.

<sup>9</sup> Orze' za ca Bed ich yu. Orze' bruu yu nañ yu' gyiib. Par wangad lagy yu ti coz nu ricy anc ze' nde' coz rishi. Psa' lagy yu nu Ñgyoozh ricy num yu mod ni pcaa.

<sup>10</sup> Orze' bded dey lugaar loga la nu rña soldad. Niga bdeda' dey lugaar cyup. Niga byap dey tub ro' nu byaa nu gyiib. Ro' ze' benu shaal nañ, orze' gac ruun nañ yu' gyiib chu'n lat cay. Orze' ro' ze' byaal ub lañ. Orze' bruu dey nañ yu' gyiib ze'. Bza dey lat tub cay. Orze' derepent la bzeeñ anc yu ub zi lay.

<sup>11</sup> Orze' gud lagy yu la coz guc. Orze' mnii tooy:

—Na gaal gud lagya nu rishli Ñgyoozh bzuu nez mi tub anc nu blooy ya yaa Herodes, nunu bloo chuy ya lo dela coz nu ricy pee de mbecy Israeel gyicy nuy ya —nay.

<sup>12</sup> Na ornu gud lagy yu nde', orze' zay par yu' Li, ñaa Waa, laab yu ze' yu nu la Marc. Zigy mbecy by-atublaazh dey ze' nu rnii nu dey Ñgyoozh. <sup>13</sup> Orze' psig yu lo yaro' ni loli'. Orze' tub fiñ feñ nu la Rode bruuñ za güiiñ ben cyu nde'. <sup>14</sup> Tees ornu güefñ ni nu zaab ti' Bed, orze' byu' loñ nu laab yu. Orze' par nu tanta' la bet lagy ni wanshaala'ñ ro' ze' sinu carer la gush ni zañ par lat de mbecy. Mniiñ nu zu Bed ich yu'. <sup>15</sup> Orze' na dey:

—¡Ru tub mbecy ton! —na dey.

Tees bzu fert ni nu laab rishli rniiñ. Orze' na' dey:

—Par walab yu nde', sinu yu ze' tub anc nu nac nuy —na dey.

<sup>16</sup> Lat nu za fiñ mñaa ze', orze' fert la ca Bed rsiigy yu lo yaro' ni loli' ze'. Orze' or guchi pshaal dey ro'. Na ornu bzaac dey Bed, tona' la za nu ic dey. <sup>17</sup> Orze' bicy Bed yaay par nu checa dey nu ricy yu zu redz. Orze' byooy rishlo dey lac bzac yu ornu Ñgyoozh bloom yu nañ yu' gyiib. Orze' nay:

—Niir lo Santiag, gal nu lo de' zir de b icy na de coz nu guc ze' —nay.

Orze' bruuy zay tuuba' lugaar.

<sup>18</sup> Na or bza' yu tuuba' dzi, orze' tona' la pcan shcab ni de soldad. Orze' na dey rab yu losa'y:

—¿La bzac Bed? —na dey.

<sup>19</sup> Orze' Herodes pcaay de mbecy nu yub yu Bed par wangyad yu. Orze' bdugyi'y lo de soldad nu rña ze'. Orze' pcaay mbecy nu cut yu de soldad ze'. Despuees ni de nu nde', Herodes bruuy lo de yu ni Judea zay ciyiñ yu Cesarea.

### Gut Herodes

<sup>20</sup> Orze' Herodes tona' la guzi lagy yu lo de mbecy Tiro nu Sidón. Orze' tublaazh la gua güii dey yu. Nu loga la b icy dey Blasto par amig. Yu ze' zuy riiñ nu riib ic yu nañ yu' ni Herodes. Orze' mnishbaa dey lo Herodes nu cue' chuc oo nuy dey, gun de coz nu row dey druun de lugaar nu riib ic yu. <sup>21</sup> Orze' Herodes bzuy tub dzi nu nii nuy de mbecy zigy. Dzi ze' bzuy negy nu rzu mbecy nu riib ic. Orze' gusub yu lo yashily, ze' nu riib ic yu. Orze' mniyy riidz lo de mbecy. <sup>22</sup> Orze' de mbecy brish ti dey. Orze' na dey:

—¡Yu nu rnii nu de ub na, yu re walab mbecy, sinu tub ñgyoozh! —na dey.

<sup>23</sup> Orze' tub anc ni Ñgyoozh lueg la pshet yaay Herodes. Bicy yu nu gush güiiy. Ni bicy anc ze', gun wangyicy zily yu Ñgyoozh. Orze' bdow bya'y gut yu.

<sup>24</sup> Niga niga güefñ zir mbecy de riidz ni Ñgyoozh, nunu bicy cup zir dey consuel lo Crisht.

<sup>25</sup> Orze' blazh riiñ ni Bernabee nu Saulo Jerusaleeng. Gaze' nu bish cya ga' dey zay par Antioquia tuuba' tir. Za nuy Waa. Laab yu ze' yu nu la Marc.

Bernabee nu Saulo brugyi' ricy yu riiñ

<sup>13</sup> Lat de mbecy ni Crisht nu yu' Antioquia yu' la be mbecy nu rnii por cuen ni Ñgyoozh, nunu yu' ga' la be mbecy nu rlyuu coz ni Ñgyoozh. Tub yu lay Bernabee. Tuuba'y lay Simoo, laab yu ze' yu nu la Cas. Tuuba'y lay Lucio, yu ze' mbecy Cirene. Tuuba'y lay Manaén, yu nu tublaazh la bguul dey nu Herodes, yu nu byub ic Galilea. Tuuba'y lay Saulo. De yu ze' zuy riiñ lat de mbecy ni Crisht. <sup>2</sup> Orze' tub dzi lat nu rzu bich dey nu nac Shuaan den, nunu lat nu rca dey ni ub yu nu cue' gow yu gyit nu rzu bich dey nu nac Ñgyoozh, orze' na Espiriit Yon ni Ñgyoozh rab mi dey:

—Blo reñ der Bernabee nu Saulo par nu gyicy dey riiñ nu pcui nu gyicy yu —nam.

<sup>3</sup> Na ornu bded ni nu pca dey ni ub yu nu cue' goy gyit lat nu mnii nu dey Ñgyoozh, orze' briib yaa dey too de yu ze'. Orze' bzuu nez dey yu zay lo riiñ nu briic Espiriit Yon ni Ñgyoozh nu gyicy yu.

Bernabee nu Saulo pshaal yu riidz ni Ñgyoozh Chipre

<sup>4</sup> Orze' Espiriit Yon ni Ñgyoozh bzuu nez mi dey zay. Bruu dey Antioquia za dey par Seleucia. Ze' gush dey tub barc zay par Chipre, tub nac yu nu ri lo nisyudoo.

<sup>5</sup> Na ornu bri dey Salamina, tub gyedz nu ri lo yu ni Chipre, orze' pshaal dey riidz ni Ñgyoozh nañ de yu' nu rsya' de mbecy Israeel riidz ni Ñgyoozh. Waa za nuy dey par nu locyuub yu dey.

<sup>6</sup> Bded dey lo yu nu ri lo nisyudoo ze'. Orze' bri dey tub gyedz nu la Pafos. Ze' bdzeel dey tub tu' nu la Barjesús. Yu ze' mbecy Israeel, nunu rnii nu nac yu tub mbecy nu rnii por cuen ni Ñgyoozh, tees walab rishli.

<sup>7</sup> Yu ze' nac nuy Sergio Paulo. Nunu Sergio Paulo, yu ze' riib ic yu nu ri lo nisyudoo ze'. Nac yu mbecy nu tona' la yu' shcab ni. Orze' bredz yu Bernabee nu Saulo nu cha dey loy gun rlag yu gyeñ yu riidz ni Ñgyoozh. <sup>8</sup> Ze' tu' ze' tuuba' nu lay nde' Elimas. Orze' yu ze' guay contr ni dey. Orze' bdu'y lag yu nu riib ic lo de yu ze', par nu cue' gyicy cup yu consuel lo Crisht.

<sup>9</sup> Orze' Espiriit Yon ni Ñgyoozh briib ic za' lam nañ lardo Saulo, laab yu ze' yu nu la Baly. <sup>10</sup> Orze' Baly mbi la bgüiy lo tu' ze'. Orze' nay:

—¡Mbecy rguu, mbecy rgubdzaa, ru nar gal nu na nuras! Ru zar contr ni dela coz nu se'ñ, nunu rila wachecar nu rchaar dela riidz rishli ni Ñgyoozh.

<sup>11</sup> Orze' na Ñgyoozh shet yaam ru. Na gyaca' lor. Ru wazaca'r yaa ni doo par la be tiem —nay.

Orze' lueg la bet dzeeñ urlo Elimas. Orze' brugyi' ryub yu ca na mbecy nu gan yu yaay nu lyuu nez niy.

<sup>12</sup> Orze' yu riib ic ze', ornu bzaac yu de coz nu guc, orze' bicy cup yu consuel lo Crisht. Tona' la za nu ic yu nu nac de riidz ni Shuaan den.

Bernabee nu Baly shaal yu de riidz ni Crisht Antioquia ni Pisidia

<sup>13</sup> Baly nu de losa'y bruuy Pafos, gu' dey nañ tub barc zay. Za dey par Perge, tub gyedz nu ri lo de yu nu la

Panfilia. Tees ze' bruu Waa lat dey. Bish cyay yay par Jerusaleeng.<sup>14</sup> Orze' bruu Baly nu de losa'y Perge. Zay par Antioquia, tub gyedz nu ri lo tub nac yu nu la Pisidia. Orze' sab, dzi nu rzu lagy mbecy Israeel, gua dey nañ yu' nu rsya' de mbecy Israeel riidz ni Ñgyoozh. Orze' gusub dey.<sup>15</sup> Na ornu blazh nu blab mbecy tub nac riidz nu ta' lo leey ni Ñgyoozh nu bzeeñ Moisees, gal nu tub nac riidz nu bzeeñ de yu nu mnii por cuen nim, orze' yu nu riib ic nañ yu' ze' bzeed yu rasoo lo Baly, gal nu lo de losa'y. Orze' nay:

—Bicy na, benu ricy cup ru tub consef, orze' gac niir lo de mbecy na la —nay.

<sup>16</sup> Orze' Baly wes suy. Bicy yaay par nu ri gua dey nu cue' gyicy yu zu redz. Orze' brugyi' rniiy. Orze' nay:

—Bzuub gyidag de ru mbecy Israeel nu de ru mbecy nu rca lagy lo Ñgyoozh.<sup>17</sup> Ñgyoozh ni de mbecy Israeel pcuim de gyitoo bel ni den. Bicy mi nu byañ dey lat nu gabee rcyiñ dey gal nu rcyiñ mbecy yad lugaar nu la Egipto. Tona' la fert bicy num dey ornu bloom dey Egipto.<sup>18</sup> Orze' nañ cyuu ña'n gugyeem lo dey lat nu shiñ bicy dey tub lugaar ub zi.<sup>19</sup> Orze' mnit lom gag yac mbeccy nu pcyiñ lo de yu nu la Canaan, nunu briic mi lugaar ze' nu gani de mbecy nim.<sup>20</sup> Orze' nañ tap gaynal nu ña'n, briic mi mbecy nu gyub ic dey por cuen nim. De yu ze' byub ic yu gashtal pshuub la tiem ni Samueel, yu nu mnii por cuen nim.<sup>21</sup> Orze' bdiiñ dey lom nu cuic mi tub mbecy nu gac rey ni dey. Orze' Ñgyoozh briic mi Sauul, iñ yu nu la Cis, nez Benjamin, par nu gac rey ni dey nañ cyuu ña'n.<sup>22</sup> Orze' despuess bloom Sauul nunu bicy mi nu byac Dabi rey ni dey. Ñgyoozh bzat mi Dabi ornu nam: "Yá bzaaca nu mod nu na Dabi iñ Isaí nañ lardooy, nde' mod nu tona' la yet lagya. Yu ze' gyicy yu dela coz nu rlagya", nam.<sup>23</sup> Ñgyoozh bicy mi nu Jesuuz, biñ nu bruu lat famil ni Dabi, byac mi biñ nu co mbañ de mbecy Israael. Gulas mnii Ñgyoozh nu segur la ni gyicy mi.<sup>24</sup> Anzir nu cyid Jesuuz, Waa pshaal yu de coz ni Ñgyoozh lo de mbecy Israeel. Mnii nu ne' dey dela coz cyi nu ricy yu, nunu zu nis dey.<sup>25</sup> Ornu sñuu ga laz de riñ nu briic Ñgyoozh nu gyicy Waa, orze' nay rab yu de mbecy: "Yá a' nacä biñ nu rnii too de ru nu nacä, tees ornu laz de coz nu ricya, orze' cyid tuuba' mbecy. Ni gyid lab mi wangyapa loo", nay.

<sup>26</sup> 'Der bicy na nu nac nez Abraham, nunu de ru mbecy nu rca lagy lo Ñgyoozh nu yu' lat ii, par de ub na bzeed Ñgyoozh riidz nu lac mod co mbañ mi den.

<sup>27</sup> Tees de yu nu yu' Jerusaleeng nu de yu nu riib ic dey wangad lagy dey cyu nac Jesuuz. Ni' zil' wangyet lag dey cuen de riidz nu bzeeñ de mbecy nu mnii por cuen ni Ñgyoozh, de riidz nu rlab dey de sab la, dzi nu rzu lagy mbecy Israael, nañ yu' nu rsya' de mbecy Israael riidz ni Ñgyoozh. Nde' nu mnii dey nu gat mi par nu byu' niñ gal nu pcaa de yu nu mnii por cuen ni Ñgyoozh ornu mnii dey nu rlag yñi gat mi.<sup>28</sup> Mas wangyap dey ni tub la falt nim nu gyicy yñi nu gat mi, tees mnishbaa dey lo Pilato nu gyicy yu mandaar lo de mbecy nu cut dey mi.<sup>29</sup> Orze' bicy nu dey mi dela coz nu bi cañ nu gyicy nu dey mi, gal nu rniiñ lat de riidz ni Ñgyoozh.

Gaze' nu pshet dey mi lo cruu. Orze' pcach dey mi nañ tub blyuu.<sup>30</sup> Tees Ñgyoozh bicy mi nu byabañ mi.<sup>31</sup> Orze' zañ dzi bruu zac mi lo de yu nu gusa num ornu bruum Galilea guam par Jerusaleeng. Na de yu ze' mnii dey lo de mbecy Israael nu bzaac dey nu byabañ mi.

<sup>32</sup> 'Orze' de yá yap nee de lo de ru tub riidz nu tona' la cyit na. Riidz ze', nde' coz nu mnii Ñgyoozh lo de gyitoo bel ni den nu segur la gyicy mi.<sup>33</sup> Coz ze' bicy mi nu byu' niñ par de ub na, gun laab nez den de gyitoo bel ze'. Ni bicy mi ornu bicy mi nu byabañ Jesuuz. Ni rniiñ lo salmo cyup ornu Ñgyoozh nam: "Ru nac ru Iñä. Dzi na yá gyicya nu cui mbañ ru", nam.<sup>34</sup> Ni' zil' mnii Ñgyoozh lat de riidz nim, ornu mnii nu gyicy mi nu gyabañ Jesuuz, nunu wazaan mi nu gadz cuerp nim. Orze' nam rab mi biñ nu pcuim: "Yá tona' la nap gyicy du ru gal nu mnée lo Dabi nu segur la gyicya", nam.<sup>35</sup> Ze' tuuba' lugaar mnii yu nu mnii por cuen nim rab yum: "Ru wazaan ru nu gadz cuerp ni biñ Yon nir", nay.<sup>36</sup> Tees tiem nu pcyiñ Dabi gyishlombecy, bicy yu de coz nu rlag yñi Ñgyoozh nu gyicy yu. Gaze' nu gut yu. Pach dey yu lat de baa ni gyitoo bel ni den. Orze' byayu cuerp niy.<sup>37</sup> Tees biñ nu bicy Ñgyoozh nu byabañ, mi ze' wangadz cuerp nim.<sup>38</sup> Orze' na der bicy na, yá rnée lo der coz nu rlag yñi nu gad lagy der nu Ñgyoozh gyicy sulagy mi ni mbecy nu nac Jesuuz.<sup>39</sup> Nunu rlag yñi gad lagy der nu dela mbecy nu gyicy cup consuel lo Crisht gla dey ni dela cyi. Ze' leey nu bzeeñ Moisees wancyiñ yñi nu gyicy yñi nu la de mbecy ni de cyi nu ricy yu.<sup>40</sup> Orze' bicy cuidad der nis zac ru coz nu mnii de yu nu mnii por cuen ni Ñgyoozh gulas,<sup>41</sup> ornu pcaa dey gal nu Ñgyoozh mnii:

De ru mbecy rgubdzaa, güii der.

Gua nu ic der, nunu gat der,

gun coz nu gyicya tiem nu cyiñ ru gyishlombecy ii, nde' tub coz nu rila wayeña lagy ru.

Mas shaal mbecy coz ze' lo der, tees wayeña lagy ru, nam —na Baly rab yu de mbecy nu nguaa nañ yu' ze'.

<sup>42</sup> Na lat nu bruu Baly nu Bernabee nañ yu' nu rsya' de mbecy Israael riidz ni Ñgyoozh, orze' de mbecy nu walab mbecy Israael nese nu gul yu mnii yu cha ga' dey nañ yu' ze' tuuba' sab, dzi nu zu lagy dey, nunu nii zir dey de coz ze' lat dey.<sup>43</sup> Na ornu blaazh brush las de mbecy, orze' zañ mbecy Israael, nunu zañ mbecy nu gush leey ni de mbecy Israael guaca dey ich Baly nu Bernabee. Orze' Baly briic yu consef ni dey, nunu mnii yu zaab gash la dey de coz nap nu rbic Ñgyoozh niy.

<sup>44</sup> Orze' tuuba' sab, dzi nu rzu lagy mbecy, tona' la mbecy zigy byatublaazh yu. Sñuu ga zil' mbecy ricy falt par nu laz de mbecy gyedz ze'. Byatublaazh dey par nu zuub gyidag yu de riidz ni Shuaan den.<sup>45</sup> Na ornu de mbecy Israael bzaac dey de mbecy zigy ze', orze' tona' la bicy saap lagy dey ich Baly nu Bernabee. Orze' mnii dey riidz nu za contr ni riidz nu mnii Baly, nunu gugy zi dey yu.<sup>46</sup> Orze' Baly nu Bernabee fert zir mnii dey. Orze' na dey:

—Rlagy ñi nu nu loga la shaal dë riidz ni Ñgyoozh lo de ru. Tees como de ru rzu chu der de riidz ze', nunu como de ru ricy der ub ru par mbecy nu wangyap nu cui mbañ tub la, orze' dë ya zaan dë de ru. Na chä de lat de mbecy nu walab mbecy Israeel,<sup>47</sup> gun ni b icy Shuaan den mandaar ornu nam:

Ya b icya nu nar gal nu na tub yaa  
par nu zac de mbecy nu walab mbecy Israeel.  
Ya gyicya nu dela mbecy nu yu' gal nu blaazha' zir ze'  
nu zet ni gyishlombecy  
cui mbañ dey nu nac ru,  
nam —na dey.

<sup>48</sup> Na ornu güeñ de mbecy nu walab mbecy Israeel de riidz ze', orze' tona' la bet lagy dey, nunu b icy zily dey riidz ni Ñgyoozh. Nunu de yu nu bi pcui Ñgyoozh par nu cui mbañ yu tub la, brugyi' ricy cup dey consuel lom. <sup>49</sup> Orze' brush las riidz ni Ñgyoozh par dutuub la lugaar gaab ga ni Antioquía ni Pisidia. <sup>50</sup> Tees de mbecy Israeel pcha' dey ic de mbecy zub lo gyedz ze', nunu pcha' dey ic de biñ mñaa lily nu walab mbecy Israeel, de biñ mñaa nu driib zily Ñgyoozh. Orze' de mbecy ze' brugyi' ricy dey nu rsheed zi dey Baly nu Bernabee. Orze' pcyuu nu dey yu lo de yu ni dey. <sup>51</sup> Orze' Baly nu Bernabee bdib dey gyid lab yu par tub muesht nu gabe nu wangash de mbecy gyedz ze' dey. Orze' bruu dey lugaar ze', zay tub gyedz nu la Iconio. <sup>52</sup> Tees de mbecy Antioquía ni Pisidia nu ricy cup consuel lo Crisht tona' la zu cyit lagy dey, nunu riib ic za' la Espiriit Yon ni Ñgyoozh nañ lardoo dey.

#### Baly nu Bernabee pshaal yu riidz ni Ñgyoozh Iconio

**14** Na Iconio tublaazh la gua Baly nu Bernabee nañ yu' nu rsya' de mbecy Israeel riidz ni Ñgyoozh. Tona' la nap mnii dey. Nde' nu tona' la mbecy zigi b icy cup dey consuel lo Crisht. Yu' mbecy Israeel b icy cup yu consuel lo Crisht, nunu yu' ga' mbecy nu walab mbecy Israeel b icy cup yu consuel lom. <sup>2</sup> Tees de mbecy Israeel nu wangyicy cup consuel lo Crisht b icy dey nu pcha' ic mbecy nu walab mbecy Israeel, nunu b icy dey nu bish cya dey ich de b icy na. <sup>3</sup> Tees Baly nu Bernabee tuñ pcyiñ dey lugaar ze'. Wanchib la dey pshaal yu riidz ni Shuaan den. Mnii dey nu tona' la nap ricy num mbecy, nunu mi ze' b icy mi nu gud lagy de mbecy nu de riidz nu rnii dey, nde' coz nu laab ñi. De mbecy gud lagy dey nu riidz ze' rishli, gun Shuaan den briic mi mod nu gyicy dey nusuriidz gal nu de coz nu ricy nu za nu ic mbecy. <sup>4</sup> Orze' dela mbecy gyedz ze' byac cup shcab ni dey. Tub nac yu guc nuy de mbecy Israeel, tub naca'y guc nuy Bernabee nu Baly. <sup>5</sup> Orze' de mbecy nu walab mbecy Israeel, nu de mbecy Israeel, nu de yu nu riib ic ni dey, laab de yu ze' mnii too dey nu shiñ gyicy nu dey Baly nu Bernabee. Orze' mnii too dey nu goow gyita'y Baly nu Bernabee gashtal gat la dey. <sup>6</sup> Na ornu gud lagy Baly nu Bernabee, orze' bruu chu dey. Zay par lo de yu ni Listra nu Derbe, cyup gyedz nu ri lo de yu nu la Licaonia. <sup>7</sup> Ze' pshaal dey de riidz nu sac ni Jesuuz.

Baly nu Bernabee pshaal yu riidz ni Ñgyoozh Listra

<sup>8</sup> Listra zu tub mbecy coj. Yu ze' zub zi'l yu, gun gaal zi'l nu gul yu rila wagac zay. <sup>9</sup> Ze' güeñ yu riidz nu rnii Baly. Orze' Baly gud lagy yu nu ricy cup yu ze' consuel lo Crisht, nunu nde' nu gac gyac yu. Orze' Baly mbi la bgüiyy loy. <sup>10</sup> Orze' ye la brish tiy. Orze' nay:

—¡Wes su nunu li bzu! —nay.

Orze' rzab lay wes suy. Nunu brugyi' lay rzay. <sup>11</sup> Na ornu de mbecy zigi bzaac dey nu ni b icy Baly, orze' brugyi' nu rbish ti dey. Orze' na dey nu riidz yu, riidz Licaonia:

—¡De ñgyoozh gush dem mod nu na mbecy, nunu bet dem gashtal lo la den ii! —na dey.

<sup>12</sup> Mnii dey nu Bernabee nac yu tub ñgyoozh nu la Júpiter. Ze' Baly mnii dey nu nac yu tub ñgyoozh nu la Mercurio, gun yu ze' yu nu rnii. <sup>13</sup> Orze' de uz nu zu riiñ nañ yu' ni ñgyoozh Júpiter, yu' nu zub ru' gyedz, orze' uz ze' gua nuy la be tor nu gyee. Yu ze' nu de mbecy ngulagy dey ñgyuut yu chigud ze' nu cuic dey tub gun lo Baly, gal nu lo Bernabee. <sup>14</sup> Na ornu Baly nu Bernabee güeñ dey de coz nu rlagy de yu ze' nu gyicy yu, orze' pshaal la dey shab yu, nunu gush dey carer gu'y lat de mbecy zigi ze'. Orze' brish ti dey.

<sup>15</sup> Orze' nay:

—Der mbecy, ¿lagu ni ricy der? Dë ya nac dë mbecy gal nu na' zi'l de ru. Nunu dë ya yap dë ii par nu rica nu gad lagy der nu laa yaa der de coz nu rila wacyiñ ii, nunu "O" nii der ni Ñgyoozh mbañ, biñ nu psa' lagy gyibaa, nu gyishlombecy, nu nisyudoo, nu dela coz nu yu' de lugaar ze'. <sup>16</sup> Gulas Ñgyoozh bzaan mi nu gyicy mbecy la zi'l coz nu rlagy ub yu gyicy yu. <sup>17</sup> Tees dub laa tiem rlyuum cyu nac mi ornu ricy mi coz nap. Ricy mi nu yet gyey, nunu rbic mi cosech. Rbic mi coz nu gow der, nunu ricy mi nu zu cyit lagy der —na dey.

<sup>18</sup> Mas nu de riidz ze', tees tona' la biigy par nu cay ni dey nu cue' cut dey de tor ze' par tub gun nu cha lo dey.

<sup>19</sup> Orze' la be mbecy Israeel bruu dey Antioquía ni Pisidia, nunu bruu ga' dey Iconio. Orze' za dey par Listra. Ze' bdu' dey lagy de mbecy zigi nu cha dey contr ni Baly. Orze' de mbecy pshet dey gyita' Baly nu ñgyut dey yu. Orze' bgayu tuñ la dey yu par ru' gyedz, gun psa' lagy dey nu gut yu. <sup>20</sup> Tees ornu de mbecy nu ricy cup consuel lo Crisht byatublaazh dey lo Baly, orze' weshtey. Orze' gu' ga'y lat gyedz tuuba' tir. Na tuuba' dzi Baly nu Bernabee bruu dey Listra za dey par Derbe.

<sup>21</sup> Orze' Baly nu Bernabee pshaal dey riidz nu sac ni Crisht Derbe, nunu pshet gras dey lardoo zañ mbecy par nu gyicy cup dey consuel lo Crisht. Orze' bish cya dey. Bruu dey Derbe za'y par Listra. Orze' bruu dey Listra. Zay par Iconio. Orze' bruu dey Iconio. Za dey par Antioquía ni Pisidia. <sup>22</sup> Nez nu za dey, gua zaab lo dey de mbecy ni Crisht nu yu' de lugaar ze'. Bicy dey nu byafert dey nu nac de coz ni Crisht, nunu mnii dey nu gyicy paa dey nu de riidz nim nu bi güeñ dey. Blyuu dey ni dey. Orze' na dey:

—Zañ coz deet rlagy ñi nu zac na par nu chu'n lo gyeł gubier ni Ñgyoozh —na dey.

<sup>23</sup> Baly nu Bernabee bloo su dey yu bel ni tub nac ga de mbecy ni Crisht. Orze' mnii nu dey Ñgyoozh, nunu pca dey ni ub yu nu cue' goy gyit. Orze' bzeeñ dey de yu bel ze' yaa Ñgyoozh, biñ nu ricy cup dey consuel lo, par nu güiim dey.

### Baly nu Bernabee cush cya dey par Antioquía ni Siria

<sup>24</sup> Na ornu bded dey lo de yu ni Pisidia, orze' bru'ña dey lo yu ni Panfilia. <sup>25</sup> Orze' za dey tub gyedz nu la Perge. Ze' pshaal dey de riidz ni Crisht. Orze' bruu dey Perge, za dey par Atalia. <sup>26</sup> Ze' gush dey tub barc. Orze' za dey par Antioquía, ze' nu bgu' mbecy dey yaa Ñgyoozh par nu locyuub mi dey nunu par nu güiim dey lat nu gyicy yu riiñ nim, riiñ ze' nu bi bza' lo dey na.

<sup>27</sup> Na ornu bru'ña dey Antioquía, orze' b icy tublaazh dey de mbecy ni Crisht. Orze' pshaal dey lo de mbecy ze' dela coz nu b icy nu Ñgyoozh dey. Pshaal dey nu lac mod b icy Ñgyoozh par nu byaal nez nu cha dey lo de mbecy nu walab mbecy Israel, gun orze' de yu ze' gac gyicy cup dey consuel lo Crisht. <sup>28</sup> Orze' tuñ tiem byeñ dey lugaar ze' nu de mbecy ni Crisht.

### De mbecy ni Crisht yu' tublaazh dey Jerusaleeng

**15** Orze' la be mbecy bruu dey lo de yu ni Judea guay Antioquía. Orze' blyuu dey ni de b icy na. Orze' na dey:

—Wac ruu mbañ den benu waca beey sircunsision cuerp ni den gal nu rniiñ lo leey nu bzeeñ Moisees —na dey.

<sup>2</sup> Orze' Baly nu Bernabee fert la mnii dey nu walab ni. Orze' zi ga la bee nu dey yu riidz. Orze' de mbecy mnii too dey nu Baly nu Bernabee nu la be mbecy nu yu' Antioquía, de yu ze' rlagy ñi cha dey par Jerusaleeng par nu cha güiim dey de aposht nu de yu bel, gun orze' cugyi' dey nu nac de coz ze'.

<sup>3</sup> Orze' de mbecy ni Crisht ze' bzuu nez yu dey zay. Lat nu za dey lo yu ni Fenicia gal nu lo yu ni Samaria, orze' bdzeel dey de mbecy ni Crisht. Orze' byoo dey rishlo dey lac mod guc. Orze' mnii dey nu de mbecy nu walab mbecy Israel byac dey mbecy ni Ñgyoozh. Ornu güeñ de mbecy nu yu' lugaar ze' nde', orze' tonal la bet lagy dey.

<sup>4</sup> Na ornu bri dey Jerusaleeng, orze' de mbecy ni Crisht, nu de aposht, nu de yu bel, de yu ze' gua nii nu dey yu ñgyoozh. Orze' Baly nu Bernabee byoo dey rishlo dey nu lac mod b icy nu Ñgyoozh dey. <sup>5</sup> Orze' la be mbecy nu ricy cup consuel lo Crisht, yu nu gunash leey ni de mbecy fariseo, orze' wes su dey. Orze' na dey:

—Rlagy ñi caan de mbecy ni Crisht nu walab mbecy Israel nu caa dey beey sircunsision cuerp ni dey, nunu rlagy ñi caan dey nu gyicy yac yu nu leey nu bzeeñ Moisees —na dey.

<sup>6</sup> Orze' de aposht nu de yu bel byatublaazh dey par nu go dey riidz nu nac de coz ze'. <sup>7</sup> Na ornu blazh bee dey riidz, orze' wes su Bed. Orze' nay:

—Der b icy na, de ru rad lagy der nu tonal la gulas pcui Ñgyoozh ya lat de ru par nu shaalq de riidz ni Crisht lo de mbecy nu walab mbecy Israel, gun orze' gyeñ dey, nunu gyicy cup dey consuel lom. <sup>8</sup> Ñgyoozh, biñ nu rad lagy la na lardoo mbecy, b icy mi nu rad lagy den nu cyiñ de mbecy nu walab mbecy Israel nu gac dey mbecy ni Crisht. Ni b icy mi ornu briic mi Espiriit Yon nim ni dey gal nu b icy nu'm de ub na. <sup>9</sup> Mod nu b icy num de ub na laab ni' zi'l mod b icy num dey. B icy sulagy mi de cyi nu b icy dey, gun ricy cup dey consuel lo Crisht. <sup>10</sup> Orze' na ñlagu rlagy der gyicy ru preb Ñgyoozh ornu ricy der nu deet rzac de mbecy nu ricy cup consuel lo Crisht? Coz nu rnii der nu gyicy dey, nde' coz nu waggee den, gal nu de gyitoo bel ni den wangaggee dey. <sup>11</sup> Ze' de ub na rzeña lagy den nu gruu mbañ na nu nac faboor nu ricy nu Shuaan den Jesuuz. Ni' zi'l de yu ze' —na Bed.

<sup>12</sup> Dela mbecy gucua ri dey ornu güeñ dey nu rnii Baly nu Bernabee, ornu bzeed cuen dey lo dey dela coz ily nu b icy Ñgyoozh, nunu dela nusuriidz nu b icy mi lat de mbecy nu walab mbecy Israel lat de riiñ nu b icy dey. <sup>13</sup> Na or blazh nu mnii Baly nu Bernabee, orze' na Santiag rab yu de mbecy:

—Bzuub gyidag der, b icy na. <sup>14</sup> Simoo Bed bi byoo ga'y rishlon mod nu b icy Ñgyoozh num de mbecy nu walab mbecy Israel ornu nap b icy num dey tir loga la. Bloo sum tub nac mbecy nu gac nim lat dey. <sup>15</sup> Ni' zi'l yaruu riidz nu pcaa de yu nu mnii por cuen ni Ñgyoozh.

<sup>16</sup> Orze' na Ñgyoozh: Or laz h nde', orze' ya' cush cya locyuuba de nez Dabi, gun mnu nez Dabi, tees ya zu napu ñii.

<sup>17</sup> Gun orze' dela de' zir mbecy yub dey Shuaan yu. De lo la mbecy nu ya pcui nu gac ne yub dey ya.

<sup>18</sup> Ni na Ñgyoozh, biñ nu bi gulas briic nu gad lagy de mbecy de nde', rniiñ.

<sup>19</sup> Ni' ya rsa' lagya nu walagy ñi nu gyicy deet den nu de mbecy nu walab mbecy Israel, de yu nu yac mbecy ni Ñgyoozh. <sup>20</sup> Tees rlagy ñi caan tub gyicy zeed na lo dey. Rlagy ñi niin lo dey nu cue' gow dey de coz nu a' yad ñi nu gow yu. Cue' gow dey de gun nu briic mbecy lo nab. Rlagy ñi niin nu cue' gal dey de mbecy nu wanchelaay, nunu cue' gow dey bañcyug nu psii mbecy yeñ, nunu cue' gow dey reñ. <sup>21</sup> Gun nese gulas nu gashtal dzi na rlab mbecy leey nu bzeeñ Moisees nañ de yu' nu rsya' de losa'n riidz ni Ñgyoozh. De sab la, dzi nu rzu lagy mbecy, rlab dey riidz nim, nunu dela gyedz rshaal mbecy riidz ze' nim —nay.

### Gyicy nu bzeed de aposht lo de mbecy nu walab mbecy Israel

<sup>22</sup> Orze' de aposht, nu de yu bel byatublaazh dey, nu dela mbecy ni Crisht. Orze' mnii too dey nu co su dey

la be mbecy lat dey, par nu cha nu dey Baly nu Bernabee par Antioquía. Orze' bloo su dey Judas, laab yu ze' yu nu la Barsabás, nunu ni' zi'l bloo su ga' dey Silas. De yu ze' mbecy nu rca lagy de bicy na lo.

<sup>23</sup> Orze' briic dey tub gyicy za nu dey. Gyicy ze' rniiñ: "Dę ya, nu de aposht, nu de yu bel, nu de b icy na, zeed dę ñgyoozh ni de ru b icy na nu walab nez de mbecy Israeel. Zeed dę ñgyoozh ni de ru mbecy nu yu' Antioquía, nunu ni' zi'l ni de ru mbecy nu yu' lo yu ni Siria, nunu ni' zi'l ni de ru mbecy nu yu' lo de yu ni Cilicia. <sup>24</sup> Bi güeñ de nu la be mbecy nu bruu lat dę bru'ña dey lat der nu b icy dey nu rac deet nañ shcab ni der nu nac de coz nu rnii dey. Tees dę ya wannęe dę lo dey nu ni gyicy yu. <sup>25</sup> Nde' nu na byatublaazh dę, nunu b icy de tub zi'l shcab nu pcui dę la be mbecy nu cyid tooy rishlo der. Orze' bzuu nez dę yu cyid yu lo der. Yad nu dey Bernabee nu Baly, de yu nu dzi rca den. <sup>26</sup> De yu ze' mas rlagy mbecy cut yu dey, tees ricy paa dey nu coz nu rlagy Shuaan den Jesucrisht. <sup>27</sup> Orze' gzuu nez dę Judas, nu Silas nu cyid yu lo der, gun orze' nii dey lo der par nu gyeñ gyidag la der dela coz nu caa dę lo gyicy ii. <sup>28</sup> Gun Espiriit Yon ni Ñgyoozh nu dę ya rzee nu walagy ni caa dę reña' coz nu gyicy der, sinu de coz nu rlagy ni gyicy der, de coz nu zat dę lo gyicy ii. <sup>29</sup> Cue' gow der coz nu rbic mbecy lo nab. Cue' gow der reñ, nunu cue' gow der bañcyug nu gut nu psii mbecy yeñ. Cue' gal der de mbecy nu wanchelaar. Tona' la nap gyicy der benu cue' la gyicy der de coz ze'. Bi nii ga'n." Ni cañ lo gyicy ze'.

<sup>30</sup> Orze' bzuu nez dey de mbecy ze' za dey par Antioquía. Na ornu bri dey Antioquía, orze' byatublaazh dela mbecy nu ricy cup consuel lo Crisht. Orze' briic dey gyicy ze' nu sys' dey. <sup>31</sup> Na ornu psya' de mbecy gyicy ze', orze' riidz nu ta' loñ b icy ni nu tona' la bet lagy dey. <sup>32</sup> Judas nu Silas, como nac dey mbecy nu rnii por cuen ni Ñgyoozh, chi ñuu mniiy lo de b icy na. Briic yu baloor ni dey, nunu b icy fert yu dey nu nac de coz ni Crisht. <sup>33</sup> Na ornu bi rac la be tiem nu rcyiiñ dey lugaar ze', orze' de b icy na mnii nu dey yu ñgyoozh. Orze' bruu dey yay lo de mbecy nu bzuu nez yu. <sup>34</sup> Tees Silas mnii tooy nu gyiyeeñ gay. <sup>35</sup> Ni' Baly nu Bernabee byeeñ dey Antioquía. Bicy dey riiñ tublaazh nu zigy de' zir mbecy. Blyuu dey ni de mbecy, nunu pshaal dey riidz ni Shuaan den lo de mbecy.

### Baly bla' losa'y nu Bernabee

<sup>36</sup> Despuees, or gules, orze' na Baly rab yu Bernabee: —Yaa chan cha güiin de b icy na nu yu' dela gyedz ze' nu pshaal na de riidz ni Shuaan na. Cha güiin la ricy dey —nay.

<sup>37</sup> Tees Bernabee rlag yu cha nuy Waa. Laab yu ze' yu nu la Marc. <sup>38</sup> Ze' Baly psa' lag yu nu a' nap nu cha nu Waa dey, gun bzeen gay riiñ nu b icy dey ornu pcyi-iñ dey Panfilia, nunu wangyicya'y riiñ nuy dey. <sup>39</sup> Orze' bee zi dey riidz nu losa'y. Orze' b icy zet lag y dey lo losa'y. Orze' Bernabee za nuy Marc. Orze' gush dey tub barc nu za par Chipre. <sup>40</sup> Ze' Baly bloo suy Silas par nu gac losa'y. Orze' de mbecy bzeeñ dey Baly yaa Ñgy-

oozh par nu locyuub mi yu, nunu güiim yu. Orze' bruy Antioquía zay. <sup>41</sup> Orze' bded yu lo yu ni Siria, nunu bdeda'y lo yu ni Cilicia. Lat nu gua zaab loy de mbecy ni Crisht, orze' b icy fert yu dey nu nac coz nim.

### Timoteo rded nuy Baly nu Silas

**16** Orze' Baly zay par Derbe nu Listra. Ze' bdzeel yu tub mbecy nu ricy cup consuel lo Crisht nu la Timoteo. Yu ze' i'ñ tub biñ mñaa Israeel. Ze' uz yu nac yu mbecy griego. Naay laab mbecy ni Crisht. <sup>2</sup> Orze' dela b icy na nu yu' Listra, nunu dela b icy na nu yu' Iconio nap mnii dey niy. <sup>3</sup> Baly rlag yu cha nuy Timoteo, nde' nu pcaay beey sircunsision cuer p niy. Ni b icy Baly, gun dela mbecy Israeel nu yu' de lugaar ze' gud lag yu nu uz Timoteo nac yu tub mbecy griego. <sup>4</sup> Orze' lat nu gusa dey dela gyedz, blyuu dey ni de mbecy gal nu mnii de aposht nu de yu bel nu yu' Jerusaleeng ornu byatublaazh dey. <sup>5</sup> Orze' dela mbecy ni Crisht fert zir guc nu dey de coz nim, nunu tub dzi ga ryañ zir dey.

### Bde' tub mbecy Macedonia lo Baly

<sup>6</sup> Espiriit Yon ni Ñgyoozh wansaan mi nu shaal dey ridz ni Crisht lo de mbecy Asia, nde' nu bded dey dub tuuñ la ze' nu ñgyiid ru' yu ni Frigia nu Galacia. <sup>7</sup> Na ornu bri dey ru' bzaa ni Misia, orze' b icy pee dey ñgyay lo de yu nu la Bitinia. Tees Espiriit ni Jesuuz wansaan mi nu ñgya dey lugaar ze'. <sup>8</sup> Orze' bded nez zi'l dey lo yu ni Misia. Gaze' nu za dey par Troas. <sup>9</sup> Na ornu bri dey Troas, orze' rel bde' lo Baly. Bzaac yu tub mbecy Macedonia mod ni pcaal. Orze' mnishbaay lo Baly. Orze' nay: "Ciid ru par Macedonia nu locyuub ru dę ya", nay.

<sup>10</sup> Orze' cuanzir bzaac Baly nde', orze' bzu lily dę nu cha dę par Macedonia, gun mnii too dę nu ñgyoozh bredz mi dę ya par nu shaal dę de riidz nap ni Crisht lo de mbecy nu yu' ze'.

### Baly nu Silas zay Filipos

<sup>11</sup> Orze' Troas brush dę tub barc. Za dę par lo tub nac yu nu ri lo nisyudoo nu la Samotracia. Orze' bruu dę ze'. Orze' tuuba' dzi bri dę tub gyedz nu la Neápolis.

<sup>12</sup> Orze' bruu dę ze'. Za dę gyedz nu la Filipos. Filipos, nde' tub gyedz nu bzaa de mbecy Rom, nunu nde' gyedz nu ricy ni presis ni de lugaar ni Macedonia ze'. Orze' ze' byeeñ dę la be dzi. <sup>13</sup> Orze' sab, dzi nu rzu lag y mbecy Israeel, orze' bruu dę par ru' gyedz. Za dę par ru' gyoow, ze' nu psa' lag dę nu gyatublaazh mbecy nu nii nu dey ñgyoozh. Orze' gucuä dę ze' rdo dę de riidz nu sac ni Crisht nu de biñ mñaa nu byatublaazh ze'. <sup>14</sup> Ze' tub biñ mñaa nu güeñ riidz nu rdo dę, mi ze' lam Lidia. Mi ze' mbecy Tiatira nunu ricy mi daljez nu rut mi negy bizat. Nac mi tub mbecy nu rca ñgyoozh, nunu Shuaan den pshaal mi shcab nim par nu gyet lag mi cuen de riidz nu mnii Baly. <sup>15</sup> Orze' briib nis dey mi, nunu briib nis dey dela famil nim. Orze' mnishbaam lo dę. Orze' nam:

—Yaa gyan cyiiñ der yu' benu rash der shcab nu ya rishli ricy cupa consuel lo Shuaan na —nam.

Orze' pcuugy mi lardqo dę nu gyä dę yu'm.

<sup>16</sup> Orze' tub dzi ornu za dę ze' nu ryatublaazh mbecy par nu rnii nu dey Ñgyoozh, orze' bdzeel dę tub fiñ feñ nu nac moz por fers la ni mbecy. Tub nuras b icy niy fiñ ze', nunu rbooñ cuen par nu nac nuras ze'. Tona' la sheñ tiñ rad ni patroo ñiñ nu nac nu rbooñ cuen.

<sup>17</sup> Tees biid cañ ich dę nu Baly, orze' brugyi' ye la rbish tiñ. Orze' nañ:

—¡De mbecy re ricy mi coz nu rnii Ñgyoozh biñ nu zi-ly zir nac! ¡Rbic mi nu gad lagy der lac mod ruu mbañ ru! —naañ.

<sup>18</sup> Zañ dzi ni b icy ñi gashtal ornu bdza' Baly niñ. Orze' bish cyay bgüiñ loñ. Orze' nay rab yu nuras ze':

—Par nu nac rishbeey ni Jesucrisht, ya rnëe lor nu ruu chur lo fiñ ii —nay.

Orze' lueg la bruu nuras ze'.

<sup>19</sup> Na ornu de patroo ni fiñ ze' gud lagy dey nu wada' mod nu gyicy dey gan tiñ nu nac ñii, orze' bdu' yaa dey Baly nu Silas. Gua nu dey yu lo de fushtiz lol'i ze' nu rgua de yu zu riiñ. <sup>20</sup> Na ornu bru'ña dey lo de fushtiz, orze' na dey:

—De mbecy ii nac dey mbecy Israeel, nunu ricy dey coz deet ledz na. <sup>21</sup> Rlyuu dey nu gyicy na coz nu cha contr ni leey. Como de ub na nac na mbecy Rom, nde' nu wac nii den nu nap de coz nu rnii dey. Ni wac gyicy den gal nu rlagy dey —na dey.

<sup>22</sup> Orze' ni' de mbecy zigy bish cya dey ich dey. Orze' de fushtiz por fers la bloo dey shab dey. Orze' pcaa dey mbecy nu gaaz dey yu nu laspeed. <sup>23</sup> Na despuees ornu dzi bi bgaaz dey yu, orze' mne' dey yu nañ yu' gyiib. Orze' pcaa dey de yu nu riib ic yu' gyiib ze' nu nap gyicy segur yu dey. <sup>24</sup> Na ornu bi gu' riiñ ze' yaa yu nu riib ic ze', orze' mne'y de yu ze' gal ze' nu g yi zir ni nañ yu' gyiib ze'. Orze' briy gyi' de yu ze' nañ gyeegy nu Zub gazel cyup ya gyibag. Gaze' nu b icy nicey dey ñi.

<sup>25</sup> Orze' tub guzeel rel, Baly nu Silas rnii nu dey Ñgyoozh, nunu rul dey lom. Nunu reñ dela de pres.

<sup>26</sup> Orze' derepent la briib tub duru ily. Orze' pcueñ yu' gyiib gashtal ze' nu zu laa simient niñ. Orze' lueg la byaal dela ro', nunu bet lag dela caden nu pcacuuñ dey de pres. <sup>27</sup> Orze' yu nu riib ic yu' gyiib ze' brish yu yaa. Na ornu bzaac yu nu naal dela ro' ni yu' gyiib, orze' psa' lagy yu nu briib dze dela pres. Orze' blooy mandzicy niy nañ gyid yu'ñ, nunu b icy peey nu ñgyuut yu ub yu. <sup>28</sup> Orze' brish ti Baly. Gaze' nu nay:

—¡Cue' shiñ gyicy nur ub ru gun ii yu' dela de! —nay.

<sup>29</sup> Orze' yu nu riib ic ze' bredz yu mbecy nu cha nuy gyi. Orze' carer la gu'y nañ yu' ze'. Nunu rash la bis yu nu tanta' gudzib yu. Orze' wes saa lay yeñ gyi' Baly nu Silas. <sup>30</sup> Orze' blooy de yu ze' lugaar ze'. Gaze' nu nay rab yu dey:

—¿La ñuu coz rlagy ñi nu gyicya par nu ruu mbaña? —nay.

<sup>31</sup> Orze' na Baly nu Silas:

—B icy cup consuel lo Shuaan den, Jesucrisht. Orze' ruu mbañ ru nu dela famil nir —na dey.

<sup>32</sup> Orze' pshaal dey riidz ni Shuaan den loy nu lo dela mbecy nu rcyiñ loy. <sup>33</sup> Na laab or ze' yu nu riib ic ze' za

nuy dey nu bdiib yu ze' nu guud güii ni dey. Orze' lueg la wi nis yu nu dela famil niy. <sup>34</sup> Orze' ya nuy Baly nu Silas. Gup yu par nañ yu' nuy dey. Ze' briic yu coz nu gow dey. Orze' mbecy nu riib ic ze' nu dela famil niy tona' la gucyit lagy dey gun bi ricy cup dey consuel lo Crisht.

<sup>35</sup> Na tuuba' dzi or napor, orze' de fushtiz bzuu nez dey ayudant ni dey lo yu nu riib ic ze'. Orze' na dey rab yu:

—Blaa de mbecy ze' —na dey.

<sup>36</sup> Orze' yu riib ic ze' gua mniy lo Baly. Orze' nay:

—De fushtiz bzeed dey rasooñ nu laq ru nu Silas. Orze' na ruu der. Gac gya der dub gusht la —nay.

<sup>37</sup> Orze' na Baly rab yu ayudant ze':

—Pshet dey yag ich dę lo rgüii la de mbecy zigy, nunu ii nigul ri bee dey dę. Nunu dę ya nac dę mbecy Rom. Ze' ii mne' dey dę ya nañ yu' gyiib. Orze' na rlagy dey coy dę ya dze ga. Rila wac. Ub la de fushtiz rlagy ñi nu cyid dey coy dę ya —nay.

<sup>38</sup> Na de ayudant gua niiy lo de fushtiz de riidz nu mnii Baly. Na ornu güeñ de fushtiz nu Baly nu Silas nac dey mbecy Rom, orze' tona' la gudzib dey. <sup>39</sup> Orze' za dey lo Baly nu lo Silas, nunu bdiñ dey rishsulagy lo dey. Orze' gua nu dey de yu ze' par ich yu' gyiib nunu mnishbaa dey loy nu ruu dey gyedz ze'. <sup>40</sup> Orze' Baly nu Silas bruuy nañ yu' gyiib zay par yu' Lidia. Ze' bdzeel dey dela b icy na, nunu briic dey consuel ni de yu ze'. Orze' bruu dey yu' Lidia za dey.

### Baly nu Silas zay Tesalónica

**17** Nez nu za dey bded yu tub gyedz nu la Anfípolis, nunu bded dey tuuba' gyedz nu la Apolonia. Orze' bru'ña dey tub gyedz nu la Tesalónica. Orze' ze' zub tub yu' ze' nu rsya' mbecy Israeel riidz ni Ñgyoozh.

<sup>2</sup> Orze' Baly zay nañ yu' ze' como nil rzay. Orze' chon sab, dzi nu rzu lagy mbecy Israeel, orze' Baly bee nuy de mbecy riidz. Bzat yu de riidz nu bzeeñ Ñgyoozh.

<sup>3</sup> Orze' mniy tub mod par nu gyet gras lardoo de mbecy ze', nunu pshaal yu lo dey nu Mesías, bin nu ca lo cuen nu co mbañ mbecy, rlagy ñi nu gzac zim, nunu despuees ornu gat mi rlagy ñi nu gyabañ mi, nay. Orze' na ga'y rab yu dey:

—Laab Jesuuz, biñ nu ya rzata lo der, laab mi ze' nac mi Mesías, biñ nu ca lo cuen nu co mbañ mbecy —nay.

<sup>4</sup> Orze' guña lagy la be mbecy riidz nu rnii Baly, nunu guc nu dey Baly nu Silas. Ni' zi'l guña lagy zigy mbecy griego, de yu nu rca Ñgyoozh, nunu guña lagy zigy biñ mñaa Zub lo.

<sup>5</sup> Na de mbecy Israeel gusaap lagy dey. Orze' b icy tublaazh dey la be mbecy a' nap, gal nu mbecy gur rd-ed. Orze' b icy dey nu pcha' ic dela mbecy gyedz ze'. Orze' por fers la gu' dey nañ yu' Jasón. Byub dey Baly nu Silas nu cha nu dey yu lo de mbecy zigy. <sup>6</sup> Na ornu wangyad yu, orze' bgayu tuñ la dey Jasón nu de' zir de b icy na. Gua nu dey yu lo de fushtiz gyedz ze'. Orze' rbish ti dey. Orze' nay:

—¡De yu ii ricy deet dey dutuub la lugaar! ¡Na yada' dey gyedz ii nin! <sup>7</sup> ¡Nunu Jasón briic yu yu' nu rcyiñ

dey! ¡De yu ii za dey contr ni leey ni yu nu riib ic de nasyoong, gun rnii dey nu zu tuuba' mbecy nu riib ic, tub yu nu la Jesuuz! —na dey.

<sup>8</sup> Orze' nu riidz ze' b icy dey nu pcha' ic de mbecy zi-  
gy, nunu b icy dey nu pcha' ic de fushtiz nu yu' gyedz  
ze'. <sup>9</sup> Orze' de fushtiz pcaa dey Jasón nu de' zir de  
mbecy ze' nu zeeñ dey ñuu tiñ par nu cue' grib dze  
dey gyedz ze'. Gaze' nu blaa dey yu.

### Baly nu Silas zay Berea

<sup>10</sup> Na ornu bi becheñ, orze' lueg la de b icy na bzuu  
nez dey Baly nu Silas zay Berea. Na ornu bru'ña dey  
Berea, orze' gua dey nañ yu' nu rsya' mbecy Israeel ri-  
idz ni Ñgyoozh. <sup>11</sup> De mbecy Israeel nu yu' Berea napa'  
zir ricy dey gaze' de mbecy Tesalónica. Orze' tonal la  
yet lagy dey de riidz nu rnii Baly nu Silas. Nunu tub dzi  
ga psya' zir dey riidz nu bzeeñ Ñgyoozh ben a rishli de  
coz nu rnii Baly nu Silas. <sup>12</sup> Orze' zigy mbecy ze' b icy  
cup dey consuel lo Crisht gal nu zigy mbecy griego:  
tant biñ mñaa zub lo, nunu tant yu gyeey. <sup>13</sup> Tees ornu  
de mbecy Israeel nu yu' Tesalónica güeñ dey nu ni' zi'l  
Baly rshaal yu riidz ni Ñgyoozh Berea, orze' za dey ze'.  
Orze' brugyi' ricy dey nu rcha' ic de mbecy zigy.

<sup>14</sup> Orze' lueg la de b icy na bzuu nez dey Baly zay par ru'  
nisyudoo. Ze' Silas nu Timoteo rup laa dey byeeñ yu  
Berea. <sup>15</sup> De mbecy nu za nu Baly, de yu ze' za nu dey  
yu gashtal Atenas. Gaze' nu bish cya dey zay par Berea  
tuuba' tir. Za nu dey rasqo nu bzeed Baly lo Silas nu  
Timoteo. Baly mniy nu cha dey loy lueg lueg la.

### Baly nu Silas pcyiiñ dey Atenas

<sup>16</sup> Lat nu Baly blez yu Silas nu Timoteo Atenas, tonal  
la deet guc nañ lardooy ornu bzaac yu nu dzi zañ nab  
nguua gyedz ze'. <sup>17</sup> Nde' nu beey riidz nu de mbecy Is-  
raeel nu de' zir mbecy nu driib zily Ñgyoozh nañ yu'  
ze' nu rsya' dey riidz nu bzeeñ mi. Nunu de dzi la beey  
riidz nu cyu zi'l mbecy nu byap yu lat yagyi'. <sup>18</sup> Orze' la  
be mbecy nu rsya' leey nu la epicúreos nu la be mbecy  
nu rsya' ga' leey nu la estoicos brugyi' nu zi ro nu dey  
Baly riidz. Orze' na dey:

—¿La coz rnii mbecy nu dzi zaab ga ru' re? —na dey.  
Orze' tub naca' mbecy nay:

—Rlyu nu rzat yu ñgyoozh nu walab ñgyoozh guledz  
—na dey.

Ni rnii dey, gun Baly rshaal yu riidz ni Jesuuz, nunu  
rshaal yu riidz nu lac byabañ mi despuees nu bi gut  
mi. <sup>19</sup> Orze' gua nu dey yu tub lugaar nu la Areópago,  
ze' nu ryatublaazh tub nac mbecy nu zu riñ. Orze' na  
dey:

—Rlagy d e gad lagya de riidz cub nu rlyuur. <sup>20</sup> Ru rnii  
ir reñ ga la riidz lo d e, nde' nu rlagy d e gad lagya lac  
yaruu de riidz ze' —na dey.

<sup>21</sup> Ni mnii dey gun dela mbecy Atenas nu de' zir mbecy  
yad nu rcyiiñ Atenas walaga' dey gyicy yu reña'  
coz, sinu se nu niyy zi'l dey nunu se nu gyeñ zi'l dey ca  
na la de riidz cub.

<sup>22</sup> Orze' Baly wes suy lat de mbecy nu byatublaazh  
Areópago. Orze' nay:

—De ru mbecy Atenas, ya rzaca nu de mod la dzi ca  
ic der Ñgyoozh. <sup>23</sup> Gun lat nu rdeda ledz der, bzaac q de  
lugaar nu driib zily der Ñgyoozh. Byapa tub mez nu  
driib zily der tub ñgyoozh. Lo mez ze' ca letr. Orze' ze'  
rniiñ: "Ñgyoozh nu a' yu' lon", rniiñ. Ñgyoozh nu de ru  
driib zily ru, mas a' yu' lo der mi, mi ze' biñ nu gzata lo  
der na.

<sup>24</sup> Ñgyoozh, biñ nu psa' lagy gyishlombecy nu dela  
coz nu yu' gyishlombecy ii, mi ze' wacciiñ mi nañ yu'  
nu rzaa mbecy. <sup>25</sup> Ni' mbecy wac gyicy dey ni tub la coz  
nu locyuub dey mi, como ub mi rbic mi gyel mbañ ni  
dey, nunu rbic mi dela coz nu galagy ñi ni dey.

<sup>26</sup> Ñgyoozh psa' lagy mi tub mbecy. Lo nez yu ze'  
bruu de lo la nez mbecy. Ñgyoozh b icy mi nu yu' dey  
dutuub la gyishlombecy. Anzir nu sa' lagy mi dey, bi  
bloo ic mi gul chu' dey gyishlombecy, nunu bi bloo ic  
mi ca lugaar chu' dey. <sup>27</sup> Ni b icy mi, gun orze' yub dey  
mi, gun dzi ga gyad mi ni dey lat nu yub dey mi. Rishli  
Ñgyoozh a' zet la zum lo tub ga de ub na. <sup>28</sup> Gun par  
nu nac Ñgyoozh, mbañ den, nunu rcueñ den, nunu yu'  
den gyishlombecy ii. Gal nu mnii tub losa' der ornu  
pcaa riidz cyit. Orze' nay: "Ni' de ub na nac naa i'ñ  
mi", nay. <sup>29</sup> Orze' como nac naa i'ñ Ñgyoozh walagy ñi  
sa' lagy na nu nam gal nu na tub nab nu ryaa nu or o  
nu plat o nu gyita', tub nab nu bzaa mbecy nu shcab ni  
ub zi'l yu. <sup>30</sup> Gulas Ñgyoozh se la la b icy num de mbecy  
nu wangad lagy de coz ze'. Tees na rcaam dela mbecy  
nu yu' dutuub la lugaar nu ne' dey dela cyi nu ricy yu.  
<sup>31</sup> Gun Ñgyoozh bi b zum tub dzi nu li ri beem ni dela  
mbecy nu yu' gyishlombecy. Ni gyicy mi par nu nac tub  
biñ nu bi bloo sum. Nunu briic mi nu gad lagy mbecy  
nu segur la ni gyicy mi ornu b icy mi nu byabañ mi ze'  
despuees nu gut mi —na Baly.

<sup>32</sup> Na ornu güeñ dey nu mnii Baly nu byabañ tub  
mbecy gut, orze' yu' mbecy nu psuriidz dey yu. Yu' ga'  
mbecy nu mniy:

—De ya rlagya gyeñä ornu zat ru de riidz ze' tuuba'  
tir —na dey.

<sup>33</sup> Orze' bruu Baly lat dey. Zay. <sup>34</sup> La be mbecy guc  
nuy Baly, nunu b icy cup dey consuel lo Crisht. Dionisio,  
yu ze' tub mbecy nu bzu riiñ Areópago b icy cup yu  
consuel lo Crisht. Nu tuuba' mbecy nu b icy cup con-  
suel lo Crisht, tub biñ mñaa nu la Dámaris. Nunu zañ  
zir dey b icy cup yu consuel lo Crisht.

### Baly zay Corinto

<sup>18</sup> Na despuees ni de nu nde', bruu Baly Atenas,  
zay tub gyedz nu la Corinto. <sup>2</sup> Ze' bdzeel yu tub  
mbecy Israeel nu la Aquila. Yu ze' tub mbecy Ponto,  
tees sa bruuy lo de yu ni Italia nu mñaay, tub biñ  
mñaa nu la Priscila. Bruuy Italia, gun Clau, yu nu riib ic  
de nasyoong, pcaay dela mbecy Israeel nu ruu dey tub  
gyedz ni Italia nu la Rom. Orze' Baly gua güiyy dey.

<sup>3</sup> Orze' byeeñ nuy de yu ze', nunu tublaazh la b icy dey  
riñ, gun Baly nac yu tub yu nu rzaa yu' negy. Laaba'  
nde' daljez nu ricy Aquila nu mñaay. <sup>4</sup> De sab, dzi nu

rzu lagy de mbecy Israel, rza Baly nañ yu' nu rsya' de mbecy Israel riidz ni Ñgyoozh, gun rlag yu cuug yu lardoo de mbecy Israel, nunu tant mbecy nu walab mbecy Israel.

<sup>5</sup> Na ornu bruu Silas nu Timoteo Macedonia za dey par Corinto. Orze' Baly wangyicy yu reña' riiñ. Se tub lo zi'l nu rshaal yu riidz ni Crisht. Naal la blyuuy ni de mbecy Israel nu Jesuuz laab mi ze' Mesías, biñ nu bloo su Ñgyoozh. <sup>6</sup> Tees ornu gua dey contr niy, nunu ornu shiñ mnii dey niy, orze' bdib yu shab yu par nu gabe nu wangash dey riidz ze'. Orze' nay:

—Benu de ru dune'r, laab der yu' falt nir. Ya sac falt ne. Na par lo ya chä lat de mbecy nu walab mbecy Israel —nay.

<sup>7</sup> Orze' bruu nañ yu' nu rsya' de mbecy Israel riidz ni Ñgyoozh ze', zay cyiñ yu yu' tub mbecy nu la Ticio Justo, tub yu nu rca Ñgyoozh. Yu ze' rcyiñ yu cuit yu' nu rsya' de mbecy Israel riidz ni Ñgyoozh. <sup>8</sup> Tees Crispo, yu nu riib ic nañ yu' nu rsya' mbecy Israel riidz ni Ñgyoozh, yu ze' nu dela famil niy b icy cup yu consuel lo Shuaan den. Nunu zigy zir mbecy Corinto güeñ dey riidz ni Crisht, nunu b icy cup dey consuel lom, nunu wi nis dey.

<sup>9</sup> Na tub rel Shuaan den Jesuuz bruu zac mi lo Baly mod ni pcaal. Orze' nam rab mi yu:

—Cue' dzib ru. Zaab nii lar riidz ne. Cue' checar nu niir lo de mbecy. <sup>10</sup> Gun ya nac du ru. Ni tub la mbecy wac shiñ gyicy nuy ru, gun zigy de mbecy gyedz ii nac dey mbecy ne —nam.

<sup>11</sup> Orze' byeeñ yu ze' tub ña'n nu. Orze' blyuuy riidz ni Ñgyoozh ni de mbecy.

<sup>12</sup> Ornu Galión bdugiyi riiñ nu riib ic yu por cuen ni gubier ni Acaya, de mbecy Israel byatublaazh dey nu cha dey contr ni Baly. Orze' gua nu dey yu ze' nu dri bee Galión ni de mbecy. <sup>13</sup> Orze' na dey rab yu Galión:

—Yu ii rcuug yu lardoo de mbecy nu cay Ñgyoozh tub mod nu za contr ni leey —na dey.

<sup>14</sup> Na ornu Baly b icy peey niyi, orze' na Galión rab yu de mbecy Israel:

—Benu b icy yu coz nu walab se'ñ, o benu b icy yu tub cyi ilu tonal' la shiñ, orze' rlag yñi gyicy cupa paséz du de ru mbecy Israel. <sup>15</sup> Tees como rtub su der losa'r nu lac yaruu de riidz, nunu rtub su der losa'r nu nac ca na tub mbecy, nunu rtub su der losa'r nu nac leey ni ub der, orze' laab de ub ru rlag yñi nu za' lo der gyel cha' ic ni ub ru. Ya wari beę̄ coz nu na gal nu na nii —na Galión.

<sup>16</sup> Orze' pcyuu nuy dey par ich yu' ze' nu dri beey ni mbecy. <sup>17</sup> Orze' de mbecy pshet yaa dey Sosht, yu nu riib ic nañ yu' nu rsya' mbecy Israel riidz ni Ñgyoozh. Orze' bdi dey yu laab ro' la ze'. Nunu Galión wangyicy cuen yu de coz nu b icy dey.

### Baly bish cyay zay Antioquía

<sup>18</sup> Na despuees ni de nu nde', orze' Baly byeeñ yu zañ ru' dzi Corinto. Gaze' nu bruu lat de b icy na za nuy Priscila nu Aquila nañ tub barc par lo de yu nu la Siria. Tub gyedz nu la Cencrea, anzir chu'y nañ barc,

orze' b icy yu tub trat nu Ñgyoozh. Orze' b icy yag yu tooy par nu gabe nu segur la gyicy paay nu trat ze'.

<sup>19</sup> Orze' bru'ña dey Éfeso. Ze' bzeeñ Baly Priscila nu Aquila. Orze' guay nañ yu' nu rsya' de mbecy Israel riidz ni Ñgyoozh. Orze' bee nuy de mbecy Israel riidz.

<sup>20</sup> Orze' mnishbaa dey loy nu tuñ tiem gyiyeñ yu nuy dey tees wanshet ic yu. <sup>21</sup> Tees ornu bruu lo dey, orze' nay rab yu dey:

—Benu Ñgyoozh rlag yu, ya yap güi der tuuba' tir —nay.

Orze' gu'y nañ barc. Bruuy Éfeso zay.

<sup>22</sup> Orze' bru'ñay Cesarea. Orze' bruu ga'y ze' yay par Jerusaleeng. Yay nu niyi ñgyoozh nu de mbecy ni Crisht nu yu' ze'. Orze' bruu Jerusaleeng zay par Antioquia. <sup>23</sup> Na ornu pcyiñ yu lugaar ze' tub tiem, orze' bruu. Gusay lo de yu ni Galacia nu lo de yu ni Frigia. Bicy yu nu byafert zir ricy cup de mbecy consuel lo Crisht.

### Apolos pshaal yu riidz ni Crisht Éfeso

<sup>24</sup> Na tub mbecy Israel nu la Apolos briy Éfeso. Yu ze' tub mbecy Alejandría. Tona' la nap za riidz nu rniyi, nunu nap ñuu rad lag yu riidz ni Ñgyoozh. <sup>25</sup> Nap blyuuy mbecy niy de coz ni Shuaan den. Nunu fert la rniyi, nunu nap rlyuuy de coz ni Jesuuz. Tees par nu zu nis mbecy, tub zi la de coz nu blyuuy Waa, de nde' zi'l rad lag yu. <sup>26</sup> Orze' brugyi' nu wachib lay rniyi lat de mbecy nañ yu' nu rsya' mbecy riidz ni Ñgyoozh. Na ornu Priscila nu Aquila güeñ dey de riidz nu mniyi, orze' gua nu dey yu par yu'y. Ze' nap zir pshaal dey de coz ni Ñgyoozh loy. <sup>27</sup> Orze' Apolos mnii tooy nu chay par lo yu ni Acaya. Orze' de mbecy ni Crisht nu yu' Éfeso blocyub dey yu, gun bzeed dey tub gyicy lo de b icy na nu yu' ze'. Mniyi lo dey nu nap gyicy nu dey Apolos ornu griy. Na ornu briy Acaya, tona' la nap blocyub yu de yu nu brugyi' nu ricy cup consuel lo Crisht par nu nac faboor ni Ñgyoozh. <sup>28</sup> Lat de mbecy zigy nap blyuuy nu dzi radza de riidz nu rnii de mbecy Israel. Orze' wangaca' nii dey nu walab ni. Bzat yu riidz nu bzeeñ Ñgyoozh, ornu blyuuy ni dey nu Jesuuz, laab mi ze' Mesías, biñ nu ca lo cuen nu co mbañ mbecy.

### Baly zay Éfeso

<sup>19</sup> Lat nu ri Apolos Corinto, Baly gusay de lugaar ni logyi'. Orze' briy Éfeso. Ze' byap yu la be mbecy nu ricy cup consuel lo Crisht. <sup>2</sup> Orze' nay rab yu dey:

—¿A guud Espiriit Yon ni Ñgyoozh ni de ru, ornu nu loga la nu b icy cup der consuel lo Crisht? —nay.

Orze' na dey:

—Ni wangyeñ dë ti yu' tub Espiriit Yon ni Ñgyoozh —na dey.

<sup>3</sup> Orze' na Baly:

—Benu ni, orze' ¿lac yaruuñ ornu briib nis dey de ru? —nay.

Orze' na dey:

—Yaruuñ gal nu mnii Waa —na dey.

<sup>4</sup> Orze' na Baly:

—Waa briib nis yu de mbecy nu bi mne' de coz cyi, nunu mniiy lo de mbecy Israeel nu gyicy cup dey consuel lo biñ nu cyid despuees par lo ub yu. Mi ze' lam Jesuuz —nay.

<sup>5</sup> Ornu güeñ dey riidz ze', orze' bzu nis dey par nu gabe nu nac dey mbecy ni Shuaan den, Jesuuz. <sup>6</sup> Orze' Baly briib yaay too dey. Orze' Espiriit Yon ni Ñgyoozh b icy nim dey. Orze' mnii dey nu riidz reña' mbecy, nunu mnii dey por cuen ni Ñgyoozh. <sup>7</sup> Lo dela dey tub trocyup yu gyeey nac yu.

<sup>8</sup> Lat chon beey gua Baly nañ yu' nu rsya' de mbecy Israeel riidz ni Ñgyoozh, wanchib lay mniiy lo de mbecy. Bee nuy dey riidz, nunu b icy yu nu bguugy lardoo dey nu nac riidz ni gyel gubier ni Ñgyoozh. <sup>9</sup> Tees bruu su la be mbecy ze' nu b icy cyig y lardoo dey, nunu wacheña lag yu. Shiñ mnii dey ni de coz ni Shuaan den lat de mbecy zigy. Nde' nu Baly bruuy lat dey. Orze' za nuy de mbecy nu ricy cup consuel lo Crisht par nañ tub yu' scuel, nu la Yu' Scuel ni Shi Tirano. Ze' bee nu Baly de mbecy riidz de dzi la. <sup>10</sup> Ni b icy yu nuy dey nañ cyup ña'n. Nde' nu güeñ dela mbecy nu yu' lo de yu ni Asia de riidz ni Shuaan den: tant mbecy Israael, tant mbecy nu walab mbecy Israael.

<sup>11</sup> Nunu Ñgyoozh tona' la nusuriidz ily b icy mi par nu nac Baly. <sup>12</sup> Mas tub bay ni Baly o tub shab yu nu rzuy rza nu dey lo de mbecy rat. Orze' de mbecy rat ze' ryac yu. O benu nuras b icy ras nuy dey, orze' druu chu nuras ze' lo dey.

<sup>13</sup> Na yu' la be mbecy Israael nu rded rboo nuras. Orze' yu ze' b icy peey mbooy nuras nu nac rishbeey nu rbic Jesuuz. Orze' na dey rab yu nuras:

—¡Par nu nac rishbeey ni Jesuuz, biñ nu rzat Baly, rnœe de lor nu ruu chur lo mbecy ii! —na dey.

<sup>14</sup> Ni b icy gag y iñ tub mbecy nu la Esceva. Yu ze' tub yu nu riib ic de uz. <sup>15</sup> Tees ornu ni gug y dey nuras, orze' na nuras rab yu dey:

—Ya yu' lo Jesuuz, nunu ya yu' lo cyu nu Baly. Ze' de ru ?cyu nac ru? —nay.

<sup>16</sup> Orze' mbecy nu b icy ni nuras ze' tona' la fert pshet yaay dey. B icy yu gan dey. Orze' bruu dey nañ yu' ze' carer. Guud güii dey, nunu por fers la blooy dela shab dey. Gyid yaag y la dey yay. <sup>17</sup> Dela de mbecy Éfeso nu de mbecy Israael gal nu mbecy nu walab mbecy Israael, dela dey güeñ dey de coz nu guc nunu tona' la gadzib dey. Orze' tona' la briib zily mbecy Jesuuz.

<sup>18</sup> Orze' zigy mbecy nu ricy cup consuel lo Crisht b icy caacy yu de cyi nu b icy yu lat de mbecy. <sup>19</sup> Zigy de mbecy nu b icy tu' losa' b icy tublaazh dey de libr ni tu' ni dey, nunu pcaa dey gyiñ lo rgüii la de mbecy zigy. Na ornu bloo dey cuen ben la be sac de libr ze', orze' pshuub ñi pres ni cyaal gaynal miily tiñ plat. <sup>20</sup> Ni mod g uc. Orze' bzu laa riidz ni Ñgyoozh, nunu b icy ñi nu byanap de mbecy.

<sup>21</sup> Na despuees nu bi g uc de coz ze', orze' Baly mnii tooy nu ches say lo de yu ni Macedonia nu lo de yu ni Acaya. Na ornu lazh chesay de lugaar ze', orze' mnii tooy nu gyay Jerusaleeng. Orze' nay:

—Lazh nde' rlagy ñi cha güii gyedz Rom —nay.

<sup>22</sup> Na tub tiem, lat nu gabee riy lo yu ni Asia se tub tiem, orze' bzuu nez yu Timoteo nu Erasto nu cha ga dey par Macedonia. De yu ze' nil rloctuub dey Baly. Orze' Baly bzuu nez yu dey zay.

### Pcha' ic de mbecy Éfeso

<sup>23</sup> Tiem ze' tona' la deet g uc par nu nac de coz ni Shuaan den Éfeso. <sup>24</sup> Zu tub mbecy nu la Demetr. Yu ze' tub yu nu ricy nap plat. Bzaay nab ni yu' nu driib zi ly mbecy tub ñgyoozh nu la Diana. Orze' tona' la sheñ tiñ rad ni de mbecy nu rzaa de nab ze'. <sup>25</sup> Orze' b icy tublaazh yu de mbecy nu ricy laab losa' riiñ nu ricy ub yu. Orze' nay rab yu dey:

—De ru mbecy, de ru rad lag y der nu dzi gusht rcyiñ den par nu nac riiñ nu ricy na. <sup>26</sup> Gun de ru rzac der nunu reñ der de coz nu rnii Baly. Rniy nu ñgyoozh nu rzaa mbecy, nde' rila walab ñgyoozh, nunu bi b icy yu gan nu pcuugy yu lardoo zañ mbecy nu laa yaa dey de ñgyoozh ze': tant Éfeso gal nu dela lugaar lo yu ni Asia. <sup>27</sup> Orze' dzi rishdzidz walab tub lo zi'l nu nii zi mbecy ni de riiñ nu ricy na, sinu ni' zi'l gyicy dey nu se la la sac yu' ni Diana, ñgyoozh lily ni den. Orze' nit lo gyel lily nim. Nunu biñ re biñ nu driib zily dela mbecy Asia, nunu dela mbecy nu yu' gyishlombecy —nay.

<sup>28</sup> Na ornu güeñ de mbecy ze' de riidz ze', orze' tona' la guzi lag y dey. Orze' brugyi' rbish ti dey. Orze' nay:

—¡Tona' la coz ily nac Diana ni de mbecy Éfeso! —na dey.

<sup>29</sup> Orze' dutuub la lat gyedz brush las nu zu redz ze'. Orze' de mbecy zigy bdu' yaa dey Gayo nu Aristarco, cyup mbecy Macedonia nu rded nu Baly. Orze' za nu dey yu carer par nañ yu' nu ryatublaazh de mbecy.

<sup>30</sup> Baly ngulagy yu chay lo de mbecy zigy tees de mbecy ni Crisht wansaan dey. <sup>31</sup> Nunu la be de fushtiz ni Asia, de yu nu nac amig ni Baly, bzeed dey rasqo loy nu cue' chu'y nañ yu' nu ryatublaazh mbecy ze'. <sup>32</sup> Ze' tona' la zu redz gu' de mbecy. Tub mbecy rbish tiy tub coz. Ze' tuuba' mbecy rbish tiy reña' coz. Orze' zigy zir de mbecy nu wangad lag y dey lagu byatublaazh yu.

<sup>33</sup> Yu' mbecy nu briic yu fers ni Alejandro, gun de mbecy Israael mnii dey loy nu chay cha niiy lo dela de mbecy. Orze' Alejandro b icy yaay lo dey par nu cue' gyicy dey zu redz. B icy peey niyy tub riidz par nu gabe nu sac falt ni de mbecy Israael lo de mbecy zigy. <sup>34</sup> Tees de mbecy zigy byu' lo dey yu nu nac yu mbecy Israael. Orze' tublaazh la brish ti dey nañ cyup or. Orze' na dey:

—¡Tona' la coz ily nac Diana ni de mbecy Éfeso! —na dey.

<sup>35</sup> Or guchi orze' scyerban ni gyedz ze' pcyaag yu ic de mbecy zigy. Orze' nay:

—De ru mbecy Éfeso, dela mbecy rad lag y dey nu bdugyi gyedz Éfeso ii par nu ña dey yu' ni ñgyoozh lily, yu' ni Diana, nunu par nu ña dey nab mi nu bruu gash tal gyibaa bet lag ñi. <sup>36</sup> Nunu ni tub la mbecy wac niyy nu de coz nu mnœe nde' tub coz nu walab rishli. Orze' nde' nu rlagy ñi gyag ic der nunu cue' gur gyicy la der.

<sup>37</sup> De ru biid nu der de mbecy ze' par ii mas wangyicy

gubaan dey la coz nu yu' nañ de yu' nu driib zily den ñgyoozh nin. Ni wannii zi dey nim.<sup>38</sup> Benu Demetr nu de yu nu ricy nuy riñrlagy dey cu'y cyi ca na mbecy, orze' par nde' yu' dzi nu yu' de fushtiz par nu ri beey ni de mbecy. Lo de yu ze' gad gyel fushtiz.<sup>39</sup> Tees benu yu' reña' coz nu rlagy der niir, orze' rlagy ñi za' lo der ñii ii lat de junt nu cu' de fushtiz.<sup>40</sup> Gun na rishdzidz nis nii mbecy nu b icy den gyel yuu lat de ub na par nu nac de coz nu guc dzi na. Wad la ru'n niin lagu ni gu' deet na ii. Ni' wac shaal den lo mbecy lagu ni rlagy na gyicy na —na scyerban ni gyedz ze'.

<sup>41</sup> Orze' ornu bded nu ni mniiy lo de mbecy, orze' ptush las yu dey yay.

### Baly zay Macedonia

**20** Na ornu guca de gyel deet ze', orze' Baly b icy tublaazh yu de mbecy nu ricy cup consuel lo Crisht. Orze' briic yu consef ni dey. Orze' despuees mniiy ñgyoozh nuy dey. Orze' bruuy zay par Macedonia.<sup>2</sup> Lat nu zay de lo yu ni Macedonia, dzi briic yu baloor ni de mbecy ni Crisht. Orze' briy Grecia.<sup>3</sup> Ze' pcyiñ yu chon beey. Na ornu bzu lily yu nu chay par Siria nañ tub barc, orze' gud lagy yu nu de mbecy Israel psaap dey riidz nu shiñ gyicy nu dey yu. Orze' mnii tooy nu cush cyay, ded yu lo de yu ni Macedonia tuuba' tir.<sup>4</sup> Sópater, tub mbecy Berea, gua nuy yu. Yu ze' iñ Pirro. Ni' zi'l reña' mbecy gua nu dey yu. Gush lañ: Aristarco, nu yu nu la Segundo, cyup de yu ze' mbecy Tesalónica, nu Gayo, tub yu Derbe, nu Timoteo, nu Tíquico nu Trófimo, cyup de mbecy ze' bruuy lo de yu ni Asia.<sup>5</sup> Orze' de mbecy ze' za ga la dey par lo d. Za dey tub gyedz nu la Troas. Ze' blez dey d. <sup>6</sup> Ze' d. y, ornu bded sa' nu row dey gyshtily nu sac lebadur, orze' gu' de nañ barc. Orze' bruu d. Filipos za d. Na ornu bza' gaay dzi, orze' bri d. Troas. Orze' byatublaazh d. nu losa'. Ze' pcyiñ d. tub sman.

### Baly pcyiñ yu Troas

<sup>7</sup> Orze' dzi loga la ni sman byatublaazh d. nu losa' nu daw d. gyit mod nu bzeeñ Jesucrisht. Orze' Baly pshaal yu riidz ni Crisht lo de mbecy. Zaab rnii lay lo dey gashtal or guzeel rel, gun tuuba' dzi gyay.<sup>8</sup> Orze' byatublaazh d. nañ tub yu' nu Zub gya ni tub yu' chon shily. Ze' rca gyi ni zañ candiil.<sup>9</sup> Ze' Zub tub yu feñ nu la Eutico. Zub yu ru' bentan. Lat nu rnii Baly, orze' tonal la byeed pcaal yu gashtal por fij gush la pcaal yu, gun Baly dzi tuñ mniiy. Orze' bruuy gal shily chon ni yu' ze'. Bet lag yu gal lo yu la. Orze' pshes nañ dey yu gut lay.<sup>10</sup> Orze' Baly bet yu par lo yu. Orze' gusaab tiily yu. Bdu' yaay yu. Orze' nay:

—Cue' dzib der gun gabee mbañ yu —nay.

<sup>11</sup> Orze' gupa'y laab gal gya ze' bdow nuy dey gyit mod nu bzeeñ Jesuuz. Despuees orze' chi bee nuy dey riidz gashtal briib la doo. Gaze' nu bruuy lo dey zay.

<sup>12</sup> Orze' ya nu dey yu feñ ze' par yu' y mbañ yu. Orze' guud baloor ni dey.

### Baly bruuy Troas zay Milet

<sup>13</sup> Orze' bzeeñ Baly d. ya. Gaze' nu gu' d. nañ barc za g. d. lo par Aso. Ze' chu' Baly nañ barc. Ni mniiy nu gyicy d., gun rlagy yu chay gyi' lay par Aso.<sup>14</sup> Na ornu bdzeel d. Baly Aso, orze' gu' y nañ barc. Orze' za d. par Mitilene.<sup>15</sup> Orze' ze' bruu d. za. Orze' tuuba' dzi bri d. Quío. Gal tuuba' dzi bri d. Samos. Ze' bzu lagy d. Troguilio. Orze' tuuba' dzi bri d. Milet. <sup>16</sup> Gun Baly bdu' ic yu nu ded nez zi'l yu Éfeso, gun orze' cue' ganday yu lo yu ni Asia, gun gyeel riy Jerusaleeng, gun dzi ga dugyi ru' y sa' ni Pentecostés.

### Baly rniiy lo de yu bel ni de mbecy ni Crisht Éfeso

<sup>17</sup> Orze' lat nu ri Baly Milet, bzed yu rasoo za nu mbecy par Éfeso. Mniiy nu cha de yu bel ni de mbecy ni Crisht nu cha cheel dey yu.<sup>18</sup> Na ornu bri dey, orze' nay rab yu dey:

—De ru rad lagy der la coz b icy nese dzi loga la nu bri d. lo yu ni Asia.<sup>19</sup> Dub laa tiem nu pcyiñ lat der b icy coz nu mnii Shuaan den lo. Nunu rila wangale', sinu b icy riñ ze' tiem nu deet rac. Nunu tiem ze' tonal la b icy shni par nu nac de coz a' nap nu psaap de mbecy Israel riidz nu ñgyicy nuy ya.<sup>20</sup> De ru rad lagy der nu ya rila wancheç nu neq ni tub la coz nu rlagy ñi nu locyuuba der. Tees ya pshaala de riidz ni Crisht, nunu blyuñ ni der lat de mbecy zigy gal nu nañ yu' ni der.<sup>21</sup> Blyuñ ni de mbecy Israel, nunu tant blyuñ ni de mbecy nu walab mbecy Israel. Ya mneq lo dela mbecy nu rlagy ñi ne' dey de cyi nu ricy dey, nunu gyicy yu coz nu rlagy ñgyoozh. Nunu rlagy ñi gyicy cup dey consuel lo Shuaan den, Jesucrisht.<sup>22</sup> Orze' na chä par Jerusaleeng gal nu mnii Espiriit Yon ni ñgyoozh lo nu gyicy. Ni wagad lagy ya la coz zacä re.<sup>23</sup> Tub zi la coz rad lagy ya. Nu dela gyedz nu rdeda Espiriit Yon ni ñgyoozh rniim lo nu gyet lagu nañ yu' gyiib, nunu zañ coz deet zacä de ze'.<sup>24</sup> Tees ya rnii too nu se la la saca nu cyiñ gyishlombecy ii, benu chi ga nde' gyicy ñi nu shupa laza, nunu za' lo de riñ nu briic Shuaan den Jesucrisht nu gyicy. Riñ ze' nde' nu shaala de riidz nu sac nu bruu lo ñgyoozh, de riidz nu rniñ nu dzi coz nap ricy nu ñgyoozh de ub na.

<sup>25</sup> Ya gusa mneq de riidz ni gyel gubier ni ñgyoozh lat der, nunu na rad lagya nu rila wazaca' der ya.

<sup>26</sup> Nde' nu dzi na ya neq lo der, benu yu' mbecy bdune' lat der, ya sac falt ne.<sup>27</sup> Gun ya mneq lo der dela coz nu bloo ic ñgyoozh nu gyicy mi, nunu wancach ru' ni tub lañ.<sup>28</sup> Bicy cuidad der ub ru, nunu b icy cuidad der nu de mbecy zigy nu bzeeñ ñgyoozh nu ña der. Ña der dela mbecy nu ricy cup consuel lo Shuaan den, biñ nu brish cyi den nu nac nu pshum reñ mi.<sup>29</sup> Ya rad lagya nu despuees ornu ruu lat der, cyid mbecy a' nap. Gyicy yu nu laa yaa de mbecy ni Crisht de coz rishli. Na dey gal na lob dañ nu nit lo ma shily.<sup>30</sup> Shuub dzi nu ruu la be mbecy rguu lat der. Lyuu dey coz fals, gun orze' de mbecy ni Crisht cha cay ich yu.<sup>31</sup> Cuidad der, nunu

cue' nit lagy der nu dzi rel la ya blyuu ni der nu nis lo nañ chon ña'n lat nu tona' la bzac zi.

<sup>32</sup>'Orze' der bicy na, ya zeeña der yaa Ñgyoozh nu ñam der. Nunu ya drish lo nu de riidz nu rnii de coz ily nu ricy Ñgyoozh locyuub ñi de ru, gun gyicy fert ñi der, nunu gac cuic ñi dela coz nu bzu chum par dela mbecy nu bi pcuim nu gac nim. <sup>33</sup>Ya rila wansaab lagya ni tiñ ni mbecy, ni de shab mbecy. <sup>34</sup>Gun de ru nap rad lagy der nu ya bicya riiñ par nu gad coz nu rlagy ñi ne, nunu coz nu rlagy ñi ni de yu nu gusa nu ya. <sup>35</sup>Dub laa tiem rlyuu ni der nu ni mod rlagy ñi gyicy den riiñ, nunu locyuub den de mbecy nu ricy falt la coz ni. Byeza' lagy der de riidz ni Shuaan den Jesuuz ornu nam: "Gacyit zir lagy mbecy ornu cuic yu coz ni losa'y gaze' ornu gash yu coz nu cuic losa'y niy", nam —na Baly.

<sup>36</sup>Na ornu blazh mnii Baly de nde', orze' gusu tib yu nuy dey. Mnii nuy Ñgyoozh nu dela dey. <sup>37</sup>Orze' dela mbecy biiñ yu, nunu bdu' yaa dey yeñ Baly. Nunu bdow dey chit lo Baly. <sup>38</sup>Tona' la bicy shni dey, gun mnii Baly nu wazaca' dey yu. Orze' za nu dey yu gash-tal lo la barc.

### Baly zay Jerusaleeng

**21** Ornu bzeeñ de de bicy na, orze' gu' de nañ barc. Orze' za de li laa tub lugaar nu la Cos. Orze' tuuba' dzi za de Rodas. Ze' bruu de za de Páтара. <sup>2</sup>Páтара byap de tub barc nu za par Fenicia. Gu' de nañ barc ze' za. <sup>3</sup>Za de ze' nu rabee tub nac yu nu ri lo nisyudoo nu la Chipre. Orze' ze' briic de welt bzeeñ de Chipre par yaa reg na. Orze' za de par Siria. Orze' ze' blez barc gyedz Tiro, gun rlagy ñi gyet yuu ze'. Orze' ze' bet de par lo yu. <sup>4</sup>Orze' ze' byap de la be mbecy ni Crisht, nunu pcyiiñ du de yu tub sman. Orze' nu nac Espiriit Yon ni Ñgyoozh mnii nu dey Baly nu cue' chay par Jerusaleeng. <sup>5</sup>Tees ornu blazh tub sman, bruu de za. Dela dey nu mñaay nu de yu nguzh za nu dey de ya par ru' gyedz ze'. Orze' ze' bzu tib de mnée du de Ñgyoozh. <sup>6</sup>Orze' mnée de Ñgyoozh nu dey nu bi gyä de. Orze' gu' de nañ barc. Ze' de mbecy ze' bish cya dey yay par yu'y.

<sup>7</sup>Orze' bruu de Tiro za de. Orze' bya' lo byaj mi' ze' Tolemaida. Orze' ze' mnée de Ñgyoozh nu de bicy na. Ze' pcyiiñ du de yu tub dzi. <sup>8</sup>Na tuuba' dzi bruu de ze' za de par Cesarea. Orze' ze' za de yu' tub mbecy nu rshaal riidz ni Ñgyoozh, yu nu la Lip, nunu pcyiiñ du de yu. Yu ze' tub yu nu bruu lat gagy mbecy nu pcui dey Jerusaleeng par nu locyuub dey de aposht. <sup>9</sup>Yu ze' zu tap i'ñ yu, fiñ mñaay nu nigul gad ñgyee. Rnii deñ de riidz nu rbic Ñgyoozh niñ. <sup>10</sup>Ze' pcyiiñ de la be dzi. Orze' bru'ña Agabo, tub mbecy nu rnii por cuen ni Ñgyoozh. Yu ze' bruuy gashtal Judea. <sup>11</sup>Biid güiyy de ya. Orze' gush yu sinch ni Baly, nunu pcyig yu yaa ub yu, nunu pcyiga'y gyi'y nu sinch ze'. Orze' nay rab yu de:

—Espiriit Yon ni Ñgyoozh nam: "Ii mod gyicy mbecy Israel nu yu' Jerusaleeng nu shuaan sinch ii. Orze' gu' dey yu yaa de mbecy nu walab mbecy Israel", nam —na Agabo.

<sup>12</sup>Na ornu güeñ de de riidz ze', orze' de ya nu de mbecy Cesarea mnishbaä de lo Baly nu cue' gyay Jerusaleeng. <sup>13</sup>Tees orze' Baly nay:

—¿Lagu dzi ruun der? Tona' la ricy der nu ricy shni. Ya bi zu la ca na nu zu walab tub lo zi'l nu cyiig dey ya, sinu ni' zi'l bi zu la par nu gata Jerusaleeng nu nac Shuaan den Jesuuz —nay.

<sup>14</sup>Wangac cuugy de lardooy. Orze' guça de nu rnëe nu cue' gyay. Orze' mnée de:

—Gal nu rlagy Shuaan den Jesuuz, ni gac —mnée de.

<sup>15</sup>Na ornu blazh la be dzi, orze' bicy nap de suu. Orze' bruu de ze' ya par Jerusaleeng. <sup>16</sup>Ni' la be de mbecy Cesarea nu ricy cup consuel lo Crisht ya nuy de ya. Zu tub mbecy Chipre nu la Mnasón. Yu ze' tona' la gulas bicy cup yu consuel lo Crisht. Orze' lo yu ze' bri de.

### Baly cha güiyy Santiag

<sup>17</sup>Na ornu bri de Jerusaleeng, orze' tona' la bet lagy de bicy na ornu bdzeel dey de ya. <sup>18</sup>Orze' na tuuba' dzi Baly gua nuy de. Gua güiij de Santiag, nunu ni' zi'l nguaa dela de mbecy nu zu riiñ ni de yu bel lat de mbecy ni Crisht ze'. <sup>19</sup>Orze' Baly mniyy ñgyoozh nuy dey, nunu pshaal yu lo dey dela coz nu ricy Ñgyoozh num de mbecy nu walab mbecy Israel par nu nac riiñ nu ricy yu. <sup>20</sup>Na ornu güeñ dey nde' orze' byabic dey gyel mbecy ni Ñgyoozh. Orze' na dey rab yu Baly:

—Orze' na bicy na, ru gac cu' cuen ru nu yu' bee milly mbecy Israel nu ricy cup consuel lo Crisht. Tona' la ricy zily dey leey nu bzeeñ Moisees. <sup>21</sup>Na güeñ dey nu ru shiñ na riidz nu rlyuur ni de mbecy Israel nu ricy cup consuel lo Crisht, de yu nu yu' ledz de mbecy nu walab mbecy Israel. Güeñ dey nu rlyuur nu rlagy ñi zaan dey leey nu bzeeñ Moisees. Nunu mbecy rnii dey nu rlyuur nu cue' caa dey beey sircunsision cuerp ni i'ñ yu. Nunu güeñ dey nu rlyuur nu cue' gyicy paa dey nu de cushtom ni de mbecy Israel. <sup>22</sup>Segur la gyeñ dey nu ru brir Jerusaleeng. Orze' ¿la coz rlagy ñi nu gyicy den? <sup>23</sup>I mod gyicy ru ricy peé de. Zu tap mbecy nu rlagy ñi gyicy yac dey nu riidz nu mnii dey lo Ñgyoozh nu segur la gyicy yu. <sup>24</sup>Cha nur dey, nunu tublaazh la gyicy der coz nu rnii leey par nu gyicy caacy mbecy ub yu par lo Ñgyoozh. Orze' rlagy ñi cyish ru gasht ni dey. Orze' despuees shiñ dey gyich tooy. Ni mod gad lagy de mbecy nu riidz nu zaab ze' nde' gyel rguu, gun ni' ru gyicy paar nu leey nu bzeeñ Moisees. <sup>25</sup>Ze' de mbecy nu walab mbecy Israel nu ricy cup consuel lo Crisht, bi bzeed de gyicy lo dey. Mnée de lo dey nu cue' sug ic dey nu nac de coz ze'. Nomaas walag yñi nu gow dey beel nu rcuaa mbecy lo nab, nunu walag yñi nu gow dey reñ, nunu ni walag yñi nu gow dey bañcyug nu bduzzi yeñ, nunu cue' gal dey mbecy nu wanchelaay —na dey rab dey Baly.

### Baly zay pres

<sup>26</sup>Orze' tuuba' dzi Baly gua nuy de mbecy ze', nunu bicy nuy dey mod nu rnii leey nu bzeeñ Moisees par

nu gyacaacy mbecy lo Ñgyoozh. Gaze' nu gu'y loli' ni yu' nu driib zily mbecy Israeel Ñgyoozh, nunu bicy yu nu gud lagy de mbecy nu yu' ze' gul gya' lo tiem nu gyacaacy dey. Tiem ze', orze' tub ga la dey cuic yu gun lo Ñgyoozh.

<sup>27</sup> Na ornu bi rgaab lazg gagy dzi ze', orze' la be mbecy Israeel nu bruu lo de yu ni Asia bzaac dey Baly loli' ni yu' nu driib zily de mbecy Israeel Ñgyoozh. Orze' bicy dey nu pcha' ic de mbecy zigy. Orze' bdu' yaa dey Baly. <sup>28</sup> Orze' rbish ti dey. Gaze' nu na dey:

—¡Der mbecy Israeel, blocyuub dę ya! Yu ii mbecy nu rded dela lugaar nu rlyuuy ni de mbecy coz nu za contr ni mbecy Israeel, nunu coz nu za contr ni leey nu bzeeñ Moisees. Nunu coz ze' zañ contr ni coz ni yu' nu driib zily den Ñgyoozh ii. Orze' yeed nuy la be mbecy griego nañ yu' nu driib zily den Ñgyoozh. Na rnuy yu' yon ni den ii —na dey.

<sup>29</sup> Ni mnii dey, gun bzaac dey nu rded nu Baly tub mbecy Éfeso, yu nu la Trófimo. Orze' psa' lagy dey nu Baly gya nuy yu ze' par loli' ni yu' nu driib zily dey Ñgyoozh.

<sup>30</sup> Orze' dutuub la lat gyedz deet guc. Orze' by-atublaazh dey carer. Bdu' yaa dey Baly. Por fers la za nu dey yu. Bruu nu dey yu loli' ze'. Za nu dey yu lat cay. Rgayu tuñ la dey yu. Nunu lueg la psoow dey ro' nu rzu' dey loli' ze'. <sup>31</sup> Orze' dela mbecy zigy bicy pee dey nu ñgyut yu Baly. Orze' bzeed mbecy rasqo lo yu nu rib ic de soldad nu dutuub la lat gyedz Jerusaleeng yu' deet dey. <sup>32</sup> Orze' yu nu riib ic ze' lueg la gua nuy de jef ni soldad, nunu gua nuy la be soldad. Orze' tub miññ zi'l bi bru'ñay ze' nu yu' de mbecy zigy ze'. Na ornu de mbecy bzaac dey yu nu riib ic ze' nu de soldad, orze' gua dey nu rshet yu ni Baly. <sup>33</sup> Orze' mbecy nu riib ic ze' guay lo Baly. Orze' mniiy lo mbecy nu cyiig dey yu nu cyup caden nu cha nu dey yu pres. Orze' nay rab yu mbecy:

—¿Cyu mbecy yu ii? ¿La coz bicy yu? —nay.

<sup>34</sup> Yu' mbecy rbish tiy tub coz. Ze' yu' ga'y rniyy reñia coz. Yu nu riib ic ze' wangad lagy lay la coz guc, gun tanta' ricy mbecy zu redz. Orze' pcaay mbecy nu cha nu dey Baly ze' nu yu' de soldad. <sup>35</sup> Na ornu bru'ñia nu dey yu gyi' scaler nañ ze' nu rciyñ de soldad ze', orze' rlagy ñi shup dey yu, gun tanta' guloc de mbecy zigy. <sup>36</sup> De mbecy zigy zaab dey ich yu. Rbish ti dey. Orze' na dey:

—¡Biit yu! —na dey.

### Baly rcay ub yu

<sup>37</sup> Orze' ornu bicy pee dey ñgya nuy Baly ze' nu yu' de soldad, orze' na Baly rab yu yu nu riib ic ze':

—¿A gac nee tub coz lor? —nay.

Orze' na yu nu riib ic ze':

—¿A gac niir riidz griego? <sup>38</sup> Orze' ¿a walab ru mbecy Egipto, yu nu bi rac tiem ricy gyel yuu nu gubier, nunu gua nur tap miily yu nu rut mbecy par tub lugaar ub zi? —nay rab yu Baly.

<sup>39</sup> Orze' na ga' Baly:

—Ya nacä mbecy Israeel. Gula Tarso, tub gyedz lily nu ri lo yu ni Cilicia. Nunu ya ricy cupä dela rishbeey nu ca lo cuen ni de mbecy gyedz ze'. Orze' bicy faboor bzaan nee du de mbecy zigy —nay.

<sup>40</sup> Orze' yu nu riib ic ze' briic yu rishbeey ni Baly nu niy. Orze' Baly wes suy lo escaler ze'. Bicy yaay lo de mbecy zigy nu cue' gyicy dey zu redz. Na ornu guca nu zu redz, orze' Baly mniiy lo dey nu riidz hebreo.

**22** Orze' nay rab yu de mbecy zigy:

—Der bicya gal nu de ru yu bel, bzuub gyidag der ornu nee lagu nu sac falt ne —nay.

<sup>2</sup> Na ornu güeñ dey nu mnii Baly nu riidz hebreo, orze' guri zir dey. Orze' na ga' Baly:

<sup>3</sup> Ya nacä tub mbecy Israeel. Gulä tub gyedz ni Cilia-cia nu la Tarso, tees bguul dey ya Jerusaleeng ii. Gamaliel byub ic yu de coz nu psya', nunu blyuu dey ne nu nap gyicy paq nu de leey nu bzeeñ Moisees. Ya fert la zaba nu rca Ñgyoozh gal nu de ru rca der mi ii dzi na. <sup>4</sup> Nde' nu gulas psheed zi de mbecy nu gush nez cub ni Crisht gashtal bicya nu gut dey. Pshet lagä mñaas gyeey la pres. Mne' dey yu' gyiib. <sup>5</sup> Orze' yu nu riib ic de uz nu dela yu nu zu riñ ni yu bel ni den gac nii dey nu ya rnëe coz rishli. Briic dey tub gyicy ne nu cha du lo de bicy na, mbecy Israeel nu yu' Damasco. Orze' ze' za, gun orze' ni' du' yaq de mbecy nu nac num lugaar ze' nu yap du dey pres par Jerusaleeng ii, gun orze' gad cashtig ni dey.

### Baly rniyy lac mod byac yu mbecy ni Crisht

<sup>6</sup> Na nez nu za ornu bi rgaab ri Damasco tub or wi doo, sij la bet tub yaa ryal bruuñ gashtal baa bet ñi dub yub la lo. <sup>7</sup> Orze' wes saq la lo yu, nunu güeñ ya nu zaab ti' mbecy. Orze' nam: "Saulo, Saulo, ¿lagu rsheed zir ya?" nam. <sup>8</sup> Orze' ya mnëe: "¿Cyu nac ru, Shuaana?" mnëe. Orze' nam: "Ya nacä Jesuuz, biñ nu pcyiñ Nazaret, biñ nu ru rsheed zir", nam. <sup>9</sup> De yu nu za nu ya bzaac dey yaa ze', nunu gudzib dey tees wangyeñ dey coz nu mnii biñ nu mnii nu ya ze'.

<sup>10</sup> Orze' ya mnëe: "¿La coz rlagy ñi gyicya Shuaana?" mnëe. Orze' Shuaan na nam: "Weshte nunu gua Damasco. Orze' ze' nii mbecy lor dela coz nu rlagy ñi nu gyicy ru", nam. <sup>11</sup> Ya byaca' lo par nu nac yaa ryal ze'. Orze' de yu nu za du bdu' yaa dey yaq za nu dey ya par Damasco.

<sup>12</sup> Ze' rciyñ tub mbecy nu la Ananías. Yu ze' tub mbecy nu tonä la pcaa ic Ñgyoozh, nunu dzi bicy paay nu leey nu bzeeñ Moisees, nunu dela mbecy Israeel nu yu' Damasco nap mnii dey niy. <sup>13</sup> Orze' yu ze' biid güiyy ya. Na ornu bru'ñay, orze' nay rab yu ya: "Bicya Saulo, na gac zac ru tuuba' tir", nay. Orze' laab or la ze' guc bzaaca tuuba' tir, nunu bgüiñ loy. <sup>14</sup> Orze' nay rab yu ya: "Ñgyoozh ni de gyitoo bel ni den pcuiim ru par nu gad lagy ru coz nu rlagy mi, nunu par nu zac ru biñ nu sac falt ni, nunu par nu gyeñ ru de riidz nu ruu ru' ub lam. <sup>15</sup> Gun ru zat ru mi ze' lo de lo la mbecy nu yu' gyishlombecy. Shaal ru lo dey dela coz nu bzaac ru, nu dela coz nu güeñ ru. <sup>16</sup> Orze' cue' cuez ru. Weshte,

nunu bzu nis, nunu bicy cup consuel lo Shuaan den, gun orze' gyecy dela cyi nu b icy ru", nay.

### Baly rniy nu bdugiyi riñ lat de mbecy nu walab mbe cy Israeel

<sup>17</sup> 'Orze' ya bish cya ga' yap Jerusaleeng. Orze' lat nu rneé du Ñgyoozh nañ yu' nu driib zily den mi, orze' bde' lo. <sup>18</sup> Orze' bzaacä Shuaan na. Orze' nam rab mi ya: "Bicy lal. Dzach ru bruu Jerusaleeng, gun de mbecy ii wayeña lagy dey de coz nu rniir nu nac ya", nam.

<sup>19</sup> Orze' ya mneé lom nu "De mbecy ii nap rad lagy dey nu ya gua nañ dela yu' nu rsya' mbecy leey nir. Guä bdu' yaa de yu nu ricy cup consuel lor. Gua du dey nañ yu' gyiib. Nunu bdi su dey. <sup>20</sup> Nunu ornu bit dey Shteb, yu nu bzat ru lo de mbecy, ni' ya riñ lat de yu ze', nunu bicy dë tub zi'l riidz nu de yu ze'. Nunu ya mñä shab de yu nu biit dey ze", mneé lom. <sup>21</sup> Orze' Shuaan den nam rab mi ya: "Char, gun ya zuu neza ru char zet lat de mbecy nu walab mbecy Israeel", nam —na Baly.

### Bet lag Baly yaa yu nu riib ic de Soldad

<sup>22</sup> Orze' bee nde' zi'l bzuub gyidag dey. Gaze' nu brugi' dub ru' la dey rbish tiy. Orze' na dey:

—¡Rlagy ñi nu gat yu! ¡Walab se'ñ benu cui mbañ yu! —na dey.

<sup>23</sup> Orze' rbish ti dey, nunu rboo dey shab yu brugyi' rne' dey ñi baa. Nunu rne' ga' dey yu gyedz par baa, gun ton'a' la guzi lagy dey. <sup>24</sup> Orze' yu nu riib ic de soldad pcaay de soldad nu cha nuy Baly par nañ yu' nu rcyiiñ dey ze'. Orze' mniy lo de soldad nu gaaz dey yu par nu gad lagy yu lagu rbish ti de mbecy Israeel nu nac Baly. <sup>25</sup> Tees ornu pcyiig dey Baly par nu gaaz yu, orze' nay rab yu jef ni soldad:

—Par lo leey, ¿a se'ñ nu gaaz der tub mbecy nu nash gyedz Rom benu nigul ri bee dey niy? —nay rab yu jef ni soldad ze'.

<sup>26</sup> Na ornu jef ni soldad güeñ yu nde', orze' guay lo yu riib ic dey. Orze' nay rab yu ze':

—Cuidad nu coz nu gyicy ru, gun mbecy re nash yu Rom —nay.

<sup>27</sup> Orze' yu riib ic ze' guay lo Baly. Orze' nay rab yu:

—Mnii lo. ¿A laab nash ru Rom? —nay.

Orze' na Baly:

—Laab —nay.

<sup>28</sup> Orze' nay rab yu Baly:

—Ya sheñ tiñ brishä par nu byaca tub yu nu nash Rom —nay.

Orze' na ga' Baly:

—Tees ya nashä Rom gaal zi nese nu gula —nay.

<sup>29</sup> Orze' dela de mbecy nu b icy pee nu ngaaz Baly lieg la bruu chu dey loy. Nunu yu nu riib ic de soldad gudzib yu ornu gud lagy yu nu Baly nash yu Rom, nunu gudzib yu gyi' nu pcacuuñ dey yu nu caden.

### Baly chay lat junt zab lo ni de mbecy Israael

<sup>30</sup> Orze' yu nu riib ic de soldad ze' rlagy yu gad lag yu ben la cyi driib de mbecy Israael ic Baly. Orze' tu-

uba' dzi, orze' pshaagy yu caden nu pcyiig dey Baly. Orze' pcaay de uz zub lo nu de yu nu zu riiñ ni junt zab lo nu gyatublaazh dey. Orze' za nuy Baly bzuy yu lo de yu ze'.

**23** Orze' Baly bgüiij lo de yu nu zu riiñ ni junt zab lo ze'. Orze' nay rab yu dey:

—Der bicy na, dub laa lat nu zu gyishlombecy, nunu mas gashtal dzi na ya wagat lo lo Ñgyoozh par nu nac de coz nu b icy —nay.

<sup>2</sup> Orze' Ananías, yu nu riib ic de uz, pcaay de yu nu zu gaab ga lo Baly nu shet dey tub yaa yaru'y. <sup>3</sup> Orze' na Baly rab yuy:

—¡Mbecy rzuu lo, Ñgyoozh segur la shet yaam ru! Ru zab ru ze' dri beer ne mod ni leey, tees ru zar contr ni leey ornu mniir lo mbecy nu shet yu ne —nay.

<sup>4</sup> Orze' yu nu zu garee lo Baly nay rab yuy:

—Ru rnii zir ni yu nu pcuii Ñgyoozh nu riib ic de uz —nay.

<sup>5</sup> Orze' na ga' Baly:

—Der bicy na, ya wangad lagya nu yu ze' nac yu yu nu riib ic de uz, gun riidz ni Ñgyoozh rniñ: "Cue' nii zir ni yu nu riib ic losa'r", rniñ —nay.

<sup>6</sup> Na ornu Baly bzaac yu nu lat junt ze' yu' mbecy saduceo, nunu yu' ga' mbecy fariseo, orze' nay rab yu dey:

—Der bicy na, ya mbecy fariseo, nunu i'ñ mbecy fariseo nacä. Nunu ii dri bee der ne gyi' nu nac nu drish lo nu ornu gat de mbecy gyabaña' dey despuees —nay.

<sup>7</sup> Cuanzir nu ni mniy, orze' de mbecy fariseo nu de mbecy saduceo brugyi' zi ro dey riidz nu de losa'y. Nunu byac cyup nac de yu nu zu riiñ ni junt ze'. <sup>8</sup> Gun de mbecy saduceo rnii dey nu ornu gat mbecy wayabaña' dey, nunu rnii dey nu sac de anc, ni sac espiriit. Tees de mbecy fariseo rzeña lagy dey nu yu' anc, rzeña lagy dey nu yu' espiriit, nunu rzeña lagy dey nu gyabaña' de mbecy. <sup>9</sup> Orze' brugyi' rbish ti dey. Lat de mbecy fariseo, yu' ga' la be mbecy nu rlyuu leey nu bzeñ Moisees. Orze' wes su dey. Orze' na dey:

—Mbecy ii rila wagyicy yu ni tub la coz a' nap. Benu mniy tub espiriit loy o tub anc mniy loy, nde' walab nu zañ contr ni Ñgyoozh —na dey.

<sup>10</sup> Orze' brugyi' ton'a' la fert zi ro dey riidz nu losa'y. Orze' yu nu riib ic de soldad gudzib yu nu ncad güii dey Baly. Orze' pcaay de soldad nu chu' dey lat de mbecy ze' nu co dey Baly por fers la, nunu cha nu dey yu par ze' nu rcyiiñ dey.

<sup>11</sup> Orze' rel ze' bruu sac Jesuuz lo Baly. Orze' nam rab mi yu:

—Cue' dzib ru, gun ru bzat ru ya Jerusaleeng ii nunu ni' zi'l rlagy ñi gyicy ru Rom —nam.

### De mbecy Israael rnii too dey lac mod cut dey Baly

<sup>12</sup> Orze' tuuba' dzi de mbecy Israael b icy dey tub zi'l riidz ben lac mod cut dey Baly. Mnii dey nu segur la nu wow la dey gyit, nunu ni wo' la dey nis gashtal cut la dey Baly. Nunu mnii dey nu Ñgyoozh shiñ gyicy num dey benu wagyicy paa dey nu de coz nu mniy ze'.

<sup>13</sup> Bded cyuu mbecy nu psaap dey riidz nu ni gyicy yu.

<sup>14</sup> Orze' gua dey lo de uz zub lo nu lo de yu nu zu riiñ ni de yu bel ni de mbecy Israeel. Orze' na dey:

—De ya mnęe de lo Ñgyoozh nu shiñ gyicy num de benu daw de la zi'l coz anzir nu dut de Baly. <sup>15</sup> Orze' de ru nu de' zir mbecy ni de junt zub lo ii zeed der rasoo lo yu nu riib ic de soldad nu cyid nuy Baly lor ina. Gyicy ru tub mod nu rlagy ni nu cugyi' zir ru lo Baly par nu gad lagy nap zir ru la coz b icy yu. Orze' de ya bi zu lily de nu dut de yu anzir nu ru'ñay lor —na dey.

<sup>16</sup> Tees i'ñ zan Baly güeñ yu nu ni mnii dey ni Baly.

Orze' gua niiy lo Baly nañ yu' nu rcyiiñ de soldad.

<sup>17</sup> Orze' Baly bredz yu tub jef ni soldad. Orze' nay rab yuy:

—Gua nu yu feñ ii lo yu nu riib ic der, gun rlag yu ni iy tub riidz loy —nay.

<sup>18</sup> Orze' jef ni soldad gua nuy yu feñ ze' lo yu riib ic de soldad. Orze' nay rab yuy:

—Baly, yu nu ri pres, bredz yu ya. Mniy nu yap tu yu feñ ii lor, gun rlag yu niiy tub riidz lor —nay.

<sup>19</sup> Orze' yu nu riib ic ze' bdu' yaay yaa yu feñ ze' gua nu reñ yuy. Na ornu bi zu reñ dey lat mbecy. Orze' nay rab yuy:

—¿La coz rlag yu niir lo? —nay.

<sup>20</sup> Orze' yu feñ ze' nay:

—De mbecy Israeel b icy dey tub zi'l riidz nu nishbaa dey lor ina nu cha nur Shi Baly lat junt zub lo. Gyicy dey tub mod nu rlag yu gad lag y nap zir yu nu nac de coz nu ricy Shi Baly. <sup>21</sup> Tees cue' zuub gyidag ru ni dey, gun bded cyuu mbecy nu siiñ dey ni Shi Baly nez nu chay. Bi mnii dey lo Ñgyoozh nu shiñ gyicy num dey benu gow dey la coz o benu go' dey la zi'l coz anzir nu cut dey Shi Baly. Orze' na rbez dey ben la na riidz nu niir —nay.

<sup>22</sup> Orze' yu riib ic ze' nay:

—Cue' la niir lo ni tub la mbecy nu ni mniir lo —nay. Orze' blaay yu feñ ze' yay.

### Cha nu dey Baly lo Feely

<sup>23</sup> Orze' yu nu riib ic ze' bredz yu cyup jef ni soldad.

Orze' nay:

—Bzu lily der cyup gaynal soldad nu rgyit nu mandzicy, nunu zu lily der setent de yu nu ryub cuay, nunu zu lily der cyup gaynal soldad nu rgyit nu yag too lyuch, nunu zu lily der dey par nu chay Cesarea, tub gyiib gaa or becheñ. <sup>24</sup> Nunu zu lily der cuay nu gyub Baly. Nunu gri nu ruub der yu lo Feely, yu nu riib ic por cuen ni gubier —nay.

<sup>25</sup> Orze' yu riib ic de soldad ze' pcaay tub gyicy nu rniiñ:

<sup>26</sup> "Ya Clau Lisias zeedä gyicy ii lor, shi Feely, yu lily nu riib ic por cuen ni gubier. Shnu ru. <sup>27</sup> De mbecy Israeel bdu' yaa dey mbecy nu zeedä lor ii, nunu b icy pee dey nu ñgyut dey yu. Mbecy briic yu nu gad lag y nu nash yu Rom. Orze' gua du de soldad ne, nunu bloo mbañay.

<sup>28</sup> Ya ngulagy nu ñgyad lag y la cyi driib dey ic yu.

Orze' gua du yu lat junt zub lo ni de mbecy Israeel.

<sup>29</sup> Orze' gud lag y nu driib dey cyi ic yu nu nac leey ni

de ub zi'l dey. Par wangyicy yu coz nu gyicy ni nu cut dey yu. Nunu ni' wangyicy yu coz nu gyicy ni nu chay nañ yu' gyiib. <sup>30</sup> Na ornu mbecy briic yu nu gad lag y nu la be mbecy Israeel mnii too dey ben lac mod cut dey yu, orze' ya mnii too nu zuu nezä yu lor. Orze' ya mnęe lo de yu nu briib gyidza tooy nu cyid nii dey lor de coz nu rnii dey nu ricy yu." Ni pcaay lo gyicy ze'.

<sup>31</sup> Orze' de soldad b icy yac dey de coz nu mnii yu riib ic ze'. Gua tee dey Baly, nunu gua nu dey yu laab rel ze' gashtal tub gyedz nu la Antípatris. <sup>32</sup> Orze' tuuba' dzi de soldad nu rza gyi' bish cya dey yay par ze' nu rcyiiñ yu. Orze' byeeñ de soldad nu riib cuay ze'. Za nu dey Baly. <sup>33</sup> Na ornu bri dey Cesarea, orze' briic dey gyicy ze' ni yu nu riib ic por cuen ni gubier, nunu bzeñ yu Baly yaay. <sup>34</sup> Orze' yu riib ic ze' blab yu lo gyicy ze'. Orze' bdugyi' y lo Baly ben ca ledz yu. Na ornu gud lag y nu ledz yu ze' riñ lo de yu ni Cilicia, <sup>35</sup> orze' nay rab yu Baly:

—Ya gzuub gyidaga de coz nu niir ornu ri de yu nu driib cyi ic ru —nay.

Orze' pcaay de mbecy nu ña dey Baly nañ yu' ily nu bzaa Herodes.

### De mbecy Israeel riib dey gyidza ic Baly

**24** Ornu blazh gaay dzi, Ananías, yu nu riib ic de uz zay Cesarea. Za nuy la be mbecy nu zu riiñ ni yu bel ni de mbecy Israeel. Nunu za nuy Tértulo, tub yu nu rne' ic ni de mbecy lo gubier. Orze' gua dey lo Feely, yu nu riib ic por cuen ni gubier. Orze' briib dey gyidza ic Baly. <sup>2</sup> Orze' ornu bru'ña nu dey Baly, orze' Tértulo brugyi' driib yu gyidza ic yu. Orze' nay rab yu Feely:

—Shnu la ru Shi Feely, gun par nu nac ru, ri zu ledz de. Nunu gusht zir rcyiiñ de na gaze' gulas. <sup>3</sup> Tona' la yet lag y de, nunu rlag y de ric de gras nir. <sup>4</sup> Ya walag y nit lo sheñ tiem nir. Orze' na b icy pasez bzuub gyidag de coz nu nee de lor tub miiñ. <sup>5</sup> Byap de mbecy ii tona' la ricy deet yu nu losa'y. Dutuub la gyishlombecy ricy cyup la'y de mbecy Israeel, nunu riib ic yu tub nac mbecy nu la nazarenos. <sup>6</sup> Nunu b icy pee ga'y ñgyicy bag yu nañ yu' nu driib zily de Ñgyoozh. Orze' bdu' yaq de yu za du de yu pres. Ngulagy de ri bee de niy gal mod nu rnii leey ne de. <sup>7</sup> Tees orze' Lisias, yu nu riib ic de soldad, pshet yaay de. Por fers la bloo zay yu yaq de. <sup>8</sup> Orze' mniy nu benu ca na mbecy rlag y nu riib yu gyidza ic Baly, rlag y ni nu cyid yu lo ru. Benu ru cugyi'r loy, orze' gad lag y ru nu rishli dela cyi nu rnee de ii —nay.

<sup>9</sup> Orze' dela mbecy Israeel nu yu' lugaar ze' mnii dey nu nde' coz rishli. <sup>10</sup> Orze' Feely, yu nu riib ic por cuen ni gubier, b icy yaay par nu gad lag y Baly nu niiy. Orze' na Baly:

—Ya rad lag y nu guzañ ña'n ru dri beer ni de mbecy ledzä. Nde' nu yet lag y nee lor lag u nu sac falt ne.

<sup>11</sup> Orze' na benu cugyi'r lo de mbecy, bi rac trocyup zi dzi nu byaa Jerusaleeng par nu riib zilya Ñgyoozh.

<sup>12</sup> De mbecy Israeel wansac dey nu ndoo zi riidz nu losa'. Ni wansac dey nu ñgyicya nu ncha' ic mbecy.

Wansac dey nu ni ňgyicya nañ yu' nu driib zily de Ñgyoozh. Nunu ni wansac dey nu ni ňgyicya nañ yu' nusraya' de riidz nim. Ni wansac dey nu ni ňgyicya ni tub la lugaar lat gyedz Jerusaleeng.<sup>13</sup> De mbecy ii wagac gyicy caacy dey ti coz rishli de cyi nu driib dey icä lor.<sup>14</sup> Tees ya gyicy caacya nu ya rcä Ñgyoozh ni de gyitoo bel ne de ze' mod nu rnii dey nu nde' mod fals. Tees ya zeña lagya dela coz nu ca lo leey nu bzeeñ Moisees. Nunu zeña lagya dela riidz nu pcaa de yu nu mnii por cuen ni Ñgyoozh.<sup>15</sup> Ya drish lo lo Ñgyoozh gal nu de ub yu ni' rgyish loy lom. Ya drish lo nu dela mbecy gyabañ dey: tant mbecy nap, nunu tant mbecy a' nap.<sup>16</sup> Nde' nu dub laa tiem ryuba mod nu cue' gyicya coz nu gyicy ñi nu gat lo lo Ñgyoozh. Nunu ryuba mod nu cue' gyicya coz nu gyicy ñi nu gat lo lo mbecy.

<sup>17</sup> Na ornu bza' la be ña'n nu bruu Jerusaleeng, orze' yaa ga' par nu ricä tiñ ni losa', nunu par nu ricä gun ni Ñgyoozh.<sup>18</sup> Lat nu bicya nde' bzaac dey ya lolí' ni yu' nu driib zily de Ñgyoozh. Saa la blazh nu b icy yacañ nu dela coz nu rnii leey nu rlagy ñi gyicy mbecy par nu gyicy caacy dey ub yu. Nunu wansac dey nu rded du mbecy zigy. Ni wansac dey ya lat de gyel deet.<sup>19</sup> Tees ze' yu' la be mbecy Israel nu bruu lo de yu ni Asia. Nap zir benu cyid de yu ze' lor benu ricy cup dey gyidza nu rlagy yu riib yu icä.<sup>20</sup> O benu wancyiid dey, orze' cugyi'r lo de mbecy ii la cyi byu' beeñ nu bicya ornu gua lat junt Zub lo.<sup>21</sup> Nomaas tub coz mnée ornu zu lat dey: "Dzi na dri bee der ne gyi' nu rzeña lagya nu ornu gat de mbecy, orze' despues gyabañ dey tuuba' tir", mnée —na Baly rab yu Feely.

<sup>22</sup> Gaze' nu Feely como nap gud lagy yu de coz ni nez cub ni Crisht, orze' bzeeñ naat yu ni nde'. Orze' nay rab yu Baly:

—Ya ri beeñ nir ornu ri Lisiás, yu nu riib ic de soldad —nay.

<sup>23</sup> Orze' pcaay soldad nu riib ic nu ñay Baly. Tees bzan yu nu chesay, nunu zaan yu nu cyid güii de amig ni yu, nunu zaan yu nu zu bich dey nu nac yu.

<sup>24</sup> Na ornu blazh la be dzi, orze' bru'ña ga' Feely nu mñaay Drusila. Drusila nac mi mbecy Israel. Orze' bredz yu Baly nu zuub gyidag yu riidz nu niyy. Orze' mniy lac yaruu nu gyicy cup den consuel lo Crisht.

<sup>25</sup> Tees ornu mnii Baly nu rlagy ñi nu gyicy na coz nu se'ñ, nunu rlagy ñi nu nap gyub ic na ub na, nunu ornu bzat yu dzi nu ri bee Ñgyoozh ni dela mbecy, orze' gudzib Feely. Orze' nay:

—Gua la ru na, tees ornu zu natä, orze' redzä ru tuuba' tir —nay.

<sup>26</sup> Ni' zi'l Feely brish loy lo Baly nu cuic yu tiñ par nu ruuy. Nunu nde' nu zañ tir bredz yuy. Nunu bee nuy yu riidz.<sup>27</sup> Ornu bza' cyup ña'n, orze' Feely bruuy riiñ nu zuy ni nu riib ic yu por cuen ni gubier. Orze' bdugyi tuuba' mbecy riiñ ze'. Orze' gu' yu nu la Porcio Festo. Orze' Feely rlagy yu nu ganap lagy de mbecy Israel loy. Orze' bzeeñ yu Baly pres.

### Baly chay lo Festo

<sup>25</sup> Orze' Festo briy par nu chu'y riiñ nu gyub ic yu por cuen ni gubier. Tees ornu bi bza' chon dzi, orze' bruuy Cesarea zay Jerusaleeng.<sup>2</sup> Ze' de yu zub lo ni de uz nu de yu zub lo ni de mbecy Israel briib dey gyidza ic Baly. Orze' mnishbaa dey lo Festo<sup>3</sup> nu gyicy yu faboor nu caay de mbecy nu cha nuy Baly par Jerusaleeng. Ni mnii dey gun bloo ic dey lac mod cut dey Baly nez nu chay.<sup>4</sup> Orze' na Festo rab yu dey:

—Baly riy pres Cesarea. Ya sñuu ga cha par Cesarea.

<sup>5</sup> Orze' de yu nu riib ic lat der rlagy ñi nu cha nu dey ya par Cesarea. Orze' re gac riib dey cyi ic yu, benu shiñ bicy yu —nay.

<sup>6</sup> Orze' Festo briy Jerusaleeng tub shuñ dzi o tub tii dzi. Gaze' nu bruuy zay par Cesarea. Orze' tuuba' dzi bi zub yu nañ yu' riiñ par nu ri beey ni de mbecy. Orze' mnii nuy de mbecy nu cyid nu dey Baly.<sup>7</sup> Ornu bru'ña Baly, orze' de mbecy Israel nu bruu Jerusaleeng bri lo' la dey yu. Orze' brugyi' driib dey zañ gyidza ic yu tees wangac ňgyicy caacy dey ti nde' coz rishli.<sup>8</sup> Orze' Baly pcay ub yu. Gaze' nu nay:

—Ya wangyicya ni tub la coz nu za contr ni leey ni de mbecy Israel, ni coz nu za contr ni yu' nu driib zily de Ñgyoozh, ni coz nu za contr ni yu nu riib ic dela nasyoong —nay.

<sup>9</sup> Tees Festo rlagy yu gyicy yu coz nu gyet lagy de mbecy Israel. Orze' nay rab yu Baly:

—¿A shet ic ru char par Jerusaleeng par nu ri beeñ nir nu nac de coz nu rnii de mbecy ii? —nay.

<sup>10</sup> Orze' na Baly:

—Ya zu lo ru, yu nu zu riiñ por cuen ni yu nu riib ic dela nasyoong. Ii rlagy ñi ri beer ne. Mas ru rad lagy ru nu se la la coz a' nap b icy du de mbecy Israel.<sup>11</sup> Benu ya ňgyicya coz nu za contr ni leey o benu ňgyicya coz nu gyicy ñi nu rlagy ñi nu gata, orze' ya wanee lor nu co mbañ ru ya. Tees como de gyidza nu driib dey icä, nde' walab coz rishli, orze' ni tub la mbecy wac gu' dey ya yaa dey. Ya rdiña nu ub la yu nu riib ic de nasyoong ri beey ne —nay.

<sup>12</sup> Na ornu blazh bee nu Festo de yu nu rbic consef riidz, orze' nay rab yu Baly:

—Ru bdiiñ ru nu yu nu riib ic de nasyoong nu ri beey nir. Orze' lo yu ze' char —nay.

### Baly chay lo rey Agripa

<sup>13</sup> Orze' ornu blazh la be dzi rey Agripa nu Berenice za dey Cesarea za güiyy Festo.<sup>14</sup> Na ornu bi rac la be dzi rcyiiñ dey ze', orze' Festo mniy loy de coz nu bzac Baly. Orze' nay rab yuy:

—Ri tub mbecy ii, yu nu bzeeñ Feely pres.<sup>15</sup> Ornu gua Jerusaleeng, orze' de yu zub lo ni de uz nu de yu bel ni de mbecy Israel briib dey cyi ic yu, nunu mnii dey lo nu nee nu yu' falt niy.<sup>16</sup> Orze' ya mnée lo dey nu de yu gal nu de mbecy nu riib ic por cuen ni gubier Rom rila wagnëe de nu yu' falt ni mbecy nu gyicy ñi nu gat yu anzir nu gac lo nu lo niy nu de mbecy nu driib

cyi ic yu, gun orze' gad mod nu niiy lagu sac falt niy nu nac de cyi nu driib dey ic yu.<sup>17</sup> Na ornu biid dey par ii, orze' wansaana nit lo tiem. Orze' tuuba' dzi bi zuba nañ yu' riiñ. Orze' pcaq̄a de mbecy nu cha tee dey Baly.<sup>18</sup> Yä psa' lagya nu de mbecy nu driib cyi ic yu zañ coz a' nap nii dey nu b icy yu. Tees walab ni.<sup>19</sup> Tub zi la coz nu mnii dey, nde' nu ricy yu coz nu za contr ni mod nu driib zily dey Ñgyoozh, nunu bzat dey tub yu nu la Jesuuz. Gut yu tees Baly rniiy nu mbañ yu.<sup>20</sup> Wangad lagya lac gyicya par nu gad lagya de coz nu guc. Orze' mnœ̄ lo Baly nu ben a washet ic yu gyay Jerusaleeng. Orze' ze' duri bœ̄ niy.<sup>21</sup> Tees orze' Baly bdiñ yu nu chay lo Augusto, yu nu riib ic de nasyoong, nu ri beey niy. Orze' mnœ̄ lo de mbecy nu zeeñ dey yu pres gashtal ornu gad mod nu zuu nez̄a yu lo yu nu riib ic ze' —nay.

<sup>22</sup> Orze' na Agripa rab yu Festo:

—Ni' ya rlagya gyeña coz nu nii mbecy ze' —nay.

Orze' na Festo rab yu Agripa:

—Ina gyeñ ru de coz nu gniy —nay.

<sup>23</sup> Orze' tuuba' dzi rey Agripa nu Berenice bru'ña nuy de jef ni soldad nu de yu zub lo ni gyedz ze'. Na ornu gu' dey nañ yu' ze', orze' tona' la briib zily dey de yu ze'. Orze' Festo pcaay de mbecy nu cha tee dey Baly.

<sup>24</sup> Gaze' nu na Festo:

—Rey Agripa gal nu de ru mbecy nu byatublaazh ii. Ii bi zu tub mbecy. Zigy mbecy Israeel driib dey cyi ic yu ii lo: tant mbecy nu yu' Jerusaleeng, nunu tant mbecy nu yu' Cesarea ii. Zaab rbish ti la dey nu rlag yñi gat yu.

<sup>25</sup> Tees ya rsa' lagya nu wangyicy yu ni tub la coz nu gyicy ñi nu rlag yñi nu gat yu. Nunu como laab yu bdiñ yu nu chay lo Augusto nu ri beey niy, orze' ya bi mne' icä nu zeedä yu lo Augusto.<sup>26</sup> Tees ya wagad lagya la na falt niy nu cäa lo gyicy nu zeedä lo yu nu riib ic dela den. Nde' nu yap du yu lo der. Nunu ricy zir ñi presis lo ru, rey Agripa, gun ornu lazh cugyi'r loy ben a wad la ñuu coz nu cäa lo gyicy.<sup>27</sup> Gun ya rzee nu dzi coz ton benu zuu nez̄a tub pres lo yu nu riib ic de nasyoong benu wagac nee de falt nu yu' niy —nay.

### Baly rniiy lo Agripa lagu sac falt niy

**26** Orze' na Agripa rab yu Baly:

—Na gac niir lagu sac falt nir —nay.

Orze' Baly b icy yaay lo dey. Gaze' nu brugyi' rniiy.

Orze' nay:

<sup>2</sup> —Rey Agripa, ya ricya ubä par tub mbecy nu tona' la cyit na dzi ni, gun gac nee lor dzi na lagu sac falt ne. Lo dela gyidza nu driib de mbecy Israeel icä, rila sac falt ne nu nac de coz ze'.<sup>3</sup> Nunu yet zir lagya, gun ru nap rad lagy ru dela cushtom ni de mbecy Israeel, nunu nap rad lagy ru dela nu la gyi' nu rtub su de losä'. Nde' nu rnœ̄ lor nu b icy pasé̄ zuub gyidag ru de riidz nu nee lor —na Baly—.

### Mod nu bzu Baly anzir nu gac yu mbecy ni Crisht

<sup>4</sup> Dela mbecy Israeel rad lagy dey lac mod na lat nu pcyiñä lat dey nese miiñ lä: tant ledzä, nunu tant

Jerusaleeng.<sup>5</sup> De yu ii rad lagy dey, nunu benu rlag y dey, gac niiy nu nese miiñ lä b icya mod ni mbecy fariseo. Nunu de mbecy fariseo ta zir mod nu ricy dey lo Ñgyoozh gaze' de' zir mbecy Israeel.<sup>6</sup> Nunu na zu ii rduri bee ne par nu nac nu drish lo lo de riidz nu mnii Ñgyoozh lo de gyitoo bel ni den nu segur la gyicy mi. Riidz ze' nde' nu gyicy Ñgyoozh nu gyabañ dela mbecy nu bi gut.<sup>7</sup> Lo trocyup nac nez de drish lo de lo Ñgyoozh nu gzac de nu gyicy yac mi de riidz nu mniim. Nunu nde' nu rca dem, nunu ricy de coz nu rlag y mi dzi rel la. Nde' nu ru rey Agripa par nu nac nu laaba' de coz ze' drish lo loon, nde' nu de mbecy Israeel driib dey gyidza icä na.<sup>8</sup> De ru mbecy Israeel ¿lagu wagac cheña lagy der nu Ñgyoozh gyicy mi nu gyabañ dela mbecy nu bi gut?

### Baly rniiy nu pshed ziy de mbecy ni Crisht

<sup>9</sup> Tees ya laa ni' zi'l mnii too anzir nu rlag y ñi nu dzi gyicya coz nu cha contr ni Jesuuz, biñ nu pcyiñä Nazaret.<sup>10</sup> Ni mod b icya Jerusaleeng. De yu zub lo ni de uz briic yu rishbeey ne. Orze' pshet lagä zigy mbecy nu ricy cup consuel lo Crisht nañ yu' gyiib, nunu b icya tub zi'l riidz ornu mnii mbecy nu gat dey.<sup>11</sup> Zañ tir pcaq̄a mbecy nu cuic yu cashtig ni de mbecy ze' ben a walaa yaa dey de coz nu ricy cup yu consuel lo. Ni b icya nañ dela yu' nu rsya' de mbecy Israeel riidz ni Ñgyoozh, gun tona' la guzi lagya lo dey. Nde' nu gua gashatal de gyedz nu yu' lo yu nu walaba' yu ni de mbecy Israael par nu sheed zi de mbecy ze'.

### Baly rniiy tuuba' tir ornu byac yu mbecy ni Crisht

<sup>12</sup> Par nu ni b icya, nde' nu ya gua tub gyedz nu la Damasco. De yu zub lo ni de uz pcaay ya nu cha, nunu briic yu rishbeey ne.<sup>13</sup> Orze' nez nu za, tub or wi doo, bzaacä tub yaa. Bruuñ gal baa. Bet ñi dub yub la lo nu lo de yu nu za du. Tona' la ryal yaa ze'. Ryal zir ñi gaze' yaa ni doo güidz.<sup>14</sup> Orze' dela de wes saä lo yu. Orze' güeñ ya nu zaab ti' tub mbecy. Orze' nam rab mi ya nu riidz hebreo: "Saulo, Saulo, ¿lagu rsheed zir ya? Laab ru shiñ ricy nur ub ru gal nu ricy tor, ornu rlo ma too garoch, ornu rchiib mbecy ma", nam.<sup>15</sup> Orze' ya mnœ̄: "¿Cyu ru Shuaanä?" mnœ̄. Orze' na Shuaanä rab mi ya: "Ya Jesuuz, biñ nu ru rsheed zir.<sup>16</sup> Orze' weshte, nunu bzu gyi'r lo yu. Ya bruu zacä lor par nu du' riiñ yaar nu gac ru moz ne, nunu par nu shaal ru lo de mbecy de coz nu bzaac ru dzi na, nunu par nu shaal ru lo mbecy de coz nu lyuñ nir par lo.<sup>17</sup> Ya wazaanä nu shiñ gyicy nu de mbecy Israeel ru, nunu wazaanä nu shiñ gyicy nu mbecy nu walab mbecy Israeel ru, de mbecy nu zuu nez̄a ru nu char lo ze'.<sup>18</sup> De yu ze' nay gal nu na mbecy lo ca'. Tees ru rlag y ñi nu gyicy ru nu zac dey. Gun orze' ruu dey ze' nu cow. Cha dey ze' nu yu' yaa. Orze' cue' gyub ic nuras dey, sinu Ñgyoozh gyub ic mi dey. Gun par nu nac nu gyicy cup dey consuel lo ya, gyicy sulagy Ñgyoozh dela coz cyi nu ricy dey. Nunu gyacaacy dey gal nu byacaacya' de' zir mbecy nu nac nu ricy cup dey consuel lo", nam.

## Baly ricy paay nu de coz nu rnii Jesuuz

<sup>19</sup> 'Orze' na rey Agripa, ya wangyicya nu wansuub gyidaga ni de coz nu güeñä nu bruu gashtal gyibaa. <sup>20</sup> Sinu nu loga la pshaalä de riidz nu bruu lo Ñgyoozh lo de mbecy Damasco. Niga pshaalä de riidz ze' lo de mbecy nu yu' Jerusaleeng. Niga pshaalä ñii lo de mbecy nu yu' dutuub la lo yu ni de mbecy Israeel. Ni' zi'l pshaalä ñii lo de mbecy nu walab mbecy Israeel. Ya mnëe lo dey nu rlagy ñi nu ne' dey dela coz cyi nu ricy yu, nunu rlagy ñi nu gyicy dey coz nu rlagy Ñgyoozh, nunu rlagy ñi nu gyicy dey tub mod nu gabe nu bi mne' dey dela coz cyi nu ricy yu. <sup>21</sup> Orze' par nu nac de nu nde', orze' de mbecy Israeel bdu' yaa dey ya lat nu ri loli' ni yu' nu driib zily den Ñgyoozh, nunu b icy pee dey ñgyut yu ya. <sup>22</sup> Tees Ñgyoozh zaab rlocyuub lam ya. Nde' nu dzi na zu ii, nunu rzaq de coz nu gac ze' lo dela der: mas lo de mbecy shni, mas lo de mbecy lily. Nde' nu rnëe lor laaba' de coz nu mnii de yu nu mnii por cuen ni Ñgyoozh. Ni mnii Moisees nu de yu nu mnii por cuen nim nu ni gac. <sup>23</sup> Mnii dey nu Mesías, biñ nu ca lo cuen nu co mbañ mbecy, rlagy ñi nu gzac zim, nunu gac mi biñ nu gyabañ loga la despuees ornu bi gut mi. Orze' de riidz nu rnii mi ze' nañ gal nu na tub yaa. Riidz ze' rniiñ lo de mbecy Israeel nu gac gruu mbañ dey, nunu ni' zi'l rniiñ lo de mbecy nu walab mbecy Israeel —na Baly.

<sup>24</sup> Orze' lat nu rnii Baly nu lagu sac falt niy, orze' brish ti la Festo. Orze' nay:

—Nu guton ru Baly, nu nac nu dzi rsya'r gyicy, nde' nu raton ru! —nay.

<sup>25</sup> Orze' na ga' Baly:

—Ya walab nu guton Shi Festo. Riidz nu rnëe, nii coz rishli nunu coz nu nap za. <sup>26</sup> Nunu ii zu rey Agripa. Yu ii nap rad lagy yu de coz ze'. Nde' nu ya wachibä rnëe loy, nunu segur la rad lagyä nu bdu' cuen yu de coz ze', gun de coz ze' rila wangac ñi tub ze' nu ngach.

<sup>27</sup> Rey Agripa, ¿a rzeña lagy ru de riidz nu mnii de yu nu mnii por cuen ni Ñgyoozh? Ya rad lagyä nu ru rzeña lagy ru —na Baly.

<sup>28</sup> Orze' na ga' Agripa rab yu Baly:

—Ru rsa' lagy ru nu gac cuugy ru lardoo nu gaca mbecy ni Crisht nu nac riidz gyidz ze' —na Agripa.

<sup>29</sup> Orze' na' Baly:

—Mas rnëe riidz gyidz o mas rnëe riidz nap tees ya rdiñä lo Ñgyoozh nu walab ru zi'l, sinu dela de mbecy nu rzuub gyidag de riidz nu rnëe dzi na, nu gzu dela der mod nu ya zu, nomaas walagya nu de ru cuir pres gal nu ya ri —na Baly.

<sup>30</sup> Gaze' nu wes su Agripa nu Festo nu Berenice nu de' zir de yu nu nguaa ze'. <sup>31</sup> Orze' bruu dey nañ yu' ze'. Orze' na dey rab yu losa'y:

—Yu re wangyicy yu ni tub la coz nu gyicy ñi nu gat yu o nu gyicy ñi nu chay nañ yu' gyiib —na dey.

<sup>32</sup> Orze' na Agripa rab yu Festo:

—Benu cue' ñgyiiñ yu nu ri bee yu nu riib ic de nasyoong niy, orze' ñgyac ndulaay i ga la —nay.

## Baly zay Rom

<sup>27</sup> Na ornu mnii too Festo nu zeed yu dë Italia nañ tub barc, orze' bgu' dey Baly nu la be de' zir pres yaa tub jef ni de soldad, yu nu la Julio. Yu ze' riib ic yu tub nac soldad nu bloo la dey De Soldad ni Augusto.

<sup>2</sup> Orze' gu' dë nañ tub barc ni tub mbecy gyedz Adramitio. Barc ze' bi zu lily ñii par nu ruuñ chañ par de gyedz ni Asia nu yu' ru' nisyudoo. Orze' bruu barc ze'. Orze' za dë. Aristarco, tub mbecy Tesalónica, tub gyedz nu ri lo yu ni Macedonia, yu ze' za nuy dë.

<sup>3</sup> Orze' na tuuba' dzi bri dë Sidón. Julio dzi nap b icy nuy Baly. Bzaan yu nu cha güiij de amig niy, nunu bzaañ yu nu cuic de amig niy dela coz nu cyiiñ niy. <sup>4</sup> Orze' bruy dë Sidón za. Bzeeñ dë Chipre, tub nac yu nu ri lo nisyudoo, par yaa reg na, gun tona' la druu bi par ze' nu za dë. <sup>5</sup> Orze' bded dë lo nisyudoo ru' yu ni Cilicia nu Panfilia. Orze' bri dë Mira, tub gyedz nu ri lo de yu ni Licia.

<sup>6</sup> Orze' lugaar ze' jef ni soldad ze' byap yu tub barc ni de mbecy gyedz Alejandría. Barc ze' chañ par Italia. Orze' bgu'y dë nañ barc ze'. <sup>7</sup> Orze' guly za dë nañ la be dzi. Orze' dzi gyee bri dë lo nis nu ri gaab ga tub gyedz nu la Gnido, gun gabee rzub bi par ze' nu za dë. Orze' bded dë tub gyedz nu la Salmón. Gaze' nu bded dë cuit Creta, tub nac yu nu ri lo nisyudoo. <sup>8</sup> Bded dë gaab ga lo yu ze', nunu dzi gyee bded dë. Orze' bru'ña dë tub lugaar nu la Buenos Puertos. Ze' gaab ga ri tub gyedz nu la Lasea.

<sup>9</sup> Mnit lo zañ dzi. Orze' byarishdzidz nu cha dë nañ barc, gun bi rgaab tiem nu ri gyey. Orze' Baly byooy rishlo de mbecy. <sup>10</sup> Orze' nay:

—Der mbecy, ya rzeñ nu dzi rishdzidz za den na. Tona' la coz ily nit lo. Walab barc zi'l, nunu walab yuu zi'l nit loñ, sinu gnit lo ga' mbecy —nay.

<sup>11</sup> Tees yu nu riib ic de soldad wansuub gyidag yu ni Baly. Bzuub gyidag zir yu ni yu nu riib ic barc ze', gal nu ni shuaan ñi. <sup>12</sup> Nunu lugaar ze' nu byeeñ barc ze' walab lugaar nap par tiem nu gri gyey. Nde' nu sñuu ga zi'l gac dela mbecy rlagy yu ruuy lugaar ze'. Orze' cha dey ben a wariy tub gyedz ni Creta nu la Fenice. Ze' tub lugaar nu dri barc, nunu druuñ. Nunu ornu rgüiin par ze' nu rza doo, orze' nis ze' Zub ro' niñ par yaa been nu par yaa reg na. Orze' ze' gac cyiiñ dë lascyey.

## Dzi zu gyey

<sup>13</sup> Orze' brugyi' nu yagugy druu bi par yaa reg na ornu rgüiin par ze' nu rza doo. Orze' de mbecy psa' lagy dey nu gyicy yu gan gal mod nu mnii tooy. Gaze' nu bruu dey lugaar ze', za dey gaab ga lo de yu ni Creta.

<sup>14</sup> Tees ornu sa zi'l bruu dey ze' zay, orze' brugyi' druu tub bi ily rdugyiñ par lo barc nu yu' dë ze'. Bi ze' bloo la dey ñi Bi nu Druu Par Yaa Reg Na Ornu Güiin Par Ze' nu Rza Doo. <sup>15</sup> Bi ze' tona' la b icy nuñ barc, nunu wangaca' saa dey barc ze' par ze' nu rdugyiñ. Orze' blaa yaa dey ñi. Orze' za nu biñ. <sup>16</sup> Orze' za dë cuit tub nac

yu mi' nu ri lo nisyudoo nu la Cauda. Za dę tub lo nis ze' nu beñ ricy bi. Orze' ze' gyee bzu nap dę barc mi' nu zaab par ich ze'. <sup>17</sup> Despuees ornu bi pshup dę barc mi' ze', orze' bgu' dey ñi nañ barc ily. Gaze' nu ptiish dey duu cacy nañ barc par nu gyafert ñi. Orze' rdzib dey nu ches tị barc lo tub nac yu uzh nu ri par iiñ nis gaab ga lo yu ni Libia. Gaze' nu pshet te dey negy nu zaab too barc ze'. Orze' bzaan dey nu za nu biñ.

<sup>18</sup> Orze' tuuba' dzi, como ni zi'l dzi ricy bi, orze' brugyi' rne' dey yuu nu yu' nañ barc ze' lo nis. <sup>19</sup> Orze' dzi chon de coz nu ricy nu barc riiñ mne' dey ñi lo nis laab nu yaay. <sup>20</sup> Zañ dzi wansaca' dę doo güidz, nunu ni' zi'l wansac dę bel baa. Nunu ii zaab druu la bi ily. Orze' brugyi' nu wagrish lo ga' dę nu gruu mbaña.

<sup>21</sup> Orze' como dela mbecy bi guzañ dzi wagowa' dey gyit, orze' Baly wes suy lat dey. Gaze' nu nay rab yu dey:

—Der mbecy, nap zir benu nzuub gyidag der ne, nunu cue' ndruun lo yu ni Creta, gun orze' cue' nnit lo de coz sheñ ze'. <sup>22</sup> Tees cue' dzib der, gun wat ni tub la den. Nomaas barc ii nit loñ. <sup>23</sup> Gun che bruu zac tub anc ni Ñgyoozh lo, biñ nu nac nu ya, nunu biñ nu ya rca. <sup>24</sup> Orze' nay rab yu ya: "Cue' dzib ru Baly. Rlagy ñi nu char lo mbecy nu riib ic de nasyoong. Nunu par nu nac ru, wazaan Ñgyoozh nu gat ni tub mbecy nu yu' nur nañ barc ii", nay. <sup>25</sup> Nde' nu cue' dzib der, gun ya ricy cupa consuel lo Ñgyoozh nu gyicy mi gal nu mnii anc ze'. <sup>26</sup> Orze' gyet lag den lo tub nac yu nu ri lo nisyudoo —na Baly.

<sup>27</sup> Despuees ornu bza' trotap dzi nu dzi ricy bi, na or bi rel, bi bri nuñ barc lo tub nisyudoo nu la Nisyudoo Adriatico. Na or guzeel rel mnii too dey nu cyup ridz yagaab dey lo tub nac yu nu ri lo nisyudoo. <sup>28</sup> Gaze' nu pcaa dey tub coz ye lo tub duu cacy. Orze' mne' dey ñi lo nis. Orze' gud lagy dey nu yu' tub gal rub tiiñ zu tub metr nu gyi ri nis. Na ornu bzaañ sñuu miiñ, ni' zi'l b icy dey. Orze' gud lagy dey nu yu' gal rub gaay zu cyup metr nu gyi. <sup>29</sup> Na orze' gudzib dey nis dugyi barc lo de gyita' nu yu' par iiñ nis ze'. Orze' mne' dey tap duu cacy nu ca coz ye lo par ich barc, gun orze' chesab riñ lo nis. Orze' brish lo dey nu dzach za' yu. <sup>30</sup> De yu nu rsaa barc b icy pee dey nu ndruu chuy. Orze' brugyi' rshet lag dey barc mi' ze' lo nis. Bicy pee dey nu ñgya nuy tub coz ye nu ne'y par lo barc ze'. <sup>31</sup> Orze' na Baly rab yu yu nu riib ic de soldad, nu de' zir de soldad:

—Benu de yu nu rsaa barc re wabez dey nañ barc, orze' wac ruu mbañ der —na Baly.

<sup>32</sup> Orze' de soldad pshi'ñ yu de duu cacy nu nag barc mi' ze'. Orze' bet lag ñi lo nisyudoo.

<sup>33</sup> Na ornu gabee cow ru', orze' Baly mnishbaay lo dela mbecy nu gow dey ñuu gyit. Gaze' nu nay rab yu dey:

—Bi bza' trotap dzi nu yu' der dzi rash ru shcab, nunu wangow der gyit. <sup>34</sup> Nde' nu ya rnishbaa lo der nu gow ru ñuu. Gun nde' coz nu rlagy ñi par nu gagye der. Nunu wat ni tub der, nunu ni tub gyich too der wadune'ñ —nay.

<sup>35</sup> Ornu blazh mnii Baly de coz ze', orze' bdu' yaay tub gyishtily. Orze' briic yu gras ni Ñgyoozh lat dela mbecy ze'. Orze' blew yu gyishtily ze'. Gaze' nu brugyi' row yu. <sup>36</sup> Orze' dela mbecy guud baloor ni dey, nunu bdowa' dey ñuu gyit. <sup>37</sup> Yu' cyup gaynal Zub chon gal rub gaay zu tub mbecy nu yu' nañ barc ze'. <sup>38</sup> Na ornu bi bdow gyel dey na, orze' mne' dey de trig lo nisyudoo par nu gyadzach barc ze'.

### Mnit lo barc

<sup>39</sup> Na ornu bza' yu, orze' bzaac dey lo yu par wagyu' lo ga' dey ca lugaar ni yu ze'. Orze' bzaac dey tub nis nu ri reñ, tees ñgyiid la ru'ñ nu nisyudoo. Nunu ru' nis ze' ri tub lacy she. Gaze' nu mnii too dey benu gac cha nu dey barc par ze' nu ri lacy ze'. <sup>40</sup> Gaze' nu pshi'ñ dey duu cacy nu nag barc ze' nu coz ye ze'. Orze' bzeeñ dey ñi lo nis. Nunu pshaagy dey duu cacy nu nag yag nu rlyuu ca na nez nu cha barc. Gaze' nu pshes nañ dey negy nu zaab too barc ze', gun orze' bi saañ barc ze'. Na orze' brugyi' nu rza barc par garee ga ze' nu ri yu ze'. <sup>41</sup> Tees orze' bdugyiñ ze' nu ri tub nac yu uzh nu ri par iiñ nis. Orze' wes tị par loñ lat yu uzh ze'. Wangaca' ruuñ. Nunu tonal' b icy nu nis par ich ñi, gashtal brugyi' rduzug lañ.

<sup>42</sup> Orze' de soldad rlagy dey cut yu de mbecy nu nac pres nis riib dze dey ornu lazhu cub dey nis nu riy gal lo yu bigy. <sup>43</sup> Tees yu nu riib ic de soldad rlagy yu co mbañ yu Baly. Orze' wansaan yu nu ni gyicy dey. Sinu b icy yu mandaar lo de mbecy ben ca na dey gac cub yu nis, orze' yu ze' gyet yu lo nis loga la. Orze' cub yu nis par nu riy lo yu bigy. <sup>44</sup> Orze' dela de' zir mbecy za ca dey ich yu. Yu' dey zay lo tub yala. Yu' ga'y zay lo tub la' barc bla'. Ni mod bruu nap de. Brj dela de lo yu bigy.

### Baly zay Malta

<sup>28</sup> Na ornu bri nap de lo yu, orze' gud lagy de nu nde' tub nac yu nu ri lo nisyudoo nu la Malta.

<sup>2</sup> De mbecy nu guledz, de yu ze' tonal' la nap b icy nu dey de ya. Bet gyey, nunu dzi rag. Gaze' nu pcuaa dey tub nac gyi ily, nunu mnii dey nu cuidz de gyi ze'.

<sup>3</sup> Orze' Baly b icy tublaazh yu tub nac yag wach. Orze' pcuaay ñi lo gyi ze'. Par nu nac nu dzi zig, orze' bruu tub b icy lat yag ze' nu ricy pee ma cha ma. Orze' pshet la ru' ma yaa Baly. <sup>4</sup> Na ornu bzaac de mbecy guledz nu zaab gyi b icy ze' yaa Baly. Orze' na dey rab yu losa'y:

—Rabee nu yu re nac yu tub mbecy nu rut losa'. Tees wasaan gyel fushtiz ni Ñgyoozh nu cui mbañ yu mas bruu nap yu lo nisyudoo —na dey.

<sup>5</sup> Tees Baly bdib yaay. Orze' pshet lag yu b icy ze' lo gyi. Nunu se la la bzac yu. <sup>6</sup> Dela mbecy blez yu nu chegyi Baly o nu derepent la gyes saay gat yu. Tees ornu bi guchi rbez dey, nunu rgüii dey nu se la la bzac yu, orze' reña' mod mnii too dey. Gaze' nu na dey:

—Yu re tub ñgyoozh —na dey.

<sup>7</sup> Gaab ga lugaar ze' mbish yu ni tub mbecy nu la Publio, yu ze' riib ic yu yu nu ri lo nisyudoo ze'. Orze' bredz yu de, nunu nap b icy nuy d e lat chon dzi nu pcyiñ d e loy. <sup>8</sup> Na uz Publio mbish yu nu rat yu. Rcaañ zig niy, nunu druyuuy. Orze' Baly gua güiyyu. Na ornu blazh mnii nu Baly Ñgyoozh nu nac yu, orze' briib yaay yu. Orze' byac yu. <sup>9</sup> Na ornu bi bded nde', orze' dela mbecy rat nu yu' lo yu nu ri lo nisyudoo ze' guay lo Baly. Orze' byac dey. <sup>10</sup> Orze' briic dey zañ coz gane d e. Nunu ornu gu' d e nañ tuuba' barc, orze' briic dey dela coz nu cyiiñ n e d e nez nu cha.

### Baly bruuy Malta zay Rom

<sup>11</sup> Na ornu blazh chon beey, orze' gu' d e nañ tub barc ni de mbecy Alejandría. Lo barc ze' ca cyup nab ñgyoozh nu la Cástor nu Pólux. Barc ze' byeeñ ñi Malta lascyey. Gaze' nu gu' d e nañ ñi za d e. <sup>12</sup> Orze' bri d e tub gyedz nu ri ru' nisyudoo nu la Siracusa. Ze' pcyiñ d e chon dzi. <sup>13</sup> Gaze' nu bruu d e ze'. Za d e tub ru' yu la ni lugaar ze'. Orze' bru'ña d e tub gyedz nu la Regio. Orze' tuuba' d zi brugyi' nu druu bi par yaa been ornu güiin ze' nu driib doo. Orze' za d e. Na ornu bza' cyup dzi, orze' bri d e tub gyedz nu la Puteoli. <sup>14</sup> Ze' byap d e la be mbecy nu ricy cup consuel lo Crisht. De yu ze' bredz dey de ya par nu cyiiñ du d e yu tub shuñ dzi. Orze' bruu d e ze'. Za d e par Rom. <sup>15</sup> De b icy na nu yu' Rom, ornu güeñ dey nu za d e, orze' gua cheel dey de ya gashtal tub lugaar nu la Yagyi' ni Apio, nu tuuba' lugaar nu la Chon Posad. Ornu Baly bzaac yu de yu ze', orze' briic yu gras ni Ñgyoozh, nunu gud baloor niy. <sup>16</sup> Na ornu bri d e Rom, orze' yu nu riib ic de soldad ze' bzeeñ yu de pres yaa tuuba' yu nu riib ic de yu nu rña laab pres. Tees bzaan dey nu cyiiñ reñ Baly nu tub soldad nu ñay yu.

### Baly bzat yu Crisht Rom

<sup>17</sup> Na ornu bi bza' chon dzi nu bri Baly Rom, orze' bredz yu de yu Zub lo ni de mbecy Israeel, de yu nu yu' Rom par nu gyatublaazh dey. Na ornu bi byatublaazh dey, orze' nay rab yu dey:

—Der b icy na, ya walab nu shiñ b icy du de losa'n, nunu ni' walab nu b icy cooz nu za contr ni cushtom nu bzeeñ de gyitoo bel ni den, tees pshet lag dey ya pres Jerusaleeng. Orze' bgu' dey ya yaa de mbecy Rom.

<sup>18</sup> Orze' de mbecy Rom bdugyi' dey lo de coz nu guc, nunu ngulagy dey nlaay ya, gun wancyuu caacy ni tub la cyi nu briib dey too par nu gyicy ñi nu gata. <sup>19</sup> Tees de mbecy Israeel wangalagy dey nu ndulaq. Nde' nu ya wangac gyicya reña' mod. Orze' ya bdiñä nu yu nu riib ic de nasyoong gri beey n e. Ni b icy mas sac ni tub la cyi fals nu riiba ic de losa'n. <sup>20</sup> Nde' nu ya bredza de ru par nu zaca der, nunu par nu nee du de ru. Tub zi la

nu nac biñ nu rgyish lo de mbecy Israeel lo, par nu nac mi ze', nde' nu ri pres —na Baly.

<sup>21</sup> Orze' na dey rab yuy:

—De mbecy Judea wancaa dey ni tub la gyicy nu nzat dey ru lo d e. Ni' de b icy na nu bruu Judea wannii dey ti b icy ru cyi. <sup>22</sup> Rlagy d e gyeñä de coz nu ru rnii toor, gun bi rad lagy d e nu dela lugaar rnii dey riidz nu za contr ni leey cub ze' —na dey.

<sup>23</sup> Orze' bzu dey tub dzi nu gzuub gyidag dey de coz nu nii Baly. Na ornu pshuub dzi ze', orze' tona' la zigy mbecy byatublaazh dey ze' nu rcyiiñ Baly. Gaal zi'l brugyi' rniy se or napor gashtal or bicheñ laa gabee rnii ru'y de riidz ni gyel gubier ni Ñgyoozh. Bzat yu de riidz nu bzeeñ Moisees, nunu bzat yu de riidz nu bzeeñ de yu nu mnii por cuen ni Ñgyoozh par nu gyicy ñi nu cuug yu lardoo de mbecy nu cyu nac Jesuuz. <sup>24</sup> Par nu nac de coz nu mniy, orze' bguugy lardoo la be mbecy tees de' zir mbecy wancheña lagy dey. <sup>25</sup> Orze' wangiyicy dey tub zi'l riidz nu losa'y. Orze' brugyi' rash nez dey druuy lo Baly. Orze' na Baly:

—Nap mnii Espiriit Yon ni Ñgyoozh ornu mniim lo Isaías, tub yu nu mnii por cuen ni Ñgyoozh, ornu mniy lo de gyitoo bel ni den. Isaías nay:

<sup>26</sup> Ñgyoozh nam:

"Gua niir lo de mbecy ii.

De ru mas nap gzuub gyidag der tees wayet lag der cuen.

Mas nap güii der tees wazac der.

<sup>27</sup> Gun de mbecy ii byacyigy tooy.

Nunu psoow dey gyidag yu.

Nunu psoow dey urloy,

gun orze' wazac dey nu urloy,

nunu wagyeñ dey nu gyidag yu.

Ni wayet lag dey cuen nu shcab niy.

Nunu ni wachaa dey mod nu gyicy yu,

gun orze' yub dey ya.

Gun orze' ya gyicy nap a dey",

na Ñgyoozh,

na Isaías —na Baly.

<sup>28</sup> Orze' na ga'y:

—Ya ricä nu gad lagy der nu na Ñgyoozh rlagy mi nu nee d e de riidz nu gyicy nu gruu mbañ mbecy lo de mbecy nu walab mbecy Israeel. Nunu de yu ze' gzuub gyidag dey niñ —na Baly.

<sup>29</sup> Ornu blazh mnii Baly de riidz ze', orze' de mbecy zi ga la ro dey riidz nu losa'y. Orze' ya dey.

<sup>30</sup> Orze' li laa cyup ña'n pcyiiñ Baly lugaar ze'. Pcyiiñ yu nañ tub yu' nu rgyish yu gyi'. Nunu nap b icy nuy de mbecy nu gua güiyy. <sup>31</sup> Pshaal yu de riidz ni gyel gubier ni Ñgyoozh lo dey, nunu blyuuy ni dey de coz ni Jesucrist. Nunu rila wanca de mbecy niy nu cue' ni gyicy yu.

# Romanos

Baly bzeed yu tub gyicy lo de mbecy ni Crisht nu yu'  
Rom

**1** Ya Baly, tub yu nu ricy de coz nu rnii Jesucrisht.  
Ñgyoozh bzum ya nu naç aposht nunu pcuim ya  
par nu shaalä de riidz nu sac nim.

**2** Riidz nu sac ze', nde' tub coz nu ton'a la gulas mnii  
Ñgyoozh nu segur la gyicy mi. Ni mniim lat de riidz  
nim nu bzeeñ de yu nu mnii por cuen nim. **3** Riidz ze'  
rniiñ de coz ni I'ñ mi, Shuaan den Jesucrisht. Byac mi  
tub mbecy gyishlombecy nu nac nu bruum lat nez  
Dabi. **4** Tees Espiriit Yon b icy mi nu gud lagy den nu mi  
ze' nac mi i'ñ Ñgyoozh nu nac coz ily nu guc ornu  
byabañ mi nu gut mi.

**5** Nunu nap b icy nu Ñgyoozh ya ornu b icy mi nu Jesu-  
uz bzum ya nu gac aposht. Ni b icy mi, gun orze' lo-  
cyuuba de mbecy nu yu' gab'i naañ la ni gyishlombecy  
nu gyicy cup dey consuel lom, nunu zuub gyidag dey  
nim, gun orze' ca lagy dey lom. **6** Gaza' de ru de mbecy  
Rom nu bzu Ñgyoozh nu gac ni Crisht. **7** Nde' nu ya  
zeedä gyicy ii lo de ru, de mbecy ni Crisht nu yu' Rom.  
Ñgyoozh rcam de ru, nunu bzum der par nu gac der  
mbecy nim.

Ñgyoozh Uz na nu Shuaan den Jesucrisht gyicy dem  
faboor nu nap gyicy num der, nunu gyicy mi nu cheti ri  
añ ni der.

Baly rlag yu cha güiyy de mbecy ni Crisht nu yu' Rom

**8** Nu loga la, nu nac Jesucrisht ya dricä gras ni Ñgy-  
oozh nu nac dela der, gun de ga la lugaar bi rnii de  
mbecy nu fert ricy cup der consuel lo Crisht. **9** Nu dutu-  
ub la lardooy, ricya de coz nu rlag y Ñgyoozh ornu  
rshaala riidz ni I'ñ mi, Jesuuz. Nunu mi ze' rad lagy mi  
nu rzatä der lat nu rnëe dum. **10** De tir la ornu rnëe  
dum, ya rdiñä lom nu cuic mi tub mod nu yap güiij der,  
benu nde' coz nu rlag y mi. **11** Rlag y yap güiij der par  
nu locyuuba der nu de coz nu druu lo Espiriit Yon ni  
Ñgyoozh, gun orze' gyafert zir der nu nac de coz ni Crisht.  
**12** Mod nu rnëe ii, nii nu locyuub na losa'n. Ya lo-  
cyuuba de ru nu nac de coz nu ricy Crisht num ya,  
nunu de ru locyuub der ya nu nac de coz nu ricy Crisht  
num de ru.

**13** Der b icy na, ya rlag y nu gad lagy der nu zañ tir bi-  
cy pëe nu nyap güiij der, tees mas gashtal dzi na wa-  
gad mod nu yap a. Rlag y yap a, gun orze' za' lo ñuu ri-  
iñ ni Crisht lat de ru, gal nu b icya lat de' zir de mbecy  
nu walab mbecy Israael. **14** Ya yad ñi ne nu shaalä riidz  
ni Crisht lo dela mbecy: mas lo de yu lily, nunu mas lo

de mbecy riidz, mas lo de mbecy nu nap rad lagy,  
nunu mas gal lo de yu nu wagad lagy, tees yad ñi ne  
nu shaalä riidz ze' lo dey. **15** Nde' nu ric la añ ne nu  
shaalä de riidz nu sac ni Crisht lo de ru, mbecy nu yu'  
Rom.

**16** Ya wagat lo nu nac de riidz nu sac ni Crisht, gun nu  
nac de riidz ze' Ñgyoozh co mbañ mi de mbecy nu gyi-  
cy cup consuel lom. Nu loga la co mbañ mi de mbecy  
Israael, tees ni' zi'l co mbañ mi de mbecy nu walab  
mbecy Israael. **17** Gun riidz ze' ricy ñi nu gad lagy den  
lac mod ricy Ñgyoozh par nu gyanap den lom. Tub zi la  
nu nac nu gyicy cup den consuel lom, orze' gyanap  
den par lom. Gun lat de riidz ni de yu nu mnii por cuen  
nim rniiñ: "Yu nu gyanap par lo Ñgyoozh nu nac nu ri-  
cy cup yu consuel lom, orze' yu ze' cui mbañ yu", rniiñ.

## Dela mbecy yu' falt niy par lo Ñgyoozh

**18** Rabee nu gal gyibaa gruu cashtig nu gzeed Ñgy-  
oozh lat de mbecy nu ricy coz cyi, nunu lat de mbecy  
nu ricy coz a' nap nu losa', gun ton'a la rzi lagy mi lo  
dey. De mbecy a' nap ze' ricy dey nu wagac gad lagy  
de mbecy de coz rishli nim nu nac de coz a' nap nu ricy  
dey. **19** Tees naal la rabee de coz nu gac gad lagy dey  
nim, gun laab mi pshaal mi ñii lo dey. **20** Gun de coz  
nim nu wac zac dey, gac gad lagy dey ñi nu nac nu rzac  
dey de coz nu psa' lagy mi. Gaal zi nese nu bzub gyi'  
gyishlombecy rad lagy dey nu mi ze' nac mi Ñgyoozh,  
nunu rad lagy dey nu rila walazh fers nim. Rad lagy  
dey nde' nu nac de coz nu psa' lagy mi. Nde' nu sac  
rishto' lo ni dey. **21** Gun mas rgu' lo dey mi, tees waca  
lagy dey lom gal nu yad ñi nu gyicy dey lom, nunu ni  
wancuic dey gras nim. Lugaar nu gyicy dey nde', ca nu  
guton too dey, nunu mnu shcab ni dey. Wangac nii too  
dey ca na coz nu nap. **22** Rnii dey nu nac yu mbecy nu  
yu' lo, tees nac dey mbecy ton. **23** Pchaa dey gyel lily ni  
Ñgyoozh biñ nu rila wat. Orze' brugyi' driib zily dey tub  
nab mbecy nu gat. Driib zily dey nab chigyiñ, driib zily  
dey nab bily, driib zily dey nab de bañcyug tap gyi'.  
Dela nde' driib zily dey.

**24** Nu nac de nde', orze' bzaan Ñgyoozh nu ricy dey  
de lo la coz a' nap nu druu nañ lardooy. Bzaan mi nu  
ricy dey de lo la coz to' lo nu losa'y. **25** Lugaar nu zuub  
gyidag dey de riidz rishli nim ca coz rguu rzuub gyidag  
dey. Driib zily dey de coz nu psa' lagy mi, nunu rzu bich  
dey nu nac de coz ze'. Ni ricy dey lugaar nu griib zily  
dey biñ nu psa' lagy dela coz. Rlag y ñi gyabic den gyel  
mbecy nim par tub la. Laab ni gac ñii.

<sup>26</sup> Par nu nac nde', Ñgyoozh bzaan mi nu de coz to' lo nu druu nañ lardoo dey chetib ic ñiy. Mas de biñ mñaa shiñ ricy dem. Lugaar nu dzeel mi yu gyeey mod nu rlagy ñi, ca nu losa' mñaa dem ral mi. <sup>27</sup> Ni' zi'l de yu gyeey. Guca dey nu rdzeel dey biñ mñaa mod nu rlagy ñi. Ca nu ric la añ ni dey nu gal yu losa' gyeey yu. Ricy dey coz to' lo nu losa' gyeey yu. Ub la dey rnuy cuerp ni ub yu nu nac de coz a' nap nu ricy yu. Nde' cashtig nu ricy cup dey.

<sup>28</sup> Orze' Ñgyoozh bzaan mi nu byashiñ na shcab ni de mbecy, gun walagy dey caa ic yu de riidz rishli nim. Nde' nu ricy dey de coz nu a' yad ñi nu gyicy yu. <sup>29</sup> Dzi bded ru' ga' ricy dey de lo la coz a' nap. Shiñ ricy nu dey losa'y. Ye rzac dey lo coz ni losa'y. Rzat zi dey losa'y. Rasaap lagy dey nu nac losa'y. Rut dey losa'y. Deet rzu' dey nu losa'y. Rguu dey losa'y. Ricy ras dey nuy losa'y. Ro dey rishcuen. <sup>30</sup> Rnii zi dey ni losa'y. Wayet lagy dey Ñgyoozh. Nac dey mbecy rnid ru'. Nac dey mbecy le'. Ricy zily dey ub yu. Rboo ic dey lac mod gyicy yu coz a' nap. Wacsuub gyidag dey ni de mbeli. <sup>31</sup> A' nap dey. Wagacy yac dey nu de riidz nu rnii. Waca dey losa'y. Wagacy ic dey lo losa'y. Wagashni lagy dey losa'y. Dela nde' coz nu ricy dey. <sup>32</sup> Nap rad lagy dey nu Ñgyoozh mniim nu cyu zi'l mbecy nu ni gyicy, orze' yu ze' yad ñi ni yu' gat yu. Tees walab tub lo zi'l nu zaab ricy la de ub yu de coz ze', sinu shiñ zir ricy dey, gun gal yet la lagy dey ornu ni ricy reña' mbecy.

### Ñgyoozh gri beem ni dela mbecy

<sup>2</sup> Orze' ru mbecy nu rnii too nu yu' falt ni losa', sac rishto' lo nir. Orze' mas cyu zi'l mbecy nu nac ru, sac rishto' lo nir, gun ornu rniir nu yu' falt ni de losa'r, orze' ni' zi'l ricy ru coz nu ricy de losa'r, orze' rabee nu ni' zi'l yu' falt nir. <sup>2</sup> Rad lagy den nu nap ricy Ñgyoozh ornu rniim nu yu' falt ni de mbecy nu ricy coz a' nap. <sup>3</sup> Tees ru, de cyi nu driib ru too losa'r ni' zi'l ru ricy ru ñii. ¿A rash ru shcab nu gac ruu chur lo cashtig ni Ñgyoozh? <sup>4</sup> Ru wagacy yu graseer ni Ñgyoozh nu dzi gugy nam. A' tañ mi nu nac de cyi nu ricy den, nunu dzi ricy cup mi pasez ni den. Tees sac la graseer ru. ¿A wagad lagy ru nu Ñgyoozh dzi gugy nam par nu locyuub mi ru nu ne'r dela cyi nu ricy ru? <sup>5</sup> Par ru, dzi ga cyig y lar door. Dzi ga zed lor. Nde' nu laab ru ricy ru nu dzi zir gad cashtig nir ornu shuub dzi nu gruu zac Ñgyoozh nu gri beem ni de mbecy mod nu se'ñ. <sup>6</sup> Gun Ñgyoozh cyish mi ni tub ga la mbecy dub gal nu na coz nu b icy yu. <sup>7</sup> Yu' mbecy nu zaab ricy la dey coz nap. De yu ze' rlagy yu nu cuic Ñgyoozh gyel lily niy. Rlagy dey gyac yu mbecy rasoo. Rlagy dey cyiiñ yu tub la. De mbecy ze' cuic mi gyel mbañ ni dey tub la. <sup>8</sup> Ze' yu' ga' mbecy nu walagy dey zuub gyidag yu ni Ñgyoozh. Rzu chu dey de coz nu se'ñ par nu ryub yu coz a' nap. Ñgyoozh rzi lagy mi lo de yu ze', nunu cuic mi cashtig ni dey. <sup>9</sup> Tona' la gzac zi de mbecy nu shiñ ricy ze'. Gzac deet dey. Nu loga la shiñ gzac de mbecy Israel nu shiñ ricy, nunu ni' shiñ gzac de mbecy nu walab mbecy Israel. <sup>10</sup> Tees Ñgyoozh cuic mi gyel lily ni de yu nu ricy coz nap, nunu gyicy mi nu gac dey mbecy rasoo, nunu cuic

mi gyel ri zu nañ lardoo dey. Nu loga la cuic mi ñii ni de mbecy Israeel, nunu ni' zi'l cuic mi ñii ni de mbecy nu walab mbecy Israeel.

<sup>11</sup> Tub zi'l mod gri bee Ñgyoozh ni dela mbecy. <sup>12</sup> De mbecy nu a' yu' lo leey ni Moisees, ornu ricy dey cyi, orze' nit lo dey, mas a' yu' lo dey leey ze'. Ze' de mbecy nu yu' lo leey ni Moisees, orze' Ñgyoozh gri beem ni dey laab mod nu rnii leey ze'. <sup>13</sup> Gun walab nu gyanap mbecy par lo Ñgyoozh nu nac nu gyeñ zi'l dey ornu rlab mbecy de riidz ni leey, sinu Ñgyoozh gyicy mi nu gyanap mbecy nu nac nu gyicy yac dey niñ. <sup>14</sup> De mbecy nu walab mbecy Israael, mas sac leey ze' lat dey tees nil ricy yac dey de coz nu rniiñ. Orze' ricy dey nu rabee nu rad lagy yu ca na coz nu se'ñ, mas a' yu' lo dey leey. <sup>15</sup> De coz nu ricy dey, nde' rlyuuñ nu yu' lo dey leey ze' nañ lardooy. Ni' zi'l rabee nu yu' lo dey leey nañ lardooy, gun yu' nu rat lo dey nu nac coz a' nap nu ricy yu. Nunu ni' zi'l wagat lo dey ornu ricy yu coz nap. <sup>16</sup> Orze' ni mod gac ornu shuub dzi nu gyicy Ñgyoozh nu gri bee Jesucristi ni dela mbecy nu nac de coz nu b icy dey. Mas ngach b icy dey de coz a' nap, tees gri beem ni dey nu nac coz a' nap ze'. Ni mod za de riidz nu sac nim nu rshaalä lo der.

### De mbecy Israael nu leey ni Moisees

<sup>17</sup> Ze' ru rniir nu nac ru mbecy Israael. Rgyish lor lo leey ni Moisees, nunu ricy le'r nu nac nur Ñgyoozh.

<sup>18</sup> Rad lagy ru la na coz nu rlagy Ñgyoozh, nunu rad lagy ru la na coz nap, nunu rad lagya'r la na coz a' nap, gun leey nim blyuuñ nir. <sup>19</sup> Rzu fert ru nu gac lyuur ni de mbecy nu wagad lagy lac mod gyicy. Orze' gac shaal ru lo mbecy nu wagad lagy de coz ti laab ni, o ti walab ni. <sup>20</sup> Gac lyuur ni de mbecy nu sac shcab ni, nunu gac lyuur ni de mbecy nu na shcab ni gal nu na shcab ni yu nguzh. Gun leey ricy ñi nu rad lagy ru dela coz, nunu ricy ñi nu rila wagadzar nu de riidz nu rniir. <sup>21</sup> Rlyuur ni mbecy, tees ¿lagu ni ub ru waglyuur? Rshaal ru lo mbecy nu cue' gyicy yu gubaan tees ub ru ricy ru gubaan. <sup>22</sup> Rniir lo de mbecy nu cue' gal dey losa'y nu wanchelaay, tees ub ru ricy ru ñii. Rzi lagy ru lo nab, tees ricy ru gubaan de coz nu nguaa nañ yu' nu driib zily mbecy nab. <sup>23</sup> Ru ricy le'r nu ricy cup ru leey ni Ñgyoozh, tees ricy ru nu waca lagy mbecy lo Ñgyoozh ornu wagacy yac ru niñ. <sup>24</sup> Nde' nu rniiñ lat de riidz ni Ñgyoozh: "De yu nu walab mbecy Israael rnii zi dey ni Ñgyoozh nu nac de ru", rniiñ.

<sup>25</sup> Benu gyicy yac der ni leey ze', orze' cyiiñ ñi nu ca beey sircunsision cuerp ni der. Tees benu wagacy yac der ni leey ze', orze' se la la gyicy mas cue' la caañ der.

<sup>26</sup> Orze' benu de mbecy nu walab mbecy Israael, de yu nu waca beey sircunsision cuerp ni, ze' benu de yu ze' gyicy yac yu ni leey ni Ñgyoozh, orze' segur la gyicy Ñgyoozh dey par mbecy nu ca beey sircunsision cuerp ni. <sup>27</sup> Orze' de yu nu sac beey sircunsision cuerp ni, tees ricy yac dey ni leey ze', orze' de yu ze' ricy dey nu rabee nu yu' falt ni de ru, gun mas ricy cup der leey ni Ñgyoozh, nunu mas ca beey sircunsision cuerp ni der, tees wagacy yac der niñ. <sup>28</sup> Gun mas tub uz mbecy nac

yu mbecy Israeel, walab nde' gyicy ñi nu rishli nac yu mbecy Israeel. Ni' zi'l mas ca beey sircunsision cuerp niy, tees walab nde' gyicy ñi nu gabe nu rishli nac yu mbecy ni Ñgyoozh. <sup>29</sup> Sinu yu nu nac mbecy ni Ñgyoozh nañ lardoo, yu ze' rishli nac yu mbecy Israeel. Mas waca beey sircunsision cuerp niy, tees nañ lar-doo y rabee nu nac yu mbecy ni Ñgyoozh. Nunu nde' tub coz nu druu lo Espiriit Yon nim, walab coz nu druu lo leey nu ca lo gyicy. Yu ze', walab mbecy ricy zily yuy, sinu Ñgyoozh ricy zily mi yu.

**3** Dzi ga grusu tub mbecy nu niiy: "¿La ñuu cyiiñ ñi ni tub mbecy benu nac yu mbecy Israeel? ¿La ñuu cyiiñ ñi niy benu ca bee sircunsision cuerp niy?" niiy.  
<sup>2</sup> Ca ni gaal cyiiñ ñi, gun Ñgyoozh bzeeñ mi riidz nim yaa de mbecy Israeel. Nunu nde' coz nu ricy zir ñi pre-sis. <sup>3</sup> Yu' mbecy nu wangyicy paay, tees se la la nu nde'. Par nu nac nde', ¿a wagyicy paa Ñgyoozh, rzii der? <sup>4</sup> Ñgyoozh segur la ricy paam. Mas dela mbecy rguu dey, tees mi ze' segur la ricy yac mi gal nu rniiñ, gun lat de riidz nim rniiñ:

Ñgyoozh, ru segur la gad lagy mbecy nu rishli rniiñ. Ornu mbecy cugyi'y ben a rishli rniiñ, segur la gruu nap ru, rniiñ.

<sup>5</sup> Tees dzi ga grusu tub mbecy nu niiy: "Benu de ub na shiñ gyicy na, orze' nap zir rad lagy mbecy nu Ñgyoozh nap ricy mi. Orze' ¿a shiñ ricy mi ornu rbic mi cashtig nin?" (Yá rnëe mod nu rnii cualcyer la mbecy.)  
<sup>6</sup> Rila a' shiñ ricy mi. Benu wagyicy mi coz nu se'ñ, orze' ¿lac mod gri beem ni de mbecy nu yu' gyishlombecy?

<sup>7</sup> Beni orze' dzi ga grusu tub mbecy nu niiy: "Benu ya güu, orze' nap zir rabee gyel lily ni Ñgyoozh, gun mi ze' rishli rniiñ. Orze' ¿lagu gaal nu dzi rniiñ nu ya nacä mbecy cyi? <sup>8</sup> Dela den rlagy ñi nu gyicy na coz a' nap, gun orze' gruu zac coz nap", rnii dey. Yu' mbecy nu rnii ziy ne. Rnii dey nu ni mod za riidz nu rlyuu. Ñgyoozh nap ricy mi ornu rniiñ nu yu' falt ni dey.

### Dela mbecy yu' cyi dey

<sup>9</sup> Orze' ¿lac beni? ¿A nap zir nu nac de ub na mbecy Israeel gaze' tub naca' mbecy? ¡Walab! De yä bi pshaala lo der nu de mbecy Israeel gal nu de mbecy nu walab mbecy Israeel, tub zi'l nu yu' cyi dey. <sup>10</sup> Ni rnii riidz ni Ñgyoozh ze' nu rniiñ:

¡Par Ñgyoozh, sac ni tub mbecy nap!  
 ¡Sac ni tub yu!

<sup>11</sup> Sac mbecy nu yet lag cuen de coz ni Ñgyoozh. Ni sac yu nu ryub Ñgyoozh.

<sup>12</sup> Dela mbecy bruu chu dey lo Ñgyoozh.  
 Dela dey gudzay.

¡Rila sac yu nu ricy coz nap!  
 ¡Sac ni tub yu!

<sup>13</sup> Shiñ na ru' dey.  
 De riidz nu driib gyeryeñ dey tona' la bag nañ.  
 Nañ gal nu na tub gyerbaa nu naal ru'.  
 Nu lyudz dey rguuy.  
 Du ub riidz dañ zi'l driib lo gyid ru' dey.

Nañ gal nu na benen ni bily.

<sup>14</sup> Zaab rzaa la lagy dey ni losa'y.

Nunu zaab rnii la dey riidz a' nap.

<sup>15</sup> Dzach zu dey par nu cut yu losa'y.

<sup>16</sup> Dela ze' nu rded dey,  
 rnu dey, nunu rzac deet dey.

<sup>17</sup> Wagad lagy dey lac mod par nu nap chesa nu dey losa'y.

<sup>18</sup> Wagnii la too dey nu ca lagy yu lo Ñgyoozh, rniiñ lat de riidz nim.

<sup>19</sup> Na rad lagy den nu dela coz nu rnii leey nu bzeeñ Moisees, nde' par de mbecy nu riib ic leey ze', gun orze' checa de mbecy nu rnii lagu nu sac falt ni dey, nunu nu nac leey ze' nii Ñgyoozh nu yu' falt ni dela mbecy nu yu' gyishlombecy. <sup>20</sup> Gun sac ni tub mbecy nu gyanap yu par lo Ñgyoozh nu nac nu gyicy yac yu ni leey ze', sinu leey ze' cyiiñ ñi par nu gad lagy dey nu yu' cyiy.

### ¿Lac mod gyanap mbecy lo Ñgyoozh?

<sup>21</sup> Tees na Ñgyoozh rbic mi nu gad lagy den lac mod gyanap na lom, nunu mod ze', nde' walab nu nac nu ricy yac den ni ca na tub leey. Tees de riidz ni leey, gal nu de riidz ni de yu nu mnii por cuen ni Ñgyoozh rztat ñi mod ze'. <sup>22</sup> Ñgyoozh gyicy mi nu gyanap den lom nu nac nu gyicy cup den consuel lom. Ni gyicy num dela mbecy nu gyicy cup consuel lom, gun dela mbecy tub zi'l mod nu na dey. <sup>23</sup> Gun dela mbecy b icy dey coz cyi, nunu a' yad ñi ni dey nu zac yu lo gyel lily nim. <sup>24</sup> Tees leew la ricy mi faboor num den nu gyanap na lom, nu nac Jesucrisht, biñ nu briish cyi den. <sup>25</sup> Ñgyoozh bzuu nez mi Jesucrisht, gun nu nac nu pshu reñ mi, orze' bic y sulagy mi dela cyi den. Ni b icy mi par dela den nu nac nu ricy cup den consuel lom. Ñgyoozh b icy mi nde' par nu gabe nu dzi se'ñ ricy mi. Gulas Ñgyoozh b icy cup mi paseñ num den, nunu wangyicy cuen mi cyi nu b icy den. <sup>26</sup> Tees na za' lom dela cyi mbecy, gun orze' gabe nu se'ñ ricy mi, nunu rzu nap mi de mbecy nu ricy cup consuel lo Jesuuz.

<sup>27</sup> Orze' wad la mod nu gyicy lily mbecy ub yu. Orze' ¿lagu? Nde' gun gyanap dey par lo Ñgyoozh walab nu nac nu gyicy yac dey coz nu rnii leey, sinu nu nac nu gyicy cup dey consuel lo Jesuuz. <sup>28</sup> Orze' nde' nu rad lagy den nu de mbecy gyanap dey lo Ñgyoozh tub lo zi'l nu nac nu gyicy cup dey consuel lo Jesuuz, nunu walab par nu nac nu gyicy yac dey nu de coz nu rnii leey.

<sup>29</sup> Ñgyoozh, ¿a nac mi Ñgyoozh ni de mbecy Israeel zi'l? ¿A walab nu naca'm Ñgyoozh ni de mbecy nu walab mbecy Israeel? Rishli gaal nac mi Ñgyoozh ni dela mbecy nu walab mbecy Israeel. <sup>30</sup> Gun sac cyu' zir, sinu tub zi la Ñgyoozh. Nunu gyicy mi nu gyanap de mbecy nu ca beey sircunsision cuerp ni lom nu nac nu gyicy cup dey consuel lo Jesuuz. Ni' zi'l de mbecy nu wanca beey ze' cuerp ni, gyanapa' dey lom nu nac nu gyicy cup dey consuel lom. <sup>31</sup> Orze' beni, ¿a rlagy ñi nu ne' den leey ze' nu nac nu gyicy cup na consuel lo Jesuuz?

¡Walab! Lugaar nu ne' den leey ze', rlagy ñi nu nap zir gyicy dun ñii.

### Mod nu bzac Abraham

**4** Tees orze' ¿lac ñuu niin nu nac mod nu bzac gyi-toob bel ne' de Abraham? <sup>2</sup> Benu ñgyanap yu par lo Ñgyoozh nu nac de coz nu b icy zi'l yu, orze' ñgyac ñgyicy le'y. Tees par lo Ñgyoozh wac gyicy le'y. <sup>3</sup> Gal nu rnii riidz ni Ñgyoozh: "Abraham b icy cup yu consuel lo Ñgyoozh, nunu par nu nac nde', Ñgyoozh b icy mi yu par mbecy nu sac cyi", rniiñ. <sup>4</sup> Benu tub mbecy gyicy yu ri-iñ, orze' yad ñi niy nu gyad iy. Iy, nde' walab nu leew la gyabic dey ñi, sinu nde' coz nu gyicy yu gan. <sup>5</sup> Na yu' mbecy nu ricy cup yu consuel lo Ñgyoozh par nu gyanap yu lom, nunu walab nu rgyish loy lo de coz nu ricy yu. Yu ze' ricy cup yu consuel lo Jesuuz, biñ nu rnii nu caacy mbecy mas yu' cyi. Ñgyoozh ricy mi yu ze' par mbecy nu sac cyi nu nac nu ricy cup yu consuel lom. <sup>6</sup> Nde' yaruuñ gal nu yaruu riidz ni Dabi ornu pcaay nu dzi ni de mbecy benu Ñgyoozh gyicy mi yu par mbecy cacy mas lac zi'l na coz nu b icy yu. <sup>7</sup> I mod za riidz ze':

¡Dzi ni de mbecy benu gyicy sulagy Ñgyoozh ni de cyi nu b icy yu!

¡Dzi ni de mbecy benu soow sum lo de cyi nu ricy yu!  
¡Dzi ni de mbecy benu wagriib cuen mi de cyi nu ricy yu!, rniiñ.

<sup>9</sup> Dabi mniiy nu mas nac yu mbecy nu ca beey sircun-sision o mas nac yu mbecy nu wanca beey sircun-sision, tees dzi niy, gun rniiñ nu Ñgyoozh b icy mi yu par mbecy nu sac cyi nu nac nu b icy cup yu consuel lom. Gal nu bi cañ: "Abraham b icy cup yu consuel lo Ñgyoozh, nunu par nu nac nde', Ñgyoozh b icy mi yu par mbecy nu sac cyi", rniiñ. <sup>10</sup> ¿Tees gul b icy mi Abraham par mbecy nu sac cyi? ¿A despuees uti anzir nu pca beey sircun-sision cuerp niy? Nde' b icy Ñgyoozh anzir nu ca beey sircun-sision cuerp niy. <sup>11</sup> Despuees, pcaay beey sircun-sision cuerp niy par tub muesht par nu gabe nu Ñgyoozh b icy mi yu par mbecy cacy nu nac nu ricy cup yu consuel lom. Ni b icy mi lat nu nigul ca beey sircun-sision cuerp niy. Orze' Abraham nay gal nu na uz de yu nu ricy cup consuel lom, mas wancaa dey beey sircun-sision cuerp niy. Nunu Ñgyoozh ni' zi'l gyicy mi dey par mbecy cacy. <sup>12</sup> Ni' Abraham nay gal nu na uz de yu nu ca beey sircun-sision ze', benu walab tub lo zi'l nu ca beey sircun-sision cuerp ni dey, sinu ni' zi'l ricy cup dey consuel lom gal nu b icy cupa' gyitoo bel ne' de, Abraham consuel lom anzir nu ca beey sircun-sision cuerp niy.

**Ñgyoozh gyicy yac mi gal nu mniim nu nac nu gyicy cup na consuel lom**

<sup>13</sup> Ñgyoozh mniim lo Abraham gal nu lo de nez yu nu segur la zeeñ mi dutuub la gyishlombecy yaa dey. Walab nu nac nu ricy yac yu ni leey, nde' nu ni mniim, sinu ni mniim, gun b icy mi yu par mbecy nu sac cyi nu nac

nu b icy cup yu consuel lom. <sup>14</sup> Tees benu gyiyeen dela coz tub zi'l yaa de mbecy nu ricy yac ni leey ze', orze' se la la sac ñi benu tub mbecy ricy cup yu consuel lom. Orze' se la la sac de riidz nu mniim ze'. <sup>15</sup> Par nu nac leey ze', Ñgyoozh cuic mi cashtig ni de mbecy. Tees be-nu sac leey, ni' sac cyi nu cha contr niñ.

<sup>16</sup> Orze' Ñgyoozh mniim riidz ze' lo Abraham nu nac nu b icy cup yu consuel lom, gun orze' de coz nu mniim ze' leew la cuic mi ñii ni de nez yu, nunu segur la cuic mi ñii ni dey. Walab tub lo zi'l nu cuic mi ñii ni de yu nu ricy yac ni leey ze', sinu cuica'm ñii ni de yu nu ricy cup consuel lom gal nu b icy cupa' Abraham consuel lom. Yu ze', nac yu uz dela den par lo Ñgyoozh, <sup>17</sup> gal nu rniiñ lat de riidz nim: "Ya gyicya nu nar gal nu na tub uz zañ nac mbecy, na Ñgyoozh rab mi Abraham." Ni rniiñ. Orze' Abraham nac yu uz den par lo Ñgyoozh, biñ nu ricy cup yu consuel lo. Nunu mi ze' biñ nu gyicy nu gyabañ mbecy nu bi gut. Nunu ornu rniiim, orze' gruu zac coz nu sac de anzir.

<sup>18</sup> Abraham b icy cup yu consuel lo Ñgyoozh, nunu briish loy lo de riidz nu mniim, mas rlyu nu wac gal nu mniim. Orze' nu nac nde' byac yu uz zañ nac mbecy. Gal nu mnii Ñgyoozh: "I la tant nez ru gyac", nam rab mi yu. <sup>19</sup> Tiem ze' sac i'ñ yu, nunu bi yu'y tub gaynal ña'n. Tees wancheday nu b icy cup yu consuel lom ornu gush yu shcab nu cuerpa niy bi zuu lañ nu gat ñi. Nunu wancheday nu b icy cup yu consuel lom ornu gush yu shcab nu bi bded tiem nu gaal Sara niy mdoo.

<sup>20</sup> Wancheday nu b icy cup yu consuel lom, nunu ni wannii la tooy nu Ñgyoozh wagyicy mi gal nu mniim, sinu dzi zir b icy cup yu consuel lom, nunu byabic yu gyel mbecy nim. <sup>21</sup> Bguugy nap la lardooy nu gac gyicy Ñgyoozh gal nu mniim nu segur la gyicy mi. <sup>22</sup> Nde' nu b icy mi yu par mbecy nu sac cyi par nu nac nu b icy cup yu consuel lom.

<sup>23</sup> Nunu ze' nu rniiñ, "Nu b icy mi yu par mbecy nu sac cyi nu nac nu b icy cup yu consuel lom", nde' wancañ par Abraham zi'l, <sup>24</sup> sinu ni' pcañ par de ub na, gun ni' zi'l b icy mi de ub na par mbecy nu sac cyi nu nac nu ricy cup den consuel lo Ñgyoozh, biñ nu b icy nu byabañ Shuaan den Jesucrisht ornu gut mi. <sup>25</sup> Mi ze' byu'm yaa mbecy par nu cut dey mi nu nac cyi den. Nunu byabañ mi par nu gyicy mi nu gyanap den par lo Ñgyoozh.

**¿Lac mod yaruuñ nu byanap na lo Ñgyoozh?**

**5** Na como byanap den lo Ñgyoozh nu nac nu ricy cup na consuel lom, nde' nu dub gusht la yu' den dun mi. Ni yu' den dun mi nu nac de coz nu b icy Shuaan den Jesucrisht. <sup>2</sup> Nu nac mi ze', nde' nu guud mod nu nap ricy nu Ñgyoozh de ub na. Nunu zaab ricy lam coz nap num de ub na. Orze' tona' la yet lagy den nu nac nu drish lon lo gyel lily nim nu cuic mi ni den.

<sup>3</sup> Nunu walab nde' zi'l, sinu ni' zi'l yet lagy den ornu rzac deet den, gun rad lagy den nu nac nu rzac deet na, orze' gac naa mbecy nu gagye. <sup>4</sup> Nunu nu nac nu gagye den, orze' gac naa mbecy nu gruu nap par lo Ñgyoozh. Nunu nu nac nu gruu nap den, orze' grish lon nu gyicy na gan. <sup>5</sup> Nunu wacshi'ñ den baloor nu

nac nu drish lon nu gyicy na gan, gun Ñgyoozh b icy mi nu gad lagy den nu tona' la rcam de ub na nu nac Es-piriit Yon nim, biñ nu rbic mi ni den.

<sup>6</sup> Gun tiem nu wancyiiñ den nu loo mbañ naa ub na, orze' Crisht gut mi. Ornu pshuub tiem nu bzu Ñgyoozh, gut mi par nu locyuub mi de ub na, mas de ub na nac naa mbecy cyi. <sup>7</sup> Par mbecy tona' la biigy nu shet ic yu nu gat yu nu locyuub yu tub losa'y mas mbecy ze' nac yu mbecy cacy. Tees cyup ridz yu' mbecy grusuy nu shet ic yu nu gat yu par nu locyuub yu losa'y gyi' nu nac yu ze' mbecy nap. <sup>8</sup> Tees Ñgyoozh briic mi nu gad lagy den nu tona' la rcam de ub na, gun lat nu gabee nac naa mbecy cyi, Crisht gut mi nu nac den. <sup>9</sup> Nu nac nu pshu reñ mi, orze' byanap den lo Ñgyoozh. Benu ni, orze' dzi zir gruu mbañ de ub na.

<sup>10</sup> Gun lat nu nac laa den losa' yuu Ñgyoozh, lat la ze' byanap den dun mi nu nac nu gut I'ñ mi Jesuuz. Benu ni b icy mi lat nu nac naa losa' yuum, orze' na nu bi byanap riidz ni den dun mi, orze' segur zir nu gruu mbañ den nu nac nu mbañ I'ñ mi Jesuuz. <sup>11</sup> Tees walab tub lo zi'l nde', sinu ni' Shuaan den Jesucrisht ricy mi nu zu cyit lagy den nu nac Ñgyoozh, gun b icy mi nu byanap riidz ni den nu Ñgyoozh.

### Adaang nu Crisht

<sup>12</sup> Ornu tub mbecy nu la Adaang b icy yu cyi, orze' gu' cyi gyishlombecy. Nunu nu nac cyi ze' brugyi' nu rat mbecy. Nde' nu dela mbecy rat dey, gun dela dey b icy yu cyi. <sup>13</sup> De mbecy ni gyishlombecy nil b icy dey cyi anzir nu zeeñ Moisees leey. Tees lat nu sac leey Ñgyoozh wanriib cuen mi de cyi nu b icy mbecy. <sup>14</sup> Nese tiem ni Adaang gashtal tiem ni Moisees, dela mbecy gut dey mas wangyicy yu cyi nu b icy Adaang ornu b icy yu coz nu mnii Ñgyoozh nu cue' gyicy yu.

Adaang saap yu Crisht, biñ nu ca lo cuen nu cyid. <sup>15</sup> Tees reña' nay par mi ze'. Gun coz nap nu leew la briic Ñgyoozh, nde' wasaap ñi cyi nu b icy yu. Rishli zigy mbecy gut yu nu nac cyi nu b icy tub zi mbecy. Tees coz ily zir ricy Ñgyoozh ornu nap ricy num zigy mbecy, nunu coz ilya' zir ricy mi ornu briic mi coz nap ni dey nu nac tub zi mbecy. Nde' Jesucrisht. <sup>16</sup> Coz nu leew la briic Ñgyoozh ze' nu coz nu b icy Adaang ze', walab tub zi'l nañ. Gun despuees ornu b icy Adaang coz cyi tub tir, orze' Ñgyoozh mniim nu gu' falt ni de mbecy. Orze' rlagy ñi nu cha dey lo cashtig. Tees mas ricy mbecy cyi zañ tir, tees Ñgyoozh mniim nu byanap dey lom nu nac coz nu leew la briic mi ze'. <sup>17</sup> Rishli nu nac cyi nu b icy tub zi mbecy ze', nde' nu bzub gyi'ñ nu gat dela mbecy. Tees coz ily zir b icy tuuba' mbecy. Mi ze' Jesucrisht. Nu nac mi ze' Ñgyoozh ricy mi faboor ily num dela mbecy, nunu nu nac mi ze' ricy mi nu leew la gyanap dey lom. Nunu de yu nu ni ricy num, de yu ze' gyicy yu gan cyiiñ yu tub mod nap gyishlombecy ii.

<sup>18</sup> Orze' nu nac cyi nu b icy tub mbecy nu la Adaang, yad ñi nu cha dela mbecy lo cashtig. Ni' zi'l nu nac coz se'ñ nu b icy tuuba' mbecy, mi ze' Jesucrisht, orze' bruu dela mbecy nu ricy cup consuel lom lo cashtig, nunu cui mbañ dey tub la. <sup>19</sup> Dela mbecy byac dey mbecy cyi

nu nac tub zi Adaang, yu nu wansuub gyidag ni Ñgyoozh. Orze' ni' zi'l mod, zigya' mbecy gyanap yu lom nu nac tuuba' mbecy nu b icy yac de coz nu rnium. Mi ze' Jesuuz.

<sup>20</sup> Ñgyoozh briic mi leey ni Moisees, gun orze' byañ zir de cyi nu ricy mbecy. Tees ornu dzi zir b icy de mbecy cyi, orze' coz ily zir b icy Ñgyoozh ornu b icy mi faboor num dey. <sup>21</sup> Nde' nu gal nu cyi dzi fert b icy nuñ de mbecy, orze' ni' zi'l fert b icy Ñgyoozh num dey. Gun cyi b icy ñi nu gat mbecy. Tees Ñgyoozh b icy mi faboor num dey ornu b icy mi nu gyanap dey lom. Orze' nu nac nde' cui mbañ dey tub la. Ni b icy mi nu nac Shuaan den Jesucrisht.

### Par lo coz cyi na den gal nu na mbecy gut

<sup>6</sup> Orze' dzi ga gruu su tub mbecy nu niy nu zaab gyicy la den coz cyi par nu gad zir mod nu nap gyicy Ñgyoozh num den, niy. <sup>2</sup> ¡Rila walab ni! Par nu nac cyi, na den gal nu na mbecy gut. Orze' cyi wayub ica'ñ de ub na. Orze' ¿walab gaal zaab gyicy la den coz cyi? <sup>3</sup> ¿Gun a wagad lagy der nu ornu bzu nis den par nu gac den mbecy ni Jesucrisht, orze' ni' zi'l bzu nis den par nu gabe nu gut den gal nu ub mi gut mi? <sup>4</sup> Nde' nu ornu bzu nis den, orze' par Ñgyoozh nde' nañ gal nu na nu pcach dey de ub na ornu pcach dey Crisht. Na ornu gut mi, orze' byabaña'm nu nac coz ily nu b icy Ñgyoozh, Uz mi. Orze' gal nu mi ze' byabañ mi, orze' ni' zi'l chu' den tub mod cub nu nac nde'.

<sup>5</sup> Gun benu na den gal na tub mbecy gut nu nac nu gut mi, orze' ni' zi'l na den gal na tub mbecy nu byabañ nu nac nu byabañ mi. <sup>6</sup> Nunu rad lagy den nu bi bya' lo mod nu na den gulas nu nac nu gut mi lo cruu, gun orze' nit lo dela cyi nu byub ic den. Orze' de cyi ze' wagayuba' ic ñi de ub na. <sup>7</sup> Gun ornu tub mbecy gat yu, orze' wayicya' cyi gan yu. <sup>8</sup> Nunu benu na den gal na mbecy gut nu nac nu gut Crisht, orze' ni' zi'l rad lagy den nu segur la cyiiñ na dun mi. <sup>9</sup> Rad lagy den como byabañ Crisht ornu gut mi, orze' nde' nu rila wata'm. Wazac mi lo gyel gut tuuba' tir. <sup>10</sup> Ornu gut mi, tub tir zi'l bruum lo cyi. Na rcyiiñ mi par nu gyicy mi de coz nu rlagy Ñgyoozh. <sup>11</sup> Orze' rlagy ñi gyicy den ub na par tub mbecy nu bi bruu chu lo cyi, tees cyiiñ den par nu gyicy na coz nu rlagy Ñgyoozh. Ni gyicy den lat nu chesa dun Crisht.

<sup>12</sup> Orze' na cue' ga' shet ic der nu gyub ic cyi cuerpu gat ii ni der, gun benu shet ic der, orze' gyicy der de cyi nu druu nañ cuerpu nir tuuba' tir. <sup>13</sup> Ni' zi'l cue' shet ic der nu gyicy ru cyi nu ni tub la lugaar ni cuerpu nir. Nunu cue' shiñ gyicy der nu ca na tub lugaar ni cuerpu nir, sinu bgu' der ub ru yaa Ñgyoozh gal nu yad ñi nu gyicy tub mbecy nu bi byabañ ornu gut. Pshet ic der nu gyub ic Ñgyoozh dutuub la cuerpu nir par nu gyicy mi coz nap num ñii. <sup>14</sup> Orze' cyi wayuba' ic ñi de ru, gun walaba' nu rcyiiñ der mod ni mbecy nu ricy yac ni leey, sinu rcyiiñ der mod ni mbecy nu ricy yac nu de faboor nu ricy Ñgyoozh nu de ub na.

### Gac den moz ni coz nap; cue' gac den moz ni cyi

<sup>15</sup> Orze' par nu nac nu rcyiiñ den nu nac faboor ni Ñgyoozh lugaar nu gyicy yac den ni leey, orze' dzi ga grusu tub mbecy nu niiy: "A gac gyicy den ñuu cyi?" niiy. ¡Rila wac! <sup>16</sup> Rishli rad lagy der nu ornu shet ic der nu gyicy ru riiñ nu rnii tub patroq nir, orze' nac der moz niy, nunu rlagy ñi nu gyicy yac der nu de riidz nu rniiy. Riidz ii yaruuñ nu gac gyac der tub moz ni cyi. Tees benu ni, orze' gat der. O nu gac gyac der tub moz nu ricy paa nu Ñgyoozh. Benu ni, orze' chu' der tub mod nu se'ñ. <sup>17</sup> Tees shnu la Ñgyoozh, gun mas gulas guc der moz ni cyi, tees na rzuub gyidag der nu dutuub la lardoor de riidz nu bdulyuu nu byeeñ yaa der. <sup>18</sup> Bi bla der lo de cyi. Orze' na gac der moz ni de coz nu se'ñ. <sup>19</sup> (Yä rnęe riidz ni cualcyer la mbecy, gun de coz ii gyee gyet lag der cuen nu shcab ni ub zi'l der.) Gulas pshet ic der nu gyub ic coz bag, gal nu coz a' nap de lugaar ni cuerp ni der. Orze' na rlagy ñi nu shet ic der nu gyub ic de coz nu se'ñ de lugaar ni cuerp ni der, gun orze' gyicy der se de coz nu rlagy Ñgyoozh zi'll.

<sup>20</sup> Lat nu guc der moz ni cyi, orze' wangyub ic de coz nu se'ñ der. <sup>21</sup> Tees ¿la ñuu coz b icy der gan lat nu b icy der de coz to' lo ze'? Se la la coz guud ni der, sinu tub zi la nu gyicy ñi nu gat der. <sup>22</sup> Tees na bi bruu der lo de coz cyi, nunu bi nac der moz ni Ñgyoozh. Nunu i der nu rad, nde' nu nac der mbecy nu rzu bich nu nac Ñgyoozh. Nunu ornu gya' lo tiem ii, cui mbañ der tub la. <sup>23</sup> Gun i den nu gyabic coz cyi, nde' nu gat na. Tees coz nu leew la rbic Ñgyoozh ni den, nde' nu cui mbañ den tub la nu nac nu nac den mbecy ni Shuaan na Jesucrist.

### Mod nu chu' den, nde' gal nu rzu' mbecy nu mñaay

<sup>7</sup> Der b icy na, de ru rad lagy der lac mod ricy leey. <sup>1</sup> Leey, tub lo zi'll lat nu mbañ mbecy riib ic ñiy. <sup>2</sup> Gyicy pee lan tub biñ mñaa. Leey rniiñ nu rlagy ñi nu gyicy paam nu ñgyeem lat nu mbañ yu. Tees benu gat yu, orze' ded la ni leey nu rniiñ nu gyicy paam nu ñgyeem. <sup>3</sup> Orze' benu zaan mi ñgyeem, ze' gash mi tuuba' yu gyeey lat nu mbañ ñgyeem, orze' leey ze' rniiñ nu ricy mi cyi. Tees benu gat ñgyeem, orze' gded la ni leey ze', nunu mas gad tuuba' ñgyeem, tees nde' walab nu cyi na par lo leey.

<sup>4</sup> Der b icy na, ni mod rac nu de ub na. Par lo leey bi byac den gal nu na tub mbecy gut, gun par lo leey gut de ub na nu nac nu gut Crisht, gun na bi nac na ni Crisht, biñ nu byabañ, gun orze' gac gyicy den de coz nap nu rlagy Ñgyoozh. <sup>5</sup> Gun lat nu gu' den mod nu rlagy ub zi'll den, orze' leey ze' b icy ñi nu dzi zir rlagy den nu gyicy na de coz cyi nu druu nañ lardoorn, gun rniiñ nu cue' ni gyicy den. Nunu de coz cyi ze', de nde' coz nu ricy ñi nu yad ñi ni den nu gat na. <sup>6</sup> Na bi bruu den lo leey ze'. Par lo leey nu byub ic de ub na gulas, bi byac den gal nu na mbecy gut. Na walaba' leey nu ca

lo gyicy ze' riib ic ñi den, sinu na yu' den tub mod cub nu rnii Espiriit Yon ni Ñgyoozh.

### Mod nu ricy leey nu de ub na

<sup>7</sup> Dzi ga gruu su tub mbecy nu niiy nu a' nap rnii leey ni Moisees. ¡Walab nu a' nap rniiñ! Tees tub zi la nu nac leey ze' rad lagy la coz nu cyi. Benu cue' nii leey nu walagy ñi gasaap lagy den de coz ni losa'n, orze' wagad lagy la coz nu rasaap lagy. <sup>8</sup> Tees na nu nac leey ze', rad mod nu rasaap lagy de lo la coz, gun leey ze' ricy ñi nu druu zac de lo la coz cyi nu druu nañ lardoorn den nu gyicy na. Gun benu sac leey, orze' wagad lagy la coz nu cyi. <sup>9</sup> Gulas dub gusht la pcyiiñ, gun wanchu' lo leey ze'. Tees pshuub dzi nu bet lag la cuen leey ze'. Orze' bruu zac de cyi nu ricy. Nunu ya shni pcyiiñ. Nde' nañ gal na nu guta nu nac ñii. <sup>10</sup> Orze' leey nu gunashq par nu gruu mbañ, nde' b icy ñi nu yad ñi ne nu gata. <sup>11</sup> Gun nu nac leey ze' guud mod nu gyicy cyi gan ya, gun lugaar nu gruu mbañ, ca lo gyel gut za nuñ ya.

<sup>12</sup> Orze' leey ze', nde' tub coz cacy nu druu lo Ñgyoozh. Nunu rniiñ coz cacy nu druu lom. Rniiñ coz nu laab ñi. Rniiñ coz nap. <sup>13</sup> Orze' ¿a coz nap gyicy ñi nu gata? ¡Rila walab nde' gyicy ñi nu gata! De cyi nu ricy, nde' gyicy ñi nu gata. Ricy ñi nu wangyicy yaca ni leey nap ze'. Ni ricy ñi par nu gabe ca na de coz cyi ze'. Nunu rabee nu dzi shiñ na cyi nu nac de coz nu rnii leey ze'.

### Dzi deet rac nañ lardoorn

<sup>14</sup> Rad lagy den nu leey ni Moisees, nde' bruuñ lo Espiritiit Yon ni Ñgyoozh. Tees nacä mbecy zi'l. Nunu nacä moz ni cyi. <sup>15</sup> Wagyet lag napa cuen de coz nu ricy, gun wagyicya de coz nu rlagy gyicya, sinu ricya de coz nu rzi lagy lo. <sup>16</sup> Ornu ricya de coz nu walagy gyicya, orze' rabee gal nu rnii leey, ni' zi'l mod rlagy uba, mas wagyicya gan. Nde' nu rabee nu leey nac ñii coz nap. <sup>17</sup> Orze' de coz ze' walab nu ricy nap la ñii, sinu de cyi nu yu' nañ lardoorn ricy ñi nu ricya ñii. <sup>18</sup> Gun ya rad lagy nu sac la coz nap nañ lardoorn. Mas rlagy gyicya coz nap tees wacyiiñ gyicya ñii. <sup>19</sup> Gun ya wagyicya coz nap nu rlagy gyicya, sinu ricya coz a' nap nu walagy gyicya. <sup>20</sup> Tees benu ya ricya coz a' nap nu walagy, orze' walab nu ricy nap la ñii, sinu de cyi nu yu' nañ lardoorn ricy ñi nu ricya ñii.

<sup>21</sup> Orze' i mod nu ricya: Ornu rlagy gyicya coz nap, ca coz a' nap ricya. <sup>22</sup> Gun tonal' la yet lagy leey ni Ñgyoozh nañ shcab ne. <sup>23</sup> Tees na rdu' cuenä nu de coz nu rlagy gyicya nu cuerp ne, nde' zañ contr ni de coz nu rlagy gyicya nu shcab ne. Nunu de coz a' nap nu ricy cuerp ne, nde' ricy ñi gan ya. Orze' ya na gal nu na tub pres. Orze' wagac ruu chü lo mod nu ricy nu cyi cuerp ne.

<sup>24</sup> ¡Lashta ya! ¿Cyu gac co chu ya lo cyi nu yu' nañ cuerp ne, de cyi nu ricy nu yad ñi ne nu gata? <sup>25</sup> ¡Shnu la Ñgyoozh nu nac Shuaan den Jesucrist! Ni mod rdedä: Nu ub la, na gac gyicya de coz nu rnii leey ni

Ñgyoozh nu shcab nē, tees nu cuerp nē, ricya de coz ci.

### Rlagy ñi gyicy na mod nu rnii Espiriit Yon ni Ñgyoozh

**8** Ñgyoozh rila wanii ga'm nu yu' falt ni de mbecy nu nac nu Jesucrisht. <sup>2</sup> Gun ya bi naca ni leey nu rniiñ nu riib ic Espiriit Yon ni Ñgyoozh, nunu leey ze' gyicy ñi nu cui mbañä nu nac Jesucrisht. Orze' nu nac leey ze' ya bi bruu chü lo reña' leey nu rnii nu riib ic cyi ya. Leey ze' gyicy ñi nu gat na. <sup>3</sup> Gun yu' coz nu wangagacy ñgyicy leey ni Moisees nu nac nu wangagacye mbecy. Tees Ñgyoozh guc b icy mi de coz ze', gun bzuu nez mi I'ñ mi, Jesuuz. Orze' mi ze' gush mi tub mod gal nu na tub mbecy cyi. Ni b icy Ñgyoozh nu nac cyi den, gun orze' za' lom de cyi nu yu' nañ lardooy de mbecy. <sup>4</sup> Ni b icy mi, gun orze' gac gyicy den de coz nap nu rnii leey ze', como nac naa mbecy nu ricy coz nu rlagy Espiriit Yon nim, nunu walab nu nac naa mbecy nu ricy coz nu rlagy ub zi'l.

<sup>5</sup> De mbecy nu ricy de coz nu rlagy ub zi'l, de yu ze' rzu bich dey nu nac coz ni mbecy zi'l. Ze' de yu nu ricy de coz nu rlagy Espiriit Yon nim, rzu bich dey nu nac de coz nu rlagy Espiriit Yon zi'l nim. <sup>6</sup> Benu zu bich den nu nac de coz nu rlagy ub zi'l den, orze' gat den. Tees benu zu bich den nu nac de coz ni Espiriit nim, orze' cui mbañ den nunu chu' den nu gyel ri zu. <sup>7</sup> Benu zu bich den nu nac coz ni mbecy zi'l, orze' gyac den losa' yuu Ñgyoozh, gun wagyicy yac den leey nim. Nunu mas rlagy den gyicy yac na niñ tees wagac. <sup>8</sup> De yu nu dzi rzac lo de coz ni ub zi'l, wagac gyicy dey nu gyedzu' lagy Ñgyoozh.

<sup>9</sup> Ze' de ru benu Espiriit Yon ni Ñgyoozh rcyiiñ mi nañ lardooy der, orze' wagyicy der mod nu rlagy ub zi'l ru, sinu ricy der mod nu rlagy Espiriit Yon nim. Cyu zi'l mbecy yu nu a' ricy cup Espiriit ni Crisht, yu ze' walab mbecy ni Crisht. <sup>10</sup> Benu Crisht rcyiiñ mi nañ lardooy der, mas ca lo cuen nu gat cuerp ni der nu nac cyi, tees espiriit ni der mbañ ñii nu nac nu byanap der par lo Ñgyoozh. <sup>11</sup> Benu Espiriit ni biñ nu b icy nu byabañ Jesucrisht ornu gut mi rcyiiñ mi nañ lardooy der, orze' laab Ñgyoozh, biñ nu b icy nu byabañ Crisht ornu gut mi, gyicy mi nu cui mbañ cuerp nu gat ni der tuuba' tir nu nac Espiriit Yon nim, biñ nu rcyiiñ nañ lardooy der.

<sup>12</sup> Orze' der b icy na, yu' tub coz nu rlagy ñi nu gyicy den. Nde' walab nu gyicy den coz nu rlagy ub zi'l na, sinu nde' coz nu rlagy Espiriit Yon ni Ñgyoozh. <sup>13</sup> Gun benu gyicy der coz nu rlagy ub zi'l ru, orze' gat der. Tees benu Espiriit Yon locyuub mi der nu co chur de coz cyi nu rlagy der gyicy ru, orze' cui mbañ der.

<sup>14</sup> Gun de yu nu riib ic Espiriit Yon ni Ñgyoozh, de yu ze' nac yu i'ñ Ñgyoozh. <sup>15</sup> Gun Espiriit nu briic Ñgyoozh ni der wangyicy mi nu nac der tub moz par nu dzib der tuuba' tir, sinu b icy mi nu byac der i'ñ Ñgyoozh. Nunu ricy mi nu rnii der: "Ñgyoozh, uza", rnii der mi. <sup>16</sup> Tub zi'l riidz rnii den nañ lardooy nu Espiriit Yon ni Ñgyoozh ornu rnii den nu nac naa i'ñ mi. <sup>17</sup> Nunu como nac den i'ñ mi, orze' dela gyel nap nu mniim nu segur la cuic mi ni de mbecy nim, dela nde' gyiyeen ñi yaa

den. Nunu gal nu rbic mi ni Crisht, ni' zi'l cuica'm ni de ub na, como gal nu bzac zi Crisht, ni zi'l rzac zi ga' den nu nac mi, gun orze' gal nu guud gyel lily nim, ni' zi'l gad gyel lily ni den dun mi.

### Gyel lily ni den nu gad par lo

<sup>18</sup> Ya drushä shcab ni de coz nu rzac zi den na wasaap ñi gyel lily nu lyuu Ñgyoozh lo den par lo.

<sup>19</sup> Gun dela coz nu psa' lagy Ñgyoozh ca looñ nez nu gyeel shuub tiem nu gruu zac de mbecy nu nac I'ñ mi.

<sup>20</sup> Gun Ñgyoozh b icy mi nu dela coz ze', se la la sac ñi. Walab nu ub de coz ze' b icy ñi nu se la la sac ñi, sinu nde' coz nu b icy Ñgyoozh lat nu rbez mi <sup>21</sup> nu dza mod nu na de coz ze'. Mod nu na de coz ze' na, nde' gyicy ñi nu nit loñ. Ze' despuees, orze' gash ñi tub mod nu rila wadeda' niñ. Orze' gash ñi mod nu na de mbecy nu nac I'ñ Ñgyoozh, gun orze' gal nu wanit lo ga' den, ni' zi'l wanit lo de coz ze'. <sup>22</sup> Gun rad lagy den nu gashtal dzi na shiñ rzac dela coz nu psa' lagy Ñgyoozh. Rzac ñi gal nu rzac tub biñ mñaa ornu rgaal mi mdoo. <sup>23</sup> Nunu walab tub lo zi'l nu shiñ rzac de coz nu psa' lagy Ñgyoozh, sinu ni' de ub na deet rzac den nañ lardooy mas ricy cup den Espiriit Yon nim, biñ nu nac coz loga la nu briic mi ni den. Tona' la deet rzac den lat nu rlez naa par nu shuub dzi nu gyicy i'ñ mi den, nunu lat nu rlez naa par nu gyanap cuerp nin. <sup>24</sup> Ñgyoozh bi bloo mbañ mi den nu nac nu drish lo den lom. Tees benu tub mbecy bi bzaac loy lo de coz nu rgyish loy lo, orze' walaba' nu rgyish loy loñ. Ni tub la mbecy wacyish loy lo tub coz benu bi bzaac loy loñ. <sup>25</sup> Tees benu drish lon lo de coz nu nigul sac na lo, orze' nu paséz lez naañ.

<sup>26</sup> Ni' Espirit Yon ni Ñgyoozh locyuub mi den nu nac nu wacyiiñ den. Gun wagad lagy den lac mod nii dun Ñgyoozh gal mod nu rlagy ñi. Tees laab Espiriit Yon nim rnishbaam lom par cuen ni de ub na. Rnishbaam tub mod nu wac gya nu riidz. <sup>27</sup> Orze' Ñgyoozh, biñ nu rad lagy de coz nu rlagy mbecy nañ lardooy, rad lagy mi coz nu rnii too Espiriit Yon nim, gun rnishbaa Espirit Yon nim lom por cuen ni de mbecy nu nac nim. Rnishbaa Espiriit Yon nim gal mod nu rlagy mi.

<sup>28</sup> Rad lagy den nu la zi'l coz nu rzac mbecy, Ñgyoozh gyicy mi nu gyac ñi tub coz nu nap par de yu ze' benu rca dey mi. Ricy mi nu gyac ñi coz nap benu bzum dey nu gac yu nim gal nu rlagy mi. <sup>29</sup> De mbecy nu nil nese anzir bi rad lagy Ñgyoozh nu gac dey nim, de yu ze' nese nu bzub la gyi' gyishlombecy bi pcuim dey nu gyac dey gal nu na I'ñ mi, Jesuuz, gun orze' Jesuuz, mi ze' I'ñ logam nu cuim lat zañ b icy mi. <sup>30</sup> Nunu de mbecy nu pcuim nese nu bzub gyi' gyishlombecy, de yu ze' bzum dey nu gac nim. Nunu de yu nu bzum ze', b icy mi nu byanap dey lom. De yu nu byanap ze', de yu ze' b icy mi nu gad de gyel lily nim ni dey.

### Ñgyoozh rcam de ub na nu nac Crisht

<sup>31</sup> Orze' ¿lac ñuu niin beni? Benu Ñgyoozh zam fa-boor nin, orze' ¿cyu gac cha contr ni den? <sup>32</sup> Gun Ñgyoozh wantiily lom. Gashtal I'ñ mi bzeed mi nu gut mi

nu nac dela den. Orze' segur la cuic mi dela coz ni den gal nu I'ñ mi. <sup>33</sup> Orze' ni tub la mbecy wac riib yu cyi too mbecy nu bi pcam, gun laab ub la Ñgyoozh mniim nu sac falt ni dey. <sup>34</sup> Ni tub la mbecy wac niyy nu yu' falt ni de mbecy nu bi pcam ze', gun Crisht gut mi, nunu coz ilya' zir guc ornu byabañ mi. Nunu na zub mi par yaa bee Ñgyoozh Uz mi rnishbaam por cuen ni de ub na. <sup>35</sup> Orze' ni tub la coz wac gyicy ñi nu checa Crisht nu rcam de ub na. Benu zac zi den, rcam de ub na. Benu deet rzac den, rcam de ub na. Benu rshet zi mbecy den, rcam den. Benu wagad nu don, rcam den. Benu sac shab den, rcam den. Benu yu' den lo rishdzidz, rcam den. Benu gat den, rca ga'm den. <sup>36</sup> Rad lagy den nu rzac na lo dela coz ze', gun lat de riidz nim rniiñ: Nu nac ru, dub laa tiem yu' dë lo rishdzidz nu gata. Ricy nu mbecy de gal nu ricy nu dey tub shily nu bi zu lily laa ma nu gat ma, rniiñ.

<sup>37</sup> Mas ni rzac den, tees ded ru' ga' la nu gyicy den gan nu nac biñ nu rca de ub na. <sup>38</sup> Gun ya rad lagya nu segur la ni tub la coz wayicy ñi nu checa Ñgyoozh nu cam de ub na. Benu bi guut na, cam de ub na. Lat nu mbañ naa, rcam den. Ni de anc, ni de nuras gurfeñ, ni de espiriit, dela yu ze' wac gyicy dey nu checam nu cam de ub na. Ni coz nu yu' na, ni coz nu yad par lo, wac gyicy ñi nu checam nu cam den. <sup>39</sup> Ni coz nu yu' baa, ni coz yu' gyishlombecy ii, ni ni tub la coz nu psa' lagy mi, wac gyicy ñi nu checam nu cam de ub na. Rad lagy den nu rcam de ub na nu nac de coz nu bzac Shuaan den Jesucrisht.

### Ñgyoozh pcam de mbecy Israeel

**9** Na rnęe lo der tub coz rishli: ya waguu de ru, co mo nacä mbecy ni Crisht. Espiriit Yon ni Ñgyoozh, mi ze' riib ic mi nañ lardoo, nunu ya rad lagya nañ lardo nu waguu. <sup>2</sup> Ya ton'a' la ricy shni. Dub laa tiem rac nañ lardo nu nac de losa'. <sup>3</sup> Gun ya rsa' lagya nu nap zir benu zaa lagy Ñgyoozh ne, nunu nap zir benu gla' losa' nu Crisht, benu nde' gyicy ñi nu locyuub Ñgyoozh de bicya, de yu nu nac losa'. <sup>4</sup> De yu ze' nez mbecy Israeel. Ñgyoozh bicy mi dey par i'ñ mi. Nunu nash dey gyel lily nim. De yu ze' bicy mi trat num dey. Yaa de yu ze', bzeen mi leey ni Moisees. Lo de yu ze', mniim lac mod riib zily mbecy mi. Nunu mniim nu segur la zañ lo coz nap gyicy num dey. <sup>5</sup> De yu ze' nac dey nez de yu lily nu gu' gulas. Crisht gush mi nez dey ornu byac mi mbecy gyishlombecy ii, nunu mi ze' Ñgyoozh, biñ nu riib ic dela coz. Gyabic den gyel mbecy nim par tub la. Laab ni gac ñii.

<sup>6</sup> Tees Ñgyoozh waded la ricy yac mi de riidz nu mniim nu segur la gyicy mi. Gun walab dela mbecy Israael nac yu mbecy Israael nu rishli. <sup>7</sup> Nunu walab dela mbecy nez Abraham nac yu i'ñ Abraham nu rishli, gun Ñgyoozh mniim lo Abraham: "De i'ñ Isaac, de yu ze' nez ru", nam. Orze' Ñgyoozh wangyicy mi de' zir i'ñ Abraham par nez yu. <sup>8</sup> Nde' yaruuñ nu ni tub la mbecy a' nac yu i'ñ Ñgyoozh nu nac nez zi'l yu, sinu de yu nu by-

ac i'ñ Ñgyoozh nu nac de riidz nu mniim nu segur la gyicy mi, dey yu ze' zi'l gyicy mi dey par i'ñ mi nu rishli. <sup>9</sup> Gun ni mod za riidz nu mnii Ñgyoozh lo Abraham. Orze' nam: "Ornu shuub tiem, ya yapä, gun orze' gyicya nu gaal Sara tub mdoo gyeey", nam rab mi Abraham.

<sup>10</sup> Nunu walab nde' zi'l b icy mi, gun zu cyup i'ñ Rebeca tees tub zi'l uz dey. Uz de yu ze', nde' gyitoo bel ni den Isaac. <sup>11</sup> Tees anzir nu gal dey, Ñgyoozh mniim lo Rebeca: "Yu mi', yu ze' gyicy yu mandaar yu gush", nam. Ni mniim mas nigul gal dey, nunu nigul gyicy dey ni tub la coz: ni coz nap, ni coz a' nap. Ni' riidz ii gyap ñi tuuba' riidz ni Ñgyoozh, ornu nam: "Ya rca Jacob, tees rzi lagya lo Esaú", nam. Orze' Ñgyoozh gac cuim ca na mbecy nu rlagy mi par nu gac nim. Nunu ornu ni ricy mi, orze' nde' walab nu nac nu la na tub coz nu ricy dey.

<sup>14</sup> Beni, dzi ga gruu su tub mbecy nu niyy nu Ñgyoozh wagyicy mi de coz nu se'ñ. ¡Rila walab ni! <sup>15</sup> Gun Ñgyoozh mniim lo Moisees: "Ya nap gyicy du ca zi'l na yu nu rlagya, nunu gashni ga' lagya ca zi'l na mbecy nu rlagya", nam. <sup>16</sup> Orze' benu Ñgyoozh nap ricy num tub mbecy, nde' walab nu nac nu ni rlagy mbecy ze', nunu ni walab nu nac nu dzi rboo loy, sinu nu nac nu rashni lagy mi yu. <sup>17</sup> Gun riidz ni Ñgyoozh rzat ñi rey Faraón. Orze' rniiñ: "Ya bicya nu nac ru rey ni de mbecy Egipto, gun orze' gabe nu ya gac gyicya de coz ily nu nac de coz ily nu gyicy du ru, gun orze' riib zily dela mbecy nu yu' gyishlombecy ya", nam. <sup>18</sup> Orze' Ñgyoozh rashni lagy mi ca na mbecy nu rlagy mi. Nunu ni' zi'l gac gyicy mi nu gyacyig lardoo ca na mbecy nu galagy mi.

<sup>19</sup> Cyup ridz ruu su tub mbecy lat der nu niyy: "Benu ni, ¿lagu griib Ñgyoozh cyi ic mbecy?" niyy. "Mi ze' se cyu la gac gyicy gan mi, nunu se cyu la gac gyicy de coz benu ub mi walag mi", niyy. <sup>20</sup> ¡A mbecy! ¿Cyu gac ru par nu niir lo Ñgyoozh lac mod rlagy ñi? Ru nar gal nu na tub gyis. ¿A gac nii tub gyis lo mbecy nu bzaañ: "¿Lagu ni mod bazaar ya?" niiñ? <sup>21</sup> Tees mbecy nu rzaañ gac gyicy yu lac zi'l mod nu galagy yu nu gyicy nuy biñ. Gac zaay cyup gyis laab nu tub zi'l biñ. Zaay tub gyis cyit na par nu gabish riiñ lañ par tub gasht. Ze' tubañañ zaay ñi par nu cyiiñ ñi la zi'l tiem nu galagy yu.

<sup>22</sup> Gal nu ricy mbecy nu rzaa gyis, ni' zi'l gac gyicy Ñgyoozh num mbecy. Rlagy mi cuic mi nu gad lagy den la na cashtig nim, gal nu de coz ily nu gac gyicy mi nu nac mod nu ricy num tub nac mbecy. Tona' la b icy cup mi pasęñ ni dey, tees de yu ze' b icy dey nu guzi lagy mi loy, nunu yad ñi ni dey nu nit loy. <sup>23</sup> Tees b icy cup mi pasęñ ni dey, gun orze' gad lagy tub naca' de ub na nu dzi coz ily gyel lily nim. Orze' nac naa mbecy nu gushni lagy mi. Nunu nese gulas bi bzu lily mi den par nu gzac na lo gyel lily nim. <sup>24</sup> Gun de ub na nac naa mbecy nu bzuu nu gac nim. Nunu yu' mbecy lat na nu nac yu mbecy Israael. Ze' yu' ga' dey nu a' nac yu mbecy Israael. <sup>25</sup> Ni mod za tub riidz nim lat de riidz nu bzeen Oseas. Ze' rniiñ:

Ñgyoozh nam:

"De mbecy nu walab mbecy nę, de yu ze' ya nę nu nac dey mbecy nę.

Nunu de mbecy nu wanca, ya nę lo dey nu ya rca dey, nę", nam.

<sup>26</sup> Nunu laab lugaar ze' nu mnęę, ze' rniiň:

"De ru walab mbecy nę", rniiň,

orze' lugaar ze' gnii dey:

"De ru i'ñ Ņgyoozh mbaň", gnii dey,  
na Ņgyoozh, rniiň. <sup>27</sup> Ni' lat de riidz nu bzeeň Isaías rzat nı de mbecy Israeel. Ze' rniiň: "Mas tona' la mbecy zigy de mbecy Israeel, mas gal nu sheň yu uzh nu nguaa ru' nisyudoo ni zigy dey, tees ſuu zi zi'l dey gruu mbaň yu. <sup>28</sup> Gun Ņgyoozh dzach za' lom de coz nu mniiム nu gac gyishlombecy", rniiň. <sup>29</sup> Nii naň gal nu na nu mnii Isaías anzir, ornu nay:

Bicy na nu Ņgyoozh, biň nu rac ricy dela coz, cue' nzeeň mi la be mbecy nez Israeel, orze' ūgyc den gal nu na' de mbecy nu gu' gyedz Sodoma, nu de mbecy nu gu' gyedz Gomorra, na Isaías.

### De mbecy Israeel nu de riidz ni Crisht

<sup>30</sup> Orze' Ɂlac ſuu niin? De mbecy nu walab mbecy Israeel, mas wanyub dey mod par nu gyanap dey par lo Ņgyoozh, tees na byanap dey lom nu nac nu ricy cup dey consuel lom. <sup>31</sup> Ze' de mbecy Israeel byub dey tub mod nu gyanap yu lom nu nac nu ricy yac dey ni leey, tees wangyicy dey gan. <sup>32</sup> Wangyanap dey lom, gun wanyub dey mod nu rlagy mi. Mod ze', nde' nu gyicy cup dey consuel lom. Tees byub dey tuuba' mod nu gyanap yu lom. Rlagy dey gyanap yu lom nu nac de coz nu bicy de ub yu. Jesucrisht nam gal na tub gyita', nunu de mbecy Israeel blagy gyi' dey too gyita' ze'.

<sup>33</sup> Ni mod za tub riidz ni Ņgyoozh ornu nam:

Gyedz Sión ze' rishq tub gyita' nu glagy gyi' mbecy, tub gyita' nu gyicy nı nu gyesaa dey. Yu nu gyicy cup consuel lo biň nu nac gyita' ze', rila washi'ň yu baloor, gun walab nu leew bicy cup yu consuel lom, rniiň.

**10** Der bicy na, ric la aň nę nu gruu mbaň de losa'.

Nunu tona' la rdiňa lo Ņgyoozh ni dey. <sup>2</sup> Ya gac nę tub coz nap nu ricy dey: tona' la rboo lo dey nu nac Ņgyoozh. Nomaas nu wagad lagy nap dey de coz nu ricy yu. <sup>3</sup> Wangyicy cuen dey mod nu rlagy Ņgyoozh par nu gyanap mbecy lom, sinu ryub dey tub mod nu rlagy ub zi'l yu. Nde' nu wagnii la dey "O" nu mod nu rlagy Ņgyoozh. <sup>4</sup> Gun nu nac Crisht, bded ni mod nu rnii leey par nu gyanap mbecy lom, gun orze' de yu nu ricy cup consuel lom gyanap dey.

<sup>5</sup> Tees riidz nu bzeeň Moisees, nde' rniiň lac mod gyanap mbecy par lo Ņgyoozh nu nac leey. Rniiň nu benu tub mbecy ricy yac za' lay ni leey, orze' cui mbaň yu. <sup>6</sup> Tees i mod za riidz nu rnii lac mod gyanap den lom nu nac nu gyicy cup den consuel: "Cue' nii toor, Ɂcyu chup gyibaa?" rniiň. Gun walagy nı gyicy mbecy nu gyet Crisht. <sup>7</sup> Nunu; rnii ga'ň: "Ni cue' nii too der, Ɂcyu cha lat de mbecy gut?" rniiň. Gun walagy nı nu gy-

icy mbecy nu gyabaň mi. <sup>8</sup> Orze' ni mod za riidz ze': "Riidz ze' garee zuň lo der. Bi rzaat ru ſii. Nunu bi ca ic ruň." Nde' riidz nu rnii nu gyanap den nu nac nu gyicy cup na consuel lom. Laab riidz ze' rshaal dę na. <sup>9</sup> Benu nu ru'r niir nu Jesuuz nac mi Shuaan ru, nunu benu naň lardoor cheňa lagy ru nu Ņgyoozh b icy mi nu byabaň mi, orze' gruu mbaň ru. <sup>10</sup> Gun nu nac nu gyicy cup den consuel lo Crisht naň lardoorn, nde' gyicy ſi nu gyanap den lo Ņgyoozh. Nunu nu nac nu zat den Jesucrisht nu ru'n, nde' gyicy ſi nu gruu mbaň den.

<sup>11</sup> Riidz ni Ņgyoozh rniiň: "Cyu zi'l mbecy nu ricy cup consuel lom, orze' rila washi'ň yu baloor, gun walab nu leew bicy cup yu consuel lom", rniiň. <sup>12</sup> Tub zi'l na dela mbecy. Gal nu ricy num de mbecy Israeel ni' zi'l ricy num de mbecy nu walab mbecy Israeel. Laab tub zi'l mi ze' Shuaan dela dey, nunu nap ricy num dela mbecy nu nishbaa lom. <sup>13</sup> I mod za riidz ni Ņgyoozh: "Dela de mbecy nu rnishbaa lo Shuaan den, de yu ze' gruu mbaň dey", rniiň. <sup>14</sup> Tees Ɂlac mod nishbaa dey lom be-nu wagyicy cup yu consuel lom? Nunu Ɂlac mod gyicy cup dey consuel lom benu wangyeň dey de riidz nim? Nunu Ɂlac mod gyicy yu nu gyeň yu riidz nim benu washaal mbecy nı loy? <sup>15</sup> Nunu Ɂlac mod shaal dey riidz ze' benu wazuu nez dey cyu nu cha shaal nı loy? Gal nu rnii riidz ni Ņgyoozh: "Dzi ga nap ornu ryiid de yu nu rshaal de riidz nap ni Ņgyoozh", rniiň.

<sup>16</sup> Tees walab dela mbecy "O" mnii dey ni de riidz nap ze', gun i mod za riidz ni Isaías. Orze' nay: "Shuaan de, Ɂca ſuu na mbecy guňa lagy yu de riidz nir nu mnęę?" na Isaías rab yu Ņgyoozh. <sup>17</sup> Orze' nde' nu ricy cup den consuel lo Crisht nu nac nu reň na riidz nim. Nunu reň na riidz nim nu nac nu rshaal mbecy nı lon.

<sup>18</sup> Tees ya rdugyi' tub coz: Ɂa rishli wangyeň de mbecy de riidz ze'? Segur la güeň dey nı. Gun riidz ni Ņgyoozh rniiň:

Bzu laa riidz nu mnii dey dutuub la gyishlombecy. Gashtal ze' nu blaazha' zir nu zet ni gyishlombecy brush las riidz nu mnii dey, na Ņgyoozh.

<sup>19</sup> Orze' na rdugyi' tuuba' tir: Tees Ɂa wangyet lag de mbecy Israael cuen nu de riidz ze', nde' par dela mbecy? Laab Moisees mnii lac mod nu loga la. Ornu nay: Ņgyoozh nam:

"Ya gyicya nu gyicy saap der ich tub nac mbecy nu wancyuu lat de mbecy nę.

Ya gyicya nu gazi lagy der lo tub nac mbecy nu wagad lagy", na Ņgyoozh,

na Moisees. <sup>20</sup> Despuees naal la mnii Isaías ornu pcaaay:

Ñgyoozh nam:

"De mbecy nu wanyub ya, byap dey ya.

Ya bruu zaca lo de mbecy nu wancugyi' ya", nam.

Ni pcaa Isaías. <sup>21</sup> Ze' par de mbecy Israeel, Isaías pcaaay: "Ñgyoozh nam: Ya gua la dzi bzaab ya lo tub mbecy wagyeň, nunu mbecy rniid ru', nam." Ni mod pcaa Isaías.

### De mbecy Israeel nu gruu mbañ

**11** Orze' na rdugyi' ga': ¿a mne' Ñgyoozh tub nac de mbecy nu bicy nim ze'? ¡Rila walab ni b icy mi! Laab ya naqä mbecy Israeel. Abraham, yu ze' gyitoo bel ne. Neza Benjamiing. <sup>2</sup> Ñgyoozh wanne'm de mbecy Israeel, de yu nu nil nese nu loga la gud lagy mi nu nac yu nim. ¿Walab gaal wagad lagy der lac yaruu riidz ni Ñgyoozh ze' nu Elías bdu' cyiy de mbecy Israeel lat nu mnii nuy Ñgyoozh? <sup>3</sup> Elías nay rab yu Ñgyoozh: "Shuaan de, bi biit dey dela yu nu rnii por cuen nir, nunu ptily dey de mez ze' nu driib zily de mbecy ru. Stub zi la ya byeeña, nunu rlagya' dey cut yu ya", nay. <sup>4</sup> Orze' na Ñgyoozh rab mi yu: "Ya bi bloo su gagyi miili yu gyeey nu griib zily dey ya. De yu ze' wansu tib dey nu nriib zily yu nab nu la Baal", nam. <sup>5</sup> Gal nu b icy Ñgyoozh tiem ni Elías, ni' zi'l ricy mi na. Ñgyoozh b icy mi faboor nu pcuim la be de mbecy par nu gac nim. <sup>6</sup> Tees Ñgyoozh pcuim de mbecy ze' nu nac faboor nu b icy num dey. Walab nu pcuim dey nu nac la na de coz nu ricy dey. Gun benu ncuim dey nu nac la na coz nu ricy dey, orze' nde' walab tub faboor.

<sup>7</sup> Orze' na ¿lac mod? De mbecy Israeel wangyad dey tub mod nu gyanap yu par lo Ñgyoozh, sinu de yu nu p cui Ñgyoozh zi'l byap dey ñi. Ze' de' zir dey b icy mi nu byacyig y nañ lardooy. <sup>8</sup> Ni mod rnii riidz ni Ñgyoozh: "Ñgyoozh b icy mi nu byacyig y lardoo dey. B icy mi nu mas Zub urlo dey tees wacsac dey. B icy mi nu mas Zub gyidag yu, tees wagyeñ dey. Ni na dey mas gashtal dzi na", rniiñ. <sup>9</sup> Ni' zi'l mnii Dabi lat de riidz ni Ñgyoozh ornu nay:

Rlagy ñi gyet lag dey nañ caa ni de coz nu row dey.  
De coz ze' gyicy ñi nu gadza dey.

Orze' cha dey lo cashtig.

<sup>10</sup> Rlagy ñi nu gyow urlo dey,

gun orze' cue' zac dey.

Rlagy ñi dzong ich dey par tub la

nu nac nu dzi ye yuu nu ca ich yu,

na riidz nu mnii Dabi.

### Gruu mbañ de mbecy nu walab mbecy Israael

<sup>11</sup> Na rdugyi' ga': ¿A bdune' de mbecy Israael tub la nu nac nu gudza dey? ¡Rila walab ni! Sinu nu nac nu wansuub gyidag dey ni Ñgyoozh, nde' nu guud mod nu gruu mbañ de mbecy nu walab mbecy Israael, gun orze' ni' de mbecy Israael galagy dey nu gruu mbañ yu. <sup>12</sup> Orze' nu nac nu gudza de mbecy Israael, nde' nu guud mod nu nap ricy nu Ñgyoozh dela mbecy. Nunu nu nac nu wangyicy de mbecy Israael ze' gan, orze' nap b icy num de mbecy nu walab mbecy Israael. ¡B enu ni, orze' dzi zir nap gyicy num de mbecy Israael ornu cush cya ga' dey lom tuuba' tir!

<sup>13</sup> Na ricy cupa tub riidz nu rlagya ne lo de ru, mbecy nu walab mbecy Israael. Como Ñgyoozh bzum ya nu yapa gyicya riñ lat der, ya ricy zilya riñ nu ricya,

<sup>14</sup> gun orze' dzi ga galagy de losa' nu gyicy dey gal nu ricy de ru, gun orze' gruu mbañ la be dey. <sup>15</sup> Gun ornu

mne' Ñgyoozh dey, orze' guud mod nu gyanap de' zir mbecy nu yu' gyishlombecy lom. Orze' ornu cush cya ga' dey lom, orze' gzac dey gal nu zac tub mbecy gut ornu gyabañ yu. <sup>16</sup> Como de gyitoo bel ni de mbecy Israael guc dey mbecy nu pcui Ñgyoozh nu gac nim, orze' ni' zi'l de mbecy Israael nac dey mbecy nu pcui Ñgyoozh. Gun benu nap na gyishtily nu bruu ni cub loga la, orze' ni' zi'l nap na de' zir gyishtily nu gruu ni de' zir cub ze'. Nunu benu nap na lyu tub yag, orze' ni' zi'l nap na de yaañ.

<sup>17</sup> De mbecy Israael na dey gal nu na tub yag mni nu la ya oliva. Tees yu' la be de yaa yag mni ze' nu guch ñii. Orze' lugaar ze' nu guch niñ ze', ze' pcyiid dey yaa tuba' yag gyish. Orze' de ru, mbecy nu walab mbecy Israael, na der gal nu na yag gyish ze'. Orze' na ral der dela gyel nap nu rbic Ñgyoozh ni de mbecy nim.

<sup>18</sup> Tees cue' nii too der nu nap zir der gaze' de mbecy nu guc gal nu na yaa yag nu guch ze'. Benu rash der shcab nu nap zir der, orze' cue' nit lagy der nu walab yaañ rbic ñi fers ni lyuñ, sinu lyuñ rbic ñi fers ni de yaañ.

<sup>19</sup> Tees dzi ga grusu tub mbecy nu niiy: "Laab ni, tees guch de yaa yag ze' par nu gad lugaar nu cyiid dey de ub na", niiy. <sup>20</sup> Laab ni gal nu niiy. Guch de yaañ ze' par nu nac nu wangyicy cup dey consuel lo Ñgyoozh. Tees de ru nicy nash der cyong yag ze' nu nac nu ricy cup zi'l der consuel lom. Orze' cue' gyicy le' der, sinu gudzib der nis wagyicy ru gan. <sup>21</sup> Gun benu Ñgyoozh bloo chum de mbecy Israael, de yu nu na gal nu na yaa yag mni ze', orze' ¿a rnii too der nu wabo chum de ru?

<sup>22</sup> Orze' bdu' cuen der nu Ñgyoozh dzi nap mi, nunu dzi ta nam. Ta nam par de mbecy nu shiñ ricy. Tees nap mi par de ru, benu zaab gyicy paa la der nu de gyel nap nim. Benu wayicy der nde', orze' shes mi de ru ich cyoong yag mni ze'. <sup>23</sup> Ze' benu de mbecy Israael, cush cya dey nu gyicy cup yu consuel, orze' Ñgyoozh cyiid cuba'm dey ich cyoong yag ze', gun mi ze' gac cyiid mi dey tuuba' tir. <sup>24</sup> Gun de ru, mbecy nu walab mbecy Israael, na der gal nu na yaa tub yag gyish ze'. Pshiñ dey yaa yag ze'. Orze' pcyiid dey ñi nu tub mod nu dzi biigy nu tub yag mni nu la ya oliva. ¡Benu gac gyicy mi ni mod nu de ru, orze' a' biigy zir cyiid mi ñii tuuba' tir, laab yaa ya oliva nu nac yag mni ze' ich laab cyong ñi!

### Ñgyoozh co mbañ mi de mbecy Israael

<sup>25</sup> Der b icya, rlagya nu gad lagy der tub coz nu wangad lagy mbecy gulas, gun orze' cue' gash der shcab nu nac der mbecy nu dzi rad lagy. Coz ze', nde' nu yu' mbecy Israael nu b icy cyig too dey. Walab nu b icy cyig too dey par tub la, tees b icy cyig too dey gashtal ornu lazhu chu' dela mbecy nu walab mbecy Israael lat de mbecy ni Ñgyoozh, de yu nu bi ca lo cuen nu chu'.

<sup>26</sup> Ornu ded ni de nu nde', orze' dela mbecy Israael gruu mbañ dey gal nu rnii de riidz ni Ñgyoozh. Ñgyoozh nam:

Biñ nu rboo mbañ mbecy, mi ze' gruum Sión

nunu co chum dela cyi nu ricy mbecy nu bruu lat de nez Jacob.

<sup>27</sup> Orze' ya za' lo trat nu b icy du dey  
ornu loq chu dela cyi nu ricy dey,  
nam.

<sup>28</sup> Na de mbecy Israeel za dey contr ni de riidz ni Crisht nu nac de ru, mbecy nu walab mbecy Israeel. Byac dey losa' yuu Ñgyoozh, gun orze' gad mod nu de ru gac nu der mi. Tees mi ze' gabee rcam dey, gun pcam de gyitoo bel ni dey, Abraham, Isaac, nu Jacob. <sup>29</sup> Gun rila wayasha'm de coz nap nu cuic mi ni mbecy, nunu ni wabo chum de mbecy nu bi pcam nu gac nim. <sup>30</sup> Ze' de ru gulas wansuub gyidag der nim. Tees na Ñgyoozh gushni lagy mi der nu nac nu wacsuub gyidag de mbecy Israeel nim. <sup>31</sup> Ni zi'l wacsuub gyidag dey mas gash-tal dzi na, gun orze' gal nu gushni lagy Ñgyoozh de ru, orze' ni' zi'l gashni lagy mi dey ze'. <sup>32</sup> Gun Ñgyoozh ricy mi dela mbecy par mbecy nu wacsuub gyidag nim, gun orze' gashni lagy mi dela dey nu tub zi'l mod.

<sup>33</sup> !Dzi ga coz ily gyel nap ni Ñgyoozh! !Nap tona' la rad lagy mi! !Nunu tona' la yu' shcab nim! Se cyu la gac shaal lagu nu ni rnii. Se cyu la gac nii lagu ni ricy mi.

<sup>34</sup> Gal nu rnii riidz nim:

Ni tub la mbecy wac gyet lag yu cuen de shcab ni Ñgyoozh.

Ni tub la mbecy wac cuic yu consef nim.

<sup>35</sup> Ni tub la mbecy wac cuic yu coz nu com,  
coz nu rlag y ni nu gyabica'm ni dey,  
rnii. <sup>36</sup> Gun dela coz druuñ lo Ñgyoozh. Psa' lagy mi delañ, nunu delañ, nac ñii coz nim. Rlag y ni nu gyabic den gyel mbecy nim par tub la. Laab ni gac ñii.

### Mod nu rlag y ni nu chu' den par lo Ñgyoozh

**12** Nde' nu der b icy na, como Ñgyoozh dzi nap ricy num den, ya rnishbañ lo der nu gyicy der ub ru par tub gun mbañ nu rbic der ni Ñgyoozh, par tub gun nu zu chu par tub lo zi'l riiñ ni Ñgyoozh, par tub gun nu dzi gyet lagy mi, gun nde' mod rishli nu rlag y ni gril zily den Ñgyoozh. <sup>2</sup> Nunu cue' gyicy der mod nu ricy cualcyer la mbecy nu yu' gyishlombecy, sinu gush der tub shcab cub, gun orze' gac der tub mbecy nu reña' na par mod nu na der gulas. Gun orze' gad lagy der de coz nu rlag y Ñgyoozh. Gad lagy der la na de coz nap. Gad lagy der la na coz nu rlag y mi. Gad lagy der la na coz nu sac falt ni.

<sup>3</sup> Como Ñgyoozh nap b icy num ya nu bzum ya riiñ ii, orze' na neq tub coz lo dela der. Cue' gyicy der ub ru par tub mbecy nu gya zir zu par mod nu na der, sinu tub ga la der rlag y ni gash ru schab mod ni mbecy rasq ben lac na ub der. Dub gal lac ricy nu Ñgyoozh tub ga la der dub ni rlag y ni gash der shcab ben lac na der.

<sup>4</sup> Gun tub cuerpa ni mbecy ricy cup ni zañ lugaar niñ, nunu tub ga la lugaar rcyiñ ni par reñ ga la riiñ. <sup>5</sup> Ni' zi'l de ub na. Mas zigy den yu'n, tees nac den tub zi'l cuerpa ni nac Crisht. Orze' na den gal nu na de reñ ga la lugaar ni laab tub zi'l cuerpa ze'.

<sup>6</sup> Dub gal lac rlag y Ñgyoozh, dub ni ricy mi nu cyiñ tub ga la den nu gyicy na reñ ga la riiñ nim. Orze' rlag y

ni nap gyicy den riiñ ze'. Benu Ñgyoozh gyicy mi nu cyiñ tub den nu shaal na riidz nu druu lom, orze' ni' zi'l rlag y ni nu gyicy den, dub gal lac mod nu ricy num den. <sup>7</sup> Benu Ñgyoozh gyicy mi nu cyiñ tub den nu gyicy na coz nu rlag y reña' mbecy, orze' rlag y ni nu nap gyicy nañ. Orze' benu Ñgyoozh gyicy mi nu cyiñ tuuba' den nu lyuun ni losa'n, orze' rlag y ni nu ni gyicy na. <sup>8</sup> Benu Ñgyoozh gyicy mi nu cyiñ tuuba' den nu gric na baloor ni losa'n, orze' ni gyicy na. Cyu zi'l mbecy nu rbic coz ni losa', rlag y ni nu cue' nu ziy coz nu cuic yu ni losa'y. Yu nu riib ic losa' rlag y ni nu mod nap gyub ic yuy. De yu nu nap ricy nu losa', rlag y ni nu dub gusht la gyicy yuñ.

### Mod nu yad ni nu gyicy mbecy ni Crisht

<sup>9</sup> Rlag y ni nu rishli ca der losa'r. Guzi lagy der lo de coz a' nap. Bzu fert der nu nac de coz nap. <sup>10</sup> Pca tub pca tub zi'l der losa'r como nac yu b icy der nu nac Crisht. Bzu der altant par nu ca lagy der lo losa'r.

<sup>11</sup> Cue' gazed der, sinu bloo lo der nu dutuub la lar-door lat nu gyicy der de coz nu rlag y Shuaan den.

<sup>12</sup> Gucyit lagy der nu nac nu rgyish lo der lo Ñgyoozh. Bicy cup der pasez ornu deet rzac der. Nunu dub laa tiem bdiiñ der lo Ñgyoozh.

<sup>13</sup> Ornu galagy ni la coz ni de mbecy ni Crisht, orze' briic der ñii ni dey, nunu nap b icy nu der de yu nu ryiid yu'r.

<sup>14</sup> Bdiiñ der lo Ñgyoozh nu nap gyicy num de mbecy nu rshet zi de ru. Bdiiñ der lom nu nap gyicy num dey. Cue' ca nu shiñ gyicy num dey.

<sup>15</sup> Ornu tub mbecy racyit lag y yu, orze' ni' zi'l de ru gucyita' lag y der. Nunu ornu ricy shni dey, orze' ni' zi'l b icy shni ga' der.

<sup>16</sup> Nap gu' der nu losa'r. Cue' gac der mbecy le'. Nunu pshet ic der nu chesa nur de mbecy shni. Cue' nii too der nu dzi yu' shcab ni der.

<sup>17</sup> Benu tub mbecy shiñ ricy nuy de ru, orze' cue' gyicy gal ga der ñii. Byub der tub mod nu gyicy ru coz nu nap par dela mbecy. <sup>18</sup> Bicy der ca na la coz nu gac gyicy ru par nu nap chu' der nu de losa'r. <sup>19</sup> Rila cue' gyicy gal ga der ornu mbecy shiñ ricy nuy der, sinu zaan der nu Ñgyoozh cuic mi cashtig ni dey. Gun lat de riidz nim rniiñ: "Ñgyoozh nam: nde' cuen ne ya nu gricä cashtig. Ya naca biñ nu gyabic i mbecy nu shiñ ricy, nam." Ni rniiñ. <sup>20</sup> Lugaar nu gyicy gal gaa der, orze' i mod rniiñ nu gyicy der: "Benu losa' yuor ran yu, orze' briic coz nu goy. Benu rbigy yu nis, orze' briic nis go'y, gun ornu ni gyicy ru, orze' gyicy ru nu gat loy", rniiñ. <sup>21</sup> Cue' zaan der nu gyicy coz a' nap gan der, sinu b icy der coz nap. Orze' gyicy der gan, cue' gyicy der coz a' nap.

### Rlag y ni nu zuub gyidag na ni de fushtiz

**13** Dela mbecy rlag y ni nu zuub gyidag dey ni de fushtiz. Gun dela riiñ nu zu fushtiz, nde' coz nu psa' lag y Ñgyoozh, nunu de yu nu zu riiñ ze', Ñgyoozh bzum dey. <sup>2</sup> Nde' nu de mbecy nu rza contr ni de fushtiz, yu ze' rzay contr ni tub coz nu bzu Ñgyoozh, nunu

mbecy nu rza contr ze', cha dey lo cashtig. <sup>3</sup> Gun de fushtiz walab nu nguaa dey par nu chiib yu de mbecy nu nap ricy, sinu nguaay par nu chiib yu de yu nu shiñ ricy. Benu walagy der nu chiib de fushtiz ru, orze' nap bicy der. Gun orze' gyet lagy dey. <sup>4</sup> Gun fushtiz, Ñgyoozh bzum dey par nu gyicy yu coz nap nuy de ru. Tees benu shiñ gyicy der, orze' rlagy ñi nu dzib der lo dey. Gun segur la ricy cup dey rishbeey nu cuic yu cashtig ni der. De yu ze' zuy riiñ ni Ñgyoozh par nu cuic yu cashtig mod nu rlagy ñi ni de mbecy nu shiñ ricy. <sup>5</sup> Nde' nu rlagy ñi nu zuub gyidag der ni de fushtiz. Walab tub lo zi'l nu zuub gyidag der ni dey par nu ruu chu der lo cashtig ni Ñgyoozh, sinu zuub gyidaga' der ni dey par nu cue' gat lo der. <sup>6</sup> Gyi' nde' nu rgyish der tiñ cuen ni dey, gun zu dey riiñ ni Ñgyoozh ornu ricy dey gyel fushtiz niy.

### Mod nu gyicy dun losa'n

<sup>7</sup> Orze' bicy nu der tub ga la mbecy dub gal mod nu rlagy ñi. Benu cyiñ mbecy tiñ lo der por cuen ni fushtiz, orze' briic der ñii. Benu tuuba' mbecy rbooy cuen yagyi' lo der, orze' briish der ñii. De mbecy nu yad ñi nu ca lagy der lo, pca lagy der loy. De mbecy nu yad ñi nu gyicy zily der, bicy zily der yu.

<sup>8</sup> Cue' gzab der tiñ ni ni tub la mbecy. Tub zi coz gac zab der ni de mbecy: coz ze' nde' nu ca tub ca tub zi'l der losa'r, gun mbecy nu rca losa', yu ze' ricy yac yu dela coz nu rnii leey ni Ñgyoozh. <sup>9</sup> Leey ze' rniiñ: "Cue' gal der mbecy nu wanchelaar. Cue' cut der losa'r. Cue' gyicy der gubaan. Cue' gyicy saap lagy der de coz ni losa'r", rniiñ. Dela de coz ze', gal nu de' zir coz nu rnii laab leey ze', nde' coz nu yaruu stub zi riidz. Riidz ze' nde' rniiñ nu pca der losa'r gal nu rcar ub ru. <sup>10</sup> Cyu zi'l mbecy nu rca losa', rila wagyicy yu shiñ nu losa'y. Orze' benu ca den losa'n, orze' ricy yac za' la den ni de leey ni Ñgyoozh.

<sup>11</sup> Ni rlagy ñi nu gyicy der, gun bi rad lagy der la tiem yu' den. Rlagy ñi nu gyicy den gal nu ricy tub mbecy nu rgyish yaa nu zu lily yu par tuuba' dzi, gun dzi nu gruu mbañ den bi yad gaab zir ñi na gaze' nese tiem nu loga la nu brugyi' nu ricy cup den consuel lo Ñgyoozh. <sup>12</sup> Bi yad rlazh rel. Sñuu ga zi'l za' yu. Rlagy ñi nu glaa yaa den de coz nu ricy na ze' nu cow, nunu gyicy den tub mod nu ricy mbecy nu rded ze' nu yu' yaa.

<sup>13</sup> Rlagy ñi gyicy den mod nu laab ñi gal nu ricy mbecy nu rded or widoo. Walagy ñi nu cha den ze' nu yu' gyel cyit. Walagy ñi nu gzugy den. Walagy ñi nu gal den mbecy nu wanchelaan. Walagy ñi zu den tub mod nu a' cyit rabee. Walagy ñi gyicy deet den nu losa'n. Walagy ñi gyicy saap lagy den. <sup>14</sup> Walagy ñi gyicy den dela nde', sinu rlagy ñi nu fert gac du den Shuaan na Jesucrisht. Nunu rlagy ñi nu cue' gric den lugaar nu gyicy na de coz a' nap nu yu' nañ lardoone.

Cue' nii der ti yu' falt ni de bicy der nu nac Crisht

**14** Benu tub mbecy wagad lagy nap yu de coz ni Crisht, orze' "O" mnii der nu chu'y lat der. Cue' zi

go nu der yu riidz nu nac de coz nu rnii tooy. <sup>2</sup> Gun yu' mbecy, rnii tooy nu gac gow mbecy la zi'l coz. Ze' yu' ga' mbecy, yu nu wagad lagy nap, rnii tooy nu tub lo zi'l coz gac goy, nde' coz nu rbic ya mni zi'l. <sup>3</sup> Mbecy nu row la zi'l coz, walagy ñi nu güii naañ yu lo mbecy nu wagow. Ze' de mbecy nu wagow, walagy ñi nu nii ziy ni de yu nu row, gun Ñgyoozh shet ic mi nu chu' de yu ze' lom. <sup>4</sup> ¿Cyu guc ru par nu niir nu yu' falt ni moz ni reña' mbecy? Nde' cuen ni patroq niy nu gniyy ti gruu nap moz niy o nu waruu nap yu. Nunu segur la gruu nap yu, gun Ñgyoozh cyiñ mi nu locyuub mi dey nu gruu nap yu.

<sup>5</sup> Na yu' mbecy nu ricy zily zir dey ca na tub dzi gaze' de' zir dzi. Ze' yu' ga' mbecy nu rnii too dey nu tub zi'll na dela dzi. Tub ga la mbecy rlagy ñi nu nap gad lagy yu mod nu ricy ub yu. <sup>6</sup> Mbecy nu ricy zily tub dzi, ni mod ricy yu par nu rca lagy yu lo Shuaan den. Yu nu row la zi'l coz, yu ze' laaba' nu rca lagy yu lom, gun rbic yu gras nim nu nac de coz nu row yu. Mbecy nu walagy gow de coz ze', ni ricy yu par nu rca lagy yu lo Ñgyoozh, nunu ni' rbic yu gras nim.

<sup>7</sup> Gun sac ni tub la mbecy lat den nu cui mbañ yu nu nac de nu nde', gun nde' coz nu rlagy ub zi'l dey. Nunu sac ni tub mbecy lat den nu gat yu nu nac de nu nde', gun nde' coz nu rlagy laab uba' zi'l dey. <sup>8</sup> Benu cui mbañ den, orze' nde' par nu gyicy den coz nu rlagy Ñgyoozh. Nunu benu gat den, orze' gat na gun nde' coz nu rlagy mi. Orze' mas mbañ den o nu gat den, tees nac naa nim. <sup>9</sup> Gun Crisht gut mi. Orze' byabañ mi, gun orze' mi ze' nac mi Shuaan de mbecy mbañ nunu nac mi Shuaan de mbecy nu bi gut.

<sup>10</sup> Orze' a' nap benu nii der nu yu' falt ni de bicy ru. Nunu ni' a' nap benu güii naañ der lo dey. Gun dela den rlagy ñi nu gyecha'n lo Ñgyoozh par nu gri beem ni den. <sup>11</sup> Gun riidz ni Ñgyoozh rniiñ: "Shuaan den nam, segur la ya naca biñ nu mbañ. Orze' dela mbecy zu tib dey lo, nunu dela mbecy gnii dey nu ya naca Ñgyoozh, nam", rnii riidz nim. <sup>12</sup> Orze' dela den rlagy ñi nu zeed cuen na lo Ñgyoozh dela coz nu bicy na.

### Cue' gyicy der nu gya' ich bicy der

<sup>13</sup> Nde' nu na rlagy ñi nu cue' nii den nu yu' falt ni losa'n, sinu rlagy ñi nu gzu fert den nu cue' gyicy den ni tub la coz nu gyicy ñi nu gya' ich de bicy na, ni cue' gyicy den ni tub la coz nu gyicy ñi nu gyicy de bicy na coz cyi. <sup>14</sup> Ya rad lagya nu sac la coz nu row mbecy nu nil nac ñii coz nu a' caacy. Bguugy nap la lardoq nu caacy dela coz nu row mbecy, gun ya nac du Shuaan na Jesuuz. Tees benu tub mbecy rnii tooy nu a' caacy la coz, orze' par yu ze' zi'l a' caacy ñi. <sup>15</sup> Orze' benu de ru shiñ der baloor ni de bicy ru, orze' wagyicy der mod ni mbecy nu rca losa', gun ni' par de yu ze' gut Crisht. Orze' cue' zaan der nu gnuy nu nac de coz nu row der.

<sup>16</sup> Orze' cue' cuic der lugaar nu gzat zi mbecy de coz nu nap par de ru. <sup>17</sup> Gun asunt ni gyel gubier ni Ñgyoozh, nde' walab nu rzat ñi de coz nu dow den o coz nu do'n, sinu asunt ni gyel gubier nim, nde' nu rlagy ñi nu gyicy den coz nu laab ñi. Rlagy ñi nu nap chu' den

nu de losa'n. Rlagy ñi nu zu cyit lagy den nu nac Espirit Yon ni Ñgyoozh.<sup>18</sup> Gun cyu zi'l mbecy nu ni mod ricy de coz gal nu rlagy Crisht, yu ze' ricy yu mod nu yet lagy Ñgyoozh. Nunu ricy yu nu nap rnii de losa'y niy.

<sup>19</sup> Orze' rlagy ñi nu dub laa tiem yub den mod nu nap chu' dun losa'n, nunu rlagy ñi nu yub den mod nu gyafert zir dey nu nac de coz ni Crisht. <sup>20</sup> Cue' gnu der de riiñ nu ricy Ñgyoozh lat losa'r nu nac coz nu row der, gun la zi'l coz nu gow mbecy caacy ñi. Orze' gac gow der, tees a' nap nu gow der ñii, benu gyicy ñi nu gyicy de losa'r coz cyi. <sup>21</sup> Mod nu rlagy ñi, nde' nu cue' gow der beel, ni cue' go' der ñup ni urbyay, ni cue' gyicy der ni tub la coz benu nde' gyicy ñi nu gnu b icy ru. (Cue' zaan der nu gyicy cyi gan yu. Ni cue' zaan der nu gya' ich yu nu nac coz nu gyicy der.) <sup>22</sup> Mas rad lagy der nu par lo Ñgyoozh gac gyicy der mod ze', tees cue' nii der lo losa'r. (Gun dzi ni mbecy benu rad lagy yu nu sac falt niy nu nac coz nu ricy yu!) <sup>23</sup> Tees benu tub mbecy wagad lagy yu ti nap uti a' nap nu gow yu tub coz, o nu go'y, orze' Ñgyoozh niim nu yu' falt niy ornu goy ñi nunu ornu go'y ñi, gun wagad lagy yu ti gyicy yu coz nu wayet lagy Ñgyoozh. La zi'l coz nu gyicy den, benu rnii toon nu cyup ridz nde' coz nu walagy Ñgyoozh, orze' nde' cyi na.

Bicy der coz nu gyet lagy losa'r; cue' nu gyicy der nu coz nu gyet lagy ub zi'l der

**15** Orze' de ub na, mbecy nu rad lagy nap de coz ni Crisht, rlagy ñi nu locyuub den losa'n ornu wagad lagy nap dey. Walagy ñi gyicy den coz nu rlagy ub zi'l na,<sup>2</sup> sinu tub ga la den rlagy ñi gyicy na coz nu gyet lagy losa'n. Rlagy ñi gyicy den coz nu nap par de yu ze', gun orze' gyafert dey nu nac de coz ni Crisht.  
<sup>3</sup> Gun mas Crisht wangyicy mi coz nu rlagy ub zi'l mi, sinu b icy mi nu byu' niñ gal nu rniiñ lat de riidz ni Ñgyoozh ze' nu rniiñ: "De riidz nu mnii zi mbecy nir, nde' bgoñ too ya, na Mesías rab mi Ñgyoozh", rniiñ.  
<sup>4</sup> Tees dela riidz nu byeeñ gulas lat de riidz ni Ñgyoozh, byeeñ ñi par nu lyuuñ ni den, gun orze' riidz ze' gyicy ñi nu gagye den, nunu cuic ñi baloor ni den. Nunu nu nac nde' grish lo den nu ruu nap na.  
<sup>5</sup> Nunu Ñgyoozh, biñ nu gyicy nu gagyen, biñ nu rbic baloor ni den, mi ze' locyuub mi de ru nu gyicy der tub zi'l shcab nu losa'r. Locyuub mi der nu gyicy der gal nu b icy Jesucrisht.  
<sup>6</sup> Gun orze' nu tub zi'l shcab, nunu tub zi'l tiem gyabic den gyel mbecy ni Ñgyoozh, Uz Shuaan den Jesucrisht.

De mbecy nu walab mbecy Israael reñ dey riidz ni Ñgyoozh

<sup>7</sup> Orze' pshet ic der nu chu' mbecy lat der gal nu Jesucrisht pshet ic mi nu chu' den lom. Ni b icy mi par nu gabe nu Ñgyoozh dzi lily nam.  
<sup>8</sup> Gun riidz nu rnęe, nde' nu Crisht byac mi tub biñ nu rzu bich nu nac de mbecy Israael, gun orze' za' lom dela riidz nu mniim lo de gyi too bel ni dey nu segur la gyicy mi. Orze' rabee nu Ñgyoozh ricy yac mi ni de riidz nu rnii. <sup>9</sup> Ni' zi'l biid

mi, gun orze' de mbecy nu walab mbecy Israael gyabic dey gyel mbecy nim nu nac nu gushni lagy mi dey, gal nu rnii tub nac riidz nim:

Nde' nu ya gyabica gyel mbecy ni Ñgyoozh lat de mbecy nu walab mbecy Israael, nunu ya dula lor,

rniiñ.<sup>10</sup> Tub naca' riidz ni Ñgyoozh rniiñ:

De ru mbecy nu walab mbecy Israael, gucyit lagy der nu de mbecy ni Ñgyoozh, rniiñ.<sup>11</sup> Tub naca' riidz ni Ñgyoozh rniiñ:

De ru mbecy nu walab mbecy Israael, byabic der gyel mbecy ni Ñgyoozh.

Dela de ru mbecy mnii der nu dzi zily nac mi, rniiñ.<sup>12</sup> Ni' lat de riidz nu bzeeñ Isaías rniiñ:

Cyid tub mbecy nez Isaí.

Mi ze' gruu zac mi

par nu gyub ic mi de mbecy nu walab mbecy Israael. Orze' dela mbecy ze' cyish lo dey lom, rniiñ.

<sup>13</sup> Ñgyoozh, biñ nu drish lo den lo, gyicy mi nu gacyit lagy der, nunu cuic mi gyel ri zu nañ lardoo der nu nac nu ricy cup der consuel lom, gun orze' Espiriit Yon nim gyicy mi nu fert zir cyish lo der lom.

<sup>14</sup> Der b icy na, ya rad lagya nu de ru ricy za' la der de coz nap, nunu rad lagya nu nap rad lagy der de coz ni Crisht, nunu rad lagya nu cyiñ der nu lyuur ni de losa'r.  
<sup>15</sup> Tees yu' la be riidz nu pcą lo gyicy ii nu fert zañ, gun orze' cue' nit lagy der ñii. Ni b icy nu nac nu Ñgyoozh nap b icy num ya ornu bzum ya riiñ ii.

<sup>16</sup> Ze' riñ ze', nde' nu ricya de riiñ ni Jesucrisht lat de mbecy nu walab mbecy Israael. Nde' nu ya na gal na tub uz nu zu riiñ lugaar nu driib zily mbecy Israael Ñgyoozh. Orze' rshaalą de riidz nu sac ni Crisht lo de mbecy nu walab mbecy Israael, gun orze' gyac dey gal nu na tub gun nu rbic dey lo Ñgyoozh. Na dey gal nu na tub gun nu "O" niim gash mi, gal na tub gun nu bloo chu Espirit Yon nu gac ni Ñgyoozh.

<sup>17</sup> Como nac du Jesucrisht, orze' yet lagya nu nac de riiñ ni Ñgyoozh nu ricya.  
<sup>18</sup> Gun ya ricy cuidada de riidz nu rnęe. Tub lo zi'l coz nu b icy Crisht nu nac ya, nde' rzata lo de ru. Bicy mi nu rzuub gyidag de mbecy nu walab mbecy Israael ni Ñgyoozh nu nac de riidz nu mnęe, nunu nu nac de coz nu b icya.  
<sup>19</sup> Bzuub gyidag dey nim nu nac nu bzaac dey de nusuriidz nu b icy mi. De nusuriidz ze', nde' par nu gad lagy dey nu laab mi, nunu par nu cha nu ic dey. Nunu bzuub gyidag dey nim ornu bzaac dey de coz ily nu b icy Espiriit Yon nim. Orze' nese Jerusaleeng, gashtal dela lo yu ni Iliria ya pshaalą dela riidz nu sac ni Crisht.  
<sup>20</sup> Coz nu rlagya, nde' nu shaalą riidz nim de lugaar nu nigul gyeñ mbecy de riidz ze', gun orze' cue' chą nu gyicya riiñ ni Crisht ze' nu bi bzuub reña' mbecy gyi' riiñ nim.

<sup>21</sup> Sinu gal nu rnii riidz nim, ni mod rlagya:

De yu nu nigul dunii la riidz nim lo, orze' de yu ze' gad lagy dey.

De yu nu nigul gyeñ la riidz nim, de yu ze' gyet lagy dey cuen, rniiñ.

### Baly rlagy yu chay Rom

<sup>22</sup> Nu nac nde', orze' wangad la mod nu nyap güii der mas zañ tir ngulagya nu nyap güii der. <sup>23</sup> Tees na bi bya' lo riiñ nu ricya lugaar ii. Nunu nil bi rac ña'n rlaga yap güii der. <sup>24</sup> Nde' nu drish lo nu gac yap güii der nez nu deda nu cha par España. Na ornu bi bdo ñuun riidz, nunu bi bacy ñuun gusht, orze' ya drish lo nu locyuub der ya nu de coz nu galagy ñi nez nu cha. <sup>25</sup> Tees na gyä tub riiñ Jerusaleeng. Gyä du tub gun ni de mbecy ni Crisht nu yu' ze'. <sup>26</sup> Gun de mbecy ni Crisht nu yu' lo yu ni Macedonia, gal nu de mbecy ni Crisht nu yu' lo yu ni Acaya, de yu ze' mnii too dey nu zeed yu tub gun par nu locyuub dey de mbecy zi nu yu' lat de mbecy ni Crisht Jerusaleeng. <sup>27</sup> Mnii too dey nu nap benu ni gyicy yu, nunu laab nde' coz nu yad ñi nu gyicy dey, gun de mbecy Israael blocyuub dey de mbecy nu walab mbecy Israael nu nac de coz ni Crisht. Orze' de mbecy nu walab mbecy Israael rlagy ñi nu locyuub dey de mbecy Israael nu de coz nu galagy ñi ni dey. <sup>28</sup> Na ornu bi za' lo' riiñ ze', nunu gyabicä de gun ze' yaa dey, orze' cha España. Nez deda, orze' zaab lo der. <sup>29</sup> Ornu yapa, orze' rad lagya nu Ñgyoozh ricy za' lam coz nap num den nu nac Crisht.

<sup>30</sup> Der bicy na, ya rnishbaä lo der nu nac Shuaan den Jesucrisht, nunu rnishbaä lo der nu nac Espiriit Yon ni Ñgyoozh biñ nu rlocyuub den nu caan losa'n. Rnishbaä lo der nu co lo der tublaazh nu ya ornu cyiñ der lo Ñgyoozh ne. <sup>31</sup> Cyiñ der lo Ñgyoozh nu cue' zaan mi nu shiñ gyicy nu de mbecy Judea ya, de yu nu wagyicy cup consuel lo Crisht. Nunu cyiñ der lo Ñgyoozh nu de mbecy ni Crisht nu yu' Jerusaleeng nu gyet lagy dey riiñ nu cha loy. <sup>32</sup> Gun orze' benu Ñgyoozh rlagy mi, orze' tona' la zu cyit lagya ornu yapa lo der, nunu gyag ñuu lagya lat nu cyiñña lat der. <sup>33</sup> Ñgyoozh, biñ nu ricy nu zu cyit lagy na, mi ze' nac num der. Laab ni gac ñii.

### Baly rzeed yu Ñgyoozh ni de mbecy Rom

**16** Ya gyicya nu cu' lo der zan den Febe nu cyu nac mi. Mi ze' tub biñ nu zu riiñ lat de mbecy ni Crisht nu yu' Cencrea. <sup>2</sup> Nap bacy nu der mi nu nac Shuaan den. Bicy nu der mi gal nu yad ñi nu gyicy du den de bacy na nu nac Crisht. Nunu locyuub der mi nu la zi'l coz nu galagy ñi nim, gun mi ze' blocyuub mi zañ mbecy. Mas ya blocyuub mi.

<sup>3</sup> Ya zeeda' ñgyoozh ni Priscila nu ñgyeem Aquila. De yu ze' bacy nuy ya riiñ ni Jesucrisht. <sup>4</sup> Wangyicy cuen la dey mas ñigyat yu. Orze' gu' la dey lo rishdzidz nu nac nu bloo mbañ dey ya. Ya drica' gras ni dey, nunu ni' de mbecy ni Crisht nu walab mbecy Israael rbic dey gras ni dey. <sup>5</sup> Nunu ni' zeeda' ñgyoozh ni de mbecy ni Crisht nu yatublaazh nañ yu' ni dey. Ya zeeda' ñgyoozh ni amig ne Epeneto. Yu ze' mbecy loga la nu bacy cup consuel lo Crisht lo yu ni Asia. <sup>6</sup> Ya zeeda' ñgyoozh ni Li, biñ nu fert ricy riiñ lat der. <sup>7</sup> Ya zeeda' ñgyoozh ni de losa' Andrónico nu Junias. De yu ze' losa' nu bri du nañ yu' gyiib tublaazh la. Mas de aposht nap yu' lo dey yu.

Nunu bacy cup dey consuel lo Crisht anzir nu gyicy cup ya consuel lom.

<sup>8</sup> Ya zeeda' ñgyoozh ni Ampliato. Yu ze' amig ne nu dzi rca nu nac Shuaan den. <sup>9</sup> Ya zeeda' ñgyoozh ni Urbano. Yu ze' losa'n nu ricy na riiñ ni Jesucrisht. Zeeda' ñgyoozh ni amig ne Estaquis. <sup>10</sup> Zeeda' ñgyoozh ni Apeles. De mbecy bacy dey preb yu ben a ricy paay nu Crisht, nunu bruu nap yu. Ya zeeda' ñgyoozh ni de famil ni Aristóbulo. <sup>11</sup> Ya zeeda' ñgyoozh ni losa' Herodión. Nunu zeeda' ñgyoozh ni de famil ni Narcis nu ricy cup consuel lo Crisht. <sup>12</sup> Ya zeeda' ñgyoozh ni Trifena nu Trifosa. De mi ze' rboo lom lat riiñ ni Shuaan den. Nunu zeeda' ñgyoozh ni zan den nu nac Crisht Pérsida. Ni' zi'l mi ze' tona' la bloo lom lat riiñ ni Shuaan den. <sup>13</sup> Zeeda' ñgyoozh ni Rufo. Yu ze' tub mbecy ni Crisht nu dzi rasoo. Nunu zeeda' ñgyoozh ni ñaay. Mi ze' nam gal na tub ñaq. <sup>14</sup> Nunu zeeda' ñgyoozh ni Asíncrito. Zeeda' ñgyoozh ni Flegonte. Zeeda' ñgyoozh ni Hermes. Zeeda' ñgyoozh ni Patrobas. Zeeda' ñgyoozh ni Hermas. Nunu zeeda' ñgyoozh ni de bacy na nu rded nu de yu ze'. <sup>15</sup> Zeeda' ñgyoozh ni Filólogo. Zeeda' ñgyoozh ni Julia. Zeeda' ñgyoozh ni Nero. Zeeda' ñgyoozh ni zan yu Olimpas. Nunu zeeda' ñgyoozh ni dela bacy na nu nac Crisht nu rded nu de yu ze'.

<sup>16</sup> Tub ga la der nap nii nu der losa'r. Dela mbecy ni Crisht nu yu' reña' lugaar zeed dey ñgyoozh ni der.

<sup>17</sup> Der bacy na, ya rnishbaä lo der nu gyicy cuidad der nis cyiid mbecy nu gyicy yu nu tub su der losa'r, nis cyiid de yu nu gyicy nu can shcab ni der nu nac de coz ni Crisht. De yu ze' rza dey contr ni de riidz nu bdulyuu ni der. Bruu chu der lo de yu ze'. <sup>18</sup> Gun de yu ze' wagyicy dey coz nu rlagy Shuaan den Jesucrisht, sinu coz nu rlagy ub zi'l dey ricy yu. Tona' la nap za riidz nu rnii dey, nunu ryabic dey gyel mbecy ni mbecy, gun orze' rguu dey de mbecy nu dzi ton na. <sup>19</sup> Dela mbecy rad lagy dey nu tona' la nap rzuub gyidag der ni Crisht, nde' nu ya dzi yet lagya nu nac de ru. Ya rlagy nu gyicy cup der shcab par nu gyicy der coz nap, tees cue' par nu gyicy der coz a' nap. <sup>20</sup> Benu ni, orze' Ñgyoozh, biñ nu gyicy nu cheti ri añ ni der, mi ze' sñuu ga cyich ñgye'm nuras. Gabish yu yeñ gyi' der.

Shuaan den Jesucrisht nap gyicy num der.

<sup>21</sup> Timoteo zeed yu ñgyoozh ni der. Yu ze' losa' nu bacy du riiñ. Ni' zi'l de losa' Lucio, Jasón, Sosípater, de yu ze' zeed dey ñgyoozh ni der.

<sup>22</sup> Ya, Tercio, yu nu pcaa lo gyicy ii de riidz nu mnii Baly, zeeda' ñgyoozh ni de ru nu nac Shuaan den.

<sup>23</sup> Gayo, yu nu briic yu' nu cyiñña, yu ze' zeeda'y ñgyoozh ni der. Nañ yu' yu ze' ryatublaazh de mbecy ni Crisht. Erasto, yu nu nac tesorer ni gyedz, yu ze' zeeda'y ñgyoozh ni der. Nunu bacy na Cuarto zeeda'y ñgyoozh ni der.

<sup>24</sup> Shuaan na Jesucrisht nap gyicy num der. Laab ni gac ñii.

Baly ricy zily yu Ñgyoozh

<sup>25</sup> Orze' rlagy ñi gyabic den gyel mbecy ni Ñgyoozh, gun mi ze' gac cuic mi fers ni den nu nac de riidz nu sac nim, nu rshaalə lo der. Riidz ze' rniiñ coz ni Jesucrisht, nunu saap ñi de riidz nu wangad lagy mbecy gu-las tees rshaal ñi coz nu psa' lagy Ñgyoozh nese anzir nu bzub gyi' gyishlombecy. <sup>26</sup> Tees gal na rad lagy den nu nde' nac ñii de riidz ni de yu nu mnii por cuen ni

Ñgyoozh. Na rad lagy de lo la mbecy de riidz ze' nu nac nu ni bi mnii Ñgyoozh, biñ nu zu tub la, gun orze' gac gyicy yac dey niñ nunu gyicy cup dey consuel lo Crisht.

<sup>27</sup> ¡Tub zi la Ñgyoozh, mi ze' laab mi, nunu tub zi la mi ze' rad lagy mi dela coz! ¡Mi ze' zi'l rlagy ñi nu gyabic den gyel mbecy nim tub la nu nac Jesucrisht! Laab ni gac ñii.

# 1 Corintios

Baly bzeed yu gyicy lo de mbecy ni Crisht nu yu' gyedz  
nu la Corinto

**1** Ya Baly, yu nu bzu Ñgyoozh nu gac aposht ni Jesucrisht par nu chä tush lasä de riidz nim. Ni b icy num ya gun nde' coz nu bruu gal nañ lardoom. Dë ya nu biicy na Sosht tublaazh la <sup>2</sup> zeed dë gyicy ii lo der bic y na nu ricy cup consuel lo Crisht, de ru mbecy nu yu' gyedz Corinto. De ru nac der mbecy ni Ñgyoozh nu nac nu rded nu der Jesucrisht, nunu Ñgyoozh b zum der nu gac ru nim tublaazh la nu de mbecy nu rcyiiñ dela lugaar, de yu nu rnishbaa lo Shuaan den Jesucrisht. Jesucrisht, mi ze' Shuaan de ub na, nunu laaba' mi ze' Shuaan de yu ze'. <sup>3</sup> Ñgyoozh, Uz den, nu Shuaan den Jesucrisht gyicy mi faboor num der nunu gyicy mi nu cheti ri añ ni der.

## Ñgyoozh nap ricy num der nu nac Crisht

<sup>4</sup> Dub laa tiem dricä gras ni Ñgyoozh par nu nac de ru, gun b icy mi faboor num der nu nac Jesucrisht. <sup>5</sup> Par nu nac nu nac nu der Crisht, Ñgyoozh tona' la nap b icy num der. Nde' nu nap za de riidz nu rnii der, nunu nap yet lag der cuen de coz rishli. <sup>6</sup> Dela coz nu mnëe lo der nu gyicy Crisht, dela nde' bi b icy mi ñii num der. <sup>7</sup> Gun orze' rila wayicy falt ni tub la coz nu gac gyicy Ñgyoozh num der lat nu cuez der ornu gruu zac Shuaan den Jesucrisht tuuba' tir. <sup>8</sup> Nunu mi ze' locyuub mi nu gagye der gashtal shuub la dzi ze', gun orze' ni tub la mbecy wac riib dey cyi too der ornu cyid mi. <sup>9</sup> Segur la ni gyicy Ñgyoozh, gun dub laa tiem ricy yac mi dela coz nu rnii. Nunu ub mi bzum der nu gac nur I'ñ mi Jesucrisht, biñ nu nac Shuaan den.

## Bdulew de mbecy ni Crisht

<sup>10</sup> Ya rnishbaa lo der, b icy na, nu nac Shuaan den Jesucrisht, nu gnii der tub zi'l riidz gun orze' cue' gyac zañ nac der nu losa'r, sinu g uc tub nac zi'l mbecy. B icy der tub zi'l shcab, nunu b icy der tub zi'l riidz. <sup>11</sup> Ni rnëe, der b icy na, gun yu' la be mbecy lat de famil ni Cloé, mniy lo nu yu' mbecy nu rnii deet dey nu losa'y. <sup>12</sup> Coz nu rnëe, nde' nu reñ ga la riidz rnii tub ga der. Yu' mbecy lat der nu rnii: "Ya nac du Baly", rnii. Yu' ga'y rnii: "Ya nac du Apolos", rnii. Ze' tub naca'y rnii: "Ya nac du Bed", rnii. Ze' tub naca'y rnii: "Ya nac du Crisht", rnii. <sup>13</sup> ¿Walab gaal yu' zañ la' Crisht? ¿Walab gaal ya, Baly, gutä lo cruuz par nu nac der? ¿Walab gaal bzu nis der par nu gabe der nu nac ru mbecy ne ya? <sup>14</sup> ¡Dricä gras ni Ñgyoozh nu wanriib nisa ni tub la

der! Nomaas Crispo nu Gayo, de yu ze' zi'l briib nisa, <sup>15</sup> gun nis gruu su tub mbecy lat der nu gniy nu bzu nis yu par nu gabe nu nac nuy ya. <sup>16</sup> Ni' de famil ni Estéfanas briib nisa' dey, tees wagyeza' lagya ti briib nisa de' zir mbecy. <sup>17</sup> Gun Crisht wansuu nez mi ya par nu riib nisa mbecy, sinu bzuu nez mi ya par nu shaala de riidz nu sac nim. Nunu ornu rnëe de riidz ze', walab nu nac shcab lily ni mbecy rnëe ñii, gun benu ya ni nee, orze' dzi ga wayicy cuen mbecy coz nu ricy zir ñi presis. Coz ze', nde' nu gut Crisht lo cruuz.

## Rila wac chu' lo mbecy Ñgyoozh nu nac shcab ni ub zi'l yu

<sup>18</sup> Gun de mbecy nu gdune', de yu ze' rzii dey nu de riidz nu rnii nu gut Crisht lo cruuz, nde' riidz ton. Tees par de ub na, como gruu mbañ den, orze' nu nac riidz ze', Ñgyoozh tona' la coz ily ricy mi. <sup>19</sup> Gun lat de riidz ni Ñgyoozh, lat ze' rnii:

Ya nit lo shcab lily ni de mbecy lily,  
nunu zu chü shcab ni de yu nu yet lag cuen, nam.

<sup>20</sup> Orze' de mbecy nu yu' shcab ni, wayet lag dey cuen coz ni Ñgyoozh nu nac shcab niy. Nunu yu nu dzi yu' lo leey wagad lagy dey coz ni Ñgyoozh nu nac nu dzi yu' lo dey. Nunu mbecy nu dzi riidz ru' nu nac coz ni gyishlombecy ii, mas nap rnii dey tees wagad lagy dey de coz ni Ñgyoozh nu nac nu dzi rnii dey. <sup>21</sup> Gun Ñgyoozh, nu nac nu yu' shcab nim, b icy mi nu rila wac chu' lo de mbecy mi nu nac shcab lily ni de ub zi'l dey. Sinu ricy mi nu gruu mbañ mbecy nu ricy cup consuel lom par nu nac de riidz nu rshaal na nim, mas mbecy rzii dey nu riidz ze', nde' riidz ton.

<sup>22</sup> Riidz nim, nde' riidz ton par de mbecy Israeel, gun rlagy dey tub nusuriidz par nu gabe nu nde' riidz ni Ñgyoozh. Nunu nde' riidz ton par de mbecy griego, gun rlagy dey tub shcab lily. <sup>23</sup> Ze' de ub na rshaal na de coz nu bzac Crisht lo cruuz. De riidz nu rshaal den ze', nde' ricy ñi nu walagy de mbecy Israeel gyicy cup dey consuel lo Crisht, nunu de mbecy griego rnii dey nu nde' riidz ton zi'l. <sup>24</sup> Tees par de ub na mas nac naa mbecy Israeel, o a' nac naa mbecy Israeel, tees par de ub na, mbecy nu bzu Ñgyoozh nu gac nim, de riidz ze' rzat ñi Crisht. Nunu par nu nac mi, nde' nu dzi coz ily ricy nu Ñgyoozh den. Nunu nu nac mi rabee nu tonal la lily na shcab ni Ñgyoozh. <sup>25</sup> Gun mod nu b icy Ñgyoozh, par de mbecy rzii dey nu nde' tub mod ton, tees mod nu b icy mi nap zir b icy mi par dela de mbecy nu ricy cup shcab lily. Nunu mas mbecy rzii dey nu a' fert mi nu nac coz nu b icy mi, tees fert zir mi par dela mbe-

cy. <sup>26</sup> Na, der bicy na, bacy der nu gyeza' lagy ru mod nu na der nu lo ga ornu bzu Ñgyoozh der nu gac der nim. Par de mbecy nu yu' gyishlombecy ii, sac zigy mbecy nu yu' shcab lily ni lat der. Sac zigy mbecy nu gac gyicy coz ily lat der. Nunu sac zigy mbecy nu bruu lat de famil zub lo zir lat der. <sup>27</sup> Gun mbecy ricy dey de ru par mbecy ton, tees Ñgyoozh bacy mi nu gyicy der nu gat lo de mbecy nu ricy cup shcab lily. Nunu mbecy ricy dey de ru par mbecy gyidz. Tees Ñgyoozh bacy mi nu de ru gyicy der nu gat lo de mbecy lily. <sup>28</sup> De ru nac ru mbecy shni. Rzii mbecy nu se la la sac der. Tees Ñgyoozh pcam der par nu gyicy ru nu gabe nu de coz nu rzii de mbecy lily nu dzi sac, nde' se la la sac ñii. <sup>29</sup> Nde' nu par Ñgyoozh ni tub la mbecy wac gyicy le' dey lom. <sup>30</sup> Tees laab Ñgyoozh bacy mi nu nac nu der Jesucrisht, nunu nu nac Jesucrisht yu' shcab ni den. Par nu nac mi, byanap den par lo Ñgyoozh. Nunu nu nac mi yu' den nu gyel cacy, nunu bruu chu den lo coz cyi. <sup>31</sup> Nde' nu rniiñ lat de riidz nu bzeeñ Ñgyoozh: "Be-nu mbecy rlagy dey gyabic yu gyel mbecy, orze' rlagy ñi nu gyabic dey gyel mbecy ni Ñgyoozh", rniiñ.

### De riidz nu rnii nu gut Crisht lo cruu

**2** Der bacy na, ornu byap shaala de riidz nu rishli ni Ñgyoozh lat der, walab nu riidz biigy mnęe ñii. Nunu ni walab nu bacya ñii nu nac schab lily ni uba. <sup>2</sup> Gun lat nu gusa lat der, bacya nu wangad lagya de' zir de coz, nomaas nu gut Jesucrisht lo cruu nu nac de ub na, nde' zi'l gud lagya. <sup>3</sup> Nunu ornu bri lat der, ya guzee nu wacyiña guzee. Gush la bisä, nunu ton'a la gudziba. <sup>4</sup> Ornu ya pshaala riidz ni Ñgyoozh lo der, nunu ornu blyuu ni der, walab nu riidz ni mbecy lily pcuugya lardoo der, sinu bguugya lardoo der nu nac coz nu bacy Espiriit Yon ni Ñgyoozh, nunu nu nac de coz ily nu bacy Ñgyoozh lat der. <sup>5</sup> Gun orze' consuel nu ricy cup der lo Ñgyoozh nde' par nu nac nu dzi coz ily ricy mi, nde' nu ricy cup der consuel lom, walab par nu nac shcab ni mbecy lily.

### Ñgyoozh rlocyuub mi de ub na nu gyet lag na cuen nu nac Espiriit Yon nim

<sup>6</sup> Tees ya ni' zi'l rnęe riidz lily par de mbecy nu bi rad lagy nap de coz ni Crisht. Tees riidz ze', nde' walab riidz lily ni de mbecy nu yu' gyishlombecy na. Ni walab riidz lily ni de mbecy nu riib ic gyishlombecy ii, de yu nu bi ca lo cuen nu nit lo. <sup>7</sup> De coz nu rzata lo der, nde' coz lily nu bruu lo Ñgyoozh. Coz ze' wancuic Ñgyoozh nu ŋiyad lagy de mbecy gulas tees gal na briic mi nu gad lagy den. Nunu nde' psa' lagy Ñgyoozh nil nese anzir nu gzub gyi' gyishlombecy gun orze' zac den lo gyel lily nu ca lo cuen nu gad nin. <sup>8</sup> Ni tub la de mbecy nu riib ic gyishlombecy ii wangyet lag dey cuen de coz ze', gun benu ŋiyet lag dey cuen, orze' waca dey Shuaan den lo cruu, biñ nu ton'a la zily nac. <sup>9</sup> Tees lat de riidz nu bzeeñ Ñgyoozh rniiñ:

Ñgyoozh bi bzu lily mi tub coz par de yu nu rcam. Coz ze', nde' tub coz nu rila nigul zac ur lo la mbecy,

nunu rila nigul gyeñ gyidag la dey, nunu ni wagnii too dey nu nac ñii, rniiñ. <sup>10</sup> De coz ze' Ñgyoozh bacy mi nu rad lagy de ub na nu nac Espiriit Yon nim. Espiriit Yon nim gyet lag mi cuen dela coz, mas de coz biigy ni Ñgyoozh.

<sup>11</sup> Ze' par de mbecy, nomaas espiriit nu ri nañ lardoob ub zi'l dey rad lagy ñi de coz nu yu' nañ lardooy. Ni' zi'l Ñgyoozh. Espiriit Yon ni ub zi'l mi rad lagy mi de coz nu yu' nañ lardooy. <sup>12</sup> Ze' de ub na a' ricy cup na espriit nu rzu bich nu nac gyishlombecy ii, sinu de ub na ricy cup na Espiriit Yon nu bruu lo Ñgyoozh. Gun orze' gad lagy den de coz nu cuic leew lam nin. <sup>13</sup> De coz ze' rnęe lo der nu riidz nu blyuu Espiriit Yon ni Ñgyoozh ne. Ni mod rshaal de de coz rishli ni Ñgyoozh lo de mbecy nu ricy cup Espiriit Yon nim. Walab nu rshaal de ñii nu riidz nu bloo ic de.

<sup>14</sup> De mbecy nu a' riib ic Espiriit Yon ni Ñgyoozh, wagnii dey "O" ornu rbic mi de coz nim ni dey, gun par de yu ze', nde' coz ton zi'l. Nunu ni wac gyet lag dey cuen de coz ze', gun de coz ze' rlagy ñi nu Espiriit Yon ni Ñgyoozh locyuub mi den, par nu gad lagy na ben a nde' coz nap nim. <sup>15</sup> Tees mbecy nu riib ic Espiriit Yon ni Ñgyoozh, yu ze' nap yet lag yu cuen dela coz. Ze' de' zir mbecy wagyet lag dey cuen de coz nu ricy yu. <sup>16</sup> Riidz nu bzeeñ Ñgyoozh rniiñ:

Ni tub la mbecy wagad lagy dey la coz rnii too Ñgyoozh, Shuaan den.

Nunu ni tub la mbecy wac glyuu yim, rniiñ. Tees de ub na ricy cup den shcab ni Crisht.

### Baly nu de losa'y nu ricy yu riiñ ni Ñgyoozh

**3** Der bacy na, ya wangac nee lo der gal nu rnęe lo de mbecy nu riib ic Espiriit Yon ni Ñgyoozh, sinu mnęe lo der gal nu rdunii lo de mbecy nu rzu bich nu nac coz nu rlagy ub zi'l. Gun par de coz ni Crisht, na der gal nu na tub mdoo, gun wagad lagy nap der. <sup>2</sup> Ya blyuu de coz a' biigy ni der gal nu ricy biñ mñaa ornu rgaagy mi mdoo nim. Gal nu na mdoo miiñ nu wacyiñ yu gow yu gyit, ni na de ru nu wacyiñ der nu gyeñ ru de coz biigy ni Crisht. Mas na wagac nee de coz biigy ze' lo der. <sup>3</sup> Gun gabee rzu bich der nu nac de coz nu rlagy ub zi'l der. Ornu ricy der gyel saap lagy, ro zi der riidz nu losa'r. Wagyap riidz ni der. Orze' rabee nu rzu bich der nu nac coz nu rlagy ub zi'l der. Ricy der gal nu ricy cualcyer la mbecy. <sup>4</sup> Gun ornu tub der rniir: "Ya nac du Baly", rnii der. Ze' tuuba' der rniir: "Ya nac du Apolos", rnii der. Orze' rabee nu ricy der gal nu ricy cualcyer la mbecy, walab gal nu rlagy Ñgyoozh.

<sup>5</sup> Tees ¿cyu nac ya, Baly? Nunu ¿cyu nac Apolos? De ya nac de yu nu ricy de coz nu rlagy Ñgyoozh. Nunu par nu nac de ya, nde' nu ricy cup der consuel lo Shuaan den. Tub ga la de ya nu riiñ nu ricy de, riiñ nu bzeeñ mi ya de. <sup>6</sup> Ornu ya mnęe cyu nac Crisht lo der, orze' nde' nañ gal na nu mnuuza tub mbigy nañ lardooy der. Ze' Apolos bdiily yu ya mni ze' ornu blyuu yu der zañ zir coz ni Crisht. Tees Ñgyoozh, mi ze' biñ nu ricy nu raly ñi ornu ricy nap mi nañ lardooy der. <sup>7</sup> Walab dzi coz ily nac yu nu rnuuz ñi, nunu ni' walab dzi coz ily

nac yu nu rgyiily ñi. Tees Ñgyoozh zily zir nac mi, gun mi ze' ricy mi nu raly ñi. <sup>8</sup> Yu nu rnuuz ñi, gal nu yu nu rgyiily ñi, tub zi'l nac dey, nunu Ñgyoozh gyabic mi i dey dub gal lac na riiñ nu ricy tub ga la dey. <sup>9</sup> Gun de ya tublaazh la ricy de riiñ nim nu losa'. Ze' de ru na der gal na yu nim, ze' nu ricy de riiñ. O na der gal na tub yu' nu rzaam. <sup>10</sup> Nu nac faboor nu b icy nu Ñgyoozh ya, b icy gal nu ricy tub biryu. Ñgyoozh b icy mi nu bz y simient ni yu' ze', gun ya bzata Crisht lo der loga la. Ze' tuuba' mbecy rshup yu yu' lo simient nu bi zu ze'. Tees tub ga la den rlag y ñi nu nu cuidad shup den yu' ze'. <sup>11</sup> Gun ni tub la mbecy wac gzuy reña' simient ni yu' nu bi zu ze', gun simient ze' bi bzu Ñgyoozh ñi, nunu simient ze', nde' ub la Jesucrisht. <sup>12</sup> De ub na gac shup na yu' ze' nu zañ lo coz. Mbecy nu tona' la nap na riiñ ricy, yu ze' nay gal nu na tub mbecy nu shup yu' nu or. Yu' ga'y nay gal nu na tub mbecy nu rshup yu' nu plat. Yu' ga'y nay gal nu na tub mbecy nu rshup yu' nu gita' nu dzi sac. Ze' yu' ga' mbecy beñ nap na riiñ nu ricy yu. Yu ze' nay gal nu na mbecy nu rshup yu' nu yag. Yu' ga'y nay gal nu na tub mbecy nu rzaay yu' nu gyizh. Yu' ga'y nay gal nu na tub mbecy nu rgu' lo' yu' nu yaggi. <sup>13</sup> Ornu shuub dzi nu gri bee Jesucrisht ni dela mbecy, orze' gyu' bee la na riiñ nu ricy tub ga la mbecy. Gun Jesucrisht gyicy mi preb dela riiñ nu b icy de mbecy, gal nu ricy gyi nu rzaay ñi tub la coz. Orze' gabe la na riiñ nu b icy tub ga la mbecy, ben a gagyeñ nu wayic ñi lo gyi. <sup>14</sup> Benu de coz nu pshup mbecy lo simient ze' wayic ñi lo gyi ze', orze' gyad iy. <sup>15</sup> Tees benu de coz nu pshup mbecy lo simient ze' chic ñi lo gyi ze', orze' leew la b icy yu riiñ. Nit lo dela riiñ nu b icy yu, mas ub yu gruu mbañ yu. Tees nay gal na tub mbecy nu ruu chu lo gyi.

<sup>16</sup> ¿Walab gaal wagad lag y der nu nac der yu' wedz ni Ñgyoozh, nunu Espiriit Yon nim rcyiñ mi lat der? <sup>17</sup> Benu tub mbecy gnu yu' wedz ze', orze' Ñgyoozh gnum yu, gun yu' wedz nim nde' tub coz yon, nunu yu' wedz ze' nim, nde' de ru.

<sup>18</sup> Rlag y ñi nu cue' ga' guu der ub ru. Benu ca na tub mbecy tona' la yu' shcab ni yu' nac de coz nu yu' gyishlombecy ii, orze' rlag y ñi nu cue' gyicy le'y, sinu gyicy yu ub yu par tub mbecy nu wagad lag y la, gun orze' gac yu tub mbecy nu rishli yu' shcab ni. <sup>19</sup> Gun shcab nu rzii mbecy nu tona' la shcab lily, nde' shcab ton par Ñgyoozh. Gun bi cañ lat de riidz nu bzeeñ mi ze'. Orze' rniiñ: "De mbecy nu yu' shcab ni dunu dey par nu nac de coz nu rboor ic dey", rniiñ. <sup>20</sup> Tub se' ga' lat de riidz ze' nim rniiñ: "Shuaan den rad lag y mi nu se la la cyiñ de coz nu rnii too de mbecy nu dzi yu' shcab ni", rniiñ. <sup>21</sup> Nde' nu ni tub la mbecy walag y ñi nu gyicy dey gyel le' ni yu' nac ca na mbecy, gun dela coz nde' par de ru. <sup>22</sup> Ñgyoozh bzeed mi ya, Baly, nu Apolos, nu Bed par nu locyub d e der. Nunu b icy mi nu dela coz nu yu' gyishlombecy ii nde' par de ru. Briic mi gyel mbañ ni der, nunu ni' zi'l b icy mi nu nap par de ru mas gat der. B icy mi nu de coz nu yu' na nde' nap par de ru, nunu tub tanta' de coz nu chu' par lo. Dela coz ze' b icy

mi ñii nu nap par de ru. <sup>23</sup> Nunu de ru nac der ni Crisht. Ze' Crisht nac mi ni Ñgyoozh.

### Riiñ ni de aposht

**4** De ru rlag y ñi nu gyicy der de ya par mbecy nu ricy de coz nu rlag y Crisht. Rlag y ñi nu gyicy der de ya par mbecy nu bdugyi riiñ nu shaal de de riidz nu gal na rbic Ñgyoozh nu gad lag y de mbecy. <sup>2</sup> Tub coz rlag y ñi nu gyicy yu zu riiñ. Rlag y ñi nu gyicy paay nu patroo niy. <sup>3</sup> Ze' ya wagyicy cuenä mas rsa' lag y der lo ti nap ricya. Ni' zi'l wagyicy cuenä la zi'l coz nu rsa' lag y mbe cy lo. Mas ya, wagyicy cupa consuel lo shcab ni uba. <sup>4</sup> Ya rzeñ nu se la la coz b icy rzeñ, tees walab nu nac nde' gruu caacya, gun Shuaan den, mi ze' gniim ti yu' falt ne. <sup>5</sup> Orze' nde' nu walag y ñi nu gnii der ti yu' falt ni losa'r, lat nu lez den gashtal shuub la dzi nu cyid Shuaan den tuuba' tir. Orze' mi ze' gyicy caacy mi de coz nu ricy mbecy dze ga. Nunu shaal mi de coz nu rnii too mbecy nañ lardooy. Orze' Ñgyoozh gyabic mi gyel mbecy ni tub ga la dey gal nu yad ñi.

<sup>6</sup> Der b icy na, ya rneñ dela coz ii lo der par nu locyuba der. Ya bzata Apolos nu uba par nu gad lag y der lac mod gyicy nur losa'r. Tub zi'l mod nu gyicy nu der dey. Gal mod nu rnii de riidz ni Ñgyoozh, ni mod rlag y ñi. Ni tub la der walag y ñi nu cui der mbecy nu ricy riiñ ni Ñgyoozh. Cue' gyicy zily der tub yu. Ze' tuuba' gyicy gyidz der yu. <sup>7</sup> ¿Cyu b icy nu byalil y zir der par lo de' zir mbecy? Wagad lag y der ni tub la coz. Nomaas rad lag y der de coz nu briic Ñgyoozh nu gad lag y der. Orze' benu rad lag y der coz nu briic Ñgyoozh zi'l, orze' ¿lagu dzi ricy der gyel le' nir gal nu ricy mbecy nu ricy cup coz nu walab coz nu guud leew la?

<sup>8</sup> Che rzii der nu bi ricy cup gyel la der dela coz ni Crisht nu rlag y ñi ni der, rziir. De ru na der gal nu na mbecy guani'ñ, rziir. Nunu byac der gal nu na rey, rzii der, mas de ya se la' la sac de. Dzi ga nap benu gyac der rey, gun orze' de ya gyaca' de rey tublaazh la nu de ru. <sup>9</sup> Ya rzeñ nu Ñgyoozh b icy mi nu rlyu nu de ya nu de' zir de aposht nu blaazh la gal ich la zab de. Rabee de gal nu rabee tub pres nu bi zuu la nu gat lo rgüii la dela mbecy nu yu' gyishlombecy: tant de anc nunu tant de mbecy. <sup>10</sup> De mbecy rzii dey nu de ya nac de mbecy ton par nu nac Crisht. Ze' de ru rzii dey nu dzi lily na shcab ni der par de coz ni Crisht. De ya wacyiñ de, tees de ru dzi cyiñ der rzii dey. De mbecy rca lag y dey lo de ru, tees lo de ya waca lag y dey. <sup>11</sup> Mas gashtal dzi na yu' tiem nu ran de, nunu yu' tiem nu rbigy de nis, nunu yu' tiem ni shab de wagad. Yu' tiem nu shiñ ricy nu mbecy de ya. Nunu yu' tiem nu wagad yu' cyiñ de. <sup>12</sup> Nunu tona' la fert ricy de riiñ nu ya de par nu gad nu daw de. Ornu mbecy rzaa lag y dey ne de, orze' rdiñ de lo Ñgyoozh nu nap gyicy num dey. Ornu mbecy rsheed ziy de, orze' ragyee la de lo dey. <sup>13</sup> Ornu mbecy rnii ziy ne de, orze' nap la rneñ du de yu. Par lo de mbecy na de gal nu na toop. Nunu gashtal dzi na, na de gal nu na toop. Na de gal nu na de nu gu' bid nu yu' gyishlombecy.

<sup>14</sup> Ya zeeda gyicy ii lo der walab nu gyicya nu gat lo der, sinu par nu doq rishlo der, como de ru na der gal nu na tub i'ñ ya nu dzi rca. <sup>15</sup> Gun mas tii miily mbecy yu'y nu rlyuu de coz ni Crisht ni der, tees tub zi uz der zu, gun ya byacä uz der nu nac Jesucrisht, gun laab ya byapä mnæe lo der de riidz nu sac nim. <sup>16</sup> Nde' nu rnishbaä lo der nu gyicy der gal nu ricy ya.

<sup>17</sup> Nunu nde' nu zuu neza Timoteo cyid yu lo der. Yu ze' nay gal na tub i'ñ ya, gun b icya nu fert zir ricy cup yu consuel lo Shuaan den. Nunu ton'a la rca yu. Nunu ton'a la la ricy paay. Yu ze' gyicy yu nu gyeza' lagy der lac mod rlagy ñi nu chu' de mbecy nu ricy cup consuel lo Crisht. Niyy de coz nu rlyuu lat de mbecy ni Crisht dela lugaar ze' nu rdeda. <sup>18</sup> Gun yu' mbecy lat der nu ton'a la byale'y. Rsa' lagy dey nu rila wayap güii der. <sup>19</sup> Tees benu Shuaan den rlagy mi, orze' ya yap gyiily la nu yap güii ga' der. Gaze' nu gad lagya la ñuu coz rac ricy de mbecy le' ze'. Walab tub lo zi'l de coz nu rnii dey. <sup>20</sup> Gun lat de mbecy nu riib ic Ñgyoozh, walab nu riidz zi'l rnii dey, sinu coz ily ricy dey nu nac mi. <sup>21</sup> Ornu yap güii der, ¿ca na coz rlagy der? ¿A rlagy der nu rica cashtig ni der, uti rlagy der nu ca der, nunu nap gyicy du der?

#### Mod nu gyicy mbecy ni Crisht benu shiñ ricy tub yu

**5** Ya güeña nu lat de ru, zu tub mbecy nu gush yu ñaa naan yu. Yu ze' ton'a la cyi ily b icy yu. Mas de mbecy nu a' yu' lo Ñgyoozh wagiyicy yu cyi ze'. <sup>2</sup> Orze' Ɂlagu gaal nu dzi ricy der gyel le' nir? Lugaar nu gyicy le' der, nap zir nu gyicy shni der, nunu rlagy ñi co der mbecy nu b icy cyi ze' lat der. <sup>3</sup> Mas ya saca lat der tees ya ca icä der. Nunu nu nac rishbeey nu briic Shuaan den Jesuuz ne, nde' nu ya mnii toq nu lac mod rlagy ñi gyicy nu der mbecy nu b icy cyi ze'. Mas ya saca lat der tees ya nee lo der. Orze' nde' nañ gal na nu zu lat der. <sup>4</sup> Lat nu yu' tublaazh der, ya ca icä der, nunu Shuaan den Jesucrisht locyuub mi der. <sup>5</sup> Orze' mbecy nu b icy cyi ze', bgu' der yu yaa nuras, gun orze' chay lo cashtig, tees gruu mbañ yu ornu cyid Shuaan den Je-suuz tuuba' tir.

<sup>6</sup> Walagy ñi nu gyicy le' der. Mbish tub riidz nu rnii mbecy: coz cyi nañ gal nu na lebadur. Orze' nu nac ñuu miiñ lebadur gyicy ñi nu gyafert dela cub gyishtily. <sup>7</sup> Rlagy ñi nu co der lebadur ze' lat ru. Gun orze' sac la coz cyi lat der. Gun orze' na der gal nu na cub gyishtily nu du ub la nu sac la lebadur ze' lat der. Nunu rad lagya nu caacy der, gun Jesucrisht bi gut mi par nu nac de ub na. Par de ub na, mi ze' nam gal nu na shily nu rshu reñ lat sa' ni Pas. <sup>8</sup> Nunu de ub na nan gal na mbecy nu yu' sa' ze'. Nde' nu rlagy ñi chu' den nu gyel cacy, nunu gyicy den coz nu se'ñ. Gun nde' nañ gal nu na gyishtily nu sac lebadur ze'. Walagy ñi nu shiñ gyicy den nunu walagy ñi nu gyicy den coz cyi gal nu b icy den gulas. Gun nde' nañ gal nu na gyishtily nu yu' lebadur. Nunu wac gow mbecy gyishtily nu yu' lebadur ze' lat nu yu' dey sa' ni Pas.

<sup>9</sup> Lo tuuba' gyicy nu bzeeda lo der ze', pcaa nu cue' gac nu der de mbecy nu ral losa' nu wanchelaa. <sup>10</sup> De

mbecy nu walab mbecy ni Ñgyoozh, mas ral dey losa'y nu wanchelaay, mas nac dey mbecy saap lagy, nunu mas nac dey gubaan, mas nac dey mbecy nu driib zily nab, tees wanee nu rlagy ñi nu gruu der lat dey, gun benu ni gyicy der, orze' rlagy ñi nu ruu der gyishlombecy ii. <sup>11</sup> Tees coz nu rlagya nee lo der, nde' nu cue' gac nu der ni tub la de mbecy nu rnii nu nac yu b icy der, ze' ii ricy dey de cyi ze'. Ral dey losa'y nu wanchelaay. Rasaap lagy dey coz ni losa'y. Driib zily dey nab. Rzat zi dey losa'y. Nac dey mbecy rzugy. Ricy dey gubaan. Cue' gac nu der ni tub la de mbecy ze'. De mbecy ze' ni cue' gow nu der yu gyit. <sup>12</sup> Gun nde' walab cuen ne ya nu gri bee ni de yu nu walab mbecy ni Crisht. Sinu Ñgyoozh gri beem ni de mbecy ze'. Tees de mbecy nu nac ni Crisht, rlagy ñi nu gri bee der ni dey. Orze' rlagy ñi nu co der mbecy nu b icy cyi ze' lat der.

#### Mod nu gri bee dey ni b icy yu benu shiñ ricy yu

**6** Ornu ca na mbecy nu yu' lat der rziyi nu shiñ b icy yu nuy yu, orze' rila walagy ñi chay lo mbecy nu walab mbecy ni Ñgyoozh par nu gri beey ni dey, sinu rlagy ñi chay lo de' zir mbecy ni Ñgyoozh. <sup>2</sup> Walab gaal wagad lagy der nu de mbecy ni Ñgyoozh gri bee dey ni dela mbecy, orze' segur la cyiñ der nu gri beer de coz deet mi' nu yu' lat der. <sup>3</sup> ¿Walab gaal wagad lagy der nu gri bee den ni de anc? ¡Ze' yegar ñuu de coz deet nu rac lat nu rcyiñ den gyishlombecy ii na! <sup>4</sup> Orze' benu cyid coz deet lat der, Ɂlagu cha nu der gyel cha' ic ze' lo de mbecy nu wacha lat de mbecy ni Crisht? <sup>5</sup> Ya ni rnæe gun par nu gat lo der. ¿Walab gaal warusu la mas ñuu tub mbecy nu yu' shcab ni lat der nu cyiñ yu za' loy de coz deet nu rac lat de b icy na? <sup>6</sup> Nap zir duri bee ni dey lat de mbecy ni Crisht, gaze' nu cha dey lo de fushtiz nu walab mbecy ni Ñgyoozh nu gri beey ni dey.

<sup>7</sup> Benu ca na der char lo de fushtiz nu nac tub gyel cha' ic ni b icy ru, orze' wayicy ru gan gal nu rlagy ñi nu gyicy tub mbecy ni Crisht. Nap zir zaan la der nu shiñ gyicy nu mbecy der. Nap zir nu gyicy gubaan dey coz ni der gaze' nu gyicy der tub mod nu walagy ñi gyicy mbecy ni Crisht. <sup>8</sup> Lugaar nu nap gyicy der, ca nu shiñ ricy nu der losa'r. ¡Nunu ricy gubaan der coz ni laab losa'r mas nac yu b icy ru nu nac Crisht!

<sup>9</sup> ¿Walab gaal wagad lagy der nu de mbecy a' nap rila wazac dey lo gyel gubier ni Ñgyoozh? Cue' guu der ub ru. Neñ der nu de mbecy nu ral biñ mñaa nu walab mñaa, de mbecy nu driib zily nab, de mbecy nu ral losa' nu wanchelaa, de yu gyeey nu ricy losa' gyeey par mod ni biñ mñaa o ni' zi'l tub biñ mñaa nu losa'm, <sup>10</sup> de mbecy nu ricy gubaan, de mbecy nu rasaap lagy de coz ni losa', de mbecy rzugy, de mbecy nu rzat zi losa', de mbecy nu rboo coz ni losa', dela de mbecy ze' wazac dey lo gyel gubier ni Ñgyoozh. <sup>11</sup> Gu' mbecy lat der nu ni nay guc yu. Tees na bi byecy dela cyi nu b icy der. Bi byac der mbecy cacy, nunu byanap der par lo

Ñgyoozh. Dela nde' ni bzac der nu nac Jesucrisht, nunu nu nac de coz nu b icy Espiriit Yon ni Ñgyoozh.

### Cue' gyicy ras nu mbecy cuerp niy

<sup>12</sup> Yu' mbecy rnii: "Gac gyicya la zi'l coz nu rlagya", rnii dey. Nunu nde' rishli, tees walab delañ nap nu gyicy nañ. Mas gac gyicya la zi'll coz tees ya rila wazaana nu gyub ic ni tub la coz ya. <sup>13</sup> Yu' mbecy nu rnii dey nu gac gow dey gun: "Coz nu rdow den, nde' par nu chu'ñ nañ den, nunu nañ den nde' par nu chu' de coz nu rdon", rnii dey. Nunu nde' rishli, tees shuub tiem nu za' lo Ñgyoozh rup laañ. Tees walab rishli nu cuerp ni mbecy, nde' cyiñ ni par nu gal zi'l dey losa'y nu wanchelaay. Sinu cuerp ni mbecy, nde' cyiñ ñi par nu gyicy ñi de coz nu rlagy Shuaan den. Ze' Shuaan den, mi ze' rlagy ñi nu gyub ic mi cuerp ni den, gun orze' gac gyicy den de coz nu rlagy mi. <sup>14</sup> Nunu gal nu Ñgyoozh b icy mi nu byabañ Shuaan den ornu gut mi, ni' zi'l gyicy mi nu gyabañ de ub na ornu gat den nu nac coz ily nu ricy mi.

<sup>15</sup> ¿Walab gaal wagad lagy der nu tub ga la der na der gal nu na tub la' cuerp ni Crisht? ¿Orze' lac gyicya? ¿Walab gaal loq tub la' cuerp ni Crisht; orze' cheelañ nu cuerp ni biñ mñaay che'? Rila wac. <sup>16</sup> ¿Walab gaal wagad lagy der nu benu tub mbecy gal yu tub biñ mñaay che', orze' yac dey se tub zi'l cuerp? Gun lat de riidz nu bzeeñ Ñgyoozh rniiñ: "Lo cyup mbecy yac dey se tub zi'l cuerp", rniiñ. <sup>17</sup> Tees benu tub mbecy nac nuy Shuaan den, orze' tub zi'l nac yu nuy mi par lo Ñgyoozh.

<sup>18</sup> Bruu chu der lo cyi nu ral mbecy losa'y nu wanchelaay. Dela cyi nu ricy mbecy a' shiñ gyicy nuy cuerp niy. Tees mbecy nu ral losa' nu wanchelaa, yu ze' shiñ ricy nuy cuerp niy. <sup>19</sup> ¿Walab gaal wagad lagy der nu cuerp ni der, nde' yu' wedz ni Espiriit Yon nu briic Ñgyoozh ni der, nunu Espiriit Yon nim rcyiñ mi nañ cuerp ni der? Gun cuerp ni der, nde' walab coz par ub zi'l der, sinu cuerp ze', nde' coz ni Ñgyoozh. <sup>20</sup> Gun Ñgyoozh tona' la ñgyup briib mi der. Orze' rlagy ñi nu griib zily der mi nu cuerp nir.

### Consef ni nu chelaa mbecy

<sup>7</sup> Na rlagya tush cyä de riidz nu bdugyi' der lo lo gyicy nu bzeed der. Benu tub yu gyeey wachelaa, orze' nap. <sup>2</sup> Tees como tona' la yu' mbecy nu ricy yu cyi nu losa'y nu wanchalaay, orze' nap zir benu gad mñaay dey. Nunu nap zir benu de biñ mñaay gad ñgyee dem. <sup>3</sup> De yu gyeey rlagy ñi nu gyicy paay nu nac nesedaa ni mñaay, nunu de biñ mñaay rlagy ñi nu gyicy paam nu nac nesedaa ni ñgyeeem. <sup>4</sup> Cuerp ni biñ mñaay, nde' walab cuerp ni ub zi'l mi sinu ni' nde' cuerp ni ñgyeeem. Cuerp ni yu gyeey, nde' walab cuerp ni ub zi'l yu, sinu ni' zi'l nde' cuerp ni mñaay. <sup>5</sup> Rlagy ñi nu cue' dily lo dey nu nac nesedaa nu ricy cup dey lo losa'y. Nomaas benu rup laa dey shet ic yu, orze' gac zeeñ nat dey niñ par nu cuic ñi tiem nu nii nu dey Ñgyoozh. Ornu ded nu nii nu dey Ñgyoozh, orze' gyatublaazha' dey nu

losa'y. Orze' cue' cuic dey lugaar nu gyicy nuras gan dey par nu nac nu wagagyee dey.

<sup>6</sup> Ya mnée nu nap zir benu tub mbecy zu mñaay, nunu nap zir benu tub biñ mñaay zu ñgyeeem, tees walab nu ricya mandaar nu ni gyicy der, sinu rnée nu nde' nap benu ni gyicy der. <sup>7</sup> Par ya, nap zir benu de mbecy gyicy dey gal nu b icy ya nu sac mñaay. Tees yu' mbecy nu wagyeey benu sac mñaay. Orze' tub ga la mbecy nu tub ga la coz nu rbic Ñgyoozh niy. Tub mbecy rbic mi tub lo coz niy. Ze' tuuba'y rbic mi reña' loñ niy.

<sup>8</sup> Na rnée lo de mbecy solter nu nigul chelaa, nunu rnée lo de byud nu nap zir nu chesa dey ub ziy gal nu ya rdeda. <sup>9</sup> Tees benu wagyeey dey, orze' nap zir nu chelaa dey. Nap zir nu chelaa dey, gaze' nu nu shiñ nii too dey lo losa'y.

<sup>10</sup> Na neé lo de mbecy nu bi pchelaa. Nii walab ya rcaä der nu gyicy ru, sinu nii coz nu rnii Shuaan den nu gyicy der. De biñ mñaay walag y ñi nu zaan dem ñgyeeem. <sup>11</sup> Tees benu bzaan dem ñgyeeem, orze' rlagy ñi chesa la dem ub zim, o nu gyasha' dem ñgyeeem. Nunu de yu gyeey walag y ñi nu zaan dey mñaay.

<sup>12</sup> Lo dela de' zir de mbecy rnée de riidz ni ub zi'l a, walab riidz ni Shuaan den. Benu tub b icy na nu nac mbecy ni Crisht zu mñaay nu walab mbecy ni Crisht, ze' rshet ic mi rcyiñ num yu, orze' walag y ñi nu zaan yum. <sup>13</sup> Nunu benu tub biñ mñaay nu nac ni Crisht pchelaam tub yu gyeey nu walab mbecy ni Crisht, ze' rshet ic yu nu rcyiñ nuy mi, orze' walag y ñi nu zaan mi yu. <sup>14</sup> Gun Ñgyoozh gyicy mi yu gyeey ze', par mbecy nim nu nac nu rcyiñ nuy mñaay, biñ nu ricy cup consuel lo Crisht, mas ub yu wagycy cup yu consuel lom. Ze' biñ mñaay nu wagycy cup consuel lo Crisht, Ñgyoozh gyicy mim par mbecy nim nu nac nu rcyiñ num ñgyeeem, yu nu ricy cup consuel lo Crisht. Benu walab ni orze' de yu ngush ni dey na dey gal na yu nguzh ni de mbecy nu a' ricy cup consuel lo Crisht. Tees na Ñgyoozh ricy mi de yu nguzh ni dey par mbecy nim. <sup>15</sup> Tees benu tub mbecy nu wagycy cup consuel lo Crisht rlagy yu gzaan yu losa'y nu nac mbecy nu ricy cup consuel lo Crisht, orze' gzaan la der nu ni gyicy yu. Orze' de yu nu ricy cup consuel lo Crisht ze', yu ze' bdulaay nu losa'y. Gun Ñgyoozh bzum der par nu nap chu'r nu de losa'r. <sup>16</sup> Gun de ru biñ mñaay nu ricy cup consuel lo Crisht wagad lagy der ti gyicy der nu gruu mbañ ñgyeer. Nunu de ru yu gyeey nu ricy cup consuel lo Crisht wagad lagy der ti gyicy ru nu gruu mbañ mñaar.

<sup>17</sup> Tub ga la der chu'r nu mod nu psa' lagy Ñgyoozh der ornu mniiñ nañ lardoo der nu gac ru mbecy ni Crisht. Nunu ya rlyuu de nde' lat dela de mbecy ni Crisht.

<sup>18</sup> Benu tub mbecy nu ca beey nu la sircunsision cuerp niy, ze' Ñgyoozh niim loy nu gac yu mbecy ni Crisht, orze' gyiyeen la beey ze' cuerp niy. Benu tub mbecy sac beey sircunsision ze', ze' benu Ñgyoozh niim loy nu gac yu mbecy ni Crisht, orze' walag y ñi nu ca beey ze' cuerp niy. <sup>19</sup> Mas ca beey sircunsision cuerp ni dey o wacañañ tees nde' se la la cyiñ ñi. Coz nu cyiñ, nde' nu gyicy yac mbecy de coz nu rnii Ñgyoozh. <sup>20</sup> Dela mbecy chu' dey gal mod nu zuy ornu mnii Ñgyoozh nu

gac yu mbecy ni Crisht. <sup>21</sup> Benu guc der moz ni mbecy por fers la ornu mnii Ñgyoozh nu gac der mbecy ni Crisht, orze' cue' dzi csug ic der. Tees benu gad mod nu gruu der lo patroq nir, orze' gla der. <sup>22</sup> Benu Ñgyoozh niim lo tub mbecy nu nac moz por fers la nu gac yu mbecy ni Crisht, orze' par lo Ñgyoozh yu ze' nac yu mbecy bdulaa. Ni' zi'l benu Ñgyoozh niim lo tub mbecy nu sac patroq ni nu gac yu mbecy ni Crisht, orze' yu ze' nac yu moz por fers la ni Crisht. <sup>23</sup> Gun Ñgyoozh ñgyup briib mi der. Orze' cue' zu bich der nu nac coz nu rlagy mbecy. Lugaar ni nde', nap zir bzu bich der nu nac de coz ni Ñgyoozh. <sup>24</sup> Nde' nu der bicy na, bzu der lo Ñgyoozh gal mod nu zu der ornu mniim nu gyac der mbecy ni Crisht.

<sup>25</sup> Na par de mbecy nu nigul chelaa, walab nu pcaa Shuaan den ya nu ni nee, tees ya nee lo der coz nu rnii too. Nunu ya tub mbecy nu ricy cup Shuaan den consuel lo par nu nac nu rashni lagy mi ya. <sup>26</sup> Como tona' la yu' gyel deet tiem na, nde' nu rsa' lagya nu nap zir nu cue' chelaa dey. <sup>27</sup> Benu zu mñaa der, cue' zaan losa' der. Nunu benu sac mñaa der, orze' cue' zu bich der nu gad mñaar. <sup>28</sup> Tees benu chelaa der, nde' walab nu cyi na. Nunu benu fiñ feñ chelaañ, nde' ni' zi'l walab nu cyi na. Tees de mbecy nu rchelaa rzu' gyel deet ni dey gyishlombecy ii. Nde' nu rlagya loo chu der lo de gyel deet ze'.

<sup>29</sup> Der bicy na, coz nu rlagya nee lo der, nde' nii: na sñuu ga shuub dzi nu cyid Shuaan den. Orze' de mbecy nu zu mñaa rlagy ñi nu nap gyicy dey nu de coz ni Ñgyoozh gal nu ricy de yu nu sac mñaa. <sup>30</sup> De mbecy nu ricy sentiir, rlagy ñi nu cue' checa riiñ ni Ñgyoozh nu nac nu ricy dey sentiir. Ni' zi'l de mbecy nu dzi yet lagy rlagy ñi nu cue' checa riiñ nim nu nac nu yet lagy dey. Nunu de mbecy nu rzii la coz rlagy ñi nu gyicy dey ñi par coz nu walab coz ni de ub yu. <sup>31</sup> De mbecy nu ricy daljez nu de coz ni gyishlombecy ii, rlagy ñi nu cue' zu bich dey nu nac ñii, gun orze' cue' nu checa riiñ ni Ñgyoozh, gun mod nu na gyishlombecy nu yu'n ii walaba' nu zu tuuñ ñi.

<sup>32</sup> Rlagya nu rila wasug ic der. De mbecy nu sac mñaa rzu bich dey nu nac de coz nu rlagy Shuaan den, gun rlagy dey gyicy yu coz nu gyet lagy mi. <sup>33</sup> Tees mbecy yu nu zu mñaa rzu bich dey nu nac de coz ni gyishlombecy, gun rlagy dey gyicy yu coz nu gyet lagy mñaay. <sup>34</sup> Orze' cyup coz rlagy dey gyicy yu. Nunu ni' zi'l de biñ mñaa nu zu ñgyee reña' nam par de biñ nu sac ñgyee. Biñ nu sac ñgyee rzu bich mi nu nac de coz nu rlagy Shuaan den. Gun rlagy mi gyicy mi de coz nu rlagy Shuaan den, nunu zum shcab ni coz nu rlagy Shuaan den. Tees de biñ nu zu ñgyee rzu bich mi nu nac de coz ni gyishlombecy, gun rlagy mi gyicy mi coz nu gyet lagy ñgyeeem.

<sup>35</sup> De riidz ii rnœe lo der gun rlagya nu locyuuba' der. Walab nu rlagya ca ni der nu cue' gyicy der ca na tub mod nu mnœe, sinu rlagya nu gyicy der mod nu ricy mbecy rasoo. Gyicy der coz nu rlagy Shuaan den nu dutuub la lardoo der.

<sup>36</sup> Tees benu tub mbecy rziy nu rlagy ñi cuic yu iñ yu chelaañ gun bi nu ña'n ñi, nunu benu nde' coz nu rlagy ñi rlyu, orze' rlagy ñi nu gyicy yu mod nu rlagy ñi. Gac chelaañ, nunu nde' walab nu cyi na. <sup>37</sup> Ze' benu tuba' mbecy rzu fert yu nu walagy yu chelaa iñ yu, nunu benu dub gusht la niñ ricy yu, walab por fers la, orze' napa' ricy yu. <sup>38</sup> Yu nu rbic iñ chelaa, yu ze' nap ricy yu. Tees yu nu wacuic iñ chelaa, yu ze' napa' zir ricy yu.

<sup>39</sup> Tub biñ mñaa bi byid mi nu ñgyeem par lo leey lat nu mbañ yu, tees benu gat yu, orze' zu nat laam. Gac chelaam nu cyu zi'l nu rlagy mi. Cyer nu mbecy ni Crisht zi'l. <sup>40</sup> Tees gusht zir gzum benu gyyeem lam ub zim rzee. Nde' coz nu rnii too, nunu rsa' lagya nu Espiriit Yon ni Ñgyoozh riib ic mi ya ornu rnœe de riidz ii.

### Beel nu gua lo nab

**8** Na rlagya nee lo der ni de beel nu rza nu dey lo nab. Dela den neñ na nu rishli rad lagy na la na coz nu rlagy ñi. Orze' nu nac nu rad lagy den nde', orze' yale'n. Tees benu caan losa'n, orze' nde' coz nu cyiñ nin. <sup>2</sup> Benu ca na mbecy rziy nu rad lagy yu ca na tub coz, ze' gabee wagad lagy nap yu gal nu rlagy ñi nu gad lagy yu. <sup>3</sup> Tees benu tub mbecy rcay Ñgyoozh, orze' Ñgyoozh yu' lom yu.

<sup>4</sup> Orze' ni nu dow den beel nu rza nu dey lo nab ze': neñ den nu nde' tub coz nu rila a' sac, gun rishli nab se la la sac ñi gyishlombecy ii, nunu rad lagy den nu saca' zir Ñgyoozh, sinu tub zim zum. <sup>5</sup> Gun mas gyibaa nunu mas lo yu ii yu' tona' la coz nu rnii mbecy ñgyoozh. Orze' par shcab ni de mbecy, yu' tona' la ñgyoozh, nunu yu' tona' la shuaan dey. <sup>6</sup> Tees par de ub na, saca' zir Ñgyoozh, sinu tub zi Ñgyoozh uz den zum. Mi ze' psa' lagy mi dela coz. Nunu de ub na yu'n par nu gyicy na coz nu rlagy mi ze'. Nunu ni' zi'l zu tub zi Shuaan den, Jesucrisht. Par nu nac mi ze', nde' nu yu' dela coz gyishlombecy, nunu gashtal de ub na yu'n par nu nac mi ze'.

<sup>7</sup> Tees walab dela mbecy ni Crisht neñ dey nu se la la gyicy nab. Gun yu' mbecy nu bi gubee nu rcay nab. Orze' ornu row dey beel, rnii too dey nu nac nu guañ lo nab, nde' nu dzi sug ic dey nu nac ñii, gun rnii too dey nu shiñ bicy dey, par nu wagad lagy nap dey.

<sup>8</sup> Tees rishli de coz nu dow den walab nde' gyicy ñi nu ganap lagy Ñgyoozh lo den. Walab nu nac den mbecy nap par nu nac coz nu dow na. Nunu ni walab nu nac den mbecy a' nap par nu nac de coz nu wadow na.

<sup>9</sup> Nomaas rlagy ñi nu gyicy cuidad der nis gyicy der nu gnu de mbecy nu a' fert ricy cup consuel lo Jesuuz nu nac nu rad lagy der nu gac gow der beel ze'. <sup>10</sup> Benu ru, tub mbecy nu rad lagy de coz ze', ze' zub ru row ru ñii lugaar nu rgyiñ de mbecy lo nab, orze' gzac tuuba' bicy na nu a' fert ricy cup consuel nu ni ricy ru. Orze' ni' zi'l nii tooy nu ni gyicy yu mas walab coz nap, rnii tooy. <sup>11</sup> Orze' par nu nac nu ricy ru nu dñi rad lagy ru, orze' gyicy ru nu dñi rad lagy ru, orze' fert ricy cup consuel. Nunu ni' zi'l nu nac yu ze' gut Crisht. <sup>12</sup> Benu ru shiñ ricy nur tub bicy ru nu a' fert ricy cup consuel

Io Crisht, ornu rlyuur niy nu gyicy Yu coz nu rnii tooy nu nde' coz nu walab se'ñ, orze' ni' zi'l shiñ ricy nur Crisht.<sup>13</sup> Gun ze' benu nu nac nu daw beel gyicy ñii nu gnu bicya, orze' nap zir nu wadaw la ñii, gun cue' nu gyicya nu gnu bicya.

### De coz nu yad ñi nu gyicy de aposht

**9** Walab mbecy ricy dey mandaar ya. Ya naçä tub aposht, tub yu nu bzuu nez Ñgyoozh. Nunu ya bzaac urlq la Shuaan den Jesuuz. Nunu ja walab de ru nac der mbecy nim nu nac riiñ nu ricya nim?<sup>2</sup> Mas yu' mbecy nu wagiyicy yu ya par aposht, tees par de ru segur la naçä aposht, gun par nu nac ya, byac der mbecy ni Shuaan den. Nde' nu rabee nu ya naçä aposht.

<sup>3</sup> Ornu de mbecy rnii zi dey ne, orze' ni mod rca uba:  
<sup>4</sup> ¿Walab gaal walab se'ñ nu cuic der coz nu daw gal nu de coz nu do?<sup>5</sup> ¿Walab gaal walab se'ñ nu gyicya gal nu ricy de' zir de aposht, gal nu Bed, nu de b icy Shuaan den? Gun de yu ze' zu mñaay dey, nunu rded nu dey mñaay lat nu ricy dey riiñ ni Ñgyoozh.<sup>6</sup> ¿Uti rsa' lagy der nu ya nu Bernabee a' yad ñi nu checa de nu gyicy de riiñ ne par nu gad nu daw de lat nu shaal de de riidz ni Ñgyoozh?<sup>7</sup> Gun de soldad yad ñi ni dey nu gyash gyi' de gasht nu ricy yu. Nunu de yu nu rnuuz lyucy urbyay yad ñi ni dey nu gow yu urbyay niñ. Nunu de yu nu rña shily yada'ñ ni dey nu shiiy ma go'y lech ni ma.<sup>8</sup> Cue' nii too der nu nde' coz nu ya zi'l rnée, gun ni' zi'l rniiñ lo leey nu pcaa Ñgyoozh nu bzeeñ Moisees.<sup>9</sup> Gun lo leey nu bzeeñ Moisees rniiñ: "Cue' zuur gyish ru' toor ornu rza ma lo trig nu cyich ma ñii", rniiñ. Rabee nu Ñgyoozh wacsu bich mi nu nac de tor zi'l,  
<sup>10</sup> sinu nii tub riidz nu rlyuuñ ni den nu lac mod gyicy na nu losa'n. Gun leey ii pcañ par nu gyicy ñi nu cyiñ gusht den. Gun de mbecy nu rla' yu, nu de mbecy nu rgyich trig, rup laa dey rgyish lo dey nu gad ñuu cosech niy.<sup>11</sup> Orze' de ya mnauz de ñuu coz ni Ñgyoozh lat der. ¿A waruu nap ñi rzii der benu cyish der mas ñuu i de?<sup>12</sup> Benu reña' mbecy rgyish loy nu cyish der iy, ze' yegar de ya ricy zir ñi presis nu cyish der i de.

De ya mas nde' coz se'ñ nu cyish der i de, tees wannee de lo der nu ñgyish der i. Sinu gugyeé de zañ lo coz par nu cue' ñgyicy zeed de der lat nu pshaal de riidz ni Crisht.<sup>13</sup> De ru rad lagy der nu de mbecy nu ricy riiñ nañ yu' nu rca de mbecy Israeel Ñgyoozh, nañ yu' ze' druu de coz nu row dey. De mbecy nu ricy riiñ lo mez yon ni Ñgyoozh lo li' ni yu' ze' nu rshu dey reñ bañcyug, de mbecy ze' yad ñi ni dey nu gow yu de beel bañcyug nu rbic dey gun lugaar ze'.<sup>14</sup> Ni' zi'l mod, b icy pee Ñgyoozh par de mbecy nu rshaal de riidz nu sac nim. Nu nac de riiñ ze' nim, cuic mbecy nu gow dey.<sup>15</sup> Mas nde' coz nu se'ñ, tees ya rila wanné lo der nu ni gyicy nu der ya. Nunu mas na walab nu zeeda gyicy ii lo der par nu caa der nu ni gyicy nur ya. ¡Nap zir nu gata gyel ran, gaze' nu grusu tub mbecy nu coy gusht nu ricy cupa!

<sup>16</sup> Gun par ya, ornu rshaal riidz nu sac ni Crisht, nde' walab coz nu gyicy le', gun nde' coz nu rlagy ñi par nu

gyicy paq nu Ñgyoozh. Gun jdzi ga cuqa benu washalaq riidz nu sac nim gal nu rlagy ñi!<sup>17</sup> Benu dub gal rii la lagya nu gyicya ñii, orze' gyad i. Tees como nde' walab coz nu rnii tqo ya zi'l, sinu Ñgyoozh bzeen mi riiñ ze' yaq, orze' nde' nu ya wagrish lo nu gyad i.<sup>18</sup> Orze' ñia ñuu coz gad ne nu nac de riiñ ze'? Coz nu gad ne, nde' nu shaalaq riidz nu sac ni Crisht leew la. Mas yad ñi nu cuic mbecy nu daw nu nac nu rshaalaq de riidz nu sac nim, tees ya wadiñä coz nu yad ñi nu gad ne.

<sup>19</sup> Gun ni tub la mbecy wac gyicy dey mandaar ya, tees ricya nu naçä tub mbecy nu ricy de riiñ nu rlagy dela mbecy, gun dzi ga cuugya lardoo zigy zir mbecy nu gyicy cup yu consuel lo Crisht.<sup>20</sup> Lat nu rdeda lat de mbecy Israeel, orze' ricya mod nu ricy de mbecy Israeel, gun orze' gad mod nu guugya lardoo dey. Lat nu rdeda lat de mbecy nu riib ic leey nu bzeen Moisees, ni' zi'l ricya uba par mbecy nu riib ic leey ze', mas walab leey ze' riib ic ñi ya, gun dzi ga gyicya gan guugya lardoo dey.<sup>21</sup> De mbecy nu a' riib ic leey nu bzeen Moisees, ni' zi'l na yaca gal nu na de mbecy ze', gun dzi ga guugya lardoo dey nu gyac yu mbecy ni Crisht. Ni ricya mas segur la ricy yaca nu de coz nu rlagy Ñgyoozh, gun leey ni Crisht bi riib ic ñi ya.<sup>22</sup> Lat nu rdeda lat de mbecy nu ta ricy, orze' ni' zi'l yaca gal nu na mbecy nu ta ricy, gun dzi ga gyicya gan nu cuugya lardoo dey. Gal nu na dela de mbecy ze', ni' zi'l na yaca, ben a wad mod nu cuugya lardoo la be dey, gun orze' gruu mbañ dey.<sup>23</sup> Ricya dela coz ze' par nu nac riidz nu sac ni Crisht, gun orze' gyicy Ñgyoozh coz nap num ya nu nac de riidz ze'.

<sup>24</sup> De ru bi neñ der ornu tub nac mbecy rash dey carer, dela dey rboo loy. Tees tub zi lay drusuy nu ricy yu gan. Ni' zi'l mod b icy der nu de coz ni Crisht, gun orze' gyicy der gan.<sup>25</sup> Dela de mbecy nu rgyit, rzu lily dey par nu cyit yu. Ricy paa dey nu dela mod nu rlagy ñi ben a wayicy dey gan iy. I dey ze', nde' tub rued nu ryaa nu lyag ni tub lo gyee lagyis. Nde' tub coz nu wagyees. Tees de ub na gyicy na coz ni Crisht par nu gyicy na gan tub in nu rila waded ni.<sup>26</sup> Walab nu wagad lagya ca par rusha ornu drusha carer, sinu drusha carer par ze' nu gyad i. Ya na gal na tub mbecy nu rgyit nu zig. Gun ornu zeeda zig walab lo bi la zeeda ñii, sinu zeedañ chañ tub mod par nu gyicya gan gyad i.<sup>27</sup> Rcuugya cuerpa ne, nunu rca ñii por fers la nu gyicy ñi coz nu rlagya. Gun nis nit lo i despuees ornu bi blyyu ni reña' mbecy.

### Cue' griib zily mbecy nab

**10** Der b icy na, rlagya nu gyeza' lagy der de coz nu bzac de gyitoo bel ne de. Ñgyoozh gusa num dey lat tub nac za, nunu dela dey bded nap yu lo nisyudo ña.<sup>2</sup> Orze' nu nac nu gusa dey lat za ze', nunu bded dey lo nisyudo ze', orze' byac dey mbecy nu bzuub gyidag ni Moisees, gal nu byaca' de ub na mbecy nu zuub gyidag ni Jesuuz ornu bzu nis den.<sup>3</sup> Dela dey bdow yu coz nu bruu lo Ñgyoozh.<sup>4</sup> Nunu go' dey nis nu briic Ñgyoozh ornu Moisees pshet yu yangay ich

gyita'. Tees walab Moisees b icy yu nu bruu nis ze' lo gyita', sinu Crisht b icy mi nu bruuñ, gun mi ze' gusa num dey. <sup>5</sup> Mas ni, tees zigy dey wanyet lagy Ñgyoozh mod nu b icy dey. Orze' nde' nu gut dey lugaar ub zi ze' nu gusa dey ze'.

<sup>6</sup> De coz nu g uc ze', nde' cyiiñ ñi par nu lyuuñ ni de ub na nu cue' galagy na gyicy na coz cyi gal nu b icy de gyitoo bel ne de. <sup>7</sup> Nunu cue' griib zily den nab gal nu b icy la be de mbecy lat de yu ze'. Gun lat riidz nu bzeeñ Ñgyoozh rniiñ: "De mbecy g u cua dey row yu gyit. Gaze' nu wes su dey nu rulgyi'y lo nab", rniiñ.

<sup>8</sup> Nunu cue' gyicy den cyi nu losa'n nu wanchelaan gal nu b icy la be mbecy lat de yu ze'. Orze' nañ tub dzi zi' gut gal zu chon miily de yu nu b icy de cyi ze'. <sup>9</sup> Nunu cue' gyicy den preb Ñgyoozh, Shuaan na, gal nu b icy la be de gyitoo bel ne de. Orze' gut dey nu nac nu bdu-cua' bily yu. <sup>10</sup> Ni cue' nii zi den ni Ñgyoozh gal nu b icy la be de gyitoo bel ne de. Orze' tub anc nu la Anc nu Rbic Cashtig ni Ñgyoozh biit yu dey.

<sup>11</sup> Dela coz nu bzac de gyitoo bel ne de gulas, nde' par nu gad lagy mbecy nu gyicy cuidad dey ub yu. Nunu dela nde' pcañ lat de riidz nu bzeeñ Ñgyoozh par nu gad lagy den lac mod chu'n tiem na. Nunu na sñuu ga shuub dzi nu gya' lo dela coz. <sup>12</sup> Orze' nde' nu de mbecy nu rzii nu dzi fert ricy cup consuel lo Crisht, rlagy ñi nu gyicy cuidad dey ub yu nis gyicy cyi gan dey. <sup>13</sup> Dela de coz deet nu rzac den, nde' coz nu rzac de' zir de mbecy. Tees Ñgyoozh ricy paam nu de ub na. Orze' mi ze' wazaan mi nu gzac zi den ni de coz gash-tal wagagye ga' la den de coz ily nu yad, sinu tiem nu gzac deet den, orze' Ñgyoozh locyuub mi de ub na nu gad tub mod nu gyicy den gan.

<sup>14</sup> Orze' der b icya nu dzi rca, rila cue' griib zily der nab. <sup>15</sup> Ya rnæe lo der gal nu rnæe lo de mbecy nu yet lag cuen. Orze' gush der shcab ni de coz nu rnæe ben a rishli. <sup>16</sup> Despuees ornu dric den gras ni Ñgyoozh, orze' rdo'n ñup ni urbyay mod nu bzeeñ Jesucrisht. Orze' ral den gyel nap ni nu pshu reñ mi lo cruu. Nunu ornu rdow den gyishtily mod nu bzeeñ mi, orze' ral den gyel nap ni cuerpa nim. <sup>17</sup> Mas zigy den nac naa, tees dela den rdow na laab tub zi'l gyishtily ze'. Orze' lo dela den tub zin nac naa.

<sup>18</sup> Güii der la ricy de mbecy Israael. Row dey de gun nu rbic mbecy lo Ñgyoozh. Nunu ornu ni ricy dey, orze' ral dey gyel nap nu druu lo gun ze'. <sup>19</sup> Walab nu rnæe nu nab, nde' coz nu cyiiñ. Nunu walab nu rnæe nu beel nu gua lo nab, nde' cyiiñ ñi. <sup>20</sup> Sinu rlagyæ næe nu de gun nu rbic mbecy lo nab, nde' walab lo Ñgyoozh rbic dey ñi sinu lo nuras. Nunu ya walagyæ gal der coz nu druu lo nuras. <sup>21</sup> Wac gal der gyel nap nu druu lo Shuaan den ornu row der gyishtily mod nu bzeeñ mi, benu laab tiem ze' gala' der coz nu druu lo nuras. Nunu wac gal der gyel nap ornu ro' der ñup ni urbyay mod nu bzeeñ mi, benu laab tiem ze' gala' der coz nu druu lo nuras.

<sup>22</sup> ¿Uti rlagy der gyicy den nu gasaap lagy Shuaan den? ¿Uti rzii der nu fert zir de ub na gaze' ub mi?

Rlagy ñi chu' de mbecy ni Crisht mod nu gabe nu nap

<sup>23</sup> Yu' mbecy rniiy: "Gac gyicya la zi'l coz nu yad icä", rniiy. Rishli rniiy tees walab dela coz cyiiñ ñi ni den. Gac gyicy den la zi'l coz tees walab dela coz locyuub ñi nu gyanap den. <sup>24</sup> Rlagy ñi yub den mod nu nap zir par de' zir mbecy. Cue' mod nu nap par ub zi'l den.

<sup>25</sup> Gac gow der la zi'l coz nu rut mbecy ze' nu rsa'y de beel. Nunu walag yñi nu cugyi' der lo de mbecy nu rut beel ze' par nu rdzib der nu gad beel nu gua lo nab.

<sup>26</sup> Gun gyishlombecy, gal nu dela coz nu yu' lo yu ii, dela nde' coz ni Ñgyoozh.

<sup>27</sup> Benu tub mbecy nu walab mbecy ni Crisht cuedz yu der nu gow nu der yu gyit, ze' benu shet ic der gow nur yu, orze' gow laa der la zi'l coz nu gzuy lo der. Walag yñi nu cugyi' der loy nu nac nu rdzib der nu gow ru coz nu gua lo nab. <sup>28</sup> Tees benu tub mbecy niiy lo der: "Nii beel nu gua lo nab", niiy, orze' cue' gow der ñii, gun cue' nu gyicy ras nu der yu, nunu cue' nu gyicy der nu gnu shcab niy. <sup>29</sup> Walab de ru gnu shcab nir, gun de ru rad lagy ru nu beel nu gua lo nab se la la gyicy ñi. Sinu gnu shcab ni mbecy ze', gun yu ze' wagad lagy yu.

Tees yu' mbecy rniiy: "¿Lagu nu nac nu dzi ta ricy reña' mbecy wac gyicya la zi'l coz nu yad icä? <sup>30</sup> ¿Lagu rnii zi mbecy ne ornu rdaw la coz, ze' benu dricä gras ni Ñgyoozh nu nac ñii?" rnii dey. <sup>31</sup> La zi'l coz nu gyicy der, nu gow der o nu go' der o la zi'l coz nu gyicy der, b icy der mod nu gyabic mbecy gyel mbecy ni Ñgyoozh. <sup>32</sup> Cue' cuic der mod nu chu' gyel deet lat ni tub la mbecy: ni lat de mbecy Israael, ni lat de mbecy nu walab mbecy Israael, ni lat de mbecy ni Crisht. <sup>33</sup> Ni' zi'l ya ricya tub mod nu gyedzu' lagy dela mbecy. A' yuba mod nu gyedzu' lagy ub zi'lq, sinu ryuba mod nu nap par nu gyedzu' lagy de' zir mbecy, ben a wayicy cup dey consuel lo Crisht. Orze' gruu mbañ dey.

**11** Bicy der mod nu ya ricya, gal nu ya ricya mod nu ricy Crisht.

### Mod nu zu biñ mñaa lat de mbecy zigy

<sup>2</sup> Der b icy na, ya rnæe lo der nu tonal la nap ricy der, gun dub laa tiem ca ic der ya, nunu ricy paa der nu de leey nu yu' lat dela mbecy ni Crisht nu blyuñ ni der.

<sup>3</sup> Tees rlagyæ gad lagy der nu Crisht riib ic mi dela yu gyeey, nunu de yu gyeey riib ic dey mñaay, gal nu Ñgyoozh riib ic mi Crisht. <sup>4</sup> Orze' benu tub yu gyeey washet yu shimbely yu ornu rnii nuy Ñgyoozh lat de mbecy zigy o ornu rshaal yu riidz nim lat de mbecy zigy, orze' shiñ ricy nuy Crisht nu waca lagy yu lom. <sup>5</sup> Ze' de biñ mñaa, ornu rnii num Ñgyoozh lat de mbecy zigy o ornu rshaal dem riidz nim, benu a' noow toom, orze' shiñ ricy num ñgyeem. Gun gal gaa la biñ mñaa nu a' noow too nu biñ mñaa nu rshiñ yagy too. <sup>6</sup> Benu biñ mñaa walagy mi nu soow mi toom, orze' shiñ mi gyich ic mi. Como nde' coz to' lo nu shiñ mi gyich ic mi o nu shiñ yagy mi toom, orze' nap zir nu soow mi toom.

<sup>7</sup> De yu gyeey walagy ñi nu soow dey tooy, gun gal nu

na Ñgyoozh, ni na dey, nunu yu gyeey, yu ze' rlyu nu gyel lily ni Ñgyoozh. Ze' biñ mñaa, mi ze' rlyu nu gyel lily ni yu gyeey.<sup>8</sup> Gun Ñgyoozh, ornu psa' lagy mi yu gyeey, walab nu biñ mñaa psa' lagy mi yu. Sinu ornu psa' lagy mi biñ mñaa, nu yu gyeey psa' lagy mi biñ mñaa ze'.<sup>9</sup> Nunu Ñgyoozh wansa' lagy mi yu gyeey par nu nac biñ mñaa, sinu psa' lagy mi biñ mñaa par nu nac yu gyeey.<sup>10</sup> Nde' nu de biñ mñaa rlagy ñi nu soow dem toom: par nu gabe nu ñgyeem riib ic yum. Nunu rlagy ñi nu soow dem toom par ornu zac de anc.<sup>11</sup> Tees par mod nu psa' lagy Ñgyoozh, yu gyeey sac yu gyishlombeccy ii benu walab nu nac biñ mñaa. Nunu ni' zi'l biñ mñaa sac mi gyishlombeccy ii benu walab nu nac yu gyeey.<sup>12</sup> Gun rishli Ñgyoozh psa' lagy mi biñ mñaa nu nac yu gyeey, tees rishli yu gyeey ral yu nu nac biñ mñaa. Tees delañ nac ñii coz nu bruu lo Ñgyoozh.

<sup>13</sup> Gush der shcab ben a se'ñ nu a' noow too de biñ mñaa ornu rnii num Ñgyoozh lat de mbecy zigy.<sup>14</sup> ¿A walab nil bi rad lagy la den nu shiñ na benu tuñ gyich too de yu gyeey?<sup>15</sup> Tees par de biñ mñaa, nde' tub coz nu cyit na nu tuñ gyich too dem, gun ta'ñ par nu soow ñi toom.<sup>16</sup> Tees benu ca na mbecy rlagy yu tub suy riidz nu nac de coz nu mñee, orze' rlagy ñi nu gad lagy yu nu dë ya gal nu de' zir de mbecy ni Crisht a' ricy cup den reña' cushtom.

#### Nu gow dey gyishtily mod nu bzeeñ Jesuuz

<sup>17</sup> Tees de coz nu neë lo der na, nii walab nu neë nu nap ricy der. Gun ornu ryatublaazh der, lugaar nu nap gyicy der ca nu shiñ ricy der.<sup>18</sup> Nu loga la, mnii dey lo nu ornu yatublaazh der, reñ ga la shcab ricy cup tub nac ga der. Nunu rzeña lagya ñuu ga nu coz rishli de nde'.<sup>19</sup> ¡Segur la yu' mbecy lat der nu rtub su dey losa'y, gun orze' gabe nu ca na der rishli ricy paar!

<sup>20</sup> Nu nac nu reñ ga la na shcab zu tub nac ga der, ornu ryatublaazh der, orze' nde' walab mod nu bzeeñ Shuaan den nu gow der gyishtily.<sup>21</sup> Gun ornu ryap or nu row der gyit, tub ga la der row ru nir. Yu' mbecy ran yu, como wagad sheñ nu gow yu. Ze' yu' ga' dey gash-tal rzugy lay ricy ñi.<sup>22</sup> ¿Walab gaal sac yu' der, ze' nu row der gyit nunu ze' nu ro' der nis? ¿Uti rlagy der gyicy ras nur de b icy ru nu nac Ñgyoozh, nunu rlagy der gyicy ru nu gat lo de mbecy zi nu sac ni? ¿La coz neë ni der na? ¿A neë nu dzi nap ricy der? ¡Nde' gaal rila wanee ga' ni der nu nac nu ni ricy der!

#### Lac mod gow dey gyishtily mod nu bzeeñ Jesuuz

<sup>23</sup> Gun Shuaan den mniim lo de coz nu blyuñ ni der. Coz ze', nde' Shuaan den Jesuuz, laab rel nu bish cya Judas ich mi, pshet yaam tub gyishtily.<sup>24</sup> Orze' briic mi gras ni Ñgyoozh. Gaze' nu blew mi ñii. Orze' nam: "Nii cuerpa nê nu ricä nu gat par nu gruu mbañ der. I mod gyicy der par nu gyeza' lagy der ya", nam.<sup>25</sup> Na ornu blazh b icy num dey che ze', orze' ni' zi'l mod, pshet yaam tub bas ñup urbyay. Orze' nam: "Nii tub trat cub nu gyicy Ñgyoozh nu de mbecy nu nac nu shu reña".

De tir la ornu go' der ñup ii, orze' ni gyicy der par nu gyeza' lagy der ya", nam.<sup>26</sup> Ni b icy der gashtal shuub la dzi nu cyid Shuaan den tuuba' tir. Ornu gow der gyishtily ze', nunu ornu go' der ñup ze', orze' gyeza' lagy der nu gut mi lo cruuz par nu nac de ru.

<sup>27</sup> Nde' nu, benu ca na mbecy gow yu gyishtily mod nu walab se'ñ, ornu gow yu mod nu bzeeñ Shuaan den, o nu go'y ñup urbyay nu ni' walab mod nu se'ñ, ornu go'y mod nu bzeeñ mi, orze' nde' cyi na; gun wanca lagy yu lo cuerp nim, ni wanca lagy yu lo reñ mi.<sup>28</sup> Orze' tub ga la mbecy rlagy ñi nu gash dey shcab ben lac mod na dey. Gaze' nu gow dey gyishtily ze', nunu go' dey ñup ze'.<sup>29</sup> Gun benu wayicy cuen dey lac gyicy nuy cuerp ni Shuaan den ornu gow dey gyishtily, nunu ornu go' dey ñup mod nu bzeeñ mi, orze' Ñgyoozh cuic mi cashtig ni dey.<sup>30</sup> Nde' nu yu' mbecy rat lat der, nunu nde' nu yu' mbecy a' fert lat der, nunu yu' dey bi gut yu.<sup>31</sup> Tees benu rush den shcab ben lac mbecy nan, orze' wabic Ñgyoozh cashtig ni den.<sup>32</sup> Tees ornu dri bee Shuaan den nin, orze' rbic mi cashtig ni den par nu gyanap na, gun orze' waniim nu yu' cyi den ornu laab nde' la gri beem ni de mbecy ni gyishlombeccy.

<sup>33</sup> Orze' der b icy na, ornu gyatublaazh der nu gow ru mod nu bzeeñ Shuaan den, orze' cuez losa' der par nu gow der tublaazh la.<sup>34</sup> Benu yu' mbecy ran yu, rlagy ñi gow laay gyit yu' anzir nu gyatublaazh der, gun orze' wabic Ñgyoozh cashtig niy par nu nac mod nu yatublaazh der. Ze' de' zir asunt, ya neë lac mod gyicy der ornu yapa.

#### Mod nu ricy Espiriit Yon ni Ñgyoozh nu tub ga mbecy ni Crisht

**12** Der b icy na, ya døg rishlo der nu lac na coz nu rbic Espiriit Yon ni tub ga la der. Walagyä nu gac der mbecy nu wagad lagy.

<sup>2</sup> De ru rad lagy der nu anzir nu gyicy cup der consuel lo Crisht, mas lac ruu tees dzi radza der nu nac de nab gop nu wagac nii.<sup>3</sup> Tees na wagadza ga' der, benu rad lagy der nu ni tub la mbecy wac nii dey riidz nu rbic Espiriit Yon benu zaa lagy dey ni Jesuuz, nunu ni tub la mbecy wac niyi: "Jesuuz nac mi Shuaan na", niyi, benu walab lo Espiriit Yon druu de riidz ze'.

<sup>4</sup> Reñ ga la mod cyiñ tub ga la mbecy nu gyicy yu, tees laab tub zi'l Espiriit Yon ricy mi ñii.<sup>5</sup> Reñ ga la mod ricy tub ga mbecy ornu ricy yu coz nu rlagy Ñgyoozh, tees laab tub zi'l Shuaan den Jesucristo riib ic mi delañ.

<sup>6</sup> Zañ lo mod ricy Ñgyoozh num tub ga la mbecy, tees laab tub zi'l mi ricy mi delañ.<sup>7</sup> Ñgyoozh b icy mi nu lo-cyuub Espiriit Yon nim tub ga la mbecy, gun orze' lo-cyuub yu dela losa'y.<sup>8</sup> Espiriit Yon rbic mi shcab ni tub mbecy par nu cuic yu consef ni losa'y. Ze' tuuba' mbecy, laab mi ze' ricy mi nu tona' la nap ricy cup yu consuel lo Crisht. Ze' tuuba' mbecy, laab ub lam ricy mi nu ciyiñ yu gyicy yac yu mbecy rat.<sup>10</sup> Ze' tuuba'y ricy mi nu ciyiñ yu gyicy yu nusuriidz. Ze' tuuba'y ricy mi nu ciyiñ

yu nu shaal yu riidz nu druu lo Ñgyoozh lo de mbecy. Ze' tuuba'y ricy mi nu cyiñ yu nu gad lagy yu ti coz ni nuras, ti coz ni Espiriit Yon. Tuuba'y ricy mi nu gac niyi nu riidz nu rnii reña' mbecy. Ze' tuuba'y ricy mi nu cyiñ yu shaal yu riidz ze'. <sup>11</sup> Tees laab tub zi'l Espiriit Yon ricy mi dela nde'. Ricy mi nu cyiñ tub ga lo mbecy nu gyicy yu reñ ga la mod gal nu ub mi rlagy mi.

### Tub zily la nac dela lugaar ni cuer

<sup>12</sup> Gun de mbecy ni Crisht na dey gal nu na tub zi cuerpu ricy cup zañ lugaar. Mas ricy cup ñi zañ lugaar niñ tees nac ñii tub zi cuerpu. <sup>13</sup> Ni' zi'l mod na de ub na. Lat den yu' mbecy Israael. Nunu yu' mbecy nu walab mbecy Israael. Yu' ga' mbecy nu nac yu moz ni losa'y por fers la. Yu' ga' mbecy nu nac yu patroq ni dey. Tees Espiriit Yon b icy mi nu byac dela den stub zi cuerpu ornu wi nis den. Nunu Ñgyoozh bzeed mi tub zi Espiriit Yon nu nac num den.

<sup>14</sup> Gun tub cuerpu walab tub zi'l lugaar ricy cup ñi sinu zañ lugaar ricy cup ñi. <sup>15</sup> Benu tub gyi'n niiñ: "Yá a' nacä ni cuerpu, gun walab yaa nacä", niiñ. Mas ni niiñ tees nac ñii tub lugaar ni cuerpu. <sup>16</sup> Nunu benu tub gyidag na niiñ: "Yá a' nacä ni cuerpu, gun walab urlo nacä", niiñ. Mas ni niiñ tees nac ñii tub lugaar ni cuerpu. <sup>17</sup> Benu tub cuerpu nac ñii du ub urlo zi'l, orze' žlac mod par nu gyeñ na? Nunu benu tub cuerpu nin du ub gyidag zi'l nac ñii, orze' žlac mod par nu chu' gyidi'ñ na? <sup>18</sup> Tees na den gal nu na de lugaar ni cuerpu. Nunu gal nu bzu Ñgyoozh de zañ lugaar ni cuerpu, ni zi'l b icy mi nu gyicy tub ga la de ub na mod nu rlagy mi. <sup>19</sup> Benu dela den tub zi'l lugaar ni cuerpu nac naa, orze' wacyiñ cuerpu nin. <sup>20</sup> Tees cuerpu ni den rishli, ricy cup ñi zañ lugaar niñ, tees tub zi cuerpu nac ñii.

<sup>21</sup> Orze' tub urlon wac niiñ gab ñii yaan: "Ru se la la cyiñ ru ne", niiñ. Nunu toon wac niiñ gab ñii gyi'n: "Ru se la la cyiñ ru ne", niiñ. <sup>22</sup> Tees de mod la, dela lugaar ni cuerpu ni den nu rlyu nu walab lugaar nu ricy ñi presis, de lugaar ze' dzi zir cyiñ ñi ni den. <sup>23</sup> De lugaar nu a' ricy ñi presis, nde' tona' la cuidad ricy dun ñi, nunu de lugaar ngach ni cuerpu nac cuidada' zir ricy dun ñi. <sup>24</sup> Ze' de lugaar nu rabee, walagy ñi nu cuidad gyicy nu den ñi. Ñgyoozh b icy mi nu dela lugaar nu a' ricy ñi presis ni cuerpu ni den, nde' dzi zir cuidad ricy den nu lugaar ze'. <sup>25</sup> Gun orze' cue' nu la' losa' de lugaar ze'. Sinu delañ gzuñ altant nu nac de losa'ñ. <sup>26</sup> Benu rzac zi tub lugaar ni cuerpu ni den, orze' gur zu lagy dutuub la cuerpu ni den. Benu tub lugaar ni cuerpu ni den nap rzac ñi, orze' ni' zi'l nap zu lagy dela lugaar ni cuerpu ni den.

<sup>27</sup> Na dela den na den gal nu na cuerpu ni Crisht, nunu tub ga la den nac naa tub ga lugaar ni cuerpu nim.

<sup>28</sup> Lat de mbecy ni Crisht, Ñgyoozh bzum tub ga la dey nu lugaar niy. Nu loga la yu' mbecy nu zuy riiñ nu nac yu aposht. Nu cyup yu' mbecy zuy riiñ nu nac yu yu nu rnii riidz nu druu lo Ñgyoozh. Nu chon yu' mbecy zuy riiñ nu rlyuuy de coz ni Crisht. Orze' despuees yu' mbecy zuy riiñ nu ricy yu nusuriidz. Nunu yu' ga' mbecy nu ricy guñaa. Orze' yu' ga' mbecy nu rlocyuub losa'. Orze' yu' ga' mbecy nu riib ic de riiñ nu ricy mbe-

cy lat der. Orze' yu' ga' mbecy nu rnii nu riidz reña' mbecy. <sup>29</sup> Walab dela mbecy nac yu aposht. Walab dela dey nac yu mbecy nu rnii de riidz nu druu lo Ñgyoozh. Walab dela dey ricy yu guñaa nu nac Espiriit Yon ni Ñgyoozh. Walab dela dey rniiy nu riidz reña' mbecy. Walab dela dey gac shaal yu de riidz ze'. <sup>30</sup> B icy der nu gad tub riiñ nu ricy ñi presis nu gac der. Tees mod nu nap zir par dela de' zir ñi, nde' riidz nu neñ lo der na.

### Nu ca mbecy losa'y

<sup>13</sup> Mas Espiriit Yon ni Ñgyoozh shaal mi shcab neñ nu neñ riidz reñ ga la de mbecy, nunu mas shaal mi shcab neñ nu neñ riidz de anc, tees de riidz nu neñ ze' se la la sac ñi benu wacä losa'. De riidz nu neñ nañ gal nu na tub nu rzig ygid o tub nu rzig yplat. <sup>2</sup> Mas cyiñä shaalä riidz nu druu lo Ñgyoozh, mas rad lagya dela coz, mas gyet lagä cuen dela coz biigy ni Ñgyoozh, mas tonä' la ricy cupä consuel lo Ñgyoozh, gash-tal gac gyicyä nu chäg se' tub b icy, tees benu wacä losa', orze' se la la saca. <sup>3</sup> Mas ricä dela coz neñ ni de mbecy zi, nunu mas zaana caa dey gyi cuerpu neñ par nu nac Crisht, se la la cyiñä benu wacä losa'.

<sup>4</sup> Benu rca den losa'n, orze' gyicy cup den pasez dun dey, nunu nap gyicy dun dey. Benu rca den losa'n, orze' rila wayicy saap lagy den ich yu, ni wayabic den gyel mbecy ni de ub na. Ni a' nac den mbecy le'. <sup>5</sup> Benu rca den losa'n, orze' wayicy ñgya den loy; ni wazu fert den nu nac coz nu rlagy ub zi'l na; ni wacha' ic den. Benu rca den losa'n, orze' ni wayeza' lagy den loy ornu shiñ ricy nuy ub na. <sup>6</sup> Benu rca den losa'n, orze' wavyet lagy den ornu shiñ ricy nu mbecy dey, sinu gyet lagy den ornu gyicy de mbecy mod nu se'ñ. <sup>7</sup> Benu rca den losa'n, orze' gagye la den la zi'l mod nu nay. Segur la gyicy cup den consuel loy, nunu rishlo den loy nu gyicy yu gan, nunu gyicy cup den pasez niy.

<sup>8</sup> Nu rca den losa'n, rila wayecañ. Shuub dzi nu walagya'ñ nu shaal den riidz ni Ñgyoozh; ni walagya'ñ nu gyicy mi nu nii den riidz reña' mbecy, ni walagya'ñ nu gyicy mi nu gad lagy den lac yaruu de coz. <sup>9</sup> Gun Ñgyoozh ricy mi nu ñuu ga zi'l yet lag den cuen, nunu ricy mi nu ñuu ga zi rcyiñ den nu shaal na riidz nu druu lom. <sup>10</sup> Tees ornu shuub dzi nu gyanap den, ornu cyid Crisht tuuba' tir, orze' nap zir gad lagy den dela coz.

<sup>11</sup> Ornu gumiiñä, mnæ mod nu rnii yu nguzh mi', nunu guzeñ gal nu rzii yu nguzh mi', nunu brushä shcab gal nu rash yu nguzh mi' shcab. Tees na bi guushä. Orze' walagya'ñ nu gyicyä mod nu ricy yu nguzh mi'. <sup>12</sup> Na wavyet lag nap den cuen de coz ni Ñgyoozh. Rad lagy den gal nu rabee lo tub guan nu dzeeñ dzeeñ zi'l rabee loñ. Tees par lo se mbi la gabe dela coz, gun lo nu loo la zac den mi. Orze' gad lagy den gal nu rad lagy Ñgyoozh de coz nu yu' nañ lardoone.

<sup>13</sup> Tiem ze' chon coz nu ni zi'l gyicy den: nu gyicy cup den consuel lo Ñgyoozh, nunu rishlo den lom, nunu ca den losa'n. Tees coz nu ricy zir ñi presis lo chon coz ze', nde' nu ca den losa'n.

## De yu nu rnii riidz reña' mbecy

**14** Bicy der nu car losa'r. Bdiiñ der lo Ñgyoozh nu gyicy mi nu cyiiñ der nu gyicy ru riiñ nim nunu ricy zir ñi presis nu cyiñ der riiñ nu gac gnii der de riidz nu druu lom. <sup>2</sup> Gun de mbecy nu rnii riidz reña' mbecy, walab lo mbecy rniy ñi, sinu lo Ñgyoozh, gun de mbecy rila wavyet lag dey cuen de riidz nu rniy. De riidz nu rnii de mbecy ze', nde' rniy ñi por nu nac Espiriit Yon ni Ñgyoozh, tees dela riidz nu rniy ze', nde' riidz nu wavyeñ dey. <sup>3</sup> Tees de mbecy nu rshaal riidz nu druu lo Ñgyoozh laab nu riidz yu, de yu ze', rniy ñi lo dela mbecy par nu locyuub yu dey, nunu rbic yu baloor ni dey, nunu rbic yu consuel ni dey. <sup>4</sup> Ze' de mbecy nu rnii riidz reña' mbecy, de mbecy ze' laab ub zi'l yu rlocyuub yu. Tees de mbecy nu rshaal riidz nu druu lo Ñgyoozh, de yu ze' rlocyuub yu dela de mbecy ni Crisht.

<sup>5</sup> Yet lagya benu dela der niir nu riidz reña' mbecy, tees gyet zir lagya benu dela der cyiiñ ru nu shaal ru riidz nu druu lo Ñgyoozh. Gun dzi zir sac de mbecy nu rnii riidz nu druu lo Ñgyoozh gaze' de mbecy nu rnii riidz reña' mbecy. Nomaas benu grusu tub mbecy nu shaal de riidz reña' mbecy ze', gaze' nu sac ñi, gun orze' locyuub yu dela mbecy ni Crisht. <sup>6</sup> Nde' nu der b icy na, ¿la cyiiñapä lo der benu nee nu riidz reña' mbecy? Orze' se la la cyiiñä. Tees benu shaala lo der tub riidz nu briic Ñgyoozh nu nee, o benu nee lo der tub coz nu rlagy ñi nu gad lagy der, o benu shaala lo der tub riidz nu druu lo Ñgyoozh, o benu lyuu ni der tub coz ni Ñgyoozh, benu ni gyicya, orze' cyiiñä ni der.

<sup>7</sup> ¿A wacu' cuen der de gyiib ni musiic? Tub bdzi o tub arpa, mas walab nu mbañ ñii, tees benu a' nap rsiigy dey ñi, orze' wad lagy den la di rboooñ, gun a' nap rsiigy dey ñi. <sup>8</sup> Ni' zi'l ornu rzu' gyel yuu. Benu mbecy nu rlaa trompet a' nap rlaay ñi, orze' wazu lily de soldad par nu chucooy. <sup>9</sup> Ni' zi'l mod wavyet lag mbecy cuen de coz nu gnii de ru, benu nii der nu riidz reña' mbecy. Orze' nde' nañ gal nu na nu lo bi la gnii der ñii. <sup>10</sup> Zañ lo riidz yu'ñ gyishlombecy, nunu segur la yu' mbecy nu gyet lag yu cuen tub lo ga de riidz ze'. <sup>11</sup> Benu ya wavyet lagä cuen de riidz nu rnii tub mbecy, orze' mbecy ze' nay gal nu na tub mbecy nu walab losa', nunu ya na gal nu na tub mbecy nu walab losa' yu ze'. <sup>12</sup> Como rlagy der cyiiñ ru nu gyicy ru riiñ nu rbic Espiriit Yon ni Ñgyoozh, nde' nu ricy zir ñi presis nu gyicy der fers nu gyicy ru riiñ par nu locyuub ru de mbecy ni Crisht.

<sup>13</sup> Orze' de yu nu rnii riidz reña' mbecy, rlagy ñi nu cyiñ dey lo Ñgyoozh nu gyicy mi nu cyiiñ dey shaal yu de riidz ze'. <sup>14</sup> Gun benu ya nee du Ñgyoozh nu riidz reña' mbecy, orze' nee dum nañ lardoo zi'l. Tees shcab ne wagad lagy ñi la coz rnæ. <sup>15</sup> Orze' ¿la coz gyicya? Ornu rnæ du Ñgyoozh, rnæ coz nu druu nañ lardoo, tees ni' zi'l rnæ de coz nu yet lagä cuen. Ornu rdula, rdula nu dutuub la lardoo, tees ni' zi'l rdula de coz nu yet lagä cuen. <sup>16</sup> Ornu rbic der gras ni Ñgyoozh nu riidz reña' mbecy, orze' ¿lac mod nii de' zir de mbecy: "Laab ni", nii dey? Ze' ii wangyet lag dey cuen coz

nu rnii der. <sup>17</sup> Mas tona' la cyit za de riidz nu rnii der, tees rila walocyuub ñi de' zir losa' der. <sup>18</sup> Ya drica' gras ni Ñgyoozh, gun ya dzi zir rnæ nu riidz reña' mbecy gaze' de' zir de ru. <sup>19</sup> Tees lat de mbecy ni Crisht, yet zir lagya nu lyuu gaay zi riidz nu gyet lag dey cuen gaze' nu nee tii miily riidz reña' mbecy nu wavyet lag dey cuen.

<sup>20</sup> Der b icy na, cue' gash der shcab mod nu rash de yu nguzh mi'. Bicy der mod nu ricy de yu nguzh mi' nu wavyicy yu coz a' nap. Tees ornu gash der shcab, bicy der mod nu ricy mbecy gush. <sup>21</sup> Gun lat de riidz nu bzeeñ Ñgyoozh mniim lac gyicy num de mbecy Israael. Orze' nam: "Gnæ lo de mbecy Israael nu nac mbecy nu rnii reña' riidz, nunu nu nac de mbecy nu walab mbecy guledz. Tees mas ni gyicya par wazuub gyidag dey ne", nam. <sup>22</sup> Gal nu b icy mi tiem ze', ni' zi'l ricy mi na, gun ornu cuic mi reña' riidz nu nii tub ga mbecy, nde' cyiiñ ñi par nu gad lagy de mbecy nu wavyicy cup consuel lom cyu nac mi. Walab nu cuic mi ñii par de mbecy nu bi ricy cup consuel. Ze' benu Ñgyoozh gyicy mi nu cyiiñ tub mbecy shaal yu riidz nu druu lom, orze' nde' cyiiñ ñi par de mbecy nu bi ricy cup consuel lom. Walab par mbecy nu wavyicy cup consuel. <sup>23</sup> Orze' lat nu yatublaazh de ru, mbecy ni Crisht, benu dela der checuar niir riidz reña' mbecy, nunu benu lat la ze' chu' tub mbecy lat der, tub yu nu walab mbecy ni Crisht o tub yu nu a' nac nu der, orze' niyi nu raton der. <sup>24</sup> Tees benu dela der niir riidz nu druu lo Ñgyoozh, orze' ornu chu' tub mbecy nu a' nac nu der o chu' tub mbecy nu walab mbecy ni Crisht lat der, orze' de riidz nu rnii der ze', orze' nde' lyuuñ niy nu nac yu mbecy ci. Nunu de riidz ze' lyuuñ loy nu nac yu mbecy nu yu' fault ni nu nac nu gyet lag yu cuen dela coz nu rnii der. <sup>25</sup> De riidz ze' gyicy caacy ñi de coz ngach nu rnii tooy. Orze' gzu tib yu, nunu griib zily yu Ñgyoozh. Orze' niyi nu rishli gaal zu Ñgyoozh lat der.

## Mod nu gyicy de mbecy ni Crisht ornu gyatublaazh yu

<sup>26</sup> Der b icy na, orze' i mod b icy der: ornu gyatublaazh der, tub ga la der ricy cup ru tub coz nu rlagy ru gul ru. Ze' tuuba' der lyuur ni de losa'r. Ze' tuuba' mbecy briic Ñgyoozh tub riidz nu niyi lo der. Ze' tuuba' mbecy rlagy yu niyi nu reña' riidz. Ze' tuuba'y rlagy yu nu shaal yu lac yaruu de riidz ze'. Tees dela coz ze' bicy der nu tub mod nu locyuub ñi dela de mbecy zigy.

<sup>27</sup> Benu la be mbecy rlagy yu nu niyi riidz reña' mbecy, orze' cyup zi'l mbecy o chon dey gac niyi. Cue' nu ziga' zir dey. Nunu bee lo dey niyi. Ze' tuuba' mbecy rlagy ñi nu shaal yu de riidz nu rnii dey ze'. <sup>28</sup> Benu sac cyu nu shaal riidz ze', orze' mbecy nu rnii reña' riidz ze' rlagy ñi nu checay nu niyi lat de mbecy zigy. Orze' nañ lardoo zi'l yu gac niyi riidz ze' lo Ñgyoozh. <sup>29</sup> Cyup mbecy o chon yu gac niyi riidz nu druu lo Ñgyoozh. Orze' de' zir mbecy ri zi'l gua dey gash yu shcab ben a laab ni gal nu rnii. <sup>30</sup> Tees benu Ñgyoozh cuic mi riidz nu nii tuuba' mbecy, orze' mbecy nu rshaal riidz ni Ñgyoozh ze' checay nu rnii. <sup>31</sup> Dela der gac nii der riidz nu cuic Ñgyoozh nu nii der, tees bee lo der niir, gun

orze' gac dela mbecy zigy, nunu gad baloor ni dey.

<sup>32</sup> De mbecy nu rnii riidz nu druu lo Ñgyoozh gac gyub ic dey de riidz nu druu nañ lardooy. <sup>33</sup> Gun Ñgyoozh wansa' lagy mi nu pshees chu' den, sinu Ñgyoozh psa' lagy mi nu gyicy den mod nu se'ñ.

Bicy der gal nu ricy dela de' zir de mbecy ni Crisht lat nu yatublaazh dey. <sup>34</sup> De biñ mñaa wac nii dem ornu yatublaazh de mbecy ni Crisht, gun nde' coz nu rlagy ñi. Nunu wac gyub ic dem lat de mbecy zigy gal nu rnii leey ni de mbecy Israeel. <sup>35</sup> Benu rlagy mi gad lagy mi tub coz, orze' rlagy ñi cugyi'm lo ñgyeem ornu grim yu'm, gun a' nap benu tub biñ mñaa gniim lat de mbecy zigy, ze' nu rzat dey Crisht.

<sup>36</sup> Rlagy ñi gad lagy der nu de riidz ni Ñgyoozh walab lat de ru bzub gyi'ñ; ni walab lo de ru zi'l briñ. <sup>37</sup> Benu tub mbecy rnii tooy nu cyiiñ yu shaal yu riidz ni Ñgyoozh o benu rnii tooy nu Espiriit Yon ni Ñgyoozh locyub mi yu nu niiy, orze' rlagy ñi gad lagy yu nu Ñgyoozh b icy mi mandaar lo nu ni neé de riidz ii lo der. <sup>38</sup> Benu ca na mbecy wacheña lagy yu de nde', orze' cue' gyicy cuen der yu.

<sup>39</sup> Der bicy na, orze' bicy der nu gniir de riidz nu druu lo Ñgyoozh, tees cue' ca der ni de mbecy nu niiy nu reña' riidz. <sup>40</sup> Dela coz nu gyicy der bicy der ñii mod nu se'ñ, nunu mod nu rlagy ñi.

### Ornu byabañ Crisht

**15** Na der b icy na, gyicya' lagy der de riidz nu sac ni Crisht nu pshaala lo der. Riidz ze' bi gush der ñii, nunu nde' riib ic ñi der na. <sup>2</sup> Ni' par nu nac de riidz nu pshaala ze', gruu mbañ der, benu gyicy yac der nur ñii, benu walab nu nu ru' zi'l der gyicy cup ru consuel loñ. Gun benu nu ru' zi'l der gyicy cup ru consuel loñ, orze' leew la gyicy cup ru consuel loñ.

<sup>3</sup> Ya bricä nu gad lagy der de coz nu gud lagya, de coz nu ricy zir ñi presis par de' zir de coz. Nde' nu gut Crisht par nu nac cyi den gal nu rnii de riidz ni Ñgyoozh. <sup>4</sup> Orze' pcach dey mi. Orze' dzi chon byabañ mi gal nu rnii de riidz ni Ñgyoozh. <sup>5</sup> Orze' bruu sac mi lo Bed. Orze' bruu saca'm lo de trocyupa' de aposht.

<sup>6</sup> Orze' despuees bruu saca'm lo zigy zir de b icy na lat nu yu' tublaazh dey. Bded gaay gaynal dey nac yu yu'. Nunu zigy dey gabee yu' mbañ yu na, nomaas la be zi'l dey bi gut yu. <sup>7</sup> Despuees orze' bruu sac mi lo Santiag. Gaze' nu bruu sac mi lo dela de' zir aposht.

<sup>8</sup> Ornu laab nde' la nu blazh ze', orze' bruu sac mi lo ya. Ya bzaca gal nu rzac tub mdoo nu gul anzir nu shu ub tiem ni ornu bzaacäm. <sup>9</sup> Gun ya gash zir zu par lo de' zir de aposht. Ni wangyapa nu nii dey ya aposht, gun ya psheed zj de mbecy ni Crisht. <sup>10</sup> Tees nu nac nu Ñgyoozh nap b icy num ya, nac laq ca na nu nacä. Nunu walab nu leew la nap b icy num ya, gun ya ricy zi rä riiñ nim gaze' de' zir de aposht. Tees walab nu b icya de riiñ ze' ub zj, sinu Ñgyoozh b icy mi faboor num ya nu blocyub mi ya nu gyicya ñii. <sup>11</sup> Tees a' ricy ñi presis nu cyu b icy zir riiñ: ti ya o de' zir de yu ze', gun tub zi'l riidz rnëe de lo der, nunu lo de riidz ze' ricy cup der consuel.

### Ornu gyabañ de mbecy nu bi gut

<sup>12</sup> Tees como de ya rshaal de lo der nu Crisht byabañ mi, orze' ¿lagu yu' ru' la be mbecy lat der nu rnii dey nu wayabañ de mbecy nu bi gut? <sup>13</sup> Tees benu wayabañ de mbecy nu bi gut, orze' ni' Crisht wangyabañ mi. <sup>14</sup> Nunu benu cue' ñgyabañ Crisht, orze' de riidz nu rshaal de lo der se la la sac ñi, nunu se la la sac ñi nu gyicy cup den consuel lom. <sup>15</sup> Benu ni, orze' de ya nu bgüü de, gun mnëe de nu Ñgyoozh b icy mi nu byabañ Crisht. Tees benu rishli nu wayabañ de mbecy nu bi gut, orze' walab rishli b icy Ñgyoozh nu byabañ Crisht. <sup>16</sup> Gun benu wayabañ de mbecy nu bi gut, orze' ni' Crisht wac ñgyabañ mi. <sup>17</sup> Benu cue' ñgyabañ Crisht, orze' se la la sac ñi nu gyicy cup der consuel lom, nunu benu ni, orze' nigul gyicy sulagy Ñgyoozh de cyi der. <sup>18</sup> Benu ni, ni' de mbecy nu bi gut, de yu nu b icy cup consuel lo Crisht, mnit lo dey. <sup>19</sup> Benu lat nu yu' zi'l den gyishlombecy ii na, drish lo den lo Crisht, ze' wayabaña' den, orze' cuaa zir de ub na gaze' de' zir de mbecy.

<sup>20</sup> Tees rishli Crisht byabañ mi ornu gut mi. Mi ze' biñ nu byabañ loga la par lo de' zir de mbecy nu gyabañ par lo. <sup>21</sup> Gun gal nu rat den nu nac tub zi mbecy, ni' zi'l gyabañ den nu nac tuuba' zi mbecy. <sup>22</sup> Gun dela mbecy rat dey gyi' nu nac dey nez Adaang. Orze' ni' zi'l mod gyabañ dey gyi' nu nac nu dey Crisht. <sup>23</sup> Tub ga la mbecy gyabañ yu ornu shuup tiem niy. Nu loga la byabañ Crisht. Orze' despuees gyabañ de mbecy nu nac nim, ornu cyid mi tuuba' tir. <sup>24</sup> Orze' shuub dzi nu gya' lo dela coz. Orze' Crisht gyicy mi gan dela losa' yuum, nunu gu'm gyel gubier nim yaa Ñgyoozh, Uz mi. <sup>25</sup> Gun Crisht rlagy ñi nu gyub ic mi gashtal gyicy lam gan dela losa' yuum. <sup>26</sup> Orze' laab nde' la gyicy mi gan nu checa nu gat mbecy. <sup>27</sup> Gun Ñgyoozh b icy mi nu Crisht gyub ic mi dela coz. Nomaas rabee nu walab nu gyub ic mi Ñgyoozh. <sup>28</sup> Tees ornu Crisht gyub ic mi dela coz, orze' "O" niim nu gyub ic Uz mim, biñ nu b icy nu gyub ic mi dela mbecy. Orze' Ñgyoozh gyub ic mi dela coz.

<sup>29</sup> Yu' mbecy nu rzu nis dey nu nac de mbecy nu bi gut. ¿Lagu ni ricy dey benu wayabaña' de añ? <sup>30</sup> Ze' par de ya, ¿lagu de or la yu' de lo rishdzidz nu gat de?

<sup>31</sup> Segur la rishli, der b icy na, de dzi la rdeda lo rishdzidz nu gata. Tees yet lagya nu nac der como nac der mbecy ni Shuaan den Jesucrisht. <sup>32</sup> Orze' se la la pcyiiñ nu ptub su de de mbecy Éfeso, de mbecy nu na gal nu na bañ dañ, benu wayabañ den ornu gat na. Benu ni, orze' nap zir gyicy la den gusht gal nu rnii de mbecy ornu rniiy: "¡Dow na, do'n gun dzi ga gat na ina!", rnii dey.

<sup>33</sup> Cue' zaan der nu guu mbecy ru. "Benu mbecy a' nap chesa nuy mbecy nap, orze' gyicy yu nu gnu mbecy nap", rnii dey. <sup>34</sup> Orze' pchaa der mod nu gyicy ru, nunu cue' ga' gyicy der coz cyi. Gun yu' mbecy lat der nu a' yu' lo dey Ñgyoozh. Nde' nu ni rnëe de riidz ii lo der par nu gat lo der.

### Lac mod gyabañ de mbecy gut

<sup>35</sup> Che chii la ca na mbecy cugyi'y: "¿Nu lac mod gyabañ de mbecy nu bi gut? ¿Nu lac na cuerp ni dey?" nii dey. <sup>36</sup> jNde' tub coz ton nu nii dey! Benu nuuz der tub mbigy tub ya mni, warib ñi benu wanit lo mbigy nu bdunuuz ze'. <sup>37</sup> Coz nu nuuz der ze', nde' walab ub la ya mni, sinu nde' mbigy zi'l ñi: tub mbigy trig o la zi'l reña' lo mbigy. <sup>38</sup> Tees Ñgyoozh gyicy mi nu galy ya mni ze', nunu gyicy mi nu gyac mbigy ze' gal nu na nu ub mi rlagy mi. Tub lo ga de mbigy ze' ricy mi nu reñ ga la nu nañ gac ñii. <sup>39</sup> Nunu walab tub zi'l nu na beel mbecy nu de beel bañcyug. Reñ na beel mbecy, nunu reñ na beel bañcyug. Reñ na beel chigyiñ nunu reña' na beel bel gyoow. <sup>40</sup> Ni' de coz nu ta' baa, reña' nañ par de coz nu yu' lo yu ii. De coz cyit na nu ta' baa reña' rabeeñ par de coz cyit na nu yu' lo yu ii. <sup>41</sup> Cyit rabee doo güidz. Beey cyita' rabee ma. Tees reña' rabee ma par doo güidz. Bel baa reña' rabee ma. Mas de bel baa, reñ ga la rabee tub ga ma lat de losa' ma.

<sup>42</sup> Ni' zi'l mod gac ornu gyabañ de mbecy nu bi gut. Ornu rdugach cuerp ni mbecy, orze' gyayuñ. Tees ornu gyabañ ñi orze' wata'ñ. <sup>43</sup> Ornu rdugach dey, orze' shni na dey; tees ornu gyabañ dey, orze' tona' la gyafert dey. <sup>44</sup> Ornu rdugach dey, orze' cuerp ni dey nac ñii coz ni gyishlombecy ii; tees ornu gyabañ dey, orze' cuerp ni dey gyac ñi coz ni gyibaa. Yu' cuerp nac ñii ni gyishlombecy ii, nunu yu' ga' cuerp nu nac ñii ni gyibaa.

<sup>45</sup> Gun lat de riidz nu bzeeñ Ñgyoozh rniiñ: "Adaang, yu nu bzuub gyi'ñ nu rach mbecy, yu ze' byac yu tub mbecy mbañ. Ze' Crisht, biñ nu bzuub gyi'ñ nu gyabañ mbecy, mi ze' nac mi tub mbecy nu wat nu rbic gyel mbañ", rniiñ. <sup>46</sup> Nu loga la Ñgyoozh briic mi cuerp ni gyishlombecy ii ni den. Orze' despuees cuic mi cuerp ni mbecy gyibaa ni den. <sup>47</sup> Nu loga la, Adaang psa' lagy Ñgyoozh yu nu yu. Tees nu cyup Crisht bruum gyibaa. <sup>48</sup> Dela mbecy ni gyishlombecy na dey gal nu na Adaang, yu nu byaa nu yu, tees de mbecy nu nac nu Crisht na dey gal nu na biñ nu bruu gyibaa. <sup>49</sup> Orze' na, na den gal nu na mbecy nu byaa nu yu, tees par lo gyac den gal nu na Crisht, biñ nu bruu gyibaa.

<sup>50</sup> Der bicy na, ya rnœe ni cuerp gyidz ii ni den, cuerp ni beel nu ni rit, nii rila wac chu'ñ lo gyel gubier ni Ñgyoozh. Ni' cuerp gyidz ii ni den wacyiñ ñi par nu gagyeñ tub la. <sup>51</sup> Rlagya gad lagy der tub coz nu wagad lagy la de mbecy. Walab dela den gat na. <sup>52</sup> Tees nañ tub miiñ zi'l dela den dza nu nan. Tub lat nu shet zi'l gyid iz na, ornu dulaa trumpet, orze' dela de añ gyabañ dey, nunu rila wata' dey. Nunu dza nu na dela den. <sup>53</sup> Gun cuerp nu gat ni den ii rlagy ñi nu dzañ. Gyac ñi tub cuerp nu rila wata'. <sup>54</sup> Orze' ornu cuerp ni den nu gat ii gyac ñi cuerp nu rila wata', orze' gyu' ni de ridz nu bzeeñ Ñgyoozh, ze' nu rniiñ: "Bi bicy mbecy gan. Rila wata' dey", rniiñ. <sup>55</sup> Orze' gyel gut rila wayicya'ñ gan dey. Rila wayicya'ñ nu zac zi ga' dey nu gat yu. <sup>56</sup> Gat den nu nac de coz cyi nu bicy den. Nunu bicy den cyi como wangyicy den gal nu rnii leey nu bzeeñ Ñgyoozh. <sup>57</sup> Tees gric den gras ni Ñgyoozh, gun bicy mi

nu gyicy den gan nu nac de coz nu bicy Shuaan den Jesucrist.

<sup>58</sup> Na der bicy na, bzu fert der nu nac de coz ni Crisht, nunu bicy paa der nim. Bloo lo der nu de riiñ nu ricy ru ni Ñgyoozh, gun bi neñ der nu la zi'l coz ni Ñgyoozh nu ricy der walab nu leew la ricy der ñii.

### Mod nu rbic dey tiñ ni de mbecy ni Crisht

**16** Na par ornu te' der de tiñ nu gloocyuub der de mbecy ni Ñgyoozh nu yu' lo de yu nu la Judea, rlagy ñi gyicy der mod nu mneé lo tub nac ga de mbecy ni Crisht nu yu' lo de yu ni Galacia. <sup>2</sup> Tub noming ga rlagy ñi nu co reñ der ñuu tiñ. Dub gal lac ricy der gan dub ni cuic der. Orze' cu' choow der ñii, gun orze' ornu yapa, walagy ñi dude' de tiñ ze'. <sup>3</sup> Ornu yapa, orze' zeedä de mbecy nu bi pcui der ze', nu cha nu dey de tiñ ze' par Jerusaleeng, nunu cha nu dey tub gyicy ni rishbeey nu zeedä lo de bicy na nu yu' lugaar ze'. <sup>4</sup> Benu galagy ñi nu cha, orze' ni' zi'l ya cha du dey.

### Baly rlagy yu cha güiyy dey

<sup>5</sup> Nez nu yapa, rlagy ñi nu dedä lo de mbecy nu yu' Macedonia. Orze' niga dedä par lo de ru. <sup>6</sup> Rlagya gyiyeeñ du der tub tiem, ben a wac cyiñä lat der dub laa lat lascyey. Orze' gac locyuub der ya nu de coz nu galagy ñi ne ornu cha tuuba' lugaar. <sup>7</sup> Walab nu rlagy zi'l ya nu zaca der nez nu dedä, sinu rlagy nu les cyiñä lat der benu zaan Shuaan den. <sup>8</sup> Tees gyiyeeña Éfeso ii gashtal shuub la dzi nu chu' sa' ni Pentecostés. <sup>9</sup> Gun mas yu' zigy mbecy nu zay contr ni Shuaan den, tees na tiem niñ par nu gyicya gan de riiñ ily nim Éfeso ii.

<sup>10</sup> Benu gri Timoteo lo der, orze' gyicy der nu nap zu lagy yu, gun yu ze' ricy yu riiñ ni Shuaan den gal nu ricy ya. <sup>11</sup> Cue' gyicy gyidz der yu, sinu rlagy ñi nu locyuub der yu nu de coz nu galagy ñi niy par ornu chay tuuba' lugaar, gun orze' cush cyay cyida'y lo. Gun ya rishlo yu nu cyid yu nu de' zir de bicy na.

<sup>12</sup> Ze' Apolos, ya mnishbaa loy nu cyid güiyy der gal nu de' zir de bicy na. Na la walagy yu cyid yu. Tees ornu gad mod niy orze' cyid yu.

<sup>13</sup> Bicy cuidad der ub ru ni de coz a' nap. Nunu ni cue' gya' ich der nu nac de coz ni Crisht. Cue' dzib der. Bzu fert der. <sup>14</sup> Nunu dela coz nu gyicy der, bicy der ñii par nu nac nu rca der losa'r.

<sup>15</sup> Der bicy na, de ru rad lagy der nu par de' zir de mbecy nu yu' lo yu ni Acaya, Estéfanas nu de famil niy, de yu ze' byac dey mbecy ni Crisht nu loga la, nunu de yu ze' byu' lo de riiñ par nu locyuub dey de mbecy ni Crisht. <sup>16</sup> Der bicy na, rlagya nu gyicy yac der nu de coz nu rnii de yu ze', nunu de coz nu rnii de mbecy nu na gal nu na de yu ze'. Nunu bicy yac der nu cyu zi'l mbecy nu ricy nu dey riiñ. <sup>17</sup> Tona' la yet lagya nu biid Estéfanas, nu Nat, nu Acaico. De yu ze' blocyuub dey ya lugaar ni de ru, gun sac der ii. <sup>18</sup> Gal nu bicy dey nu bet lagy de ru, ni' zi'l bicy dey nu bet lagya. Cyu zi'l mbecy

nu ni na gal nu na de yu ze' rlagy ñi nu griib zily der yu.

<sup>19</sup> Dela de mbecy ni Ñgyoozh nu yu' lo yu ni Asia, bzeed dey ñgyoozh ni der. Aquila nu Priscila gal nu dela de mbecy ni Crisht nu ryatublaazh nañ yu' dey bzeed dey ñgyoozh ni der como ni' nac der mbecy ni Crisht. <sup>20</sup> Dela de bicy na nu yu' ii bzeed dey ñgyoozh

ni der. Dela der nap nii nu der losa'r par nu gabe nu nac der losa' bicy ru.

<sup>21</sup> Ya Baly, caa de riidz ii nu ya nu zeeda ñgyoozh ni der.

<sup>22</sup> Benu tub mbecy wacay Shuaan den Jesucrisht, orze' bi gul yu duu. ;Shuaan de, da!

<sup>23</sup> Shuaan den, Jesucrisht, nap gyicy num der. <sup>24</sup> Nunu bi neñ der nu ya rca der nu nac Jesucrisht.

## 2 Corintios

Baly zeed yu gyicy lo de mbecy ni Crisht nu yu' Corinto

**1** Ya Baly, yu nu bzu Ñgyoozh nu gac aposht ni Jesucrisht. Ni b icy mi, gun nde' coz nu rlag y mi. Ya nu biicy na Timoteo zeed de gyicy ii lo de mbecy ni Ñgyoozh nu yu' gyedz Corinto nunu lo dela de mbecy ni Ñgyoozh nu yu' lo de yu ni Acaya. **2** Ñgyoozh Uz na nu Shuaan den Jesucrisht gyicy dem faboor nu nap gyicy num de ru, nunu gyicy mi nu cheti ri añ ni der.

### Bzac zi Baly

**3** Orze' gyabic den gyel mbecy ni Ñgyoozh, Uz Shuaan den Jesucrisht. Mi ze' Uz na, biñ nu gushni lag y de ub na. Mi ze' Ñgyoozh nu rbic consuel ni den. **4** Dela lat tiem nu deet rzac na, orze' Ñgyoozh rbic mi consuel nin. Orze' nu nac consuel ze' cyiiñ den nu gric na consuel ni mbecy nu rzac de lo la coz deet. Gun laaba' consuel nu briic mi ni den, laaba' nde' gric na ni de mbecy. **5** Gun gal nu Crisht bzac zim, ni' zi'l zac zi ga' den nu nac mi. Tees ni' zi'l Ñgyoozh cuic zir mi consuel ni den nu nac Crisht. **6** Gun benu de ya zac deet de, nde' cyiiñ ñi par de ru, gun orze' Ñgyoozh cuic mi consuel ni der, nunu co mbañ mi der. Como Ñgyoozh rbic mi consuel ne de ya, ni' zi'l cuic mi consuel ni de ru. Locyuub mi der nu gagyer nu pasez ornu gzac deet der gal nu bzac de ya. **7** Orze' de ya tona' la drish lo de lo der nu waya' ich der, gun nap rad lag y de nu gal nu bzac deet de ya, ni' rzac deeta' de ru. Orze' ni' zi'l gal nu briic Ñgyoozh consuel ni de ya, ni' zi'l cuica'm consuel ni de ru.

**8** Na der b icy na, rlag y de gyicya nu gyeza' lag y der de coz deet nu bzaac de lat nu gusa de lo de yu ni Asia. Par nu tona' la coz ily bzac de, orze' blazh consuel ne de par nu cyiiñ gyishlombecy ii. **9** Guzeq de nu na gal nu na tub pres nu bi zuu la nu gat. Orze' ni bzac de par nu gad lag y de nu cue' gyicy cup de consuel lo uba, sinu gyicy cup de consuel lo Ñgyoozh, biñ nu gyicy nu gyabañ mbecy. **10** Ñgyoozh bi bloom de ya lo tub rishdzidz ily nu rlyu nu bi gat la de, nunu co napa'm de ya par lo. Orze' gyicy cupa' de consuel lom nu co napa'm ya, **11** benu de ru locyuub der de ya nu cyiñ der lo Ñgyoozh nu nac de. Orze' benu zigy mbecy rnii nu dey Ñgyoozh nu nac de ya, orze' ni' zi'l zigy mbecy rbic dey gras nim nu nac nu nap b icy num de.

### Baly wangac chay Corinto

**12** Yu' tub coz nu ricy ñi nu tona' la yet lag y de. Coz ze', nde' nu rad lag y de nañ lardoq nu nap b icy du de

de ru gal nu dela de' zir mbecy. Bicy du de der nu gyel cacy. Nunu naal la rabee coz nu b icy du de ru. Walab nu b icy du de ru tub mod nu bruu nañ shcab ni uba, sinu b icy de tub mod nu bruu lo Ñgyoozh. Gun Ñgyoozh b icy mi faboor nu blocyuub mi de nu ni b icya. **13** Orze' lo gyicy nu rzeed de lo der rcaq de tub lo zi'l ridz nu gac sya' der nunu nap gyet lag y der cuen. Nunu drish lo de nu par lo nap gad lag y der **14** ornu shuub dzi nu cyid Shuaan den Jesuuz, gal nu gyet lag y de ya nu nac de ru, orze' ni' zi'l gyet lagya' de ru nu nac de ya. Nde' tub coz nu gad lag y der ñuu ga zi tiem na.

**15** Nu nac nu ya rad lagya nu de coz ze' nde' segur la, nde' nu ya b icy p ee nyap a lo der loga la, gun orze' cyup tir yap a locyuuba der. **16** Gun ya b icy p ee nyap güi de ru loga la nez nu ñyaq a Macedonia. Na or mbish cy a, nyap güi ga' de ru tuuba' tir. Ni b icy p ee, gun orze' de ru gac locyuub der ya nu gad coz nu cyiñ ne ni byaj nu cha Judea. **17** Ornu mn e nu ni gyicya, za mnii too der nu ya b icy cyup ica? Uti mnii too der nu ornu ya rloo ica ben lac gyicya, orze' ryub a tub mod rguu? Arneq de nu "Bi yap la de", ze' laab tiem ze' rneq ga' de nu "Wayapa?" **18** Ñgyoozh rad lag y mi nu wagneq de nu "Bi yap de", orze' laab tiem ze' rneq ga' de nu "Wayapa." De ya a' nee de rup laa coz ze' nañ tub tiem zi'l. **19** Gun Jesucrisht, Iñ Ñgyoozh, biñ nu rzat Silvano, nu Timoteo, nu ya, mi ze' a' nac mi tub biñ nu ricy cyup ic, sinu dub laa tiem ricy mi coz nu rnii Ñgyoozh. **20** Gun Crisht b icy yac mi ni dela ridz nap nu mnii Ñgyoozh nu segur la gyicy mi. Nde' nu ornu ryabic den gyel mbecy ni Ñgyoozh nu nac Crisht, orze' rnii den: "Laab ni gac ñii." **21** Orze' laab Ñgyoozh b icy mi nu gad lag y de ya, gal nu de ru nañ lardoo den nu nac num den, nunu laab Ñgyoozh bloo sum den nu gac naa nim. **22** Orze' briic mi Espiriit Yon nim ni den. Mi ze' nam gal nu na tub sey par nu gabe nu nac naa nim. Briic mi mi ze' ni den nu loga la par nu gabe nu cuic mi de coz ni den par lo.

**23** Gun Ñgyoozh neñ mi nu wancha Corinto gal nu mnii too gun ya rzeq nu a' nap par de ru benu ñyaa. **24** Walab nu rlag y de nu por fers la cheña lag y der de coz nu gn e, gun de ru bi rzu fert der nu nac de coz ni Crisht. Coz nu rlag y de, nde' nu gyicya riiñ tublaazh la nu de ru, gun orze' zu cyit lag y der nu nac de riiñ nu gyicy den.

**25** Nde' nu ya bdu' ica nu wayap güi de ru nis gyicya nu gyicy shni der. **26** Gun benu ya gyicya nu gyicy shni der, orze' za grusu mbecy nu gyicy yu nu gyet lag ya? Gun za walab de ru nde'? Como laab de ru mbecy nu gyicy shni nu nac coz nu gyicya. **27** Nde' nu ni mod

pcaq lo gyicy nu zeeda lo der, gun cue' nu gyicy der nu gyicy shni ornu yapa lat der. Gun de ru lagya ni nu gyicy der nu gyet lagya. Gun ya rad lagya nu segur la gal nu ya gyet lagya, ni' zi'l gyeta' lagy de ru. <sup>4</sup> Tees ornu pcaq gyicy ii nu zeeda lo der, tona' la guc deet nañ lardoq, nunu gashtal nis urlo pcaq ni. Tees pcaq ni walab par nu gyicya nu gyicy shni der, sinu par nu drica nu gad lagy der nu ya tona' la rca de ru.

### Nu gyicy sulagy dey losa'y

<sup>5</sup> Benu ca na tub mbecy b icy yu nu b icy shni losa'y, walab ya zi'l b icy yu nu b icy shni, sinu b icy yu nu b icy shni dela de ru niuu ga. "Nuu ga" rnqe par nu cue' gyicy zilya de coz ze'. <sup>6</sup> Orze' lo dela de ru bded cyaal der briic der cashtig ni mbecy ze'. Orze' beñ bee ni zi'l. <sup>7</sup> Orze' na rlagy ni nu gyicy sulagy der niy, nunu cuic der baloor niy, gun orze' cue' ga' gyicy shniy. Gun nis laa yaay de coz ni Crisht. <sup>8</sup> Nde' nu ya rnishbaq lo der nu cuic der nu gad lagy yu nu rca der yu tuuba' tir. <sup>9</sup> Gun anzir bzeed qyicy ze' lo der nu nac de coz ze', par nu gyicya preb der ben a wazuub gyidag der de riidz nu nqe. <sup>10</sup> Na ornu de ru gyicy sulagy der ni mbecy nu nac coz nu b icy yu, orze' ni' ya gyicy sulagy niy. Nunu benu yu' cyi nu gyicy sulagy, orze' gyicy sulagy ni nu nac de ru par lo Crisht, <sup>11</sup> gun orze' nuras wagyicy yu gan de ub na, gun bi neñ na la na may nu ricy cup yu.

### Guc deet nañ lardoo Baly gyedz Troas

<sup>12</sup> Na ornu bri gyedz nu la Troas par nu shaala de riidz ni Crisht lo de mbecy nu yu' gyedz ze', orze' Shuaan den tona' la blocyub mi ya nu guud tub mod nu b icya riiñ nim. <sup>13</sup> Tees rila wanganap lagya par nu wancheela b icy na Tito. Nde' nu mnqe du dey ngyoozh. Orze' bruu lugaar ze' gua par lo de yu ni Macedonia.

### Gyicy den gan nu nac Crisht

<sup>14</sup> Gric den gras ni Ngyoozh, gun ricy mi nu gyicy den gan nu nac Crisht. Orze' de ub na dric na nu gad lagy de mbecy de coz nim. De coz ze' nañ gal nu na tub coz zguul nu tush las den. <sup>15</sup> Nunu laab de ub na na den gal nu na tub dzeeñ zguul ni yaal nu rbic Crisht par lo Ngyoozh. Orze' nu zguul ti' ze' zaab ti'ñ lat de mbecy nu gruu mbañ, gal nu lat de mbecy nu nit lo. <sup>16</sup> Par de mbecy nu dune', ti' zguul ze' gyicy ni nu gad lagy yu nu gat yu. Ze' par de yu nu gruu mbañ, nu zguul ze' gyicy ni nu gad lagy dey nu cui mbañ yu. Orze' ca na mbecy nu cyiiñ yu gyicy yu riiñ ni Ngyoozh? <sup>17</sup> De ya cyiiñ de, gun wagyicy du de de riidz ni Ngyoozh gal nu ricy de mbecy nu ricy daljez nu la coz, gun yu' zigy mbecy nu ni ricy yu. De ya, lugaar nu ni gyicy de, lo la Ngyoozh li rshaal de de riidz nim. Gun mi ze' bzoo nez mi de ya, nunu de ya nac du de Crisht nunu mi ze' nac num de ya.

### Trat cub nu ricy Ngyoozh nu mbecy

<sup>3</sup> Ornu ni rnqe de, ca rlyu nu tuuba' tir brugyi' nu ryabic de gyel mbecy ni uba? Walab gaal rlagy ni nu rlyuu de tub gyicy lo der nu rniiñ cyu nac de, gal nu ricy la be mbecy? O walab gaal rlagy ni nu cuic der gyicy nu rniiñ cyu nac de nu lyuu lo reña' mbecy? <sup>2</sup> Walag y ni nu ni, gun de ru na der gal nu na tub gyicy nu rniiñ cyu nac de ya. De ru na der gal nu na tub gyicy nu bi ca nañ lardoq de. Orze' dela mbecy gac gad lagy dey coz nu rniiñ gyicy ze', nunu gac sya' dey ni. <sup>3</sup> Nunu rabee nu laab Crisht pcaam lo gyicy ze', nunu bzeed mi ni nu nac de ya. Nunu wancaam lo gyicy ze' nu tint, sinu pcaam looñ nu nac Espiriit Yon ni Ngyoozh, tub biñ nu mbañ. Nunu wancañ lo tub gyita' she, sinu gyicy ze' cañ nañ lardoo mbecy.

<sup>4</sup> Orze' segur la rad lagy de de nu nde', gun ricy cup de consuel lo Ngyoozh nu nac Crisht. <sup>5</sup> Gun walab nu nil cyiiñ de nu gyicya la coz, sinu benu gac gyicy de ni, orze' Ngyoozh b icy mi nu gac gyicy de ni. <sup>6</sup> Mi ze' b icy mi nu cyiiñ de gyicya de riiñ ni tub trat cub. Nde' walab trat nu ca lo gyicy. Sinu nde' trat nu bruu lo Espiriit Yon ni Ngyoozh. Gun trat ni leey nu ca lo gyicy, nde' rniiñ nu rlagy ni nu gat den. Tees Espiriit Yon ni Ngyoozh rbic mi gyel mbañ ni den.

<sup>7</sup> Leey ni Moisees pcañ nu letre lo gyita'. Nunu bruu zac gyel lily ni Ngyoozh, ornu briic mi ni. Orze' de mbecy Israel wangagyeey dey nu ngüiiy lo Moisees par nu tonal la byaryal loy, mas nu ryal ze' byagash yaa niñ. Tees benu rabee gyel lily ni Ngyoozh ornu bruu zac leey nu rniiñ nu rlagy ni nu gat na, <sup>8</sup> zdzi zir rabee gyel lily nim nu nac nu gusu tub trat cub nu riib ic Espiriit Yon nim! <sup>9</sup> Gun benu rabee gyel lily nim ornu bruu zac leey nu rñii nu rlagy ni nu gat na, jorze' zdzi zir nap rabee gyel lily nim nu nac tub trat nu rniiñ lac mod gyanap mbecy lom! <sup>10</sup> Gun gyel lily ni Ngyoozh nu bruu zac gulas wasaap ni gyel lily nim nu rabee tiem na.

<sup>11</sup> Benu bruu zac gyel lily ni Ngyoozh ornu biid leey ni Moisees, tub leey nu bi bded ni, orze' zdzi zir nap rabee gyel lily nim na nu nac nu zu tub trat cub, tub trat nu zu par tub la.

<sup>12</sup> Par nu nac nu drish lo de lo trat cub ze', wacchib la de rnqe. <sup>13</sup> Wagyicy de gal nu b icy Moisees. Gun yu ze' psoow yu loy par nu cue' zac de mbecy Israel nu gyu nu ryal nu ca loy. <sup>14</sup> Tees gal nu byoow lo Moisees, ni' zi'l byoow nañ shcab ni de mbecy Israel. Nunu mas gashtal dzi na noow nañ shcab ni dey lat nu rsya' dey de gyicy ni trat gush. Gun tub zi la nu "O" nii mbecy ni Crisht, orze' gyal nañ shcab ni. <sup>15</sup> Mas gashtal dzi na noow nañ shcab ni dey ornu rsya' dey de riidz ni Moisees. <sup>16</sup> Tees ornu tub mbecy "O" niiy ni Crisht, orze' gyal nañ shcab ni. <sup>17</sup> Gun Shuaan den, Jesucrisht, mi ze' nac mi Espiriit ni Ngyoozh. Nunu ze' nu rcyiñ Espiriit ni Shuaan den Jesucrisht, ze' sac reña' shuaan den. <sup>18</sup> Nde' nu dela den saca' negy nu rsoow lon. Na den gal nu na tub guan nu rlyuu gyel lily ni Shuaan na Jesucrisht. Nunu gac den gal nu na ub mi. Orze' tub dzi ga rabee zir gyel lily nim loon. De nde' coz nu ricy

Shuaan den Jesucrisht, biñ nu nac Espiriit ni Ñgyoozh.

**4** Nde' nu dē ya wansi'ñ dē baloor. Gun Ñgyoozh bdu'm riiñ nim yaa dē nu nac nu gushni lagy mi dē. <sup>2</sup> Nde' nu rzu chū dē de coz to' lo nu ricy dē ngach. Nunu wachesa dē nu gyel rguu. Ni wagnē dē nu de riidz ni Ñgyoozh nde' walab coz rishli, sinu rnē dē du uub la mod nu rishli. Nunu nu mod ze' gric dē nu gad lagy de mbecy nañ lardooy nu nap ricy dē par lo Ñgyoozh. <sup>3</sup> Nunu benu noow rshaal dē de riidz nu rbic gyel mbañ rlyu, orze' noow zañ par de mbecy nu dune' zi'l. <sup>4</sup> Gun nuras, yu nu nac ñgyoozh ni gyishlombecy ii, b icy yu nu byoow nañ shcab de mbecy nu wagiyicy cup consuel, gun orze' cue' gyet lag dey cuen de riidz nu sac nim, de riidz nu rzat gyel lily ni Crisht. Nunu mi ze' rbic mi nu gad lagy den la na Ñgyoozh, nu nac mod nu na ub mi. <sup>5</sup> Ornu rshaal dē de riidz ni Ñgyoozh, walab nu rzat dē uba, sinu rnē dē nu Jesucrisht nac mi Shuaan den. Nunu rnē dē nu dē ya naca mbecy nu ricy coz nu rlagy ñi ni de ru nu nac Jesuuz. Nde' zi'l riñ nu ricy dē. <sup>6</sup> Nunu laab Ñgyoozh, biñ nu psa' lagy yaa lugaar ze' nu cow, mi ze' bzeed mi yaa nañ lardoq dē, gun orze' gad lagy dē la na gyel lily nim nu gruu lo Je- sucrisht.

### Mod nu rcyiñ mbecy nu ricy cup consuel lo Crisht

<sup>7</sup> Tees gyel nap ni Ñgyoozh nu ricy cup dē nañ cuerpe, nde' nañ gal nu na tub gyel nap nu bdu' choow mbecy nañ tub gyis yu, gun orze' gabe nu tonal la coz ily druu lo Ñgyoozh. Walab nu druuñ lo dē ya. <sup>8</sup> Mas cya' la rzac dē coz deet, tees walab nu nit loñ dē. Yu' nu dzi drush dē shcab, tees waglazh la consuel ne dē. <sup>9</sup> Yu' tiem nu rzab mbecy ich dē, tees Ñgyoozh wac-saan yaam dē. Yu' nu shiñ ricy nu mbecy dē, tees wag-nit lo dē. <sup>10</sup> Ca zi'l lugaar nu rded dē, dub laa tiem zu dē lo rishdzidz nu gat dē gal nu bzac Jesuuz, gun orze' rabee nu Jesuuz mbañ mi nu nac dē ya. <sup>11</sup> Gun lat nu gabee mbañ dē ya, dub laa tiem rded dē lo rishdzidz nu gat dē nu nac Jesuuz, gun orze' nu nac dē ya mbecy nu ca lo cuen nu gat, rabee nu Jesuuz zum. <sup>12</sup> Ni mod rded dē ya lo rishdzidz nu gata. Ze' de ru gad nu cui mbañ der.

<sup>13</sup> Nunu rshaal dē de riidz ni Ñgyoozh, gun ricy cup dē consuel lom, gal nu rniiñ lat de riidz nim. Orze' rni-iñ: "Ya b icy cupa consuel, nunu nu nac nde' mnēe", rni-iñ. <sup>14</sup> Gun rad lagy dē nu Ñgyoozh, biñ nu b icy nu byabañ Shuaan den Jesuuz, ni' zi'l gyicy mi nu gyabañ dē ya nu Jesuuz. Nunu gyicy mi nu tublaazh la gyecha' dē gal nu de ru lom. <sup>15</sup> Orze' dela coz nu rzac dē, nde' par de ru, gun orze' dub gal nu nap ricy nu Ñgyoozh mbecy, orze' ni' yu' mbecy nu cuic yu gras nim, gun orze' rabee nu dzi zily nac mi.

<sup>16</sup> Nde' nu washi'ñ dē baloor. Gun mas cuerpe ne dē dzach ded niñ, tees tub dzi ga gyafert zir dē nañ lar-doo. <sup>17</sup> Coz nu rzac zi dē gyishlombecy ii na, nii walab coz nu dzi biigy. Nunu dzach ded niñ. Tees nu nac nu rzac zi dē, nde' nu gad gyel lily ne dē nu rila walazh. Nunu gyel lily nu gad ne dē, nde' tonal la coz ily par de coz nu rzac zi dē. <sup>18</sup> Gun wagiyicy cuen dē de coz nu

rzac urlo dē gyishlombecy ii, sinu ca lo dē lo de coz nu wacsacä. Gun coz nu rzac dē, nde' coz nu ded ni. Tees coz nu wasac dē, nde' coz nu gzu tub la.

**5** Gun cuerpe ni de ub na gyishlombecy ii nañ gal nu na tub yu' negy. Wazu tuuñ ñi. Orze' dudily ñi. Tees rad lagy na nu benu nit lo yu' negy ze', orze' se la la nde', gun Ñgyoozh bi bzu lily mi tuuba' yu' gyibaa nu wanit lo nu cuic mi ni den. Nunu yu' ze' walab nu yaa mbecy byaañ. <sup>2</sup> Nde' nu lat nu rcyiñ na nañ yu' negy ze', orze' ric la añ nin nu gad yu' nu Zub gyibaa, ze' nu cyiiñ den nañ ñi. <sup>3</sup> Gun yu' nu Zub gyibaa, nde' cuerpe nu cuic Ñgyoozh ni den par lo. Nde' nañ gal nu na tub negy nu gzun, gun orze' cue' nu gyid yaagy la den chesan nu nac nu sac cuerpe ni den. <sup>4</sup> Lat nu rcyiñ den nu cuerpe nin gyishlombecy ii, orze' gyi la ryeed añ ni den nu deet rac nañ lardoona. Orze' walab nu rlagy den nu chesan nu sac cuerpe nin, sinu rlagy den nu gzun tuuba' cuerpe nu gad ni den gyibaa, gun orze' gad gyel mbañ ni cuerpe nu gat ni den. Orze' nde' rila wata'ñ. <sup>5</sup> Ñgyoozh nac mi biñ nu bzu lily de ub na par de nu nde'. Nunu briic mi Espiriit Yon nim ni den par nu gabe nu gad de nu nde' nin.

<sup>6</sup> Nde' nu dub laa tiem rzu fert den. Gun rad lagy den nu lat nu rcyiñ na nañ cuerpe ni gyishlombecy ii, orze' walab nu rcyiñ den lo Shuaan na. <sup>7</sup> Nde' walab coz nu zac den na na la, sinu nde' gad lagy den nu nac nu zeña lagy na de riidz nim. <sup>8</sup> Nde' nu na rzu fert den, nunu yet zir lagy den benu gat na, gun orze' gruu nañ cuerpe ii. Orze' gyan cyiiñ dun Shuaan na Jesuuz. <sup>9</sup> Nde' nu dub laa tiem rzu bich den nu nac coz nu yet lagy Shuaan na. Ni gyicy den mas gabee rcyiñ den nañ cuerpe nin, o mas nu saca'n. <sup>10</sup> Gun dela den rlagy ñi gyecha'n lo Crisht par nu gri beem ni den, gun orze' tub ga la den gad coz nu yad ñi nu gad nin dub gal nu na coz nu b icy den lat nu pcyiñ den nañ cuerpe nin: be-nu b icy den coz nap o coz a' nap.

### Riidz ni gyel ri zu

<sup>11</sup> Orze' como rad lagy dē nu rca lagya lo Shuaan na, nde' nu ricy pēe dē nu rcuugya nañ lardoona de mbecy. Ñgyoozh nap yu' lom dē ya, nunu drish lo dē nu ni' zi'l de ru nap yu' lo der dē ya. <sup>12</sup> Walab nu ryabic dē gyel mbecy ne dē tuuba' tir, sinu dric dē lugaar nu gyet lagy der nu nac dē, gun orze' gad mod nu tush cya der riidz nu rnii de mbecy nu rcui. Gun de yu ze' rgüiylia la na losa'y par ich yu, par wagiyicy cuen la dey la nay nañ lardooy. <sup>13</sup> Tees benu dē ya naca mbecy ton, nde' par Ñgyoozh. Nunu benu walab, orze' nde' par de ru.

<sup>14</sup> Orze' la zi'l coz nu ricy dē, nde' nu nac nu Crisht rcam dē ya. Gun na bi gud lagy dē nu tub zi Crisht gut mi lugaar ni dela mbecy. Orze' nde' nañ gal nu na nu gut dela mbecy. <sup>15</sup> Nunu Crisht gut mi par dela mbecy, gun orze' de mbecy nu gabee mbañ, cue' ga' cyiiñ dey par nu nac coz nu rlagy ub yu, sinu cyiiñ dey par Crisht, biñ nu gut nunu biñ nu byabañ nu nac dey.

<sup>16</sup> Nde' nu warush den shcab ben la na tub mbecy mod ni gyishlombecy ii. Mas gulas mnii too den nu nac Crisht mod ni gyishlombecy, tees na walaba' nu ni mod

ricy den. <sup>17</sup> Gun benu tub mbecy nac nuy Crisht, orze' byac yu tub mbecy cub. Orze' dela mod nu nay gulas, bi bded niñ. Mod nu nay na, nde' tub mod cub.

<sup>18</sup> Dela nde' coz nu b icy Ñgyoozh. Coz nu b icy mi ze' b icy ñi nu byanap riidz ni den dun mi nu nac Crisht. Nunu bdu'm riiñ yaa den nu locyuub na de mbecy nu gyanap riidz ni dey nuy mi. <sup>19</sup> Mod nu rnëe, nde' nu Ñgyoozh ricy mi nu gyanap riidz ni de mbecy gyishlombecy nuy mi nu nac Crisht. Mi ze' wariib cue-na'm de cyi nu ricy dey. Nunu bdu'm riiñ yaa den nu shaalä de riidz ze' nim lo de mbecy. <sup>20</sup> Orze' de ya naca mbecy nu bzuu nez Crisht nu chä por cuen nim. Nañ gal nu na nu Ñgyoozh rnium lo der nu nac de ya. Nde' nu rnishbaa d e lo der nu gyanap riidz nir nur mi ze'. <sup>21</sup> Gun Crisht rila wangyicy mi ni tub cyi. Tees par nu nac de ub na, Ñgyoozh b icy mim par tub mbecy cyi. Gun orze' nu nac mi ze', gyacaacy den lo Ñgyoozh.

**6** Orze' como tublaazh la ricy den riiñ ni Ñgyoozh, d e ya rnishbaa d e lo der nu cue' zaan der nu leew la nap gyicy nu Ñgyoozh der. <sup>2</sup> Gun lat de riidz nim nam:

Tiem nu rlagy ñi zuub gyidaga ni der.

Nunu dzi nu gruu mbañ der, ya locyuuba der, nam.

Na na la, tiem nu bzat mi ze'. ¡Dzi na la dzi nu gruu mbañ der ze'!

<sup>3</sup> Wangyicy d e ni tub la coz nu gyicy ñi nu gadza mbecy, gun orze' cue' nu gnii zi mbecy ni riiñ nu ricy de, <sup>4</sup> sinu gyicy d e tub mod par nu gabe nu nac d e mbecy nu ricy coz nu rlagy Ñgyoozh. Gun ornu rzac zi d e, nu pasez ragyeé d e. Ornu ricy falt la coz ne d e, orze' ragyeé d e. Ornu deet rac, orze' ni' zi'l ragyeé d e. <sup>5</sup> Ornu rgaaz dey d e ya, orze' ragyeé d e. Ornu yet lag d e nañ yu' gyiib, orze' ragyeé d e. Ornu ryach mbecy, orze' ragyeé d e. Ornu fers ricy d e riiñ, orze' ragyeé d e. Ornu rach pcaal d e, orze' ragyeé d e. Ornu ran d e, orze' ragyeé d e. <sup>6</sup> Ricy d e nu gabe nu nac d e mbecy nu ricy coz nu rlagy Ñgyoozh nu nac de coz nu ricy d e. Rd ed d e nu gyel cacy. Nap yet lag d e cuen de coz rishli ni Ñgyoozh. Ricy cup d e pasez nu losa'. Yet lagy d e losa'. Nac d u d e Espiriit Yon ni Ñgyoozh. Nunu rishli rcä d e losa'. <sup>7</sup> Rshaal d e de riidz rishli ni Ñgyoozh. Nunu Ñgyoozh coz ily ricy mi nu nac d e ya. Nu nac nu byanap de par lo Ñgyoozh, cyiñ d e nu chucqo nu de losa' yuum. Gac shet yaq d e yu. Nunu gac ca d e uba. <sup>8</sup> Yu' nu rca lagy mbecy lo d e. Ze' yu' ga' nu rgüii tañ dey lo d e. Yu' nu nap rnii dey nu nac d e. Ze' yu' ga' nu shiñ rnii dey nu nac d e. Ricy dey d e ya par mbecy rguu, mas rnëe d e coz rishli. <sup>9</sup> Mas nap yu' lo dey d e ya, tees ricy dey de ya par mbecy nu a' yu' lo dey. Mas bi yu' d e nu gata, tees gabee mbañ d e. Mas rbic dey cashtig ne d e, tees wacut dey d e ya. <sup>10</sup> Rlyu nu ricy shni d e, tees dub laa tiem nap zu lagy d e. Rlyu nu gyel zi zu d e, tees ricy d e nu yaguani'ñ zig mbecy nu nac coz ni Ñgyoozh. Rlyu nu saca' la coz ne d e, tees ricy cup d e dela coz nu ricy ñi presis.

<sup>11</sup> Orze' de ru b icy na nu yu' Corinto, d e ya naal la mnëe lo der. Pshaal d e dela coz nu yu' nañ lardog lo

der. <sup>12</sup> Rila wagyicy zet lagy d e lo der, sinu de ru ricy zet lagy der lo d e ya. <sup>13</sup> Orze' ya rnëe lo der gal nu rnii tub mbecy nuy i'ñ yu. "O" nii der ne d e ya, gal nu d e ya "O" nee d e ni de ru.

Cuerp ni mbecy, nde' tub yu' mbañ nu rcyiñ Ñgyoozh

<sup>14</sup> Cue' gyicy losa' der mbecy nu wayicy cup consuel lo Crisht. Gun mbecy nu nap ricy, wac gac losa'y mbecy nu shiñ ricy. Nunu tub ze' nu yu' yaa wac gac losa'ñ ze' nu cow. <sup>15</sup> Gun Crisht walab tub zi'l shcab ricy cup mi nu nuras. Ni' zi'l de mbecy nu ricy cup consuel lom reña' na shcab ricy cup yu par mbecy nu a' ricy cup consuel lom. <sup>16</sup> Nunu yu' wedz ni Ñgyoozh wangyap ñi nu gyicy cup ñi nab. Gun de ub na nac naa yu' wedz ni Ñgyoozh, biñ nu rbic gyel mbañ. Gal nu ub mi mniim:

Ya zu lat dey, nunu chesa d u dey.

Ya nacä Ñgyoozh ni dey.

Nunu de yu ze' gac dey mbecy ne.

<sup>17</sup> Orze' bruu der lat mbecy cyi, nunu bruu chu der lat dey, na Ñgyoozh, Shuaan den.

Cue' gyicy cuen der cushtom ni mbecy cyi.

Orze' ya shet icä nu gyecha' der lo.

<sup>18</sup> Nunu ya gacä uz der.

Ze' de ru gac der i'ñ gyeeya nu i'ñ fiñ mñña.

Ni na Ñgyoozh Shuaan den, biñ nu gac gyicy dela coz.

**7** Orze' der b icy na, como Ñgyoozh bi mniim zañ ridz nu segur la gyicy mi, nde' nu rlagy ñi nu chu' den nu gyel cacy. Rlagy ñi nu ruu chu den lo de coz nu gyicy ñi nu gabag cuerpa nin nunu tant espiriit nin. Nunu rlagy ñi nu zu chu den ub na par nu gyicy na coz nu rlagy Ñgyoozh zi'l nu nac nu rca lagy den lom.

Baly ricy cup yu consuel lo de mbecy Corinto

<sup>2</sup> ¡"O" mnii der ne d e nañ lardoor! Gun rila wangyicy de coz a' nap nu ni tub la mbecy. Ni wangyicy de nu gat lo ni tub la mbecy. Ni wanguu d e ni tub la mbecy.

<sup>3</sup> Walab nu ni rnëe lo der nu riiba cyi ic der. Gun tona' la rcä d e ru. Nde' nu rlagya cyiñ tublaazh nu de ru, nunu ornu gat de ru, orze' ni' zi'l rlagya gata tublaazh nu de ru. <sup>4</sup> Ya tona' la ricy cupa consuel lo der, nunu yet lagya nu nac der. Lat dela gyel deet nu rzac d e, ya ricy cupa baloor nunu dub gal rii la lagya yet lagya.

<sup>5</sup> Nese lat nu bri d e lo de yu ni Macedonia, rila wangaad nu zu lagy d e, sinu dela lugaar nu gua d e yu' gyel deet. Yu' rucoo nu mbecy d e ya dela ze' nu rdedä.

Orze' yu' rdzib d e nañ lardoog. <sup>6</sup> Tees Ñgyoozh, biñ nu rbic baloor ni mbecy nu a' ricy cup baloor, mi ze' briic mi baloor ne d e nu nac nu biid Tito lo d e. <sup>7</sup> Nunu walab nu briic d e baloor nu nac nu bri zi'l yu lo d e, sinu ni' zi'l nu nac de coz nu mniy lo. Mniy nu tona' la briic der baloor niy. Nunu mniy lo nu tona' la rlagy der nu zac ru d e ya. Nunu mniy nu ricy shni der nu nac d e, nunu rsug ic der nu nac d e. Nunu nu nac de nu nde' yet zir lagy d e na.

<sup>8</sup> Mas gyicy nu bzeedə lo der b icy ñi nu b icy shni der, tees ya yet lagya nu bzeedə ñii lo der. Gun ya anzir wangyet lagya nu bzeedə ñii lo der, tees na yet lagya. Wangyet lagya, gun gud lagya nu b icy shni der. Tees tub miiñ zi'l b icy shni der. <sup>9</sup> Tees na dzi yet lagya. Walab nu yet lagya nu b icy shni der, sinu yet lagya, gun mne' der dela cyir ornu b icy shni der. Gun de ru b icy shnir gal mod nu rlagy Ñgyoozh. Nde' nu walab nu shiñ b icy du d e der. <sup>10</sup> Gun benu tub mbecy gyicy shni gal mod nu rlagy Ñgyoozh, orze' nde' ricy ñi nu dza mod nu gyicy yu. Nunu nde' gyicy ñi nu gruu mbañ yu. Orze' walag y ñi nu gyicy shni zir yu. Tees be-nu mbecy gyicy shni, tees benu walab gal mod nu rlagy Ñgyoozh, orze' nde' gyicy ñi nu gat yu par lo Ñgyoozh. <sup>11</sup> Tees de ru b icy shnir gal mod nu rlagy Ñgyoozh! Orze' na güii la guc. Nu nac nu b icy shni der nap gush der shcab nu nac asunt ze'. Nunu bzu fert der nu mnii der nu sac falt nir. B icy ñi nu pcha' ic der. Nunu b icy ñi nu gudzib der. Orze' despuees ngulagy der nzac ru ya. Nunu nde' b icy ñi nu briic der cashtig ni mbecy nu shiñ b icy ze'. Nu nac de nu nde' b icy ñi nu rabee nu rila sac falt ni der nu nac asunt ze'. <sup>12</sup> Orze' ornu bzeedə gyicy ze' lo der, nde' walab par nu nac yu nu shiñ b icy, ni walab par nu nac de yu nu gutow ni. Sinu bzeedə gyicy ze' lo der par nu gyicya nu gabe par lo Ñgyoozh nu dzi rzu bich der nu nac d e ya. <sup>13</sup> Nu nac nde' guud baloor ne d e.

Nunu walab nu briic zi'l ñi baloor ne d e ya, sinu ni' zi'l bet lagy d e nu nac nu bzaac d e nu ni' zi'l Tito bet lagy yu, gun dela der b icy ru nu guti ri añ niy. <sup>14</sup> Gun ya byabica gyel mbecy ni der lo Tito. Nunu de ru wangiyicy der nu gruu gyel mbecy ne ya. Gal nu rishli rnęe d e lo der, ni' zi'l rishli rnęe d e lo Tito ornu byabica gyel mbecy ni der. <sup>15</sup> Nunu yu ze' dzi zir rcay de ru, ornu yeza' lagy yu nu dela der rzuub gyidag ru niy, nunu nap b icy nu der yu ornu biid yu lor. <sup>16</sup> Orze' ton a' la yet lagya nu gac gyicy cup za' l a consuel lo der!

### Wansi la dey briic yu gun

**8** Na der b icy na, rlagya nu gad lagy der la coz guc lat de mbecy ni Crisht nu yu' de gyedz ni Macedonia nu nac nu Ñgyoozh nap b icy num dey. <sup>2</sup> Mas ton a' la deet bzac dey nu nac de preb, tees ton a' la nap zu lagy dey. Nunu mas ton a' la gyel zi zu dey, tees wansi laa dey briic yu gun. B icy dey gal nu ricy mbecy guaniñ. <sup>3</sup> Ya rishli rnęe lo der nu dub gal rii la lagy dey briic yu ca na la nu gac cuic yu. Nunu sheñ zir briic dey par nu tanta' bloo lo dey. <sup>4</sup> Nunu ton a' la mnishbaa dey lo d e nu gricä rishbeey nu locyuub dey de' zir yu nu rbic gun ni de mbecy ni Ñgyoozh. <sup>5</sup> Nap zir b icy dey par mod nu brish lo lo dey. Nu loga la briic dey ub yu par nu gyicy yu de coz nu rlagy Shuaan den Jesuuz. Nu cyup briic dey ub yu par nu gyicy yu de coz nu rlagy de ya. Ni b icy dey gun nde' coz nu rlagy Ñgyoozh. <sup>6</sup> Nde' nu bd y' de riiñ yaa Tito nu te'y gun ze' lat de ru, gun nu rbic der nu nac nu dzi rcar losa'r, como laab Tito, yu ze' yu nu bzuub gyi' riiñ ze'. <sup>7</sup> Gun de ru nap ricy der nu dela coz nu ricy ru. Nap ricy cup der consuel lo Cr-

isht. Nap rshaal der de riidz nim. Nap rad lagy der de coz nim. Dub gal rii la lagy der ricy ru riiñ nim. Nunu nap rca der d e ya. Orze' ni' zi'l rlag y ñi nu nap gyicy der riiñ ni gun ze' nu nac nu rca der losa'r.

<sup>8</sup> Walab nu ricya mandaar lo der nu ni gyicy ru. No-maas nu ya rlagya rlyuñ ni der de mod nap nu ricy de' zir mbecy, gun orze' ricä tub mod nu gyicy der nu gabe nu rishli rca der losa'r. <sup>9</sup> Gun de ru rad lagy der de coz nap nu b icy Shuaan den Jesucrist. Mi ze' guaniñ mi nu nac de coz ni Ñgyoozh, tees byac mi mbecy zi nu nac de ru. Gun nu nac nu byac mi mbecy zi, orze' de ru byaguaniñ der nu nac de coz ni Ñgyoozh.

<sup>10</sup> Orze' na ricä consef ni der nu nac gun ze'. Na'n bed ed de ru mbecy loga la nu pte' de gun ze'. Tees walab nu tub lo zi'l nu de ru nac der mbecy loga nu briic, sinu ni' zi'l nu dub gusht la briic der ñii. <sup>11</sup> Orze' na bza' lo der riiñ nu bzuub der gyi' ze' dub gal nu gac ni der. Nunu dub gusht la bza' lo der ñii gal nu b icy der nu loga la ornu mnii too der nu gyicy ruñ. <sup>12</sup> Gun benu tub mbecy rishli gaal rlag yu cuic yu tub gun, orze' Ñgyoozh "O" niim gyash mi ñii dub gal nu gac cuic yu. Gun Ñgyoozh rniim nu cuic der coz nu yu' nir, walab nu rni-im nu cuic der de coz nu sac nir.

<sup>13</sup> Walab nu rlagya nu nu zac zi der par nu cuic der coz nu cyiñ ni reña' mbecy. <sup>14</sup> Sinu rlagya nu gal gaa la chu' nu der de' zir mbecy. Na na la ricy cup der coz nu ricy falt ni dey. Orze' gac locyuub der dey. Ze' ornu ruu su tuuba' tir, orze' de yu ze' gyicy cup dey coz nu gyicy falt ni de ru. Orze' gac locyuub dey de ru. Orze' benu locyuub der losa'r, orze' tub zi'l mod zu der nu de yu ze'. <sup>15</sup> Gun i mod za de riidz ni Ñgyoozh:

Mbecy nu pte' sheñ, wanrusub sheñ niy.  
Nunu mbecy nu pte' ñumiiñ, wangiyicy falt ñi niy.  
Ni rniñ lat de riidz ni Ñgyoozh.

### Tito zay Corinto

<sup>16</sup> Ya dricä gras ni Ñgyoozh, gun b icy mi nu ca ic Tito de ru gal nu ya ca icä der. <sup>17</sup> Gun walab nu tub lo zi'l nu bet lag yu ornu bd y' riiñ yaay nu cyid güi y de ru, sinu ni' zi'l bi bruu lardooy nu cha güi y der, como nil ca ic yu de ru.

<sup>18</sup> Nunu gzuu nez d e Tito tublaazh la nu tub mbecy nu nap yu' lo dela mbecy ni Crisht nu nac de riiñ nu b icy yu nu ptush las yu de riidz nu sac ni Crisht. <sup>19</sup> Nunu yu ze' tub mbecy nu pcui dela de mbecy ni Crisht nu cha nuy d e ya byaj ornu cha zeeña de gun ze'. Gun orze' nu nac nde' ca lagy mbecy lo Shuaan den Jesuuz, nunu gabe nu yet lag y den nu rlocyuub na losa'n. <sup>20</sup> De ya rlag y de yub d e tub mod nu cue' nii zi mbecy ne d e nu nac mod nu rte' d e de gun zañ ze'. <sup>21</sup> Gun ryub de mod nu nap, walab tub lo zi'l par lo Shuaan na Jesuuz, sinu ni' zi'l par lo de mbecy.

<sup>22</sup> Nunu tublaazh la zuu nez d e yu ze' nu tuuba' b icy na nu nac Crisht. B icy de preb yu zañ tir, nunu zañ mod b icy yu nu rabee nu nac yu mbecy nu zu fert. Nunu fert zir zuy nu nac nu ton a' la ricy cup yu consuel lo der. <sup>23</sup> Ze' benu grusu tub mbecy nu cugy' Tito, ben

cyu nac yu, orze' mnii loy nu yu ze' losq'. Ricy nuy ya riñ ornu ricy de coz nu cyiñ par de ru. Ze' benu grusu tuuba'y nu cugyi' cyu nac de' zir de b icy na ze', orze' mnii lo dey nu de yu ze' mbecy nu bzuu nez de mbecy ni Crisht. Nunu ca lagy mbecy lo Crisht nu nac de yu ze'.<sup>24</sup> Orze' gyicy der tub mod nu gad lagy de mbecy ni Crisht nu rishli rca der de yu ze'. Orze' gad lagy dey nu nap ricy de ornu driib zily de de ru.

#### Rte' dey tiñ par de b icy yu nu nac Crisht

**9** Walagy ñi nu zeeda gyicy lo der nu nac gun nu rte' der nu cuic ru ni de b icy na nu nac Crisht,<sup>2</sup> gun ya rad lagya nu rlagy der locyuub ru dey. Gun ya byabica gyel mbecy ni der lo de mbecy Macedonia. Mnëe nu de ru, mbecy Acaya, bi mnii der nu locyuub ru nese ña'n bded. Orze' nu nac nu dzi nap b icy der, briic der fers ni zigy de mbecy Macedonia, gun orze' ni' zi'l gyicy dey yu ze'.<sup>3</sup> Orze' na ya zuu neza de b icy na nu nac Crisht ii, gun orze' cue' nu leew la gyabica gyel mbecy ni der. Gun orze' zu lily der gal nu mnëe lor.<sup>4</sup> Gun dzi ga cyid de mbecy Macedonia nu de ya ornu yapa lo der. Orze' benu zac dey nu a' zu lily der, orze' mas de ya tona' la gat lo de, gun dzi b icy cup de consuel lo der. Ze' yegar de ru dzi zir gat lo der.<sup>5</sup> Nde' nu ya mnii too nu nap zir nu nee lo de b icy na nu nac Crisht nu cyid ga dey lo, gun orze' locyuub dey de ru nu laazh der nu te'r gun nu mniir nu cuic ru. Gun orze' bi yu' lily ñii ni der. Nañ gal nu na tub gun nu dub gusht la cuic der, walab nu rzi der cuic ru.

**6** Pcaa ic der de riidz ii: Mbacy nu rnuuz coz miiñ mbiyg, orze' coz miiña' rte'y. Mbacy nu rnuuz sheñ mbiyg, sheña' rte'y.<sup>7</sup> Tub ga la mbecy rlagy ñi nu cuic yu ca na nu gruu nañ lardooy. Nunu cue' gzi dey nu cuic yu. Ni cue' por fers la cuic yu. Gun Ñgyoozh yet lagy mi mbecy nu dub gal rii la lagy yu rbic yu nim.<sup>8</sup> Nunu Ñgyoozh gac cuic za' lam de lo la coz nap nim ni der, gun orze' dub laa tiem gad coz nu cyiñ ni der, nunu grusuba' lañ par nu gyicy nu der ñii de lo la riiñ nap.

**9** Gun lat de riidz ni Ñgyoozh rniiñ:

Mbacy nap dub gal rii la lagy yu rbic yu ni mbecy zi. Nunu riiñ nap nu ricy yu, nde' gzuñ tub la, rniiñ.<sup>10</sup> Ñgyoozh rbic mi de mbiyg nu rnuuz mbecy. Nunu rbic mi coz nu gow dey. Orze' na de ru na der gal nu na mbecy nu rnuuz la coz nu nac gun nu rbic ru. Ñgyoozh cuic mi de mbiyg nu galagy ñi nu nuuz der. Nunu gyicy mi nu galy ñi ni der. Nunu cuic mi tub cosech sheñ ni der nu nac nu sheñ tiñ cuic der nim.<sup>11</sup> Ñgyoozh cuic mi sheñ ni der, gun orze' gad mod nu cuic der sheñ de tir la nu cuic der. Gun orze' zigy mbecy cuic dey gras ni Ñgyoozh nu nac gun nu zeed der yaa de ya.<sup>12</sup> Gun ornu zeed der gun lo de b icy na nu nac Crisht, walab tub lo zi'l nu cuic ru coz nu cyiñ ni mbecy nu ricy falt ñi ni, sinu ni' zi'l gyicy der nu zigy mbecy cuic yu gras ni Ñgyoozh nu nac gun nu zeed der.<sup>13</sup> Orze' de yu ze' gyabic dey gyel mbecy ni Ñgyoozh, gun de coz nap nu gyicy der gyicy ñi nu gabe nu de ru rzuub gyidag der ni de riidz nu sac ni Crisht.

Orze' ni' zi'l de yu ze' ca lagy dey lo Ñgyoozh nu nac de

tiñ sheñ nu briic der ni dey gal nu ni dela mbecy.

**14** Orze' tona' la gyet lagy de yu ze' nii nu dey Ñgyoozh nu nac de ru, gun mi ze' tona' la nap b icy num der.

**15** ¡Orze' rlagy ñi nu gric den gras ni Ñgyoozh! ¡Ni waca' la niin nu tanta' coz ily rbic mi ni den!

#### Riiñ nu bdu' Ñgyoozh yaa Baly

**10** Ya Baly. Yu' mbecy nu rniiy nu ornu zu lat dey, orze' nacä mbecy gyidz. Ze' ornu sacä lat dey, orze' dzi balientä, rnii dey. Orze' ya doq rishlo der, nu nac nu Crisht dzi gugy nam nunu dzi nap mi,<sup>2</sup> orze' cue' gyicy der nu gyicya gyel balient ne ornu yap güiñ der. Gun ni gyicy du la be mbecy nu rnii nu ricya riiñ nu nac shcab ni mbecy zi'l, rnii dey.<sup>3</sup> Rishli gaal nac de mbecy zi'l. Tees wachucqo de gal nu rucoo mbecy ni gyishlombecy ii ornu rza de contr ni nuras.<sup>4</sup> Gun de suu de nu rza du gyel yuu, nde' walab coz ni gyishlombecy ii, sinu nde' de coz ni Ñgyoozh. Nunu cyiñ ñi par nu tiily ñi de lugaar nu rsoow de losa' yuu de. Orze' ni mod gyicy de par nu nit lo de cyi fals nu driib mbecy iça.<sup>5</sup> Nunu gyicy de nu nit lo la zi'l coz nu rsoow lo de coz rishli nu rad lagy de ni Ñgyoozh. Orze' ricy de tub mod nu zuub gyidag de ni Crisht nu dela shcab nu drush de.<sup>6</sup> Bi zu la de nu ricä cashtig ni dela mbecy nu wacsuub gyidag ni Crisht ornu bi byanap la rzuub gyidag der nim.

**7** De ru nu rgüiñ zi'l der lo tub mbecy, orze' rnii too der la nay. Orze' benu tub mbecy rad lagy yu nu rishli nac yu mbecy ni Crisht, orze' ni' zi'l rlagy ñi nu gad lagy yu nu de ya nacä mbecy ni Crisht.<sup>8</sup> Mas ya gyabica gyel mbecy ni uba nu nac riiñ nu bdu' Shuaan den Jesucrisht yaña, tees rila wagat lo. Gun mi ze' bdu'm riiñ ze' yaña par nu gyicya nu gyafert zir gyicy cup der consuel lom, walab par nu gyicya nu nit lo der.<sup>9</sup> Walab nu rlagya nu rlyu nu rchiiba de ru nu nac gyicy nu bzeeda lo der.<sup>10</sup> Yu' mbecy nu rnii dey nu dzi fert za de riidz nu bzeeda lo der. Tees rnii dey nu ornu zu lat dey, orze' wacabee ti lily na. Nunu de riidz nu rnëe se la la sac ñi, rnii dey.<sup>11</sup> Tees de mbecy nu ni rnii rlagy ñi nu gad lagy dey gal nu rnëe de lo de gyicy nu rzeeda lo dey ornu sacä lat dey, orze' ni' zi'l gyicy de ornu yapa lat dey.

**12** De ya walab nu rnëe nu gal gaal la zu nu de mbecy nu ryabic gyel mbecy ni ub zi'l ze'. Ni wasaap de uba gal nu na de mbecy ze'. Tees de yu ze' ricy ton dey ornu rgüiñ dey nu la na ub yu nu nac shcab ni ub zi'l yu, nunu ornu rsaap dey ub yu nu de losa'y.<sup>13</sup> Walab nu ricy zily de uba tub mod nu walab se'ñ ornu byap de nu loga la lat de ru nu pshaal de de riidz ni Crisht. Gun bdu'm riiñ yaa de nu gyicya riiñ ze' lat de ru.<sup>15</sup> Nunu wagyicy le' de nu nac riiñ nu ricy reña' mbecy, gun be-nu ni ñgyicy de, orze' ruu chü de lo riiñ nu bdu' Ñgyoozh yaña. Lugaar nu ñgyicy de nde', orze' drish lo de nu gad zir riiñ nu gyicy de lat de ru dub gal nu yafert

zir ricy cup der consuel lom. Tees dub laa tiem riiñ nu bdu' zi'l Ñgyoozh yaa de, nde' zi'l riiñ nu ricy de. <sup>16</sup> Ni' zi'l drish lo de nu gad zir riiñ nu gyicy de nu cha shaal de de riidz nu cuic gyel mbañ de lugaar nu zet zir gaze' de ze' nu yu' de ru, gun orze' cue' nu gyicy de riiñ ze' nu ricy reña' mbecy riiñ, gun orze' cue' nu gyicy le' de nu nac riiñ nu bicy reña' mbecy.

<sup>17</sup> Orze' benu ca na tub mbecy rlag yu riib zily yu tub coz, orze' rlag yñi riib zily yu Ñgyoozh, Shuaan den.

<sup>18</sup> Gun benu mbecy riib zily yu ub yu, orze' wacyiññi. Tees benu Ñgyoozh riib zily mi yu, orze' gaze' nu cyiññi.

### Mbecy fals nu ricy riiñ ni Ñgyoozh

**11** ¡Dzi ga nap benu gyicy cup der pasez ne nu nac coz ton nu ricya! <sup>2</sup> Yä dzi drushä shcab nu nac de ru. Tees Ñgyoozh bicy mi nu ni gyicya. Orze' de ru nar gal nu na tub fiñ feñ. Ze' ya na gal nu na de uz der. Ya bi brica rishnii nu chelaa der tub zi yu gyeey. Mi ze' Crisht. Orze' ya rlag yä ricä der gal nu na tub fiñ feñ yon nu sac la falt ni nu chelaa der Crisht. <sup>3</sup> Tees ya rdziba nu gzac der gal nu bzac Eva. Orze' bily ze', nu nac nu dzi lily na ma par nu guu ma, bicy ma gan bguu ma Eva. Orze' rdziba nu ni' zi'l gyicy nuras nu gadza shcab ni de ru. Orze' checa der nu rcar Crisht nu rishli gal nu mod nu rlag yñi. <sup>4</sup> Gun de ru dub gal rii la lagy der "O" rniir ni cyu zi'l mbecy nu ryiid nu rzat reña' Jesuuz, walab Jesuuz biñ nu rzat de ya. Nunu dub gal rii la lagy der "O" rniir ni tuuba' espiriit nu walab Espiriit Yon ni Ñgyoozh biñ nu guud ni der nu nac de ya. Nunu "O" rniir der ni tuuba' riidz nu rniiñ lac mod gruu mbañ mbecy ze' walab gal nu na de riidz nu pshaal de ya.

<sup>5</sup> Tees ya rzeé nu walab ich zab de par de aposht lily nu za ca der ich ze'. <sup>6</sup> Mas a' cyit za riidz nu rnëe, tees yu' shcab ne. De mod la bicy de nu gad lagy der nu yu' shcab ne dub laa tiem nu nac de coz nu bicy de lat der.

<sup>7</sup> Ya wanloq i ornu pshaala de riidz nu sac ni Ñgyoozh lat der, sinu bicya gyel gyidz ne, gun orze' ya bicy lilya de ru. <sup>8</sup> A shiñ bicya rzii der? <sup>9</sup> Ya bloo tiñ lo reña' mbecy ni Crisht par nu gad mod nu gyicya riiñ ni Ñgyoozh lat de ru. Nde' nañ gal nu na nu bicy gubaanaññi par nu locyuuba de ru. <sup>10</sup> Lat nu gusa lat der, orze' wantiñä tiñ lo ni tub la der ornu ñgalag yñi. Tees de bicy na nu nac Crisht nu yu' gashtal Macedonia briic dey de coz nu ricy falt ne. Orze' ya bicya tub mod nu cue' nu gyicy der gasht nu nac ya. Nunu zaab gyicy la mod ze' par lo. <sup>11</sup> Gal nu rad lagya de coz ni Crisht, orze' rishli gaal washet icä nu soow ni tub la mbecy Acaya ry' nu nac coz nu mnëe ze'. <sup>12</sup> Lagu ni rnëe? A nde' gun ya walab nu rcä de ru? ¡Walab! Ñgyoozh rad lagy mi nu rcä de ru.

<sup>13</sup> Orze' ya zaab gyicy la de coz nu bi ricya, gun orze' cue' nu gricä mod ni de mbecy ze' nu gnii dey nu gal gaa la zuy nu de ya. <sup>14</sup> Tees de yu ze' a' nac dey aposht nu rishli, sinu nac dey aposht fals. Nac dey mbecy rguu. Nu ricy zi'l dey nu nac yu aposht ni Crisht. <sup>15</sup> Tees cue' cha du ic den nu nac nde', gun gaza' nuras ricy yu nu nac yu anc nu rlyuu yaa. <sup>16</sup> Orze' nde' walab la coz

ily, benu de moz ni nuras gyicya' dey nu nac yu mbecy nu ricy mod nu se'ñ. ¡Tees ornu lazsh shup dey laz yu, orze' gyad i dey gal nu yad ñi!

### Baly bzac ziy

<sup>16</sup> Neé lo der tuuba' tir: ni tub la mbecy cue' nii too dey nu nacä mbecy ton. Tees benu de ru ni rnii too der, orze' bzaan la der nu neé gal nu rnii mbecy ton, gun orze' ya gyicy zilyä ubä gal nu ricy de yu ze'. <sup>17</sup> Ridz nu rnëe na, walab nu rnëe ñii por mandaar ni Shuaan den, Jesuuz, sinu ornu driib zilyä ubä, orze' rnëe mod nu rnii mbecy ton. <sup>18</sup> Tees como yu' zigy mbecy nu ricy zily yu ub yu nu nac mod ni mbecy gyishlombecy ii, orze' ni' zi'l ya gyicy zilyä ubä. <sup>19</sup> De ru rzii der nu nac der mbecy siñ too, orze' nde' nu bicy cup der pasez nu tub mbecy ton. <sup>20</sup> Ricy cup der pasez nu mbecy, benu gyicy yu de ru par moz niy. Ricy cup der pasez nu mbecy, benu gyicy yu gan de ru. Ricy cup der pasez nu mbecy benu gyicy ñg yay lo der. Ricy cup der pasez nu mbecy mas cyich la yaay ya lo der. <sup>21</sup> Ya rat lo nu neé lo der, ¡tees a' ricy cup de baloor nu ni gyicy de gal nu ricy de yu ze'!

Tees benu ca na tub mbecy cuic yu baloor nu riib zily yu ub yu, orze' ni' zi'l ya ricä baloor nu gyicy zilyä ubä, nomaas na rnëe mod nu rnii mbecy ton. <sup>22</sup> De yu ze', ya nac dey mbecy hebreo? Ni' zi'l ya nacä mbecy hebreo. De yu ze', ya nac dey mbecy Israeel? Ni' zi'l ya nacä mbecy Israeel. De yu ze', ya nac dey nez Abraham? Ni' zi'l ya nacä nez Abraham. <sup>23</sup> A ricy dey coz nu rnii Crisht? Ya dzi zir ricya de coz nu rnii, mas rlyu nu nacä mbecy ton ornu ni rnëe. Ya fert zir bicya riiñ ni Crisht gaze' de yu ze'. Zañ zir tir mne' mbecy ya nañ yu' gyiib. Zañ zir tir bgaaz dey ya nu cuart. Nunu zañ zir tir nu bi zu la lo rishdzidz nu ñgyatä. <sup>24</sup> Gaay poras de mbecy Israeel pshet dey cuart ichä. Gal rub tiñ zu tap yaa pshet dey ichä tub ga poras lo gaay tir ze'. <sup>25</sup> Chon poras de mbecy bgaaz dey ya nu yag. Ze' tub tir bgoow gyita' dey ya nu bicy pee dey nu ñgyut yu ya. Chon tir ri nañ barc ornu wes tiñ lo nis. Se nu ñgyat zi'la nu nac nis. Tub tir bzabä lo nisyudoo tub dzi nu tub rel. <sup>26</sup> Lo zañ byaj nu gusa zaab zu la lo rishdzidz nu nac gyoow ily. Zaab zu la lo rishdzidz nu nac gubaan. Zaab zu la lo rishdzidz nu nac de losä' mbecy Israeel. Zaab zu la lo rishdzidz nu nac mbecy nu walab mbecy Israeel. Bzu la lo rishdzidz lat gyedz. Nunu bzu la lo rishdzidz ngush. Bzu lo lo rishdzidz lo nisyudoo. Bzu la lo rishdzidz nu nac amig fals ne. <sup>27</sup> Tona' la fers bicya riiñ. Yu' gashtal gut ziñ la. Zañ tir guch pacaala. Yu' nu byana. Yu' nu wangad nis do'. Zañ tir wangad coz nu daw. Yu' nu guzilya. Yu' nu bicy falt shaba.

<sup>28</sup> Yu' zañ coz nu wansata lo der. Tees de dzi la deet rac nañ lardoo nu nac nu rsug icä nu nac dela mbecy ni Crisht. <sup>29</sup> Benu tub mbecy rat yu, orze' ni' zi'l nañ gal nu na nu rat ya. Benu cyi gyicy ni gan tub mbecy, orze' dzi rac nañ lardoo. <sup>30</sup> Tees benu rlag yñi nu gyicy zilyä ubä, orze' nap zir nu zata de coz nu gyicy ñi nu gabe nu nacä mbecy wacyiñ. <sup>31</sup> Ñgyoozh, Uz Shuaan den Je-

sucrisht, rlagy ñi nu gyabic den gyel mbecy nim dub laa tiem. Mi ze' rad lagy mi nu ya rishli rn̄e. <sup>32</sup> Orze' tub tiem lat nu pcyiiñä gayedz Damasco, orze' yu nu riib ic por cuen ni rey Aretas mniiy lo de mbecy nu ña dey dela ro' ni lo' nu zu dub yub la ru' gayedz ze', gun orze' cub dey ya nu cha nuy ya pres. <sup>33</sup> Tees bruu su la be mbecy gua nu dey ya ze' nu ca tub bentan ni lo' ze'. Orze' ze' bloo dey ya par ich. Nañ tub chicyiw pshet dey ya tub la' ga' ich lo' ni gayedz ze'. Orze' ni mod briib dz̄e lo yu nu riib ic ze'.

### Coz nu bde' lo Baly

**12** Se la la coz gyicy na gan benu riib zily na ub na.  
Mas ni, tees rlagy ñi nu neq de coz nu b icy  
Shuaan den Jesuuz nu mnii pcaal gal nu de coz nu b icy mi nu bde' lo. <sup>2</sup> Ya yu' lo tub mbecy ni Crisht nu bi bza' trotap ña'n byay gal gyibaa. Wagad lagy ti ni gaal guc ñi, o ti pcaal zi'l b icy ñi nu bde' loy. Tub zi la Ngoozh rad lagy mi. <sup>3</sup> Wagad lagy ti nu cuerpa ni byay uti espiriit zi'l ni ybyañ. Nde' wagad lagy. No-maas tub zi la Ngoozh rad lagy mi. <sup>4</sup> Tees yu ze' byay gal gyibaa. Orze' güeñ yu coz nu wac gyañ nu riidz. Ni wad rishbeey nu gnii mbecy de coz ze'. <sup>5</sup> Orze' ya gac riib zilya yu ze'. Tees ya wariib zilya uba. Nomaas ya neq de coz nu gyicy ñi nu gabe nu wacyiiñä. <sup>6</sup> Nunu be-nu riib zilya uba, orze' walab nu ricy tonä, gun ya rishli rn̄e. Par ya wayicy zilya uba, gun orze' cue' nu nii too mbecy nu ya gya zir zu gaze' mod nu bzac yu ze' nu zu gal nu mod nu reñ dey nu rn̄e.

<sup>7</sup> Tees par nu tonä' la coz ily bzaca, nde' nu Ngoozh briic mi tub güii ne par nu cue' gyale'. Güii ze', nde' nañ gal na tub gyech nu ri nañ cuerpa ne. Nde' nañ gal na tub coz nu ricy nuras par nu ricy ras yu nuy ya.

<sup>8</sup> Orze' chon tir bdiñä lo Shuaan den Jesuuz nu com güii nu ricy cupa ze'. <sup>9</sup> Orze' nam rab mi ya: "Ya nap ricy du ru. Orze' beñ nu nde'. Gun nap zir rabee nu ya dzi ferta nu nac nu ru wacyiiñ ru", nam. Nde' nu yet zir lagy nu naca mbecy wacyiiñ, gun orze' gabe nu Crisht dzi fert mi nu nac ya. <sup>10</sup> Nde' nu yet lagy nu nac nu wacyiiñä. Yet lagy benu gab zi mbecy ya. Yet lagy benu wagad de coz cyiiñ ne. Yet lagy benu shet zi mbecy ya. Yet lagy benu deet zaca nu nac Crisht. Gun ornu ya dzi zir wacyiiñä, orze' naca mbecy nu fert zir.

### Baly rsug ic yu nu nac de mbecy Corinto

<sup>11</sup> Ya bicy gal nu ricy mbecy ton ornu b icy zilya uba, tees de ru b icy ru nu b icy ñi. Gun de ru yad ñi ni der nu gyicy zily ru ya. Gun walab nu sac zir de aposht lily nu za ca der ich ze' gaze' ya, mas ya se la la saca.

<sup>12</sup> Gun ya nu paséz b icy riiñ lat der. Orze' b icy coz ily. Nunu b icy nusuriidz. Nunu b icy coz nu cha nu ic mbecy. Orze' de nu nde' ricy ñi nu rabee nu rishli naca tub aposht. <sup>13</sup> Orze' b icy sulagy der ne benu a' nap b icy du de ru. Gun de ru gash zir zu der gaze' de' zir mbecy ni Crisht nu nac tub zi coz. Coz ze', nde' nu wantiñä coz nu cyiiñ ne lo der. Orze' b icy sulagy der ne.

<sup>14</sup> Na bi zu lilya nu yap güii de ru byaj chon. Nunu ni' zi'l wadiñä coz nu cyiiñ ne lo der. Gun coz nu rlagya, nde' ub la de ru. Walagya coz nu yu' ni der. Gun yu nguzh wacuic dey coz cyiiñ ni de mbel niy, sinu de mbel, yu ze' rbic yu de coz nu cyiiñ ni iñ yu. <sup>15</sup> Ya "O" neq laazha dela coz nu yu' ne, nunu mas gashtal glaazha uba par nu locyuuba de ru. Rlyu nu ornu ya dzi zir rca de ru, orze' de ru dzi zir waca der ya.

<sup>16</sup> Orze' ya walab nu byub la too der. Mas ni, tees yu' mbecy nu rniiy nu bguu de ru par nu gyicya gan der.

<sup>17</sup> ¿Walab gaal nu bguu de ru nu nac tub mbecy nu bzuu neq nu biid yu lo der? <sup>18</sup> Mnishbaq lo Tito nu cyid güii de ru. Nunu bzuu neq tuuba' b icy na nu nac Crisht ze' nu cyid nu dey yu. ¿Walab gaal bguu Tito de ru? ¿Walab gaal rup laq nu Tito ricy de tub zi'l mod, nunu zu de tub zi'l shcab?

<sup>19</sup> Cyup riidz de ru rnii too der nu de ya zaab ryuub la de mod par nu gabe nu sac falt ne. Tees walab ni, sinu rn̄e de de coz nu rlagy Crisht par lo Ngoozh. Nunu de ru b icy de nu dzi rca, dela coz nu ricy de ricy de ñii par nu locyuuba de ru. <sup>20</sup> Ya rdziba ornu yap güii der, orze' zaca der nu reña' mod ricy der gaze' mod nu rlagya. Rdziba nu zac der ya nu reña' mod na gaze' mod nu rlagy de ru. Rdziba nu zac nu deet yu' der nu losa'r. Zaca nu rasaap lagy der. Zaca nu rcha' ic der. Zaca nu bigy lagy der. Zaca nu rnii der rishcuen. Zaca nu rnii zi der ni losa'r. Zaca nu nac der mbecy le'. Zaca nu wavyicy der gal mod nu rlagy ñi. Ni' zi'l rdziba.

<sup>21</sup> Rdziba ornu yapä tuuba' tir, orze' Ngoozh gyicy mi nu gat lo nu nac de ru. Nunu gyicya sentiir nu nac de mbecy nu b icy coz cyi, ze' wanne' dey cyi nu b icy yu. Gul dey biñ mñaa nu wanchelaay. Bicy dey de cyi ni biñ mñaa.

### Laab nde' la blazh rasoo ni Baly

**13** Na tir chon nu yap güii der. Orze' benu tub mbecy riib yu cyi too losa'y, orze' rlagy ñi cyup o chon teshtig. <sup>2</sup> Na rn̄e ga' lo de yu nu b icy cyi gulas gal nu lo de' zir mbecy, gal nu mn̄e byaj cyup nu byap güii de ru. Nunu rn̄e ga' nu gyicy cuidad der, gun be-nu yapä tuuba' tir, orze' segur la wazaana ded ligaañ ni dey, <sup>3</sup> gun de ru rlagy der nu lyuu ni der nu ya neq por cuen ni Crisht. Gun Crisht walab nu a' fert ricy num der, sinu ricy mi nu nap rabee nu dzi fert mi nu nac coz nu ricy num de ru. <sup>4</sup> Gun mas a' fert mi ornu biit mbecy mi lo cruzzi, tees mbañ mi nu nac nu dzi fert Ngoozh. Orze' ni' zi'l de ya a' ferta, tees lat nu nac de mbecy nim, gac gyicy de de coz nu rlagy ñi ni de ru nu nac nu Ngoozh dzi fert mi.

<sup>5</sup> Orze' bgüii der lac na ub ru, gun orze' gad lagy der ben a rzu fert der nu nac de coz ni Crisht. Orze' b icy der preb ub ru. ¿A wagad lagy der nu Jesucrisht cyiiñ mi nañ lardoo der? ¡Benu wagad lagy der nde', orze' wangyicy der gan preb ze'! <sup>6</sup> Tees drish lq lo der nu yad lo orze' gad lagy der nu walab nu wangyicy de gan nu nac coz ni Crisht. <sup>7</sup> Orze' de ya diñ de lo Ngoozh nu cue' gyicy der ni tub la coz a' nap. Walab ti gun ni rn̄e de par nu gabe nu b icy gan nu nac riiñ ni Crisht, sinu

ni rnęę dę gun orze' de coz nap zi'l, nde' gyicy der. Wagiyicy ñi presis ti gabe nu b icy dę gan.<sup>8</sup> Gun dę ya rila wacha contr ni coz rishli, sinu tub lo zi'l nu rzę dę faboor ni coz rishli.<sup>9</sup> Nde' nu yet lagy dę ornu wacyi-iñä. Ni' zi'l yeta' lagy dę ornu de ru dzi fert der. Orze' zaab rnęę du lą dę Ñgyoozh nu nac de ru gun orze' gyanap der.<sup>10</sup> Ya pcaä gyicy ii anzir nu yap güjj de ru, gun ornu yapä lo der, orze' walagy ñi nu dzi fert gyicy du der ornu gyicyä riiñ ni Shuaan den Jesuuz. Gun mi ze' bdu'm riiñ ze' yaä nu locyuubä de ru nu gal shcab ni der. Walab nu bdu'm riiñ yaä dę par nu nit lo de ru.

<sup>11</sup> Na der b icy na, ya rlagya nu dub gusht la cyiñ der. Bloo lo der nu gac der mbecy gal nu rlagy Ñgyoozh. Bzuub gyidag der ni de consuel nu dricä ni der. Bicy der tub zi'l shcab. Nunu gu' der nu gyel ri zu. Orze' Ñgyoozh, biñ nu rca de mbecy, nunu biñ nu zeed gyel ri zu lat dey, mi ze' gac num de ru.<sup>12</sup> Mnii der Ñgyoozh nu losa'r gal mod nu rlagy ñi.<sup>13</sup> Dela de mbecy ni Ñgyoozh zeed dey ñgyoozh ni der.

<sup>14</sup> Orze' Shuaan na Jesucrisht gyicy mi faboor nu nap gyicy num de ru. Nunu Ñgyoozh rcam der. Nunu Es-piriit Yon nim gac num de ru.

# Gálatas

Baly bzeed yu ñgyoozh ni de mbecy ni Crisht nu yu' lo  
yu nu la Galacia

**1** Ya Baly tub aposht, tub yu nu rded riiñ ni Jesucrist.  
Riiñ nu bdugyi, nde' walab coz nu bruu lo de  
mbecy, nunu walab riiñ nu briib mbecy icä, sinu Jesucrist  
ni Ñgyoozh, uz na, briib mi ñii icä. Nunu Ñgyoozh,  
uz den bicy mi nu byabañ Jesucrist. **2** Ya nu de bicy na  
nu yu' ii zeed dë ñgyoozh ni dela mbecy ni Crisht nu  
yu' de gyedz nu yu' lo de yu nu la Galacia.

**3** Orze' Ñgyoozh, uz den, nunu Shuaan den Jesucrist  
gyicy dem faboor nu nap gyicy num de ru, nunu gyicy  
mi nu cheti ri aña ni der. **4** Jesucrist pshet ic mi nu gut  
mi par nu cyish mi cyi den. Ni bicy mi, gun orze' locyub  
mi den lat nu rded na lat de mbecy shiñ ricy nu yu'  
gyishlombecy ii. Ni bicy mi gun nde' coz nu rlagy Ñgyoozh,  
uz den. **5** Rlagy ñi gyabic na gyel mbecy nim tub  
la. ¡Laab ni gac ñii!

Benu mbecy ricy cup yu consuel nu reña' mod nu ruu  
mbañ yu, orze' nac yu mbecy bdune'

**6** Ya tona' la za du icä nu wangac tuñ la bi rlaa yaa  
der Ñgyoozh, biñ nu pcui de ub na nu gac nim nu nac  
faboor nu bicy Crisht. Rlaa yaa der Ñgyoozh par nu ricy  
cup der consuel lo reña' riidz nu rniiñ nu reña' mod  
ruu mbañ naa. **7** Rishli walab nu yu' reña' riidz nu rniiñ  
lac mod gruu mbañ mbecy, tees yu' la be mbecy nu  
rcan yu shcab ni der, nunu rlag yu chaay de riidz nu  
sac ni Crisht. **8** Tees mas dë ya, o mas tub anc nu ruu  
gal gyibaa shaal yu tub riidz nu za contr ni riidz nu  
pshaal dë lo der, orze' yu ze' byanduuy. **9** Gal nu bi  
mneé lo der, laaba' nde' nee ga' na. Benu ca na mbecy  
shaal yu tub riidz nu za contr ni de riidz nu sac ni Jesucrist,  
de riidz nu ricy cup der consuel lo ze', orze' yu  
ze' byanduuy.

**10** Ya wagnée de coz nu yet zi'l lagy mbecy, sinu rneé  
de coz nu yet lagy Ñgyoozh. Walab nu ricya nu gyet  
lagy mbecy ya, gun benu ni gyicya par nu gyet lagy  
mbecy ya, orze' wagiyicy yaca nu de mandaar nu rnii  
Crisht.

Lac mod guc nu byac Baly aposht

**11** Ya rlagya ricä nu gad lagy der bicy na, nu de riidz  
ni Jesuuz nu rshaala, nde' walab coz nu bloo ic mbecy.

**12** Ni walab lo mbecy bloq ñii. Ni walab mbecy blyuuy  
ne. Sinu Jesucrist bicy mi nu gud lagyä ñii.

**13** Gun de ru bi güeñ der mod nu bicya gulas, lat nu  
pca lagya lo cushtom ni de mbecy Israel. Ya fert la bz-

aba nu psheed zj de mbecy ni Crisht. Nunu mnii töö  
nu nit lo dey. **14** Ya bicy paa zirä nu de cushtom ni de  
mbecy Israel gaze' de' zir de losä' mbecy Israel, de  
losä' nu tub zi'l ña'n de, gun ya tona' la bicy zilya de  
cushtom ni de gyitoo bel ne. **15** Tees Ñgyoozh nil bloo  
sum ya nu gacä nim nese anzir nu galä ni ñaa. Orze'  
bicy mi tub faboor ily briib mi riiñ nim icä. Nunu bet  
lagy mi **16** nu bicy mi nu gu' lo iñ mi, Jesuuz, gun orze'  
ya gac shaala riidz ni Jesuuz lat de mbecy nu walab  
mbecy Israel. Ornu bicy mi nde', ya wansaapa riidz  
nu ni tub la mbecy. **17** Ni wancha Jerusaleeng nu ñgya  
güü de' zir de yu nu bi nac aposht anzir nu ya gacä  
aposht. Sinu lueg la gua gal Arabia. Orze' bruu Arabia,  
gaze' nu bish cyä za par Damasco.

**18** Gal bza' chon ña'n, gaze' nu bruu Damasco yaä  
par Jerusaleeng nu du' lo Bed. Orze' pcyiiñ du yu tiiñ  
dzi. **19** Tees wansaca de' zir de aposht. Nomaas Santiag  
bicy Shuaan den, yu ze' zi'l bzaaca. **20** Ñgyoozh rad lagy  
mi nu de coz nu caä lo gyicy ii, nii coz rishli.

**21** Despuees gaze' nu bruu Jerusaleeng. Guä de lu-  
gaar ni Siria nunu guä de lugaar ni Cilicia. **22** Nunu de  
mbecy ni Crisht, de yu nu yu' Judea, gabee nigul chu'  
lo dey ya nu zac la dey lo. **23** Nomaas reñ zi'l dey nu  
zaab riidz nu rnii mbecy: "Yu nu bzab ich den gulas, na  
bi rded yu rshaal yu riidz nu ricy cup den consuel lo, ri-  
idz nu ngulagy yu nu nnit loy gulas", rnii mbecy.  
**24** Orze' ryabicy dey gyel mbecy ni Ñgyoozh nu nac ya.

De' zir de aposht bicy losa' dey Baly

**2** Ornu bza' trotap ña'n, orze' byaa tuuba' tir  
Jerusaleeng nu Bernabee. Nunu gaza' Tito bya du  
yu. **2** Byaa gun Ñgyoozh bicy mi nu gud lagya nu rlag  
ñi nu gyä. Orze' ornu bri Jerusaleeng, byatublaazha nu  
de yu Zub lo zi'l. Orze' wangac chu' reña' mbecy. Mneé  
de riidz nu sac ni Crisht nu rshaala lat de mbecy nu  
walab mbecy Israel lo dey. Mneé lo dey, gun dzi ga  
leew la bicya de riiñ nu bi bicya, gal nu de riiñ nu gal  
na ricya. **3** Tito, losä' nu rded du, mas nac yu tub mbe-  
cy griego, tees wannii dey nu ca beey sircunsision  
cuerp niy par nu gabe nu nac yu mbecy ni Ñgyoozh.  
**4** Ni a' nii la too dey ti ca beey ze' cuerp niy benu cue'  
nu bru'ña la be bicy na nu rnii coz fals. De yu ze' dze  
ga gu' dey lat de. Gu' dey par nu siiñ yu ne de, gun  
rlagy dey gad lagy yu lac mod ricy de gyi' nu nac de  
mbecy ni Jesucrist. Nunu rlag yu dey gad lagy yu ben a  
ricy paa de nu de leey ni de mbecy Israel. Nunu gu'  
dey par nu yub dey mod nu gyicy de de coz nu rnii de  
leey ze'. **5** Mas lac ru', tees wanguugy lardoo de par ni

ñuu miiñ la nu ñgyicy dē de coz nu rlagy dey, gun orze' de riidz rishli ni Crisht wadza lañ lat der.

<sup>6</sup> Nunu de mbecy zub lo, wancyaañ dey de coz nu lyuu, nunu dela mbecy rad lagy dey nu nac yu mbecy zub lo, (Mas nac dey mbecy zub lo, par ya se la la nde', gun Ñgyoozh wagüiim mod nu na mbecy.) <sup>7</sup> Lugaar nu ñcyaañ dey de coz nu rlyuu, ca nu mnii dey nu rabee nu Ñgyoozh bzum ya nu gyicya riiñ nu shaalä de riidz nu sac ni Crisht lat de mbecy nu walab mbecy Israeel, gal nu bzu ga'm Bed nu ricy yu riiñ nu rshaal yu riidz nu sac ni Crisht lat de mbecy Israeel. <sup>8</sup> Gun laab zir Ñgyoozh nap ricy num de mbecy Israeel nu nac Bed, nunu laab mi nap ricy num de mbecy nu walab mbecy Israeel nu nac ya.

<sup>9</sup> Orze' Santiag, nu Bed, nu Waa, de yu nu rnii mbecy nu nac yu zub lo, de yu ze' gud lagy dey nu Ñgyoozh b icy mi faboor nu nap b icy num ya. Orze' b icy losa' dey ya nu Bernabee. Mnii dey nu de ya cha shaalä de riidz nu sac ni Crisht ze' nu yu' de mbecy nu walab mbecy Israeel. Ze' de ub yu shaal yu de riidz nu sac ni Crisht ze' nu yu' de mbecy Israael. <sup>10</sup> Nomaas nu mnii dey nu ca ga ic dē nu locyuuba de mbecy zi. Nunu ya ni' zi'l zu shcab nu nac nde'.

### Baly pshuu nuy Bed Antioquia

<sup>11</sup> Tees ornu Bed guay gyedz nu la Antioquia, orze' pshuu du yu lo lay, gun yu' falt niy. <sup>12</sup> Gun anzir nu ru'ña la be de mbecy nu rsya' lo Santiag, orze' Bed bdow yu gyit tublaazh la nu de mbecy nu walab mbecy Israael. Tees ornu bru'ña de mbecy ze', orze' b icy zet lagy yu. Orze' bruu chuy lat dey, gun gudzib yu lo de mbecy nu rnii nu dela mbecy ni Crisht rlagy ñi nu gyicy yac dey ni de leey ni de mbecy Israael. <sup>13</sup> Orze' gaza' de mbecy Israael nu nac mbecy ni Crisht bzuu lo dey gal nu b icy Bed. Orze' b icy zet lagy dey bruu chuy lat de mbecy nu walab mbecy Israael, nunu gaza' Bernabee bruu chuy lat dey. <sup>14</sup> Tees ornu bzaca de mod nu ricy dey nu wasaap ñi de riidz rishli ni Crisht, orze' mnée lo Bed lat dela mbecy zigy: "Ru, mas nac ru mbecy Israael, tees rcyiiñ ru mod nu rcyiiñ mbecy nu walab mbecy Israael. Benu ni, ¿walab gaal gac caar de mbecy nu walab mbecy Israael nu gyicy dey mod nu ricy de mbecy Israael?" rugya yu.

**De mbecy Israael gal nu de mbecy nu walab mbecy Israael gruu mbañ dey nu nac nu gyicy cup zi'l dey consuel lo Crisht**

<sup>15</sup> De ya nac dē mbecy Israael nese nu gul laq de. Walab nu bruu dē lat reña' mbecy, de mbecy nu ricy ci. <sup>16</sup> Tees neñ den nu ni tub la mbecy wayanap dey lo Ñgyoozh nu nac nu ricy yac dey ni leey nu bzeeñ Moisees, sinu tub lo zi'l nu gyanap dey lom nu nac nu gyicy cup zi'l dey consuel lo Jesucrisht. Ni' dē ya ricy cup dē consuel lo Jesucrisht, gun orze' gyanap dē lo Ñgyoozh nu nac nu ricy cup dē consuel lo Crisht. Walab nu nac nu gyicy yac dē ni de leey ze'. Walab nde' gyicy ñi

nu gyanap den lo Ñgyoozh. Gun ni tub la mbecy wac gyanap yu lom nu nac nu ricy yac yu ni de leey ze'.

<sup>17</sup> Nunu benu gyicy cup den consuel lo Crisht par nu gyanap na lo Ñgyoozh, ze' despuees nii too den nu wangyanap na lom, gun wagyicy yac den ni leey ni de mbecy Israael, orze' ¿walab gaal Crisht ricy zir mi nu nac den mbecy cyi? ¡Mas lac ru' tees walab ni! <sup>18</sup> Ze' benu ya lyuu ni de mbecy nu rlagy ñi nu gyicy yac dey ni leey ni de mbecy Israael, ze' ii ya bi bzu chü leey ze', orze' ya nacä mbecy cyi. <sup>19</sup> Gun lat nu psya' leey ni Ñgyoozh, orze' bet laga cuen nu wac grish lo looñ par nu gyanapa. Nde' nu na ya na gal nu na mbecy gut par lo leey ze'. <sup>20</sup> Orze' nde' nu walaba' nu rcyiiñ gal nu pcyiiñ gulas, sinu rcyiiñ gal mod nu rlagy Crisht. Na nu zu gyishlombecy ii, se coz nu rlagy zi'l ñi nu gyicy mbecy nu ricy cup consuel lo iñ Ñgyoozh, se nde' zi'l coz nu ricya. Gun iñ mi pcam ya, nunu pshet ic mi nu gut mi nu nac gaza' ya. <sup>21</sup> Nde' nu ya wazuub yaä de faboor nu b icy Ñgyoozh nu gut Crisht lo cruu, gun bi b icy na nu mbecy ñgyanap dey lo Ñgyoozh nu nac leey nu bzeeñ Moisees, orze' leew zi'l nu gut Crisht.

### ¿La na coz gyicy ñi nu gruu mbañ den?

**3** ¡A der mbecy Gálatas, dzi ga mbecy ton nac der!

¿Cyu b icy tu' de ru par nu cue' gyicy yac der ni de riidz rishli? Naal la pshaal dē lat der de coz nu gec ornu gut Jesucrisht lo cruu. <sup>2</sup> Rlagy ñi nu nii der tub coz nu dugyi' lor: ¿Lac mod guud Espiriit Yon ni Ñgyoozh ni der? ¿A guud mi nu nac nu b icy yac der nu leey nu bzeeñ Moisees, o ti par nu nac nu güeñ der de riidz ni Jesucrisht, nunu b icy cup der consuel loñ? <sup>3</sup> ¿Lagu' dzi ga ton na de ru? Ornu nu loga brugyi' ricy der coz nu rlagy Ñgyoozh. Nu nac Espiriit Yon nim b icy der ñii. Ze' na ¿a rlagy der nu za' lor coz nu rlagy mi nu shcab ni ub zi'l der? <sup>4</sup> ¿A se la la pcyiiñ ñi nu bzac zi der nu nac Jesucrisht? ¡Mas lac ru', tees walab ni, gun nde' segur la pcyiiñ ñi ni der! <sup>5</sup> Ornu Ñgyoozh briic mi Espiriit Yon nim ni der, nunu ornu b icy mi nusuriidz lat der, ¿lagu ni b icy mi? Walab nu nac nu ricy paa der nu leey nu bzeeñ Moisees, nde' nu ni b icy mi, sinu par nu nac nu bzuub gyidag der ni de riidz ni Jesucrisht, nunu b icy cup der consuel loñ.

<sup>6</sup> Ze' Abraham b icy cup yu consuel lo Ñgyoozh. Nu nac nde', nde' nu Ñgyoozh b icy mi yu par tub mbecy nap. <sup>7</sup> Nde' nu dela de ru rlagy ñi nu gad lagy der nu dela de mbecy nu ricy cup consuel lo Ñgyoozh, rishli nac dey nez Abraham. <sup>8</sup> De riidz nu bzeeñ Ñgyoozh rniñ nu par lo, Ñgyoozh gyicy mi nu de mbecy nu walab mbecy Israael gyanap dey lom par nu nac nu gyicy cup dey consuel lom. Nde' nu Ñgyoozh nam rab mi Abraham lat de riidz ze' nim: "Ya nap gyicy du de lo la mbecy nu nac nu gyicy cup dey consuel lo gal nu ricy cupa' ru consuel lo", nam. <sup>9</sup> Nde' nu Ñgyoozh nap ricy num de mbecy nu ricy cup consuel lom, gal nu b icy mi nu Abraham, yu nu b icy cup consuel lom.

Ñgyoozh b icy mi tub trat nu Abraham nunu nde' ricy zir ñi presis par leey ni Moisees

<sup>10</sup> De mbecy nu rgyish lo lo leey nu bzeeñ Moisees par nu gruu mbañ yu, de yu ze' byanduuy, gun lat de riidz ni Ñgyoozh rniiñ: "Cyu zi'l mbecy nu wagyicy yac nu dela coz nu ta' lo libr ni leey, de yu ze' byanduuy", rniiñ. <sup>11</sup> Orze' na naal la rabee nu, ni tub la mbecy rila wac gyanap yu lo Ñgyoozh nu nac nu gyicy yac yu nu leey nu bzeeñ Moisees. Gun lat de riidz ni Ñgyoozh rniiñ: "De mbecy nu byanap lo Ñgyoozh nu nac nu ricy cup dey consuel lom, orze' nu nac nde' cui mbañ dey", rniiñ. <sup>12</sup> Tees benu gyicy yac den nu leey nu bzeeñ Moisees par nu ruu mbañ naa, orze' reña' mod gyicy den par mod nu gyicy cup na consuel lo Ñgyoozh. Gun lat de riidz nu bzeeñ Moisees rniiñ: "De mbecy nu gyicy yac nu dela coz nu rnii leey ze', de yu ze' cui mbañ dey par nu nac ñii", rniiñ.

<sup>13</sup> Ze' na Crisht b icy mi nu a' nac den mbecy byanduuy nu nac leey nu bzeeñ Moisees. Ni b icy mi ornu pshet ic mi nu gal mi duu par nu guud mod nu locyuub mi de ub na. Jesucrisht byandum, gun lat de riidz nu bzeeñ Ñgyoozh rniiñ: "Yu nu gat nu ca lo tub yag, yu ze' byanduuy", rniiñ. Ze' Jesuuz pcam lo cruu. Orze' nde' nu byandum. <sup>14</sup> Ni bzac mi gun orze' dela coz nu mnii Ñgyoozh nu cuic mi ni Abraham ni' zi'l cuic mi ni de mbecy nu walab mbecy Israeel. Cuic mi ñii nu nac Jesucrisht. Nunu par nu nac nu ni bzac mi, nde' nu Ñgyoozh briic mi Espiriit Yon nim ni de ub na par nu nac nu ricy cup den consuel lom. Nde' tub coz nu bi mniim nu segur la gyicy mi.

Baly pshaal yu lo de mbecy lac yaruu de coz nu bi mniim

<sup>15</sup> Der b icy na, ya shaal la lo der lac yaruu de riidz nu bi mnée. Mnée lo der mod nu ricy mbecy nu losa'y. Benu tub mbecy gyicy yu tub trat nu losa'y, na despuees ornu bi bzu nap dey trat ze', orze' wac zuub zir yu riidz lo de coz nu bi mniim. Nunu ni wac gya' ich yu gal nu bi mniim. Sinu rlagy ñi nu gyicy yac yu gal nu mniim loga.

<sup>16</sup> Na Ñgyoozh bi mniim nu segur la nap gyicy num Abraham nu nez yu. De riidz ni Ñgyoozh wagniiñ: "De nez yu", gun nde' yaruuñ nu zigy de nez yu, sinu rniiñ: "Nez yu", rniiñ. Nez yu ze', nde' Crisht. <sup>17</sup> Orze' na ya shaal la lo der lac yaruu de coz nu bi mnée ze'. Leey ni Moisees bruu zac ñi tap gaynal Zub gal rup tii ña'n despuees ornu b icy Ñgyoozh trat nu Abraham. Tees Ñgyoozh b icy mi tub trat num Abraham. Orze' leey ni Moisees wac gyub ic ñi trat nu bi bzu nap Ñgyoozh nu Abraham. Wac gyicy ñi nu wayicy Ñgyoozh gal nu mniim nu gyicy mi. <sup>18</sup> Benu mbic mi gyel nap nim ni den nu nac leey, orze' walab nu cuic mi ñii nu nac de riidz nu mniim nu segur la gyicy mi. Tees Ñgyoozh leew la briic mi gyel nap nim ni Abraham nu nac nu b icy cup yu consuel lo de riidz nu mniim nu segur la gyicy mi. Nde' nu rad lagy den nu wad ñi nu nac leey ze'.

<sup>19</sup> Orze' ñla cyiiñ leey nu bzeeñ Moisees? Ñgyoozh briic mi ñii despuees par nu gad lagy na ornu mbecy ricy yu cyi. Ñgyoozh rlagy mi nu zuñ gashtal ornu shuub la tiem nu gruu zac biñ nu nac nez Abraham. Mi ze' biñ nu bzat Ñgyoozh lat de riidz ze'. Leey nu bzeeñ Moisees, Ñgyoozh briic mi ñii ni de anc. Orze' de anc ze' briic yuñ ni Moisees. Gaze' nu Moisees briic yuñ ni de mbecy. <sup>20</sup> Tees ornu Ñgyoozh mniim lo Abraham nu segur la nap gyicy num yu, ni walab anc mniim nunu ni walab mbecy mniim, sinu ub la Ñgyoozh mniim de nu nde'.

Leey ni Moisees, ñla cyiiñ ñi?

<sup>21</sup> Lac yaruu de riidz nu ya bi mnée lo der ze'? A yaruuñ nu leey ni Moisees zañ contr ni de riidz nu mnii Ñgyoozh nu segur la gyicy mi? ¡Walab ni! Gun Ñgyoozh wancuic mi leey ze' ni Moisees par nu gyicy ñi nu cui mbañ de mbecy tub la. Gun bi b icy na nu mbic mi ñii par nu cui mbañ mbecy tub la, orze' cyiiñ ñi par nu gyicy ñi nu gyanap mbecy lo Ñgyoozh. <sup>22</sup> Tees Ñgyoozh b icy mi reña' mod par nu gac gyanap mbecy tuy mi. Gun lat de riidz ni Ñgyoozh rniiñ: "Cyi riib ic ñi dela mbecy." Gun orze' de mbecy nu gyicy cup consuel lo Crisht, de yu ze' nap gyicy nu Ñgyoozh dey gal nu bi mniim nu segur la gyicy mi.

<sup>23</sup> Anzir nu shuub tiem nu gyicy cup den consuel lo Crisht, orze' na den gal nu na de mbecy nu yu' pres par nu nac leey ni Moisees. Ni mod pcyiiñ den gashtal Ñgyoozh briic mi nu gad lagy den lac mod gyicy cup na consuel lom. <sup>24</sup> Nde' nu leey ni Moisees nañ gal nu na tub moscuel nu rlyuuñ ni de ub na nu lac mod gyicy den gashtal ornu pshuub la tiem nu biid Crisht, gun orze' gyanap den lo Ñgyoozh nu nac nu gyicy cup den consuel lo Crisht. <sup>25</sup> Na como bi pshuub tiem nu gyicy cup den consuel lo Crisht, nde' nu leey ni Moisees walañañ nu riib ic ñi de ub na.

<sup>26</sup> Nde' nu na dela de ru nac ru i'ñ Ñgyoozh nu nac nu ricy cup der consuel lo Jesucrisht. <sup>27</sup> De ru bzu nis der par nu gabe nu bi nac der mbecy ni Crisht. Nde' nu na de ru bi zu der gal mod nu ub mi zum. <sup>28</sup> Orze' na tub zi'l na de mbecy Israeel nu de mbecy griego. Nunu tub zi'l na de yu nu nac moz por fers la nu de mbecy nu sac patroo ni. Nunu tub zi'l na de yu gyeey nu de biñ mñaa. Nde' nu dela den, tub zi'l nac naa par lo Jesucrisht. <sup>29</sup> Benu nac den ni Crisht, orze' nac den nez Abraham. Nunu Ñgyoozh nap gyicy num de ub na gal nu bi mne' ic mi nu segur la gyicy mi.

4 De coz nu rlagya nee, nde' de nu nii: Benu tub mbecy gat yu, nunu zeeñ yu gyel nap niy yaa i'ñ yu lat nu miñ yu, mas rishli gaal nac yu shuaan dela gyel nap ze', tees gyicy nu dey yu gal nu ricy nu dey moz por fers la. <sup>2</sup> Lat nu miñ yu, yu' mbecy nu rña dey yu nguzh ze', nunu yu' ga' mbecy nu ryub ic yu de coz nu ricy cup yu nguzh ze'. Ni gyicy dey gashtal shuub la dži gal nu mñii gyitoo uz yu. <sup>3</sup> Ni' zi'l mod rac nu de ub na. Gulas de coz nu blyuu mbecy ni gyishlombecy ii, nde' zi'll byub ic ñi de ub na. <sup>4</sup> Tees ornu pshuub tiem nu Ñgyoozh mniim, orze' bzuu nez mi I'ñ mi biid mi.

Gul mi ni tub biñ mñaa, nunu pcyiiñ mi lat leey nu bzeeñ Moisees.<sup>5</sup> Biid mi bicy mi nu bla den ni leey nu pcyiiñ den lat ze' gulas, gun orze' Ñgyoozh bicy i'ñ mi de ub na.

<sup>6</sup> Par nu gabe nu nac den i'ñ mi, orze' bzeed mi Espiriit Yon ni I'ñ mi nu cyiiñ mi nañ lardoo den. Espiriit ze' rnii: "Ñgyoozh, Uza", rnii. <sup>7</sup> Orze' na a' naca' den moz por fers ni leey ze', sinu na nac den i'ñ Ñgyoozh. Na como bi nac na i'ñ mi, orze' cuic mi dela gyel nap nim ni den.

#### Baly dzi zuy shcab nu nac de mbecy ni Crisht

<sup>8</sup> Gulas wangad lagy der cyu Ñgyoozh. Orze' bicy yac der dela coz nu rlagy de ñgyoozh nu walab ñgyoozh nu rishli. <sup>9</sup> Tees na bi yu' lo der Ñgyoozh. O nap zir nu nee nu Ñgyoozh yu' lom de ru. Orze' na ɿagu rlagy der gash ru leey nu wacyiiñ ze' par nu gyub ic ñii de ru tuuba' tir?<sup>10</sup> De ru, yu' dzi gabee ricy zily der ñii. Nunu yu' ga' beey nu ricy zily der. Yu' tiem nu ni' ricy zily der. Nunu ni' zi'l yu' ga' ña'n nu ricy zily der ñii. <sup>11</sup> ¡Yá tona' la rdzibä nu leew la bicya riiñ ni Ñgyoozh lat der!

<sup>12</sup> Der bicy na, ya rnishbaa lo der nu gyicy der gal nu ya ricya. Ni' ricya uba par mbecy nu na gal nu na de ru. De ru rila walab nu shiñ bicy nur ya. <sup>13</sup> De ru rad lagy der nu tir loga la nu pshaalä riidz ni Crisht lat der, orze' guud mod nu gyicya ñii nu nac nu gurata tub güii tiem ze'. <sup>14</sup> Mas güiñ lagy der güii nu gurata, tees wansu chu der ya, nunu wangüii naañ der lo, sinu "O" mnii der nu cyiñna lat der. Gal nu rnii der lo tub anc ni Ñgyoozh ni mnii der lo. Mnii der lo gal nu rnii der lo ub la Jesucrisht. <sup>15</sup> De ru tona' la bet lagy der. Ze' na, ɿa coz bzac der? Ya gac nee tub coz par nu gyabica gyel mbecy ni der. Bi bicy na nu ñgyac, mas gashtal urlo der mboor nu mbic ru ne. <sup>16</sup> Ze' na ɿa byaca losa' yuu der nu nac nu rnee de coz rishli?

<sup>17</sup> De' zir de mbecy ze' dzi zu dey shcab nu nac de ru. Par walab nu rishli rlagy dey nu gruu nap der, sinu coz nu rlagy dey, nde' nu gyareñ de ru nu dë ya, gun orze' ni' de yu ze' rlagy dey nu de ru gzu der shcab nu nac dey. <sup>18</sup> Na nde' tub coz nap nu gzu den shcab nu nac de losa'n benu rishli rlagy den nu gruu nap dey. Tees napa' benu ni gyicy de mbecy ze' dub laa tiem, cue' ornu zu zi'l lat der. <sup>19</sup> De ru yu feñ ne, tuuba' tir ya rzaca gal nu rzac tub biñ mñaa ornu gaal mi mdoo. Tona' la rzac deeta. Gashtal gyac la der gal nu na Crisht, orze' checa nu rzac deeta. <sup>20</sup> ¡Bi gac nu gac bi zu lat der na na la, orze' gac nee lo der! ¡Na wagad lagya ca na coz nu nii too nu nac de ru!

#### Mod nu blyuu riidz ni Agar nu Sara

<sup>21</sup> Ze' de ru, mbecy nu rlagy gyub ic leey ze', ya rlagya dugyi' tub coz lo der: ɿwalab gaal wagad lagy der de coz nu rnii leey ze'? <sup>22</sup> Rniiñ nu zu cyup i'ñ Abraham. Tub yu gul yu ni tub biñ mñaa nu nac moz por fers la niy. Ze' tuuba'y gul yu ni mñaa gaal yu, tub biñ mñaa nu a' nac moz por fers la. <sup>23</sup> Mod nu gul i'ñ moz por fers la ze', mod ze' ral cualcyer la mbecy gy-

ishlombecy ii. Ze' i'ñ biñ mñaa nu a' nac moz ze', yu ze' gul yu par nu nac nu Ñgyoozh mniim nu segur la cuic mi tub i'ñ Abraham yu gyeey. <sup>24</sup> Riidz ze' cyiiñ ñi par nu gad lagy na lac gyicy na. Lo cyup de biñ mñaa ze', nde' cyup trat nu bicy Ñgyoozh num de ub na. Biñ nu nac moz por fers la ze', mi ze' lam Agar. Mi ze' yaruum trat nu guud bicy Sinaí. De mbecy nu ricy cup trat ze', de yu ze' nac yu moz por fers la. <sup>25</sup> Agar yaruum bicy Sinaí nu Zub lugaar nu la Arabia. Ni' zi'l mi ze' yaruum mbe- cy gyedz Jerusaleeng gal mod nu yu' dey na. De mbecy nu yu' gyedz ze' nac dey moz por fers la ni de leey ze'. <sup>26</sup> Ze' biñ mñaa nu a' nac moz ze', mi ze' nu la Sara. Mi ze' yaruum gyedz Jerusaleeng, ze' nu riib ic Ñgyoozh, nunu de ub na nac dun trat nu yaruun Sara. <sup>27</sup> Gun Ñgyoozh mniim tub riidz nu sñuu ga saap ñi de nu nde' ornu nam:

Bet lagy ru biñ mñaa nu wagac gaal mdoo.  
Brish ti la nu nac nu dzi yet lagy ru,  
ru biñ nu rila wangad lagy lac rac ni güii ni mdoo.  
Gun biñ mñaa nu byeeñ ub zi,  
dzi cir chu' i'ñ mi gaze' biñ mñaa nu zu ñgyee.

<sup>28</sup> Na de ru bicy na, de ru nar gal nu na Isaac, i'ñ biñ mñaa nu a' nac moz, gun nac der i'ñ Ñgyoozh par nu nac de riidz nu mniim nu segur la gyicy mi. <sup>29</sup> Gulas yu nu gul mod ni cualcyer la mbecy ze' bicy ras nuy yu nu bicy Espiriit ni Ñgyoozh nu gul. Ni' zi'l rac tiem na.

<sup>30</sup> Tees ɿlac rniiñ lat de riidz ni Ñgyoozh? Orze' rniiñ: "Cuu nur biñ mñaa nu nac moz por fers la ze' nu i'ñ lam. Gun i'ñ mi ze' wac gyash yu de gyel nap ni uz yu, sinu i'ñ biñ mñaa nu a' nac moz ze', yu ze' gyash yu de gyel nap ni uz yu", rniiñ lat de riidz ni Ñgyoozh. <sup>31</sup> Orze' der bicy na, de ub na a' nac naa i'ñ moz por fers la ze', sinu nac naa i'ñ biñ mñaa nu a' nac moz ze'.

#### Walagy ñi gyicy yac de mbecy nu leey par nu gyanap yu lo Ñgyoozh

<sup>5</sup> Crisht bicy mi nu wayuba' ic leey ze' de ub na. <sup>5</sup> Orze' nap bicy yac der nu de coz nu bicy mi, nunu cue' shet ic der nu gyub ic leey ze' der tuuba' tir.

<sup>2</sup> Bzuub gyidag der ne ya, Baly, gun nee de riidz ii lo der: Benu zaan der nu caa mbecy beey sircunsision cuerp ni der, orze' par de ru se la' la cyiiñ Crisht. <sup>3</sup> Ya nee lo der tuuba' tir: Benu ca na mbecy zaan yu nu caa dey beey sircunsision cuerp niy, orze' yu ze' rlagy ñi nu gyicy yac yu nu dela leey ni Moisees par nu gyanap yu lo Ñgyoozh. <sup>4</sup> De ru mbecy nu rnii too nu gyanap lo Ñgyoozh nu nac leey ze', de ru bi bruu chu der lo Crisht. Ñgyoozh wayicy mi faboor num der. <sup>5</sup> Ze' de ub na, par nu nac Espiriit Yon ni Ñgyoozh nunu par nu nac nu ricy cup den consuel lo Crisht, nde' nu drish lo den lo Ñgyoozh nu gyanap den lom. <sup>6</sup> Gun benu nac du den Crisht, se la la cyiiñ nu ca beey sircunsision cuerp ni den, nunu ni' zi'l se la la cyiiñ ñi mas sac beey sircunsision ze' cuerp ni den. Coz nu cyiiñ, nde' nu gyicy cup den consuel lo Crisht. Nunu par nu nac nde' rca den Ñgyoozh, nunu rcaa ga' den losa'n.

<sup>7</sup> De ru tona' la nap bicy der. Na, ɿcyu bicy nu guca der nu ricy yac ru nu de coz rishli? <sup>8</sup> Walab ni bicy Ñgy-

oozh, biň nu bzu der par nu gac ru mbecy nim. <sup>9</sup> Benu ri tub mbecy nu radza lat der, orze' yu ze' nay gal nu na lebadur. Gal nu lebadur rbic fi fers ni dela cub gyishtily, ni' zi'l ricy yu ze' nu rnu dela de ru. <sup>10</sup> Tees ya, ricy cupa consuel lo Shuaan den Jesuuz. Nde' nu ya rnii too nu de ru rila washa' der reña' shcab, nunu de mbecy nu ricy deet lat der, de yu ze' Ngoozh cuic mi cashtig ni dey. Ni gyicy num yu mas cyur mbecy nac yu.

<sup>11</sup> Yu' mbecy rnii dey nu ya rlyuu nu ca beey sircunsion cuerpa ni mbecy. Benu ni ricya, orze' lagu rshet zi dey ya, beni? Benu ni bicya, orze' wazi lagy de mbecy lo ornu rshaalq de riidz ni de coz nu bzac Crisht lo cruz. <sup>12</sup> Tees par de mbecy nu ricy deet lat der nu nac leey ni sircunsion, nap zir benu gyicy capoo dey ub yu tub tir zi'l.

<sup>13</sup> Der bicy na, Ngoozh bloo sum de ru par nu gac der mbecy nu wayuba' ic de leey ze'. Orze' cue' cuic der lugaar ni ub ru nu gyicy der de gusht a' nap, par nu nac nu bi bla der ni de leey ze'. Sinu de mod la par nu nac nu rca der losa'r, orze' b icy der coz nu galagy de' zir dey. <sup>14</sup> Gun benu ricy yac der nu tub zi riidz, orze' ricy yac der dela coz nu ca lo leey ze'. Riidz ze', nde': "Pca der losa'r gal nu rcar ub ru", rnii. <sup>15</sup> Tees benu de ru gyicy der gal nu ricy bañcyug dañ, cucua' der nunu gow der losa'r, orze' gnu der de losa'r.

### Rlagy ñi zaan den nu gyub ic Espiriit Yon ni Ngoozh den

<sup>16</sup> Coz nu rnëe nde' nu bzaan der nu gyub ic Espiriit Yon ni Ngoozh der nunu cue' shet ic der nu gyicy ru de gusht a' nap. <sup>17</sup> Gun de gusht a' nap ze' zañ contr ni coz nu rlagy Espiriit Yon ni Ngoozh, nunu coz nu rlagy Espiriit Yon nim za ga'ñ contr ni de gusht a' nap ze'. Lo cyup de coz ze' zañ contr ni losa'ñ. Nunu nde' nu wagac gyicy der coz nu rlagy ub der. <sup>18</sup> Tees benu Espiriit Yon ni Ngoozh riib ic mi de ru, orze' leey ze' walaba'ñ riib ic ñi der.

<sup>19</sup> Naal la gad lagy na la na coz nu druu lo de gusht a' nap ze'. Druu nu ral dey losa'y nu wanchelaay, ricy dey coz a' nap, ricy dey coz nu walab se'ñ. <sup>20</sup> Nunu driib zily dey nab. Ricy tu' dey losa'y. Rzi lagy dey lo losa'y. Ricy dey nu deet rzu' losa'y. Ricy saap dey ich losa'y. Nac dey mbecy dza' ic. Zu dey shcab nu ded loy lo losa'y. Ricy dey nu yacyup nac de mbecy nu losa'y. <sup>21</sup> Nac dey mbecy lagy saap. Nac dey mbecy rzugy. Row shaad dey de coz nu a' yada'ñ nu gow dey. Benu de coz a' nap ze' gyub ic ñi mbecy, orze' dela nde' ricy dey, nunu yu' zir coz nu na gal nu na de nde' ricy dey. Na ya rdoo rishlo der nu gyicy cuidad der ub ru, gal nu bi mnëe lo der anzir. Dela de mbecy nu ricy de coz ze' rila wazac dey lo gyel gubier ni Ngoozh.

<sup>22</sup> Ze' benu Espiriit ni Ngoozh riib ic mi mbecy, orze' rca dey losa'y. Zu cyit lagy dey. Yu' gyel ri zu nañ lardooy dey. Nac dey mbecy pasez. Nunu nap ricy nu dey losa'y. Nac dey mbecy nap. Ricy yac dey nu de riidz nu rnii. <sup>23</sup> Nunu wagyicy lily dey ub yu. Nunu nap riib ic dey ub yu. Dela de nu nde' ricy mbecy benu Espiriit

Yon ni Ngoozh riib ic mi dey. Nunu sac ni tub la leey nu chañ contr ni de coz ze'. <sup>24</sup> De mbecy nu bi nac ni Jesuscrist, orze' nde' nañ gal nu na nu bi gut dey lo cruz nu Crisht. Orze' walaba' de coz a' nap ze' riib ic ñi dey. Ni wagyuba' ic de coz nu rlagy ub zi'l dey nañ lardooy. <sup>25</sup> Como de ub na cui mbañ na par nu nac de coz nu ricy Espiriit Yon ni Ngoozh, orze' rlagy ñi nu shet ic na nu gyub ic mi den.

<sup>26</sup> Walagy ñi nu gac den mbecy le'. Ni walagy ñi nu caa yuu den losa'n. Ni walagy ñi nu gazaap lagy den nu nac losa'n.

### Blocyuub der losa'r

**6** Der bicy na, benu gyu' bee nu b icy tub mbecy cyi, orze' de mbecy nu riib ic Espiriit Yon rlagy ñi nu gyicy nap dey yu. Tees rlagy ñi nu gugy nii nu dey yu. Orze' rlagy ñi nu gyicy cuidad dey ub yu nis ni' zi'l gyicy coz cyi gan dey. <sup>2</sup> Blocyuub der losa'r ornu rzac deet dey. Benu ni gyicy der, orze' ricy yac der nu leey ni Crisht.

<sup>3</sup> Benu tub mbecy rnii tooy nu lily nay, ze' walab nu lily nay, orze' laab ub yu rguuy ub yu. <sup>4</sup> Tub ga la mbecy rlagy ñi nu nii too dey ben a nap ricy ub yu. Orze' benu nap ricy ub yu, orze' gac gyet lagy yu nu nac de coz nu ricy yu. Nunu walagy ñi nu cu' cuen dey ti laab ni ricy losa'y. <sup>5</sup> Gun tub ga la mbecy gac cuen niy nu de coz nu ricy ub yu.

<sup>6</sup> De yu nu rsya' de riidz ni Crisht rlagy ñi nu locyuub dey yu nu rlyuu lat yu nu de lo la gyel nap nu ricy cup yu.

<sup>7</sup> Rila cue' guu der ub ru, gun rila wac gyicy ras nu mbecy Ngoozh. Na den gal nu na tub mbecy nu rnuuz. Laab coz nu nuuz den, laaba' nu nde' te'n. <sup>8</sup> Benu nuuz den coz a' nap nu druu lo de gusht a' nap nu ricy cup den, orze' te' ga' den laaba' coz a' nap. Coz nu te'n ze', nde' nu gat na. Tees benu nuuz na coz nap, coz nu druu lo Espiriit Yon ni Ngoozh, orze' te'n coz nap. Coz nu te' den ze', nde' nu cui mbañ den tub la. <sup>9</sup> Nde' nu cue' gazed den nu gyicy na coz nap. Gun benu wayeca den nu gyicy na coz nap, orze' shuub tiem nu gyad i den. <sup>10</sup> Orze' dub gal ornu gad mod ni den, orze' rlagy ñi nu nap gyicy du den dela mbecy. Tees ricy zir ñi pre sis nu nap gyicy dun de b icy na, de yu nu ricy cup consuel lo Crisht.

### Baly rnii nuy dey ñgyoozh

<sup>11</sup> ;Güii der na ton a' la letr ily rcaña nu yaña la! <sup>12</sup> De mbecy nu rcaa de ru por fers la nu gyicy yac der nu leey ni sircunsion, de yu ze' ni ricy dey gun par nu nac nu rlagy zi'l dey ganap lagy mbecy loy. Nunu ni mod ricy dey gun walagy dey nu sheed zi de mbecy yu nu nac de coz nu bzac Crisht lo cruz. <sup>13</sup> Tees ni' de mbecy nu ricy yac nu leey ni sircunsion, de yu ze' wagyicy yac dey nu dela coz nu rnii leey ni Moisees. Tees rlagy dey nu de ru ca beey sircunsion ze' cuerpa ni der par nu gyicy zily dey ub yu nu nac nu de ru nu ricy yac der de riidz nu rnii dey. <sup>14</sup> Ze' ya, wagyicy zilya ni

tub la coz sinu de coz nu bzac Shuaan den Jesucrisht lo cruu, gun par yä nu nac de coz nu bzac mi lo cruu, se la' la sac gyishlombecy ii. Ni' yä se la sacä par de mbecy nu yu' gyishlombecy ii. <sup>15</sup> Wagyicy ñi presis nu ca beey sircunsision cuerp ni mbecy, nunu ni wagyicy ñi presis mas sac beey ze'. Coz nu ricy zir ñi presis, nde' nu byacub den lo Ñgyoozh. <sup>16</sup> De yu nu "O" nii ni de riidz ii, Ñgyoozh gyicy mi nu cheti ri añ ni dey, nunu

gashni lagy mi dey. Ni gyicy num dey nu dela de' zir mbecy nu rishli nac nim.

<sup>17</sup> Bee na zi'l par lo ni tuba' la mbecy cue' gyicy dey nu gzac deeta, gun cuerp nè bi ta' de lac. Nde' tub muesht par nu gad lagy der nu yä tub yu nu ricy yac ni de riidz ni Shuaan den Jesuuz.

<sup>18</sup> Der bicy na, Shuaan den Jesucrisht gyicy mi faboor nu nap gyicy num dela der. ¡Laab ni gac ñii!

# Efesios

## Baly zeed yu ñgyoozh lo de mbecy Éfeso

**1** Yä Baly, tub yu nu nac aposht ni Jesucrisht, gun nde' coz nu rlagy Ñgyoozh. Ya zeeda gyicy ii lo de mbecy ni Ñgyoozh nu yu' gyedz Éfeso, de mbecy nu ricy cup consuel lo Jesucrisht. <sup>2</sup> Ñgyoozh, Uz den, nu Shuaan den Jesucrisht gyicy mi faboor nu nap gyicy num de ru, nunu gyicy mi nu cheti ri añ ni der.

## Ñgyoozh nap ricy num den nu nac Crisht

<sup>3</sup> Rlagy ñi nu gyabic den gyel mbecy ni Ñgyoozh, biñ nu nac uz Shuaan den Jesucrisht, gun mi ze' nap ricy num den nu nac Crisht, gun rbic mi de lo la coz gyibaa nu druu lo Espiriit Yon nim ni den. <sup>4</sup> Gun nil nese anzir nu gzub gyi' gyishlombecy, Ñgyoozh pcuim de ub na nu cyiiñ dun mi nu nac Crisht, gun orze' par lom gac naa mbecy nu sac falt ni. Nu nac nu rcam de ub na, <sup>5</sup> nde' nu bi ca lo cuen nu gyicy iñ mi de ub na nu nac Jesucrisht. Ni gyicy mi gun nde' coz nu yet lagy mi nunu coz nu rlagy mi. <sup>6</sup> Par nu nac nde', orze' gyabic den gyel mbecy ni Ñgyoozh dub laa tiem, gun tona' la cyit ricy num de ub na. Nde' tub faboor nu leew la ricy num den nu nac I'ñ mi nu dzi rcam. <sup>7</sup> Nu nac nu Ñgyoozh tona' la rcam de ub na, nde' nu bicy mi nu pshu reñ I'ñ mi Jesucrisht, gun orze' gla den ni de coz cyi. Orze' b icy sulagy mi de cyi nu b icy den. <sup>8</sup> Ñgyoozh rca za' lam de ub na. Briic mi shcab ni den, nunu rlocyuub mi de ub na nu gyet lag na cuen de coz nim. <sup>9</sup> Briic mi nu gad lagy den tub coz nu wangad lagy mbecy gulas. Coz ze', nde' riiñ nu bza' lom nu nac Crisht. Nde' riiñ nu bloo ic ub mi. <sup>10</sup> Riiñ nu bloo ic mi ze', nde' bza' lom ñii tiem niñ. Nde' nu ricy mi nu riib ic Crisht gaza' dela coz nu psa' lagy mi. Tant de coz gyibaa, gal nu de coz gyishlombecy ii riib ic mi ñii.

<sup>11</sup> Ñgyoozh nil nese anzir bi pcuim de ub na par nu giyeeñ de gyel nap nim yaan nu nac Crisht gal nu bloo ic ub mi, gun nde' coz nu rlagy mi. <sup>12</sup> Orze' dë ya nac dë de mbecy nu brish lo lo Crisht loga. Orze' gyicy dë nu gyed gyel mbecy nim nu nac nu dzi lily nam.

<sup>13</sup> Ni' zi'l de ru, ornu güeñ der de riidz nu rishli, de riidz nap nu rnii lac mod gruu mbañ den, orze' b icy cup der consuel lo Crisht, nunu Ñgyoozh b icy mi nu rabee nu nac der mbecy nim ornu briic mi Espiriit Yon nim ni der, gal nu mniim nu segur la gyicy mi. <sup>14</sup> Briic mi Espiriit Yon nim ni den par nu gabe nu segur la giyeeñ gyel nap nim yaa den ornu gya' lo nu gruu de ub na, mbecy nim, lo de coz cyi. Orze' rlagy ñi nu gyabic den gyel mbecy nim nu nac nu dzi lily nam.

## Baly rgyiiñ yu lo Ñgyoozh nu cuic mi shcab ni de yu nu ricy cup consuel lom

<sup>15</sup> Nde' nu, como rad lagya nu ricy cup der consuel lo Shuaan den Jesuuuz, nunu como dzi rca der de mbecy ni Ñgyoozh, <sup>16</sup> nde' nu wacheca nu drica gras ni Ñgyoozh nu nac de ru, nunu ryeza' lagya der lat nu rnœ dum. <sup>17</sup> Ñgyoozh ni Shuaan den Jesucrisht, mi ze' tona' la lily nam. Orze' ya rnishbaq lom nu gyicy mi nu locyub Espiriit Yon nim de ru nu gyet lag der cuen de coz nim, nunu shaal mi shcab ni der, gun orze' nap zir chu' lo der mi. <sup>18</sup> Rdiñä lom nu shaal mi nañ shcab ni der, gun orze' gad lagy der de coz nu rgyish lo der lo. De ru mbecy nu mniim lo nu gac nim. Orze' gad lagy der nu tona' la coz ily gyel nap nim nu zeeñ mi yaa de ru, mbecy nim. <sup>19</sup> Nunu gad lagy der nu bded ru' ga' la coz ily gyicy nu Ñgyoozh de ub na, mbecy nu ricy cup consuel lo Crisht. Gun coz ily nu ricy num de ub na, nde' nañ gal nu na coz ily <sup>20</sup> nu b icy mi ornu b icy mi nu byabañ Jesucrisht despuees ornu gut mi, nunu nde' nañ gal nu na coz nu b icy mi ornu bzuub mi Jesuuuz par yaa beem gyibaa. <sup>21</sup> Ñgyoozh b icy mi nu gya zir zum par dela mbecy nu ricy coz ily, par dela mbecy nu riib ic, par dela fushtiz, par dela patroo. Gya zir zum par dela mbecy nu zu riiñ: tant gyishlombecy ii, gal nu gyishlombecy nu yad par lo. <sup>22</sup> Ñgyoozh b icy mi nu riib ic Crisht dela coz, nunu bdu'm riiñ yaam nu chetib ic mi dela mbecy nim. <sup>23</sup> Gun de mbecy ni Crisht na dey gal nu na cuerpe nim. Nunu nañ lardoo dey rcyiiñ mi, biñ nu zu dela lugaar.

## Nu nac faboor ni Ñgyoozh, nde' nu gruu mbañ den

**2** Anzir de ru na der gal nu na mbecy gut nu nac de cyi gal nu de coz a' nap nu ricy der. <sup>2</sup> Zaab ricy la der de cyi ze' lat nu b icy der gal nu ricy cyu zi'l mbecy nu yu' gyishlombecy ii, nunu lat nu b icy der coz nu rlagy nuras, yu nu riib ic de yu a' nap nu rded lo bi, yu nu rbic baloor ni de mbecy nu wacsuub gyidag ni Ñgyoozh. <sup>3</sup> Gaza' de ub na gu' den mod ni de yu ze' tub tiem par ich. Bicy den coz nu rlagy ub zi'l na. "O" mnii den ni de coz cyi nu druu nañ lardoone, nu de coz a' nap nu druu nañ shcab ni den. Nde' nu yad ñi nu cuic Ñgyoozh cashtig ily ni den gal nu cuic mi ni de' zir de mbecy. <sup>4</sup> Tees Ñgyoozh nac mi tub biñ nu tona' la rashni lagy nunu tona' la rcaa lagy mi de ub na. <sup>5</sup> Gulas de ub na na den gal nu na mbecy gut nu nac de cyi nu b icy na. Tees tiem ze' gal nu b icy Ñgyoozh nu byabañ Crisht, ni' zi'l b icy mi nu byabañ de ub na. Nu nac faboor

nu ricy nu Ñgyoozh de ub na, nde' nu gruu mbañ den. <sup>6</sup> Orze' Ñgyoozh gyicy mi nu gyabañ den tublaazh la nu Crisht, gun orze' gzub dun mi gyibaa. Ni gyicy num der nu nac Jesucrisht. <sup>7</sup> Ni b icy mi gun orze' par lo gad lagy den nu tonal coz ily de faboor nim. Rad lagy na nde' nu nac nu pcam de ub na nu nac Jesucrisht. <sup>8</sup> Gun Ñgyoozh b icy mi tub faboor num den nu bloo mbañ mi den nu nac nu ricy cup den consuel lo Crisht. Walab nu ni b icy mi nu nac de coz nu de ub na b icy na, sinu nde' tub coz nu leew la b icy nu Ñgyoozh de ub na. <sup>9</sup> Walab nu nac de coz nap nu ricy den, nde' nu gruu mbañ naa. Nde' nu walagy ñi nu gyicy zily mbecy ub yu. <sup>10</sup> Gun de ub na nac naa mbecy nu psa' lagy Ñgyoozh. B icy cub mi den nu nac Jesucrisht, gun orze' gyicy den de coz nap nu bzu yem gulas nu gyicy den.

### Gyel ri zu nu ricy cup den nu nac Crisht

<sup>11</sup> Nde' nu b icy der nu gyeza' lagy ru nu gulas a' nac der mbecy ni Ñgyoozh. Guc der mbecy nu walab mbecy Israael nu nac gyitoo bel ni der. De mbecy nu ca beey sircunsision cuerp ni mnii dey nu de ru nac der mbecy nu sac beey sircunsision cuerp ni. Tees coz nu rzat dey, nde' coz nu ricy dey nu cuerp ni ub zi'l yu. <sup>12</sup> Orze' b icy der nu gyeza' lagy ru nu tiem ze' a' nac der mbecy ni Crisht. A' nac der mbecy guledz Israael. Nunu trat nu b icy Ñgyoozh nu de mbecy Israael, nde' walab par de ru. Lat nu gu' der gyishlombecc ii, ni wangad lagy der cyu nac mi, nunu ni wancyish lo der nu cui mbañ ru. <sup>13</sup> Orze' nde' nu anzir nañ gal nu na nuzet zu der lo Ñgyoozh. Tees na nu nac Jesucrisht, nu nac nu pshu reñ mi, nde' nu byagaab der lo Ñgyoozh. <sup>14</sup> Gun Crisht b icy mi nu byanap yu' den nu losa'n. B icy mi nu de mbecy Israael, gal nu de mbecy nu walab mbecy Israael byac se tub nac zi'l den. Ptily mi bzaa nu bzu gazel den. <sup>15</sup> Orze' Crisht b icy mi nu bya' lo de coz nu rnii leey ni de mbecy Israael. Gun lo cyup nac mbecy b icy mi nu byac se tub nac zi'l mbecy cub nu nac ub mi. Ni mod b icy mi par nu chu' gyel ri zu lat de mbecy. <sup>16</sup> Nu nac nu gut Crisht lo cruu, nde' nu bza' lom de gyel cha' ic nu yu' lat rup nac la mbecy. Nunu nu nac nu gut mi lo cruu, nde' nu lo cyup nac mbecy byac se tub nac zi'l yu, nunu b icy mi nu byanap yu' dey nu Ñgyoozh.

<sup>17</sup> Orze' Crisht biid num de riidz ni gyel ri zu lo dela mbecy: tant lo de ru nu na der gal nu na mbecy nu zet zu lo Ñgyoozh, gal nu lo de mbecy Israael nu na gal nu na mbecy nu yu' gaab lom. <sup>18</sup> Gun Espiriit Yon nim rbic mi nez nu gya rup nac la den par lo Ñgyoozh nu nac Crisht. <sup>19</sup> Nde' nu de ru a' naca' der mbecy yad, ni a' naca' der mbecy nu walab mbecy guledz, sinu nac der mbecy gyibaa nu de' zir de mbecy ni Ñgyoozh. Bi nac der famil nim. <sup>20</sup> De ru na der gal nu na tub yu' nu Zub too tub simient. Ze' simient ze', nde' de aposht gal nu de yu nu mnii por cuen ni Ñgyoozh. Nunu Jesucrisht nam gal nu na gyita' ni simient nu ricy zir ñi presis ze'. <sup>21</sup> Mi ze' biñ nu nac cyuub dutuub la cuerp ni yu' ze'. B icy mi nu dela lugaar ni yu' ze' nash ñii losa'ñ. Orze' zaab rzup lañ gashtal gyac lañ tub yu' yon nim. <sup>22</sup> B icy

mi nu gaza' de ru nash losa' der par nu gyac der tub yu' nu rcyiiñ Ñgyoozh nu nac Espiriit Yon nim.

### Baly b icy yu riiñ ni Crisht lat de mbecy nu walab mbecy Israael

**3** Nu nac nu nde', ya Baly, ri pres nu nac Jesucrisht. <sup>1</sup> Ri pres nu nac nu blocyuuba de ru mbecy nu walab mbecy Israael. <sup>2</sup> Tees de ru segur la bi neñ der nu Ñgyoozh dzi nap mi. Nde' nu bdu'm riiñ ya, gun nu nde' coz nu cyiiñ par de ru. <sup>3</sup> Ñgyoozh briic mi nu gad lagya de coz nu bloo ic mi nu gyicy mi. De nde' coz nu wangad lagy de mbecy gulas. Ya bi pcäa ñumi' de riidz nu bricä nu gad lagy der. <sup>4</sup> Na ornu sya' der ñii, orze' gad lagy der de coz nu ya rad lagya ni Crisht. Nde' de coz nu wangad lagy mbecy gulas. <sup>5</sup> Ñgyoozh wancuic mi nu gad lagy ni tub la mbecy de coz ze' gulas, tees na Espiriit Yon nim briic mi nu gad lagy de aposht nim gal nu de yu nu mnii por cuen nim. <sup>6</sup> Ze' de riidz nu wangad lagy mbecy ze', nde' nu nac de riidz nu sac ni Crisht, coz nu cuic Ñgyoozh ni de mbecy Israael, laaba' nde' cuic mi ni de mbecy nu walab mbecy Israael. Orze' gac dey gal nu na tub zi'l cuerp. Nunu de coz nu mnii Ñgyoozh nu segur la gyicy mi nu nac Jesucrisht, orze' de coz ze' gaza' de mbecy nu walab mbecy Israael dugiyiñ ñi.

<sup>7</sup> Ñgyoozh bdu'm riiñ ya nu gyicya riiñ ni de riidz ze' mas rila wangyapa nu ni gyicy num ya. Mi ze' bdu'm ñii ya nu nac nu dzi coz ily ricy mi. <sup>8</sup> Ya nacä mbecy nu gash zir zu par de mbecy nu blaazha' zir gash zu nu yu' lat de mbecy ni Ñgyoozh. Mas ni, tees Ñgyoozh nap b icy num ya ornu bdu'm riiñ ya nu shaala de riidz nu blaazha' la ñgyup sac ni Crisht lat de mbecy nu walab mbecy Israael. <sup>9</sup> Bdu'm de riiñ ze' ya nu gyicya nu gad lagy dela mbecy ca na de coz nu bloo ic Ñgyoozh nu gyicy mi. Nese gulas tonal coz nu wangad lagy de mbecy de coz nu bloo ic Ñgyoozh ze'. Nunu laab mi psa' lagy mi dela coz. <sup>10</sup> Ni b icy mi, gun orze' dela mbecy nu riib ic gyibaa gad lagy dey la na de lo la shcab nim nu nac de mbecy ni Crisht. <sup>11</sup> Ñgyoozh, ni b icy mi ñii, gun nde' coz nu nil rlagy mi nu gyicy mi nese nu bzub gyi' tiem. Orze' briib mi ñii ic Shuaan den Jesucrisht nu gyicy mi ñii. <sup>12</sup> Orze' nu nac Crisht rila wadzib lagy den nu gyechan lo Ñgyoozh. Nunu wadzib den nu gyechan lom nu nac consuel nu ricy cup na lom. <sup>13</sup> Nde' nu ya rnishbaq lo der nu cue' shi'ñ der baloor nu nac nu rzac zj nu nac de ru, gun de nu rzac zj ii, nii coz nap par de ru.

### Crisht rcam de mbecy

<sup>14</sup> Nu nac de nu nde', orze' ya rzu tiba lo Ñgyoozh Uz den. <sup>15</sup> Orze' lo Ñgyoozh bruu nu la dela de mbecy nim: de yu nu yu' gyibaa, gal nu de mbecy nu yu' gyishlombecc ii. <sup>16</sup> Ya diñä lo Ñgyoozh, Uz den, nu cuic mi faboor cyit na nim ni der, faboor lily nu gruu lat zañ de faboor cyit na nu ricy cup mi. Nunu faboor nu cuic mi ze', nde' nu gyicy mi nu cyiiñ der, nunu cuic mi fers ni der nañ lardoor nu nac Espiriit Yon nim. <sup>17</sup> Nunu diñä

lom nu Crisht cyiiñ mi nañ lardoo der nu nac nu ricy cup der consuel lom. Orze' de ru zaab fert zir ca der Ñgyoozh.<sup>18</sup> Gun orze' gad lagy dela mbecy ni Ñgyoozh nu ton'a' la coz ily rca Crisht dey. Gyel rca nim, nde' nañ gal nu na tub coz nu blaazha' la she, nu blaazha' la tuñ, nu blaazha' la gyi, nu blaazha' la gya.<sup>19</sup> Rdiñä lom nu gad lagy der nu rcam de ru. Tees par de nu nde' ton'a' la coz ily, nde' nu wagagyee shcab ni der nu gad lagy ru. Rlagy ñii nu gad lagy der nu rcam de ru, gun orze' gyicy cup za' la der Ñgyoozh.

<sup>20</sup> Orze' na rlagy ñi gyabic den gyel mbecy ni Ñgyoozh. Mi ze' biñ nu gac gyicy coz ilya' zir gaze' de coz nu rdiñ na lom, nunu coz ily zir ricy mi gaze' de coz nu rnii too den. Gyicy mi ñii nu nac de mod nu ricy mi nañ lardoo den.<sup>21</sup> ¡Orze' dela mbecy ni Crisht rlagy ñi nu gyabic dey gyel mbecy ni Ñgyoozh nu nac Jesucrisht tub la, nunu dub laa tiem! ¡Laab ni gac ñii!

Tub zi'l nac den nu nac Espiriit Yon ni Ñgyoozh

**4** Nde' nu ya, tub mbecy nu ri pres nu nac Shuaan den Jesuuz, rnishbañ lo der nu chesa der gal mod nu rlagy ñi nu chesa mbecy nu bzu Ñgyoozh nu gac nim, gun ni b icy mi num der.<sup>2</sup> Guc der mbecy nu ricy gyel gyidz ni. Guc der mbecy gugy na. Nunu guc der mbecy pasež. Gugyee tub, gugyee tub zi'l der lo losa'r nu nac nu rcar yu.<sup>3</sup> Bloo lo der nu dub laa tiem tub zi'l gac der nu losa'r. Gun nde' coz nu druu lo Espiriit Yon ni Ñgyoozh, nunu mi ze' locyuub mi der nu nap chu'r nu de losa'r. Orze' nu nde' gyicy ñi nu tub zi'l nac der nu losa'r.<sup>4</sup> Gun dela mbecy ni Crisht nac dey se tub zi'l cuerp. Nunu zu tub zi Espiriit Yon ni Ñgyoozh. Nunu Ñgyoozh bzum de ub na nu gac naa nim, gun orze' tub zi'l mod nu grish lon lo de coz nu yad par lo.<sup>5</sup> Zu tub zi Shuaan den Jesuuz, nunu tub zi mod nu gyicy cup den consuel lom, nunu tuuba' zi mod nu gzu nis na.<sup>6</sup> Zu tub zi Ñgyoozh, Uz dela de ub na. Nunu riib ic mi dela den. Nunu ricy mi riiñ nim nu nac dela den. Nunu rcyiñ mi nañ lardoo dela den.

<sup>7</sup> Tub ga la den guud riiñ nu cyiiñ den nu gyicy na dub gal mod nu rlagy Crisht nu cuic mi.<sup>8</sup> Nde' nu lat de riidz ni Ñgyoozh rniiñ:

Ornu gup mi gyibaa, orze' ya num de losa' yuum pres.

Nunu leew la briic mi coz ni de mbecy nim.

Ni rniiñ lat de riidz ni Ñgyoozh.

<sup>9</sup> ¿Lac yaruu riidz nu gup mi ze'? Nde' yaruuñ nu bet mi gyishlombecy ii loga la.<sup>10</sup> Laab biñ nu bet gyishlombecy ii, laaba' mi ze' gup mi gashtal ze' nu blaazha' zir nu gya ni de baa, gun orze' dutuub la zum.<sup>11</sup> Nunu laab mi ze' b icy mi nu la be dey gac yu aposht. Ze' la be ga' dey gac yu yu nu nii por cuen ni Ñgyoozh.

Ze' la be ga' dey gac yu yu nu shaal de riidz nu sac nim. Ze' yu' ga' dey nu gac yu yu nu ña de mbecy nim. Nunu laab de yu ze' nac yu yu nu rlyuu ni mbecy nim.<sup>12</sup> Ni mod bzu lily mi de mbecy nu nac nim, par nu gyicy dey riiñ nim, gun orze' gyicy dey nu gyafert zir de mbecy ni Crisht, de yu nu nac cuerp nim.<sup>13</sup> Gun orze' gyac den mbecy nu gyicy cup consuel lo laab ni' zi'l

coz, nunu gac den mbecy nu gzu tub zi'l shcab nu nac Jesuuz, I'ñ Ñgyoozh. Ni mod orze' gac den mbecy nu bi gul shcab ni. Gun orze' gac den tub nac mbecy nu gal gaa la na nu Crisht.<sup>14</sup> Gun cue' nu gac naa gal nu na yu nguzh, gun de yu nguzh a' biigy la dza shcab ni dey. Nunu na dey gal nu na doob nu rne' bi par re par ii la. "O" rnii dey ni la zi'l riidz rguu nu rnii de mbecy a' nap. De mbecy a' nap ze' ricy dey nu radza mbecy nu nac de gyel rguu nu rboo ic dey.<sup>15</sup> Tees nap zir nu gnii den nu riidz nu rishli nu gabe nu dzi rca den losa'n, gun orze' gal shcab ni den gashtal gyac lan mbecy nu na gal nu na Crisht. Orze' mi ze' nam gal nu na too cuerp. Ze' de mbecy nim na dey gal nu na de' zir lugaar ni cuerp ze'.<sup>16</sup> Orze' nu nac Crisht dela lugaar ni cuerp ze' nap nash losa'ñ. Nap nash ñii dela lugaar ze' nu ñgyiid ñi nu losa'ñ. Nunu ornu tub ga la lugaar ni cuerp nap ricy ñi riiñ, orze' dutuub la cuerp galy ñi nunu gyanap ñi nu nac nu de mbecy rca tub rca tub zi'l dey losa'.

#### Mod cub nu cyiiñ den nu nac Crisht

<sup>17</sup> Orze' nii tub coz nu neé lo der. Nii tub riiñ nu du' yaa der nu nac Shuaan den Jesuuz: nu cue' ga' chesa der gal nu rded de mbecy nu a' yu' lo Ñgyoozh. Gun de yu ze' rded yu ca na la nu rnii shcab ton ni dey.

<sup>18</sup> Byoow nañ shcab ni dey. Reña' mod rcyiñ dey par mod nu druu lo Ñgyoozh, gun shtee dey nu nac nu gut shcab niy.<sup>19</sup> Bicy cyig too dey, nunu gutib ic bis dey. Nunu ric la ñi dey nu gyicy yu de lo la coz a' nap.

<sup>20</sup> Tees de ru walab ni mod psya' der lo Crisht par nu chesar.<sup>21</sup> Sinu de ru rishli güeñ der de riidz nu zaab nu nac mi. Nunu de ru psya' der lom ca na de coz rishli.

<sup>22</sup> Rlagy ñi nu ne' der de mod nu b icy ru nu gusar gulas. Gun gulas guc der mbecy bdunu nu nac de coz a' nap nu dzi bzaab lagy der lo. De nu nde' bguuñ de ru gulas.<sup>23</sup> Tees na, de ru rlagy ñi nu gyicy cup ru tub shcab cub, nunu rlagy ñi nu gyicy cub der nañ lardoor.<sup>24</sup> Orze' rlagy ñi gyac der tub mbecy cub, dub gal mod nu psa' lagy Ñgyoozh. Orze' rabee nu ni na der nu nac nu ricy ru mod nu se'ñ, mod nu rlagy Ñgyoozh. Ricy der mod nu rishli.

<sup>25</sup> Orze' nde' nu na cue' ga' guu der losa'r, sinu tub ga la der niir riidz nu rishli lo losa'r, gun dela den nac naa reñ ga la lugaar ni tub zi'l cuerp.

<sup>26</sup> Benu cha' ic der, orze' cue' shet ic der nu gyicy ñi nu gyicy ru cyi. Cue' cha' ic der dub laa dzi.<sup>27</sup> Cue' cuic der lugaar ni nuras.

<sup>28</sup> De yu nu ricy gubaan, rlagy ñi nu checay ni fis ze'. Orze' rlagy ñi gyicy yu riiñ. Gyicy yu riiñ nap nu shic yu, gun orze' rusub ñuu tiñ nu cuic yu ni yu nu ricy falt ñi ni.

<sup>29</sup> Cue' grib riidz a' nap ru' der, sinu du ub riidz nap la nii der. Nii der riidz nu locyuub ñi mbecy. Nii der gal mod nu rlagy ñi. Nii der de riidz nu gyicy ñi coz nap nu de mbecy nu zuub gyidag.<sup>30</sup> Cue' gyicy der nu gyicy shni Espiriit Yon ni Ñgyoozh. Gun nu nac nu ricy cup der Espiriit Yon ze' gabe nu nac der mbecy ni Ñgyoozh gashtal ornu shuub dzi nu wagyuba' ic cyi der.

<sup>31</sup> Bloo der dela bis nu guti nañ lardoor. Blaa yaa der nu rgyiiñ lagy ru lo de coz nu ricy ru nañ lardoor. Cue' gazi lagy der. Cue' cush ti der nu gyel rzi lagy. Ni cue' gab zi der losa'r. Ni cue' gyicy der ni tub la coz a' nap.

<sup>32</sup> Guc der mbecy gugy na, mbecy pasez nu losa'. Nunu bicy sulagy tub, bicy sulagy tub zi'l der ni losa'r, gal nu Ñgyoozh bicy sulagya'm ni de ru nu nac Crisht.

### Mod nu rlagy ñi nu rcyiiñ de mbecy nu nac i'ñ Ñgyoozh

**5** De ru rlagy ñi gyicy der gal nu ricy Ñgyoozh como nac der i'ñ mi nu dzi rcam. <sup>2</sup> Bicy der gal nu ricy mbecy nu dzi rca losa' gal nu bicy Crisht num de ub na. Gun Crisht rcam de ub na nunu pshet ic mi nu guc mi gun nu nac den. Orze' coz nu bicy mi, nde' nañ gal nu na tub coz zguul par lo Ñgyoozh.

<sup>3</sup> Orze' de ru, como nac der mbecy ni Ñgyoozh, orze' rila cue' cuic der mod ni mbecy nu griib dey gyidza too der. Cue' nii dey nu ca na tub der ral ru losa'r nu wanchelaar, gun cue' nu riib dey ni tub la cyi bag nu ni na too der. Nunu cue' nu nii dey nu ca na tub der ye rzac ru lo la coz. <sup>4</sup> Cue' nii der riidz bag, ni riidz ton, ni de riidz nu gat loon niin. Gun de nu nde' riidz nu a' yad ñi nu nii den. Nap zir nu niin de riidz nu gric na gras ni Ñgyoozh. <sup>5</sup> Tees bi rad lagy der nu cyu zi'l mbecy nu ral losa' nu wanchelaar, o cyu zi'l mbecy nu ricy ca na tub cyi bag nu ni na, o cyu zi'l mbecy nu ye rzac lo de coz, (gun nde' tub zi'l nañ nu nu driib zily dey nab), orze' ni tub la de yu ze' wac zac dey lo gyel gubier ni Crisht gal nu Ñgyoozh. <sup>6</sup> Cue' zaan der nu guu mbecy ru nu de riidz wacyiiñ, gun tub zi la par nu nac nu nde', Ñgyoozh cuic mi cashtig ni de mbecy nu wacsuub gyidag nim.

<sup>7</sup> Orze' rila cue' gac nu der mbecy nu ni ricy ze'.

<sup>8</sup> De ru gulas na der gal nu na mbecy nu yu' ze' nu cow. Tees na na der gal nu na mbecy nu yu' ze' nu yu' yaa par nu nac nu nac nu der Shuaan den Jesuuz. Orze' bicy der gal mod nu yad ñi nu gyicy mbecy nu yu' ze' nu yu' yaa. <sup>9</sup> Gun ze' nu yu' yaa, ze' druud de lo la coz nap, de lo la coz nu se'ñ, nunu de lo la coz rishli.

<sup>10</sup> Orze' bicy der nu gad lagy ru la na coz nu gyet lagy Shuaan den Jesuuz. <sup>11</sup> Rila cue' gash der mod ni de coz wacyiiñ nu gyicy der gal nu ricy de mbecy nu yu' ze' nu cow. Nap zir nu gyicy der nu gruu zac de coz ze' ze' nu yu' yaa, gun orze' gabe nu de nde' walab coz nap.

<sup>12</sup> Gun gashtal gat lo lan ornu gniin de coz nu ricy dey ngach. <sup>13</sup> Tees ornu de coz ze' gruu zac ñi ze' nu yu' yaa, orze' naal la gabe la nañ. <sup>14</sup> Gun yaa gyicy ñi nu gabe dub gal la na dela coz. Nde' nu rnii dey:

De ru mbecy nu bi gut briish yaa.

Bruu der lat de aña.

Orze' Crisht lyuum yaa lor,  
rnii dey.

<sup>15</sup> Orze' nde' nu bzu der cuidad lac mod chesar. Cue' gyicy der gal nu ricy mbecy ton nu wagad lagy, sinu bicy der gal nu ricy mbecy nu yu' shcab ni. <sup>16</sup> Orze' cue' zaan der nu nit lo tiem, sinu ornu gad mod bicy der riñ ni Crisht, gun tiem nu yu'n na, nii tub tiem nu tona' la shiñ ricy mbecy. <sup>17</sup> Cue' gac der mbecy ton. Sinu

byub der mod nu gad lagy ru ca na de coz nu rlagy Shuaan den Jesuuz. <sup>18</sup> Cue' gzugy der, gun nde' gyicy ñi nu gnu der. Lugaar nu gyicy der nde', orze' nap zir pshet ic der nu gyub ic za' la Espiriit Yon ni Ñgyoozh nañ lardoor. <sup>19</sup> Ornu nii nu der de losa'r, orze' zat der de riidz nim, gal nu de cant nim, nunu gul der de riidz nu druu lo Espiriit Yon nim. Orze' biil der, nunu byabic der gyel mbecy ni Shuaan den Jesuuz nu dutuub la lardoor. <sup>20</sup> Dub laa tiem briic der gras ni Ñgyoozh Uz den nu nac dela coz, gun nac naa mbecy ni Shuaan den Jescrishi.

### Mod nu gyicy de mbecy ni Crisht nu famil niy

<sup>21</sup> "O" mnii der ni losa'r nu nac nu rca lagy der lo Crisht.

<sup>22</sup> De ru biñ mñaa rlagy ñi nu "O" nii der ni ñgyeer gal nu ricy der nu Shuaan den Jesuuz. <sup>23</sup> Gun de yu gyeey riib ic yu de ru biñ mñaa nu nac mñaay gal nu Crisht riib ic mi dela mbecy nim. Ni' zi'l Crisht nac mi biñ nu rboo mbañ de mbecy nim, de yu nu nac cuerpe nim.

<sup>24</sup> Gun gal nu de mbecy nim "O" rnii dey nim, orze' ni' zi'l de ru biñ mñaa nu zu ñgyee rlagy ñi nu "O" nii der nu nac dela coz nu nii ñgyeer.

<sup>25</sup> Na de ru yu gyeey, pca der mñaar gal nu Crisht pcam de mbecy nim, nunu pshet ic mi nu gut mi nu nac dey. <sup>26</sup> Ni bicy mi, gun orze' zu chum dey nu gac yu mbecy nim. Bdiib mi cyi dey nu nac de riidz nim gal nu nu nac nis nu winis dey. <sup>27</sup> Gun ornu gyash mi dey, orze' bi byac dey mbecy lily na, mbecy nu sac ni tub la falt ni. Orze' gac dey mbecy nu bzu chum nu gac nim. Nunu gac dey mbecy nu sac cyi. <sup>28</sup> Orze' gal nu de yu gyeey rashni lagy dey cuerpe niy. Orze' ni' zi'l mod rlagy ñi nu ca dey mñaay. Yu nu rca mñaay, orze' ni' zi'l rcay ub yu. <sup>29</sup> Gun ni tub la mbecy wagazi lagy yu lo cuerpe niy, sinu rgoow yuñ nunu ricy cuidad yuñ, gal nu ricy Crisht nu de mbecy nim. <sup>30</sup> Gun de mbecy nim nay gal nu na cuerpe ni ub mi. Nunu de ub na nac naa tub ga lugaar ni cuerpe ze' nim. <sup>31</sup> "Nde' nu de yu gyeey zeeñ yu uz yu nunu zeeñ yu ñaay par nu gyatublaazh yu nu mñaay. Orze' lo rup laa dey yac yu se tub zi mbecy."

<sup>32</sup> Orze' nde' tub riidz ily nu wagac gyet lag nap de mbecy cuen. Tees ya rztä Crisht nu de mbecy nim ornu rnëe nde'. <sup>33</sup> Mas lac ru', tees tub ga la der rlagy ñi nu ca der mñaar gal nu rcar ub ru. Nunu de ru biñ mñaay rlagy ñi nu ca lagy der lo ñgyeer.

De ru yu feñ, bzuub gyidag der ni de mbel nir par nu nac der mbecy ni Shuaan den Jesuuz, gun nde' mod nu rlagy ñi. <sup>2</sup> Gun coz loga la nu mnii Ñgyoozh nu gyicy na par nu gyiyeeñ nap na, nde' nu: "Pca lagy der lo uz ru, nunu pca lagy der lo ñaar, <sup>3</sup> gun orze' nap zu lagy der nunu tuñ tiem cyiiñ der gyishlombecy ii", na Ñgyoozh.

<sup>4</sup> De ru mbecy gush, cue' gyicy der nu cha' ic de i'ñ ru. Nap zir nu nap guul der de yu nguzh nir. Pshuu nu der yu, nunu blyuu der ni dey dub gal mod nu rlagy Shuaan den Jesuuz.

<sup>5</sup> De ru mbecy nu nac moz por fers la, bzuub gyidag der ni mbecy nu nac patroo nir gyishlombecy ii. Ni bicy

der lat nu rca lagy ru loy, nunu lat nu rdzib lagy ru. Nunu bicy der ñii nu dutuub la lardoor gal mod nu ricy der de coz ni Crisht. <sup>6</sup> Bicy der ñii, tees walab tub lo zi'l ornu zu zi'l yu rgüiy lo der, par nu gyet lagy yu coz nu ricy ru, sinu nu dutuub la lardoo der bicy de coz nu rlagy Ñgyoozh, como nac der mbecy nu ricy coz nu rnii Crisht. <sup>7</sup> Orze' nap zu lagy der bicy der de riiñ ze'. Bicy der ñii par riiñ ni Shuaan den Jesuuz. Cue' gyicy der ñii par riiñ ni mbecy zi'l. <sup>8</sup> Tees bi neñ der nu tub ga la mbecy, mas nac yu mbecy nu zu patroo ni, o mas nac yu mbecy nu sac patroo ni, tees Shuaan den Jesuuz gyabic mi i dey dub gal nu na coz nap nu b icy yu.

<sup>9</sup> Na de ru mbecy nu nac patroo, ni' zi'l nap b icy nu der de mbecy nu nac moz ni der. Nunu cue' chiib ru dey. Bicy der nu gyeza' lagy ru nu Shuaan den Jesuuz, biñ nu zub gyibaa, riib ic mi rup nac la der, nunu mi ze' walab nu reñ ga la mod gyicy mi nu tub ga mbecy.

### De suun nu briic Espiriit Yon ni Ñgyoozh par nu chucoon

<sup>10</sup> Na der b icy na, b icy der nu gac ru mbecy fert nu nac nu rcyiiñ nu der Shuaan den Jesuuz, gun mi ze' cuic mi fers ily nu ricy cup mi ni der. <sup>11</sup> Bzu lily der nu dela suur nu cuic Ñgyoozh nu chuc oo der, gun orze' gzu fert der ornu nuras chay contr ni der nu gyel rguu niy. <sup>12</sup> Gun walab nu yu' den nu chan contr ni mbecy nu nac losa' mbecy na, sinu nu chan contr ni de nuras a' nap nu rded lo bi. De yu ze' ricy yu mandaar nunu riib ic yu gyishlombecy cow ii. <sup>13</sup> Nde' nu gush der dela suu dañ ru nu rbic Ñgyoozh, gun orze' gagye der ornu shuub tiem nu dzi coz ily gzac der. Na ornu lazh gzu lily der dela suu dañ ru, orze' gzu fert zir der.

<sup>14</sup> I mod b icy der par nu gzu fert ru. Mnii der de riidz nu rishli, gun nu nde' nañ gal nu na sinch nu ri nañ der. Nunu cue' gyicy der cyi, gun orze' na der gal nu na mbecy nu ca tub g yiib lyush par nu soow ñiy. <sup>15</sup> Bzu lily der nu cha shaal ru riidz nu sac ni Crisht, de riidz

nu gyicy nu nap chu' dun Ñgyoozh. Gun benu ni, orze' na der gal nu na tub mbecy nu ca gyi' gyidlab. <sup>16</sup> Ze' tuuba' coz, nde' b icy cup der consuel lo Crisht, gun orze' na der gal nu na mbecy nu zu yaa tub g yiib she par nu soow yu dutuub la cuer p niy. Gun, ornu zeed nuras boo too der, orze' gyuñ nu nac gyiib ze'. <sup>17</sup> Briish lo der nu gruu mbañ ru, gun orze' na der gal nu na tub mbecy nu zub cyug too. Ze' riidz ni Ñgyoozh, nde' nañ gal nu na mandzicy. Nde' coz nu rbic Espiriit Yon ni Ñgyoozh ni der. <sup>18</sup> Nunu cue' checa der nu nii nur Ñgyoozh. Mnishbaa der lom, nunu bdiiñ der lom dub laa tiem dub gal mod nu rnii Espiriit Yon nim nañ lardo der. Bzu der altant. Nunu cue' shi'ñ der baloor. Orze' mnii nu der Ñgyoozh par nu nac dela mbecy nim. <sup>19</sup> Nunu ni' zi'l bdiiñ der lo Ñgyoozh nu nac ya, gun orze' cuic mi de riidz nu rlagy ñi nu neé, gun orze' ya wadzib la nu neé ñii, gun orze' ya grica nu gad lagy de mbecy ni de riidz nu sac ni Crisht, de riidz nu w angad lagy de mbecy gulas. <sup>20</sup> Orze' Ñgyoozh bzuu nez mi ya nu cha shaal a de riidz ze' por cuen nim. Nunu par nu nac nu ricya nde', nde' nu rj pres na. Orze' bdiiñ der lo Ñgyoozh, gun orze' rila wadzib la neé de riidz ze'.

### Baly nii nuy dey ñgyoozh

<sup>21</sup> Orze' b icy na Tíquico nu dzi rcaan, yu ze' cyid nuy rasqo ne lo der, gal nu de riidz ni de coz nu ricya. Yu ze' nac yu tub mbecy nu tona' la ricy paa nu de riiñ ni Shuaan den Jesuuz. <sup>22</sup> Nde' nu ya zuu neza yu nu cyid yu lo der, gun gniy lac mod rzac d e. Orze' ni mod cuic yu baloor ni der.

<sup>23</sup> Orze' Ñgyoozh Uz den gal nu Shuaan den Jesucr-

isht gyicy mi nu cheti ri añ ni dela de b icy na, nunu gyi-

cy mi nu ca den losa'n lat nu ricy cup den consuel lom.

<sup>24</sup> Nunu nap gyicy nu dem dela mbecy nu rca Shuaan

den Jesucrisht tub mod nu rila wayeca.

# Filipenses

Gyicy nu bzeed Baly lo de mbecy nu yu' gyedz nu la Fil-  
ipos

**1** Ya Baly nu Timoteo ricy dē coz nu rnii Jesucrisht.  
Na zeed dē ñgyoozh ni dela mbecy ni Jesucrisht  
nu yu' gyedz Filipos. Nunu zeed dē ñgyoozh ni de yu  
bel nu riib ic lat de mbecy nim, nunu zeed dē ñgyoozh  
ni de ayudant ni dey. **2** Ñgyoozh Uz den, nu Shuaan  
den Jesucrisht gyicy mi faboor nu nap gyicy num de  
ru. Gyicy mi nu cheti ri añ ni der.

## Baly bdiiñ yu lo Ñgyoozh ni de mbecy ni Crisht

**3** De tir la ornu yeza' lagya de ru, orze' dricā gras ni  
Ñgyoozh. **4** Nunu la zi'l tiem nu rdiña lo Ñgyoozh ni  
der, dub gal ri lagya rdiña lom, **5** gun de ru bicy nu der  
ya riiñ tublaazh la par nu ptush las den de riidz nu sac  
ni Jesucrisht lat de mbecy. Ni bicy nur ya nese dzi nu  
brj̄ lo der nu loga la nunu ni' zi'l ricy der mas gashtal  
dzi na. **6** Nunu ya bi neñā nu Ñgyoozh, biñ nu bzuub  
gyi' riiñ nañ lardoo der, mi ze' za' lom ñii ornu shuub  
dzi nu cyid Jesucrisht tuuba' tir. **7** Nunu ricy cupa rasoo  
nu ni rnii too, gun ya tona' la razañ lagya der. Gun  
Ñgyoozh bicy num den faboor lat nu rj̄ yu' gyiib, o or-  
nu rz̄a lo de mbecy nu riib ic. Gun faboor ze', nde' nu  
gzu ferta nu nac de riidz nu sac ni Jesuuz, nunu dricā  
nu gad lagy de mbecy nu nde' coz rishli. **8** Ñgyoozh rad  
lagy mi nu ya ric la añ nē nu rlagya zaca der, gun ya  
razañ lagya der gal nu razañ lagy Jesucrisht de ru. **9** Ya  
rdiña lo Ñgyoozh nu tub dzi ga ca zir der losa'r. Lat nu  
ricy der nde', ya diña lom nu shaal zir mi shcab ni der  
nu gad lagy der ca na coz nu se'ñ nu gyicy der. **10** Gun  
orze' dub laa tiem gac cui der ca na coz nu nap zir, gun  
orze' gac der mbecy nu caacy lardoo, nunu gac der  
mbecy nu sac falt ni ornu shuub dzi nu cyid Crisht.  
**11** Gun ornu shuub dzi ze', Jesucrisht bi bya' lo nu bicy  
mi nu byac der mbecy nu bicy coz nu se'ñ, gun orze' ca  
lagy mbecy lo Ñgyoozh nunu gyabic dey gyel mbecy  
nim.

## Par Baly benu cui mbañ yu, orze' gyicy yu coz nu rlagy Crisht zi'l

**12** Ya rlagya nu gad lagy der bicy na, nu de coz nu  
bzaca nde' rishli gaal blocyuub ñi nu bzu de riidz nu  
sac ni Jesuuz. **13** Ze' na dela de soldad nu yu' ro' riiñ nu  
dela de' zir mbecy rad lagy dey nu ya rj̄ yu' gyiib nu  
nac Crisht. **14** Nunu Shuaan den Jesuuz briic mi baloor  
ni zigy de bicy na ornu bzaac dey coz nu guc lat nu rj̄

nañ yu' gyiib. Nde' nu wacchib la dey rshaal yu riidz nu  
bruu lo Ñgyoozh.

**15** Rishli yu' la be mbecy nu rshaal yu riidz ni Crisht,  
gun rasaap lagy dey ni riiñ nu ricya. Nunu rlagy dey  
ded loy lo. Ze' yu' ga' mbecy rniiy riidz ni Crisht, gun  
rlagy yu gyicy yu coz nu se'ñ. **16** Mbecy nu bzata loga la  
ze', yu ze' rnii dey riidz ni Ñgyoozh par nu ricy dey ub  
yu nu nac yu mbecy nu ricy ñi presis. Walab nu dub gal  
ri lagy dey rniiy. Rzii dey nu gyicy yu nu deet gac nañ  
lardoo lat nu rj̄ yu' gyiib. Ze' yu' ga' mbecy rnii dey ri-  
idz ni Crisht nu nac nu rca dey mbecy. Rad lagy dey nu  
Ñgyoozh pcaam ya nu gzu ferta nu gyicya riiñ nu nac  
riidz nu sac ni Jesucrisht. **18** Lac zi'l mod nu rnii too dey  
nu ricy yu, tees par ya se la la nde'. Mas nu dub gal ri  
lagy dey o nu walab dub gal ri lagy dey ricy yu, tees  
rnii dey riidz ni Crisht. Nde' ricy ñi nu tona' la yet lagya.

Nunu yeta' lagya **19** Gun ya rad lagya nu gruu napa.  
Ni gac gun de ru rgyiñ der lo Ñgyoozh ne nunu gun  
Espiiriit Yon ni Jesucrisht rlocyuub mi ya. **20** Coz nu drish  
lo, nde' nu cue' zaan Ñgyoozh nu gyicya coz nu gyicy  
ñi nu gat lo. Tees wacchib la rneq riidz nu sac ni Crisht.  
Ni mod na par dub laa tiem ricya coz nu gyicy ñi nu ca  
lagy mbecy lom. Ca lagy mbecy lom mas nu gruu  
mbaña o nu cut dey ya. Lac zi'l. **21** Gun par ya, benu cui  
mbaña, orze' gyicya coz nu rlagy Crisht zi'l. Ze' benu  
gata, orze' napa' zir. **22** Benu gzu zira gyishlombecy ii,  
orze' gac gyicy zira coz nap par Crisht. Nde' nu wagad  
lagya ca nañ rlagya. **23** Pcan laa shcab ne. Wagad lagya  
ca na nu nap zir. Ya rlagya gata, gun orze' gyi cyiñ du  
Crisht. Ni mod nap zir par ya. **24** Tees ricy zir ñi presis  
nu cyiñ gyishlombecy ii par nu locyuuba de ru. **25** Na  
bi bguugy lardoo ni de coz ze', nde' nu ya rsa' lagya nu  
gzu se ñuu la be tiem gyishlombecy ii, gun orze' cyiñ  
lat dela der, gun orze' gac locyuuba de ru nu nap zir  
gyicy cup der consuel lo Crisht, nunu gyet lagy zir der  
nu nac de coz nu ricy cup der consuel lo. **26** Gun ornu  
yapa lo der tuuba' tir, orze' gyabic zir der gyel mbecy  
ni Jesucrisht nu nac ya.

**27** Bzu der cuidad. Nu se'ñ gu' der gal nu rlagy ñi nu  
chu' mbecy nu rzeña lagy ni de riidz nu sac ni Crisht.  
Gun orze' mas yap güij der o mas saca lat der, tees  
rlagya gyeña nu ricy der tub zi'l shcab. Nunu rlagya  
gyeña nu gal gaa la rzu fert zir der ni de coz nu rzeña  
lagy den, de coz nu rnii de riidz nu sac ni Jesuuz.

**28** Nunu rlagya gyeña nu wacchib der lo de mbecy nu  
rzi lagy lo der, gun nde' gyicy ñi nu gabe nu de mbecy  
nu rzi lagy ze' nit lo dey. Nunu laab nde' ricy ñi nu  
gabe nu de ru gruu mbañ der. Nunu nde' coz nu gyicy  
Ñgyoozh. **29** Ñgyoozh bicy mi faboor num de ru walab

tub lo zi'l nu gyicy cup der consuel lo Crisht, sinu ni' zi'l nu gzac zi ga' der nu nac mi.<sup>30</sup> De ru nu ya tublaazh la rza den contr de mbecy nu rzi lagy lon. Bi bzaac der lac mod bicya. Nunu mas na reñ der lac mod na de coz nu ricya lat nu rza contr ni dey.

**Crisht b icy mi gyel gyidz nim; orze' byac mi biñ nu gya zir zu**

**2** Como Crisht rbic mi baloor ni der, como ricy cup der consuel lom nu nac nu rcam der, como Espiriit Yon ni Ñgyoozh nac num der, como razañ lagy der losa'r, nunu como rashni lagy der mbecy,<sup>2</sup> orze' nde' nu b icy der nu bet lagy gyel la. Gun ya yet lagy benu nap yu' nu der losa'r. Nunu yet lagy benu rca der losa'r. Nunu yet lagy benu gyicy der tub zi'l shcab. Nunu yet lagy benu cue' nu reñ ga la mod rlagy tub ga la der nañ lardoor, sinu tub zi'l mod rlagy dela der.<sup>3</sup> Orze' cue' gyicy der coz par ub zi'l ru. Ni cue' gyicy der coz par nu gyicy der gyel le' nir, sinu gyicy der gyel gyidz nir. Mnii too der nu lily zir na losa'r gaze' ub ru.<sup>4</sup> Cue' zu bich der nu nac ub zi'l ru, sinu bzu bicha' der nu nac losa'r.<sup>5</sup> Laab shcab nu b icy cup Jesucrisht, laaba' shcab ze' b icy cup de ru.<sup>6</sup> Gun Jesucrisht, mas gal na' zi'l Ñgyoozh Uz mi nam, tees pshet ic mi bzu chum mod nu nam gyibaa. Mod nu nam nu gal gaa la nac mi nu Ñgyoozh.<sup>7</sup> Tees bzeeñ mi mod nu nam. Ornu gul mi, gush mi mod nu na tub mbecy nu ricy yac de mandaar nu ricy Ñgyoozh. Ni b icy mi ornu byac mi mbecy.<sup>8</sup> Ornu byac mi mbecy, b icy mi gyel gyidz nim. Pshet ic mi nu biiit mbecy mi, gun b icy yac mi ni Ñgyoozh. Mod to' lo gut mi. Gal lo cruz gut mi, gal nu rat mbecy a' nap.<sup>9</sup> Par nu b icy mi gyel gyidz nim, nde' nu b icy Ñgyoozh nu byac mi biñ nu gya zir zu, nunu Ñgyoozh b icy mi nu sac zir mi par dela mbecy.<sup>10</sup> Ni b icy Ñgyoozh, gun orze' dela mbecy gzu tib dey nu ca lagy yu lo Jesuuz. Dela anc nu yu' gyibaa, dela mbecy nu yu' gyishlombecy, dela mbecy nu bi gut, dela nuras, dela de yu ze' gzu tib dey lom.<sup>11</sup> Ni b icy Ñgyoozh, gun orze' dela mbecy nii dey nu Jesucrisht nac mi Shuaan den. Ornu gyicy dey de nu nde', orze' ca lagy mbecy lo Ñgyoozh Uz na.

**De mbecy ni Crisht na dey gal na tub yaa lat de mbecy nu wagyicy yac ni Ñgyoozh**

<sup>12</sup> Der b icy nu dzi rca, gal nu b icy yac der ni de riidz nu mnę̄ lat nu pcyiiñä lat der, na nu zet rj, fert zir b icy yac der ni riidz nu rnę̄ lo der. B icy der de coz nu yad ñi nu gyicy ru par nu nac der mbecy nu bloo mbañ Ñgyoozh. Nunu gudzib der nis wayicy ru gan.<sup>13</sup> De ru gac gyicy ru nde', gun laab Ñgyoozh gyicy mi nu galagy der nu gyicy ru coz nu yet lagy mi, nunu gyicy mi nu gac gyicy der ñii.

<sup>14</sup> Dela coz nu gyicy der, cue' nii deet der nu nac ñii, nunu b icy der ñii nu dutuub la lardoor.<sup>15</sup> Ni gyicy der, gun orze' de ru, mbecy nu nac iñ Ñgyoozh, gac der mbecy caacy lardoor. Gac der mbecy nu sac falt ni lat de mbecy mnu nu de mbecy gubag. Gabe der lat de

mbecy ze' gal nu rabee yaa ni de bel baa rel. Ni gabe der<sup>16</sup> lat nu cha nu der de riidz nu cuic gyel mbañ, gun ornu cyid Crisht tuuba' tir, orze' ya tonal la gyet lagya nu nac coz nu b icy der, gun orze' gabe nu wansu lee-wa gyishlombecy ii, nunu wangyicy leewa riiñ nim.

<sup>17</sup> De ru na der gal nu na tub gun nu rbic der ni Crisht nu nac nu ricy cup der consuel lom. Nde' nu benu cut dey ya nu nac nu ricy ya riiñ ni Ñgyoozh nu rlocyuuba der, nde' nañ gal na nu ricä tub gun ni Ñgyoozh tublaazh la nu gun ni de ru. Nde' nu yet lagy, nunu gyet lagy du de ru nu nac de coz nu yet lagy der.<sup>18</sup> Ni' de ru gyet lagy der nu ya. Gyet lagy den tublaazh la.

**Dela de' zir mbecy nu nac ub zi'l dey zuy shcab**

<sup>19</sup> Benu Shuaan den Jesucrisht cuic mi lugaar, ya rlagya nu zuu nez gyiilya Timoteo cyid yu lo der, gun ornu cush cyay, orze' gad baloor ne ornu gyeñä la ricy der.<sup>20</sup> Sac cyu' zir mbecy nu rcyiñ du ii nu zuy shcab gal nu ya zu shcab nu nac de ru. Nomaas Timoteo ni mod zuy shcab nu nac de ru. Nunu tub zi la yu ze' rishli ca ic yu der.<sup>21</sup> Gun dela de' zir mbecy nu nac ub zi'l dey zuy shcab. Wacsu dey shcab nu nac de coz nu rlagy Jesucrisht.<sup>22</sup> Tees de ru bi rad lagy der nu Timoteo nac yu mbecy nu ricy paa. De ru rad lagy der nu b icy yu riiñ nu ya gal nu ricy tub yu nguzh nu uz yu ornu pshaal de de riidz nu sac ni Jesucrisht.<sup>23</sup> Nde' nu ya rlagya zeeda yu nu cyid yu lo der ornu bi byu' bee la na coz nu gyicy nu dey ya.<sup>24</sup> Nunu drish lo nu Shuaan den Jesuuz gyicy mi nu ni' ya yap gyiilya lo der.

<sup>25</sup> Ya rnii tqo nu rlagy ñi nu zeeda b icy na Epaafroditu nu cyid yu lo der na. Yu ii b icy nuy ya riiñ ni Ñgyoozh, nunu bzu fert yu nuy ya lo de mbecy nu rzi lagy lom. Nunu blocyuub yu ya gal nu mnii too der ornu beed der yu nu biid yu lo.<sup>26</sup> Ya gzuu neza yu, gun ric la añ niy nu rlagy yu gzac yu dela der. Nunu deet gac añ niy, gun güeñ der nu gurat yu.<sup>27</sup> Ni gurat yu, nunu sñuu miiñ la bi gut yu. Tees wangat yu, gun Ñgyoozh gushni lagy mi yu. Nunu walab ub zi'l yu gushni lagy Ñgyoozh, sinu ni' zi'l gaza' ya gushni lagy mi, gun orze' cue' nu shni ga' zir gyicya.<sup>28</sup> Nde' nu rlala nu zuu neza yu nu cyid yu lo der, gun orze' gyet lagy der ornu gzac der yu tuuba' tir. Orze' gyabeñ ñuu gyicy shni.<sup>29</sup> Gyet lagy der nunu nap gyicy nu der yu ornu griy, gal nu yad ñi nu gyicy nu der de b icy ru nu ricy cup consuel lo Shuaan den Jesucrisht. Pca lagy der lo cyu zi'l mbecy nu na gal nu na yu ii,<sup>30</sup> gun se nu ñgyat zi'l yu par nu dzi fert b icy yu riiñ ni Crisht. Bzu lay ub yu lo rishdzidz, nu nac nu blocyuub yu ya por cuen ni de ru ni de coz nu wangac gyicy der.

**Mbecy nu gyicy cup consuel lo Crisht, yu ze' yu nu cyib Ñgyoozh cyi**

**3** Nde' nu de ru b icy na, bet lagy der nu nac nur Jesucrisht.

Ya wagazeeda nee lo der tuuba' tir laaba' de coz nu bi mnę̄, nunu de coz nu mnę̄ locyuub ñi der nu cue' gyicy dza mbecy der.<sup>2</sup> Cuidad der nu de mbecy nu na

gal nu na chę', de yu nu rlyuu de coz fals, de yu nu rnu cuerp ni ornu rcaay beey sircunsision par nu gabe nu nac yu mbecy ni Ngooozh.<sup>3</sup> Tees de ub na na den gal nu na mbecy nu rishli ca beey sircunsision, gun de ub na rishli nac naa ni Ngooozh. Nac naa nim, gun Espiriit Yon nim rlocyuub mi uub na nu caan mi. Nac naa nim, gun Jesucrisht ricy mi nu yet lagy na. Nac naa nim, gun wagiyicy cup na consuel lo ub zi'l na par nu gruu mbañ naa.<sup>4</sup> Gun bi b icy na nu gac gyicy cup na consuel lo ub zi'l na par nu gruu mbañ na, orze' ni' ya gac gyicy cupa consuel lo uba. Benu ca zi'l na mbecy rnii tooy nu gac gyicy cup yu consuel lo ub zi'l yu, nunu nde' gyicy ni nu gruu mbañ yu, orze' ya ricy cup zirə rasoo nu ni gyicy cupa consuel lo uba, benu gyicya.<sup>5</sup> Gun pcaa dey beey sircunsision cuerp ne ornu bza' shuñ dzi nu gulə. Naca nez mbecy Israeel. Famil ne bruuu lat nez Ben-jamiing. Ya naca mbecy Israeel, nunu de mbel ne nac yu mbecy Israeel. Ya guca mbecy fariseo, gun tona' la b icy paña nu dela leey ni de mbecy Israeel.<sup>6</sup> Ya tona' la bzu ferta nu de mod nu rzeña lagy de mbecy Israeel, gashtal psheed zi de mbecy nu ricy cup consuel lo Jesucrisht. Ya tona' la se'ni b icy nu leey ni de mbecy Israeel, nunu warusu ni tub la mbecy nu riib yu cyi icä. Nde' nu ricy cup zirə rasoo nu gyicy cupa consuel lo uba, bi b icy na nu ni ngiyicya.<sup>7</sup> Tees na rad lagya nu dela coz nu guzeè nu dzi sac ze', dela nde' wacyiñ ni, gun dzi zir sac Crisht par de nu nde'.<sup>8</sup> Nunu walab de nde' zi'l coz nu a' sac, sinu ni' dela coz nu b icy a' sac ni, gun dzi zir sac ni nu yu' lo Shuaan den Jesucrisht. Par nu nac mi bdune' dela coz ne. Nunu ya ricya nu de coz ze' nañ gal nu na toop, gun orze' gyicya gan gaca ni Crisht.<sup>9</sup> Nunu ya nac dum. Gaze' nu Ngooozh gyicy mi ya par mbecy nu sac cyi. Walab nu nac nu ricy paña nu leey nim, nde' nu gyicy mi ya par mbecy nu sac cyi, sinu nu ricy cupa consuel lo Crisht. Gun Ngooozh bi mniim nu bi ricy mi de mbecy par mbecy nu sac cyi nu nac nu gyicy cup dey consuel lo Crisht.<sup>10</sup> Coz nu rlagya, nde' nu nap chu' lo Crisht. Rlagya nu gyicy nu Ngooozh ya coz ily gal nu b icy num Jesuuz ornu b icy mi nu byabañ mi. Rlagya nu gzac zi gal nu bzac zi Crisht, nunu gaca gal nu na tub mbecy nu gut ornu gut mi.<sup>11</sup> Gun ya drish lo nu gaza' ya gyabañ ornu gyabañ de mbecy gut.

### Ricy Baly fers, gun orze' gyicy yu gan iy nu gyabic Ngooozh

<sup>12</sup> Walab nu bi b icya gan nu bi byaca gal mod nu rlagya nu gaca. Walab nu sac falt ne. Tees rloo lo nu gyaca gal mod nu rlagya Crisht nu gaca ornu pcam yu nu gaca nim.<sup>13</sup> Der b icy na, ya walab nu rnęe nu bi b icya gan. Ya wagiyicy cuena' de coz nu bbed par ich, sinu rloo lo nu gyacya gan par lo.<sup>14</sup> Ricya tub fers nu shupa lazä, gun orze' gyicya gan i nu cuic Ngooozh ni den nu nac Jesucrisht. Gun par nde' blousum de ub na.

<sup>15</sup> Dela mbecy nu byafert nu de coz ni Ngooozh rlagya ni nii too dey nu nac de coz ze' gal nu rnii too ya. Benu tub mbecy reña' rnii tooy par ya, tees ca ni gaal lyuu

Ngooozh loy ca na coz nu rishli.<sup>16</sup> Tees de ub na rlagya ni nu se'ni gyicy na nu de coz nu bi gud lagy na.

<sup>17</sup> Der b icy na, b icy der gal nu ricy ya, nunu ca ic der de yu nu ricy gal nu b icy de nu de yu nu gusa nu ya.

<sup>18</sup> Gun zañ tir bi mnęe lo der, nunu na nu nis urlę rnęe lo der, nu tona' la yu' mbecy nu zay contr ni de coz nu bzac Crisht lo cruu. <sup>19</sup> De yu ze' nit lo dey gably. De mbecy ze' de gyel bizh nac ni ngooozh ni dey, nunu ornu ricy dey coz to' lo, lugaar nu gat lo dey ca nu ricy dey gyel le' niy. De yu ze' coz ni gyishlombecy zi'l ii zu dey shcab.<sup>20</sup> Tees de ub na wagiyicy na gal nu ricy de yu ze', gun de ub na gyibaa, nde' ledz na. Nunu rlez den biñ nu ruu gyibaa cyid mi nu co mbañ mi de ub na. Mi ze' Shuaan den Jesucrisht.<sup>21</sup> Mi ze' chaam cuerp gyidz ii ni den. Gyicy mi nu gyac ni gal nu na cuerp lily ni ub mi. Nunu ni gyicy mi nu nac nu gac gyicy mi coz ily, nunu laaba' nu nac nu dzi cyiñ mi nu gyicy mi coz ily, nde' nu chetib ic mi dela coz.

### Dub laa tiem bet lagy der nu nac nu der Shuaan den Jesuuz

**4** Der b icy na, ya rcę de ru. Nu gusht ne gac nu gac na na la zacə der. De ru ricy der nu dzi nap zu rlagya. Nu nac de ru rabee nu nap bruu riiñ nu ricya. Ya rlagya nu zaab gzu fert la der como de ru bi nac nu der Shuaan den Jesuuz.

<sup>2</sup> Ya rnishbaña lo de ru, Bod nu Sintique, nu gyicy der se tub zi'l shcab. Chu' der gal nu rzu' mbecy nu bily mi nu nac Shuaan den Jesuuz.

<sup>3</sup> Ze' ru losa' nu tona' la ricy paa, losa'n nu b icy na riñ ni Ngooozh tublaazh la, ya rlagya nu locyuub ru de biñ mňaa ze' nu gyicy nap dem riidz nu losa'm. De biñ mňaa ze' fert b icy dem riiñ nu ya par nu shaal de de riidz nu sac ni Jesuuz. Bicy de riiñ ze' tublaazh la nu Clement gal nu de' zir mbecy nu b icy riiñ nu ya. Dela de yu ze' bi ta' nu la dey lo libr ni Ngooozh, libr ze' nu ta' nu la de mbecy nu ca lo cuen nu cui mbañ.

<sup>4</sup> Dub laa tiem zaab bet la lagy der gyi' nu nac nu der Shuaan den Jesuuz. Nunu cush cya' ga' nu nee lo der tuuba' tir bet lagy der.<sup>5</sup> Bicy der nu gad lagy dela mbecy nu nac der mbecy nu nap ri lardoo. Pcaa ic der nu sňuu ga shuub dzi nu cyid Shuaan den Jesuuz.

<sup>6</sup> Cue' sug ic der nu nac ni tub la coz, sinu ornu deet rac nañ lardoo der, orze' mnii nu der Ngooozh. Orze' bdiñ der coz nu rlagya ru lom. Nunu briic der gras nim.<sup>7</sup> Orze' Ngooozh gyicy mi nu cheti ri añ ni der. Nunu de mbecy rila wagyet lag dey cuen lagu nu gac cheti ri añ ni der. Nde' gyicy ni nu wac deet nañ lardoo der nunu wac deet nañ shcab ni der nu nac nu der Jesucrisht.

### Bzu der shcab nu nac coz nap

<sup>8</sup> De ru b icy na nu dzi rcę, laab nii la riidz nu nee lo der. Mnii too der nu nac la zi'l coz nap, nunu nu nac la zi'l coz nu gyicy ni nu gyed gyel mbecy. Gush der shcab nu nac la zi'l coz nu se'ni. Gush der shcab nu nac la zi'l coz cyit na. Gush der shcab nu nac la zi'l coz nu lily na.

Orze' gush der shcab nu nac la zi'l coz nap, gal nu de coz nu gyicy nu gyed gyel mbecy.

<sup>9</sup> Bicy der dela coz nu ya blyuu ni der gal nu de riiñ nu bdü' yaa der. Bicy der dub gal mod nu güeñ der de riidz nu mnęe, nunu dub gal na mod nu bzaac der ni de coz nu bicya. Benu gyicy der dela nde', orze' Ñgyoozh, biñ nu ricy nu rzeti ri añ ni der, gac num de ru.

### De mbecy Filipos bzeed yu gun par Baly

<sup>10</sup> Ya tona' la yet lagya nu nac Shuaan den Jesuuz, gun rabee nu bi byea' ga' lagy der ya tuuba' tir. Walab nu rnęe nu rishli mnit lagy der ya, sinu rnęe nu wangad mod ni der nu locyuub ru ya. <sup>11</sup> Walab nu ni rnęe par nu nac nu ricy falt la coz ne, gun ya bi gubeę lac mod gacę mbecy nu nap zu lagy mas lac zi'l mod nu rdeda. <sup>12</sup> Bi neña ornu wagad sheñ. Nunu bi neña ornu rad sheñ. Lac zi'l mod nu rcyiňa, bi gubeę lac gacę mbecy nu nap zu lagy. Ya bi gubeę lac gacę mbecy nu nap zu lagy ornu dza naña, lac gacę mbecy nu nap zu lagy ornu rana, lac gacę mbecy nu nap zu lagy ornu yu' sheñ la coz ne, lac gacę mbecy nu nap zu lagy ornu sac ŋi ne. <sup>13</sup> Ya gac gagye la zi'l coz nu cyid nu nac Crisht nu rbic mi fers ne. <sup>14</sup> Tees de ru tona' la nap bicy nu der ya ornu blocyuub der ya lat nu bzac zi.

<sup>15</sup> De ru, mbecy Filipos, de ru bi neñ der nu lat nu pshaalä riidz ni Ñgyoozh nu loga la ornu brüu lo de yu ni Macedonia, wancyuu su ni tub mbecy nu mbic yu tiñ

nu cyiiň ne, sinu de ru zi'l briic ru. Ni b icy nu der ya nu nac nu ni' ya blocyuubä de ru nu nac de coz ni Ñgyoozh. <sup>16</sup> Mas lat nu pcyiiňa Tesalónica, gyedz nu ri lo yu ni Macedonia, ti la be la tir bzeed der tiñ par nu blocyuub der ya. <sup>17</sup> Walab par nu rnii tqo nu gad gun ne, nde' nu ni rnęe, sinu nu rlagya nu gyicy der gan sheñ zir coz nap par lo Ñgyoozh. <sup>18</sup> Ya bi ricy cupa dela coz nu rlagya ŋi, nunu gashtal drusuba' lañ ne. Guud dela coz nu cyiiň ne, gun Epafroditö bri nuy de coz nu bzeed der. De coz nu bzeed der nañ gal nu na coz zguul, tub gun nu "O" mnii Ñgyoozh nu byash mi, nunu bet lagy mi. <sup>19</sup> Ñgyoozh cuic za' lam dela coz nu ricy falt ni der nu nac nu tona' la coz ily de coz cyit na nu ricy cup mi. Ni gyicy mi num de ru nu nac Jesucrisht. <sup>20</sup> ¡Orze' rlagya ŋi gyabic den gyel mbecy ni Ñgyoozh, Uz den, tub la! ¡Laab ni gac ŋii!

### Laab nde' la ŋgyoozh nu zeed Baly

<sup>21</sup> Gab der de mbecy ni Ñgyoozh shnuy por cuen ne, de yu nu nac nu Jesucrisht. De b icy na nu rcyiň nu ya ii zeed dey ŋgyoozh ni der. <sup>22</sup> Nunu ni' zi'l de mbecy ni Ñgyoozh nu yu' ii zeed dey ŋgyoozh ni der. Nunu nu loga la de yu nu zu riiñ yu' rey César, de yu ze' zeed dey ŋgyoozh ni der.

<sup>23</sup> Shuaan den Jesucrisht gyicy mi faboor nu nap gyicy num dela der.

# Colosenses

**1** Yaq Baly nacq aposht ni Jesucrisht, gun nde' coz nu rlagy Ngooozh. Yaq nu biicy na Timoteo tublaazh la zeed de gyicy ii lo der, <sup>2</sup> lo de ru mbecy ni Ngooozh nu yu' Colosas, lo de ru b icy na nu ricy paa nu de coz ni Crisht.

Ngooozh Uz den gyicy mi faboor nu nap gyicy num der, nunu gyicy mi nu cheti ri añ ni der.

## Baly rnii nuy Ngooozh nu nac de mbecy Colosas

<sup>3</sup> Dub laa tiem ornu rnęę du de Ngooozh, Uz Shuaan den Jesucrisht, nu nac de ru, orze' dric de gras nim.

<sup>4</sup> Gun bi gud lagy de nu fert ricy cup der consuel lo Jesucrisht, nunu dzi rca der dela losa'r nu nac mbecy ni Ngooozh. <sup>5</sup> Nu nac nu rgyish lo der lo de coz nu bi yu' choow nir gyibaa, nde' nu dzi rca der losa'r. De ru bi bzuub gyidag der de riidz ni de coz nu rgyish lo der lo ze' lat nu güeñ der de riidz nu rishli, de riidz nap nu rnii lac mod gruu mbañ de mbecy. <sup>6</sup> Orze' de riidz nu bdunii lo der ze', zaab za lañ dela lugaar ni gyishlombecy, nunu ricy ñi mod nu nap nu de mbecy, laab ni' zi'l gal nu guc lat de ru nese ornu güeñ der nu rnii de mbecy nu nap ricy Ngooozh num den nunu gud lagy der nu rishli gal nu mnii dey. <sup>7</sup> De nde' coz nu blyuu Epafras ni der, yu nu dzi razañ lagya ze'. Yu ze' yu nu ricy riiñ lat de ru lugaar ne ya. Nac yu tub yu nu ricy riiñ ni Jesucrisht lat der, nunu tona' la ricy paay. <sup>8</sup> Nunu laab yu ze' mniyy lq de nu Espiriit Yon ni Ngooozh b icy mi nu tona' la rca der losa'r, nay.

<sup>9</sup> Nde' nu nese dzi nu güeñ de de nu nde', orze' zaab rnęę du la de Ngooozh nu nac der, nunu rdiñ de lom nu nap gyet lag der cuen ni de coz nu rlagy mi, nunu rdiñ de lom nu cuic mi de lo la shcab nap nu druu lo Espiriit Yon nim ni der. <sup>10</sup> Gun benu ni, orze' gac cyiñ der gal mod nu rlagy Shuaan den Jesuuz, nunu dub laa tiem gyicy der de coz nu gyet lagy mi. Nunu zañ coz nap gyicy der nu nac mod nu rcyiñ der. Nunu cugyi' nu nap zir cu' lo der Ngooozh. <sup>11</sup> Nunu rdiñ de lom nu gyicy fert mi der nu nac nu dzi lily nam ornu ricy mi de coz ily. Orze' de ru nu pasęz fert la ragyee der mas deet rac. <sup>12</sup> Bet lagy der, nunu briic der gras ni Ngooozh, Uz den, gun mi ze' bi bzu lily mi de ru nu gyash yaa der ca na coz nu ca lo cuen nu gad ni de mbecy nu nac num lugaar ze' nu yu' yaa nim. <sup>13</sup> Gun Ngooozh bi bloo nap mi de ub na lugaar ze' nu cow, ze' nu riib ic nuras. Orze' ya num de ub na par lugaar ze' nu riib ic I'ñ mi nu dzi rcam. <sup>14</sup> Nu nac I'ñ mi ze' bloo mbañ mi de ub na, nunu b icy sulagy mi dela cyi den.

## Nap yu' du den Ngooozh nu nac nu gut Jesucrisht

<sup>15</sup> Ngooozh wac zac nam, tees gal nu na Ngooozh ni' zi'l na Crisht, biñ nu gac zac na. Orze' mi ze' I'ñ logam, biñ nu gya zir zu par dela coz nu psa' lagy Ngooozh.

<sup>16</sup> Par nu nac I'ñ mi ze' psa' lagy mi dela coz nu yu' gyibaa, gal nu dela coz nu yu' gyishlombecy ii. Laab nu nac I'ñ mi psa' lagy mi de coz nu gac zac na, gal nu de coz nu wac zac na. Gaza' de anc nu riib ic, gal nu de anc fert, par nu nac mi ze' Ngooozh psa' lagy mi dela de yu ze'. Orze' Ngooozh psa' lagy mi dela coz nu nac I'ñ mi, nunu psa' lagy mi dela coz par I'ñ mi. <sup>17</sup> Crisht nil zum nese anzir nu gruu zac dela coz, nunu par nu nac mi ze', dela coz yu'ñ gal mod nu rlagy ñi. <sup>18</sup> Dela mbecy ni Crisht na dey gal nu na tub cuerpe. Ze' Crisht nac mi too cuerpe ze'. Laab mi ze' zum nese nu loga la. Nunu laab mi byabañ mi nu loga la ornu gut mi, gun orze' gya zir zum par dela coz. <sup>19</sup> Gal nu na Ngooozh ni' zi'l na Jesucrisht, gun nde' coz nu rlagy mi. <sup>20</sup> Gun par nu nac Crisht, Ngooozh rlagy mi zu nap mi dela coz nu psa' lagy mi, de coz nu yu' gyishlombecy ii, gal nu de coz nu yu' gyibaa. Gun orze' nap yu' num dela coz par nu nac nu pshu reñ Jesuuz ornu pcam lo cruu.

<sup>21</sup> Gulas de ru walab mbecy ni Ngooozh nac der, sinu guc der losa' yuum nañ lardoor par nu nac de coz a' nap nu b icy der. <sup>22</sup> Tees na laab Ngooozh b icy mi nu nap yu' nu der mi nu nac mod nu bzac Crisht ornu gut cuerpe nim. Ni b icy mi, gun orze' gad mod nu gyecha' der lom. Byac der mbecy nu bi zu chu par nu gac nim. Byac der mbecy cacy, mbecy nu sac falt ni. <sup>23</sup> Tees par nu ni ricy Ngooozh num de ru, orze' rlagy ñi nu gzu fert der nu nac de coz nu bi ricy cup der consuel lo. Orze' cue' glaa yaa der de coz nu rgyish lo der lo, de coz nu guud ni der ornu güeñ ru de riidz nu sac ni Jesucrisht. De nde' riidz nu rdunii lo de mbecy dutuub la gyishlombecy. Nunu gaza' ya Baly rlocyuuba nu rshaalä de riidz ze'.

## Baly bdugiyi riiñ nu locyuub yu de mbecy ni Crisht

<sup>24</sup> Na ya yet lagya nu rzac zi nu nac de ru, gun nil bi ca lo cuen nu tona' la gzac zi de mbecy. Na ya rzac zi nu cuerpe la ne gal nu bzac zi Crisht, gun orze' gaza' locyuuba nu shuub laz ni de nu rzac zi de mbecy ni Crisht. Ya rzac zi nu nac de mbecy ni Crisht, de yu nu bi nac cuerpe nim. <sup>25</sup> Orze' Ngooozh b icy mi nu gyicya riiñ ni dela mbecy nim. Bdu'm riiñ ze' ya nu locyuuba de ru. Ze' riiñ ze', nde' nu rshaalä dela riidz nim. <sup>26</sup> Ya rshaal nap la de riidz nu rila wangad lagy de mbecy

gulas. Tees na Ñgyoozh rbic mi nu gad lagy dela mbecy nim ni de riidz ze'.<sup>27</sup> Orze' Ñgyoozh rlagy mi cuic mi nu gad lagy de mbecy tub coz ngach nim nu tona' la coz nap, nunu tona' la cyit. Coz ngach ze', nde' par dela mbecy mas yu nu walab mbecy Israael. Coz ngach ze', nde' Crisht, biñ nu rcyiiñ nañ lardoo de ru. Orze' nu nac mi ze' segur la gzac der lo de coz cyit na nu gad ni der par lo.

<sup>28</sup> Dę ya rzat dę Crisht, nunu rshuu du dę dela mbecy, nunu rlyuu ni dey nu de shcab lily nu ricy cup dę. Orze' gu' dę de mbecy ni Crisht nu bi gul shcab ni yaa Ñgyoozh.<sup>29</sup> Nde' nu ricya riñ, nunu tona' la rloo lo nu dela fers ne. Rac ricya ñii gun Crisht rbic mi fers ne.

**2** Rlagya nu gad lagy der nu tona' la rloo lo nu ricya riñ ni de ru, gal nu ni de mbecy Laodicea, nunu ni' zi'l ni de mbecy nu nigul zacä lo nu loo la.<sup>2</sup> Tona' la rloo lo par nu gricä baloor ni dela der nañ lardoor, gun orze' dub laa tiem zaab ca zir der losa'r, gun orze' nap gad lagy der de coz rishli. Gun orze' cyiiñ ñi ni der par nu nap gad lagy der de coz rishli. Orze' gad lagy der de coz nu wansaan Ñgyoozh nu ñgyad lagy de mbecy gulas. Coz ze', nde' Crisht.<sup>3</sup> Crisht nam gal nu na tub gyiñ nu yu' choow gyel nap ni Ñgyoozh, gun nu nac mi ze' gad lagy den dela shcab lily ni Ñgyoozh.<sup>4</sup> De nu nii dricä nu gad lagy der, gun orze' cue' nu guu ni tub la mbecy de ru nu de riidz nu dzi le' za.<sup>5</sup> Mas ya sacä lat der, tees ca icä de ru. Ya yet lagyä ornu gud lagyä nu yu' der gal mod nu rlagy ñi, nunu yet lagyä nu nac nu fert ricy cup der consuel lo Crisht.

### Cyiiñ na tub mod cub nu nac Crisht

<sup>6</sup> Orze' como de ru "O" mnii der ni Shuaan den Jesucrisht, nde' nu rlagy ñi nu cyiiñ der gal mod nu rcyiiñ de mbecy nim.<sup>7</sup> Jesucrisht nam gal nu na tub nac yu. Orze' pshet lyu der lo yu ze', nunu zuub der yu'r laab lo yu ze', gun orze' gyafert zir gyicy cup der consuel lom, gun nde' coz nu bdulyuu ni der. Nunu dub laa tiem cuic der gras ni Ñgyoozh.

<sup>8</sup> Bzu der cuidad. Cue' zaan der nu guu de mbecy ru nu nac de riidz fals nu rboo ic mbecy zi'l. De riidz ni de mbecy ze' walab lo Crisht bruuñ, sinu de nu nde' coz nu bzeeñ de gyitoo bel ni dey, nunu laab nu nde' riidz ni nuras, yu nu riib ic gyishlombecy ii.

<sup>9</sup> Gal mod nu na Ñgyoozh, ni' zi'l na Jesucrisht lat nu gusam gyishlombecy ii.<sup>10</sup> Orze' de ru ricy cup za' la der Ñgyoozh, par nu nac nu nac nu der Crisht. Mi ze' riib ic mi dela mbecy nu riib ic, gal nu de espiriit.

<sup>11</sup> Nunu ni' zi'l par nu nac nu nac nu der Crisht, orze' nde' nañ gal nu na nu pca beey sircunsision cuerpa ni der. Nde' walab mbecy pcaay beey ze' cuerpa ni der, sinu ub la Crisht pcaam beey ze' cuerpa ni der. Beey nu pcaam mi ze', nde' yaruuñ nu bi bla der ni de coz cyi nañ lardoor.<sup>12</sup> Gun ornu rzu nis der, orze' nañ gal nu na nu tublaazh la bgach der nu Crisht. Nunu ni' zi'l laab ornu bzu nis der ze', orze' nañ gal nu na nu tublaazh la byabañ nu der mi nu nac nu b icy cup der consuel lo Ñgyoozh, biñ nu b icy nu byabañ Crisht. Mi ze' rac ricy mi coz ily tona' la.<sup>13</sup> Gulas de ru na der gal nu na mbe-

cy gut par Ñgyoozh nu nac de cyi nu b icy der, nunu nu nac nu sac beey sircunsision cuerpa ni der. Tees na Ñgyoozh b icy mi nu tublaazh la byabañ der nu Crisht. Ni b icy mi ornu b icy sulagy mi dela cyi nu b icy der.<sup>14</sup> Ñgyoozh mnit lom dela di'ñ na nu ca lo cuen ni den nu za contr nin, nunu mnit lom dela coz nu ca lo cuen nu rish na nu nac di'ñ ze'. Ornu bza' lom de di'ñ ze', orze' nañ gal nu na nu pcaam ñii lo cruuz.<sup>15</sup> Par nu nac Crisht, Ñgyoozh b icy mi gan de nuras nu riib ic. Nde' nañ gal nu na nu bloom gyel mbecy ni dey ornu gua num dey pres nez lo rgüii dela de mbecy.

### Briish lo der lo de coz nu yu' gyibaa

<sup>16</sup> Nde' nu cue' shet ic der nu nii zi de mbecy ni der nu nac de coz nu row der, gal nu de coz nu ro'r. Ni cue' shet ic der nu nii zi mbecy nir nu nac cushtom ni de sa' mi' ni dey, gal nu sa' nu rzu' dey ornu sa rca beey mi', gal nu ni de dzi nu rzu lagy mbecy.<sup>17</sup> Dela de coz ii nañ gal nu na sheñ zi'l de coz nu yad par lo. Ze' Jesucrisht, mi ze' laab tub zi'l mi.<sup>18</sup> Yu' mbecy nu rniiy nu rlagy ñi nu riib zily dey de anc. Nunu rnii dey nu Ñgyoozh b icy mi nu bde' loy. Ricy yu nu nac yu mbecy shni. Ze' rishli nac dey mbecy le' nu nac nu ricy cup dey shcab ni mbecy zi'l. Nunu waca bee la la gyi' ricy le' dey. Cue' shet ic der nu nii de mbecy ze' nu yu' falt ni der nu nac de coz ze'.<sup>19</sup> De yu ze' a' nac nu dey Crisht, biñ nu nac too tub cuerpa. Nunu mi ze' ricy mi nu raly dutuub la cuerpa ze' nu nac nu rgoow mi ñii, nunu rzuub mi tub ga lañ nu lugaar niñ. Orze' raly ñi dub gal mod nu rlagy Ñgyoozh.

<sup>20</sup> De ru gut der ornu gut Crisht. Nde' nu na walaba' nuras, yu nu riib ic gyishlombecy ii, riib ic yu de ru. Benu ni, orze' ¿lagu gabee rcyiiñ der gal nu rcyiiñ de mbecy ni gyishlombecy ii? ¿Lagu gabee "O" rnii der ni de leey mi' ze'?<sup>21</sup> Gal nu na de nu nii: Cue' gan ru de coz ze'. Ze' tuuba'ñ: Cue' gow ru de nu nde'. Ze' tuuba'ñ: Cue' gal ru de nu nde'. Ni rnii de leey ze'.<sup>22</sup> Tees de coz nu rzat de leey ze' nac ñii coz nu ded ni, ornu bi b icy nu mbecy ñii riiñ. Nunu de leey ze' guud ñi nu nac shcab ni mbecy zi'l.<sup>23</sup> Rishli de mbecy nu bloo ic de leey mi' ze', rlyu nu siñ too dey, tees walab rishli. De leey ze' ricy ñi tub mod nu dzi ta par nu gyicy de mbecy par lo Ñgyoozh. Rniiñ nu gyicy gyidz mbecy ub yu. Rniiñ nu dzi ta gyicy nuy cuerpa niy. Mas ni rnii de leey mi' ze', tees rila wacyiñ ñi nu soow ñi lo de cyi nu yu' nañ lardoo den.

**3** De ru na der gal nu na mbecy nu bi byabañ tublaazh la nu Crisht. Nde' nu b icy der nu cuig yagy ru lo de coz nu yu' gyibaa, ze' nu rcyiiñ Crisht, par yaa bee Ñgyoozh.<sup>2</sup> Bzu der shcab nu nac de coz nu yu' gyibaa. Cue' caa ic der nu nac de coz nu yu' gyishlombecy ii.<sup>3</sup> Gun de ru na der gal nu na mbecy nu bi gut, tees na rcyiiñ der tub mod ngach nu Crisht, tub mod nu rila wagad lagy mbecy. Nde' coz nu rlagy Ñgyoozh.<sup>4</sup> Mod nu rishli nu rcyiiñ der gyishlombecy ii, nde' nu gyicy der de coz nu rlagy Crisht. Ornu mi ze' gruu zac mi tuuba' tir, orze' ni' zi'l de ru gruu zaca' der nur mi. Orze' dugyi der gyel lily nim.

### Mod gush gal nu mod cub

<sup>5</sup> Na mnit lo der dela shcab a' nap nu druu gyishlombecy ii, de coz nu yu' nañ lardoo der. Ni tub la der cue' gal ru biñ mñaa nu walab mñaar. Cue' gyicy der de coz shiñ na ze'. Ni cue' shiñ nii too der lo biñ mñaa. Ni cue' galagy der lo de coz nu a' yad ñi nu gad nir. Ni cue' ye gzac der lo de coz. Gun nu ye rzac mbecy lo de coz, de nde' gal gaa la nañ nu nu driib zily mbecy nab. <sup>6</sup> Gun Ngoozh cuic mi tub cashtig ily ni de mbecy nu wacsuub gyidag nim nu nac nu ricy dey de coz ze'. <sup>7</sup> Ni mod bicy de ru anzir nu gad lagy der gu-las. <sup>8</sup> Tees na bzaan der dela de coz ze'. Orze' cue' cha' ic der nu losa'r. Nunu cue' gazi lagy der. Cue' nii too der nu shiñ gyicy nur losa'r. Nunu cue' gab zi der losa'r. Nunu cue' go der riidz bag. <sup>9</sup> Cue' nu guu tub, guu tub zi'l der losa'r, gun mod nu na der gulas walaba' ni na der na. Nunu wagyicya' der de coz nu bicy ru gulas. <sup>10</sup> Ze' par mod nu na der na, nu bi byac der tub mbecy cub. Ngoozh, biñ nu psa' lagy de ru, zaab ricy nap lam der par nu gyac ru gal nu na' ub mi, gun orze' nap chu' lor mi. <sup>11</sup> Rila wagyicy ñi presis nu nac naa mbecy griego o nu nac naa mbecy Israeel. Nunu wagyicy ñi presis nu ca beey sircunsision cuerپ ni den o wacañañ, o nu nac naa mbecy yad, o nu nac naa mbecy nu waca bee ca bruu, o nu nac naa moz por fers la, o nu gac na mbecy nu a' nac moz por fers la. Coz nu ricy zir ñi presis, nde' nu Crisht rcyiñ mi nañ lardoo der.

<sup>12</sup> Ngoozh rcam de ru. Nunu pcuim der par nu gac der mbecy nim. Pcyiñ der tub mod nu gabe nu rashni lagy der losa'r. Nap bicy nu der losa'r. Cue' gac der mbecy le'. Guc der mbecy gugy na. Guc der mbecy pasez. <sup>13</sup> Bicy cup tub bicy cup tub zi'l der pasez ni losa'r. Benu ca na tub der ricy cup ru gyel cha' ic nu losa'r, orze' bicy sulagy der niy. Bicy sulagy der ni losa'r, gal nu Shuaan den Jesuuz bicy sulagy mi ni de ru. <sup>14</sup> Rlagy ñi se tub coz nu gyicy der. Nde' nu ca der losa'r. Benu ni gyicy der, orze' tub zi'l nac der nu losa' gal nu rlagy ñi. <sup>15</sup> Crisht gyicy mi nu cheti ri añ ni der nu nac nu nde'. Orze' gad lagy der ca na de coz nu laab ñi. Ngoozh pcuim de ru par nu gac der se tub zi'l cuerپ, gun orze' gad nu cheti ri añ ni der. Nunu gac der mbecy nu ricy graseer.

<sup>16</sup> Orze' dub laa tiem ca gaa la ic der de riidz ni Crisht, nunu blyuu der ni losa'r. Nunu pshuu nu tub pshuu nu tub zi'l der losa'r. Nunu gac der mbecy nu siñ too ornu gyicy der de coz ze'. Nunu dub gal rii la lagy der briic gras ni Ngoozh. Nunu biil der de riidz nim, gal nu de cant, gal nu de riidz nu druu lo Espiriit Yon nim. <sup>17</sup> Dela coz nu gyicy der, gal nu de coz nu nii der, bicy der ñii gal nu ricy mbecy ni Shuaan den Jesuuz. Orze' briic der gras ni Ngoozh Uz den par nu nac Shuaan den Jesuuz.

### Mod nu gyicy de mbecy ni Crisht nu losa'y

<sup>18</sup> De biñ mñaa, rlagy ñi nu "O" niim ni ñgyeem, gun nde' mod nu rlagy ñi nu gyicy de biñ nu ricy cup con-

suel lo Shuaan den Jesuuz. <sup>19</sup> Ze' de yu gyeey rlagy ñi nu ca dey mñaay. Cue' gur gyicy la der nu mñaar.

<sup>20</sup> De ru mbecy feñ, bzuub gyidag der de coz nu rnii de uz ru, gun de coz ze' gyet lagy Shuaan den Jesuuz. <sup>21</sup> Ze' de ru yu bel, cue' gyicy der nu cha' ic de yu feñ nir, gun orze' cue' nu shiñ dey baloor.

<sup>22</sup> De ru mbecy nu nac moz por fers la, bzuub gyidag der ni mbecy nu nac patroq nir gyishlombecy ii. Cue' gyicy der nu dzi nap ricy ru ornu zu zi'l yu rgüiy lo der, par nu gyet lagy yu coz nu ricy ru or ze' zi'l, sinu bicy der ñii nu dutuub la lardoor nu nac nu rca lagy der lo Shuaan den Jesuuz. <sup>23</sup> La zi'l coz nu gyicy der, bicy der ñii nu dutuub la lardoor. Orze' nde' nañ gal nu na nu rir lo riiñ ni Shuaan den Jesuuz. Cue' gyicy der ñii par riiñ ni mbecy. <sup>24</sup> Na bi neñ der nu Shuaan den Jesuuz gyabic mi i der, de coz nu bzu lily mi par de mbecy nim. Gun de ru ricy ru riiñ ni Crisht, gun mi ze' gaal nu rishli nac mi Shuaan den. <sup>25</sup> Tees de mbecy nu shiñ ricy, gyad i dey nu nac de coz a' nap nu ricy yu, gun Ngoozh walab nu reñ ga la mod gyicy mi nu tub ga de mbecy.

**4** Na de ru patroq, bicy der mod nu se'ñ nu de mbecy nu nac moz por fers la ni der. Bicy der nu gyeza' lagy ru nu ni' de ru zu tub patroq nir gyibaa.

<sup>2</sup> Nunu zaab mnii nu laa der Ngoozh. Zaab zu laa der altant nu cuic ru gras nim lat nu rnii nu der mi.

<sup>3</sup> Nunu ni' zi'l bdiiñ der lom par nu nac dë ya, gun orze' cuic mi mod nu shaal dë de riidz ni Crisht, de riidz nu wangad lagy de mbecy gulas. Gun par nu nac de riidz ze' rj pres. <sup>4</sup> Orze' bdiiñ der lom, gun cuic mi mod nu naal la neçe lo de mbecy gal mod nu rlagy ñi nu gyicya.

<sup>5</sup> Bicy der tub mod nu rasqo nu de mbecy nu wagyicy cup consuel lo Crisht. Cue' zaan der nu nit lo tiem ornu gad mod nu gyicy der riiñ ni Crisht. <sup>6</sup> Dub laa tiem, ornu go der riidz nu de mbecy, orze' mnii der riidz nap, gal nu riidz nu gyet lagy dey. Nunu rlagy ñi nu gad lagy der lac mod tush cyar riidz lo tub ga mbecy.

### Baly rnii nuy dey ñgyoozh

<sup>7</sup> Bicy den Tíquico, yu nu dzi rcaan, gac yu tub yu nu bicy paa ornu blocyuu yu de ub na, nunu ricy yu riiñ ni Shuaan den Jesuuz nu ya. Yu ze' cyid nuy rasqo n e lo der. <sup>8</sup> Nde' nu ya zuu neza yu cyid yu lo der. Orze' niyy lo der lac yu' d e par ii. Orze' cuic yu baloor ni der.

<sup>9</sup> Laab nu Tíquico cyid bicy na Onésimo, yu nu dzi ricy paa. Yu ze' laab losa' de ru. De yu ze' gyrooy rishlo der dela coz nu rac par ii.

<sup>10</sup> Aristarco, losa' nu rj nañ yu' gyiib, zeed yu ñgyoozh ni der. Ni' zi'l Marc zeeda'y ñgyoozh ni der. Yu ze' bicy cueñ Bernabee. De ru bi bri tub gyicy lo der nu rzat ñi Marc. Benu cyid güiyy de ru, orze' nap bicy nu der yu. <sup>11</sup> Ni' zi'l Jesuuz, yu nu rnii dey Jusht, zeed yu ñgyoozh ni der. Nomaas de yu ii zi'l yu nu yu' lat de mbecy Israeel nu ricy cup consuel lo Crisht nu yu' d ii. De yu ii zi'l ricy du riiñ ni gyel gubier ni Ngoozh. De yu ii nac dey tub consuel ily ne. <sup>12</sup> Epafraas ni' zi'l zeed yu ñgyoozh ni der, nunu nac yu tub yu nu ricy riiñ ni Jesu-crisht. Yu ze' laab losa' de ru. Dub laa tiem rnishbaay

Io Ñgyoozh par nu nac de ru ornu rnii nuy mi, gun orze' gyafert der, nunu gac nap la der, gal nu na mbecy nu gul shcab ni. Gac der mbecy nu wagiyicy cyup ic, nunu gyicy der gal nu rlagy mi.<sup>13</sup> Yä Baly nacä teshtig ni dela coz nu ricy Epafras. Tona' la rzu bich yu nu nac de ru gal nu de mbecy nu yu' Laodicea, gal nu de mbecy nu yu' Hierápolis.<sup>14</sup> Luc, yu nu nac doctoor, yu nu dzi rca den, zeed yu ñgyoozh ni der. Ni' zi'l Demas.

<sup>15</sup> Gab der de bicy na nu yu' Laodicea shnu dey. Gab der Nifna shnuñ gal nu de mbecy ni Crisht nu ry-

atublaazh yu'ñ.<sup>16</sup> Na ornu lazh lab der lo gyicy ii, orze' gzeed der ñii chañ lat de mbecy ni Crisht nu yu' gyedz Laodicea. Gun orze' ni' zi'l de yu ze' lab dey loñ. Ze' na ni' zi'l de ru laba' der lo gyicy nu gruu gyedz ze'.<sup>17</sup> Nii der lo Arquipo ni rasoo nu zeedä ii: nu ca ic yu nu gyicy yu de riiñ nu bdu' Shuaan den Jesuuz yaay.

<sup>18</sup> Yä Baly cäa de riidz ii nu yaña nu letr ne nu zeedä ñgyoozh ni der: Ca ic der nu yañ nañ yu' gyiib. Ñgyoozh gyicy mi faboor nu nap gyicy num der.

# 1 Tesalonicenses

## Baly zeed yu Ŋgyoozh ni de mbecy Tesalónica

**1** Yä Baly, gal nu Silvano, gal nu Timoteo zeed dë gyicy ii lo der b icy na nu nac Crisht nu yu' gyedz Tesalónica, de ru mbecy ni Ŋgyoozh, Uz den, gal nu Shuaan den Jesucrisht.

Ñgyoozh gyicy mi faboor nu nap gyicy num de ru, nunu gyicy mi nu cheti ri añ ni der.

**2** Dub laa tiem dric dë gras ni Ŋgyoozh nu nac dela der, nunu rzaat dë de ru lat nu rnëe du dë Ñgyoozh.

**3** Nunu lat nu rnëe du dë Ñgyoozh Uz den, ryeza' lagy dë de coz nu ricy der nu nac nu ricy cup der consuel lom, gal nu de riiñ nu ricy der nu nac nu dzi rca der mi, gal nu lac mod ragyee der ornu rzac zir nu nac nu rgyish lo der lo Shuaan den Jesucrisht. **4** Der b icy na, Ñgyoozh rcam de ru, nunu rad lagy den nu bi pcam der nu gac nim. **5** Tees ornu pshaal dë de riidz nu sac ni Crisht lat der, walab riidz zi'l mnëe dë, sinu b icy dë nu gad lagy der de coz ily nu ricy Espiriit Yon ni Ñgyoozh, nunu bric dë nu gad lagy der nu zeña lagy nap la dë nu de riidz ze', nde' coz rishli. De ru nap rad lagy der mod nu gusä dë lat der. Byub dë tub mod nu nap par de ru.

**6** Ze' de ru b icy der gal mod nu b icy dë ya nunu gal mod ni Shuaan den Jesuuz. Nunu Espiriit Yon ni Ñgyoozh b icy mi nu tona' la bet lagy der ornu pshet ic der ni de riidz ze' mas tona' la bzac zi der nu nac ñii. **7** Nde' nu briic der nu gad lagy dela mbecy nu ricy cup consuel lo Crisht nu yu' lo de yu ni Macedonia, gal nu de yu nu yu' lo yu ni Acaya nu lac mod gyicy dey. Briic der nu gad lagy dey nu lac mod gyicy dey nu nac mod nu b icy de ru. **8** Walab tub lo zi'l nu brush las de riidz ni Shuaan den Jesucrisht lo de yu ni Macedonia nu Acaya, nu nac de ru, sinu ni' dela lugaar zaab riidz nu lac mod ricy cup der consuel lo Crisht. Nde' nu walagya'ñ nu gnëe dë ni tub la riidz. **9** Dela mbecy ze' rnii dey nu dzi nap b icy nu der dë ya ornu brj dë lat der. Nunu rnii dey nu bi guca der nu driib zily ru nab. Orze' brugyi' nu ricy der de coz nu rlagy biñ nu rishli nac Ñgyoozh, biñ nu mbañ. **10** Nunu ni' rnii ga' dey nu rbez der Jesuuz, I'ñ Ñgyoozh, biñ nu b icy mi nu byabañ. Rbez der mi gal ornu ruum gyibaa cyid mi tuuba' tir. Mi ze' biñ nu co mbañ de ub na lo cashtig ni Ñgyoozh.

## Baly b icy yu riiñ ni Ñgyoozh Tesalónica

**2** Der b icy na, de ru rad lagy der nu wangyap leew dë lat der. **2** Rad lagy der nu anzir nu yap dë lat der, orze' brj dë Filipos. Orze' ze' gugy zi dey dë ya,

nunu shiñ b icy nu dey dë ya. Tees Ñgyoozh blocyuub mi dë nu wanchib la dë pshaal la dë riidz nu sac ni Crisht lo der, mas zigy mbecy guay contr në dë. **3** Gun walab nu rshaal dë riidz ni Ñgyoozh nu nac dë mbecy nu radza. Ni walab nu rshaal dë riidz nim par nu gad mod nu gyicy dë gan losa'. Ni walab nu rshaal dë riidz nim par nu gad mod nu guu dë losa'. **4** Orze' lugaar nu ni gyicy dë, ca nu b icy Ñgyoozh dë par mbecy nu cyiñ. Orze' bdu'm riiñ yaq dë nu shaal la dë riidz nu sac nim.

Orze' ni mod rshaal dë de riidz ze'. Walab nu gyicy dë mod nu gyet lagy mbecy, sinu gyicy de mod nu gyet lagy Ñgyoozh, biñ nu rad lagy la na lardoo dela den.

**5** Nap rad lagy der nu walab nu mnëe dë riidz nu cyit zi'l za lo der. Ni walab nu mnëe dë riidz par nu soow ñi lo gyel ye rzac në dë. Ñgyoozh rad lagy mi nu nde' rishli. **6** Rila wanyub dë mod par nu gyicy zily ni tub la mbecy dë ya: ni de ru, ni reña' mbecy. **7** Mas yad ñi nu nee dë lo der nu gyabic der gyel mbecy në dë, gun nac dë aposht ni Crisht, tees guc dë mbecy gugy na du der. Bicy du de ru gal nu ricy tub biñ mñaa nu de yu nguzh mi' nim. **8** Par nu nac nu dzi rca dë de ru, bi bzu lily dë walab tub lo zi'l nu shaal dë de riidz nu dzi sac nu bruu lo Ñgyoozh, sinu ni' bzu lily dë nu gyicya la zi'l coz nu rlagy ñi par nu blocyuub dë de ru nu nac nu tona' la rca dë der. **9** Der b icy na, segur la yeza' lagy der nu dzi fert b icy dë riiñ par nu gad coz nu daw dë. Dzi rel la b icy dë riiñ par nu cue' ñgyicy zeed dë ni tub la der lat nu rshaal dë de riidz nap nu bruu lo Ñgyoozh lat der.

**10** De ru, nu Ñgyoozh rad lagy der nu de mod nu b icy du de ru, mbecy nu ricy cup consuel lo Crisht, nde' tub mod nu nap, tub mod nu laab ñi, tub mod nu sac falt ni. **11** De ru rad lagy der nu b icy du der gal nu ricy tub mbecy nu i'ñ yu. **12** Bric dë baloor ni der. Bric dë consuel ni der. Dë ya zaab rnëe la lo der nu chesar gal nu rlagy Ñgyoozh, biñ nu blo su de ru par nu gzac der lo gyel gubier nim, gal nu gyel lily nim.

**13** Nu nac de nde', zaab dric la dë gras ni Ñgyoozh, gun ornu güeñ der de riidz nim nu byap shaal dë lat der, orze' "O" mnii der. Bicy der ñii par riidz ni Ñgyoozh, walab riidz ni mbecy zi'l, gun laab rishli riidz ni Ñgyoozh nac ñii. Gun Ñgyoozh ricy mi coz nap nañ lardo de ru, mbecy nu ricy cup consuel lom.

**14** Der b icy na, laaba' coz nu bzac de ru laaba' coz ze' nu bzac de mbecy ni Ñgyoozh nu yu' lo de yu ni Judea, de yu nu nac ni Jesucrisht. Pshet zi de mbecy Israeel de yu ze', laaba' gal nu pshet zi de losa'r de ru. **15** De mbecy Israeel biit dey de yu nu mnii por cuen ni Ñgyoozh gulas, nunu biita' dey Shuaan den Jesucrisht,

nunu pcyuu nu dey dę ya. De yu ze', wagyedzu' lagy Ñgyoozh lo dey, nunu za dey contr ni dela mbecy. <sup>16</sup> Tees ornu rlagy dę nęe lo de mbecy nu walab mbecy Israeel, par nu ni' gruu mbañ dey, b icy pee dey nu ncay nę de nu cue' ni ñgyicy dę. Orze' ni mod b icy dey nu psa' la dey suuy nu nac cyi. Orze' na Ñgyoozh bi bzeed mi cashtig nim too dey.

### Baly ngu lagy yu ñgya güiyy de mbecy Tesalónica

<sup>17</sup> Der b icy na, ornu bla' losa' den tub tiem, mas wansac dę de ru, tees nañ lardoq dę rniiñ nu yu' der, nunu tona' la bloo lo dę nu yuba mod nu gzacä de ru lo nu loo la. <sup>18</sup> Dę ya ngulagya nyapa lo der. Nunu ub la ya, Baly, b icy pę nyapa lo der zañ tir. Tees nuras wansaan yu. <sup>19</sup> Gun ɿcyu ñuu gyicy nu yet lagy dę? ɿCyu ñuu gyicy nu nap zu lagy dę b enu walab de ru ornu cyid Shuaan den Jesucrisht tuuba' tir? <sup>20</sup> Gun laab nu nac de ru nap zu lagy dę, nunu yet lagy dę.

**3** Na ornu wangagyee dę nu ricy la añ nę nu gzacä der, orze' mnii tgo dę nu gyiyeen ga' dę ub zi gyedz Atenas. <sup>2</sup> Orze' bzuu neza biicy na Timoteo nu cyid yu lo der. Yu ze' tub yu nu ricy riiñ ni Ñgyoozh ornu rshaal yu de riidz nap ni Crisht. Bzuu nez dę yu ze' nu cyid güiyy der, gun locyuub yu de ru nu fert zir gyicy cup ru consuel lo Crisht, nunu cuic yu baloor ni der nu nac mi. <sup>3</sup> Gun orze' cue' checa ni tub la der nu ricy cup ru consuel lo Crisht nu nac nu rzac zi der ze'. Tees laab de ru rad lagy der nu rlagy ñi nu gzac den de coz ze'. <sup>4</sup> Gun lat nu gabee rcyiiñ dę lat der, tiem bi mnęe dę lo der nu gzac zir, nunu de ru gud lagy der nu gal nu mnęe, ni guuc ñi. <sup>5</sup> Nde' nu ornu ya wangagyee ga', orze' bzuu neza Timoteo nu biid yu lo der, gun orze' cugyi'y lo der ben a nap ricy cup der consuel lo Crisht. Gun ya gudziba nis yub nuras mod nu shiñ gyicy nuy de ru. Gun b enu ni, orze' leew la b icy dę riiñ ni Ñgyoozh lat der.

<sup>6</sup> Na Timoteo bi briy nu bruu y lo der. Bri nuy de rasoq nap nu ricy cup der consuel lo Crisht, nunu rca der losa'r. Mniyy nu dub laa tiem nap ca ic der nu nac dę ya. Nunu mniyy nu gal nu dę ya rlagy dę nu gzacä de ru, ni' zi'l de ru rlagy der nu gzac der dę ya. <sup>7</sup> Nde' nu der b icy na, de ru briic der baloor nę dę lat nu deet bzac dę, nunu bzac zi dę. Briic der baloor nę dę nu nac nu dzi fert ricy cup der consuel lo Crisht. <sup>8</sup> Nunu nu nac nu fert ricy cup der consuel lo Shuaan den Jesuuz, nde' nu yet lagy dę yu' gyishlombecy ii.

<sup>9</sup> Na tona' la dric dę gras ni Ñgyoozh nu nac de ru, nunu dric dę gras nim, gun ricy mi nu tona' la yet lagy dę nu nac der. <sup>10</sup> Dzi rel la rdiñ dę lom nu zaan mi nu yap güii dę der lo nu loo la. Orze' gric dę la zi'l coz nu gabee ricy falt ni der par nu gyafert zir gyicy cup der consuel lo Crisht.

<sup>11</sup> Rlagy dę nu Ñgyoozh Uz den, gal nu Shuaan den Jesuuz locyuub mi dę ya nu gad tub mod nu yap güii der. <sup>12</sup> Nunu rlagy dę nu gyicy Shuaan den Jesuuz nu dzi zir ca der losa'r gal nu dela de' zir de mbecy. Rlagy dę nu ca der losa'r gal nu dę ya rca dę de ru. <sup>13</sup> Rlagy dę nu gyicy fert mi der nañ lardoor, nunu rlagy dę nu

gac der mbecy cacy, gal nu mbecy nu sac falt ni par lo Ñgyoozh, Uz den, ornu cyid Shuaan den Jesucrisht tuuba' tir nu dela mbecy nu nac nim. |Laab ni gac ñii!

### Mod nu rlagy Ñgyoozh nu chesa mbecy

**4** Na der b icy na, como dę ya nac dę mbecy nu rnii por cuen ni Shuaan den Jesuuz, rnishbaa dę lo der, nunu du' dę riiñ yaa der nu zaab chesa lar mod nu blyu dę ni der, tub mod nu ganap lagy Ñgyoozh, gal nu bi ricy der na. <sup>2</sup> De ru bi rad lagy der de coz nu mnii Shuaan den Jesuuz nu blyu dę ni der. <sup>3</sup> Ñgyoozh rlagy mi nu chesa der mod ni mbecy nu sac falt ni. Nunu rlagy mi nu cue' gal ni tub la der mbecy nu wanchelaar. <sup>4</sup> Tub ga la der rlagy ñi nu gad lagy der lac mod gyicy nur mñaar. Gyicy nur ñii tub mod nu nap par lo Ñgyoozh, gal nu mod nu se'ñ. <sup>5</sup> Cue' nu nii toor nu gyicy ru tub mod nu a' yad ñi nu gyicy ru nur ñii, gal nu ricy de mbecy nu a' yu' lo Ñgyoozh. <sup>6</sup> Orze' ni tub la mbecy walag y ni gyicy ras nuy b icy yu nu nac Crisht. Ni walag y ni nu gyicy yu gan losa'y nu nac asunt ni biñ mñaar. De ya bi bdoo dę rishlo der nu Ñgyoozh cuic mi cashtig ni de mbecy nu ni ricy. <sup>7</sup> Gun Ñgyoozh wansum de ub na nu gac naa mbecy nu ral losa' nu wanchelaa, sinu bzum de ub na nu gac naa mbecy cacy. <sup>8</sup> Orze' cyu zi'l mbecy nu washet ic nu gyicy gal nu rdunii ii, yu ze' walab nu wacshet ic yu de coz nu rnii mbecy zi'il, sinu washet ic yu nu gyicy yu de coz nu rnii Ñgyoozh, biñ nu rbic Espiriit Yon nim ni den.

<sup>9</sup> Walag y ni zeeda gyicy lo der par nu gad lagy der nu car de b icy ru nu nac Crisht, gun laab Ñgyoozh bi blyu um ni der nu ca tub ca tub zi'l der losa'r. <sup>10</sup> Tees ni b icy der nu dela de b icy na nu yu' lo de yu ni Macedonia. Nde' nu der b icy na, dę ya rnishbaa dę lo der nu tub dzi ga pca zir der losa'r. <sup>11</sup> B icy der nu nap chu'r nu losa'r. Nunu cue' ne' ru' der lat asunt ni mbecy. Nunu zaab b icy la der riiñ nu gad nu gow der. De nde' riiñ nu bdu' dę yaa der anzir. <sup>12</sup> Ni mod b icy der, gun orze' ca lagy de mbecy nu walab mbecy ni Crisht lo der, nunu orze' wayicy falt ni tub la coz ni der.

### Cyid Jesucrisht tuuba' tir

<sup>13</sup> Der b icy na, walag y dę nu gac der mbecy nu shtee la nu nac coz nu gzac de mbecy nu bi gut, gun orze' cue' nu gyicy shni der gal nu ricy de mbecy nu wacyish lo nu gyabañ. <sup>14</sup> Gun de ub na rzeña lagy den nu Jesuuz gut mi, nunu byabañ mi. Nunu nde' nu Ñgyoozh gyicy mi nu cyid Jesuuz tuuba' tir. Cyid num de yu nu bi gut nu b icy cup consuel lom.

<sup>15</sup> Na nęe lo der gal nu blyu Shuaan den Jesuuz nę dę. De mbecy nu yu' lat den nu gabee mbañ ornu shuub dzi nu cyid Shuaan den Jesuuz tuuba' tir, waya ga dey lo par de yu nu bi gut. <sup>16</sup> Gun gzab ti' nu rbish ti, nunu gnii anc zub lo, nunu dulaa trumpet ni Ñgyoozh. Orze' laab Shuaan den Jesuuz gruum gal gyibaa gyet gash mi. Orze' nu loga la de mbecy nu b icy cup consuel lo Crisht gyabañ dey. <sup>17</sup> Orze' despuees de yu nu gabee mbañ gyes nañ dey lo bi tublaazh la nu de yu

nu byabañ ze'. Gya dey lat za. Gun orze' dzeel den Shuaan na Jesuuz baa. Orze' cyiiñ du den mi tub la.  
<sup>18</sup> Orze' briic der baloor ni losa'r nu nac de riidz ii.

**5** Der bicy na, walagy ñi zeeda tub gyicy lo der nu nac nu la dzi o la or gac de coz ze', <sup>2</sup> gun de ru nap rad lagy der nu dzi nu cyid Shuaan den Jesuuz tuuba' tir cyid ñi gal nu ryiid tub gubaan rel. <sup>3</sup> Ornu gnii de mbecy: "Sac la gyel deet. Ri zu", orze' sij la ru'ña gyel zi lo dey. Sij la gzac dey gal nu rzac tub biñ mñaa ornu bi gaal mi mdoo. Wada' la mod nu ruu chu dey loñ.

<sup>4</sup> Der bicy na, de ru walab nu na der gal nu na de mbecy nu rded ze' nu cow, nunu dzi nu cyid Shuaan den tuuba' tir, nde' wac ñi nu largut la der gal ricy tub gubaan. <sup>5</sup> Dela de ru na der gal nu na mbecy nu rded ze' nu yu' yaa. Na der gal nu na mbecy nu rded or-widoo. Walab nu na der gal nu na mbecy nu rded rel o ze' nu cow. <sup>6</sup> Nde' nu walagy ñi nu gac den gal nu na de mbecy nu nas, gal nu ricy de' zir mbecy, sinu rlagy ñi nu zu ga lagy den, nunu gzu den altant. <sup>7</sup> De mbecy nu raas, raas dey rel. Nunu de mbecy rzugy, rel rzugy dey. <sup>8</sup> De ub na nac naa mbecy nu rded or widoo. Orze' rlagy ñi nu gzu den altant. Gun benu gyicy cup der consuel lo Ñgyoozh nu nac nu rca der mi, orze' nde' nañ gal nu na tub cyug nu rsoow too der, gun cue' nu gad güii too der. <sup>9</sup> Gun Ñgyoozh wansum den par nu chan lo cashtig nim, sinu bzum den par nu gruu mbañ naa nu nac Shuaan den Jesucrisht. <sup>10</sup> Jesucrisht gut mi par nu nac de ub na, gun orze' mas cui mbañ na, o mas gat na, tees gyan cyiiñ dun mi. <sup>11</sup> Nde' nu briic der baloor ni losa'r, nunu blocyuub losa' der nu gyafert yu gal nu bi ricy der na.

### Baly rlocyuub yu de mbecy

<sup>12</sup> Der bicy na, dë ya rnishbaq dë lo der nu ca lagy der lo de yu nu ricy riiñ ni Crisht lat der, de yu nu riib ic, de

yu nu rshuu nu de ru. <sup>13</sup> Rlagy ñi ca lagy der loy, nunu ca der yu nu nac de riiñ nu ricy dey. Nap gu' nu der losa'r.

<sup>14</sup> Der bicy na, dë ya rnishbaq dë lo der nu niir lo de mbecy sed nu cue' gazed dey. Briic der baloor ni de mbecy dzidz. Nunu blocyuub der de mbecy shni. Bicy cup der pasež nu dela mbecy.

<sup>15</sup> Rila cue' gyicy gal ga der. Sinu dub laa tiem bloo lo der nu nap gyicy nu der losa'r, nu dela de mbecy.

<sup>16</sup> Dub laa tiem bicy der nu zu cyit lagy ru. <sup>17</sup> Zaab mnii nu la der Ñgyoozh. <sup>18</sup> Briic der gras ni Ñgyoozh mas la zi'l coz nu rzac der, gun nde' coz nu rlagy mi nu gyicy der gyi' nu nac der mbecy ni Crisht.

<sup>19</sup> Cue' gyicy der nu checa Espiriit Yon ni Ñgyoozh nu gyicy mi riiñ lat der. <sup>20</sup> Nunu cue' gyicy zet lagy der lo de riidz ni Ñgyoozh nu rshaal dey lat der. <sup>21</sup> Gush der shcab nu nac ñii ben a rishli. Orze' "O" mnii der ni de riidz nap, <sup>22</sup> tees bzu chu der de lo la de coz a' nap ze'.

<sup>23</sup> Orze' Ñgyoozh, biñ nu rbic gyel ri zu nañ lardoон, gyicy mi nu de mod la gac der mbecy cacy, nunu gyicy mi nu dela lugaar ni der sac falt niñ ornu cyid Shuaan den Jesucrisht tuuba' tir: gaza' espiriit ni der, gal nu lardoo der, gal nu cuerپ ni der. Delañ sac falt niñ.

<sup>24</sup> Orze' segur la ni gyicy Ñgyoozh, biñ nu bzu der nu gac nim, gun dub laa tiem mi ze' ricy paam.

### Baly rnii nuy dey ñgyoozh

<sup>25</sup> Der bicy na, ni' zi'l bdiiñ der lo Ñgyoozh nu nac dë ya.

<sup>26</sup> Dela der mnii ñgyoozh nu rishnap nu de bicy ru nu nac Crisht.

<sup>27</sup> Ya rnishbaq dë lo der por cuen ni Shuaan den Jesucrisht nu lab der lo gyicy ii lo dela de bicy na.

<sup>28</sup> Shuaan den Jesucrisht gyicy mi faboor nu nap gyicy num der.

## 2 Tesalonicenses

Baly zeed yu Ŋyooozh ni de mbecy Tesalónica

**1** Yä Baly, nu Silvano, gal nu Timoteo tublaazh la  
zeed dë gyicy ii lo de ru b icy na nu nac Crisht nu  
yu' gyedz Tesalónica. De ru mbecy ni Ŋyooozh, Uz den,  
gal nu Shuaan den Jesucrisht.

<sup>2</sup> Ŋyooozh Uz den nunu Shuaan den Jesucrisht gyicy  
mi faboor nu nap gyicy num de ru, nunu gyicy mi nu  
cheti ri añ ni der.

Ŋyooozh gri beem ni de mbecy cyi ornu cyid Crisht tuuba' tir

<sup>3</sup> Der b icy na, rlag y ñi nu dub laa tiem gric dë gras ni  
Ñyooozh nu nac de ru gal nu yad ñi, gun tub dzi ga  
zaab gyicy cup zir der consuel lo Crisht, nunu zaab ca  
zir der de losa'r. <sup>4</sup> Nde' nu dë yä ryabicä gyel mbecy ni  
der ornu rdø riidz nu de mbecy ni Crisht nu yu' gal  
reña' lugaar. Ryabic dë gyel mbecy ni der nu nac nu  
rzu fert der, nunu nu nac nu ricy cup der consuel lo Crisht  
lat nu rshet zi mbecy de ru nunu lat nu rzac deet  
der. <sup>5</sup> Nu nac de nu nde', rabee nu Ŋyooozh dzi se'ñ ricy  
mi ornu ri beem ni dela mbecy, gun orze' niim nu  
yad ñi ni der nu chu'r lat de mbecy nu riib ic mi, gun  
de ru rzac zi der nu nac nu riib ic mi der naa la.

<sup>6</sup> Gun Ŋyooozh dzi se'ñ ricy mi. Nde' nu gyicy mi nu  
gzac zi de mbecy nu rshet zi de ru, <sup>7</sup> nunu gyicy mi nu  
nap chesu nap lag y de ru, de mbecy nu rzac deet. Ni'  
zi'l gyicy num dë yä. Nde' gyicy mi ornu shuub dzi nu  
gruu zac Shuaan den Jesuuz. Gruum gal gyibaa lat  
lyush g yi nu cyid mi. Nunu cyid mi lat de anc nu dzi  
rcyiiñ nim. <sup>8</sup> Orze' cyid mi par nu cuic mi cashtig ni de  
mbecy nu a' yu' lo Ŋyooozh, gal nu ni de yu nu wacsu  
ub gyidag de riidz nu sac ni Shuaan den Jesuuz. <sup>9</sup> Ze'  
cashtig nu cuic mi ze', nde' nu shiñ gzac dey tub la.  
Orze' chu' dey reña' lugaar. Wayu' dey ze' nu rcyiiñ  
Shuaan den Jesuuz. Ni wayu' dey ze' nu yu' gyel lily  
nim. Ni wayu' dey ze' nu ricy mi coz ily. <sup>10</sup> Cuic mi  
cashtig ni dey ornu cyid mi gal dzi nu blosu Ŋyooozh.  
Gun orze' dela mbecy ni Crisht gyabic dey gyel mbecy  
nim, nunu cha nu ic dey nu dzi zily nac mi. Ni' zi'l gyicy  
gaza' de ru, de mbecy nu guña lag y de riidz nu mnëe  
de.

<sup>11</sup> Nde' nu zaab rdiñ lą dë lo biñ nu nac Ŋyooozh ni  
den nu gyicy mi nu gyap der nu gac ru mbecy nu blo  
sum nu gruu mbañ. Mi ze' gyicy mi nu gac za' lo der  
dela coz nap nu rlag y ru gyicy ru, gal nu de coz nu gyi  
cy der nu nac nu ricy cup ru consuel lo Crisht. Ni gyicy  
mi nu nac nu dzi fert mi. <sup>12</sup> Ni mod rnëe du dë Ŋy-

oozh, gun orze' gyabic mbecy gyel mbecy nim nu nac  
de ru, nunu gyabica' dey gyel mbecy ni der nu nac mi  
ze'. Ni gyicy dey dub gal nu na faboor nu ricy Ŋyooozh  
gal nu Shuaan den Jesucrisht num de ru.

Ornu cyid Crisht tuuba' tir

**2** Na nëe lo der b icy na ni de riidz nu cyid Shuaan  
den Jesuuz tuuba' tir, gal nu de riidz ni nu gy  
atublaazh den dun mi. Rnishbaq dë lo der nu <sup>2</sup> cue'  
gzaan der nu can mbecy shcab ni der. Ni cue' zaan der  
nu chiib dey de ru nu nac nu rnii dey nu bi biid Shuaan  
den Jesucrisht. Dz i ga ni nii tub mbecy nu rnii por cuen  
ni Ŋyooozh. O dz i ga ni mod za riidz ni tub mbecy nu  
rshaal riidz nim. O dz i ga nii mbecy lo der nu gyicy nu  
bzeed dë nu ni rniiñ. <sup>3</sup> Tees cue' zaan der nu guu mbe  
cy ru ni tub la mod. Gun anzir nu shuub dzi ze', orze'  
nid ru' mbecy lo Ŋyooozh, nunu gruu zac tub mbecy  
nu cha contr nim. Mbecy ze' bi ca lo cuen nu nit loy.  
<sup>4</sup> Yu ze' chay contr ni dela coz nu gyicy mbecy par Ŋy  
ooozh. Dela coz nu driib zily mbecy chay contr niñ.  
Nunu gashtal nañ yu' nu driib zily mbecy Ŋyooozh ze'  
chesub yu. Gyicy yu nu nac yu Ŋyooozh.

<sup>5</sup> ¿A wagyea' lag y der nu yä bi bzatä mbecy ze' lo  
der lat nu pcyiiñ lat der? <sup>6</sup> Na de ru bi rad lag y der nu  
cyu ricy nu gabee nigul cyuu zac yu ze'. Tees ornu shu  
ub tiem niy, gaze' nu gruu zac yu. <sup>7</sup> Orze' mas bi yu'  
zañ mbecy nu bi ricy coz a' nap, tees biñ nu ricy nu  
gabee nigul gruu zac mbecy a' nap ze', mi ze' zaab ricy  
lam riiñ nu cue' gruu zac yu gashtal co la Ŋyooozh mi  
gyishlombecy. <sup>8</sup> Orze' dzi ze' gruu zac yu. Na ornu cyid  
Shuaan den Jesuuz tuuba' tir, orze' cut mi yu nu nac bi  
nu griib ru'm. Nit lom yu ornu cyid mi tuuba' tir nu  
gyel lily nim. <sup>9</sup> Tees lat nu chesay gyishlombecy ii, orze'  
nuras locyuu yu mbecy ze' nu chay contr ni Ŋyooozh.  
Gyicy nuras nu cyiñ mbecy ze' nu gyicy yu coz ily. Gyi  
cy yu de lo la nusuriidz fals, gal nu de coz nu cha nu ic  
mbecy. <sup>10</sup> Nunu de lo la mod guuy de mbecy nu bi ca lo  
cu en nu nit lo, gun de yu ze' wangalagy dey niiy "O" ni  
de coz rishli. Ni wangalagy dey nu ca dey ñi. Gun benu  
ñgyicy dey nde', orze' gruu mbañ dey. <sup>11</sup> Nde' nu Ŋy  
ooozh zaan mi nu gadza dey, gun orze' cheña lag y dey  
ni de coz rguu. <sup>12</sup> Nde' nu Ŋyooozh niim nu yu' falt ni  
de mbecy nu wancheña lag y ni de coz rishli, de yu nu  
bet zir lag y coz a' nap.

Ŋyooozh bi pcuim de mbecy nu gruu mbañ

<sup>13</sup> Der b icy na, dub laa tiem rlag y ñi nu gric dë gras ni  
Ñyooozh nu nac de ru mbecy nu razañ lag y Shuaan

den Jesuuz. Gun Ñgyoozh pcuim de ru nese nu loga la nu gruu mbañ der. Orze' Espiriit Yon nim b icy mi ñii, ornu b icy mi nu byac der mbecy nu bi zu chu par Ñgyoozh. Ni mod na der byac ru nu nac nu ricy cup der consuel lo de riidz rishli nim.<sup>14</sup> Gun Ñgyoozh blo sum de ru nu ni gzac der, nunu ni bzac der nu nac de riidz nu sac nim nu pshaal d e lat der. Nunu blosum der par nu zac lor de gyel lily ni Shuaan den Jesucrisht.

<sup>15</sup> Nde' nu na, der b icy na, bzu fert der nu nac de riidz rishli nu blyuu ni der, nunu cue' laa yaa der ñii. De nde' mn e d e lat nu rcyiñ ña lat der, nunu gal nu mn ee lo gyicy nu bzeed a lo der. <sup>16</sup> Orze' ub la Shuaan den Jesucrisht gal nu Ñgyoozh Uz den cuic mi consuel ni der. Gun mi ze' nac mi biñ nu rca de ub na. Nunu nu nac faboor nim, orze' cuic mi tub consuel nu rila walazh ni den. Nunu mi ze' gyicy mi nu grish lon nu gruu nap na. <sup>17</sup> Orze' de mi ze' cuic za' lam consuel ni der. Nunu gyicy dem nu gyafert der, gun orze' dela coz nu gyicy der gal nu de coz nu gniir, nap gruuñ ni der.

### Cyiñ der lo Ñgyoozh nu nac d e ya

**3** Ze' laab nii la stub coz nu nee lo der b icy na, nde' nu cyiñ der lo Ñgyoozh nu nac d e ya. Cyiñ der lom nu dzach grush las de riidz ni Shuaan den Jesuuz dela lugaar nunu cyiñ der lom nu ca lagy de mbecy loñ gal nu g uc lat de ru. <sup>2</sup> Ni' zi'l cyiñ der lom nu cue' zaan mi nu shiñ gyicy nu de mbecy a' nap d e ya. Gun walab dela mbecy ricy cup dey consuel lo de riidz ni Shuaan na. <sup>3</sup> Tees Shuaan den Jesucrisht, mi ze' nac mi biñ nu ricy paa. Nunu mi ze' cuic mi fers ni der. Nunu co chum der lo nuras a' nap. <sup>4</sup> Nunu mi ze' ricy mi nu gyicy cup d e consuel lo der, gun rad lagy d e nu ricy der de coz nu mn e d e, nunu segur la zaab gyicy la der ñii par lo.

<sup>5</sup> Na Shuaan den Jesuuz locyuub mi der nu ca der de mbecy, gal nu rca Ñgyoozh den, nunu cuic mi fers ni der par nu gagye der ornu gzac zir.

### Rlagy ñi gyicy den riiñ

<sup>6</sup> Der b icy na, ya rn e lo der nu nac rishbeey ni Shuaan den Jesucrisht nu gruu chu der lo ca zi'l na b icy na nu walagy gyicy riiñ, gal nu lo de yu nu wagiyicy gal nu rnii de riidz nu blyuu d e ni der. <sup>7</sup> De ru nap rad lagy der nu rlagy ñi gyicy der gal nu b icy d e. Walab nu wangiyicy d e riiñ lat nu pcyiñ d e lat der. <sup>8</sup> Nunu wantaw leew d e gyit, sinu brish d e g yi'ñ. Lugaar nu gazed d e, ca nu bloo lo d e nu b icy d e riiñ dzi rel la, gun wangalagy d e nu rriib a de nu nde' ic der. <sup>9</sup> Yad ñi nu diñ d e nu d aw lo der. Tees wantiñ d e gun rlagy d e nu gyicya tub mod nap par nu zac der, gun orze' gyicy der gal nu b icy d e ya. <sup>10</sup> Lat nu pcyiñ d e lat der, i mod mn e d e lo der: "Mbecy nu washet ic nu gyicy riiñ, orze' yu ze' cue' goy gyit." <sup>11</sup> Bi neñ d e nu yu' la be mbecy lat der nu wagiyicy yu riiñ. Se la la coz ricy dey. Nomaas nu rne' zi'l ru' dey lat asunt ni mbecy. <sup>12</sup> Orze' nu nac rishbeey ni Shuaan den Jesucrisht, ya rn e lo de mbecy ze' nunu rdu' riiñ yaa dey nu cue' nid ru' dey, sinu gyicy dey riiñ par nu gad coz nu gow dey.

<sup>13</sup> Der b icy na, cue' gazed der nu gyicy der de coz nap. <sup>14</sup> Benu ca na tub mbecy walagy yu zuub gyidag yu de riidz nu rn e lo der lo gyicy ii, orze' bdu' cuen der yu, nunu cue' gac nu der yu. Gun orze' gat loy. <sup>15</sup> Tees cue' gyicy ruy par losa' yuur, sinu byoo rishloy gal nu ricy nur b icy ru.

<sup>16</sup> Orze' Shuaan den Jesuuz, biñ nu rbic gyel ri zu, zeed mi gyel ri zu lat der dub laa tiem nunu dela mod. Mi ze' gac num dela der.

<sup>17</sup> Ya Baly, zeed a ñgyoozh ni der nu letr nu rca a nu yaa. Ni mod rca a nu la del a gyicy nu rzeed a lo mbecy. Ni mod rca a. <sup>18</sup> Shuaan den Jesucrisht gyicy mi faboor nu nap gyicy num dela der.

# 1 Timoteo

## Gyicy loga nu bzeed Baly lo Timoteo

<sup>1</sup> Ya Baly nacə tub aposht, tub yu nu rded riiñ ni Jesucrisht. Ya byaca aposht, gun ni b icy Ngoozh, biñ nu co mbañ de ub na. Nunu ni' zi'l Jesucrisht, biñ nu drish lo den lo, mi ze' b icy mi nu byaca aposht.  
<sup>2</sup> Orze' Timoteo, ya caa gyicy ii nu zeedə ñii lor. Ru nar gal nu na yu feñ ne nu nac nu ya b icy nu fert zir ricy cup ru consuel lo Crisht.

Orze' Ngoozh Uz den nu Shuaan den Jesucrisht gyicy mi faboor nu nap gyicy num ru, nunu gashni lagy mi ru, nunu gyicy mi nu cheti ri añ nir.

## Bicy cuidad der nu de mbecy nu rlyuu coz fals

<sup>3</sup> Lat nu pcyiiñ na Éfeso, ornu bi zu la nu cha par Macedonia, orze' mnęe lor nu ricy ñi presis nu gyiyeen ru Éfeso, gun orze' gac niir lo ca na de mbecy nu cue' lyuu dey de coz fals. <sup>4</sup> Mnii lo dey nu laa yaay de riidz nu bloo ic mbecy zi'l ze', gal nu de lisht nu ta' nu la de gyitoo bel ni dey. Gun de nu nde', tub lo zi'l nu ricy ñi nu ro zi mbecy riidz nu losa'y. De coz ze' walocyuub ñi nu "O" nii mbecy ni de coz nu rlagy Ngoozh nu nac nu gyicy cup dey consuel lo Crisht.

<sup>5</sup> Rlagy ñi nu gyicy dey gal nu rnęe, gun orze' ca tub ca tub zi'l dey losa'y. Rlagy ñi ca dey losa'y gal nu ricy mbecy nu caacy lardoo, gal nu ricy mbecy nu sac nu gat lo nu nac coz nu ricy yu, gal nu ricy mbecy nu ricy cup consuel lo Jesuuz nu dutuub la lardoo. <sup>6</sup> Nde' nu la be mbecy gudza dey nez nu rlagy ñi nu chay. Orze' nde' nu nac nu riidz ton zi'l ro dey. <sup>7</sup> Rlagy dey gac yu mbecy nu rlyuu leey nu bzeeñ Moisees, tees ni ub dey wagyet lag yu cuen de coz nu rniiy. Nunu de riidz nu fert la zu dey nu rshaal yu, ni' wagyet lag yu cuen.

<sup>8</sup> Rad lagy den nu leey ni Moisees, nde' coz nap benu gyicy duñ ñi gal mod nu rlagy ñi. <sup>9</sup> Rlagy ñi gad lagy den nu Ngoozh briic mi leey walab par nu chañ contr ni mbecy nu sac falt ni, sinu par nu chañ contr ni mbecy nu yu' falt ni, par de mbecy nu wagiyac coz nu rnii leey, par de mbecy nu wacsuub gyidag ni Ngoozh, par de mbecy nu shiñ ricy, par de mbecy cyi, par de mbecy nu waca lagy lo Ngoozh, par de mbecy nu waca Ngoozh, par de mbecy nu rut uz, par de mbecy nu rut ñaa, par de mbecy nu rut losa', <sup>10</sup> par de mbecy nu ral losa' nu wanchelaa, par de mbecy nu ricy losa' gyeey par biñ mñaa, par de biñ mñaa nu ricy losa' mñaa par yu gyeey, par de yu nu rut losa' nu tiñ, par de mbecy rguu, par de mbecy nu rnii cyooh, orze' despuées rguuy. Par dela de mbecy nu ni ricy ze', za leey

ze' contr ni dey. Nunu de riidz ni Ngoozh rniiñ nu yu' coz nu wac gyicy na. Benu mbecy gyicy yu de coz ze', orze' za ga' leey contr niy. <sup>11</sup> Dela de coz ni leey nu rnęe ii bruuñ lo de riidz nap ni Jesucrisht. Nunu dela riidz nap ze', Ngoozh Yon b icy mi nu rad lagy na. Nunu riiñ nu briic mi nu gyicya, nde' nu tush lasa de riidz nap ze'.

## Baly briic yu gras ni Ngoozh nu nac nu gushni lagy mi yu

<sup>12</sup> Ya tonal la drica gras ni Shuaan den Jesucrisht, gun b icy mi ya par mbecy nu ricy paa, nunu nde' nu bdu'm riiñ nim ya. Nunu laab ub mi locyuub mi ya nu gyicya riiñ ze'. <sup>13</sup> Ni b icy num ya mas shiñ b icy gulas. Mnęe riidz nu gua contr nim. Psheed zi de mbecy nim. Nunu mnęe zi nim. Tees gushni lagy mi ya, gun gyel ton zi'l b icya nde', nunu tiem ze' nigul gyicy cupa consuel lom. <sup>14</sup> Orze' Shuaan den Jesucrisht b icy mi tub faboor ily num ya nu dzi nap b icy num ya. Orze' nde' nu na bi ricy cupa consuel lo Jesucrisht, nunu rcam. Ni ricya nu nac nu nac du Jesucrisht.

<sup>15</sup> De riidz nu rnęe na, nii coz nu segur la, nunu dela mbecy rlagy ñi cheña lagy dey niñ. Riidz ze', nde' nu Jesucrisht biid mi gyishlombecy ii, gun orze' co mbañ mi de mbecy cyi. Orze' lo dela de mbecy cyi, ya nacə mbecy cyi ga' zir. <sup>16</sup> Nde' nu Ngoozh gushni lagy mi ya, gun orze' gac lyuu Jesucrisht ni de mbecy nu tonal la ricy cup mi pasęz num dey. Gun mas ya nacə tub mbecy cyi zub lo zir, tees nu nac ya, orze' sya' de' zir de mbecy nu bi ca lo cuen nu gyicy cup consuel lom. Orze' cui mbañ dey tub la. <sup>17</sup> Orze' rlagy ñi nu ca lagy den lo biñ nu riib ic, nunu rlagy ñi nu gyabic den gyel mbecy nim tub la. Mi ze' biñ nu mbañ tub la. Mi ze' biñ nu wacsac na. Tub zi lam nac mi Ngoozh nu rishli. ¡Laab ni gac ñii!

<sup>18</sup> Timoteo, ru nar gal nu na tub yu feñ ne. Orze' ya rdu' riiñ ii yaar laaba' gal nu mnii de yu nu mnii por cuen ni Ngoozh nu nac ru. Gun orze' fert la char contr ni de mbecy nu rlyuu coz fals. <sup>19</sup> Orze' lat nu gyicy ru de coz ze', ni' zi'l b icy cup consuel lo Jesuuz. Nunu tub lo zi'l de coz nu rad lagy ru nu se'ñ, de nde' b icy, gun yu' la be mbecy nu b icy lay coz a' nap nu mnii too dey. Orze' nu mnu dey consuel nu b icy cup yu. <sup>20</sup> Lat de yu ze' bruu Himeneo nu Alejandro. De yu ze' bi bgu' dey yaa nuras nu gyicy ras nuy dey, gun orze' sya' dey nu cue' nii dey riidz nu za contr ni Ngoozh.

## Lac mod nii nu mbecy Ñgyooozh

**2** Nu loga la rnęę lo de mbecy ni Crisht nu ricy ňi presis nu zaab cyiň la dey dela coz nu cyiiň ni mbecy lo Ñgyooozh. Nunu ricy ňi presis nu nii nu dey mi. Ricy ňi presis nu cyiň dey lom par dela mbecy. Nunu ricy ňi presis nu cuic dey gras nim.<sup>2</sup> Cyiň dey lom nu nac de mbecy nu riib ic. Nunu cyiň dey lom nu nac dela de fushtiz. Cyiň dey lom tub mod nu locyuub ňi dela mbecy. Gun orze' gusht cyiiň den, nunu chu'n nu gyel ri zu lat nu gyicy na coz nu rlagy Ñgyooozh, gal nu coz nu se'ñ.<sup>3</sup> Rlagy ňi nu cyiň ru lom nu nac dela mbecy, gun nde' coz nap nu gyicy ru, nunu nde' coz nu gyicy ňi nu gyet lagy Ñgyooozh, biň nu co mbaň de ub na.<sup>4</sup> Gun mi ze' rlagy mi nu ruu mbaň dela mbecy, nunu rlagya'm nu dela mbecy gad lagy dey riidz nu rishli nim.<sup>5</sup> Gun zu tub zi Ñgyooozh par dela mbecy. Nunu zu tub zi biň nu mne' ic ni de mbecy lo Ñgyooozh. Biň nu mne' ic ze', mi ze' Jesucrisht. Nunu laab ub mi nac mi mbecy.<sup>6</sup> Gun Jesucrisht pshet ic mi nu gut mi par nu briish mi cyi dela mbecy. Ornu pshuub tiem nu gut mi, orze' nde' blyuuň lo de mbecy nu Ñgyooozh rlagy mi nu gruu mbaň dela mbecy.<sup>7</sup> Nde' nu ya bdugyi nu naçä tub aposht, nunu naçä tub yu nu rshaal laab de riidz ze'. Nunu bdu'm riiň yaq nu lyuu lat dela mbecy nu walab mbecy Israeel de riidz rishli ni Ñgyooozh. Nunu ya rishli rnęę, walab nu rguu.

<sup>8</sup> Nde' nu ya rlagya nu de yu gyeey nu yu' dela lugaar shes nañ dey yaay ornu nii nu dey Ñgyooozh. Nunu yaay nu shes nañ yu ze', nde' rlagy ňi nu yaa mbecy nu wayicy cyi. Rlagy ňi nu gac yu mbecy nu wagazi lagy. Rlagy ňi gac yu mbecy nu wagnii deet.

<sup>9</sup> Ze' de biň mňaa rlagy ňi nu mod nap gzu dem shab mi. Rlagy ňi gzu dem negy nu a' le' byaa, nunu rlagy ňi nu rasoo gzu dem shab mi. Ornu gzu cyudz dem, orze' rlagy ňi nu cue' le' gyicy nap dem gyich toom. Rlagy ňi nu cue' nu dzi dii dem ub mi nu or, nu urndub nu dzi sac, o nu negy nu dzi ſgyup sac.<sup>10</sup> Walab nde' mod nu gyicy dem nu cyit nam, sinu coz nap nu gyicy dem, nde' gyicy ňi nu cyit nam. Nde' mod nu rlagy ňi par biň mňaa nu nac ni Ñgyooozh.<sup>11</sup> Orze' de biň mňaa rlagy ňi nu gzuub gyidag dem de riidz nu rdulyuu lat de mbecy ni Crisht. Rlagy ňi nu "O" nii dem nañ lardoom, tees cue' la grib riidz ru'm.<sup>12</sup> Ya waricä rishbeey nu lyuu biň mňaa lat mbecy zigy. Nunu waricä rishbeey nu gyub ic dem lat de yu gyeey. Sinu rlagya nu ri gzub dem. Cue' gniim.<sup>13</sup> Gun Adaang, yu ze' psa' lagy Ñgyooozh yu loga la. Gaze' nu despuees psa' lagy mi Eva.<sup>14</sup> Nunu walab Adaang bguu nuras yu, sinu Eva. Na ornu bi bguu nuras mi na, orze' bet lag mi lo cyi.<sup>15</sup> Tees na de biň mňaa gruu nap mi, ornu gaal mi mdoo, benu zaab gyicy cup lam consuel lo Ñgyooozh, nunu zaab caa lam de mbecy, nunu zaab gyicy lam coz nu gyedzu' lagy Ñgyooozh, nunu gac dem mbecy rasoo.

## De yu nu nac yu bel lat de mbecy ni Crisht

**3** Mbish tub riidz nu rlagy ňi nu cheňa lagy mbecy. Riidz ze', nde' "Benu ca na tub mbecy rlagy yu gac yu yu bel lat de mbecy ni Crisht, orze' tona' la riiň nap rlagy yu gac yu." Nde' riidz nu rlagy ňi nu cheňa lagy mbecy.<sup>2</sup> Nde' nu na, par nu cyiiň yu nu gac yu yu bel, orze' rlagy ňi nu cyiiň yu tub mod nu cue' la griib mbecy gyidza tooy. Rlagy ňi gac yu mbecy nu ricy paa nu tub zi'l biň nu nac mňaay. Rlagy ňi gac yu mbecy nu zu cuidad nu nac ub. Rlagy ňi nu gac yu mbecy nu nap rash shcab. Rlagy ňi nu gac yu mbecy rasoo. Rlagy ňi nu nap nii nuy mbecy nu rza yu'y. Rlagy ňi nu gac yu mbecy nu nap na shcab ni par nu lyuuy ni losa'y.<sup>3</sup> Cue' gac yu mbecy rzugy. Cue' gac yu mbecy dzech na. Sinu rlagy ňi nu gac yu mbecy nu nap ri lardoo. Rlagy ňi nu gac yu mbecy gugy na. Cue' gac yu mbecy nu ye rzac lo tiň.<sup>4</sup> Nunu rlagy ňi gac yu mbecy nu nap riib ic lat de famil ni. Rlagy ňi nu de i'ñ yu gac yu mbecy nu rca lagy lo de mbecy nunu gac dey mbecy nu rzuub gyidag.<sup>5</sup> Gun benu tub mbecy wagac gyub ic yu lat de famil niy, orze' ni' zi'l wac ña nap yu de mbecy ni Crisht.<sup>6</sup> Yu nu gac yu bel wac mbecy nu sa brugyi' ricy cup consuel lo Jesuuz, gun nis gyale'y. Gun benu ni gyicy yu, orze' gnii Ñgyooozh nu cyi nu gyicy yu zañ contr nim gal nu bicia' zi'l nuras.<sup>7</sup> Tuuba' coz rlagy ňi nu cue' gzab riidz nu nac yu mbecy a' nap lat de mbecy nu walab mbecy ni Crisht, gun orze' cue' nu gruu gyel mbecy niy. Orze' cue' gyicy nuras gan yu.

## De yu nu zu ayudant lat de mbecy ni Crisht

<sup>8</sup> Ni' zi'l de yu nu gzu ayudant lat de mbecy ni Crisht rlagy ňi nu gac dey mbecy nu rca lagy losa' lo. Rlagy ňi gac yu mbecy nu rnii nu dutuub la lardoo. Cue' gac yu mbecy rzugy. Cue' gac yu mbecy nu ye rzac lo tiň.<sup>9</sup> Rlagy ňi nu dutuub la lardoo dey gyicy cup yu consuel lo de riidz nu gal na briic Ñgyooozh nu gad lagy den. Nunu rlagy ňi nu cyiiň yu tub mod nu cue' gat loy nu nac de coz nu ricy yu.<sup>10</sup> Rlagy ňi gac preb dey. Orze' despuees, benu wayu' falt ni dey, orze' gaze' nu cyiiň dey nu gac yu ayudant.

<sup>11</sup> Ni' zi'l mňaa dey rlagy ňi nu gac dem mbecy nu rca lagy losa' lo. Nunu cue' gac dem mbecy nu rnii rishcuun. Rlagy ňi nu gac dem mbecy nu zu cuidad nu nac ub. Nunu rlagy ňi gyicy paa dem nu dela coz nu gyicy mi.<sup>12</sup> De ayudant rlagy ňi nu gyicy paay nu tub zi'l biň nu nac mňaay. Nunu rlagy ňi nu nap gyub ic yu de i'ñ yu, nu de' zir mbecy nu yu' yu'y.<sup>13</sup> Benu de ayudant nap gyub ic dey riiň nu bdugyi, orze' ca lagy mbecy lo dey. Orze' wadzib lagy la dey nu shaal yu de riidz nu ricy cup yu consuel lo, de riidz nu rnii coz ni Jesucrisht.

## De riidz ni Ñgyooozh nu gal na rad lagy mbecy

<sup>14</sup> Na ya drish lo nu gac yap güiij gyiilya ru, tees na caq gyicy ii zeedä lor,<sup>15</sup> gun ze' benu wac yap gyiilya, bi neň ru lac mod gyicy de mbecy ni Ñgyooozh nu de

losa'y, gun de mbecy ze' nac dey mbecy ni Ñgyoozh mbañ. De yu ze' yu nu ricy cup consuel lo Crisht, nunu de yu ze' gzu fert dey nu de riidz rishli nim.<sup>16</sup> Rishli gaal dzi coz ily de riidz nim nu gal na briic mi nu gad lagy den. Riidz ze', nde' nu:

Crisht gush mi cuerp ni mbecy,  
nunu bruu zac mi gyishlombecy ii.  
Orze' Espiriit Yon ni Ñgyoozh b icy mi nu byu' bee  
nu nac mi biñ nu sac ni tub la falt ni.  
De anc bzaac dey mi.  
Orze' brush las riidz nu rnii de coz nu b icy mi  
lat zañ nac mbecy.  
Orze' b icy cup mbecy consuel lom  
zañ lugaar ni gyishlombecy.  
Nunu despuees ni de nu nde',  
pshupa' Ñgyoozh mi gyibaa.  
De nde' de riidz nu gal tiem na briic Ñgyoozh nu gad  
lagy den.

#### De yu nu laa yaa de coz ni Crisht

**4** Tees Espiriit Yon ni Ñgyoozh naal la rniim nu ornu  
bi yad shuub dzi ni gyishlombecy, yu' mbecy nu  
wayicy cupa' dey consuel lo riidz nu ricy cup de ub na  
consuel lo na, sinu gzuub gyidag dey ni de riidz nu  
gruu lo de nuras nu rguu mbecy, nunu gzuub gyidaga'  
dey ni de riidz fals nu rlyuu de nuras.<sup>2</sup> Ni gyicy dey or-  
nu gzuub gyidag yu coz nu gnii de mbecy rzuu lo, gal  
nu de mbecy rguu. De mbecy a' nap ze' mnu shcab ni  
dey nu nac coz nu ricy yu. Orze' na wagat lo ga' dey  
mas shiñ ricy yu.<sup>3</sup> De mbecy ze' zañ coz a' nap lyuu  
dey. Ca dey ni de mbecy nu cue' gad mñaa dey. Nunu  
yu' coz nu wazaan dey nu gow mbecy. De nde' coz fals.  
De coz nu don ze', nde' nac ñii coz nu psa' lagy Ñgy-  
oozh par nu gow de mbecy nu ricy cup consuel lo Crisht,  
de mbecy nu rad lagy de riidz rishli. Nunu de yu  
ze' rbic dey gras nim ornu row dey ñi.<sup>4</sup> Gun dela coz  
nu psa' lagy Ñgyoozh nu dow na, caacy ñi. Walagy ñi  
zu chu mbecy ni tub la de coz ze' benu gric zi'l den  
gras ni Ñgyoozh ornu grush nañ.<sup>5</sup> Dela coz nu dow na  
caacy ñi, gun Ñgyoozh rniim nu caacy ñi. Nunu caacy  
ñi gun rnii nu den mi nu nac ñii.

#### Moz nu ricy paa ni Jesucrisht

<sup>6</sup> Timoteo, ze' benu ru lyuur de coz ii ni de b icy na,  
nunu benu gyafert ru nu nac de riidz nu zeña lagy dela  
den, de riidz rishli nu ricy yac ru ni, orze' benu ni gyicy  
ru, orze' ru nac ru tub moz ni Jesucrisht nu ricy paa.  
<sup>7</sup> Orze' cue' gyicy cuen ru de riidz ton nu walab lo Ñgy-  
oozh bruu. Psya' de coz nu gyicy zir ñi nu gyicy ru de  
coz nu bi ca lo cuen nu ricy mbecy ni Ñgyoozh.<sup>8</sup> Mbecy  
ñumiiñ zi gyicy yu gan benu gyicy yu riiñ par nu  
gyafert cuerp niy. Tees benu gyicy yu de coz nu ca lo  
cuen nu ricy de mbecy par lo Ñgyoozh, orze' coz ily gy-  
icy yu gan, gun benu ni gyicy yu, orze' gruu nap yu gy-  
ishlombecy ii, nunu gruu nap yu ze' nu cyiñ yu par lo.  
<sup>9</sup> Dela nde' coz rishli, nunu dela mbecy rlagy ñi nu  
cheña lagy dey ñi.<sup>10</sup> Nde' nu nu nac nde' fert ricy den

riiñ ni Ñgyoozh. Nunu rzaan la den mas shiñ ricy nu  
mbecy de ub na, gun drish lo den lo Ñgyoozh mbañ.  
Gun Ñgyoozh nac ni biñ nu rboo mbañ dela mbecy. Co  
mbañ mi de mbecy nu ricy cup consuel lo Crisht.

<sup>11</sup> Orze' de coz ii caar de mbecy nu gyicy yuñ, nunu  
lyuur ni dey nu ni gyicy yu.<sup>12</sup> Cue' zaan ru nu gyicy  
gyidz mbecy ru nu gabee nac ru mbecy feñ, sinu nap  
zir benu rlyuur ni de mbecy ni Crisht nu lac mod gyicy  
dey nu nac mod nu ricy ub ru. Mnii riidz nap. Bzu tub  
mod nu nap. Pca de losa'r. Bicy cup consuel lo Crisht.  
Nunu ru guc mbecy nu sac falt ni. Benu ni gyicy ru,  
orze' lyuur ni dey lac mod gyicy yu.<sup>13</sup> Orze' blab de ri-  
idz ni Ñgyoozh nu dutuub la lardoor ze' nu yu'  
tublaazh de mbecy ni Crisht gal yap la. Pshaal lo dey  
lac yaruu de riidz ze', nunu blyuu ni dey.<sup>14</sup> Cue' gac ru  
mbecy nu wagyicy cuen riiñ nu bdu' Ñgyoozh yaar. Ni  
bicy mi ornu mnii mbecy por cuen nim nu nac ru,  
nunu ornu de yu bel nu zu riiñ lat de mbecy ni Crisht  
brib yaa dey toor.

<sup>15</sup> Bicy de coz ze' nu dutuub la lardoor. Gun orze'  
gzac dela mbecy nu zaab ricy lar gan nu nap ricy ru ri-  
ñi ni Ñgyoozh.

<sup>16</sup> Bzu cuidad nu de coz nu ricy ru, nunu bzu cuidad  
nu de coz nu rlyuur. Fert la bzu nu delañ. Benu ni gyicy  
ru, orze' gruu mbañ ru, nunu ni' zi'l gyicy ru nu gruu  
mbaña' de mbecy nu zuub gyidag de coz nu niir.

#### Lac mod chu' de mbecy ni Crisht

**5** Cue' gab zir de mbecy gush, sinu benu gyicy dey  
coz nu walab se'ñ, orze' pshuu nu dey gal nu  
rshuu nur uz ru. Ze' de yu feñ, benu gyicy dey coz nu  
walab se'ñ, orze' pshuu nu dey gal nu rshuu nur tub  
bicy ru.<sup>2</sup> Ze' de biñ mñaa gush, benu gyicy dem coz nu  
walab se'ñ, orze' pshuu nu dem gal nu rshuu nur ñaar.  
Ze' de fiñ feñ, benu gyicy deñ coz nu walab se'ñ, orze'  
pshuu nu deñ gal nu rshuu nur zan ru. Nunu cue' shiñ  
nii toor.

<sup>3</sup> De mbecy ni Crisht rlagy ñi nu locyuub yu de byud  
benu nu rishli sac cyu nu locyuub dem.<sup>4</sup> Benu tub  
byud zu i'ñ mi, o zu yag mi, orze' yu ze' rlagy ñi nu gad  
lagy yu nu locyuub yum loga la. Como mi ze' nac mi  
famil niy. Orze' ni mod gyabic yu coz nu zaab yu ni de  
mbel niy nu nac nu bguul dey yu. Gun nde' coz nu yet  
lagy Ñgyoozh.<sup>5</sup> Biñ mñaa nu rishli gaal nac byud, de  
biñ mñaa nu rishli byeeñ ub zi, mi ze' cue' checam nu  
cyish lom lo Ñgyoozh, nunu dzi rel la cyiñ mi lo Ñgy-  
oozh. Nunu dzi rel la cue' checam nu nii num Ñgy-  
oozh.<sup>6</sup> Ze' byud nu zu par nu gyicy zi'l mi coz nu gusht  
nim, mas zum gyishlombecy ii, se la la cyiñ mi ni Ñgy-  
oozh. Nam gal nu na tub mbecy gut.<sup>7</sup> Pcaa de mbecy  
ni Crisht nu ni mod gyicy nu dey de byud, gun orze'  
warusu mbecy nu griib gyidza too de mbecy ni Crisht.

<sup>8</sup> Benu tub mbecy wabic yu de coz cyiñ ni de famil niy,  
benu wabic yu coz cyiñ ni de mbecy nu yu' nañ yu',  
orze' wagyicy yac yu ni de riidz nu rzeña lagy yu. Orze'  
yu ze' a' nap zir yu gaze' de mbecy nu wagyicy cup  
consuel lo Crisht.

<sup>9</sup> Zaan ru nu caa dey nu la de byud lo lisht ni de biñ mñaa nu ricy riiñ nu de mbecy ni Crisht benu bi pshuub mi gayon ña'n, nunu benu b icyac mi nu tub zi ñgyeem nu bzu. <sup>10</sup> Nunu rlag yñi nu nap neñ mbecy de coz nap nu ricy mi: nu nap rguul mi de iñ mi, nu nap rnii num de mbecy nu rza yu'm, nu a' le'm, sinu rzu bich mi nu nac de mbecy ni Crisht, nu rlocyuub mi de mbecy nu rzac zi. Orze' benu fert b icyac mi de lo la riiñ nap, orze' zaan ru nu caa dey nu lam lo lisht ze'.

<sup>11</sup> Tees de byud nu nigul shuub gayon ña'n, cue' zaan ru nu caa dey nu lam lo lisht ze', gun ornu nii too dem nu gad tuuba' ñgyeem, orze' galag y mi nu chelaam tuuba' tir. Orze' gla yaam riiñ ni Crisht. <sup>12</sup> Orze' yu' falt nim, gun wangyicy yac mi nu de riidz nu mniim lo Crisht nu gyicy mi. <sup>13</sup> Nunu tuuba' coz, yu' nu gyac dem mbecy nu sac riiñ gyicy. Orze' chesam gaza' yu' mbecy la. Nunu walab tub lo zil nu sac riiñ gyicy dem, sinu cugyi' nii dem rishcuen. Cugyi' nu ne' ru' dem lat asunt ni reña' mbecy. Orze' nii dem coz nu walab señ. <sup>14</sup> Nde' nu ya rlag yñi nu chelaa de byud feñ. Orze' cyich mi famil, nunu nap gyub ic mi de riiñ nañ yu'. Orze' rila cue' cuic dem lugaar nu nii zi de mbecy nu rzi lag y lo den nu nac naa mbecy ni Crisht. <sup>15</sup> Ni rnæe lor, gun yu' la be byud nu bi bruu chu dem lo de coz ni Crisht par nu ricy dem coz nu rlag y nuras.

<sup>16</sup> Benu zu tub byud lat de famil ni tub biñ mñaa nu ricy cup consuel lo Crisht, orze' biñ mñaa ze' rlag yñi gyash mi byud ze' goow mim lugaar nu goow de' zir de mbecy ni Crisht mi, gun orze' de mbecy ni Crisht gac gyash yu de byud nu rishli ub zi, rishli sac famil ni.

<sup>17</sup> Rlag yñi nu ca zir lag y de mbecy lo yu bel nu nap riib ic lat de mbecy ni Crisht gaze' de' zir mbecy. Nunu ricy zir ñi presis benu yu ze' yu nu rshaal riidz ni Ñgyoozh nunu rlyuuy ni de mbecy. <sup>18</sup> Gun riidz ni Ñgyoozh rniiñ: "Cue' car coz nu gow tor lat nu ricy ma riiñ", rniiñ. Nunu rniiñ: "Yu nu ricy riiñ yad ñi nu gyad iy", rniiñ.

<sup>19</sup> Cue' gyicy cuen ru de cyi nu driib mbecy ic de yu bel benu wanrusu cyup o chon teshtig nu bzaac yu nu shiñ b icyac yu. <sup>20</sup> Ornu gyubee nu tub yu bel yu' falt niy, orze' shuu nur yu lo rgüiñ la dela de mbecy ni Crisht ornu yu' tublaazh dey, gun orze' de' zir mbecy dzib dey nu gyicy yu cyi. <sup>21</sup> Ñgyoozh Uz na, nu Jesucrisht, nu de anc Zub lo rzac dem ornu ya ricya mandaar lor nu gyicy yac ru nu de coz nu mnæe. Ni gyicy ru mas cyu zil' mbecy nac yu. Cue' nu reñ ga mod gyicy nur tub ga mbecy.

<sup>22</sup> Cue' glal ru nu griib yaar too mbecy nu gyicy ru nu gac yu yu bel. Gun benu ni gyicy ru, nde' cuen ni ru benu gyicy yu cyi. Cue' gyac ru mbecy nu yu' falt ze' ni.

<sup>23</sup> Timoteo, ru cya' rac nañ ru, nunu cya' rat ru. Orze' cue' go'r nis zi'l, sinu rlag yñi nu go'r ñuu mi' ñup ni urbyay, gun orze' gyicy ñi guñaa nuñ ru. <sup>24</sup> Rlag yñi nu gyicy cuidad ru anzir nu riib ru riiñ ic yu bel, gun waric na rasoo la mbecy nay. Yu' mbecy lo nu loo la ricy yu cyi. Orze' rabee lac ricy yu anzir nu gyicy der preb yu. Ze' yu' ga' mbecy ngach ricy dey coz cyi. Orze' waca bee de cyi nu b icyac yu, sinu gal despuees gaze' nu gruu zac ñi. <sup>25</sup> Orze' ni' zil' mod yu' mbecy nu lo nu loo la ri-

cy yu coz nap. Orze' rabee lac ricy dey. Nunu yu' ga' mbecy ngach ricy yu coz nap. Tees ni' de coz nap nu ricy yu wagyeñ ñi ngach.

<sup>6</sup> Dela moz nu byac ni mbecy por fers la rlag yñi nu gyicy dey patroq niy par mbecy nu yad ñi ni nu ca lag yu lo nu dutuub la lardooy, gun orze' cue' nii zi mbecy ni Ñgyoozh nunu cue' nii dey nu coz a' nap de coz nu rlyuu den. <sup>2</sup> Ze' benu patroq ni moz ze' nac yu mbecy nu ricy cup consuel lo Jesuuz, orze' cue' checa moz ze' nu ca lag yu loy, gun patroq ze' nac yu b icyac yu nu nac Crisht. Lugaar nu checay nu ca lag yu loy, rlag yñi nu gyicy paa zir yu nu patroq niy. Gun ricy cup patroq ze' consuel lo Jesucrisht, nunu Ñgyoozh rcam yu.

### Coz nu rishli sac

Orze' blyuu de coz ze' ni de mbecy, nunu niir lo dey nu ricy ñi presis nu ni gyicy yu. <sup>3</sup> Benu ca na mbecy lyuuy coz nu walab coz nu rlyuu de, o benu riidz nu lyuuy wasaap ñi riidz ni Shuaan den Jesucrisht, de riidz nu rlyuu de, o benu riidz nu lyuuy wasaap ñi riidz nu rnii lac mod gyicy den de coz nu rlag y Ñgyoozh, <sup>4</sup> orze' yu ze' nac yu tub mbecy le'. Yu ze' rila wagyet lag yu cuen. Yu ze' rlag yu nu go zil' yu riidz nu rila wagycy ñi presis. Nunu rlag yu tub suy losa'y nu riidz. Orze' tub lo zil' coz a' nap ricy reña' mbecy nu nac de nde'. Rasaap lag y dey nu nac losa'y. Rnii deet dey nu losa'y. Rnii dey rishcuen. Driib dey gyidza too losa'y. Ricy dey malis lo losa'y. <sup>5</sup> Zaab rnii deet la dey, gun wagash nap dey shcab, nunu wagad lag y nap dey de coz nu rishli. Nde' nu rziñ dey nu de coz ni Ñgyoozh nu ricy yu, nde' par nu gyicy zil' yu gan gyel nap rziñ. <sup>6</sup> Ornu mbecy gyicy yu coz ni Ñgyoozh, nunu zu laay conform ca na la nu gad, orze' rishli yu ze' yu nu tona' la coz sheñ gyicy gan. <sup>7</sup> Ornu briin gyishlombecy ii, se la la coz bri dun. Nunu ornu ruun gyishlombecy, ni' zil' ni tub la coz wac gya dun. <sup>8</sup> Tees benu yu' coz nu don, nunu benu ricy cup den shab na, orze' de nu nde' gyicy lan ñi nu coz nu beñ. <sup>9</sup> Tees yu' mbecy rlag yu gyaguani'ñ yu. Nde' nu rziñ lañ nañ lardooy nu rlag yu gyicy yu coz a' nap par nu gyicy yu gan tiñ. Orze' yet lag yu nañ caa ni de coz a' nap ze'. Ye rzac dey lo zañ coz nu gyicy dñay nu de ub yu. Orze' nde' gyicy ñi nu gnu mbecy ze', nunu dune'y. <sup>10</sup> Gun benu tub mbecy ye rzac yu lo tiñ, orze' bi gush yu nez nu gyicy yu cyi. Nde' nu la be mbecy bi bruu chu dey lo de riidz nu ricy cup den consuel lo. Orze' nde' nu laab ub la dey ricy yu nu tona' la rzac ziy.

### Nu co lo Timoteo gun gyicy yu gan

<sup>11</sup> Ze' ru Timoteo, ru nac ru mbecy nu ricy coz nu rlag y Ñgyoozh. Orze' cue' gyicy ru de coz ze'. Bicy nu coz nu ricy ru, nde' coz nu señ. Nunu b icyac nu cyiñ ru gal mod nu rlag y Ñgyoozh. Nunu b icyac nu gyicy cup ru consuel lo Jesuuz. Nunu b icyac nu car cyu zil' mbecy. Nunu b icyac nu gagyer ornu deet rac. Nunu b icyac nu gac ru mbecy gugy na. <sup>12</sup> Ornu shet yaar riiñ ni Ñgyoozh, orze' fert la bloo lo, gun orze' gyicy ru gan nu cui

mbañ ru tub la. Ni gyicy ru gun nac ru mbecy nu ricy cup consuel lo Jesuuz, gun Ngoozh pcuim ru nu cui mbañ ru, nunu par nu gad nu cui mbañ ru, mnii lat zigi mbecy nu ru ricy cup ru consuel lo Jesuuz.<sup>13</sup> Lo rgüii la Ngoozh, biñ nu rbic gyel mbañ ni dela coz nu yu' gyishlombecy, nunu lo rgüii la Jesucrisht, biñ nu mnii cyu nac lo Poncio Pilato, nde' nu ya rnqe lor<sup>14</sup> nu gyicy yac ru dela coz ze'. Gun cue' nu gad lugaar nu griib mbecy gyidza ic ru. Ni bicy gal shuub la dzi nu cyid Shuaan den Jesucrisht.<sup>15</sup> Orze' Ngoozh gyicy mi nu cyid mi ornu shuub tiem. Mi ze' nac mi Biñ yon. Mi ze' nil ricy cup mi rishbeey nu gyicy mi la zi'l coz nu rlagy mi. Mi ze' riib ic mi dela mbecy nu riib ic. Nunu nac mi Shuaan dela yu nu nac shuaan.<sup>16</sup> Tub zi la mi ze' nil zum tub la. Nunu tub zi la mi ze' gac gyicy mi nu cyiñ mbecy tub la. Rcyiñ mi ze' nu yu' yaa ni gyel lily nim, ze' nu rila wac gyecha' mbecy. Sac ni tub la mbecy nu bi bzaac yum, nunu ni tub la mbecy wac zac yum. ¡Rlagy ñi ca lagy mbecy lom, nunu rlagy ñi nu gyub ic mi dela mbecy tub la! ¡Laab ni gac ñii!

<sup>17</sup> Tees de mbecy nu ricy cup gyel nap gyishlombecy ii, mnii lo dey nu cue' gyicy ñgyay. Nunu mnii lo dey nu

cue' cyish loy lo gyel nap niy. Gun wagad lagy yu lac gaal tuñ tiem gyicy cup yu gyel nap ze'. Sinu mnii lo dey nu cyish loy lo Ngoozh. Gun Ngoozh cuic za' lam dela coz ni den, gun orze' gyicy den gusht dun ñi.

<sup>18</sup> Mnii lo dey nu gyicy yu zañ coz nap. Gun benu ni gyicy dey, orze' na dey gal nu na mbecy guani'ñ nu nac coz nu ricy yu. Orze' mnii lo dey nu cyañ yu de coz nap nu gyicy yu. Mnii lo dey nu gzu dey altant par nu locyuub yu losa'y, nunu mnii lo dey nu cue' ziy cuic yu coz ni losa'y.<sup>19</sup> Benu ni gyicy dey, orze' Ngoozh gyabic mi ñii ni dey par lo. Nunu benu ni gyicy dey, orze' tub la cyiñ nu dey Ngoozh gal mod nu rlagy ñi.

### Laab nde' la riiñ nu bdu' Baly yaa Timoteo

<sup>20</sup> Timoteo, bicy cuidad nu riiñ nu gutib ic ru. Nunu cue' zuub gyidag ru de riidz wacyiñ nu za contr ni Ngoozh, de riidz nu ricy zily dza la mbecy.<sup>21</sup> Yu' mbecy nu rzeña lagy dey de riidz wacyiñ ze'. Orze' nu nac nde' gudza dey nu de coz ni Crisht.

Ngoozh gyicy mi faboor nu nap gyicy num der.

## 2 Timoteo

**1** Ya Baly tub aposht ni Jesucrisht nu nac nu nde' coz nu rlagy Ñgyoozh. Orze' mi ze' bzuu nez mi ya nu cha shaalā riidz nu mniim nu cuic mi nu cui mbañ den nu nac nu nac du den Jesucrisht. <sup>2</sup> Orze' ya pcaa gyicy ii nu zeedä ñii lo ru, Timoteo. Ru nar gal na tub ya feñ ne nu dzi rcä.

Orze' Ñgyoozh Uz den gal nu Shuaan den Jesucrisht gyicy mi faboor nu nap gyicy num ru. Nunu gashni lagy mi ru. Nunu gyicy mi nu cheti ri añ nir.

### Co lor nu nac riiñ nu briic Ñgyoozh nu gyicy ru

<sup>3</sup> Cya' yeza' lagy ru ornu rnę̄ dū Ñgyoozh or napor nu or gyeche. Orze' ya drica' gras ni mi ze', biñ nu ricya riiñ ni gal nu b icy de gyitoo bel ne. Nunu ya rad lagy nu mod nu ricya, nde' mod nu se'ñ. <sup>4</sup> Zaab yeza' la lagy ru biiñ ru tiem nu bla' losa'n. Nunu rlagy yap güiñ ru, gun orze' ded ru' ga' la nu gyet lagy. <sup>5</sup> Gun ya yeza' lagy nu ru rishli gaal ricy cup ru consuel lo Crisht. Nu loga la shus ru Loida b icy cup mi consuel lo Crisht. Nunu ni' zi'l ñaar Eunice ricy cup mi consuel lom. Nunu ya rad lagy nu segur la ni' zi'l na consuel ricy cup ru.

<sup>6</sup> Nde' nu ya neę̄ lor nu co lor nu nac riiñ nu briic Ñgyoozh nu gyicy ru ornu briib ya toor. <sup>7</sup> Gac gyicy ru ñii gun Ñgyoozh briic mi Espiriit Yon nim ni den. Nunu mi ze' wagiyicy mi nu dzib den, sinu b icy mi nu cyiñ na nu gyicy na riiñ nim, nunu b icy mi nu caan Ñgyoozh gal nu de losa'n, nunu b icy mi nu gac gyicy na mandaar ub na. <sup>8</sup> Orze' cue' gat lor ornu zat ru Shuaan na Jesuuz lo mbecy. Nunu ni' zi'l cue' gat lor nu nac ya, gun ya rj pres nu nac mi ze'. Tees nap zir nu shet ic ru nu zac zir nu de' zir mbecy ni Crisht nu nac de riidz nu sac nim. Gagyer de nu nde' nu nac fers nu rbic Ñgyoozh nir. <sup>9</sup> Orze' Ñgyoozh bi bloo mbañ mi de ub na, nunu bloo sum den nu chu'n mod nu se'ñ. Walab nu nac coz nu ricy de ub na, nde' nu ni b icy mi, sinu b icy mi ñii par nu nde' coz nu rlagy ub mi, nunu par nu nac faboor nu b icy num den nu nac Jesucrisht. Orze' nese anzir nu gzub gyi' gyishlombecy, bi psa' lagy mi nu ni gyicy mi. <sup>10</sup> Orze' na bi blyuum faboor ze' lo den lat nu biid Jesucrisht, biñ nu bloo mbañ de ub na. Orze' mi ze' b icy mi nu a' riiba' ic gyel gut de ub na. Nunu nu nac de riidz nu sac nim b icy mi nu gad lagy den nu cyiñ na lo Ñgyoozh nu tub cuerpu nac wata'.

<sup>11</sup> Orze' Ñgyoozh bdu'm riiñ ya nu shaalā de riidz nu sac nim ze', nunu briib mi riiñ ni aposht, gal nu riiñ ni moscuel icä nu rlyuu de riidz ze'. <sup>12</sup> Nunu par nu nac nde' rzac zi nu rj pres. Tees rila wagat lo nu nac de ri-

idz ni Crisht ze', gun ya bi rad lagyä cyu biñ nu ricy cu-pä consuel lo. Nunu ya rad lagyä nu segur la cyiñ mi nu ñam riiñ nu bdu'm ya ze' gashtal shuub la dzi nu cyid mi tuuba' tir.

<sup>13</sup> Pshaal laab de riidz rishli nu güeñ ru nu pshaala. Nunu lat nu gyicy ru ñii b icy cup consuel lo Crisht, nunu car Ñgyoozh, gal nu de losa'r nu bi nac nu Jesucrisht. <sup>14</sup> Bicy cuidad de riidz nap nu bdu' Ñgyoozh yaar. Nunu Espiriit Yon nim, biñ nu rcyiñ nañ lardoo den, mi ze' locyuub mi ru nu gac gyicy ru de nde'.

<sup>15</sup> Ru bi rad lagy ru nu dela mbecy nu bruu lo de yu ni Asia blaa yaa dey ya. Gaza' Figelo nu Hermógenes blaa yaay ya. <sup>16</sup> Tees Ñgyoozh nap gyicy num de famil ni Onesíforo, gun yu ze' zañ tir b icy yu nu guud baloor ne. Nunu wangat loy nu nac ya mas rj pres. <sup>17</sup> Lugaar nu gat loy, laab bri lay Rom, orze' rila wancheday nu byub yu ya gashtal byad la niy. <sup>18</sup> Orze' Shuaan den Jesuuz nap gyicy num yu ornu shuub dzi nu gri beem ni de mbecy. Ru nap rad lagy ru lac gaal tant nu blocyub yu de ub na gyedz Éfeso.

### Tub soldad nu ricy paa ni Jesuuz

**2** Orze' ru, yu feñ ne, "O" mnii nu cuic Ñgyoozh fers nir nu nac faboor nu bi b icy mi num ru nu nac Jesucrisht. <sup>2</sup> Orze' de riidz nu bi güeñ ru nu pshaala lat zigy de mbecy, bgu' de nu nde' yaa mbecy nu ricy paa, mbecy nu rabee nu cyiñ nu lyuu ni losa'.

<sup>3</sup> Rlagy ñi nu gagyer nu zac zir gal nu de ya rzac zi gal nu ricy tub soldad nu ricy paa ni Jesucrisht. <sup>4</sup> Gun ni tub la mbecy, lat nu nac yu soldad, wagne' ic yu lat reña' asunt, gun rlagy ñi nu gyicy yu nu ganap lagy de soldad nu gya zir zu par ub yu. <sup>5</sup> Orze' ni' zi'l mod ricy de yu nu rgyit. Wayicy dey gan iy benu wayit yu gal mod nu rlagy ñi. <sup>6</sup> Rlagy ñi nu fert gyicy ru riiñ gal nu ricy mbecy nu ricy riiñ ngush, gun yu ze' yad ñi niy nu gyash yaay coz nu gow yu lo cosech loga. <sup>7</sup> Gush ñuu shcab nu nac de coz nu rnę̄ ii. Orze' Shuaan den Jesuuz gyicy mi nu gyet lag ru cuen delañ.

<sup>8</sup> Bicy nu gyeza' lagy ru Jesucrisht. Mi ze' byabañ mi ornu gut mi. Nunu mi ze' bruum lat nez rey Dabi. De nde' riidz nu sac nim nu rshaala lo de mbecy. <sup>9</sup> Nunu par nu nac de riidz ze', nde' nu ya rzac zi. Mas gashtal nañ yu' gyiib la rj gal nu rbi tub mbecy a' nap. Ya ri noowä, tees riidz ni Ñgyoozh a' ri noow ñi. Suelt la rd-ed ñi. <sup>10</sup> Nde' nu ya ragyę̄ lo dela coz nu rzaca, gun nde' coz nap par de mbecy nu pcui Ñgyoozh nu gac nim, gun orze' ni' de yu ze' gruu mbañ dey nu nac Je-

sucrisht, nunu cyiiñ nu dey mi tub la lugaar cyit zu, ze' nu rcyiiñ mi.

<sup>11</sup> Nii tub riidz nu segur la rishli:

Como ornu gut mi, orze' nde' nañ gal nu na nu guta' de ub na par nu nac de coz nu bicy den gulas.

Orze' na rcyiiñ den dun mi tublaazh la.

<sup>12</sup> Nunu como gagye den nu zac zin, orze' nde' nu gad nu gyub ic den dun mi ze' nu gyub ic mi par lo.

Benu nii den nu walab mbecy nim nac naa, orze' ni' zi'l mi ze' niim nu de ub na a' nac naa mbecy nim.

<sup>13</sup> Mas de ub na wagyicy paan, tees mi ze' zaab ricy paa lam, gun wac cham contr ni mod nu na ub mi. Dela nde' riidz nu segur la rishli.

### Moz nu ricy paa ni Crisht

<sup>14</sup> Bicy nu gyeza' lagy mbecy de riidz ze'. Nunu bdu' riiñ yaa dey nu cue' tub su dey losa'y nu nac reñ ga la riidz nu rnii tub ga dey. Orze' nde' gyicy cuidad dey ñi par lo Ñgyoozh. Gun benu nid ru' dey lo losa'y, nde' se la la cyiiñ ñi. Tub zi la coz nu gyicy nu rnid ru' dey, nde' par nu gnu zi'l dey de mbecy nu rzuub gyidag. <sup>15</sup> Bicy ca na la coz nu gac gyicy ru par nu ganap lagy Ñgyoozh lor ornu gyar lom. Bicy gal nu ricy tub moz nu wat lo nu nac riiñ nu bicy yu. Blyuu de riidz rishli ni Crisht ni de mbecy gal mod nu rlagy ñi. <sup>16</sup> Bruu chu lo de riidz wacyiiñ, riidz nu wayet lagy Ñgyoozh, gun de mbecy nu ni mod ro riidz dzi zir gnu dey ub yu par lo coz ni Ñgyoozh. <sup>17</sup> Orze' de coz nu rlyuu dey ni mbecy gyicy ñi gal nu ricy tub güii ily nu de mbecy ze'. Hime-neo nu Fileto nac yu mbecy nu ni b icy nu reña' mbecy. <sup>18</sup> De yu ze' gudza dey lo de riidz rishli ni Crisht, gun rnii dey nu bi bded tiem nu gyabañ de mbecy nu bi gut. Orze' nu nac nde' ricy dey nu rcan shcab ni la be mbecy nu nac de coz ni Crisht. <sup>19</sup> Tees de riidz rishli ni Ñgyoozh, nde' nañ gal nu na simient ni tub yu' nu tonal la fert zu. Ze' lo simient ze' ca de riidz ii: "Shuaan den yu' lom ca na mbecy nu nac nim." Ze' tuuba' riidz ze' rniiñ: "Dela mbecy nu rnii nu Jesuuz nac mi Shuaan yu, dela de yu ze' rlagy ñi nu gruu chu dey lo de cyi." Ni rnii riidz nu ca lo gyita' ni simient ze'.

<sup>20</sup> Nañ yu' ni tub yu lily, orze' ze' nguaa coz nu byaa nu or nu plat. Tees walab nde' zi'l, sinu ni' zi'l nguaa coz nu byaa nu yag nu yu biigy. Yu' coz nu rcyiiñ rabee zi tiem. Ze' yu' ga'ñ rcyiiñ ñi la zi'l tiem. <sup>21</sup> Orze' benu tub mbecy gruu chuy lo cyi, orze' yu ze' nay gal na tub coz nu cyiiñ nu gyicy coz nap. Nay gal na tub coz nu zu chu par riiñ ni Ñgyoozh zi'l. Orze' mi ze' gac gyicy mi riiñ nap nu nac yu.

<sup>22</sup> Cue' shet ic ru nu gyicy ru de coz nu yu' nañ lardoo yu feñ, sinu pcyiiñ tub mod nu se'ñ, nunu b icy cup consuel lo Jesuuz, nunu pca Ñgyoozh gal nu de losa'r, nunu nap pcyiiñ nu de losa'r. Dela de mbecy nu bi byacaacy nañ lardoo, rgyiiñ dey lo Shuaan den Jesuuz nu locyuub mi dey nu ni gyicy yu. <sup>23</sup> Cue' gyicy cuen ru de riidz ton nu se la la cyiiñ nu ro mbecy. Nunu ru rad lagy ru nu de riidz ze' ricy ñi nu ro zi dey riidz nu losa'y. <sup>24</sup> Nunu de mbecy nu nac moz ni Shuaan na Jesucrisht, yu ze' walagy ñi nu go zi dey riidz nu losa'y, sinu rlagy

ñi nu nap chu' nuy dela mbecy. Rlagy ñi nu cyiiñ yu par nu nap lyuu ni de mbecy. Nunu rlagy ñi nu gyicy cup yu pasez ni dey. <sup>25</sup> Nunu rlagy ñi nu gyicy nap yu de mbecy rnid ru' nu mod rasoo, nunu cyish loy nu Ñgyoozh gyicy mi nu cush cya mbecy rnid ru' ze' lom. Orze' gad lagy dey de coz rishli nim. <sup>26</sup> Gun orze' cyish dey yaa nunu gla dey ni caa nu rzu nuras. Gun na dey gal nu na pres ni nuras, par nu gyicy nuy dey ca na la nu yad ic yu.

### Lac mod na de mbecy ornu bi yad lazhiem

Ni' zi'l rlagy ñi nu gad lagy ru nu ornu bi yad lazhiem, orze' deet gac. <sup>2</sup> Tiem ze' de mbecy ze' gac yu mbecy bigy lagy. Nunu gyet lagy dey tiñ. Nunu le' dey. Nunu ñgya dey. Nii zi dey ni Ñgyoozh. Wazuub gyidag dey ni de mbel niy. Gac dey mbecy nu sac graseer. Waca lagy yu lo de coz ni Ñgyoozh. <sup>3</sup> Ni waca dey mbecy, ni washni lagy dey mbecy. Gnii dey rishcuu. Wac gyicy dey mandaar ub yu ornu galagy yu gyicy yu de coz a' nap nu rnii tooy. Nunu gyet lagy dey nu shiñ gyicy nuy losa'y. Gazi lagy dey lo dela coz nap. <sup>4</sup> Cush cya dey ich losa'y. Gac dey mbecy bariant. Tona' la gyañgya dey. Nunu yub dey coz nu rlagy ub zi'l yu lugaar nu yub dey coz ni Ñgyoozh. <sup>5</sup> Gyicy dey tub mod nu dzi nap ricy dey par lo Ñgyoozh, tees washet ic dey nu gyicy nap Ñgyoozh yu.

Rila cue' gyatublaazh ru nu de mbecy nu ni na ze'.

<sup>6</sup> Gun lat de yu ze' yu' la be mbecy nu rza yu' reña' mbecy. Orze' ricy dey gan rguuy de biñ mñaa nu sac shcab ni, de biñ nu dzi rzu shcab nu nac cyi. De mi ze' dzi rlagy mi gyicy mi de lo la cyi. <sup>7</sup> De biñ mñaa ze' dub laa tiem rsya'm de riidz ni mbecy, tees rila wagyet lag dem cuen de coz rishli ni Ñgyoozh. <sup>8</sup> Orze' gal nu Janes nu Jambres gua dey contr ni Moisees, orze' ni' zi'l de mbecy nu rzu' ngach ze' rza dey contr ni de coz rishli ni Ñgyoozh. De yu ze' nac yu mbecy nu mnu shcab ni. Nunu ricy cup dey tub consuel nu wacyiiñ. <sup>9</sup> Tees wayicy dey gan zigy mbecy, gun dela mbecy rad lagy dey nu coz ton zi'l ricy de yu ze', laaba' gal nu gud lagy mbecy nu nac cyup de yu nu gua contr ni Moisees gu-las.

### Laab nde' la riiñ nu bdu' Baly yaa Timoteo

<sup>10</sup> Ru zaab reñ lar rasoo ni de coz nu ricya. Rad lagy ru de riidz nu rlyuu. Rad lagy ru lac mod rcyiiñ. Nunu rad lagy ru de coz nu bdu' icä nu gyicya. Rad lagy ru nu ricy cupa consuel lo Crisht. Rad lagy ru nu ricy cupa pasez ni de mbecy. Nunu rad lagy ru nu rca de mbecy. Nunu rad lagy ru nu ragye <sup>11</sup> ornu rzab mbecy icha gal nu ornu rzac zi. Ru rad lagy ru dela coz nu bzaca Antioquia, nu Iconio, gal nu Listra. Nunu rad lagy ru lac bzac zi ornu bzab mbecy icha. Tees Shuaan den Jesuuz bloo nap mi ya yaa dela dey. <sup>12</sup> Nunu rishli gaal dela mbecy nu rlagy gyicy dela coz nu rlagy Ñgyoozh nu nac nu nac nuy Jesucrisht zi'l, orze' de yu ze' segur la zac zi dey nu nac mbecy. <sup>13</sup> Tees de mbecy a' nap gal

nu de mbecy rguu, de yu ze' tub dzi ga ya a' nap zir dey. Rded dey rguuy. Nunu rguu ga' nuras dey.

<sup>14</sup> Ze' ru, bzu fert nu dela coz nu bi guc ru. Bi gud lagy ru nu de nde' coz rishli. Gun ru bi rad lagy ru nu cyu blyuu nir. <sup>15</sup> Ca ic ru nu nese miiñ lar bi rad lagy ru de riidz nap ni Ñgyoozh. Riidz ze', nde' cyiiñ ñi nu gu' liñ ru, nunu gyicy ñi nu gruu mbañ ru nu nac nu ricy cup ru consuel lo Jesucrisht. <sup>16</sup> Ñgyoozh byub ic mi nañ shcab ni mbecy ornu pcaa dey dela riidz nim. Nunu de riidz ze', nde' cyiiñ ñi par nu lyuuñ ni de mbecy, nunu shuu nuñ dey, nunu gu' liñ dey, nunu cuic ñi nu gad lagy dey nu cyiiñ yu gal mod nu rlagy ñi. <sup>17</sup> Gun orze' de mbecy ni Ñgyoozh de lo la mod nap cyiiñ dey nu gyicy yu. Gun orze' bi bzu lily dey nu gyicy yu de lo la coz nap.

**4** Lo Ñgyoozh nu lo Jesucrisht, ya du' riiñ yaar nu shaal ru de riidz nim. Nunu Jesucrisht cyid mi tuuba' tir nu gac mi rey, gun gri beem ni de mbecy mbañ gal nu de mbecy nu bi gut. Orze' lo de mi ze' ya nap tona' la rdü' riiñ yaar nu <sup>2</sup> shaal ru de riidz nim. La zi' tiem nu gad mod pshaal de riidz ze' nim. Mas rlyu nu wad mod, tees ru b icy lañ. Pcuugy lardoo dey. Nunu pshuu nu dey. Nunu briic baloor ni dey. Nuu blyuu ni dey. Dela de nde' b icy nu pasez. <sup>3</sup> Gun shuub tiem nu de mbecy wazuub gyidaga' dey ni de riidz ni Ñgyoozh nu rdulyuu. Lugaar nu zuub gyidag dey ni de riidz nim, ca nu yub dey zañ moscuel nu lyuu ni dey de coz nu rlagy ub zi' dey gyeñ yu. <sup>4</sup> Orze' de yu ze' zu chuy de riidz rishli par nu gzuub gyidag dey ni de lo la rishtoo. <sup>5</sup> Tees ru dub laa tiem b icy cuidad par nu cuir ca na coz nu gyicy ru. Gugyee ornu rzac zir. Bzu shcab ni se tub lo zi' nu shaal ru de riidz nu sac ni Crisht. Nap b icy paa nu de riiñ nu bi ricy ru.

<sup>6</sup> Ya bi zu la nu gata. Gaca gal nu na tub gun nu cha lo Ñgyoozh, gun sñuu ga shuub or nu gata. <sup>7</sup> Ya na gal nu na tub soldad nu nap gucoo lat gyel yuu. Nunu ya na gal nu na tub yu nu gush carer. Ze' na bi bri gal ze' nu ca lo cuen nu gri. Gun ya b icy pañ nu Jesuuz. <sup>8</sup> Orze' na bi ri lily tub i nu yad ñi nu gyad ne nu nac nu b icy pañ. Shuaan den Jesuuz, biñ nu gri bee ni mbecy, mi ze' gyabik mi ñii ne ornu shuub dzi nu cyid mi tuuba' tir. Nunu walab ne ya zi' gyabik mi, sinu ni' zi' gyabik

mi ni dela mbecy nu se nu ca zi' lo nez nim nu cyid mi tuuba' tir nu nac nu rcay mi.

### Riidz par Timoteo zi'

<sup>9</sup> Bicy tub fers nu cyid güiir ya lueg la benu gac nir. <sup>10</sup> Gun Demas, yu nu dzi rca de coz nu yu' gyishlombe cy ii, yu ze' bi blaa yaay ya, nunu zay par gyedz Tesalónica. Crescente zay par lo de yu ni Galacia. Ze' Tit, yu ze' zay lo de yu ni Dalmacia. <sup>11</sup> Se Luc zi' byeeñ nuy ya. Yub ru Marc cyid nur yu, gun yu ze' cyiiñ yu nu locyuub yu ya nu nac de riiñ ni Jesuuz. <sup>12</sup> Ya bzuu neza Tíquico nu zay Éfeso. <sup>13</sup> Ornu cyid ru, orze' cyid nur chacyet ne nu bzeeña Troas yu' Carpo. Nunu ni' zi' cyid nur de libr ne. Nunu ricy zir ñi presis nu cyid nur gyicy pergamino nu ta' riidz lo ze'.

<sup>14</sup> Alejandro, yu nu nac birgyib, tona' la shiñ b icy nuy ya. Shuaan den Jesuuz cyish mi niy dub gal na coz nu b icy nuy ya. <sup>15</sup> Ru bzu cuidad nu nac yu ze', gun tona' la zay contr ni de riidz nu rshaal den.

<sup>16</sup> Tir loga la nu gua lo de fushtiz, ni tub la mbecy wanlocyuub dey ya. Dela dey blaa yaay ya. Ya drish lo lo Ñgyoozh nu cue' gyicy cuen mi de coz nu b icy dey.

<sup>17</sup> Tees Shuaan den Jesuuz blocyuub mi ya, nunu briic mi fers ne, gun orze' guud mod nu shaala de riidz nu sac ni Jesuuz, nunu bicya nu güeñ de mbecy nu a' yu' lo Ñgyoozh de riidz ze'. Nde' nañ gal nu na nu Shuaan den Jesuuz bloo nap mi ya ru' biidz. <sup>18</sup> Nde' nu rad lagya nu co nap mi ya nu nac dela coz a' nap, nunu gya num ya par lugaar ze' nu riib ic mi.

¡Rlagy ñi nu gyabik den gyel mbecy nim dub laa tiem! ¡Laab ni gac ñii!

### Laab nde' la ñgyoozh nu zeed Baly

<sup>19</sup> Ya zeeda ñgyoozh ni Prisca gal nu ni Aquila, gal nu de famil ni Onesíforo. <sup>20</sup> Ze' Erasto, yu ze' byeeñ yu Corinto. Ze' Trófimo, yu ze' bzeeña yu Mileto, gun rat yu. <sup>21</sup> Bicy tub fers nu grir anzir nu gyap tiem rag. Eubulo, gal nu Pudente, nu Lino, nu Claudia, gal nu dela de b icy na nu yu' ii zeed dey ñgyoozh nir.

<sup>22</sup> Orze' Shuaan den Jesucrisht gac num ru. Nunu Ñgyoozh gyicy mi faboor nu nap gyicy num dela der.

# Tito

## Baly zeed yu ñgyoozh ni Tit

**1** Yä Baly tub yu nu ricy coz nu rlagy Ñgyoozh.  
Nunu nacä aposht ni Jesucrisht. Mi ze' bzuu nez mi yä nu chä lat de mbecy nu blosu Ñgyoozh, gun orze' locyuuba dey nu fert gyicy cup yu consuel lom, nunu gad lagy dey de coz rishli nu ricy den nu nac Ñgyoozh. **2** Ni ricy den nu nac nu drish lon nu gad nu cui mbañ den tub la. Ñgyoozh bi mne' ic mi nu cui mbañ den nese anzir nu gzub gyi' gyishlombecy. Nunu mi ze' waguum. **3** Nunu na la, tiem niñ, bi briic mi nu gad lagy den ni de riidz nim. Ni b icy Ñgyoozh, biñ nu co mbañ de ub na, nu nac de riidz nu bdu'm yäa nu shaala lat de mbecy. **4** Orze' ya caä gyicy ii nu zeedä lo ru Tit. Ru nac ru tub yu feñ ne nu rishli nu nac de coz ni Crisht, de coz nu rup laan ricy cup na consuel lo.

Orze' Ñgyoozh Uz den nu Jesucrisht, biñ nu co mbañ de ub na, gyicy dem faboor nu nap gyicy num ru, nunu gyicy dem nu cheti ri añ nir.

## Riiñ nu ricy Tit Creta

**5** Ornu ya bzeeña ru lo tub nac yu nu la Creta nu ri lo nisyudoo, orze' ni b icy, gun orze' gzu nap ru de coz nu ricy falt nu duzu nap, nunu orze' tub ga la gyedz co sur mbecy nu gac yu yu bel lat de mbecy ni Crisht dub gal mod nu yä mnëe lor. **6** Orze' yu nu gac yu bel rlagy ñi nu cyiiñ yu tub mod nu cue' la griib mbecy cyi tooy. Nunu rlagy ñi gac yu mbecy nu ricy paa nu tub zi'l biñ nu nac mñaay. Nunu ni' zi'l de i'ñ yu rlagy ñi nu gac yu mbecy nu ricy cup consuel lo Crisht. Nunu cue' nu nii mbecy nu i'ñ yu nac yu mbecy gurfeñ o mbecy nu rnid ru'. **7** Orze' yu bel nu riib ic lat de mbecy ni Crisht, rlagy ñi nu gac dey mbecy nu sac falt ni, como de yu ze' zuy riiñ ni Ñgyoozh. Cue' nu gac dey mbecy cyig too. Ni cue' nu gac dey mbecy dza' ic. Ni cue' gac dey mbecy rzugy. Ni cue' gac dey mbecy balient. Nunu ni cue' nu dzi ye gzac dey lo tiñ. **8** Lugaar nu ni na dey gac yu, orze' rlagy ñi nu nap nii nu dey mbecy ornu cyid yu yu'y. Nunu rlagy ñi nu gyet lagy dey de coz nap. Nunu gac dey mbecy nu nap na shcab ni. Nunu gac dey mbecy nap. Nunu gac dey mbecy nu zu par Ñgyoozh zi'l. Nunu rlagy ñi nu nap gyicy yu mandaar ub yu. **9** Orze' rlagy ñi nu gzu fert yu nu nac de riidz rishli ni Ñgyoozh nu bdulyuu niy, gun orze' ni' zi'l gac cuic yu baloor ni losa'y nu nac de riidz ze', nunu gac cuugy yu lardoo de mbecy nu rnii reña' rasoo.

**10** Gun yu' zigy mbecy nu zay contr ni de riidz ni Ñgyoozh. Gun laab lat dey yu' mbecy nu rzu fert yu nu ca

beey sircunsision cuerپ ni de mbecy ni Crisht. De yu ze' riidz ton zi'l rnii dey, nunu rguu dey losa'y. **11** Rlagy ñi nu soow den ru' de mbecy ze', gun ricy dey nu rcan shcab ni dub yu' la mbecy. Rlyuu dey coz nu a' yad ñi niy nu lyuuy nu nac nu ye rzac dey lo de coz nu rbic mbecy niy.

**12** Bzu tub mbecy nu b icy yu nu mniiy por cuen ni Ñgyoozh. Nunu laab mbecy Creta nac yu. Orze' yu ze' bzat yu de losa'y. Orze' nay: "De mbecy Creta dub laa tiem rguu dey. Na dey gal nu na bañ gyish. Row shaad dey. Nunu nac dey mbecy zed", nay. **13** Nunu laab ni gal nu mnii yu ze'. Nde' nu fert pshuu nu dey. Gun orze' gyanap consuel nu ricy cup dey lo Crisht. **14** Gun orze' cue' ga' nu gyicy cuen dey de rishtoo nu bloo ic de mbecy Israeel. Ni cue' gyicy cuen dey mandaar nu ricy de mbecy nu bruu chu lo de coz rishli ni Ñgyoozh.

**15** Gun benu ca na mbecy nap na shcab niy, orze' dela coz nu ricy yu, nde' coz cacy par lo Ñgyoozh. Tees de mbecy nu wayicy cup consuel lo Crisht nunu benu a' nap na shcab ni dey, orze' par de yu ze' saca' coz nap par lo Ñgyoozh. Gashtal shcab nu ricy cup dey gubag ñi. Nunu wagat lo dey nu nac coz a' nap nu ricy yu. **16** Rnii dey nu yu' loy Ñgyoozh, tees nu nac coz nu ricy dey rabee nu walab rishli. Nac dey mbecy rzi lagy. Nunu nac dey mbecy nu wacsuub gyidag. Rila wacyiñ dey nu gyicy yu ni tub la coz nap.

De mbecy rlagy ñi gyicy yu dub gal nu rnii de riidz nu sac ni Ñgyoozh

**2** Orze' dub laa tiem lyuur ni de mbecy nu gyicy yu dub gal mod nu rnii de riidz nu sac falt ni Ñgyoozh, de riidz nu rlyuu mbecy nu nac de coz ni Crisht. **2** Orze' de yu gush rlagy ñi nu gac dey mbecy nu ca lagy de' zir mbecy lo. Rlagy ñi nu gac dey mbecy nu nap na shcab ni. Rlagy ñi nu nap gzu dey shcab nu nac de coz ni Crisht. Rlagy ñi nu nu rishli gaal ca dey de losa'y. Rlagy ñi nu gagye dey ornu rzac ziy. **3** Ni' zi'l mod par de biñ gush. Rlagy ñi nu gyicy dem gal mod nu yad ñi nu gyicy de biñ mñaay nu ro rishcuen. Ni cue' gzugy dem. Rlagy ñi lyuu dem ni de fiñ feñ nu nac de mod nap nu ricy de ub mi. **4** Nunu lyuu ga'm ni de fiñ feñ nu ca deñ ñgyeeñ gal nu de i'ñ ñi. **5** Lyuu ga'm nu nap gyub ic deñ ub ñi, nunu gac deñ mbecy nu sac falt ni. Ni' zi'l lyuum ni deñ nu gyicy paa deñ nu de riiñ nu yu' nañ yu'. Lyuum ni deñ nu gac ñii mbecy gugy na. Lyuum ni deñ nu "O" niiñ ni ñgyeeñ. Gun benu ni gyicy

deñ, orze' wad mod nu nii zi ni tub la mbecy ni de riidz ni Ñgyoozh.

<sup>6</sup> Na ni' zi'l byoo rishlo de yu feñ nu nap gyicy yu mandaar ub yu. <sup>7</sup> Nunu dub laa tiem ru lyuur ni dey nu gyicy dey dela mod nap. Lyuur ni dey nu nac mod nu ricy ru. Ornu lyuur ni dey, orze' nu tub zi'l lardoor b icy ñi. Cue' nu cyup lardoor gyicy ruñ. Nunu cue' niir riidz shi' lo dey, <sup>8</sup> sinu niir nu mod nu rasøo, gun orze' ni tub la mbecy waniiy nu ru walab riidz nap rniir, gun orze' cyu zi'l mbecy nu za contr ni den gat lo dey par nu nac nu wad mod nu nii dey riidz a' nap nu nac de ub na.

<sup>9</sup> Bdu' riiñ yaa de yu nu nac moz nu gzuub gyidag dey ni patroo niy nu nac dela mandaar nu ricy yu loy. Gyicy yu tub mod nu gyet lagy patroo niy. Nunu cue' tush cyay riidz loy. <sup>10</sup> Nunu cue' gyicy gubaan yu la coz niy, sinu rlagy ñi nu gyicy yu tub mod nu gabe nu tonal a nac yu mbecy nap, gun orze' dela mbecy zac dey nu dzi cyit na de riidz ni Ñgyoozh, biñ nu bloo mbañ de ub na. Laab de nde' de riidz nu rlyuu den.

<sup>11</sup> Tees Ñgyoozh bi briic mi nu gad lagy den la na faboor nu gyicy num de mbecy. Nu nac faboor ze' gad mod nu gruu mbañ dela mbecy. <sup>12</sup> De riidz ni faboor ni Ñgyoozh ze' rlyuuñ ni den nu rlagy ñi nu laa yaa den de coz a' nap, gal nu de gusht a' nap nu yu' gyishlombecy ii. Orze' lat nu rcyiiñ den gyishlombecy ii rlagy ñi nu nap gyicy den mandaar ub na. Nunu rlagy ñi nu gyicy den de coz nu se'ñ. Nunu rlagy ñi nu zu den shcab nu nac coz ni Ñgyoozh. <sup>13</sup> Orze' lat nu rcyiiñ den gyishlombecy ii, grish lo den nu shuub tiem nu gyu' niñ gal nu mnii Ñgyoozh. Ni gac ñii ornu cyid Jesucrisht tuuba' tir nu gyel lily nim. Mi ze' nac mi Ñgyoozh ni den gal nu biñ nu co mbañ den. <sup>14</sup> Mi ze' pshet ic mi gut mi par nu briish mi cyi den, gun orze' b icy mi nu bruu chu den lo de cyi nu ricy na. Nunu b icy mi nu byacaacy nap lan lo Ñgyoozh, gun orze' gac na mbecy nim. Gac na mbecy nu ric la añ ni lo de coz nap.

<sup>15</sup> De nu nii rlagy ñi nu lyuur ni mbecy. Cuic ru baloor ni dey. Nunu shuu nur dey gal nu ricy mbecy nu ricy cup rishbeey. Cue' shet ic ru nu nii mbecy nu ru wacyiñ ru.

### Coz nu rlagy ñi nu gyicy mbecy ni Crisht

**3** Bicy nu gyeza' lagy de mbecy ni Crisht nu "O" nii dey ni de gubier gal nu ni de fushtiz. Rlagy ñi nu gac dey mbecy nu rzuub gyidag. Nunu zaab zu la dey altant nu gyicy yu coz nap. <sup>2</sup> Rlagy ñi nu cue' shiñ nii dey nu nac ni tub la mbecy. Rlagy ñi nu cue' go zi dey riidz nu losa'y. Rlagy ñi nu gac dey mbecy gugy na. Rlagy ñi nu gac dey mbecy nu nap nii nu dela losa'.

<sup>3</sup> Gun gulas ni' zi'l de ub na guc na mbecy nu sac shcab ni. Guç na mbecy nu wacsuub gyidag ni Ñgyoozh. Nañ gal nu na nu bdune' den. Orze' de lo la coz

nu gusht ni den, nde' byub ic ñi de ub na. Gusa den lat de coz a' nap. Gusaap lagy den nu nac losa'n. Rzi lagy mbecy lo den, nunu rzi lagy den lo mbecy. <sup>4</sup> Tees ornu Ñgyoozh, biñ nu bloo mbañ de ub na, briic mi nu gad lagy den nu dzi nap ricy num den, nunu dzi rcam den, <sup>5</sup> orze' bloo mbañ mi den. Ni b icy mi, tees walab nu nac nu dzi nap b icy den, sinu nu nac nu gushni lagy mi den. Ornu bzu nis den, nde' nañ gal nu na nu gul naa tuuba' tir, gun byac na mbecy cub. Byac den mbecy cub nu nac nu rcyiiñ Espiriit Yon nim nañ lardoo den. <sup>6</sup> Briic mi Espiriit Yon nim nu nac Jesucrisht, biñ nu bloo mbañ de ub na. Gun orze' Espiriit Yon nim nap tona' la gyicy num den. <sup>7</sup> Gun orze' gyanap den lom nu nac faboor nim. Orze' gad nu cui mbañ den dub gal mod nu drish lon.

<sup>8</sup> Dela nde' coz rishli. Nde' nu rlagya nu gzu fert ru nur ñii, gun orze' de yu nu ricy cup consuel lo Ñgyoozh gzu fert yu nu gyicy yu de coz nap. De riidz ii nac ñii riidz nap, nunu cyiiñ ñi par dela mbecy. <sup>9</sup> Tees ru cue' shet ic ru nu gor riidz ton nu mbecy. Cue' gor riidz nu cyu nez tub ga mbecy. Cue' chucoo der. Nunu cue' go zi der riidz nu nac de asunt ni leey nu bzeeñ Moisees. De nde' nac ñii coz nu rila wacyiñ. Nunu se la la cyiñ ñi ni den.

<sup>10</sup> Ze' benu ca na mbecy ricy yu nu yacyup nac de mbecy ni Crisht, mas bi pshuu nur yu tub tir o cyup tir, ze' benu wagyicy cuen yu de coz nu rniir, orze' cor yu lat de mbecy ni Crisht. <sup>11</sup> Rlagy ñi nu gad lagy ru nu mbecy ze' a' nap na shcab niy. Laab de cyi nu ricy yu ricy ñi nu rabee nu yu' falt niy.

### Riidz par Tit zi'l

<sup>12</sup> Ya zuu neza Artemas nu Tíquico nu cyid dey lor. Na ornu gri dey na, orze' gyicy ru tub fers nu cyid ru gyedz Nicópolis nu cyid güiir ya. Gun ya bi bdu' icä nu cyiña gyedz ze' lat tiem rag. <sup>13</sup> Ru, locyuub ru Zenas nu Apolos, cyup de yu nu rne' ic lo de fushtiz, nu ca na la nesedaan ni dey, gun orze' zaab za la byaj ni dey nu cue' gyicy falt ni tub la coz ni dey. <sup>14</sup> Nunu ni' zi'l de losa'n, de yu nu nac mbecy ni Crisht, rlagy ñi nu gyicy yu nu gad lagy yu lac mod gyicy yu de lo la coz nap, nunu rlagy ñi nu locyuub yu de mbecy nu ricy falt coz ni, gun orze' cue' nu cyiñ leew dey gyishlombecy ii.

### Laab nde' la ñgyoozh nu zeed Baly

<sup>15</sup> Na dela de mbecy nu yu' ze' nu rcyiiñ ii, dela dey zeed yu ñgyoozh nir. Orze' gab ru de mbecy shnuv, de mbecy nu rca de ub na nu nac nu ricy cup dey consuel lo Crisht.

Orze' Ñgyoozh gyicy mi faboor nu nap gyicy num dela de ru.

# Filemón

## Baly zeed yu ŋgyoozh ni Moong

**1** Yä Baly rị pres nu nac Jesucrisht. Orze' na cäa gyicy ii tublaazh la nu biicy na Timoteo nu zeedä lo ru Moong. Ru losä' dë nu tona' la rçä. Nunu tub zi'l riiñ ni Crisht ricy den. **2** Orze' zeedä gyicy ii lo ru, gal nu lo dela de mbecy ni Crisht nu yatublaazh yu'r, gal nu lo zan den Apia, gal nu lo Arquipo. Yu ze' nay gal nu na tub soldad ni Crisht nu nac losä' nu rded dý tublaazh.

**3** Orze' Ŋgyoozh Uz den gal nu Shuaan den Jesucrisht gyicy dem faboor nu nap gyicy num ru, nunu gyicy dem nu cheti ri añ nir.

## Moong ricy cup yu consuel lo Crisht nunu dzi rcay losä'y

**4** Dub laa tiem dricä gras ni Ŋgyoozh ornu yeza' lagya ru lat nu rnęe dym, **5** gun yä bi güeñä nu zaab ridz nu tona' la rcar dela mbecy nim nunu dzi ricy cup ru consuel lo Shuaan den Jesuuz. **6** Nunu rdiñä lom nu ornu cuic ru nu gad lagy mbecy nu la na consuel ricy cup ru, orze' nde' gyicy ñi nu nap zir gyet lag dey cuen ni dela coz nap nu ricy nu Ŋgyoozh de ub na nu nac Crisht. **7** Yä dzi yet lagya nunu guti ye lagya nu nac nu dzi rcar losa'r. Orze' shnu lar, b icy na, gun b icy ru nu guti ye lagy de yu nu ricy cup consuel lom.

## Baly rgyiiñ yu rishsulagy nu nac Onésimo lo Moong

**8** Orze' como yä naca tub aposht ni Crisht, orze' ricy cupä rishbeey nu gyicya mandaar lor nu gyicy ru ca na coz nu rlagy ñi. **9** Tees yet zir lagya nishbaä lor nu ni gyicy ru nu nac nu rca den losa'n. Ya Baly. Nunu bi gubelä. Nunu ri pres nu nac Jesucrisht. **10** Orze' na yä diñä tub faboor lor par nu nac Onésimo. Yu ze' bi byac yu gal nu na tub yu feñ nę nu nac de coz ni Ŋgyoozh lat nu rị nañ yu' gyiib ii.

**11** Gulas, yu ze' se la la pcyiiñ yu nir, tees na rcyiiñ yu par ru nunu rcyiiñ yu par yä. **12** Yä zuu neza yu nu gyed yu lor tuuba' tir. Orze' b icy nuy gal nu ricy nur yä. **13** Ya

ngulagyä nu ŋgyiyeeñ yu lọ ii, gun orze' ŋgyicy yu riiñ nę lugaar ni ru lat nu rị nañ yu' gyiib nu nac de riidz nu sac ni Crisht. **14** Tees yä wangalagyä ŋgyicyä ni tub la coz benu walab nu nac rishbeey nir. Gun ornu gyicy ru faboor nur yä, orze' cue' gyicy ru ñii por fers la, sinu gyicy ru ñii nu dub gal rii la lagy ru. **15** Cyup ridz Onésimo bruu chuy lor par la be tiem, gun orze' na cyiiñ yu lor tub la. **16** Na walaba' nu cyiiñ yu lor nu nac yu moz por fers la, sinu na gya zir zuy gaze' tub moz por fers la. Nac yu tub b icy ru nu dzi rcar nu nac Crisht. Ya tona' la rçä yu. Tees ru nap zir rcar yu na, gun na walab tub lo zi'l nu nac yu moz nir, sinu ni' zi'l nac yu b icy ru nu nac Shuaan den Jesuuz.

**17** Nde' nu beni, benu ru ricy ru yä par b icy ru nu nac Crisht, orze' nap nii nur yu ornu griv lor gal nu nap nii nur ub la yä ornu yapä lor. **18** Ze' benu yu ze' b icy yu la na tub coz nuy ru, o benu zaab yu nir, orze' yä grishä ñii nir. **19** Yä Baly cäa lo gyicy ii nu letr yaa: Ya grishä ñii nir. ¡Mas ŋgyicyä nu gyeza' lagy ru nu yu' diñä ru gyi' lardoor lo! **20** Orze' laab ru, b icy na, b icy tub faboor nu yä nu nac nu ricy cup na consuel lo Shuaan den Jesuuz. Orze' b icy na nu nac Crisht, briic consuel nañ lardoog.

**21** Yä zeedä gyicy ii lor, gun yä rad lagya nu gzuub gyidag ru ne. Nunu neña nu sheñ zir gyicy ru gaze' coz nu diñä lor. **22** Ni' zi'l neę lor nu zu yer tub lugaar ze' nu cyiiñä, gun yä drish lọ lo Ŋgyoozh nu gyicy mi gal nu rnii der ornu rgyiiñ ru lom. Orze' cuic mi lugaar nu yap güüj der.

## Laab nde' la Ŋgyoozh nu zeed Baly

**23** Epafras, losä' nu ri nañ yu' gyiib nu nac Jesucrisht, yu ze' zeed yu Ŋgyoozh nir. **24** Nunu ni' zi'l Marc, nu Aristarco, nu Demas, nu Luc, de yu nu rlocyuub yä nu nac de riiñ ni Crisht, de yu ze' zeed yu Ŋgyoozh nir.

**25** Orze' Shuaan den Jesucrisht gyicy mi faboor nu nap gyicy num der.

# Hebreos

Ñgyoozh rniim lo den nu nac I'ñ mi

**1** Gulas mnii Ñgyoozh lo de gyitoo bel nu nac de yu nu mnii por cuen nim. Nunu zañ tir, nunu zañ mod mniim lo dey. **2** Tees lat tiem nu yu' den na, orze' rniim lo den nu nac I'ñ mi. Nunu nu nac I'ñ mi psa' lagy mi gyishlombecy. Nunu b zum mi ze' par nu gyiyeñ dela coz yaam. **3** Lo I'ñ mi ze' gabe gyel lily nim, nunu gal nu na Ñgyoozh Uz mi ni' zi'l nam. Nunu laab I'ñ mi ze' ricy mi nu ni mod yu' dela coz. Ni ricy mi nu riidz nim nu dzi rcyiñ. Na ornu blazh bdiib mi cyi de mbecy, orze' gusub mi ze' nu zub mbecy nu gya zir zu par yaa bee Ñgyoozh gyibaa.

I'ñ Ñgyoozh zily zir nac mi gaze' de anc

**4** Orze' I'ñ mi ze' nac mi tub biñ nu zily zir nac gaze' de anc, nunu Ñgyoozh briic mi tub nu lam nu gya zir sac gaze' de nu la anc. **5** Gun Ñgyoozh rila wannium lo ni tub la anc gal nu mniim lo I'ñ mi ornu nam:

Ru I'ñq.

Dzi na ya nee nu ru nac ru biñ nu nac I'ñq, nam. Ni' zi'l Ñgyoozh wansat mi ni tub anc mod nu bzat mi I'ñ mi ornu nam:

Ya nacä Uz mi,  
nunu mi ze' nac mi I'ñq,  
nam. **6** Ornu Ñgyoozh bzuu nez mi I'ñ mi nu gul loga nim nu biid mi gyishlombecy, orze' nam:

Dela anc rlagy ñi nu riib zily dey mi, nam. **7** Ze' par de anc, i mod mniim:

Ya b icyä nu anc ne nay gal nu na bi.  
Nac dey moz ne nu na gal nu na lyush gyi, nam. **8** Tees lo I'ñ mi mniim:

Ñgyoozh, ru nac ru biñ nu gyub ic tub la.  
Ru gyub ic ru mod nu se'ñ.

**9** Ru yet lagy ru nu ricy ru de coz nu laab ñi, nunu wayet lagy ru nu gyicy ru de coz a' nap.

Nde' nu ya, Ñgyoozh nir, pcui ru,  
nunu b icyä nu zu cyit zir lagy ru gaze' de' zir mbecy, nam. **10** Ni' zi'l Ñgyoozh bzat mi I'ñ mi ornu de yu nu mnii por cuen nim mnii dey lo I'ñ mi:

Shuaan dë, ornu ru bzuub ru gyi' gyishlombecy, ru psa' lagy ru ñii.

Nunu laab nu yaar psa' lagy ru gyibaa.

**11** Tees de nu nde' nit loñ,  
tees ru ni zi'l zur.

De nu nde' gyaguush ñi gal nu ricy tub shab mbecy.

**12** Orze' cu' choow ru ñii,  
nunu zur tuuba' shab cub ru.

Tees ru ni zi'l nar tub la.

Orze' rila waded ni tiem nir,  
na dey. **13** Ñgyoozh rila wannium lo ni tub la anc gal nu mniim lo I'ñ mi ornu nam:

Bzub par yaa bee gashtal gyicy la nu gyub ic ru de losa' yuur.

Rila wannium ni mod lo ni tub la anc.

**14** Orze' de anc, yu ze' nac yu espiriit nu ricy yac nu de coz nu rnii Ñgyoozh. Nunu Ñgyoozh rzuu nez mi dey par nu locyuub yu de mbecy nu gruu mbañ.

Rlagy ñi gyicy cuidad den nu de riidz nu rnii lac gruu mbañ den

**2** Nde' nu rlagy ñi nu nap caa ic den de riidz nu bi reñ na gun nis ruu chu den loñ. **2** Gun de riidz nu bzeen de anc ze', bi rad lagy den nu nde' coz rishli. Nunu cyu zi'l mbecy nu wangyicy yac ni de riidz ze', o cyu zi'l mbecy nu wansuub gyidag ni riidz ze', orze' za dey lo cashtig gal nu rlagy ñi. **3** Benu ni, orze' lac mod gruu chu den lo cashtig benu wayicy cuen den de riidz nu rniiñ nu lac ñuu mod gruu mbañ naa? Gun riidz ze' tona' la ricy ñi presis. Gun laab Shuaan den nu loga la pshaal mi de riidz ze'. Orze' despuees de mbecy nu gueñ de riidz ze' briic dey nu gad lagy den nu de riidz ze', nu nde' coz rishli. **4** Ni' zi'l Ñgyoozh b icy mi nu gad lagy den nu laab nde' coz rishli. Ni b icy mi nu nac nu briic mi muesht, nu nac nu b icy mi de coz par nu cha nu ic mbecy, nunu nu nac nu b icy mi zañ lo nusuriidz. Nunu ni' zi'l b icy mi ornu b icy mi nu b icy Espiriit Yon nim nu cyiñ tub ga la mbecy nu gyicy yu tub ga riiñ nim. Ni b icy Espiriit nim dub gal nu rlagy ub mi.

Jesucrisht gush mi mod ni de b icy mi

**5** Gun Ñgyoozh wangyicy mi nu gyub ic de anc gyishlombecy tiem nu yad par lo. Nde' gyishlombecy nu rzat den na. **6** Sinu ricy mi gal nu rniiñ lat ca na tub riidz nim ornu rniiñ:

Ñgyoozh, lac yad ñi ni de mbecy nu gyicy cuen ru dey?

Nunu lac yad ñi ni dey nu gzur shcab nu nac yu?

**7** Ru b icy ru nu gash zir zu dey gaze' de anc par ñuu miiñ tiem.

Tees b icy ru nu lily na dey.

B icy ru nu byarasog dey.

**8** B icy ru nu riib ic yu dela coz, rniiñ.

Na ze' nu rniiñ nu b icy mi nu riib ic mbecy dela coz, orze' wancam ni dey nu wac gyub ic yu ca na de coz.

Tees na nigul zac den nu riib ic mbecy dela coz.<sup>9</sup> Ze' Jesuuz, rad lagy mi nu ſuu miſiñ zi tiem bzu Ñgyoozh mi tub mod nu gash zir par mod nu na de anc, gun orze' nu nac faboor nu bicy nu Ñgyoozh den, nde' nu gut Jesuuz nu nac dela mbecy. Nunu na Ñgyoozh bicy mi mi ze' par tub biñ nu ricy cup gyel lily, nunu tub biñ nu ca lagy mbecy lo nu nac mod nu gut mi.

<sup>10</sup> Ñgyoozh tona' la zily nac mi. Dela coz yu'ñ nu nac mi. Nunu bicy mi nu ni mod zuñ. Orze' Ñgyoozh rlagy mi nu dela i'ñ mi gzac dey lo gyel lily nim. Nde' nu na bi bza' lom riiñ nu biid Jesuuz, biñ nu rboo mbañ de mbecy nu nac nu bzac zim. <sup>11</sup> Gun de mbecy nu bi byacaacy, gal nu biñ nu ricy caacy mbecy, tub zi'l Uz dey nuy mi. Nde' nu Jesuuz wagat lom ornu rniiñ lo dey: "Bicya", rniiñ. <sup>12</sup> Nde' nu lat de riidz ni Ñgyoozh rniiñ ornu nam:

Ñgyoozh, ya rzata ru lo de bicya.

Lat de mbecy nu yu' tublaazh rdula nu ryabica gyel mbecy nir, nam.<sup>13</sup> Tuuba' tir nam:

Ñgyoozh, lo ru ricy cupa consuel, nam. Tuuba' tir mniim:

Ii zu du de i'ñä nu briic Ñgyoozh ne, mniim.

<sup>14</sup> Como de mbecy nu nac i'ñ mi ze' nac dey gur mbe-  
cy la, orze' ni' Jesuuz gush mi mod nu na dey, gun  
orze' nu nac nu gut mi, bicy mi nu wacyiiñ nuras, yu  
nu ricy nu rat mbecy. <sup>15</sup> Gun orze' bicy mi nu wadziba'  
de mbecy nu gat yu. <sup>16</sup> Gun rishli biid mi, tees walab  
par nu locyuub mi de anc, sinu par nu locyuub mi de  
mbecy nu nac nez Abraham. <sup>17</sup> Nde' nu gush mi tub  
mod nu gal gaa la nam nu de bicy mi. Gun orze' byac  
mi uz nu chu' lo Ñgyoozh par cuen ni de mbecy. Ornu  
rzu'm lo Ñgyoozh, orze' ricy paam, nunu rashni lagy  
mi de mbecy, gun bi briish mi cyi dey. <sup>18</sup> Nunu como  
laab mi bzac zim, nunu guc preb mi, nde' nu cyiñ mi  
nu locyuub mi de mbecy nu rzac preb.

### Zily zir nac Jesuuz gaze' Moisees

**3** Nde' nu der bicy na, de ru mbecy nu bi bzu chu  
Ñgyoozh nu gac nim, gush der shcab nu nac Jesu-  
crisht. Mi ze' biñ nu bzuu nez Ñgyoozh, nunu mi ze' uz  
nu rzu' lom por cuen ni de ub na dub gal mod nu rnii  
de riidz nu ricy cup den consuel lo. <sup>2</sup>Jesuuz bicy paam  
nu Ñgyoozh, biñ nu bicy nu zum riiñ ze'. Bicy paam gal  
nu bicy paa Moisees nu nac riiñ nu bicy yu nañ yu'  
wedz ni Ñgyoozh. <sup>3</sup>Yad ñi ni Jesuuz nu dzi zir ca lagy  
mbecy lom gaze' Moisees, gun zily zir nac mbecy nu  
rzaa tub yu' gaze' ub la yu' nu ryaa ze'. <sup>4</sup>Na dela yu'  
rlagy ñi tub mbecy nu zaay ñi. Tees Ñgyoozh psa' lagy  
mi dela coz. <sup>5</sup>Na Moisees, yu ze' tub moz nu bicy paa  
nañ yu' ni Ñgyoozh. Bzat yu de coz nu gniim par lo.  
<sup>6</sup>Tees Crisht, como nac mi I'ñ Ñgyoozh, orze' mi ze' ri-  
cy paam ornu riib ic mi nañ yu' nim. Ze' de ub na na  
den gal nu na yu' ze' nim benu gzu fert den, nunu be-  
nu zu cyit lagy den nu nac de coz nu drish lon lo.

### Ñgyoozh rbic mi nu zu lagy de mbecy nim

<sup>7</sup> Nde' nu rlagy ñi nu gyicy cuidad den gal nu rnii Es-  
piritu Yon ni Ñgyoozh lat de riidz nim. Ñgyoozh nam:

Dzi na, benu gyeñ der de riidz nu rnëe,

<sup>8</sup> Orze' cue' gyicy cyigy lardoo der  
gal nu bicy de mbecy nu bish cya icha,  
de yu nu bicy preb ya lat nu gusa dey lugaar ub zi.

<sup>9</sup> Lugaar ze' bicy de gyitoo bel ni der preb ya.  
Ni bicy dey mas bzaac dey de coz nu bicya lat cyuu  
ña'n.

<sup>10</sup> Nde' nu ya guzi lagya lo de mbecy nu gu' tiem ze'.  
Ya mnëe nu dub laa tiem radza dey.

Nunu wangalagy dey ñyet lag yu cuen mod nu ya  
rlagy.

<sup>11</sup> Nde' nu ya guzi lagya,  
nunu ya mnëe lo dey nu rila wazac dey lo gyel rzu  
lagy nu grica,  
nam, rniiñ lat riidz nim.

<sup>12</sup> Orze' der bicy na, bicy cuidad der nis gac der mbe-  
cy a' nap, nis gac der mbecy nu wagyicy cup consuel,  
gun orze' nu nac nde', dzi ga gruu chu der lo Ñgyoozh  
mbañ. <sup>13</sup>Lugaar nu gyicy der nde', orze' tub ga la der  
briic der baloor ni losa'r de dzi la lat nu gabee gad  
tiem, gun orze' ni tub la der wadzar nu nac de coz cyi,  
nunu wayacyigy lardoo der. <sup>14</sup> Gun Crisht nac num den  
benu wayecan nu gyicy cup den consuel lom gashtal  
gat lan, benu gyicy cup den consuel lom gal nu bicy  
den nu loga la. <sup>15</sup> Nde' nu rnii riidz ni Ñgyoozh ornu  
nam:

Dzi na, benu reñ der riidz nu rnëe,  
orze' cue' gyicy cyigy lardoo der

gal nu bicy de mbecy nu bish cya icha,  
nam, rniiñ. <sup>16</sup> ¿Cyu de mbecy nu güeñ de riidz nu mni  
Ñgyoozh ze', na despuees orze' bish cya dey ich mi? ¿A  
walab nde' de mbecy nu bloo Moisees lo de yu ni Egip-  
to? <sup>17</sup> ¿Cyu lo guzi lagy Ñgyoozh lat de cyuu ña'n ze'?  
¿A walab lo de mbecy nu bicy coz cyi, de yu nu gut lu-  
gaar ub zi ze'? <sup>18</sup> Ornu Ñgyoozh mniim nu rila wazac  
dey lo gyel rzu lagy nu cuic mi, ¿cyu nu rzat mi ze'? ¿A  
walab de yu ze' de mbecy nu wansuub gyidag nim?

<sup>19</sup> Orze' rad lagy den nu wansac de mbecy ze' lo gyel  
rzu lagy nu rbic mi nu nac nu wangyicy cup dey con-  
suel lom.

**4** Na Ñgyoozh gabee ricy yac mi de riidz nu mniim  
ze'. Riidz ze', nde' nu gac zac den lo gyel rzu lagy  
nim. Tees rlagy ñi gyicy cuidad den, gun nis ruu su tub  
mbecy lat den nu wayicy yu gan nu wazac yu loñ.

<sup>2</sup> Gun ni' de ub na bi reñ den de riidz nu sac nim gal nu  
güeña' de yu ze'. Par de yu ze' se la la pcyiiñ ñi ni dey  
mas güeñ dey ñi, gun mas güeñ dey ñi, tees wancheña  
lagy dey ñi. <sup>3</sup>Tees de ub na nu nac nu rzeña lagy den,  
orze' gzac na lo gyel rzu lagy nim. Orze' gac ñii gal nu  
mniim:

Ya guzi lagya lo dey,  
nunu mnëe nu rila wazac dey lo gyel rzu lagy nu rica,  
nam. Ni mniim mas bi rad gyel rzu lagy nim ni dey,  
gun Ñgyoozh nese nu bzub gyi' gyishlombecy bi bza'

lom riiñ nu b icy mi. <sup>4</sup> Gun lat ca na tub nac riidz nim rniiñ nu nac sab dzi nu rzu lagy mbecy:

Dzi gagy Ñgyoozh bzu lagy mi,  
gun bza' lom dela riiñ nim,  
rniiñ. <sup>5</sup> Mas bi rad ñi, tees wansac dey loñ, gun lat de riidz nim rniiñ: Ñgyoozh nam:  
Rila wazac dey lo gyel rzu lagy nu ricä,  
nam. <sup>6</sup> Tees gabee ricy falt ru' nu gzac mbecy lo gyel  
rzu lagy nim. De mbecy nu güeñ loga la de riidz nim  
wansac dey loñ, gun wansuub gyidag dey nim. <sup>7</sup> Nu  
nac nde', orze' Ñgyoozh b zum tuuba' tiem nu bloo lam  
Dzi Na. Na ornu bi bza' zañ ña'n nu gut de mbecy ze',  
orze' bzat mi tiem ze' lat de riidz ni Dabi. Orze' nam:  
Benu dzi na reñ der riidz nu rnëe,  
orze' cue' gyicy cyigy lardoo der,  
nam, na de riidz nim. <sup>8</sup> Benu Josué ñgya nuy de mbecy  
Israeel lo gyel rzu lagy nim, orze' wazata'm tuuba'  
tiem ze'. <sup>9</sup> Nde' nu rad ru' gyel rzu lagy nim ni de mbe-  
cy nim. <sup>10</sup> Gun de mbecy nu zac lo gyel rzu lagy nim, de  
yu ze' gzu lagy dey ni de riiñ nu ricy yu gal nu Ñgyoozh  
bzu lagy mi ni de riiñ nu b icy mi. <sup>11</sup> Nde' nu rlagy ñi nu  
gyicy den tub fers nu zac den lo gyel rzu lagy nim.

Walagy ñi nu zuub yaan de riidz nu mniim gal nu b icy  
de mbecy ze', gun benu ni, orze' ni' wayicy den gan.

<sup>12</sup> Gun riidz ni Ñgyoozh, nde' tub coz nu zaab cyiiñ la.  
Nde' tub coz nu dzi coz ily ricy. Dzi zir nap ricy ñi par  
tub mandzicy nu rup chu la' la ru' ri'ñ. Nu nac riidz ze'  
nap rzac den gashtal nañ lardoona. Lo riidz ze' naal la  
rniiñ de coz nu yu' nañ shcab nin. Nunu naal la rniiñ  
de coz nu rlagy den gyicy na nañ lardoona. <sup>13</sup> Ni tub la  
coz wac cach loñ lo Ñgyoozh. Dela coz naal la rad lagy  
mi, nunu lo mi ze' dela mbecy rlagy ñi nu zeed cuen  
dey.

### Jesuuz zum riiñ ni den lo Ñgyoozh

<sup>14</sup> Na zu tub biñ lily, biñ nu nac uz nu zu riiñ ni den.  
Mi ze' Jesuuz, I'ñ Ñgyoozh. Mi ze' rzam lo Ñgyoozh por  
cuen ni de ub na. Nde' nu rlagy ñi nu gzu fert den nu  
nac de riidz ni Crisht nu guña lagy na. <sup>15</sup> Gun biñ nu zu  
riiñ ni den ze', mi ze' gac gashni lagy mi de ub na nu  
nac nu wacyiiñ den, gun ni' guc de lo la preb mi gal nu  
rzac de ub na na la. Nomaas mi ze' rila wangyicy mi  
cyi. <sup>16</sup> Orze' na dub gusht la, walagy ñi nu dzib lagy  
den gyecha'n ze' nu zub Ñgyoozh biñ nu riib ic de ub  
na. Mi ze' gashni lagy mi den, nunu nap gyicy num  
den, nunu locyuub mi de ub na tiem nu galagy ñi.

**5** Zu tub riiñ. Nde' tub riiñ nu rzu' tub uz lo Ñgy-  
oozh por cuen ni mbecy. Uz nu rdugyi riiñ ze' dru-  
uy laab lat mbecy zi'l. Orze' rac yu uz nu rbic de lo la  
gun lo Ñgyoozh nu nac de cyi mbecy. <sup>2</sup> Ze' uz nu  
rdugyi riiñ ze' ni' wacyiiñ yu. Nde' nu ricy cup yu pasez  
nu de mbecy nu wagad lagy, gal nu de mbecy nu  
radza. <sup>3</sup> Nunu gyi' nu nac yu mbecy wacyiiñ, nde' nu  
walab tub lo zi'l nu rbic yu gun nu nac cyi ub yu, sinu  
ni' zi'l rbica'y gun nu nac cyi dela mbecy.

<sup>4</sup> Na ni tub la mbecy wac gzuy ub yu riiñ ze', sinu  
Ñgyoozh zum yu gal nu bzuu ga'm Aroong. <sup>5</sup> Ni' zi'l Cr-

isht wansum ub mi riiñ ze', sinu Ñgyoozh b zum mi gal  
nu nam:

Ru I'ñä.  
Dzi na ya neñ nu ru biñ nu nac I'ñä,  
nam. <sup>6</sup> Tuuba' lugaar lat de riidz nim nam:  
Ru dugyir riiñ nu zu uz.  
Orze' cyid ru lo por cuen ni de mbecy tub la.  
Nunu ya zu ru laaba' riiñ nu bzu Melquisedec,  
nam. <sup>7</sup> Lat nu gusa Crisht gyishlombecy ii, orze' fert la  
brish ti num Ñgyoozh nunu shni mnii num mi, gun mi  
ze' biñ nu gac co mbañ ub mi, gun orze' cue' nu gat  
mi. Tees gun "O" mniim ni Ñgyoozh, nde' nu bzuub  
gyidag Ñgyoozh riidz nu mniim. <sup>8</sup> Crisht, mas nac mi  
I'ñ Ñgyoozh, tees byac mi mbecy nu bzuub gyidag nu  
nac nu bzac zim. <sup>9</sup> Na ornu bya' lo riiñ nu biid mi gy-  
ishlombecy ii, orze' byac mi biñ nu rboo mbañ de mbe-  
cy nu rzuub gyidag. <sup>10</sup> Orze' Ñgyoozh b zum Crisht riiñ  
nu zu uz nu rzu' lom por cuen ni de mbecy. Nde' nu  
laab riiñ nu b zum Melquisedec, laaba' riiñ ze' b zum Cr-  
isht.

### Nu gya' ich mbecy lo de coz ni Crisht

<sup>11</sup> Yu' zañ riidz nu rlagy ñi neñ de nu nac de coz ze'.  
Tees dzi biigy par nu shaal de lo der, gun dzi gyee gyet  
lag der cuen. <sup>12</sup> Bi b icy na nu ñgyac der, bi nac der  
moscuel na, tees gabee rlagy ñi nu dulyuu ni der tu-  
uba' tir de riidz nu bi bdulyuu ni der nu loga la nu nac  
Ñgyoozh, gun tanta' nu wacyiiñ der. Na der gal nu na  
tub mbecy nu ro' lech lugaar nu gow der coz cyigy.  
<sup>13</sup> Cyu zi'l mbecy nu ro' ga ub lech zi'l, yu ze' nay gal nu  
na tub mdoo. Yu ze' wagyet lag yu cuen la na de coz  
nap nu gyicy den. <sup>14</sup> Ze' de coz cyigy, nde' par nu gow  
de mbecy gush. De yu ze' rad lagy yu ca na coz nap,  
gun bi gubeey nu rcuiy la na coz nap, nunu la na de  
coz a' nap.

**6** Nde' nu rlagy ñi nu ded lo den lo de riidz a' biigy  
ni Crisht, nunu rlagy ñi nu gac den mbecy nu gul  
shcab ni. Walagy ñi nu gnii ga' den de riidz nu bi bdu-  
lyuu nese nu loga la. Ni cue' ga' nii den nu rlagy ñi nu  
ne' mbecy de cyi nu ricy yu, de cyi nu gyicy nu gat yu.  
Ni cue' ga' nii den nu rlagy ñi nu gyicy cup mbecy con-  
suel lo Ñgyoozh. <sup>2</sup> Ni cue' ga' lyuu den nu nac nu zu  
nis mbecy. Ni cue' ga' lyuu den nu nac nu riib yaa  
mbecy too losa'y. Ni cue' ga' lyuu den nu gyabañ de  
mbecy nu bi gut. Ni cue' ga' lyuu den ni nu gri bee  
Ñgyoozh ni de mbecy. Dela nde' nac ñii coz a' biigy ni  
Crisht. <sup>3</sup> Rlagy ñi nu ded lon lo de coz ze'. Benu Ñgy-  
oozh zaan mi, orze' ni gyicy den. <sup>4</sup> Gun yu' mbecy nu bi  
gulas bet lag dey cuen de coz ni Crisht. Bi gud lagy dey  
la na de coz ni Ñgyoozh. Bi yu' lo dey Espiriit Yon nim.  
Bi gud lagy dey de coz nap nu rnii riidz nim. Bzaac dey  
nu ricy mi de coz ily gal nu gyicy mi de tiem nu yad par  
lo. Mbecy ze', benu gruu chu dey lo de coz ni Crisht,  
orze' rila waca' gyanap shcab ni dey par nu gac dey  
mbecy nim tuuba' tir. Gun nde' nañ gal nu na nu rcaa  
dey Crisht, I'ñ Ñgyoozh, lo cruuuz tuuba' tir. Orze' ricy  
dey nu to' lo zum lo dela mbecy tuuba' tir. <sup>7</sup> De mbecy  
ze' na dey gal nu na yu nu rzayo' nis gyey ornu yet tub

poras gyey loñ. Benu yu ze' cuic ñi tub cosech nu cyiiñ ni de mbecy nu ricy riiñ loñ, orze' Ñgyoozh nap gyicy num ñii. <sup>8</sup> Tees benu yu ze' cuic ñi gyish nu gyech, orze' se la la cyiiñ ñi. Orze' Ñgyoozh zaa lagy mi niñ. Nunu ornu gya' lo tiem, orze' ca gyiñ.

### Nu zu fert den nu nac riidz nu drish lon lo

<sup>9</sup> Der bicy na nu dzi rca dę, mas ni mod rnęe du dę de ru, tees rad lagy dę nu segur la gzac der lo de coz ily nu gad nir nu nac nu gruu mbañ der. <sup>10</sup> Gun Ñgyoozh ricy mi mod nu se'ñ. Wanit lagy mi de riiñ nim nu b icy der nu nac nu rcar mi ornu blocyuub der de b icy ru nu nac Crisht. Nunu mas na gabee rlocyuub der dey. <sup>11</sup> Coz nu rlagy dę, nde' nu tub ga la de ru zaab co lo zir der gashtal gya' lo la tiem. Gun orze' dela coz nu rgyish lo der lo gac ñii. <sup>12</sup> Walagy dę nu gyac der mbecy zed, sinu rlagy dę nu gyicy der gal nu ricy de mbecy nu ricy cup consuel. Bicy der gal nu ricy de mbecy nu b icy cup pasez, gun nu nac nu ni ricy dey, orze' dela coz nu mnii Ñgyoozh nu cuic mi ni dey, dela nde' gyiyeen ñi yaa dey.

<sup>13</sup> Ornu Ñgyoozh mniim lo Abraham, orze' bzat mi ub mi par nu gabe nu segur la gyicy mi gal nu mniim. Como saca' zir mbecy nu zily zir nac gaze' ub mi, orze' bzat mi ub mi. <sup>14</sup> Orze' nam: "Ya neę lor nu segur la nap gyicy du ru, nunu segur la gyicya nu gyañ de nez ru nu chu' par lo", nam rab mi Abraham. <sup>15</sup> Orze' Abraham b icy cup yu pasez. Orze' Ñgyoozh b icy mi gal nu mniim. <sup>16</sup> Na benu tub mbecy rniy nu segur la gyicy yu tub coz, orze' zat yu tub mbecy nu zily zir nac gaze' ub yu. Nde' nu benu tub su dey losa'y nu riidz, orze' rzat dey mbecy ze'. Orze' gya' loñ ni dey. <sup>17</sup> Nde' nu Ñgyoozh rlagy mi nu naal la gad lagy de mbecy nu mniim nu nap gyicy num de mbecy ze', nunu rila wadza mod nu rlagy mi gyicy mi num dey. Nde' nu bzat mi ub mi par nu gabe nu segur la gyicy mi gal nu mniim.

<sup>18</sup> Orze' Ñgyoozh b icy mi cyup coz. Mniim nu ni gyicy mi. Nunu bzat mi ub mi par nu gabe nu ni gyicy mi. De nde' coz nu rila wac dza. Nunu Ñgyoozh waguum. Ni b icy mi, gun orze' de ub na, mbecy nu cha lom par nu ñam den, de ub na gric na baloor par nu gzu fert den nu nac de riidz nu drish lo den lo. <sup>19</sup> Nunu de riidz nu drish lo den lo ze', nde' nañ gal nu na tub gyiib ye ni barc par nu cue' guul bi barc par re par ii la. Orze' nde' ricy ñi nu rzu fert den nañ lardoona. Riidz ze', nde' ricy ñi nu gac chu' den lo Ñgyoozh. Nde' nañ gal nu na nu gac ded den ro' negy nu zaab nañ yu' nu driib zily de mbecy Israeel Ñgyoozh. Orze' chu' den nañ yu' yon zir par de' zir lugaar. <sup>20</sup> Jesuuz bi ya gam par lugaar yon ze' por cuen ni den. Mi ze' byac mi uz nu zu riiñ lo Ñgyoozh por cuen ni de ub na. Nde' nu laaba' riiñ nu bzu Melquisedec, laaba' riiñ ze' bdugiyim. Na riiñ ze' ricy mi tub la.

### Ñgyoozh b zum Jesuuz laaba' riiñ nu bzu Melquisedec

<sup>7</sup> Na Melquisedec, yu ze' rey ni tub gyedz nu la Salem. Nunu yu ze' tub uz nu zu riiñ lo Ñgyoozh,

biñ nu zily zir nac. Na Abraham guay tub gyel yuu. Biit yu de rey nu riib ic. Orze' bish cyay yay. Na nez nu yay, orze' Melquisedec gua cheel yuy. Orze' Melquisedec bdiñ yu lo Ñgyoozh nu nap gyicy num yu. <sup>2</sup> Orze' Abraham briic yu tub ga coz lo tii de coz nu b icy yu gan lat gyel yuu ze' ni Melquisedec. Riidz Melquisedec, riidz ze' yaruuñ: Rey nu sac cyi. Ni yaruuñ. Nunu riib ic yu tub gyedz nu la Salem. Como riidz Salem, nde' yaruuñ: Gyel ri zu, nde' nu ni' nac yu: Rey nu rbic gyel ri zu. <sup>3</sup> Rlyu nu sac uz Melquisedec. Nunu sac ñaay. Rlyu nu sac la de gyitoo bel niy. Rlyu nu sac tiem nu gul yu. Rlyu nu sac la tiem nu gut yu. Nay gal nu na I'ñ Ñgyoozh, gun zaab zu lay riiñ lo Ñgyoozh rlyu.

<sup>4</sup> Orze' na gad lagy der nu dzi zily nac Melquisedec. Mas gashtal Abraham, gyitoo bel ni den, briic yu tub ga coz lo tii de coz nu guud niy lat gyel yuu ze' nu ganiy. <sup>5</sup> De uz nu zu riiñ lo Ñgyoozh ni de mbecy Israael, de uz ze' nac dey nez Leví. Orze' por leey la rgyiñ dey tub ga de coz lo tii de coz lo de mbecy Israael. Rte' dey de coz ze' lat losa'y, mas ni' ub yu nac yu nez Abraham. <sup>6</sup> Ze' Melquisedec mas walab nez Leví guc yu, tees gush yu tub ga coz lo tii de coz ni Abraham. Nunu bdiñ yu lo Ñgyoozh nu nap gyicy num yu. Nunu Abraham guc yu mbecy nu mnii Ñgyoozh lo nu segur la nap gyicy num. <sup>7</sup> Segur la yu nu cyiñ lo Ñgyoozh nu nap gyicy num losa', yu ze' zily zir nac yu gaze' losa'y nu zac lo gyel nap ze'. <sup>8</sup> Tees lat de ub na, de mbecy nu rgyiñ tub ga coz lo tii coz, de yu ze' nac dey mbecy nu gat. Ze' Melquisedec, riidz ni Ñgyoozh rniy nu yu ze' nay gal nu na tub mbecy mbañ. <sup>9</sup> De nde' yaruuñ nu ornu briic Abraham tub ga coz lo tii de coz, orze' ni' zi'l b icy Leví, gal nu de nez yu, mas de yu ze' rgyiñ dey tub nac ga tiñ lo tii nac ñii ni de mbecy Israael. <sup>10</sup> Ni yaruuñ mas Leví nigul gal yu ornu ni b icy Abraham. Gun nañ cuerp ni Abraham bi ri mbig yu nu byac Leví. Ri mbig yu nañ cuerp niy ornu bdzeel yu Melquisedec. Orze' ni' Leví briic yu tiñ ni Melquisedec lat nu riy nañ cuerp ni Abraham.

<sup>11</sup> Ñgyoozh briic mi leey ni de mbecy Israael nu nac de nez Leví, de uz nu zu riiñ lom. Benu riiñ nu zu de nez Leví, benu nde' beñ par nu gyanap mbecy lo Ñgyoozh, orze' walagy ñi nu ndruu sac tuuba' mbecy nu dugyi laaba' riiñ nu bdugyi Melquisedec, tub yu nu dugyi riiñ nu reña' na par riiñ nu bdugyi Aroong.

<sup>12</sup> Gun ornu rdza mod nu zu uz riiñ lo Ñgyoozh, orze' ni' zi'l rlagy ñi nu dza ga' leey. <sup>13</sup> Nunu Shuaan den, biñ nu rzat riidz ni Ñgyoozh ii, mi ze' reña' nez mi, walab nez Leví. Nunu lat nez mi ze' nigul gruu sac ni tub uz nu gzu riiñ lo Ñgyoozh. <sup>14</sup> Gun dela mbecy rad lagy dey nu mi ze' nac mi nez Judá. Nunu Moisees wansat yu nez Judá ornu mniy ca na mbecy gac yu riiñ nu gac yu uz.

<sup>15</sup> Orze' naal la rad lagy den nu bdza mod nu ricy Ñgyoozh, gun bruu zac tub mbecy nu zu riiñ ni uz, tub mbecy nu na gal nu na Melquisedec. <sup>16</sup> Mi ze' walab nu zum riiñ ze' nu nac tub leey nu rniiñ ca na nez mbecy rlagy ñi nu gzuy riiñ ze', sinu byac mi biñ nu zu riiñ ze'

nu nac nu ricy cup mi tub mod par nu cyiiñ mi tub la.

<sup>17</sup> Gun lat de riidz ni Ñgyoozh ze' rniiñ, ornu nam:

Ru dugyir riiñ nu zu uz nu cyid ru lo por cuen ni de mbecy tub la.

Nunu ya zu ru laaba' riiñ nu bzu Melquisedec, rniiñ. <sup>18</sup> Orze' mod ni Leví bya' loñ, bded niñ, gun wancyiiñ ñi. <sup>19</sup> Gun leey nu bzeeñ Moisees wangac ñgyicy ñi nu ñgyanap mbecy par lo Ñgyoozh. Nde' nu na drish lo den lo tub coz nu nap zir. Nu nac nde' gac gyecha' den lo Ñgyoozh.

<sup>20</sup> Nunu ornu Ñgyoozh mniim nu dugyi Jesucrisht riiñ ze', orze' bzat mi ub mi par nu gabe nu segur la gyicy mi ñii. <sup>21</sup> Ornu de' zir mbecy bdugyi dey riiñ lom, orze' Ñgyoozh wansat mi ub mi. Tees Ñgyoozh bzat mi ub mi, ornu bdugyi Jesuuz riiñ ze'. Ni rnii de riidz nim:

Shuaan den mniim,  
nunu bzat mi ub mi par nu gabe nu segur la gac ñii.  
Nunu rila wadza shcab nim.

Orze' nam:

"Ru dugyir riiñ nu gac ru uz nu chu' lo por cuen ni de mbecy par tub la", nam,  
rniiñ. <sup>22</sup> Nde' nu Jesuuz ricy mi nu rad lagy den nu trat nu ricy Ñgyoozh nu de ub na, nu nde' segur la. Nde' trat nap zir gaze' trat nu bicy mi num de mbecy nu lo-ga la.

<sup>23</sup> Nunu tuuba' coz. Dela de' zir uz nu zu riiñ lo Ñgyoozh, zigy dey nac yu, gun zaab rat la dey. Orze' tub gay wagac zu tuñ yu riiñ. <sup>24</sup> Tees Jesuuz mbañ mi tub la. Nunu waruum riiñ nu zum par nu chu' tuuba' mbecy lom. <sup>25</sup> Nde' nu na, gal nu par dub laa tiem gac co mbañ mi de mbecy nu gyecha' lo Ñgyoozh nu nac mi. Ni ricy mi, gun zum tub la par nu rnishbaam lo Ñgyoozh nu nac de mbecy.

<sup>26</sup> Orze' Jesuuz, mi ze' zum riiñ lo Ñgyoozh dub gal mod nu galagy ñi ni den. Nac mi biñ Yon. Sac la falt nim. Ni sac cyim. Mi ze' tub biñ nu a' nac nu de mbecy shiñ ricy. Gya zir zum gaze' de' zir mbecy gyibaa.

<sup>27</sup> Wagycy mi gal nu ricy de' zir de uz nu rza lo Ñgyoozh por cuen ni de mbecy. Gun de yu ze' de dzi la rlagy ñi cuic dey gun lo Ñgyoozh. Nu loga la cuic dey gun par de cyi ub yu. Despuees gaze' nu cuic dey gun par cyi de mbecy. Ze' Jesuuz tub tir zi'l briic mi gun par dela mbecy ornu briic mi ub mi. <sup>28</sup> Yu' uz nu zu riiñ nu rzu' dey lo Ñgyoozh por cuen ni de mbecy dub gal mod nu rnii leey ni Moisees. Tees de yu ze' nac dey mbecy wancyiiñ. Tees despuees ornu biid leey ni Moisees, Ñgyoozh bzum I'ñ mi nu gac mi uz nu chu' lom. Nunu bzat mi ub mi ornu bzum I'ñ mi. Orze' na I'ñ mi byac mi biñ nu ricy riiñ nu briic Ñgyoozh nim tub la.

Jesuuz zum gyibaa nu locyub mi de ub na

<sup>8</sup> Na coz nu ricy zir ñi presis nu nii den, nde' nu zu tub uz nu rzu' lo Ñgyoozh por cuen ni de ub na. Nunu mi ze' nam gal nu bi mnœ. Na Zub mi par yaa bee Ñgyoozh gyibaa. <sup>2</sup> Zum riiñ nañ tub yu' yon nu rishli, tub yu' nu wansaa mbecy nu yaay, sinu coz nu bzaa Ñgyoozh.

<sup>3</sup> Na dela uz nu zu riiñ ze' bdugyi dey riiñ ze' par nu cuic yu gun lo Ñgyoozh, nunu par nu cut dey bañcyug nu shuy reñ ma lom. Nde' nu ni' zi'l rlagy ñi nu Jesucrisht cuic mi gun lo Ñgyoozh. <sup>4</sup> Benu gyishlombecy ñcyiñ mi, orze' wac gyicy mi riiñ ze', como par nde' bi yu' de uz nu rbic gun lo Ñgyoozh mod nu rnii leey ni Moisees. <sup>5</sup> Ornu rzu dey riiñ ze', orze' rboo nab dey coz nu rac gyibaa. Ricy dey de coz ze' gyishlombecy ii gal nu na tub sheñ zi de coz rishli nu rac gyibaa. Rad lagy den nu nab zi'l nde' ricy dey, gun ornu Moisees bi zuu lay nu zaay yu' yon ze', orze' Ñgyoozh nam rab mi yu: "Bzu cuidad ornu ghaar ñii. Gal mod nu na nab ñii nu bzaac ru ornu blyuu lor too bicy ze', ni na ghaar", nam. <sup>6</sup> Ze' Crisht zum tub riiñ nu gya zir zu par riiñ nu zu de' zir uz. Ni' zi'l trat nu bloom nu rniiñ nu lac gyicy nu Ñgyoozh den, nde' tub trat nu nap zir par trat gush ni leey, gun riidz ni trat cub, riidz nu mnii Ñgyoozh nu se-gur la gyicy mi, nde' riidz nu nap zir gaze' riidz ni trat gush.

<sup>7</sup> Benu cue' ñgyu' falt ni trat nu loga la nu b icy nu Ñgyoozh de mbecy, orze' walagy ñi tuuba' trat. <sup>8</sup> Tees Ñgyoozh byap mi falt ni de mbecy nim. Orze' mniim: Shuaan den nam: Shuub dzi nu zu tub trat cub lat de mbecy Israel nu lat de mbecy Judá.

<sup>9</sup> Reña' mod nañ par trat nu b icy du de gyitoo bel ni dey  
tiem nu bloq dey lo yu ni Egipto ornu yaa du dey.  
Tees wangycy yac dey trat ne.  
Orze' ya blaa yaq dey,  
na Shuaan der. <sup>10</sup> Orze' na ga'm:  
Mod nu za trat nu gyicy du de mbecy Israel:  
Ornu shuub dzi ze', ya gyicya nu caa ic dey de riidz nu rnœ.

Gyicya nu gad lagy dey ñi.  
Ya nacä Ñgyoozh ni dey,  
nunu de yu ze' gac dey mbecy ne.  
<sup>11</sup> Ni tub la mbecy walagy ñi nu lyuuy ni losa'y.  
Ni walagy ñi nu lyuuy ni b icy yu nu niyy:  
"Rlagy ñi nu chu' lor Shuaan den", niyy,  
gun dela mbecy chu' lo dey ya.

Dela mbecy shni, nunu gashtal dela mbecy lily,  
se tub ru' la chu' lo dey ya.

<sup>12</sup> Nunu ya gyicy sulagy del a cyi nu b icy dey.  
Nunu rila wayeza' ga' lagya ñii,  
nam. <sup>13</sup> Ornu bzat mi tub trat cub, orze' b icy mi nu trat loga ze' par tub trat nu bi bded ni. Nunu benu bi gu-ush ñi, benu bi bded niñ, orze' sñuu ga nit loñ.

Mod nu zu de uz riiñ lo Ñgyoozh gyishlombecy nunu mod nu zu Crisht riiñ ze' gyibaa

<sup>9</sup> Nu nac trat loga la, yu' mod nu briib zily mbecy ii. Ze' briib zily dey mi. <sup>2</sup> Yu' ze' ricy cup ñi cyup cuart. Cuart loga la, nde' bloo la dey ñi Lugaar Yon. Ze' Zub tub candeler iñ nu tub mez. Ze' nguaa gysishtly nu bzu chu dey par Ñgyoozh. <sup>3</sup> Na par ich tub ro' negy ca tu-uba' cuart. Orze' cuart ze' bloo la dey ñi Ze' nu Blazha'

Zir Lugaar Yon.<sup>4</sup> Ze' zu tub mez or par nu zaay dey yaal. Nunu ze' Zub gyiñ ni trat nu b icy nu Ñgyooozh dey. Gyiñ ze' briily dey or dutuub lañ. Nañ gyiñ ze' ri tub casit or. Ze' nañ ñi yu' maná, coz nu bdow dey lat nu gusay lugaar ub zi. Nunu laab nañ gyiñ ze' ri yanga Aroong nu briib iñ ich ze'. Nunu laab nañ gyiñ ze' ri cyup gyita' nu pca leey ni Ñgyooozh.<sup>5</sup> Ze' par too gyiñ ze' Zub cyup nab ni tub lo mbecy nu yu' gyibaa nu la Querubines. Nab ze', nde' muesht ni gyel lily ni Ñgyooozh. Nunu ptiily lowe'ñ par nu soow ñi lugaar ze' nu ricy sulagy Ñgyooozh cyi mbecy. Tees na wac shaal de lac zu dela coz ze'.

<sup>6</sup> Na ornu bi zu lily de coz ze', orze' de uz nu zu riiñ lo Ñgyooozh zaab za la dey nañ cuart loga ze' par nu za' lo dey riiñ nu bi cay. <sup>7</sup> Tees tub zi la uz nu rzu' lo Ñgyooozh por cuen ni de mbecy, tub zi la yu ze' gac chu'y nañ cuart cyup ze'. Nunu yu ze' tub tir zi gac chu'y nañ cuart ze' nañ tub ña'n. Rza nuy reñ nu rbic yu lo Ñgyooozh nu nac de cyiy, gal nu nu nac de cyi mbecy. <sup>8</sup> Na Espiriit Yon ni Ñgyooozh rbic mi nu gad lagy den nu lat nu gabee zu uz riiñ nañ cuart loga ze', orze' wac chu' mbecy nañ cuart cyup ze', ze' nu blazha' zir lugaar yon. <sup>9</sup> Mod nu ricy dey nañ yu' ze', nde' ricy ñi nu yet lag den cuen mod nu rac nu de ub na. Orze' yaruuñ nu de gun nu rbic mbecy lo Ñgyooozh tiem ze', gal nu de bañcyug nu rut dey lom, de nde' wac gyicy nap ñi lar-doo mbecy, gun gabee wac chu' dey nañ cuart cyup ze'. <sup>10</sup> De uz ze' tub lo zi'l cuen ni dey ni de coz row mbecy zi'l, gal nu ni de coz nu ro' zi'l dey. Cuen ni dey nu lac mod gyicy caacy yu de coz. Nunu de riiñ nu ricy de yu ze', nde' tub lo zi'l nu cyiiñ ñi gal tiem nu bruu-zac tub mod cub. Orze' gya' lo de coz nu ricy de uz ze'.

<sup>11</sup> Tees na Crisht bi biid mi. Byac mi uz nu rzu' lo Ñgyooozh por cuen ni den. Ricy mi de coz nap nu rzac den na. Yu' nu zum riiñ nañ ze', nde' coz nap zir, nunu coz nu cyiiñ zir gaze' yu' nu bzu de uz riiñ nañ ze'. Nunu yu' ze', walab mbecy bzaay ñi. Nde' walab coz ni gyishlombecy ii. <sup>12</sup> Ornu Crisht gu'm nañ cuart nu blazha' zir yon ze', orze' wancha num reñ chiib, ni reñ biser par nu cuic mi lo Ñgyooozh, sinu reñ ub lam gua num. Orze' gu'm tub tir zi'l nu nac dela mbecy, nunu b icy mi nu gac gruu mbañ den tub la. <sup>13</sup> Gun gyishlombecy ii rbic dey reñ chiib, nunu rbic dey reñ tor, nunu rtush las dey diñ terner too de mbecy nu a' caacy, gun orze' gyicy caacy dey yu. <sup>14</sup> Benu ni, orze' jdzi zir coz ily ricy reñ Crisht! Gun nu nac Espiriit nu zu tub la, orze' Crisht briic mi ub mi par tub gun nu rila sac fart ni. Nunu nu nac reñ mi, orze' gyicy mi nu wat den lo Ñgyooozh nu nac de coz to' lo nu b icy den, de coz nu gyicy nu yad ñi nu gat den, gun orze' gyicy den coz nu rlagy Ñgyooozh mbañ.

<sup>15</sup> Nde' nu Crisht nac mi biñ nu bzu trat cub. Nu nac nu gut mi, orze' guud mod par nu gyicy sulagy Ñgyooozh de cyi nu b icy de mbecy nu byub ic trat loga ze'. Nunu gut mi, gun orze' de mbecy nu bzum nu gac nim zeeñ mi gyel nap nu rila waded ni yaa dey, gal nu mnii Ñgyooozh nu segur la gyicy mi.

<sup>16</sup> Na benu tub mbecy gyicy yu tub trat nu rniiñ lac mod gyicy nu dey de coz nu yu' niy ornu gat yu, orze' rlagy ñi cuic de famil niy nu gad lagy de mbecy nu bi gut yu anzir nu gyicy dey gal nu rniiñ lo trat ze'. <sup>17</sup> Tees wagycy dey gal nu rniiñ lo trat ze' lat nu gabee mbañ yu nu bzu trat ze'. <sup>18</sup> Nde' nu trat nu b icy Ñgyooozh nu loga la, bzu nap dey ñi nu nac nu pshu reñ. <sup>19</sup> Gun Moisees blab yu dela coz nu mnii leey ze' lat de mbecy zigy. Gaze' nu gush yu tub nac gyich ña shily, nunu gush yu tub yaa yag nu la hisopo. Orze' psal yu nde' lo reñ chiib, nu lo reñ biser nu gu' can nu nis. Orze' pcooy nde' lo gyicy ni leey, nunu pcooy ñi lat de mbecy zigy. <sup>20</sup> Orze' nay rab yu dey: "Nii reñ nu gyicy nu chesu nap trat ni Ñgyooozh, trat nu bzum nu gyicy yac der", nay. <sup>21</sup> Ni' zi'l mod pcoo Moisees reñ ich yu' yon ze', nunu pcoo ga'y reñ ze' lo de yuu nu nguaa nañ ñi. <sup>22</sup> Gun par lo leey sñuu ga la gac dela coz yacaacy ñi nu nac reñ. Nunu Ñgyooozh rila wayicy sulagy mi ni de mbecy benu washu reñ.

#### Coz nu bzac Crisht, nde' tub gun nu briic mi ni Ñgyooozh par nu za' lom cyi de mbecy

<sup>23</sup> De coz ze', nde' nab de coz gyibaa. Tees ni mod rlagy ñi gyacaacy ñi. Na de coz rishli nu yu' gyibaa dzi zir gun ily rlagy ñi niñ. <sup>24</sup> Gun Crisht wanchu'm nañ tub yu' yon nu bzaa mbecy. Yu' yon nu bzaa mbecy ze', nde' tub nab de coz rishli gyibaa. Tees Crisht ub la gyibaa gu'm. Ze' zum lo Ñgyooozh por cuen ni de ub na. <sup>25</sup> Na uz nu zu riiñ lo Ñgyooozh por cuen ni de mbecy Israeel, yu ze' rzu'y nañ cuart ze' nu blazha' zir lugaar yon. Tub ña'n ga rzu' nuy reñ bañcyug ze'. Tees Crisht wancuic mi ub mi par tub gun lo Ñgyooozh nu zañ tir gal nu b icy de yu ze'. <sup>26</sup> Gun benu ni, orze' rlagy ñi nu zañ tir gat mi nese nu bzub gyi' gyishlombecy. Tees na, ornu sñuu ga gya' lo tiem, orze' bruu sac mi tub tir zi'l par dela mbecy. Briic mi ub mi par tub gun lo Ñgyooozh par nu za' lom cyi de mbecy. <sup>27</sup> Na dela mbecy rlagy ñi nu gat dey tub tir zi'l, nunu despuees orze' gri bee Ñgyooozh ni dey. <sup>28</sup> Nunu ni' Crisht tub tir zi'l briic mi ub mi par tub gun lo Ñgyooozh par nu bza' lom cyi zigy mbecy. Orze' despuees gruu zac mi tuuba' tir, nunu nde' walaba' nu za' lom cyi de mbecy, sinu par nu co mbañ mi de mbecy nu rbez nu cyid mi.

**10** Gun leey ni Moisees nañ gal nu na tub sheñ de coz rishli. Coz ze', nde' de coz nap nu cyid par lo. Tees leey ze', nde' walab ub lañ, sinu sheñ zi'l ñi. Nunu nu nac leey ze', de ña'n la rbic dey de gun lo Ñgyooozh. Tees rila wac gyicy nap leey ze' de mbecy nu gyecha' lom nu nac gun nu rniiñ nu cuic dey,<sup>2</sup> gun benu ñgyicy cyi de mbecy nu driib zily Ñgyooozh nu nac gun ze', orze' wat lo dey nu nac ñii. Nunu checa dey nu cuic yu gun.<sup>3</sup> Tees de gun ze' ricy ñi nu de ña'n la yeza' lagy de mbecy de cyiy.<sup>4</sup> Gun reñ tor nu reñ chiib rila wac za' loñ cyi mbecy.

<sup>5</sup> Nde' nu ornu Crisht biid mi gyishlombecy ii, orze' nam rab mi Ñgyooozh:

Ru walagy ru nu cut mbecy bañcyug lor.

Ni walagy ru nu cuic dey gun lor,  
sinu bzu lily ru cuerپ nę.

<sup>6</sup> Ni wagyu' lagy ru nu rbic mbecy gun par nu gya' lo  
cyi dey.

<sup>7</sup> Orze' ya mneę lom: "Ñgyoozh, ii zu par nu gyicya gal  
nu rlagy ru.

Ii zu par nu gyicya gal nu bi caň lo gyicy nir nu gyi-  
cyä", mneę,

na Jesuuz. <sup>8</sup> Nu loga la mniim nu Ñgyoozh walagy mi  
de gun nu rbic mbecy. Walagy mi de bañcyug nu rbic  
dey lom. Walagy mi de bañcyug nu rcaa dey gyi par nu  
gya' lo cyi dey. Ni wagyedzu' lagy mi de nu nde'. Ni  
mniim mas rbic dey dela gun ze' gal nu rnii leey.

<sup>9</sup> Orze' niga mnii Crisht lo Ñgyoozh: "Ñgyoozh, ii zu par  
nu gyicya gal nu rlagy ru", nam. Orze' Ñgyoozh bzu  
chum mod nu briic dey gun gulas. Orze' bzu nap mi  
tuuba' mod cub. Mod ze', nde' mod ni gun ornu briic  
Jesuuz ub mi. <sup>10</sup> Como Jesucrisht b icy mi gal nu rlagy  
Ñgyoozh, orze' bya' lo dela cyi den nu nac nu tub tir  
zi'l briic mi cuerپ nim par tub gun lo Ñgyoozh.

<sup>11</sup> Na dela uz nu zu riiň lo Ñgyoozh de dzi la zu dey  
lom, nunu zaab rbic la dey laab laab zi'l gun ze' lo Ñgyoozh. Tees gun ze' rila wac za' loň de cyi. <sup>12</sup> Ze' Crisht  
tub zi gun briic mi par cyi den. Nunu gun ze' cyiiň ňi  
tub la. Gaze' nu gusub mi par yaa bee Ñgyoozh. <sup>13</sup> Ze'  
zub mi na nu rbez mi gashtal ornu gyicy Ñgyoozh nu  
gyub ic mi de losa' yuum. <sup>14</sup> Nu nac tub zi gun bzu nap  
mi de mbecy tub la, de yu nu bi bya' lo dela cyi.

<sup>15</sup> Nunu Espiriit Yon ni Ñgyoozh rbic mi nu gad lagy  
den laab ni' zi'l coz. Nu loga la nam:

<sup>16</sup> Shuaan der nam:

Ni mod za trat nu gyicy du de mbecy Israeel.

Ornu shuub dzi ze', ya gyicya nu caa ic dey de riidz nu  
rnęę.

Gyicya nu gad lagy dey ňi naň lardooy, na Shuaan  
der, na Espiriit Yon ni Ñgyoozh.

<sup>17</sup> Orze' gaze' nu nam:

Orze' wayeza' ga' lagya de cyi dey.

Wayeza' ga' lagya nu shiň b icy dey,  
nam. <sup>18</sup> Orze' ornu Ñgyoozh gyicy sulagy mi de cyi  
mbecy, orze' walagya'ñ gun par nu za' loň de cyi dey.

### Rlagy ňi gyecha' den lo Ñgyoozh

<sup>19</sup> Nde' nu der b icy na, na gac nu wadzib lagy la den  
nu chan ze' nu yon zir par de' zir lugaar nu nac nu  
pshuu reň Jesuuz. <sup>20</sup> Mi ze' b icy mi nu gad tub mod par  
nu ded den ro' negy ze' nu chu' den lo nu loo la gal lo  
Ñgyoozh. Mod ze', nde' tub mod cub. Nde' tub mod  
nu rbic gyel mbaň nu nac cuerپ ni Jesuuz. <sup>21</sup> Gun Jesuuz  
nac mi tub uz lily ni den. Mi ze' zum riiň nu riib ic mi  
naň yu' ni Ñgyoozh. <sup>22</sup> Orze' rlagy ňi nu gyecha' den lo  
Ñgyoozh, nunu gac den tub mbecy nu sac gyel rguu  
naň lardooy. Nunu ornu gyecha' den lom, orze' gyicy  
cup na consuel lom. Tees b icy caacy mi lardooy den,  
gun orze' wat lo den nu nac cyin. Nunu b icy caacy mi  
cuerپ ni den nu nis cacy nu bzu nis den. <sup>23</sup> Orze' rlagy  
ňi nu gzu fert den nu nac de coz ni Crisht nu rzeňa  
lagy den. Rlagy ňi nu cue' nu gyicy cyup ic den, gun

Ñgyoozh segur la gyicy yac mi de coz nu mniim nu gyi-  
cy mi. <sup>24</sup> Tub ga la den rlagy ňi nu rush den shcab nu  
nac losa'n ben a wad tub mod nu locyuub na dey par  
nu ca zir yu losa'y, nunu par nu locyuub na dey nu gyi-  
cy yu de coz nap. <sup>25</sup> Nunu walagy ňi nu checa den nu  
gyatublaazh na gal nu ricy la be mbecy. Lugaar nu  
checa den, rlagy ňi nu gric zir den baloor ni losa'n.  
Nunu briic zir der baloor ni dey como rad lagy der nu  
bi rgaab shuub dzi nu cyid Shuaan den.

<sup>26</sup> Gun sac reňa' gun par nu za' loň cyi den benu zaab  
gyicy nap la den cyi despuees ornu bi gu' lo den de coz  
rishi. <sup>27</sup> Gun benu ni gyicy den, orze' se tub zi la mod  
nu gac, nde' nu dzib den nu gzac den lo cashtig ily ni  
Ñgyoozh, nunu gzac den lo gyi ily nu nit lo de losa' yuum.  
<sup>28</sup> Na benu tub mbecy zay contr ni leey ni Moisees,  
nunu benu yu' tub cyup chon teshtig nu rniiy nu bzaac  
yu nu ni b icy yu, orze' washni lagy dey yu, sinu nii dey  
nu gat yu. <sup>29</sup> Benu ni, orze' dzi zir cashtig ily gad ni  
mbecy nu rzuub yaa I'ň Ñgyoozh. Dzi zir cashtig ily  
gad ni mbecy nu rgüi naaň lo reň mi, reň nu bzu nap  
trat nu b icy nu byacaacy yu. Dzi zir cashtig ily gad ni  
mbecy nu rnii zi ni Espiriit Yon ni Ñgyoozh, biň nu nap  
ricy nu de ub na. <sup>30</sup> Gun rad lagy den nu Shuaan den  
nam: "Nde' cuen ne ya nu ricä cashtig. Ya nacä biň nu  
gyabic i yu nu shiň ricy", nam. Nunu rniiň tuuba' se' nu  
nam: "Shuaan der ri beem ni de mbecy nim", nam.

<sup>31</sup> Dzi ga coz ily nu gyet lag den yaa Ñgyoozh mbaň!

<sup>32</sup> Orze' pcaa ic der mod nu bzac der gulas. Na bi gud  
lagy der de coz ni Ñgyoozh, orze' gugyee der nu gzac  
zir zaň lo coz. <sup>33</sup> Yu' mbecy lat der nu lo rgüi la zigy  
mbecy mnii zi mbecy ni dey, nunu shiň b icy nu dey yu.  
Yu' ga' mbecy lat der nu nac nuy de mbecy nu ni mod  
bzac zi ze'. <sup>34</sup> Orze' gushni lagy der de yu nu ri pres.  
Nunu ornu rboo mbecy suu der, orze' gugyee der,  
nunu gycit lagy der, gun rad lagy der nu gyibaa yu'  
coz nap zir ni der, coz nu rila waded ni. <sup>35</sup> Orze' cue'  
gac der mbecy dzidz, gun orze' gyad tub i der nu toná'  
la coz ily nu nac nu ricy cup der baloor. <sup>36</sup> Rlagy ňi nu  
gagye der, gun orze' gyicy der gal nu rlagy Ñgyoozh,  
nunu gyash yaa der de coz nu mniim nu segur la cuic  
mi ni der. <sup>37</sup> Gun de riidz nim rniiň:

Se ňuu zi zi tiem  
par nu cyid biň nu rlagy ňi nu cyid.

Wayicy gul lagy mi.

<sup>38</sup> Orze' Ñgyoozh nam:

Tees de yu nu byanap lo  
cui mbaň dey nu nac nu ricy cup dey consuel lo.

Tees benu ca nay gya' ich yu,

orze' wadzeel reňay, na Ñgyoozh,

rniiň. <sup>39</sup> Par de ub na a' nac den mbecy nu gya' ich. Ni  
a' nac den mbecy nu cha lo cashtig. Sinu nac den mbe-  
cy nu ricy cup consuel lom, mbecy nu gruu mbaň.

### Nu gyicy cup na consuel

**11** Nu gyicy cup den consuel, nde' laab ni' zi'l nu  
gad lagy den nu segur la gzac na de coz nu dr-  
ish ion. Nunu nu gyicy cup den consuel, nde' laab ni'  
zi'l nu gzu fert den nu nac de coz nu wacsac na. <sup>2</sup> De

gyitoo bel ni den nu gu' gulas, de yu ze' byedzu' lagy Ñgyoozh de coz nu b icy dey nu nac nu b icy cup yu consuel lom.<sup>3</sup> Nu nac nu ricy cup den consuel lom, orze' rad lagy den nu psa' lagy mi de lo la coz nu yu' gyishlombecy nu riidz nu rnii zi'l mi. Psa' lagy mi de coz nu rzac den, tees byaañ nu coz nu wansac den.

<sup>4</sup> Na Abeel, nu nac nu b icy cup yu consuel lom, briic yu tub gun nim nu nap zir gaze' gun nu briic Caiing. Nunu nu nac nde', Ñgyoozh b icy mi yu par tub mbecy nu sac falt ni. Nunu gush mi gun ze' niy. Nunu nu nac nu b icy cup yu consuel lom, gabee rlyuu y ni den mas bi gut yu.

<sup>5</sup> Na Enoc, nu nac nu b icy cup yu consuel lo Ñgyoozh, orze' Ñgyoozh byash mi yu, gun orze' cue' nu ñgyat yu. Orze' wangyad yu ca zay, gun Ñgyoozh ya num yu. Tees riidz ni Ñgyoozh rniiñ nu anzir nu gya num yu, orze' b icy yu nu byedzu' lagy mi loy.<sup>6</sup> Tees ni tub la mbecy wac gyicy yu nu gyedzu' lagy Ñgyoozh loy, be-nu wagyicy cup yu consuel lom. Gun cyu zi'l mbecy nu rlagy gyecha' lo Ñgyoozh, orze' rlagy ñi nu cheña lagy yu nu zum, nunu rlagy ñi nu cheña lagy yu nu benu yub yum, orze' gyabic mi iy.

<sup>7</sup> Na Noé, nu nac nu b icy cup yu consuel lo Ñgyoozh, ornu mniim loy nu gyicy cuidad yu de coz nu yad par lo, de coz nu nigul sac yu. Orze' bzuub gyidag yu nim. Orze' bzaay tub barc. Nañ barc ze' bruu mbañ yu nu dela famil niy. Nunu ni mod blyuu yu nu yu' falt ni dela mbecy nu yu' gyishlombecy. Nunu Ñgyoozh b icy mi yu par tub mbecy nu sac cyi nu nac nu b icy cup yu consuel lom.

<sup>8</sup> Na Abraham, nu nac nu b icy cup yu consuel lom, b icy yac yu nim ornu mniim nu ruuy ledz yu. Guay tub lugaar nu mnii Ñgyoozh nu segur la cuic mi niy. Bruuy ledz yu mas wangad lagy yu ca par chay.<sup>9</sup> Nu nac nu b icy cup yu consuel lom, pcyiiñ yu lugaar nu mnii Ñgyoozh nu segur la cuic mi niy. Pcyiiñ yu lugaar ze' mod nu rcyiiñ mbecy nu walab mbecy guledz. Pcyiiñ yu nañ yu' negy gal nu pcyiiñ Isaac, nu Jacob, nu de yu nu mnii ga' Ñgyoozh nu cuic mi laab lugaar ze' niy.<sup>10</sup> Gun Abraham blez yu tub gyedz nu bloo ic Ñgyoozh, tub gyedz nu bzaam, tub gyedz nu rila waded ni.

<sup>11</sup> Na Sara, nu nac nu b icy cup mi consuel lo Ñgyoozh, orze' guud mod nu gu' i'ñ mi mas tonal' la guush mi. Bi bded tiem nu gaal mi mdoo, tees bguu mi tub mdoo, gun guña lagy mi nu Ñgyoozh gyicy mi gal nu mniim.<sup>12</sup> Nde' nu mas Abraham bi zuy nu gat yu, tees ni mod guud zañ nez yu. Zañ dey. Gal nu zañ de bel baa ni zañ dey. Gal nu sheñ yu uzh nu nguaa ru' nisyudo ni' zi'l zigy dey byac yu. Waca' la lab na dey.

<sup>13</sup> Dela mbecy ze' gut dey, nunu wansac dey lo de coz nu mnii Ñgyoozh nu segur la cuic mi. Tees como b icy cup dey consuel lom, orze' gud lagy dey nu par lo guyu' ni riidz nim, nunu bet lagy dey. Nunu naal la mnii dey nu a' nac dey mbecy guledz gyishlombecy ii, sinu nac yu mbecy zu nez.<sup>14</sup> Gun de yu nu ni rnii, de yu ze' naal la rbic dey nu gad lagy den nu rded dey ryub yu tub lugaar nu gac ledz yu.<sup>15</sup> Wangash dey shcab nu nac lugaar ze' nu bruu dey. Gun benu ñgyash dey shcab,

orze' ñgyac mbish cya dey.<sup>16</sup> Tees rlagy dey tub lugaar nap zir par nu gac ledz yu. Rlagy dey tub lugaar gyibaa par nu gac ledz yu. Nde' nu Ñgyoozh wagat lom ornu rnii dey: "Ru Ñgyoozh ne", rnii dey, gun mi ze' bzu lily mi tub gyedz nu gac ni dey.

<sup>17</sup> Tiem nu b icy Ñgyoozh preb Abraham, pshet ic yu nu cuic yu i'ñ yu par tub gun lom nu nac nu b icy cup yu consuel lom. Bzu lily yu par nu cuic yu tub gun lom, mas mniim loy nu segur la ornu mniim:<sup>18</sup> "Nu nac Isaac chechu' de nez ru", nam.<sup>19</sup> Abraham b icy yu Ñgyoozh par tub biñ nu gyicy nu gyabañ de mbecy, mas bi gut yu. Nunu nde' nañ gal nu na nu Ñgyoozh ñgyabic mi Isaac ni uz yu ornu ñgyat yu.

<sup>20</sup> Nu nac nu b icy cup Isaac consuel lo Ñgyoozh, mniy lo Jacob nu lo Esaú nu lac gyicy nu Ñgyoozh dey par lo.

<sup>21</sup> Nu nac nu b icy cup Jacob consuel lom, mniy lac gyicy num de i'ñ See. Ni b icy yu ornu bi rgaab gat yu. Nunu briib zily yum lat nu bzaab tiily yu lo yangay.

<sup>22</sup> Nu nac nu b icy cup See consuel lom, ornu sñuu ga gat yu, bzat yu tiem nu gruu de mbecy Israeel lo yu ni Egipto. Nu nac nu b icy cup yu consuel lom, bzeeñ yu tub riidz niy lo de losa'y. Orze' mniy lo dey lac gyicy nu dey rit yu.

<sup>23</sup> Nu nac nu b icy cup de uz Moisees consuel lom, orze' pcach dey yu nañ tub chon beey despuees ornu gul yu. Gun bzaac dey nu yalagy nay nunu wanchib dey lo rey Faraón. Wansuub gyidag dey ni de riidz niy, nu mniy nu cut dey de mdoo gyeey.

<sup>24</sup> Nu nac nu b icy cup Moisees consuel lom, ornu bi guush yu, wansaan yu nu nii mbecy nu nac yu i'ñ fiñ feñ ni rey Faraón.<sup>25</sup> Guziiy nu nap zir nu zac zi nuy de mbecy ni Ñgyoozh, gaze' nu gyicy yu gusht nu nac coz cyi par ñuu zi zi tiem.<sup>26</sup> Mnii tooy nu benu mbecy güii naañ dey loy nu nac Mesías, biñ nu cyid par lo, orze' dzi zir sac ñi gaze' dela gyel nap ni Egipto, gun pcaa ic yu iy nu gyabic Ñgyoozh par lo.<sup>27</sup> Nu nac nu b icy cup yu consuel lom, bruu y Egipto. Wanchib yu ornu guzi lagy rey Faraón. Sinu bzu fert yu nu nac coz nu b icy yu. Bicy yu gal nu ricy tub mbecy nu gzac lo Ñgyoozh, biñ nu wacsac na.<sup>28</sup> Nu nac nu b icy cup yu consuel lom, bzu yey sa' ni Pas, nunu pcaay de mbecy nu ta'y reñ lo yaro', gun orze' anc nu cut de mbecy ze' wut yu de mdoo gyeey loga ni de mbecy Israeel.

<sup>29</sup> Nu nac nu b icy cup de mbecy Israeel consuel lom, orze' bded dey lo nisyudoo ña lo yu wach. Orze' de mbecy Egipto b icy pee ga' dey nu ni ñgyicy yu. Orze' de yu ze' gut dey lo nis.

<sup>30</sup> Nu nac nu b icy cup de mbecy Israeel consuel lo Ñgyoozh, orze' ornu blazh b icy dey marchaar gag y dzib dub yub la ich lo' nu rsoow ru' gyedz Jericó, orze' wes saa lañ.<sup>31</sup> Nu nac nu b icy cup tub biñ congal nu la Rahab consuel lo Ñgyoozh, orze' wancut dey mi ornu biit dey de' zir mbecy wangyeñ, gun Rahab bredz mi de yu nu gua tu' cuen por cuen ni de mbecy Israeel nu cha dey yu'm.

<sup>32</sup> Walagy ñi nu neq zira. Sac tiem par nu zata Gedeón, par nu zata Barac, par nu zata Sansón, par nu

zata Jefté, par nu zata Dabi, par nu zata Samueel, par nu zata de yu nu mnii por cuen ni Ñgyoozh. Sac tiem nu zata de yu ze' lor.<sup>33</sup> Tees nu nac nu b icy cup dey consuel lo Ñgyoozh, gu' dey gyel yuu, nunu b icy dey gan bee nasyoong la. B icy dey gyel fushtiz gal nu rlagy ñi. Ñgyoozh briic mi de coz nu mniim nu segur la cuic mi ni dey. Psoow dey ru' biidz.<sup>34</sup> Psu dey gyi ily. Bruu chu dey lo mbecy nu ngulagy nu ñgyut dey nu mandzicy. De yu nu gugyidz byafert dey. Nunu lily na dey lo gyel yuu. B icy dey gan bee nac gaa la soldad nu nac losa' yuuy.<sup>35</sup> Nu nac nu b icy cup de biñ mñaa consuel lo Ñgyoozh, orze' byabañ famil nim ornu gut yu.

Yu' ga' dey nu pshet zi mbecy yu gal gut lay. Wan-shet ic dey nu laa mbecy yu, gun orze' ornu gyabañ yu, orze' cyiñ yu tub mod nu nap zir.<sup>36</sup> Yu' nu mnii zi mbecy ni dey. Yu' nu bgaaz mbecy dey nu cuart. Yu' nu pca cuuñ mbecy dey nu caden, nunu pshet lag dey yu nañ yu' gyiib.<sup>37</sup> Yu' nu bgoow gyita' dey yu. Yu' nu b icy cyup la' mbecy dey nu sier. Yu' nu biit mbecy dey nu mandzicy. Yu' nu gusa dey nu shab yu nu byaa nu gyid shily o nu gyid chiib. Yu' nu nac dey mbecy zi. Yu' nu psheed zi mbecy dey. Yu' nu b icy ras nu mbecy dey.<sup>38</sup> A' yad ñi ni cualcyer la mbecy gyishlombecy ii nu chesa de mbecy nap ze' lat dey. Tees gusa dey gal gusa de mbecy zu nez. Gusa dey lugaar ub zi, nunu gusa dey too b icy. Pcyiñ dey gyeegy nu bduuñ dey lo yu, nunu pcyiñ dey nañ blyuu.

<sup>39</sup> De yu ze', mas byedzu' lagy Ñgyoozh lo dey nu nac nu b icy cup dey consuel lom, tees wansac dey lo coz nu mniim nu segur la gyicy mi.<sup>40</sup> Gun Ñgyoozh bloo ic mi tub mod nu nap zir par de ub na. Mod ze', nde' nu gyicy nap mi dey nu de ub na.

### Ca gaa la ic den Jesucrisht

**12** Nde' nu como tona' la mbecy zigy blyuu dey ni den de coz nu bzac dey nu nac Crisht, orze' nde' nu rlagy ñi zu chu den dela coz nu ricy ñi nu wagac gyicy paa den, nunu rlagy ñi loo chu den dela cyi nu ricy mandaar de ub na. Rlagy ñi nu loo lo den gal nu rboor lo de mbecy ornu rash dey carer.<sup>2</sup> Rlagy ñi nu ca gaa la ic den Jesuuz. Mi ze' blyuum ni den lac mod gyicy na nu nac de coz nu b icy mi. Nunu b icy yac za' lam nu de coz nu rlagy Ñgyoozh. Gut mi lo cruu. Wangyicy cuen lam ti to' lo gut mi, gun rad lagy mi nu ornu laz hzac zim, orze' chesu cyit lagy mi. Orze' gusub mi par yaa bee Ñgyoozh ze' nu riib ic mi.

<sup>3</sup> Orze' gush der shcab nu nac de coz nu bzac mi. Tona' la guzi lagy de mbecy cyi lom, tees gugyeem. Orze' nde' nu gush der shcab nu nac mi, gun orze' cue' nu gatsiñ der, nunu cue' shi'ñ der baloor.<sup>4</sup> Gun lat nu za der contr ni de cyi nu ricy mbecy, nigul coo lo der gashtal gat lar.<sup>5</sup> ¿A mnit lagy der consef nu briic Ñgyoozh ni der como i'ñ mi nac der? De riidz ze' rniiñ:

Orze' Ñgyoozh nam:

I'ñä, cue' shi'ñ der baloor ornu rdza'm ni der. Shuaan der nir ornu rshuu num der.

Ni cue' shi'ñ der baloor ornu rdza'm ni der.

<sup>6</sup> Gun benu Shuaan ru rcam tub mbecy,

orze' rshuu num yu.

Nunu cuic mi cashtig ni de mbecy nu gyash mi par nu gyac dey i'ñ mi, nam, rniiñ.<sup>7</sup> Orze' gugyee der ornu rzac zir, gun Ñgyoozh gyicy num der gal nu ricy num tub i'ñ mi, gun sac la tub yu nguzh nu washuu nu uz yuy.<sup>8</sup> Benu washuu num der gal nu ricy num dela i'ñ mi, orze' walab i'ñ nap mi nac der, sinu i'ñ gyish zil nac der.<sup>9</sup> Na de uz den nu yu' gyishlombecy ii, de yu ze' rbic yu cashtig ni den, nunu rca lagy den loy. Orze' dzi zir ricy ñi presis nu "O" nii der ni uz na nu Zub gyibaa, gun orze' cui mbañ den.<sup>10</sup> Na de uz na nu yu' gyishlombecy ii, rbic dey cashtig ni den dub gal lac rnii too dey nu nap par ñuu zi zil tiem. Tees Ñgyoozh, ornu rshuu num den, nde' tub coz nap par de ub na, gun orze' gac den mbecy cacy gal nu caacy ub mi.<sup>11</sup> Tiem nu rzac den lo cashtig ze', shni rzac den rziin, nunu walab nu yet lagy den. Tees despuees orze' de yu nu pshuu num ze' gyad i dey. I dey ze', nde' nu cyiñ dey nu gyel ri zu, nunu cyiñ dey mod nu rlagy ñi.

### Nez nu li byub der char

<sup>12</sup> Orze' de coz ni Crisht, nde' nañ gal nu na tub coz nu psuun ñi der. Orze' yaa gutsiñ der, briic der fers niñ. Nunu tib gut siñ der briic der fers niñ.<sup>13</sup> Nunu nez nu li byub der char, gun orze' gyi'r nu byatis ze' gyanap ñi lugaar nu gyatis zir ñi.

<sup>14</sup> B icy der nu nap chu' der nu losa'r, nunu b icy der nu chu' der nu gyel cacy, gun ni tub la mbecy wazac yu lo Ñgyoozh benu a' nac yu mbecy cacy.<sup>15</sup> B icy cuidad der nis ruu su tub mbecy lat der nu wazac yu lo de coz nap nu leew la ricy nu Ñgyoozh de ub na. Nunu b icy cuidad der nis gyac der gal nu na tub gyish lya. Ornu laz hgal yñi, orze' gyicy ñi day nu zañ mbecy nu benen niñ.<sup>16</sup> B icy cuidad der nu ni tub la der cue' gal ru mbecy nu wanchelaar. Nunu b icy cuidad der nu ni tub la der cue' zat naañ der coz nu druu lo Ñgyoozh. Gun Esaú ni b icy yu. Biit yu dela coz nu yad ñi nu gad niy nu nac yu i'ñ loga par tub zi comid.<sup>17</sup> Orze' rad lagy der nu despuees ngulagy yu nu nii uz yu nu nap gyicy nu Ñgyoozh yu, tees bzuub yaa uz yu rishniiy, gun mas biñ lay nu byub yu mod nu ñgyicy nap yu coz nu b icy yu, tees wangada' mod.

<sup>18</sup> Na de ru wangyicy der gal nu b icy de mbecy Israael ornu becha' dey b icy Sinaí. Becha' dey lo tub coz nu gac bzaac dey. Becha' dey b icy Sinaí, ze' nu rca gyi ily, nunu ze' nu cow, lugaar shni, ze' nu druu bi ily.

<sup>19</sup> Becha' dey ze' nu rdulaa trumpet. Becha' dey ze' nu zaab ti' Ñgyoozh nu rniiñ. Becha' dey lugaar ze'. Orze' ornu de mbecy zigy güeñ dey nu rnii Ñgyoozh, orze' mnishbaa dey lom nu cue' ga' niim.<sup>20</sup> Gun wangagyeey dey ornu güeñ dey nu rniiñ ornu nam: "Mas gal tub bañcyug, benu zuub gyi' ma too b icy ii, orze' rlagy ñi goow gyita' dey ma gal gat la ma o rlagy ñi nu cut dey ma nu yag too lyuch", nam.<sup>21</sup> Tanta' nu coz ily bzaac dey. Mas Moisees nay: "Rash la bisä tanta' nu rdziba", nay.

<sup>22</sup> Ze' na de ru becha' der b icy Sión, gyedz ni Ñgyoozh mbañ, gyedz Jerusaleeng nu ri gyibaa. Becha' der ze' nu yu' anc zigy tona' la. <sup>23</sup> Becha' der ze' nu yu' tublaazh de i'ñ Ñgyoozh, de yu nu ca nu la gyibaa. Becha' der lo Ñgyoozh, biñ nu gri bee ni dela mbecy. Becha' der lo de espiriit ni de mbecy nap nu gu' gulas, de yu nu byanap lo Ñgyoozh. <sup>24</sup> Becha' der lo Jesuuz, biñ nu bzu tub trat cub. Becha' der lo reñ mi, reñ nu b icy caacy de ub na. Reñ Abeel mniiñ nu rlagy ñi cashtig, tees reñ Jesuuz nap zir rniiñ.

<sup>25</sup> Orze' b icy cuidad der nu cue' zuub yaa der rishnii biñ nu rnii nu den. Gun de yu nu bzuub yaa riidz nu mnii Ñgyoozh gyishlombecy ii ornu mniim lo dey nu gyicy cuidad dey, de yu ze' wangac ndruu dey lo cashtig. Benu ni, orze' segur la wac ruu chu den lo cashtig, benu zuub yaa den biñ nu gashtal gyibaa rnii nu gyicy cuidad den. <sup>26</sup> Tiem ze' ornu mniim, b icy mi nu pcueñ la gyishlombecy ii, tees na rnii loon: "Stub tir ya cueña gyishlombecy, nunu ni' zi'l cueña gyibaa", nam. <sup>27</sup> Ornu mniim "Stub tir", orze' naal la rabee nu de coz nu psa' lagy mi, cueñ mi ñii. Orze' co chum de coz nu rcueñ, gun orze' de coz nu wacueñ, gyiyeeñ ñi. <sup>28</sup> Tees gyel gubier ni Ñgyoozh nu rbic mi ni den, nde' coz nu wacueñ. Nde' nu gyicy den graseer ni Ñgyoozh, nunu griib zily den mi tub mod nu gyedzu' lagy mi. Ca lagy den lom, nunu dzib na lom. <sup>29</sup> Gun Ñgyoozh, biñ nu nac du den, mi ze' nam gal nu na tub gyi nu rnit lo.

### Lac mod gyicy na coz nu rlagy Ñgyoozh

**13** Rlagy ñi tub ga la der zaab ca zir der de b icy ru nu nac Crisht. <sup>2</sup> Cue' nit lagy der nu nii nur de mbecy nu walab mbecy guledz nunu cha nu der yu yu'r. Yu' mbecy ornu ni b icy dey mas wangad lagy dey cyu, tees mas anc briic dey yu' chu'y. <sup>3</sup> Ca ic der de yu nu yu' nañ yu' gyiib. B icy der nu ri ga' der nañ yu' gyiib nur dey. Ca ic der de yu nu rzac zi, gun ni' de ru ricy cup der tub cuerpa nu rzac zi. <sup>4</sup> Dela mbecy rlagy ñi nu ca lagy yu lo compromis nu ricy yu ornu rchelaay. Nunu rlagy ñi gyicy paa de mbecy nu rchelaa ze' nu losa'y, gun Ñgyoozh cuic mi cashtig ni de mbecy nu ral losa' nu wanchelaa.

<sup>5</sup> Cue' ca der tiñ. Nunu gush der shcab nu beñ ca na la nu ricy cup der. Gun Ñgyoozh nam: "Ya rila wazeeña ru, nunu rila wazaana ru", nam. <sup>6</sup> Orze' wadzib la den gac niin tub riidz. Nde'

Shuaan den,  
mi ze' biñ nu locyuub ya.

Orze' rila wadziba,

gun se la la coz gac gyicy nu mbecy ya

rniñ. <sup>7</sup> Pcaa ic der de yu nu byub ic ru gulas, de yu nu pshaal riidz ni Ñgyoozh lo der. Gush der shcab nu nac de coz nap nu gac par nu nac nu pcyiñ dey gyishlombecy, nunu gush der mod nu gusa dey ornu gusa nu dey Crisht. <sup>8</sup> Jesucrisht laab mi naag, nunu laab mi na, nunu laab mi par tub la. <sup>9</sup> Orze' cue' rruu chu der lo de coz nu laab ñi nu nac zañ lo riidz nu

gareñ za nu rlyuu mbecy. Nap zir nu zu fert den nañ lardoon. Ni gyicy den nu nac faboor nu leew la ricy Ñgyoozh, walab nu nac nu gyicy den tub mod nu ta na nu de coz nu don. De yu nu ricy mod nu ta ze' rila wanruu nap dey nu nac ñii.

<sup>10</sup> De uz nu zu riiñ nañ yu' negy nu briib zily de mbecy Israael Ñgyoozh rila sac rishbeey nu dugyi dey de gyel nap nu rad nu nac gun ni de ub na nu gua lo Ñgyoozh. <sup>11</sup> Tees uz nu rza lo Ñgyoozh por cuen ni de mbecy Israael, yu ze' rza nuy reñ bañcyug lugaar ze' nu yon zir par de' zir lugaar. Gun orze' cuic yu reñ ze' par nu cyib ñi de cyi de mbecy. Tees cuerpa ni bañcyug ze' rcaa dey gyiñ gal zet ru' gyedz. <sup>12</sup> Nde' nu ni' Jesuuz gut mi zet ru' gyedz. Gut mi par nu cyib mi cyi mbecy nu nac reñ mi. <sup>13</sup> Orze' gal nu mi ze' gut mi zet ru' gyedz, ni' rlagy ñi ruu chu den lo mod nu ricy de' zir mbecy. Gun gal nu mi ze' bruu gyel mbecy nim ornu gut mi, orze' ni' zi'l de ub na shet ic na nu gruu gyel mbecy nin nu nac mi. <sup>14</sup> Gun gyishlombecy ii sac tub gyedz nu chu' den tub la, sinu ryub den tub gyedz nu gruu zac par lo. <sup>15</sup> Nde' nu rlagy ñi nu dub laa tiem gyabic den gyel mbecy ni Ñgyoozh nu nac Jesucrisht. Nde' gun nu rlagy ñi gric den nim. Gun ze' dric den nim nu ru' den ornu rzat nam. <sup>16</sup> Cue' nit lagy der nu nap gyicy ru. Nunu tub ga la der blocyuub der losa'r, gun nde' tub gun nu gyedzu' lagy Ñgyoozh.

<sup>17</sup> Bzuub gyidag der ni de yu nu riib ic der, nunu "O" nii der ni de riidz nu rnii dey, gun dey ze' rña dey de ru. Nunu rad lagy der nu de yu ze' zeed cuen dey lo Ñgyoozh nu nac coz nu ricy yu. B icy der nu dub gusht la gyicy dey riiñ nim. Cue' nu shni gyicy dey riiñ nim, gun benu ni, orze' wac locyuub dey de ru.

<sup>18</sup> Zaab cyiñ la der lo Ñgyoozh nu nac ya. Gun segur la de ub na wat lo den nu nac de coz nu ricy na, gun dub laa tiem rlagy den gyicy na mod nap. <sup>19</sup> Nunu ya rnishbaq lo der nu fert cyiñ der lo Ñgyoozh ne, gun orze' yap gyiilya lo der.

### Nu rgyiñ yu lo Ñgyoozh nu nac dey

<sup>20</sup> Orze' Shuaan den Jesuuz nac mi biñ lily nu rña de mbecy nu nac shily nim nu nac reñ mi nu bzu nap trat ni Ñgyoozh nu rila waded ni. Orze' Ñgyoozh, biñ nu rbic gyel ri zu, mi ze' b icy mi nu byabañ Jesuuz. <sup>21</sup> Orze' mi ze' cuic mi la zi'l coz nu galagy ñi ni der par nu gyicy der gal nu rlagy mi. Nunu gyicy mi nu gyicy der de coz nu gyedzu' lagy mi nu nac Jesucrisht. Mi ze' ricy cup mi gyel lily tub la! Laab ni gac ñii!

<sup>22</sup> Der b icy na, ya rnishbaq lo der nu pasęz zuub gyidag der de consef nu ricä ni der, gun gyicy nu pçaa ii, nii tub gyicy mi'. <sup>23</sup> Ya rlagya nu gad lagy der nu b icy na Timoteo, bi bruuy nañ yu' gyiib. Benu cyid gyiily yu, orze' yap du yu ornu yap güij de ru.

<sup>24</sup> Ya zeeda ñgyoozh ni de yu nu riib ic lat der, nunu zeeda ñgyoozh ni dela mbecy ni Ñgyoozh. De mbecy Italia zeeda' dey ñgyoozh ni der. <sup>25</sup> Ñgyoozh gyicy mi faboor nu nap gyicy num dela der.

# Santiago

**1** Ya Santiago, tub yu nu ricy coz nu rnii Ñgyoozh  
nunu coz nu rnii Shuaan den Jesucrisht. Shnu de  
ru, de trocyup nac nez de mbecy Israeel nu brush las  
dutuub la gyishlombecy.

## Shcab nu druu lo Ñgyoozh

**2** De ru bicya, gush der shcab nu dzi ga nap ornu  
gzac der lo de lo la preb, **3** gun rad lagy der nu ornu  
gyicy der gan de preb ze' nu nac nu ricy cup der consuel  
lo Ñgyoozh, orze' gac der mbecy nu gagye. **4** Bicy  
der nu gagyer, gun orzel' gyanap za' la der. Nunu orze'  
gac der mbecy nu bi gul shcab ni, nunu gac der mbecy  
nu wagycy falt ni tub la coz ni.

**5** Na benu ca na der sac shcab nir, orze' rlag yñi nu  
cyiñ der ñii lo Ñgyoozh. Orze' mi ze' cuic mi shcab ni  
der, gun Ñgyoozh cuic za' lam shcab ni mbecy, nunu ni  
wayicy tañ mi ornu ni cuic mi. **6** Ornu cyiñ der lom,  
orze' rlag yñi nu gyicy cup der consuel lom, nunu rila  
walagy yñi nu nii too der nu dzi ga wayicy mi gal nu nii  
der. Mbecy nu ni nii too, yu ze' nay gal nu na nguuly ni  
nisyudoo. Bi rza nuñ yñi par re par ii la. **7** Yu nu ni na,  
cue' la sa' lagy yu nu gad coz nu gruu lo Ñgyoozh niy.  
**8** Gun na la rnii tooy tub coz. Ina reña' coz bi rnii ga'  
tooy. Orze' a' fert yu nu de coz nu ricy yu.

**9** Na de bicy na nu shni yu', rlag yñi nu gyet lagy yu  
ornu ricy zily Ñgyoozh yu. **10** Nunu de bicy na nu  
guani'ñ, rlag yñi nu gyet lagy yu ornu Ñgyoozh niim  
loy nu se la la sac yu. Gun yu guani'ñ nay gal nu na tub  
gyee ni gyish, gun wagagyee tuñ yñi. **11** Gun ornu driib  
doo, orze' yet nu zig, orze' rawach gyish ze'. Orze' rlag  
gyee niñ. Orze' nit lo nu cyit nañ. Ni' zi'l yu guani'ñ ded  
niy lat nu rded yu daljez niy.

## Zu mbecy shcab ti gyicy yu coz cyi

**12** Dzi ni de mbecy nu ragyee ornu rac preb yu, gun  
ornu gyicy yu gan de preb ze', orze' Ñgyoozh gyabic  
mi iy. Iy ze', nde' nu cui mbañ dey nuy mi tub la. Nde'  
tub i dey nu mniim nu segur la cuic mi ni dey benu rca  
dey mi. **13** Benu ca na mbecy nii tooy nu gyicy yu coz  
cyi, orze' cue' niiy nu: "Ñgyoozh bicy mi nu ni rnii toq",  
niiy. Gun Ñgyoozh rila wagnii toom ti gyicy mi cyi.  
Nunu ni wagycy mi nu nii too mbecy nu gyicy dey cyi.

**14** Sinu de coz a' nap nu yu' nañ lardoo mbecy ricy yñi  
nu rlag yu shiñ gyicy yu. Nde' nu rnii too dey nu gyicy  
yu cyi. **15** Na ornu cuic dey lugaar nu shiñ gnii tooy,  
orze' nde' gyicy yñi nu ricy dey cyi. Nunu ornu bi gubee  
dey nu ricy yu cyi ze', orze' nde' gyicy yñi nu wazaca'  
dey lo Ñgyoozh, nunu gat dey.

**16** Der bicy ya, cue' zaan der nu gadzar. **17** Dela coz  
nap nunu dela coz nu sac falt ni nu bi rad ni den, dru  
uñ gal gyibaa. Druuñ gashtal lo la Ñgyoozh, Uz na, biñ  
nu psa' lagy dela gyi nu ta' baa. Mi ze' rila wadza nu  
nam ni ñu miiñ la. **18** Briic mi gyel mbañ ni den nu nac  
riidz rishli nim, gun nde' coz nu ub mi rlag yu. Nunu  
orze' na den gal nu na cosech nu pte'm loga la lo dela  
coz nu psa' lagy mi.

## Mod nu chu' mbecy ni Ñgyoozh

**19** Nde' nu na der bicy na, pcaa ic der de coz nu rnëe  
lor. Tub ga la der rlag yñi nu zu der altant par nu zuub  
gyidag der ni de riidz nu rdunii. Tees guly gzu der par  
nu niir, nunu gulya' gzu der par nu cha' ic ru. **20** Gun  
gyel cha' ic ni mbecy rila wayicy yñi coz nu gyedzu' lagy  
Ñgyoozh. **21** Nde' nu bzaan der dela coz bag, nunu bza  
an der dela cyi nu dzi bded ru' ga' la ricy der. Nunu "O"  
mnii der ni de riidz nu bzeeñ Ñgyoozh nañ lardoor. Ri  
idz ze' cyiñ yñi gyicy yñi nu gruu mbañ der.

**22** Cue' nu zuub gyidag zi'l der riidz nim, sinu ni' zi'l  
rlagy yñi nu gyicy yac der niñ. Gun benu nu zuub  
gyidag zi'l der ñii, orze' laab ub zi'l der rguur ub ru.

**23** Gun cyu zi'l mbecy nu rzuub gyidag zi'l de riidz ze',  
ze' wagycy yac yu niñ gal nu rniiñ, orze' yu ze' nay gal  
nu na tub mbecy nu rgüiñ lo nu tub guan. **24** Na ornu  
lazh güiñ loy la nay, orze' nez za zi'l yu bi mniita' lagy  
yu la nay. **25** Tees yu' mbecy nu wagnit lagy yu de coz  
nu reñ yu. Sinu nap zir rgu' cuen yu de leey ni Ñgy  
oozh nu sac falt niñ, de leey nu gyicy nu gruu chuy lo  
cyi. Nap rsya'y leey ze', nunu ricy yac yu niñ. Orze'  
Ñgyoozh gyicy mi nu gruu nap de coz nu ricy mbecy  
ze'.

**26** Benu tub mbecy rash yu shcab nu ricy yac yu de  
coz nu rlag yu Ñgyoozh, tees wagac gyub ic yu de coz nu  
rniiy, yu ze' rguuy laab ub yu. Nunu se la la sac yñi niy  
mas ricy yu coz nu rlag yu Ñgyoozh. **27** Par Ñgyoozh, Uz  
den, i mod rlag yu gyicy mbecy benu rlag yu mod nu  
se'ñ nunu mod nu rishli: orze' rlag yñi nu locyuub dey  
de yu nguzh zi nu sac uz. Nunu rlag yñi nu locyuub dey  
de byud ornu deet rzac mi. Nunu rlag yñi nu cue' shet  
ic dey nu gabag yu ni de cyi nu yu' gyishlombecy ii.

## Tub zi'l mod gyicy nu der dela mbecy

**2** Der bicya, como ricy cup der consuel lo Shuaan  
den Jesucrisht, biñ nu dzi lily na, walagy yñi nu reñ  
ga la mod gyicy nu der tub ga mbecy dub gal nu na  
dey. **2** Gyicy pee lan lat nu yu' tublaazh der ru'ña tub  
mbecy guani'ñ gal nu tub mbecy zi. Mbecy guani'ñ ze'

ri tub bi' or yaay nunu cyit na shab yu. Ze' mbecy zi ze' cuiñ shab yu.<sup>3</sup> Orze' nap ricy nu der yu nu nap na shab ze'. Orze' nii der gab ruy: "Ii bzub tub lugaar nap", niir. Ze' orze' nii ga'r gab ru mbecy zi ze': "Bzu la ñuu ze' ga, o bzub la mas ñuu lo yu la ii", nii der.<sup>4</sup> Benu ni gyicy der, orze' reñ ga la mod ricy nu der tub ga losa'r, nunu nu nac nu shiñ rnii too der, orze' rcui der mbecy nu rnii nur.

<sup>5</sup> Der bicy na, bzuub gyidag der. Ñgyoozh bicy mi nu de mbecy nu gyel zi zu gyishlombecy ii, de yu ze' guani'ñ dey nu nac nu dzi ricy cup dey consuel lom, nunu gyicy mi nu chu' dey lat de mbecy nu riib ic mi, gun nde' gyel nap nu mniim nu segur la cuic mi ni dela mbecy benu ca dey mi.<sup>6</sup> Tees de ru rboor gyel mbecy ni de mbecy zi. ¿A walab nu de mbecy guani'ñ, de yu ze' ricy yu nu deet rzac ru? ¿A walab de yu ze' rza nu dey de ru lo de fushtiz?<sup>7</sup> ¿A walab de yu ze' yu nu rnii zi ni Jesucrisht, biñ nu ryat zi mbecy ornu ryat zi dey de ru?

<sup>8</sup> Benu gyicy yac der gal nu rnii leey zub lo ni Ñgyoozh, ze' nu rniiñ: "Pca der losa'r gal nu rcar ub ru", rniiñ, benu ni ricy der, orze' nap.<sup>9</sup> Tees benu reñ ga la mod gyicy nu der mbecy dub gal nu nay, orze' ricy der cyi, nunu yu' falt ni der par lo leey ni Ñgyoozh.<sup>10</sup> Gun benu tub mbecy rzuub gyidag yu ni dela coz nu rnii leey, ze' grusu tub coz nu wazuub gyidag yu, orze' yu ze' yu' falt niy nu dela leey.<sup>11</sup> Gun Ñgyoozh rniiñ: "Cue' gal ru mbecy nu wanchelaar", rniiñ. Nunu laab mi rniiñ: "Cue' cut ru losa'r", rniiñ. Orze' benu tub mbecy nu wagal losa' nu wanchelaa, ze' cut yu losa'y, orze' yu ze' nac yu tub yu nu yu' falt ni par lo leey.

<sup>12</sup> Orze' bicy cuidad der nu de coz nu gyicy ru, gal nu de coz nu nii der, gun Ñgyoozh ri beem ni der mod nu rnii leey nu b icy nu bruu chu den lo de cyi.<sup>13</sup> Tees benu de mbecy wagashni lagy dey losa'y, orze' ni' Ñgyoozh washni lagy mi dey ornu gri beem niy. Tees de yu nu rashni lagy losa' gruu nap dey tiem nu gri beem ni dey.

### De coz nu ricy mbecy nde' gyicy ñi nu gad lagy na ti ricy cup yu consuel

<sup>14</sup> Der bicy na, ¿la ñuu cyiiñ ñi benu tub mbecy rniiñ nu ricy cup yu consuel lo Crisht, ze' wagiyicy yu ni tub la coz nap? ¿A gac gruu mbañ yu nu nac nu ricy cup yu consuel lom benu ni mod ricy yu? Rila wac gruu mbañ yu.<sup>15</sup> Gyicy pee lan grusu tub b icy na o tub zan na nu sac shab dey o nu sac coz nu gow dey.<sup>16</sup> Benu nii der: "Gua na, nunu Ñgyoozh gac num ru; pcha' lagy ru na, nunu bdow nap", nii der, orze' ¿la cyiiñ ñi? Benu wabic der de coz nu galagy ñi ni dey par nu zu nap lagy yu, orze' nde' se la la cyiiñ ñi.<sup>17</sup> Orze' benu consuel zi'l gyicy cup na lo Crisht par wacabee ti nap ricy na, orze' consuel nu ricy cup na lom ze', nde' nañ gal nu na tub coz gut.

<sup>18</sup> Tees cyup ridz grusu mbecy lat der nu niy: "Ru ricy cup ru consuel. Ze' ya ricya coz nap", niy. Orze' ru rila wac gyicy ru nu cheña lagya nu ricy cup ru consuel lo Ñgyoozh benu se la la coz nap ricy ru. Tees ya gac gyi-

ya nu cheña lagy ru nu ricy cupa consuel lom nu nac de coz nap nu ricya.<sup>19</sup> ¿A zeña lagy ru nu zu tub zi Ñgyoozh? Dzi ga nap benu ni zeña lagy ru, tees ni' de nuras zeña lagy dey nu zu tub zi Ñgyoozh. Nunu rash la bis dey nu tanta' rdzib yu.<sup>20</sup> ¡Mbecy ton! ¿A rlagy der lyuu nir nu benu ricy cup der consuel lom, par wacabee ti nap ricy ru, orze' se la la cyiiñ ñi nu ricy cup ru consuel lom?<sup>21</sup> Ñgyoozh bicy mi Abraham gyitoo bel ni den par tub mbecy nap nu nac de coz nap nu b icy yu ornu pshet ic yu nu cut yu i'ñ yu Isaac par tub gun lo mez ni gun nim.<sup>22</sup> Orze' Abraham cyup coz nu b icy yu. Bicy cup yu consuel lom, nunu b icy yu coz nu rlagy mi. Nunu rabee nu rishli b icy cup yu consuel lom nu nac de coz nu b icy yu.<sup>23</sup> Orze' guc ñi gal nu rnii riidz ni Ñgyoozh ze' nu rniiñ: "Abraham b icy cup yu consuel lo Ñgyoozh, nunu nu nac nde' Ñgyoozh b icy mi yu par tub mbecy nap", rniiñ. Nde' nu rnii dey, "Abraham, yu ze' nac yu amig ni Ñgyoozh", rnii dey.

<sup>24</sup> Orze' rad lagy den nu mbecy gyanap dey lo Ñgyoozh nu nac de coz nap nu ricy yu, walab tub lo zi'l nu nac nu gyicy cup yu consuel lom.<sup>25</sup> Ni' zi'l mod bzac tub biñ congal nu la Rahab. Byanap mi lo Ñgyoozh nu nac de coz nu b icy mi ornu briic mi yu' nu gu' de mbecy Israeel, nunu blocyuub mi dey ornu briic mi reña' nez nu briib dey dze ga.<sup>26</sup> Orze' benu tub cuerpa sac espiriit niñ, orze' nde' tub cuerpa gut. Ni' zi'l nu gyicy cup den consuel lo Crisht, nde' nañ gal nu na tub coz gut benu wacabee ti coz nap ricy den.

### Lyudz mbecy

**3** Der bicy na, walagy ñi nu dzi zañ der gac ru moscuel, gun bi rad lagy der nu ya nu de moscuel ta zir gyicy nu Ñgyoozh de ornu gri beem ne de.<sup>2</sup> Dela den zañ tir radzan. Benu tub mbecy wagadzay nu nac de riidz nu rniiy, orze' yu ze' sac la falt niy. Gac gyub ic yu dutuub la cuerpa niy.<sup>3</sup> Gyicy pee lan gal tub cuay, ornu zuun fren ru' ma. Orze' nap gyeñ ma. Orze' gac lyuun ni ma ca zi'l ze' nu galagy na cha dun ma.<sup>4</sup> O gyicy pee lan gal nu ricy tub barc. Coz ily nac ñii, nunu bi ily rzuub yaañ ñi. Tees nu nac tub timoq mi', orze' yu nu rsaañ gac cha nuy ñi ca zi'l ze' nu galagy yu.<sup>5</sup> Ni' zi'l rzac de ub na nu lyuudz na. Nde' tub lugaar mi' ni cuerpa ni den, tees tona' la coz ily gac gyicy ñi. Gush der shcab nu nac tub gyi mi'. Gac caañ gyi tub la ngush ily tona' la.<sup>6</sup> Lyudz na nañ gal nu na gyi. Tona' la coz a' nap nac ñii nu ricy cup cuerpa ni den. Gnuuñ dutuub la cuerpa ni den. Nunu gashtal gabilly rad baloor niñ. Dzi coz ily ricy nuñ den dub laa lat nu mbañ naa: nese lat nu gumiiñ na gashtal gat lan.<sup>7</sup> Mbecy bi ricy dey gan de lo la bañcyug. Bi ricy dey gan bañ gyish. Bi ricy dey gan chigiyiñ. Bi ricy dey gan de bañcyug nu rga' nañ lo yu. Nunu bi ricy dey gan bel nu yu' lo nis.<sup>8</sup> Tees rila wagiyicy dey gan lyudz yu. Nde' nañ gal nu na tub coz a' nap nu dza laa nañ ñi yu' benen par nu cut ñi.<sup>9</sup> Nu lyudz den ryabic na gyel mbecy ni Ñgyoozh, Uz den. Nunu laab nu lyuudz na rzaa lagy na ni losa'n, de yu nu psa' lagy Ñgyoozh nu na gal nu na ub mi.<sup>10</sup> Nunu laab nu ru' den ryabic na gyel mbecy ni

Ñgyoozh. Nunu laab nu ru' den rzaa lagy na ni losa'n. Rup laa coz ze' druuñ laab tub zi'l ru'n. Nde' rila walab se'ñ der bicy na.<sup>11</sup> Rila sac tub lugaar nu driib nis nu tub se' zi'l grib cyup lo nis: laab ze' nu grib nis ish, nunu laab ze' grib nis lya.<sup>12</sup> Der bicy na, tub yalas wac cuic ñi uuggy ni ya oliva. Nunu tub lyucy urbyay wac cuic ñi uuggy ni yalas. Ni' zi'll tub zo, ze' nu yu' nis ri' wac cuic ñi nis ish.

### Shcab nu druu lo Ñgyoozh

<sup>13</sup> ¿A ruu su tub mbecy lat der nu yu' shcab niy nunu siñ tooy? Orze' rlagy ñi nu gyicy yu nu gabey nu ni nay nu nac de coz nap nu ricy yu. Orze' gyicy yu gal nu ricy tub mbecy shni.<sup>14</sup> Tees benu zaan der nu cheti gyel saap lagy nañ lardoor, nunu benu nu nac ub zi'll der zu bich ru, orze' walag y ñi gyicy der nu nac ru tub mbecy nu dzi yu' shcab ni. Orze' za der contr ni de coz rishli.<sup>15</sup> Gun shcab ze', nde' walab shcab nu druu lo Ñgyoozh, sinu nde' shcab ni gyishlombecy zi'll ii. Nde' shcab nu yu' nañ lardoor mbecy, nunu shcab nu druu lo nuras.<sup>16</sup> Gun ze' nu rasaap lagy mbecy, nunu ze' nu rzu bich mbecy nu nac ub zi'l yu, lugaar ze' yu' coz deet. Nunu de lo la coz a' nap rac ze'.<sup>17</sup> Ze' de yu nu ricy cup shcab nu druu lo Ñgyoozh nu loga la rzu' dey nu gyel cacy. Niga gac yu mbecy nu rzu' nu gyel ri zu. Nunu gac yu mbecy gugy na. Nunu gac yu mbecy nu "O" rnii nu de' zir losa' nu nap rnii. Nunu rashni lagy dey losa'y. Nunu ricy dey coz nap. A' nac dey mbecy nu rcui losa'. Nunu a' nac dey mbecy nu ricy cyup ic.<sup>18</sup> Nunu de yu nu ricy rishnap nu losa', yu ze' ricy yu nu rzu' gyel ri zu lat dey. Orze' nde' ricy ñi nu rzu' dey mod nu rlagy Ñgyoozh.

### Coz ni gyishlombecy

**4** ¿Ca druu de gyel yuu, gal nu de gyel deet nu yu' lat der? Druuñ lat de coz a' nap nu ricy gyel yuu nañ lardoor der.<sup>2</sup> Rlagy der nu gad la coz nir, tees wagad ñi ni der. Orze' rzu lily der nu cut ru losa'r. Rzaab lagy der la coz, tees wagad ñi ni der. Orze' rucoo der, nunu rtub su losa' der. Wagad coz nu rlagy der, gun wacyiñ der ñii lo Ñgyoozh.<sup>3</sup> Nunu mas rgyiñ der ñii lo Ñgyoozh, tees wagyicy mi gal nu rnii der lom, gun rgyiñ ton der. Rgyiñ der coz nu yet zi'll lagy der.<sup>4</sup> jA mbecy wagyicy paa! ¿A wagad lagy der nu benu yet lagy ru de coz a' nap nu ricy mbecy ni gyishlombecy, orze' yac losa' yuu der Ñgyoozh? Cyu zi'l mbecy nu rlagy gac amig ni de coz ni gyishlombecy, yac losa' yuuy Ñgyoozh.<sup>5</sup> ¿Walab gaal rnii too der nu se la la sac riidz ni Ñgyoozh ze' nu rniiñ: "Ñgyoozh tona' la rcam espiriit nu brim nañ lardoor den, nunu se par ub zi'll mi rlagy mi ñii", rniiñ?<sup>6</sup> Tees Ñgyoozh faboor ily zir ricy num de ub na gal nu rniiñ lat de riidz nim: "Ñgyoozh zam contr ni de mbecy le', tees ricy mi faboor num de yu nu ricy gyel gyidz ni", rniiñ.<sup>7</sup> Orze' "O" mnii der ni Ñgyoozh. Gua der contr ni nuras, gun orze' ruu chuy lo der.<sup>8</sup> Becha' der lo Ñgyoozh. Orze' Ñgyoozh gyecha' ga'm lo der. Gal nu ricy der ornu rgyiib ru yaar, ni bdiib

der de coz cyi nu ricy ru, de ru mbecy cyi. ¡Bicy der nu gyacaacy lardoor, de ru mbecy nu ricy cyup ic!<sup>9</sup> ¡Bicy shni der! ¡Bzu der rishsulagy! ¡Biiñ der! ¡Lugaar nu gyi-gy der, orze' biiñ der! ¡Lugaar nu yet lagy der, bicy shni der!<sup>10</sup> Bicy gyidz der ub ru lo Ñgyoozh, gun orze' gyicy mi nu gyac der mbecy nu gya zu.

### Cue' nii der ti yu' falt ni bicy ru

<sup>11</sup> Der bicy na, tub ga la der walag y ñi nu nii zi der ni losa'r. Nunu walag y ñi nu nii der nu yu' falt niy. Yu nu rnii zi ni bicy o yu nu rnii nu yu' falt ni bicy, orze' yu ze' rnii zi y leey ni Ñgyoozh, nunu rniiy nu yu' falt niñ, gun wacsuub gyidag yu niñ. Benu rniiy nu yu' falt ni leey, orze' yu ze' walab tub yu nu rzuub gyidag niñ, sinu tub yu nu rnii nu yu' falt niñ.<sup>12</sup> Tees tub zi Ñgyoozh briic mi leey, nunu tub zi lam gac niim nu yu' falt ni den. Tub zi lam gac co mbañ mi, nunu tub zi lam gac nit lom. Ze' de ru, ¿cyu gac ru par nu niir nu yu' falt ni losa'r?

### Wagad lagy mbecy la coz zac yu ina

<sup>13</sup> Na bzuub gyidag der ne, de ru mbecy nu rnii: "Dzi na o ina chan ca na gyedz. Ze' cyiñ den tub ña'n. Gyicy den daljez. Gyicy den gan tiñ", rnii der.<sup>14</sup> Tees wagad lagy der la coz zac ru ina. De ru na der gal nu na za nu ta' baa. Nañ tub miiñ zi'll gruu zac ñi nunu nañ tub miña' zi'll bi mniit ñi.<sup>15</sup> Coz nu rlag y ñi nu nii der, orze' i niir: "Benu Shuaan den rlag y mi, orze' cui mbañ na. Orze' gyicy na nii o nde", nii der.<sup>16</sup> Tees na ricy der gyel le' nir, nunu rnii der nu dzi coz ily ricy ru. Nde' rila a' nap nu ni mod rnii der.<sup>17</sup> Mbecy nu rad lagy nu gyicy coz nap, ze' wagyicy yu, yu ze' ricy yu cyi.

### De mbecy guani'ñ rlag y ñi gyicy cuidad dey ub yu

**5** ¡Na de ru mbecy guani'ñ bzuub gyidag der ne! <sup>5</sup> ¡De ru gun der, nunu cush ti der nu nac de gyel zi nu gzac der!<sup>2</sup> De gyel nap ni der bi rtop ñi, nunu de shab der bi row bigyich ñi.<sup>3</sup> De or gal nu de plat ni der bi driib guul ñi. Nunu guul ze', nde' tub teshtig nu shiñ ricy der. Nde' tub coz nu nit loñ der gal nu ricy gyi nu tub la coz. Na ornu bi rlazh tiem, orze' cyaañ der gyel nap nir.<sup>4</sup> Nunu ni wangyabic der i de yu nu b icy riiñ nir, de yu nu rte' cosech ni der. Nunu nde' zañ contr ni der. Nunu Shuaan na, biñ nu riib ic de anc zigy, reñ mi ornu de yu nu b icy riiñ ni der ze' rgu' cyiy de ru lom nu nac riiñ nu b icy dey nir.<sup>5</sup> Gyishlombecy ii tona' la zu baa der nunu ricy der gusht nir. Nunu b icy re'ñ der ub ru gal nu ricy re'ñ dey tub chigud nu cut yu.<sup>6</sup> Rnii der nu yu' falt ni de mbecy nu sac falt ni, nunu rut der dey. Ii se la la coz b icy dey ornu gut yu.

### De mbecy rlag y ñi gyicy cup yu pasez

<sup>7</sup> Nde' nu der b icy na, b icy cup der pasez gashtal cyid la Shuaan na. Bdu' cuen der mod nu ricy mbecy nu rnuuz la coz. Nu pasez rbez yu nu te'y cosech nu dzi sac. Nu loga la rbez yu nu pasez nu gri gyey loga. Niga rbeza'y nu gri gyey cyup.<sup>8</sup> Orze' ni rlag y ñi nu gyicy

cup der pasez. Cue' shi'ñ der baloor, gun bi shuub dzi nu cyid Shuaan den tuuba' tir.

<sup>9</sup> Der bicy na, tub ga la der walagy ñi nu nii deet ru nu nac de losa'r, gun orze' Ñgyoozh waniim ti yu' falt ni der. Tees Ñgyoozh, biñ nu gri bee ni mbecy, bi yad shuub dzi nu ru'ñam.

<sup>10</sup> Der bicy na, pcaa ic der de yu nu psaa rasqo ni Shuaan den, de yu nu mnii por cuen nim gulas, gun orze' gad lagy der lac mod gyicy ru. Benu rlagy der gad lagy ru lac mod gagyer ornu gzac zir, orze' bdu' cuen der lac mod gugyee dey ornu bzac ziy. <sup>11</sup> De ru rad lagy der nu de ub na ricy na de mbecy nu ragyee ornu rzac zi par tub mbecy nu dzi ni. Bi rad lagy der nu Job gugyey ornu bzac ziy. Rad lagy der lac mod bicy nu Ñgyoozh yu. Nunu rad lagy der nu Shuaan den dzi gushni lagy mi yu. Nunu nap bicy num yu.

<sup>12</sup> Der bicy na, mod nu ricy zir ñi presis, benu nii der tub coz lo losa'r, cue' zat der ni tub la coz par nu gabe nu rishli gal nu rnii der. Cue' zat der gyibaa. Ni cue' zat der gyishlombecy. Ni cue' zat der ni tub la coz. Tees benu laab ni rlagy der niir, orze' laab ni niir. Nunu be-nu walab ni rlagy der niir, orze' walab ni niir. Gun orze' Ñgyoozh waniim ti yu' falt ni der.

<sup>13</sup> ¿A yu' mbecy lat der nu dzi rzac zi dey? Orze' rlagy ñi nu cyiñ yu lo Ñgyoozh. ¿A yu' mbecy lat der nu zu

cyit lagy yu? Orze' rlagy ñi nu gul yu nunu gyabicy yu gyel mbecy nim. <sup>14</sup> ¿A yu' mbecy rat lat der? Orze' rlagy ñi nu cuedz dey de yu bel nu zu riiñ lat de mbecy ni Crisht. Orze' cyiñ dey lo Ñgyoozh nu nac yu rat ze'. Nunu coo dey asecy tooy. Orze' nii dey lo Shuaan den nu gyicy yac mi yu. <sup>15</sup> Orze' nu nac nu gyicy cup dey consuel lo Ñgyoozh lat nu cyiñ yu lom, orze' yu rat ze' gyac yu. Nunu Ñgyoozh gyicy yac mi yu. Nunu gyicy sulagy mi de cyiy. <sup>16</sup> Orze' tub ga la der b icy caacy der cyir lo losa'r. Nunu tub ga la der bdiiñ der lo Ñgyoozh ni losa'r. Nunu ornu tub mbecy nap cyiñ yu lo Ñgyoozh nu dutuub la lardooy, orze' tona' la coz ily gyicy ñi.

<sup>17</sup> Elías, tub yu nu mnii por cuen ni Ñgyoozh, guc yu tub mbecy gal nu na de ub na. Na ornu bdiiñ yu lo Ñgyoozh nu dutuub la lardooy nu cue' gyet gyey, orze' gyey wangyet ñi lugaar ze' chon ña'n nu. <sup>18</sup> Na despuées ornu bdiiña'y lo Ñgyoozh, orze' brugyi' ga' nu yet gyey, nunu yu briic ñi cosech.

<sup>19</sup> Der bicy na, benu rusu tub mbecy lat der nu ruu chuy lo de coz rishli, nunu benu tuuba' mbecy gyicy yu nu cush cya ga'y lo coz rishli, <sup>20</sup> orze' bi neñ der nu cyu zi'l mbecy nu gyicy yu nu mbecy cyi zaan yu de coz a' nap nu ricy yu, nunu orze' cush cyay lo Ñgyoozh, orze' yu nu ni bicy ze' gyicy yu nu gruu mbañ mbecy cyi ze', nunu gyicy yu nu gyicy sulagy Ñgyoozh dela cyiy.

# 1 San Pedro

## Bed zeed yu ñgyoozh ni de mbecy Israeel

<sup>1</sup> Yaq Bed, tub aposht ni Jesucrisht, zeeda gyicy ii lo de ru mbecy Israeel nu bruu ledz nu za cyiiñ reña' gyedz. Rcyiñ der lo de yu ni Ponto, gal nu lo yu ni Galacia, gal nu lo de yu ni Capadocia, gal nu lo de yu ni Asia, gal nu lo de yu ni Bitinia. Dela lugaar ze' yu' der. <sup>2</sup> De ru nac der mbecy nu pcui Ñgyoozh gulas, gun nde' coz nu rlagy ub mi. Espiritiit Yon nim bzu chum der par nu gzuub gyidag der ni Jesucrisht, nunu bicy mi nu byecy cyi der nu nac reñ Jesucrisht.

Ñgyoozh gyicy mi faboor nu ded ru' ga' la nap gyicy num de ru, nunu gyicy mi nu cheti ri añ ni der.

## Gad nu grish lo den

<sup>3</sup> Gyabic den gyel mbecy ni Ñgyoozh Uz Shuaan den Jesucrisht, gun par nu nac nu tona' la rashni lagy mi de ub na, nde' nu bicy mi nu byac den mbecy cub nu nac nu byabañ Jesucrisht, nunu nde' gyicy ñi nu rishli gad nu grish lo den. <sup>4</sup> Nde' nu grish lo den nu cuic mi gyel nap nu bdu' choow mi gyibaa par de ub na, de coz nu wac nit lo, ni watop ñi, ni waziñ. <sup>5</sup> Ñgyoozh zaab ic mi der nu nac nu rac ricy mi coz ily nu nac nu ricy cup der consuel lom. Ni gyicy mi, gun orze' gad nu gruu mbañ der gal nu psa' lagy mi. Nunu laab Ñgyoozh gyicy mi nu yet lag der cuen lac mod co mbañ mi der ornu bi yad nu gya' lo tiem.

<sup>6</sup> Par nu nac nde', orze' tona' la gyet lagy der. No-maas tub tiem zi galagy ñi nu gyicy shni der nu nac nu gzac der zañ lo coz deet. <sup>7</sup> Consuel nu ricy cup der lo Crisht, nde' nañ gal nu na or. Na or ze' chañ lo gyi, mas nit lo lañ, gun orze' gabe ben a rishli nac ñii or nap. Ni' zi'l ornu gzac deet der, orze' gabe ben a rishli ricy cup der consuel lo Crisht. Nunu consuel ze' sac zir ñi gaze' or. Benu gabee ricy cup der consuel lo Crisht ornu ded ni nu gzac deet der, orze' Ñgyoozh gyabic mi gyel mbecy ni der, nunu gyicy mi nu gyac der mbecy nu lily na, nunu griib zily mi de ru. Ni gyicy der ornu gruu zac Jesucrisht tuuba' tir.

<sup>8</sup> De ru rca der Jesucrisht mas nigul zac der mi. Nunu ricy cup der consuel lom mas wac zac der mi na. Orze' guciyit lagy der tub mod nu tona' la coz ily. Tub mod nu druu gal gyibaa. Ni wagaca' cuic der rasoo de riidz ni de coz nu rzac ru. <sup>9</sup> Gun par nu nac nu guud nu bruu mbañ der, orze' nde' nu ricy cup der consuel lom.

<sup>10</sup> Orze' gulas de yu nu mnii por cuen ni Ñgyoozh nap tona' la psya' dey nu byub yu de ze' nu rniiñ ni de riidz nu gruu mbañ de mbecy. Nunu bzat dey de coz

nu gyicy Ñgyoozh faboor num de ru nu cuic mi ni der. <sup>11</sup> Orze' Espiriit ni Crisht bicy mi nu gud lagy de yu ze' de coz nu gzac zim, gal nu de gyel lily nim nu gruu zac despuees. Nde' tona' la gulas gud lagy dey. Nunu bicy pee dey nu ñgyad lagy yu cyu mbecy nde'. Nunu bicy pee dey nu ñgyad lagy yu la tiem gac de coz nu mnii Espiriit ni Crisht, biñ nu bicy cup dey nañ lardooy tiem ze'. <sup>12</sup> Tees Ñgyoozh bicy mi nu guud lagy dey riidz nu mniiy. Nde' walab par de ub yu, sinu nde' par de ub na. De riidz ze', nde' riidz nu güeñ der ornu mnii de yu nu rshaal de riidz nu sac ni Crisht nu nac Espiriit Yon ni Ñgyoozh, biñ nu bruu gal gyibaa. ¡Nunu mas gashtal de anc ngulagy dey nu ñgyet lag yu cuen lac yaruu de riidz ze'!

## Ñgyoozh b zum de ub na nu chesan tub mod nap

<sup>13</sup> Nde' nu bzu der altant, nunu byub ic der ub ru tub mod nu nap. Brish lo nap la der lo de coz nap nu cuic Ñgyoozh ni der ornu gruu zac Jesucrisht tuuba' tir.

<sup>14</sup> Bicy der gal nu rlagy ñi como nac der i'ñ Ñgyoozh. Nunu bzuub gyidag der nim. Nunu cue' gyicy der de coz a' nap nu druu nañ lardooy, gal nu bicy der anzir nu chu' lo der mi. <sup>15</sup> Lugaar nu gyicy der de coz a' nap ze', orze' bicy der mod nu nap par lo Ñgyoozh. Gun Ñgyoozh, biñ nu bzu de ru nu gac nim, mi ze' nac mi biñ yon. <sup>16</sup> Ñgyoozh nam lat de riidz nim: "Guc der mbecy nu wagacy cyi, gun ya wagacya cyi", nam.

<sup>17</sup> Ñgyoozh gri beem ni tub ga la de mbecy dub gal nu na coz nu ricy dey, nunu walab nu reñ ga la mod gyicy mi num tub ga mbecy. Como de ru "Uza", rnii der lo Ñgyoozh, nde' nu rlagy ñi nu ca lagy der lom dub laa tiem lat nu yu' der gyishlombecy ii. <sup>18</sup> Ñgyoozh bi bloo nap mi de ru lat de mod wancyiiñ nu pcyiiñ der gulas, de mod nu bzeeñ de gyitoo bel ni der. Na de ru nap rad lagy der la be la yu' lo mod nu bloo mbañ mi der. Walab nu coz nu ded ni briish mi. Ni walab nu briish mi nu or. Ni walab nu briish mi nu plat. <sup>19</sup> Sinu briish mi nu reñ Crisht nu dzi sac. Mi ze' guc mi gun lo Ñgyoozh. Guc mi gal nu na tub shily nu rila sac falt ni.

<sup>20</sup> Crisht nil bi ca lo cuen nim nu ni zac mi nese anzir nu sa' lagy Ñgyoozh gyishlombecy. Tees na nu bi yad lazhi tiem bruu zac mi par nu locyuub mi de ru. <sup>21</sup> Ze' na nu nac Crisht, de ru ricy cup der consuel lo Ñgyoozh, biñ nu bicy nu byabañ mi. Nunu briic mi gyel lily nim ni I'ñ mi. Nde' nu de ru ricy cup der consuel lo Ñgyoozh, nunu rgyish lo der lom.

<sup>22</sup> Ze' na ornu de ru bzuub gyidag der de riidz nu rishli ni Crisht, orze' byecy dela cyi der. Gun orze' rishli

gaal ca tub ca tub zi'l der losa'r nu dutuub la lardoor, gal nu dela fers ni der.<sup>23</sup> Tees de ru na der gal nu na mbecy nu bi gul tuuba' tir. Na walaba' nu gul der nu nac mbecy nu yu' gyishlombecy ii, de yu nu ca lo cuen nu gat, sinu gul der nu nac de riidz ni Ñgyoozh. Riidz ze' nim gyicy ñi nu cui mbañ mbecy, nunu gzuñ par dub laa tiem.<sup>24</sup> Gun lat de riidz ni Ñgyoozh rniiim:

Dela mbecy na dey gal nu na gyish.

Ze' gyel lily ni dey, nde' nañ gal nu na gyee ni gyish. Gyish ze', nde' chawach ñi.

Ze' gyee, nde' glag ñi.

<sup>25</sup> Tees de riidz ni Shuaan den, nde' gzuñ par tub la. Ni rnii de riidz ni Ñgyoozh. De riidz nu rzt ñi ze', nde' riidz nu sac ni Crisht nu rshaal de lo de ru.

**2** Nde' nu blaa yaa der de lo la coz a' nap nu ricy der. Rila cue' guu der. Nunu cue' gac der mbecy rzuu lo. Nunu cue' gasaap lagy der. Nunu rila cue' gzat zi der losa'r.<sup>2</sup> Guc der gal nu na mdoo nu sa gul. Bicy der nu cuigy ru lech du ub nu cyiñ par espiiriit ni der, gun orze' nu nac nde' gal shcab ni der par nu gruu mbañ ru.<sup>3</sup> Gun rishli gaal de ru bi gud lagy nap la der nu Ñgyoozh Shuaan den dzi nap mi.

### Crisht nam gal na gyita' nu rbic gyel mbañ

<sup>4</sup> Nde' nu becha' der lo Shuaan den Jesuuz, gun mi ze' nam gal nu na tub gyita' nu mbañ. Orze' de mbecy guzii dey nu wacyiñ gyita' ze'. Orze' mne' dey ñii. Tees par Ñgyoozh, nde' tub gyita' nu bducui. Nunu nac ñii gyita' nu dzi sac.<sup>5</sup> Orze' ni mod bicy der nu gac ru gal nu na gyita' ze'. Orze' Espiriit Yon nim gash mi de ru par nu shup mi yu' wedz nim. Orze' nañ yu' wedz ze' gac der uz par nu gyicy der riiñ ni ub zi'l mi. Orze' nu nac Jesucrisht cuic der gun lo Ñgyoozh, de gun nu rnii Espiriit Yon nim nu cuic der. Nde' gun nu gyedzu' lagy mi.<sup>6</sup> Nde' nu ni' zi'l rniiñ lat de riidz ni Ñgyoozh:

Ya grisha tub gyita' Sión gyedz ni Ñgyoozh.

Nde' nac ñii tub gyita' nu ricy zir ñi presis.

Nde' tub gyita' nu ya pcuñ nu gac ñii gyita' nu dzi sac. Cyu zi'll mbecy nu gyicy cup consuel lo biñ nu nac gyita' ze',

orze' de mbecy ze' waruu to' loy,  
na Ñgyoozh lat de riidz nim.

<sup>7</sup> Par de ru mbecy nu ricy cup consuel lo biñ nu nac gyita' ze', orze' mi ze' tona' la ricy ñi presis par de ru, tees par de mbecy nu wagiyicy cup consuel lom, orze' gyu' niñ gal nu rniiñ lat de riidz nim. Orze' rniiñ:

Gyita' nu mne' biryu,  
nde' byac ñi gyita' nu ricy zir ñi presis,  
rniiñ.

<sup>8</sup> Ze' tuuba' lugaar rniiñ:

Nde' tub gyita' nu gyicy ñi nu glagy gyi' mbecy.

Nunu gyicy ñi nu gyes saa dey,  
rniiñ lat de riidz ni Ñgyoozh. De mbecy ze' glagy gyi' dey nu nac nu wacsuub gyidag yu ni riidz nim. Nde' tub coz nu bi ca lo cuen nu ni gzac dey.

<sup>9</sup> Ze' de ru nac der mbecy nu pcui Ñgyoozh nu gac famil nim. Nac der uz nu zu riiñ lo Ñgyoozh, biñ nu nac rey ni den. Nac der tub nac mbecy nu nac ni Ñgyoozh.

Nac der de mbecy ze', gun orze' gzat der de coz ily nu ricy mi. Mi ze' biñ nu pcui de ru par nu gruu der ze' nu cow, gun orze' chu' der ze' nu yu' yaa nu tonal' la cyit zu.<sup>10</sup> De ru a' nac der mbecy ni Ñgyoozh gulas. Ze' na nac der mbecy nim. Gulas wangashni lagy Ñgyoozh de ru. Tees na rashni lagy mi der.

### Yu'n gyishlombecy par nu gyicy na coz nu rlagy Ñgyoozh

<sup>11</sup> Ya rnishbaa lo der bicy na nu dzi rca, bicy der gal nu ricy mbecy nu walab mbecy guledz. Cue' shet ic der nu gyicy ru de coz a' nap nu druu nañ shcab nir, gun de coz ze' zañ contr ni espiiriit nir.<sup>12</sup> Nap bicy der lat de mbecy nu a' yu' lo Ñgyoozh, gun orze' mas griib dey cyi fals too der nu nii dey nu nac der mbecy shiñ ricy, tees ornu gad lagy dey de coz nap nu ricy der. Orze' gyabic dey gyel mbecy nim ornu cyid mi tuuba' tir.

<sup>13</sup> Orze' par nu nac Shuaan den Jesucrisht "O" mnii der ni dela mbecy nu nac fushtiz gyishlombecy ii.

Gaza' yu nu riib ic de nasyoong, "O" mnii der nu zuub gyidag ru niy, gun yu ze' zuy riiñ ily par de' zir dey.

<sup>14</sup> Ni' zi'l "O" mnii der ni yu nu riib ic por cuen ni gubier, gun yu ze' bdugiyi riiñ par nu cuic yu cashtig ni de mbecy nu shiñ ricy, nunu par nu gyabic yu gyel mbecy ni de mbecy nu nap ricy.<sup>15</sup> Gun Ñgyoozh rlagy mi nu nap gyicy der, gun orze' de mbecy nu wagad lagy, gal nu de mbecy ton, wad la ru' dey nu niyi nu chay contr ni der.

<sup>16</sup> Bicy der gal mod nu ricy mbecy nu riib ic ub. Mas riib ic der ub ru, tees cue' cuic der lugaar ni ub ru nu gyicy ru coz a' nap. Sinu bicy der tub mod nu nap zir par nu nac der mbecy nu ricy coz nu rlagy Ñgyoozh.

<sup>17</sup> Bicy der mod nu rabee nu rca lagy der lo dela mbecy. Pca der de bicy ru nu nac Crisht. Nunu nap pca lagy der lo Ñgyoozh. Nunu pca lagy der lo yu nu riib ic de nasyoong.

### Rlagy ñi nu gagyen nu gzac zin gal nu gugyee Crisht

<sup>18</sup> De ru moz nu ricy riiñ ni mbecy, rlagy ñi nu "O" nii der ni patroq nir nu rca lagy der loy. Cue' nu tub lo zi'll nu nap gyicy der nu de yu nu nap ricy, gal nu nu de yu nu gugy na, sinu ni' zi'l gyicy der nu de mbecy a' nap.

<sup>19</sup> Gun nde' tub coz nap ornu tub mbecy ragyeey nu rzac ziy ornu sac falt niy nu nac nu rad lagy yu nu nde' coz nu rlagy Ñgyoozh.<sup>20</sup> Tees benu cuic dey cashtig ni der nu nac nu shiñ ricy ru, orze' se la la cyiñ ñi mas gagye der nu pasez. Ze' benu zac zi der nu nac de coz nap nu ricy ru, nunu benu gagyer looñ nu pasez, orze' nde' coz nap par lo Ñgyoozh.<sup>21</sup> Gun Ñgyoozh bzum de ru par nu gagye der lat de tiem nu gzac zir, gun Crisht bzac zim nu nac de ru. Nunu blyuum ni der lac mod gyicy ru, gun orze' gyicy der gal nu bicy mi.<sup>22</sup> Crisht wangiyicy mi ni tub la cysi. Ni wanguum ni tub la mbecy.

<sup>23</sup> Ornu gugy zi mbecy mi, orze' rila wannium ni tub riidz. Ni wantush cyam riidz nu tañ za lo dey ornu pted zi dey mi, sinu bdu'm ñii yaa Ñgyoozh, biñ nu ri bee mod nu se'ñ.<sup>24</sup> Laab ub la Crisht, lat nu pcam lo cruu

nu cuerp la nim, orze' za num dela cyi den, gun orze' de ub na nan gal nu na mbecy gut par lo de cyi. Orze' cyiiñ den gyishlombecy par nu gyicy na de coz nu se'ñ. Crisht gud güiim, gun orze' de ru gruu nap der.<sup>25</sup> Gun de ru gusa der gal nu gusa shily bdune'. Tees na bi bish cya der brir lo Crisht, gun orze' mi ze' ñam de ru gal nu rña tub mbecy shily niy, nunu ca laa lom lo den.

### Mod nu rlagy ñi nu gyicy de mbecy nu zu losa'

**3** Na de ru biñ mñaa, ni' zi'l rlagy ñi nu "O" nii der ni ñgyeer, gun benu nac yu mbecy nu wagyicy cup consuel lo de riidz nu sac ni Crisht, orze' ornu gzac yu de mod nap nu ricy der, orze' dzi ga guugy lardooy. Orze' gyicy cup yu consuel. Orze' ni walagy ñi nu niir ni tub la riidz,<sup>2</sup> gun ornu gzac yu nu nap ricy der, nunu ca lagy der lo Ñgyoozh, orze' guugy lardooy.<sup>3</sup> Nunu cue' cyish lo der lo coz nu rabee par ich nu gyacyit nar. Ni walagy ñi nu ti laca' la gyicy nu der gyich toor. Ni walagy ñi nu zaab der bec or de lugaar ni cuerp nir. Ni walagy ñi nu zu der negy nu dzi ñgyup sac.<sup>4</sup> Nap zir nu b icy der nu nac ru mbecy cyit na nu nac mod nu na nañ lardoo der. Na benu gugy na der, nunu benu rag zi'l zu lagy der nañ lardooy, orze' nde' nañ gal nu na bec cyit na nu rila waded ni. Nunu nde' tub coz nu ton'a la sac par lo Ñgyoozh.<sup>5</sup> Ni mod b icy de biñ mñaa ni Ñgyoozh nu gu' gulas par nu b icy mi nu nap rabeem. De mi ze' b icy cup mi consuel lo Ñgyoozh, nunu b icy paa dem nu ñgyeem.<sup>6</sup> Ni mod b icy Sara. Bzuub gyidag mi ni ñgyeem, Abraham. Orze' rniiim rab mi yu "Shi Abraham", rniiim. Orze' na de ru nac der mbecy nu rsya' lo Sara benu nap ricy der, nunu benu wacchib lagy la der lo ni tub la coz.

<sup>7</sup> Na de ru yu gyeey, pcyiiñ nu der mñaar tub mod nu rasoo, nunu pca lagy der lom, como ta zir na de biñ mñaa gaze' de ru. Gun ni' de mi ze' cuic Ñgyoozh nu cui mbañ mi gal nu cuic mi nu cui mbañ de ru. Ni mod b icy der, gun orze' gad mod nu nii nu der Ñgyoozh gal nu rlagy ñi.

### Nu nac coz nap nu ricy mbecy, orze' rzac ziy

<sup>8</sup> Laab nii la de riidz nu nee lo der. Rlagy ñi nu nap ch'u' dela der nu losa'r. Nunu rlagy ñi nu gyicy der tub zi'l shcab. Nunu pca der de losa'r gal nu rlagy ñi nu gyicy de mbecy nu de b icy yu. Nunu guc der mbecy gugy na. Nunu b icy shni der ub ru.<sup>9</sup> Cue' shiñ gyicy nu der mbecy nu shiñ ricy nu de ru. Ornu rab zi mbecy der cue' gab zir yu. Lugaar nu gyicy gal gar, orze' nap zir nu nap b icy nuy, gun Ñgyoozh bloo sum de ru par nu nap gyicy num der.<sup>10</sup> Gun lat de riidz ni Ñgyoozh rniiñ:

Benu ca na mbecy yet lagy yu nu cyiiñ yu gyishlombecy ii,

nunu benu rlagy yu nu gusht cyiiñ yu, orze' rlagy ñi nu cue' shiñ niyi, nunu cue' niyi riidz rguu.

<sup>11</sup> Bruu chu der lo de coz a' nap.

Orze' b icy der coz nap.

Byub der tub mod nu nap nu chu' nur de losa'r.

Orze' nde' zaab b icy la der ñii.

<sup>12</sup> Gun Shuaan den rñam de mbecy nu nap ricy.

Nunu rzuub gyidag mi ornu rnii nu dey mi.

Tees zam contr ni de mbecy nu shiñ ricy.

Ni Rniiñ lat de riidz ni Ñgyoozh.

<sup>13</sup> ¿A grusu mbecy nu shiñ gyicy nuy de ru, ze' benu de ru dub laa tiem co lo der nu gyicy ru coz nap?

<sup>14</sup> Tees mas rzac zi der nu nac nu ricy ru coz nap, orze' jdzi nu der! Nunu cue' dzib der lo ni tub la mbecy.

Nunu cue' sug ic der.<sup>15</sup> Sinu pca lagy der lo Crisht, gun mi ze' nac mi Shuaan der. Dub laa tiem bzu der altant nu tush cya der riidz nu cugyi' mbecy lo der nu nac consuel nu ricy cup der nañ lardooy.<sup>16</sup> Tees ornu tush cyar riidz ze', orze' cue' nii der riidz nu tañ za lo dey, nunu pca lagy der lo dey. Dub laa tiem b icy der coz nap, gun orze' cue' gat lo der. Gun orze' de mbecy nu nii zi ni der nu nac de coz nap nu ricy ru nu nac ru mbecy ni Crisht, orze' de yu ze' gat lo dey nu nac de riidz a' nap nu rnii dey.

<sup>17</sup> Gun nap zir nu gzac zi der nu nac de coz nap nu ricy ru benu nde' coz nu rlagy Ñgyoozh, gaze' nu gzac zi der nu nac de coz a' nap nu ricy der.<sup>18</sup> Gun Crisht gut mi tub tir zi'l par tub la nu nac dela cyi den. Mi ze' sac cyim. Tees gut mi par de ub na, mbecy nu yu' cyi, gun orze' guud mod nu gya num de ub na lo Ñgyoozh.

Mbecy b icy dey nu gut mi, tees Espiriit nim b icy mi nu byabañ mi.<sup>19</sup> Ze' Espiriit nim blocyuub mi ub mi nu gua shaal mi riidz ni Ñgyoozh lo de espiriit nu yu' pres.

<sup>20</sup> De espiriit ze' guc ñi espiriit ni de mbecy nu gu' gulas tiem nu pcyiiñ Noé. Ñgyoozh ton'a la pasèz mi gugyeem lo dey lat nu bzaa Noé barc. Tees Ñgyoozh b icy mi nu bruu nap la be dey nu nac nis ze'. Orze' tub shuñ dey bruu nap yu.<sup>21</sup> Nis ze', nde' muesht ni nis nu gzu nis de ru tiem na. Orze' nu nac nis ze', orze' Ñgyoozh co mbañ mi de ru. Ornu gzu nis den, nde' walab nu yaruuñ nu gyecy bid nu ta' cuerp ni den, sinu nu gzu nis na, nde' yaruuñ nu gdiñ na lo Ñgyoozh nu gyicy caacy mi nañ lardooy, nunu Ñgyoozh co mbañ mi de ub na nu nac nu byabañ Jesucrisht.<sup>22</sup> Jesucrisht, biñ nu gup gyibaa, nunu Zub mi par yaa bee Ñgyoozh, riib ic mi de anc, gal nu de' zir espiriit nu riib ic de espiriit nu dzi rgyiiñ.

B icy der riiñ dub gal na mod nu ricy Ñgyoozh num der

**4** Orze' como Crisht bzac zim nu cuerp nim, orze' ni' zi'l de ru bzu der tub shcab nu gzac zi der benu galagy ñi, gun cyu zi'l mbecy nu rzac zi, yu ze' bi bruu chuy lo cyi.<sup>2</sup> Ze' par lo na, rlagy ñi nu cyiiñ der mod nu rlagy Ñgyoozh. Cue' gal mod nu rlagy de ub ru.<sup>3</sup> Gun bi guzañ tiem nu de ru ni' zi'l b icy der laab de coz nu ricy de mbecy nu a' yu' lo Ñgyoozh. Lat nu gusa der gulas, orze' b icy der de lo la coz nu druu nañ lardooy. Nunu bgyiiñ lagy der lo de coz a' nap. Nunu bzugy shaad der gal ze' wagaca' la. Nunu b icy der sa' a' nap. Nunu go' der gashtal wanwuica' la der rasoo. Nunu briib zily der nab a' nap.<sup>4</sup> Na ornu de mbecy nu a' yu' lo Ñgyoozh rzac dey nu wachesa nu der dey ornu ricy dey de coz a' nap ze', orze' rza nu ic dey nunu rnii zi

ni der.<sup>5</sup> Tees ni' de yu ze' rlag yñi nu zeed cuen dey de coz nu ricy yu lo Ñgyoozh, biñ nu bi zu lily nu gri bee ni de mbecy nu bi gut, gal nu de mbecy nu gabee mbañ.<sup>6</sup> Tees Crisht gua shaal mi de riidz nu sac nim lat de mbecy nu bi gut, gun orze' Espiriit Yon nim gyicy mi nu cui mbañ dey gal nu Ñgyoozh mbañ mi. Nomaas lat nu pcyiiñ dey gyishlombecy nu cuerpi nyi, orze' Ñgyoozh briic mi cashtig ni dey gal nu ricy num de' zir de mbecy.

<sup>7</sup> Bi yad gaab tiem nu gya' lo dela de coz. Nde' nu dela de ru bzu der altant, nunu bicy der mandaar ub ru, gun orze' gac nii nu der Ñgyoozh.<sup>8</sup> Coz nu ricy zir ñi presis, nde' nu ton'a la ca der losa'r, gun benu rca der losa'r, orze' gyicy sulagy der dela cyi zañ nu ricy yu.<sup>9</sup> Dela der, ornu ryiid mbecy yu'r, orze' bgu' dey nañ yu', nunu nap bicy nu der yu. Nunu cue' nid ru' der ornu ni gyicy ru.<sup>10</sup> Orze' tub ga la der b icy paa nu riiñ nu briic Ñgyoozh nu cyiiñ der nu gyicy ru. Tub ga la der b icy riiñ nu guud lo Ñgyoozh par nu locyuub der de' zir de losa'r.<sup>11</sup> Ornu tub mbecy rniiy lat de mbecy zigy, orze' rlag yñi shaal yu riidz ni Ñgyoozh. Benu tub mbecy rlag yu nu locyuub yu losa'y, orze' rlag yñi nu gyicy yuñ nu dela fers niy nu rbic Ñgyoozh. Dela coz nu gyicy der b icy der ñii par nu gyed gyel mbecy ni Ñgyoozh nu nac Jesucrisht. Mi ze' ton'a la lily nam, nunu nac mi biñ nu gac gyicy dela coz tub la. ¡Laab ni gac ñii!

### Mbecy ni Crisht rzac zi dey

<sup>12</sup> De ru b icy na nu dzi rcä, cue' cha nu ic der ornu gzac ru lo de preb nu dzi gatow. Nunu cue' nii too der nu nde' tub gyel zi nu a' zac mbecy.<sup>13</sup> Lugaar nu cha nu ic der, orze' bet lag y der, gun gal nu bzac zi Crisht, ni' zil' zac zi ga' de ru, gun orze' ton'a la gyet lag y der ornu gruu zac Crisht tuuba' tir nu gyel lily nim.<sup>14</sup> Dzi ni der benu tub mbecy gab ziy der par nu nac Crisht. Gun orze' Espiriit Yon ni Ñgyoozh, biñ nu dzi lily na, zaab rded nu laam de ru.<sup>15</sup> Orze' cue' nu gzac zi ni tub la der nu nac der mbecy nu rut losa', o nu nac der mbecy nu ricy gubaan, o nu nac der mbecy nu ricy cyi, o nu nac der mbecy nu rne' ru' lat asunt ni losa'.<sup>16</sup> Ze' benu rzac zi der gyi' nu nac der mbecy ni Crisht, orze' cue' gat lo der, sinu byabic der gyel mbecy ni Ñgyoozh par nu rnii dey nu nac der mbecy ni Crisht.

<sup>17</sup> Bi yad shuub tiem nu Ñgyoozh gri beem. Orze' nu loga la gri beem ni de mbecy nim. Orze' dzi zir fert gri beem ni de mbecy nu wansuub gyidag de riidz nim.<sup>18</sup> Orze' benu dzi fers gruu mbañ de mbecy nap, orze' dzi ga' zir fert gyicy num de mbecy a' nap gal nu de mbecy cyi.<sup>19</sup> Orze' ni' zil' mod par de mbecy nu rzac zi, gun nde' coz nu rlag y Ñgyoozh. Orze' de yu ze' rlag yñi nu zaab gyicy la dey de coz nap. Nunu gu' dey ub yu yaa Ñgyoozh, biñ nu psa' lag y dey. Nunu nac mi biñ nu ricy paa.

### Consef nu rbic Bed

<sup>5</sup> Ya Bed naçä tub yu nu zu riiñ ni yu bel lat de mbecy ni Crisht, nunu naçä tub teshtig ni de coz nu bzac zi Crisht, nunu gaza' de ub na gad gyel lily nin ornu gruu zac mi tuuba' tir. Nde' nu na ya grica tub consef ni de mbecy nu zu riiñ ni yu bel lat der.<sup>2</sup> Nap mña der de mbecy nu nac shily ni Ñgyoozh, gun nde' riiñ nu bdu'm yaa der. Nunu bicy der ñii nu dutuub la lardoor gal nu rlag y mi. Nunu cue' gyicy der ñii por fers la. Nunu ni cue' gyicy der ñii par nu nac tiñ. Bicy der ñii gal nu ricy tub mbecy ornu dzi yet lag yu nu shet yaay tub riiñ.<sup>3</sup> Cue' dzi gyicy der mandaar de mbecy nu rñar ze', sinu blyuu ni dey nu nac mod nu ricy de ub ru.<sup>4</sup> Gun ornu gruu zac Jesuuz, biñ nu gya zir zu par de' zir de mbecy nu rña shily ze', orze' gyad tub i der nu ton'a la coz ily. I der ze', nde' rila wayagash baloor niñ.

<sup>5</sup> Na de ru yu feñ, rlag yñi nu "O" nii der ni de yu bel. Orze' tub ga la der b icy der nu gac ru mbecy shni. Orze' "O" mnii tub ga la der ni losa'r. Gun rniiñ lat de riidz ni Ñgyoozh:

Ñgyoozh zam contr ni de mbecy le',  
tees ricy mi faboor num de mbecy nu ricy gyel gyidz ni,  
rniiñ lat de riidz ni Ñgyoozh.<sup>6</sup> Orze' b icy der gyel gyidz nir lo Ñgyoozh, biñ nu ton'a la fert rña de ub na, gun orze' gyicy mi nu gac der mbecy lily tiem nu galagy ñi.<sup>7</sup> Orze' bgu' der dela gyel rsug ic nir yaa Ñgyoozh, gun mi ze' zum altant nu nac de ru.

<sup>8</sup> Nde' nu bzu der altant nunu zu ga lag y der, gun nuras nac yu losa' yuu der. Orze' yu ze' ricy yu gal nu ricy biidz ornu rshuu ma nu ryub ma cyu nu gow ma.<sup>9</sup> Fert b icy cup der consuel lo Crisht. Orze' gua der contr ni nuras. Nunu bi neñ der nu dutuub la gyishlombecy rzac zi de b icy ru nu nac Crisht laaba' de coz nu rzac de ru.<sup>10</sup> Na ornu bi bza' la be tiem nu bzac zi der, orze' gzu nap Ñgyoozh de ru. Orze' gyicy mi nu wayagash consuel ni der. Nunu gyicy fert mi nañ shacab ni der. Nunu gyicy mi nu wadza der. Laab Ñgyoozh, nu nac nu ton'a la rcam de ub na, orze' blosum den nu gad gyel lily nim ni den. Nde' gyel lily nu rila walazh. Gad ñi ni den par nu nac dun Jesucrisht.<sup>11</sup> Laab Ñgyoozh nac mi biñ nu gac gyicy coz ily ton'a la tub la. ¡Laab ni gac ñii!

### Bed rzeed yu ñgyoozh ni de mbecy ni Crisht

<sup>12</sup> Silvano nac yu tub b icy na nu ton'a la ricy paa. Orze' yu ze' blocyuub yu ya nu cäla be de riidz mi' nu gzeedä lo der par nu gricä consef ni der, nunu par nu gricä nu gad lag y der nu de coz nap nu ricy nu Ñgyoozh de ru, nde' gyicy ñi nu gad lag y der nu rcam der. Orze' zaab b icy paa la der nu nac nu rcam de ru.

<sup>13</sup> De mbecy ni Crisht nu yu' gyedz Rom, de yu nu pcui Ñgyoozh gal nu pcui ga'm de ru, de yu ze' zeed dey ñgyoozh ni der. Nunu ni' zil' Marc, yu nu na gal nu na tub iñä, yu ze' zeed yu ñgyoozh ni der.<sup>14</sup> Nunu nap

mnii nu der losa'r gal mod nu rlagy ñi ornu dzeel ru  
dey.

Orze' Ñgyoozh gyicy mi nu cheti ri añ ni dela de ru  
mbecy ni Crisht.

## 2 San Pedro

### Bed zeed yu ñgyoozh ni de mbecy ni Crisht

<sup>1</sup> Yä Simoo Bed nacä tub aposht ni Jesucrisht nunu ricyä de coz nu rlagy mi. Orze' ya caä gyicy ii nu zeedä ñii lo der. Bi byac der mbecy nu ricy cup consuel nu na gal nu na consuel nu ricy cup ya. Nunu consuel ze' tona' la sac ñi. Ni' zi'l na consuel nu ricy cup de ru nu nac nu Jesucrisht ricy mi mod nu se'ñ. Mi ze' nac mi Ñgyoozh ni den, nunu nac mi biñ nu co mbañ de ub na.

<sup>2</sup> Orze' Ñgyoozh gyicy mi faboor num der, nunu bded ru' ga' la nap gyicy num der. Nunu gyicy mi nu cheti ri añ ni der. Ni gyicy num der nu nac nu yu' lor mi, nunu nu nac nu yu' lo der Shuaan den Jesuuz.

### La na mbecy ni Crisht

<sup>3</sup> Orze' Ñgyoozh, nu nac nu dzi rcyiiñ mi, briic mi dela coz nu galagy ñi ni den par nu cyiñ na gal mod nu rlagy ñi, nunu par nu gyicy na de coz nu bi ca lo cuen nu gyicy na lom. Ni b icy mi nu nac nu yu' lon mi. Nunu laab mi blosum de ub na nu gyac den mbecy lily na gal nu lily na' ub mi, nunu blosum de ub na nu gyac den mbecy nap gal nu napa' ub mi. <sup>4</sup> Nu nac nde', orze' Ñgyoozh rbic mi dela coz nu bi mniim nu segur la cuic mi ni den. Nunu de coz ze', nde' tona' la coz ily, nunu tona' la coz nu dzi sac. Gun par nu nac de nu nde', orze' de ru gyac der gal nu na Ñgyoozh. Orze' de ru wanur gal nu rnu de mbecy nu yu' gyishlombecy ii nu nac de shcab shiñ na nu ricy cup dey. <sup>5</sup> Nde' nu rlagy ñi nu gyicy der tub fers nu cue' nu tub lo zi'l nu gyicy cup der consuel lo Jesuuz, sinu ni' zi'l rlagy ñi nu gyicy der coz nap. Nunu cue' nu tub lo zi'l nu gyicy der coz nap, sinu ni' zi'l b icy der nu gad lagy ru ca na coz nu rlagy Ñgyoozh. <sup>6</sup> Nunu cue' nu tub lo zi'l nu gad lagy der ca na coz nu rlagy Ñgyoozh, sinu ni' zi'l rlagy ñi nu nap gyub ic der ub ru. Nunu cue' nu tub lo zi'l nu nap gyub ic der ub ru, sinu ni' zi'l rlagy ñi nu pasez gagye der ca na la coz nu yad. Nunu cue' nu tub lo zi'l nu pasez gagye der, sinu ni' zi'l rlagy ñi nu gyicy der dela coz nu ca lo cuen nu gyicy der par lo Ñgyoozh. <sup>7</sup> Nunu cue' nu tub lo zi'l nu gyicy der de coz nu ca lo cuen nu gyicy der par lo Ñgyoozh, sinu ni' zi'l rlagy ñi nu gazañ lagy der losa'r. Nunu cue' nu tub lo zi'l nu gazañ lagy der losa'r, sinu ni' zi'l rlagy ñi nu ca der dey.

<sup>8</sup> Benu de ru zaab ricy lar de coz ze', orze' cyiñ der nim lat nu rded ru gyishlombecy ii, nunu walab nu leew la bdu' lo der Shuaan den Jesucrisht. <sup>9</sup> Tees de mbecy nu wayicy de coz ze', de yu ze' na dey gal nu na

lo ca', o na dey gal nu na mbecy nu wacsac nap. Mnit lagy dey nu bi byecy de cyi nu b icy yu gulas. <sup>10</sup> Nde' nu de ru, b icy na, bloo lo der nu gyicy ru nu gabe nu rishli gaal Ñgyoozh blosum der nunu p cuim der nu gac ru nim. Benu ni gyicy der, orze' rila walaa yaar de coz nim. <sup>11</sup> Nunu benu ni gyicy der, orze' nde' nañ gal nu na nu gyal ro' ni nez nu chu' der ze' nu riib ic Shuaan den Jesucrisht, biñ nu co mbañ de ub na, tub la.

<sup>12</sup> Nde' nu yä zaab rnëe la nu gyeza' lagy der dela nde', mas bi rad lagy der, bzu fert der nu nac de riidz rishli nu bdulyuu ni der. <sup>13</sup> Orze' lat nu ya mbaña, orze' ya rnii töö nu rlagy ñi nu döö rishlo der nu nac de consef nu mnëe ze'. <sup>14</sup> Orze' Shuaan den Jesucrisht bi briic mi nu gad lagya nu sñuu ga rüü gyishlombecy ii. <sup>15</sup> Nde' nu yä gyicyä ca na la coz nu gac gyicyä par nu gyeza' lagy der de coz ze' despuees ornu bi guta.

### De mbecy nu bzaac gyel lily ni Crisht

<sup>16</sup> Ornu blyuu dë ni der nu Shuaan den Jesucrisht dzi coz ily ricy mi, gal nu de riidz nu rzat nu cyid mi tuuba' tir, walab nu blyuu ni der nu rishtoo nu bloo ic zi'l dë. Gun bzaac urlo la dë Shuaan den Jesucrisht nu gyel lily nim. <sup>17</sup> Bzaac dë ornu Ñgyoozh Uz den byabic mi gyel mbecy nim, nunu ornu b icy Ñgyoozh nu rabee nu dzi lily na laab mi ze'. Ni b icy Ñgyoozh ornu bzab ti'm nu mniim tub mod nu tona' la cyit na. Orze' nam: "Mi ii I'ñä nu tona' la rca. Nunu tona' la yet lagya", nam.

<sup>18</sup> Ub la dë güeñä de riidz nu mniim ze'. Nunu gashtal gyibaa la bruuñ. Lat ze' yu' dë nu Shuaan den Jesuuz too b icy ze' nu bruu zac gyel lily ni Ñgyoozh.

<sup>19</sup> Orze' nu nac de coz nu bzaac dë, ricy ñi nu rabee nu rishli de riidz nu bzeeñ de yu nu mnii por cuen ni Ñgyoozh. Nunu nap ricy der benu ricy cuen der ñii. Gun de riidz ze' nañ gal nu na tub yaa gyi gyegy nu rbic yaa ze' nu cow. Orze' b icy cuen der de riidz ze' gashtal za' yu la ornu cyid Jesuuz tuuba' tir, biñ nu na gal nu na bel rza' yu. Orze' mi ze' cuic mi nu gad lagy der dela coz. <sup>20</sup> Tees coz nu ricy zir ñi presis, nde' nu caa ic der de riidz ii: Ni tub la mbecy a' ricy cup yu rishbeey nu niiy lac yaruu de riidz nu bzeeñ de yu nu mnii por cuen ni Ñgyoozh nu shcab ni ub zi'l yu. <sup>21</sup> Gun ni tub la yu nu bzeeñ riidz ni Ñgyoozh wanseeñ dey ni tub la riidz nu bruu nañ lardoo ub zi'l dey, sinu de yu ze' guc dey mbecy nu mnii por cuen ni Ñgyoozh. Orze' Espiriit Yon nim byub ic mi nañ lardoo dey.

### De mbecy nu rlyuu coz rguu

**2** Tees ni' zi'l gu' mbecy nu mnii fals de coz ni Ñgyoozh lat de mbecy Israeel, nunu ni' zi'l chu' mbecy nu glyuu coz fals lat de ru. De yu ze' ngach lyuu dey de coz fals nu gruu nañ shcab ni ub zi'l dey. Orze' nde' gyicy ñi nu gnu de mbecy. Orze' ni mod gyicy dey par nu gabe nu a' nac dey mbecy ni Shuaan den Jesuuz, biñ nu briish cyi dey. Orze' nu nac nu nde' dzi dzach cha dey lo cashtig.<sup>2</sup> Orze' zigy mbecy gyicy dey de coz nu ricy de yu ze'. Ricy cup dey de lo la bis. Nunu nu nac de yu ze' shiñ rnii mbecy ni de coz rishli nu ricy de mbecy ni Crisht.<sup>3</sup> Nu nac nu dzi zaab dey ich tiñ, nde' nu ricy dey gan de ru nu nac de coz fals nu rlyuu dey ni der. Orze' bi gulas tona' la Ñgyoozh bi mniim nu cha dey lo cashtig, nunu tona' la bi rac tiem bi ca lo cuen nu nit lo dey.

<sup>4</sup> Gun Ñgyoozh wangyicy sulagy mi ni de anc ornu b icy dey cyi, sinu pshet lag mi dey gably. Orze' bzeeñ mi dey tub ze' nu cow. Nañ gal nu na nu cacuñ dey par nu biyu' choow dey gashtal ornu shuub dzi nu gri beem ni dey.<sup>5</sup> Ni' zi'l Ñgyoozh wangyicy sulagy mi ni de mbecy nu gu' gulas, sinu pshet mi gyey too de mbecy a' nap ze'. Nomaas Noé zi'l bloo nap mi yu, gal nu se gagy mbecy, gun yu ze' mniy lo de mbecy nu chu' dey tub mod nu nap.<sup>6</sup> Orze' ni' zi'l Ñgyoozh mniim nu cuic mi cashtig ni de mbecy Sodoma gal nu de mbecy Gomorra nu nit lo dey. Orze' pca gyi de gyedz ze' gal byadi'ñ lañ, gun nde' cuic ñi nu gad lagy de mbecy a' nap nu chu' par lo nu gyicy cuidad dey ub yu.<sup>7</sup> Tees Lot guc yu tub mbecy nap. Orze' tona' la deet guc nañ lardooy nu nac de bis bag nu b icy cup de mbecy a' nap ze'. Nde' nu Ñgyoozh b icy mi nu bruu nap yu ni cashtig ily ze'.

<sup>8</sup> Orze' yu ze' mbecy nap nu pcyiñ lat de mbecy a' nap ze'. Orze' bzac ziy nañ lardooy ornu bzaac yu nunu güeñ yu de coz a' nap nu b icy de yu ze' de dzi la. Bzac ziy nañ lardooy par nu nac de mbecy a' nap.<sup>9</sup> Orze' Ñgyoozh Shuaan den rad lagy mi lac mod co nap mi de mbecy nu ricy mod nu rlagy ub mi lat nu rzac deet dey. Nunu rad lagy mi lac mod gyicy mi par nu cue' gruu de mbecy a' nap lo cashtig gashtal shuub la dzi nu gri beem ni dey.<sup>10</sup> Nunu cuic mi cashtig ni dela mbecy nu shet ic nu gyicy la zi'l coz a' nap nu rgyiñ lagy yu lo, gal nu dela mbecy nu walagy zuub gyidag nim. Nac dey mbecy nu ricy cyigy ic. Nac dey mbecy nu wacha lagy. Ni wacchib dey nu nii ziy ni de anc nu yu' gyibaa.<sup>11</sup> Tees de anc ni Ñgyoozh, mas fert zir dey nunu ruub zir dey par de mbecy a' nap ze', tees par lo Shuaan den Jesuuz, rila wagnii dey nu yu' falt ni de mbecy a' nap ze'.

<sup>12</sup> De mbecy a' nap ze' na dey gal nu na bañ gyish. Sac la shcab ni ma, sinu ricy ma coz nu druu nañ lardooy zi'l ma. Bruu zac ma gyishlombecy tub lo zi'l par nu cub mbecy ma, nunu cut dey ma. Orze' de mbecy a' nap ze' rnii zi dey ni coz nu wagyet lag dey cuen. Orze' de yu ze' nit loy laaba' gal mod nu nit lo de bañ gyish ze'.<sup>13</sup> Rzac zi dey nu nac nu ricy dey nu rzac zi reña'

mbecy. De yu ze' rzu bich dey nu nac de gusht nu ricy dey tiem na zi'l. ¡Tona' la to' lo ornu yatublaazh dey nu de ru lat sa' ni der, gun lat ze' ricy dey gusht niy nu rguuy de ru!

<sup>14</sup> Wac la zac dey tub biñ mñaa, orze' lueg la shiñ rnii too dey lom. Nunu wacheca la dey nu ricy yu cyi. Ricy dey gan mbecy nu a' fert ricy cup consuel lo Crisht. Bi gubee nañ lardooy dey nu ye rzac yu lo la coz. Nac dey mbecy byanduu.<sup>15</sup> Gudza dey. Wangyicy dey coz nu rlagy Ñgyoozh, gun bruu chu dey nez rishli nim. Ricy dey gal nu b icy Balaam, i'ñ Beor. Yu ze' b icy yu coz a' nap par nu gyicy yu gan tiñ.<sup>16</sup> Tees tub bur, mas wa-gac nii ma, tees mnii ma riidz nu rnii mbecy. Orze' mnii ma nu yu' falt niy. Orze' wansaan ma nu gyicy yu coz ton nu mnii tooy nu gyicy yu.

<sup>17</sup> De mbecy nu rlyuu coz a' nap ze' na dey gal nu na tub zo wach nu sac nis nañ. Na dey gal nu na za nu ta' baa, lugaar nu cuic ñi gyey, canu za nu biñ. Ñgyoozh bi mniim nu chu' dey ze' nu blaazha' zir cow par tub la.

<sup>18</sup> Gya ga la rnii dey riidz le', riidz nu wacyiiñ. Orze' de yu ze' ricy dey gan de mbecy nu sa druu chu lat de mbecy nu gudza. Ricy dey gan de mbecy ze' nu nac nu rsaap dey lagy yu.<sup>19</sup> Rnii dey nu sac patroq ni de mbecy ze'. Orze' gac gyicy de mbecy ze' la zi'l coz nu rlag yu. Ze' ub la dey zu patroq niy, gun de cyi nu ricy nu rnu dey, nde' nac ñii patroq ni dey. Gun dela coz nu zetib ic nañ lardooy mbecy, nde' yac ñii patroq ni dey.

<sup>20</sup> Benu mbecy bi b icy yu gan gucay nu ricy yu de coz cyi nu riib ic de mbecy nu yu' gyishlombecy ii nu nac nu gu' loy Shuaan den Jesuuz, biñ nu co mbañ de ub na, ze' benu cush cyay nu gyicy yu cyi ze' tuuba' tir, nunu benu cyi ze' chetib ic ñi nañ lardooy, orze' shiñ zir na nañ lardooy dey gyac gaze' gal nu na dey nu loga.<sup>21</sup> Na ornu bi gud lagy dey lac mod gyanap dey lo Ñgyoozh, ze' benu laa yaa dey de riidz nim nu mnii mbecy lo dey, orze' nap zir benu cue' la ñgyad lagy dey.

<sup>22</sup> Tees nu nac de yu ze', orze' byu' niñ gal nu rnii tub nac riidz nu rishli nu nil rnii mbecy. Orze' rnii dey: "Che' rab ma coz nu row ma. Gaze' nu cush cya ga' ma gow ma ñii tuuba' tir. Ze' cuch gus nu sa blaagy lo nis cacy, orze' cush cya ga' ma nu dudub ma lo biñ tuuba' tir", rnii dey.

### Ornu Jesuuz cyid mi tuuba' tir

**3** Orze' der b icy na nu dzi rcä, nií gyicy cyup nu zeeda lor. Orze' lo ruplaa gyicy ze' rlagya gyicya nu nap gash der shcab nu nac de consef nu dricä ni der.<sup>2</sup> Bicy der nu gyeza' lagy ru ni de coz nu mnii de yu nu mnii por cuen ni Ñgyoozh gulas, gal nu ni de coz nu mnii Shuaan den Jesuuz, biñ nu co mbañ de ub na, nu gyicy den, de coz nu blyuu de aposht nim ni der.

<sup>3</sup> Nu loga la rlagy ñi caa ic der tub coz nu neq ii: ornu bi yad shuub dzi nu ded ni gyishlombecy, orze' gruu zac mbecy nu gyicy ca na la coz a' nap nu yu' nañ lardooy lat nu rcyiñ yu gyishlombecy ii. Nunu de yu ze' gubdzaa dey de ru.<sup>4</sup> Orze' nii dey: "Beni, ¿la zi coz rac? ¿Lagu wacyiid Crisht gal nu mniim nu cyid mi tuuba' tir? Na bi blazh de gyitoo bel ni den gut yu. Ze' dela

coz ni gyishlombecy ni zi'l zuñ gaal zi nese nu bzub gyi'ñ." Ni mod gnii de mbecy rgubdzaa ze'.<sup>5</sup> Orze' de mbecy ze' ricy go' la dey ub yu nu walagy yu gad lagy yu nu ton'a' la gulas psa' lagy Ñgyoozh baa nu nac riidz nim. Nunu lugaar ze' nu yu' nis, laab ze' psa' lagy mi yu wach. Nunu nu nis psa' lagy mi ñii. <sup>6</sup> Nunu ni' zi'l despuees Ñgyoozh mnit lom gyishlombecy nu nac nis gyey nu bet tiem ni Noé.<sup>7</sup> Ze' baa nu gyishlombecy nu zu na, bi zuu lañ nu chañ lo gyi laaba' par nu nac riidz ni Ñgyoozh. Orze' de mbecy a' nap cha dey lo gyi ze' ornu shuub dzi nu ri bee Ñgyoozh ni de mbecy. Dzi ze' niim nu yu' falt ni dey. Orze' rlagy ñi cha dey lo cashtig.

<sup>8</sup> Tees der bicy na nu dzi rca, cue' nit lagy der nu par Ñgyoozh, biñ nu nac Shuaan den, par mi ze' tub dzi, nde' nañ gal nu na tub miily ña'n par de ub na. Ze' tub miily ña'n, nde' tub dzi zi par mi ze'.<sup>9</sup> Walab nu dzi ricy gul lagy mi nu gyicy mi de coz nu mniim nu gyicy mi, gal nu rnii too la be mbecy, sinu mi ze' dzi pasez mi nu de ru. Gun mi ze' walagy mi nu nit lo ni tub mbecy, sinu rlagy mi nu ne' dela mbecy de cyi nu ricy yu.

<sup>10</sup> Tees shuub dzi nu cyid Shuaan den Jesuuz tuuba'tir, tub tiem nu rila wagad lagy na, gal nu dru'ña tub gubaan. Orze' nu tub nu zu redz ily, orze' nit baa. Orze' nit lo dela coz nu ta' baa nu nac gyi. Orze' ca gyi gyishlombecy gal nu dela coz nu yu' loñ.

<sup>11</sup> Orze' benu ni mod nit lo dela coz, ricy ñi presis nu chu' der gal mod nu rlagy Ñgyoozh, nunu rlagy ñi nu gyicy der gal mod nu yad ñi nu ricy de mbecy nim.

<sup>12</sup> Orze' blez der gal ornu shuub dzi nu cyid Jesuuz, biñ nu nac Ñgyoozh ni den. Nunu gyicy der ca na la coz nu gac gyicy ru par nu dzach shuub tiem ze'. Orze' tiem

ze' nit lo baa nu nac gyi. Nunu dela coz nu ta' baa gzun ñi nu nac gyi ze'.<sup>13</sup> Tees de ub na rlez naa gal or gruu zac tub baa cub nu tub gyishlombecy cub, dub gal mod nu mnii Ñgyoozh. Orze' lugaar ze' chu' dela mbecy nap, de yu nu ricy gal mod nu rlagy ñi.

<sup>14</sup> Nde' nu der bicy na nu dzi rca, lat nu rbez der de coz ze', orze' bicy der dela coz ca na la nu gac nir, gun ornu Ñgyoozh gyap mi der, orze' lat ze' nap yu' nu der losa'r, nunu sac ni tub la falt ni der.<sup>15</sup> Rlagy ñi nu gad lagy der nu Ñgyoozh, biñ nu nac Shuaan den, dzi pasez mi num den par nu gad mod nu gruu mbañ den. Orze' bicy na Baly, yu nu dzi rca den, ni' zi'l bi bzeed yu gyicy lo der nu rniiñ laaba' de riidz ii. Pcaay lo gyicy ze' dub gal nu na shcab nu briic Ñgyoozh niy.

<sup>16</sup> Lo tub ga la gyicy nu pcaay mniiy de riidz ii. Mas yu' lugaar lo de gyicy ze', ze' nu ta' de riidz nu dzi biigy par nu gyet lag na cuen. Orze' de mbecy nu a' nap na shcab ni gal nu de mbecy a' fert pcan dey de riidz nu pcaa Baly, gal nu ricy dey nu reña' riidz ni Ñgyoozh. Orze' nu nac nde' nit lo dey.

<sup>17</sup> Nde' nu der bicy na nu dzi rca, como de ru bi gud lagy ru de coz ze' anzir nu gac ñii, nde' nu bicy cuidad der ub ru nis gruu chur lo Crisht nu nac de riidz rguu nu nii mbecy a' nap lo der. Gun orze' cue' nu checa der nu gzu fert ru nu nac de coz ni Crisht,<sup>18</sup> sinu nap zir bdu' lo der Shuaan den Jesucrisht, biñ nu co mbañ de ub na, nunu zaab gyicy zir mi faboor nu nap gyicy num der.

¡Rlagy ñi nu gyabic den gyel mbecy nim par dub laa tiem! ¡Laab ni gac ñii!

# 1 San Juan

## Biñ nu la riidz ni Ñgyoozh

**1** Caa dē lo gyicy nu zeed dē lo de ru de riidz ni biñ nu bi zu nil nese anzir nu gzub gyi' gyishlombecy. Dē ya güeñ dē riidz nu mniim. Nunu bzaac urlø lą dēm. Gun bgüii dē lom, nunu gul yaña dēm. Mi ze' nac mi biñ nu la riidz ni Ñgyoozh, biñ nu rbic gyel mbañ. **2** Orze' bruu zac biñ nu rbic gyel mbañ ze' lat dē ya. Nunu bzac dēm, nunu neę dē lo der cyu nac biñ nu rbic gyel mbañ nu rila walazh. Mi ze' biñ nu nil gulas nac nu Ñgyoozh, Uz den. Tees Ñgyoozh, Uz na, b icy mi nu bruu zac mi lo dē ya. **3** Orze' shaal dē lo der de riidz nu güeñ dē, gal nu de coz nu bzaac dē, gun orze' gac nu der dē ya. Orze' de ub na gac du den Ñgyoozh Uz na gal nu I'ñ mi Jesucrisht. **4** Orze' rcaña dē de riidz ii, gun orze' yet lagy dē gashtal ze' nu wagaca' la.

## Ñgyoozh nac mi biñ nu rbic yaa

**5** Nii riidz nu güeñ dē nu mnii Jesucrisht lo dē. Nunu shaal dē ñii lo der: Ñgyoozh nam gal nu na ze' yu' yaa, gun dzi yon mi. Par lo Ñgyoozh sac la cyi. **6** Benu niin nu nac dun mi, ze' laab tiem ze' rded na ricy na cyi, orze' rguun, nunu wagicy den gal nu rlagy Ñgyoozh. **7** Tees benu rded na ze' nu yu' yaa gal nu Ñgyoozh zum ze' nu yu' yaa, orze' nac du den losa'n. Nunu nu nac reñ I'ñ mi, Jesucrisht, gyecy dela cyi den.

**8** Benu niin nu sac cyin, orze' rguun laab ub na, nunu wacsaan den nu chetib ic coz rishli nañ lardooy. **9** Ze' benu shuub ru' den de cyi nu ricy na, orze' mi ze' ricy paam, nunu ricy mi coz nu se'ñ. Orze' gyicy sulagy mi dela cyi den, nunu cyib mi dela coz cyi nu ricy den.

**10** Benu nii den nu sac cyin, orze' ricy na nu Ñgyoozh nac mi tub biñ rguu, nunu wacsaan na nu chetib ic riidz nim nañ lardooy.

## Crisht nac mi biñ nu ne' ic ni den lo Ñgyoozh

**2** Der yu feñ, ya caña de coz ii lo gyicy nu zeed dē lor, gun orze' cue' gyicy der cyi. Tees benu tub mbecy gyicy yu cyi, orze' zu tub biñ nu ne' ic ni den lo Ñgyoozh, Uz den. Mi ze' Jesucrisht. Nunu mi ze' ricy mi coz nu se'ñ. **2** Jesucrisht guc mi tub gun nu gua lo Ñgyoozh, gun orze' gyicy sulagy mi de cyi den: nunu walab tub lo zi'l de cyi de ub na, sinu ni' zi'l de cyi de mbecy nu yu' dutuub la gyishlombecy.

**3** Benu gyicy yac den de riidz nu rnii Ñgyoozh, orze' rad lagy den nu segur la yu' lon mi. **4** Tees benu tub mbecy rniiy: "Ya yu' lo Ñgyoozh", rniiy, ze' benu wagicy yu gal nu rnii, orze' yu ze' nac yu tub mbecy rguu,

nunu wacsaan yu chetib ic coz rishli nañ lardooy. **5** Ze' mbecy nu ricy yac de riidz nim, yu ze' rca za' lay mi. Nunu nde' mod nu gad lagy na nu tub zi'l nac naa dun mi. **6** Mbecy nu rnii nu rcyiiñ nu Ñgyoozh, yu ze' rlagy ñi nu chesay gal nu gusa Jesucrisht.

## Crisht briic mi tub riidz cub nu gyicy mbecy

**7** Der b icy na, riidz nu rcaña lo gyicy nu gyicy der, nde' nu ca tub ca tub zi'l der losa'r. Walab nu sa güeñ der ñii, sinu nde' riidz nu bi gush der nese nu bzub gyi' nu ricy cup der consuel lo Crisht. **8** Mas ni, tees riidz nu rcaña ii, nii tub riidz cub nu rnii coz rishli nu nac Crisht nu coz rishli nu nac de ub na. Gun na bi rded tiem nu chu' den ze' nu cow, nunu Jesucrisht bi rlyuum yaa nu rishli lo den.

**9** Benu tub mbecy rniiy nu rded yu ze' nu yu' yaa nu rbic Crisht, ze' gabee rzi lagy yu lo b icy yu, orze' yu ze' gabee rded yu ze' nu cow. **10** Yu nu rca b icy, yu ze' rded yu ze' nu yu' yaa nu rbic Crisht. Ni tub la coz wac gyicy ñi nu gadzay. **11** Tees yu nu rzi lagy lo b icy, yu ze' rcyiiñ yu nunu rded yu ze' nu cow. Yu ze' wagad lagy yu ni ca par chay, gun ze' nu cow ze' ricy ñi nu wacsac yu.

**12** Ya zeeda gyicy ii lo de ru yu nguzh, gun Ñgyoozh bi b icy sulagy mi de cyir nu nac Jesucrisht. **13** Ya zeeda gyicy ii lo de ru yu bel, gun de ru nap yu' lor Ñgyoozh, biñ nu nil zu nese anzir nu gzub gyi' gyishlombecy. Ya zeeda gyicy ii lo de ru yu feñ, gun bi b icy der gan nuras.

**14** Ya zeeda gyicy ii lo de ru yu nguzh, gun bi yu' lo der Ñgyoozh Uz den. Ya zeeda gyicy ii lo de ru yu bel, gun de ru nap yu' lor Ñgyoozh, biñ nu nil zu nese anzir nu gzub gyi' gyishlombecy. Ya zeeda gyicy ii lo de ru yu feñ, gun fert der nu nac de coz ni Crisht, nunu "O" mnii der nu gutib ic riidz ni Ñgyoozh nañ lardooy der, nunu bi b icy der gan nuras.

**15** Cue' ca der gyishlombecy ii, ni de coz nu yu' gyishlombecy, gun benu ca na mbecy cay gyishlombecy, orze' wacay Ñgyoozh Uz na. **16** Gun de coz nu druu gyishlombecy ii, nde' coz a' nap. Druu nu rlagy dey shiñ gyicy yu. Druu nu ye rzac dey lo de gyel nap. Druu nu le' dey. Dela coz ze' walab lo Ñgyoozh Uz den druuñ, sinu druuñ gyishlombecy. **17** Tees ded ni gyishlombecy nunu ded ni de coz a' nap nu rlagy mbecy nu gyicy yu, tees yu nu ricy gal nu rlagy Ñgyoozh, yu ze' cui mbañ yu tub la.

### De mbecy nu rza contr ni Crisht

<sup>18</sup> Der yu feñ, na yu' den tiem nu bi rlazh gyishlombeçii. Nunu bi güeñ der nu bi yad tub mbecy nu zay contr ni Crisht. Tees mas na bi guazañ mbecy bi biid yu nu guay contr ni Crisht. Nde' nu rad lagy den nu bi yu'n tiem nu bi rlazh gyishlombecy ii. <sup>19</sup> Tees de mbecy nu za contr ni Crisht ze' bruu dey laab lat den. Tees rishli wangac nu dey den. Gun benu ñgyac nu dey den, orze' waruu dey lat na. Tees nu nac nu bruu dey lat den, orze' rad lagy den nu ni tub la dey wangac nuy de ub na.

<sup>20</sup> Crisht briic mi Espiriit Yon ni Ñgyoozh ni der. Orze' dela der rad lagy der de riidz rishli. <sup>21</sup> Ya walab nu zeeda gyicy ii lo der par nu wagad lagy der de riidz rishli ni Crisht, sinu par nu bi rad lagy der ñii. Nunu de ru rad lagy der nu rila wacyuu gyel rguu lat de riidz rishli. <sup>22</sup> Orze' ¿cyu nu mbecy rguu ze'? Yu ze' yu nu rnii nu Jesucrisht, mi ze' walab Mesías, biñ nu ca lo cuen nu cyid, rniiy. Nunu laab yu ze' yu nu za contr ni Crisht. Yu ze' rdiily loy lo Ñgyoozh, Uz den, nu lo I'ñ mi Jesuuz. <sup>23</sup> Cyu zi'l yu nu rdiily lo lo Jesucrisht, I'ñ Ñgyoozh, ni' zi'l rdiily loy lo Ñgyoozh Uz na. Tees cyu zi'l mbecy nu "O" rnii ni Crisht, I'ñ Ñgyoozh, yu ze' ni' zi'l yu' loy Ñgyoozh.

<sup>24</sup> Bicy der nu caa ic ru de riidz nu güeñ der nese nu loga la. Gun benu ni gyicy der, orze' rcyiñ der nu Crisht, I'ñ Ñgyoozh, nunu rcyiñ der nu Uz mi. <sup>25</sup> Nunu coz nu mnii Ñgyoozh nu segur la cuic mi ni den, nde' nu cui mbañ den tub la.

<sup>26</sup> Ya cäa de riidz ii nu zeeda lo der, de riidz nu rnii nu cyu de mbecy nu rlagu de ru. <sup>27</sup> Tees de ru bi ricy cup der Espiriit Yon nu briic Crisht ni der. Orze' walagy ñi ni tub la mbecy nu lyuu ni der. Gun laab mi lyuum ni der dela coz. Nunu de coz nu lyuum ze', nde' coz rishli, walab coz rguu. Orze' rlagu ñi nu cyiñ nu der Crisht dub gal mod nu lyuu Espiriit Yon ni der.

<sup>28</sup> Na de ru yu feñ, rlagu ñi nu cyiñ nu der Crisht, gun orze' cuic der baloor ornu gruu zac mi tuuba' tir. Gun orze' cue' nu gat lo den lat nu zu den lom ornu cyid mi. <sup>29</sup> De ru bi rad lagy der nu Jesucrisht dzi nap mi. Orze' ni' zi'l rlagu ñi nu gad lagy der nu dela mbecy nu ricy gal nu rlagu Ñgyoozh, de yu ze' nac yu i'ñ mi.

### De mbecy nu nac i'ñ Ñgyoozh

**3** Mnii ñuu too der nu tona' la rca Ñgyoozh Uz na de ub na. Par nu tona' la rcam de ub na, nde' nu rnii nu nac naa i'ñ mi, rnii. Nunu rishli gaal nac naa i'ñ mi. Nde' nu de mbecy nu yu' gyishlombecy ii wagad lagy dey cyu nac naa, como ni' zi'l wangad lagy dey cyu Ñgyoozh. <sup>2</sup> Orze' de ru bicy na nu dzi rca, bi nac den i'ñ Ñgyoozh. Mas gaal zi gabee wagad lagy nap den lac mod na den gyac na par lo, tees rad lagy den nu ornu Jesuuz gruu zac mi tuuba' tir, orze' gzac den gal nu na la ub mi, gun orze' gyac den gal nu na gaal mi. <sup>3</sup> Gun dela mbecy nu ni mod rgyish lo lom, ricy dey nu cue' chu' falt niy gal nu Jesucrisht sac falt nim.

<sup>4</sup> Tees dela mbecy nu ricy cyi, de yu ze' zay contr ni coz nu rlagu Ñgyoozh. Gun cyi, nde' la zi'l coz nu walagy Ñgyoozh. <sup>5</sup> De ru rad lagy der nu Jesucrisht biid mi gyishlombecy ii par nu cyib mi de cyi nu ricy cup mbecy. Nunu mi ze' rila a' nac mi mbecy cyi. <sup>6</sup> Orze' dela mbecy nu rcyiñ nu Crisht, de yu ze' wagacy dey cyi. Tees dela de mbecy nu ricy cyi wagad lagy dey la nam. Ni wagad lagy dey cyu nac mi. <sup>7</sup> De ru, yu feñ ne, cue' zaan ru nu guu ni tub la mbecy der, gun de mbecy nu zaab ricy la de coz nu se'ñ, de yu ze' nac dey mbecy nap gal nu mi ze' nac mi biñ nu dzi nap. <sup>8</sup> Tees de mbecy nu zaab ricy la cyi, de yu ze' nac yu mbecy ni nuras. Gun nuras ricy yu cyi nese nu bzub la gyi' gyishlombecy. Gun par nu nac nde' zi'l biid Jesuuz, I'ñ Ñgyoozh, par nu nit lom dela coz nu ricy nuras.

<sup>9</sup> Ni tub la mbecy nu nac i'ñ Ñgyoozh walab nu zaab ricy lay cyi, gun Ñgyoozh rcyiñ mi nañ lardooy dey. Nunu wagacy dey cyi, gun nac dey i'ñ mi. <sup>10</sup> Bi rabee ca na mbecy nu nac yu i'ñ Ñgyoozh, nunu bi rabee ga' ca na mbecy nu nac i'ñ nuras, gun cyu zi'l mbecy nu wagacy coz nap o nu wacay de bicy yu, yu ze' a' nac yu ni Ñgyoozh.

### Ca den losa'n

<sup>11</sup> Nii de riidz nu bi güeñ der nese nu loga la: Nu rlagu ñi nu ca tub ca tub zi'l den losa'n. <sup>12</sup> Cue' gac naa gal nu na Caiing. Yu ze' tub mbecy ni nuras. Biit yu bicy yu. ¿La gyi' biit yu bicy yu? Gyi' nu shiñ ricy ub yu. Ze' bicy yu, Abeel, yu ze' nap bicy yu.

<sup>13</sup> Der bicy na, cue' cha nu ic der benu de mbecy ni gyishlombecy rzi lagu lo der. <sup>14</sup> De ub na bi bded lon lo lugaar ze' nu yu' de mbecy gut. Nunu bi guud nu cui mbañ den tub la. Rad lagy den nu cui mbañ na nu nac nu rca den losa'n. Orze' mbecy nu waca losa' nay gal nu na mbecy nu bi gut. <sup>15</sup> Dela mbecy nu rzi lagu lo losa', de yu ze' gal gaa la nay nu de mbecy nu rut losa'. Nunu de ru rad lagy der nu ni tub la mbecy nu rut losa' a' nac yu mbecy nu cyiñ nu Ñgyoozh tub la. <sup>16</sup> Bi rad lagy den lac na mod nu caan losa'n, gun Jesucrisht pshet ic mi gut mi nu nac de ub na. Orze' ni' zi'l mod, de ub na rlagu ñi nu shet ic na mas gat na nu nac losa'n. <sup>17</sup> Ze' benu tub mbecy yu' la coz niy, ze' zac yu tub losa'y nu ricy falt ñi niy, ze' wabic yu niy, orze' mbecy, yu nu wabic ze', wacay losa'y nañ lardooy gal mod nu rlagu Ñgyoozh. <sup>18</sup> De ru yu feñ ne, cue' nu niin nu caan losa'n nu ru' zi'l na, sinu gyicy na tub mod par nu gabe nu rishli rcaan losa'n.

### Wadzib la den gyecha'n lo Ñgyoozh

<sup>19</sup> Ni mod rad lagy den nu rishli zan faboor ni Ñgyoozh, nunu wat lo den ornu gyecha'n lom. <sup>20</sup> Tees be-nu rnii toon nu yu' cyi nañ lardooy, Ñgyoozh zily zir nac mi par lardooy. Mi ze' rad lagy mi dela coz. <sup>21</sup> Der bicya nu dzi rca, benu rad lagy den nu sac cyi nañ lardooy, orze' wadzib la den nu gyecha'n lo Ñgyoozh.

<sup>22</sup> Nunu mi ze' cuic mi dela coz nu diñ na lom, gun ricy yac den ni dela riidz nim. Nunu ricy den coz nu yedzu'

lagy mi.<sup>23</sup> Nunu de riidz nu mniim nu gyicy den ze', nde' nu gyicy cup den consuel lo I'ñ mi, Jesucrisht, nunu ca tub ca tub zi'l den losa'n, gal nu mi ze' mniim nu ni gyicy den.<sup>24</sup> De mbecy nu rzuub gyidag ni de riidz nim, de yu ze' rcyiiñ nu dey mi, nunu mi ze' rcyiiñ num dey. Nunu nu nac de nde', rad lagy den nu mi ze' rcyiiñ num de ub na. Rad lagy den par nu nac Espiriit Yon nim, biñ nu briic mi ni den.

**Yu nu ricy cup Espiriit ni Ñgyoozh, nunu yu nu ricy cup espiriit nu za contr ni Crisht**

**4** De ru b icy na nu dzi rcä, cue' cheña lagy der ni de mbecy ornu ricy dey nu rniiy por cuen ni Ñgyoozh, sinu b icy der preb dey ben a laab Espiriit Yon ni Ñgyoozh rcyiiñ mi nañ lardoo dey, uti walab. Gun gyishlombecy ii bzu laa mbecy rguu nu ricy nu rnii por cuen ni Ñgyoozh.<sup>2</sup> Nii tub mod nu gac gad lagy der nu ca na mbecy nu ricy cup Espiriit Yon ni Ñgyoozh nañ lardoo: dela mbecy nu driib cuen nu Jesucrisht biid mi gyishlombecy byac mi mbecy nu rishli, orze' dela de yu ze' ricy cup yu Espiriit Yon ni Ñgyoozh.<sup>3</sup> Ze' de mbecy nu wagriib cuen de coz ze', de yu ze' a' ricy cup dey Espiriit Yon ni Ñgyoozh, sinu de yu ze' ricy cup dey tub espiriit nu za contr ni Crisht. De ru bi reñ der nu bi ca lo cuen nu cyid espiriit a' nap ze'. Nunu mas na la bi rded espiriit ze' gyishlombecy ii.

**4** De ru yu feñ nę, de ru bi nac der ni Ñgyoozh. Nunu de ru bi b icy der gan de mbecy rguu ze'. Gun biñ nu rcyiiñ nañ lardoo der, mi ze' fert zir mi gaze' nuras nu riib ic nañ lardoo de mbecy ni gyishlombecy ii.<sup>5</sup> De mbecy rguu ze' nac dey ni gyishlombecy ii. Nde' nu rnii dey de riidz nu druu gyishlombecy ii. Nunu dela de mbecy nu yu' gyishlombecy ii rzuub gyidag dey de riidz ze'.<sup>6</sup> Ze' de ub na nac naa mbecy ni Ñgyoozh. Orze' de mbecy nu bi yu' lo Ñgyoozh rzuub gyidag dey de riidz nu rnii. Tees de mbecy nu walab mbecy ni Ñgyoozh, de yu ze' wacsuub gyidag yu ni de riidz nu rnii. Orze' nu nac de nu nde' rad lagy den ca na mbecy nu ricy cup Espiriit Yon ni Ñgyoozh, biñ nu rnii de coz rishli, nunu rad lagy den ca na de mbecy nu ricy cup nuras nu rguu.

**Ñgyoozh, biñ nu rca mbecy**

**7** De ru b icy na nu dzi rcä, rlag yñ nu ca tub ca tub zi'l den losa'n. Gun nu caan losa'n, nde' coz nu bruu lo Ñgyoozh. Dela mbecy nu rca losa' nac yu i'ñ Ñgyoozh, nunu bi yu' loy mi.<sup>8</sup> Ze' de mbecy nu waca losa', de yu ze' a' yu' loy Ñgyoozh, gun Ñgyoozh nac mi biñ nu rca mbecy.<sup>9</sup> Ñgyoozh briic mi nu gad lagy den nu rcam de ub na nu nac nu bzuu nez mi I'ñ mi nu tub zi la zu nim nu biid mi gyishlombecy ii, gun orze' gad nu cui mbañ den nu nac I'ñ mi ze'.<sup>10</sup> I mod rshaal ñi lac mod rca Ñgyoozh de ub na: walab ti de ub na pcaan mi, sinu mi ze' pcam de ub na. Nde' nu gashtal bzuu nez mi I'ñ mi nu biid mi gyishlombecy par nu gac mi gun, gun orze' Ñgyoozh gyicy sulagy mi cyi den.

**11** De ru b icy na nu dzi rcä, ze' benu ni mod rca Ñgyoozh de ub na, orze' ni' zi'l de ub na ca tub ca tub zi'l den losa'n.<sup>12</sup> Gun ni tub la mbecy nigul zac yu Ñgyoozh. Tees benu ca tub ca tub zi'l den losa'n, orze' Ñgyoozh nac num de ub na, nunu rabee de coz nu ricy mi nañ lardoo den nu nac nu rcam de ub na.<sup>13</sup> Yu' tub mod par nu gad lagy den nu nac dun Ñgyoozh nunu Ñgyoozh nac num de ub na. Rad lagy der de nde' nu nac nu briic mi Espiriit Yon nim ni den.<sup>14</sup> Nunu de ya laa bzaac dę nu Ñgyoozh Uz na bzeed mi I'ñ mi biid mi par nu co mbañ mi de mbecy nu yu' gyishlombecy ii. De nde' riidz nu rshaal den.<sup>15</sup> Orze' cyu zi'l mbecy nu driib cuen yu nu Jesuuz nac mi I'ñ Ñgyoozh, orze' Ñgyoozh nac num yu, nunu yu ze' nac nuy mi.

**16** Ni mod gud lagy na nu Ñgyoozh rcam de ub na nunu guña lagy na niñ. Ñgyoozh nac mi biñ nu rca mbecy. Nde' nu de mbecy nu zaab rca la losa', de yu ze' nac nu dey Ñgyoozh, nunu Ñgyoozh nac num dey.

**17** Orze' ni mod gyac den mbecy nu ca za' la Ñgyoozh, gun orze' ornu shuub dzi nu gri beem ni de mbecy ni gyishlombecy, orze' de ub na wadziba'n, gun de ub na rded na gyishlombecy ii gal mod nu gusa Jesucrisht.

**18** Gun de mbecy nu rca de ub na, de yu ze' wadzib na loy. Nde' nu, como Ñgyoozh tona' rcam de ub na, orze' saca' la mod nu dzib den lom. Gun dzib den nu nac cashtig. Nde' nu benu ca na mbecy rdzib yu, orze' nde' gun wacabee riiñ nu b icy Ñgyoozh nañ lardooy nu nac nu rcam yu.

**19** De ub na rcaan mi, gun mi ze' pcam de ub na nu loga la.<sup>20</sup> Benu ca na tub mbecy rniiy: "Ya rcä Ñgyoozh", rniiy, ze' laab tiem ze' rzi lagy yu lo losa'y, orze' yu ze' nac yu tub mbecy rguu. Gun benu ca na tub mbecy wacay losa'y, tub mbecy nu rzac yu, ze' yegar nu caa ga'y Ñgyoozh, biñ nu wagac zac yu.<sup>21</sup> Jesucrisht mniim lo den nu gyicy na de coz ii: mbecy nu rca Ñgyoozh, yu ze' ni' zi'l rcay losa'y.

**Gyicy den gan de cyi nu yu' gyishlombecy**

**5** Dela mbecy nu zeña lagy nu Jesuuz nac mi Mesías, biñ nu ca lo cuen nu cyid, de yu ze' nac yu i'ñ Ñgyoozh. Nunu de yu nu rca Ñgyoozh Uz den, orze' ni' zi'l rca ga' dey de yu nu nac i'ñ mi.<sup>2</sup> Ornu rca den Ñgyoozh, nunu ricy den de coz nu rnii, orze' rad lagy den nu ni' zi'l rcaan de mbecy nu nac i'ñ mi.<sup>3</sup> Nu caan Ñgyoozh, nde' yaruuñ nu ricy den de coz nu rnii. Nunu de coz nu rnii, nde' walab nu dzi biigy,<sup>4</sup> gun dela mbecy nu nac i'ñ Ñgyoozh ricy dey gan de cyi nu yu' gyishlombecy ii. Nunu nu nac nu ricy cup den consuel lo Crisht, nde' nu ricy den gan de cyi ze'.<sup>5</sup> De mbecy nu zeña lagy nu Jesuuz nac mi I'ñ Ñgyoozh, de yu ze' ricy dey gan de cyi nu yu' gyishlombecy ii.

**Nu nac Jesuuz gad nu cui mbañ na**

**6** Tiem nu biid Jesucrisht, orze' wi nis mi nunu pshu reñ mi. Walab tub lo zi'l nu wi nis mi, sinu wi nis mi nunu pshu reñ mi. Nunu laab Espiriit Yon ni Ñgyoozh nac mi teshtig ni de nde'. Nunu mi ze' nac mi biñ nu

rnii nu rishli. <sup>7</sup> Orze' yu' chon coz nu ricy ñi nu gad lagy den nu Jesuuz laab mi nac mi Mesías: <sup>8</sup> nu loga la nde' Espiriit Yon ni Ñgyoozh, nu cyup nde' ornu wi nis mi, ze' nu chon, nde' ornu pshu reñ mi. Nunu lo chon de coz ze' tub zi'l mod nu rniiñ.

<sup>9</sup> "O" rnii den ni de riidz ni de coz nu bzaac mbecy. Tees sac zir de riidz ni de coz nu rad lagy Ñgyoozh, gun de riidz ze', nde' de coz nu rnii Ñgyoozh nu nac I'ñ mi Jesuuz. <sup>10</sup> Cyu zi'l mbecy nu ricy cup consuel lo Jesuuz, I'ñ Ñgyoozh, orze' bi yu' de riidz nu mnii Ñgyoozh ze' nañ lardooy. Ze' cyu zi'l mbecy nu wagiyicy cup consuel lo Jesuuz, yu ze' ricy yu Ñgyoozh nu nac mi biñ rguu, gun wancheña lagy yu ni de riidz nu mniim nu nac I'ñ mi. <sup>11</sup> Ze' de riidz ze' rniiñ nu Ñgyoozh b icy mi nu gac cui mbañ den tub la. Ze' nu cui mbañ den, nde' gad ñi nu nac I'ñ mi. <sup>12</sup> Orze' de mbecy nu nac nu Jesuuz, I'ñ Ñgyoozh, de yu ze' bi guud nu cui mbañ yu. Tees de mbecy nu a' nac nu mi ze', de yu ze' wad nu cui mbañ dey.

#### Laab nde' la riidz nu mnii Waa

<sup>13</sup> Ya zeedä gyicy ii lo de ru mbecy nu ricy cup consuel lo Jesuuz, I'ñ Ñgyoozh, par nu gad lagy der nu bi guud nu cui mbañ der tub la.

<sup>14</sup> Ricy cup den consuel lo Ñgyoozh, gun rad lagy den nu ornu rdiñ na la coz lom, orze' rzuub gyidag mi ni

den benu nde' coz nu rlag y mi. <sup>15</sup> Nunu como bi rad lagy den nu Ñgyoozh rzuub gyidag mi nin ornu rnii dun mi, orze' ni' zi'l rad lagy den nu bi ricy cup den de coz nu bdiñ na lom.

<sup>16</sup> Orze' benu ca na tub der zac ru ca na tub losa'r nu ricy yu cyi, ze' walab cyi nu gyicy ñi nu gat yu, orze' rlag y ñi nu cyiñ ru lo Ñgyoozh ni mbecy nu ricy cyi ze'. Orze' Ñgyoozh gyicy mi nu cui mbañ yu, benu nde' walab tub cyi nu gyicy ñi nu gat yu. Gun yu' cyi nu gyicy ñi nu gat mbecy. Tees walab nu rnęe nu cyiñ der lo Ñgyoozh nu nac cyi ze'. <sup>17</sup> Dela coz a' nap nu ricy mbecy laab nde' cyi. Tees yu' cyi nu walab nu gyicy ñi nu gat mbecy.

<sup>18</sup> Rad lagy den nu benu mbecy nac yu i'ñ Ñgyoozh, orze' de yu ze' wayicy dey coz cyi. Gun Jesuuz, I'ñ Ñgyoozh, rñam dey. Orze' nuras wac gyicy ras nuy de yu ze'. <sup>19</sup> Ni' zi'l rad lagy den nu nac naa mbecy ni Ñgyoozh. Nunu rad lagy den nu nuras riib ic yu dutuub la gyishlombecy ii. <sup>20</sup> Nunu ni' zi'l rad lagy den nu Jesuuz, I'ñ Ñgyoozh, bi biid mi gyishlombecy ii, nunu briic mi shcab ni den par nu gad lagy na cyu nac Ñgyoozh nu rishli. Nunu bi nac du den Ñgyoozh, biñ nu rishli, gal nu I'ñ mi Jesucrisht. Mi ze' nac mi Ñgyoozh nu rishli. Nunu mi ze' biñ nu gyicy nu cui mbañ mbecy tub la. <sup>21</sup> De ru yu feñ nę, ciudad der nu de coz nu ricy mbecy par ñgyoozh, tees walab ñgyoozh rishli.

## 2 San Juan

Rlagy ñi gad lagy na de coz rishli, nunu rlagy ñi nu caan losa'n

**1** Ya, tub yu bel nu zu riiñ ni Crisht, zeedä gyicy ii lo ru tub biñ mñaa nu pcui Ñgyoozh nu gac nim gal nu lo de i'ñ ru. Ya rishli rcä de ru, nunu walab ya zi'l, sinu ni' zi'l dela mbecy nu rad lagy de coz rishli, rca dey de ru. **2** Ya rcä de ru nu nac nu rad lagyä de coz rishli ni Crisht nañ lardög tiem na gal nu par tub la.

**3** Orze' Ñgyoozh Uz den nunu Jesucrisht I'ñ mi gyicy dem faboor nu nap gyicy num der, nunu gashni lagy mi de ru, nunu gyicy mi nu cheti ri añ ni der. Ni gyicy num den nu nac nu rad lagy na de coz rishli ni Crisht, nunu nu nac nu rca den losa'n.

**4** Ya tona' la bet lagya ornu bdzeelä la be de i'ñ ru. Nunu bzaacä nu rded dey gal mod nu rlagy ñi gal nu mnii Ñgyoozh uz den nu gyicy na. **5** Orze' na ya rnishbaä lor zan na, nu rlagy ñi nu ca tub ca tub zi'l den losa'n. De riidz nu cäa lo gyicy ii, nii walab tub mod cub nu nee nu gyicy ru, sinu laab nii mod nu bi güeñ der nese nu loga la. **6** Benu ca den Ñgyoozh, orze' ricy na de coz nu rniim. Orze' de riidz nu güeñ der nu mniim nese nu loga la, nde' nu ca tub ca tub zi'l den losa'n.

### De mbecy rguu

**7** Tees gyishlombecy ii ton'a' la zigy de mbecy rguu chesa dey. Wagnii dey nu Jesucrisht biid mi gyishlombecy ii nu rishli byac mi mbecy. De mbecy nu ni ricy ze', yu ze' nac yu mbecy rguu, nunu zay contr ni Crisht. **8** Bzu der cuidad nis nit lo de ir nu gyad nu nac de riiñ nu b icy ru, sinu gyad za' la i der.

**9** Cyu zi'l mbecy nu rlagy ded lo par lo de coz nu blyuu Crisht, yu ze' a' yu' loy Ñgyoozh. Tees mbecy nu tub lo zi'l coz blyuu Crisht caa ic yu, de yu ze' nac nuy Ñgyoozh Uz den gal nu I'ñ mi Jesuuz. **10** Benu tub mbeccy cyid yu lat der, ze' walab nu rlyuuy coz nu blyuu Crisht, orze' cue' niir nu chu'y nañ yu'. Ni cue' nii nur yu ñgyoozh. **11** Gun cyu zi'l mbecy nu nii nuy mbecy ze' ñgyoozh, orze' gal gaa la nay nu mbecy nu shiñ ricy ze'.

### Laab nii la riidz ni Waa

**12** Yu' zañ coz nu rlagya nee lo der, tees walagya nee lo der lo gyicy. Ya drish lo nu gad mod nu yap güii der. Orze' nee du de ru lo nu loo la, gun orze' nu blaazha' zir gyet lagy den.

**13** Ni' zi'l de i'ñ bily ru, de yu nu pcui Ñgyoozh nu gac nim, de yu ze' zeed dey ñgyoozh ni der.

# 3 San Juan

## Waa byabic yu gyel mbecy ni Gayo

**1** Ya, tub yu bel nu zu riiñ ni Crisht, zeedə gyicy ii lo ru Gayo, tub amig nę nu dzi rca. Ya rca ru tub mod nu rishli.

**2** Ru, bicya nu dzi rca, ya diñä lo Ñgyoozh nu dub laa tiem gzac ru lo coz nap, nunu cyiiñ ruub cuerp nir. Gun bi rad lagya nu nap zu lagy ru nañ lardoor. **3** Tona' la bet lagya ornu bri la be b icy na, gun byoo dey rishlo nu ru dzi fert ricy paar nu de riidz rishli ni Ñgyoozh.

**4** Warusu ni tuuba' la coz nu gyicy ñi nu gyet lagya gal nu yet lagya ornu rad lagya nu de mbecy nu na gal nu na iñä rded dey dub gal mod nu rnii de riidz nu rishli ni Ñgyoozh.

**5** Ru, bicya nu dzi rca, ru dzi b icy paar ornu rzu bich ru nu nac de' zir de b icy na nu nac Crisht nunu yegar ornu rzu bich ru nu nac de mbecy nu druu reña' gyedz ornu dri dey lor. **6** De yu ze', ornu biid dey lat de mbecy ni Crisht nu yu' par ii, orze' mnii dey lat dela de yu ze' nu dzi nap b icy ru nur dey nu nac nu rcar dey. Orze' por faboor locyuub ñuur dey ni de coz nu cyiiñ par byaj ni dey dub gal mod nu gyedzu' lagy Ñgyoozh.

**7** Ornu de yu ze' gush nez dey zay nu gyicy yu riiñ ni Jesucrisht, rila wanshet ic dey nu nlocyuub de mbecy nu a' yu' lo Ñgyoozh dey. **8** Nde' nu rlagy ñi nu nap gyicy dun dey ornu ded yu yu'n, gun orze' locyuub na dey ornu tush las yu de riidz rishli ni Crisht.

## Diótrefes nu Demetr

**9** Ya bzeedə tub gyicy lo de mbecy ni Crisht, tees Diótrefes wangyicy cuen yu de riidz nu mneę, gun dzi

gusht niy nu gyicy yu mandaar. **10** Nde' nu ornu yapä, orze' ricä nu gad lagy der de mod nu ricy yu. Yu ze' rded yu nu rniiy rishcuen. Nunu rniiy riidz fals nu za contr ni de ub na. Nunu yu ze' wazuy conform nu de coz nu bi ricy yu, sinu rlagz zir yu gyicy yu. Orze' wacshet ic yu nu chu' de b icy na nañ yu'y ornu dri dey loy. Nunu benu ca na mbecy rlagz yu nu cuic yu yu'y chu' de yu ze', orze' wazaan Diótrefes nu ni gyicy nuy laab de yu ze'. Ze' benu ca na tub mbecy cuic yu yu' chu' de yu ze', orze' Diótrefes cyuu nuy mbecy nu cuic yu' ze' lat de mbecy ni Crisht.

**11** Ru, bicya nu dzi rca, cue' sya'r lo de mod a' nap nu ricy mbecy, sinu sya'r de mod nap nu ricy dey. Gun mbecy nu ricy mod nap, yu ze' nac yu ni Ñgyoozh. Ze' de mbecy nu ricy mod a' nap, yu ze' a' yu' loy Ñgyoozh.

**12** Orze' dela mbecy rnii dey nu Demetr nac yu mbecy nap. Yu ze' ricy yu mod nu rlagz ñi, nunu nu nac nde' rabee nu nac yu mbecy nap. Nunu ni' zi'l dę yę nap rnee dę niy. Ru rad lagy ru nu rnee dę coz rishli.

## Riidz nu blazh ni Waa

**13** Yu' zañ coz nu rlagya neę lor, tees walagya cąä ñii lo gyicy, **14** gun drish lę nu gyiily la yap güij de ru, nunu neę du de ru lo nu loo la.

**15** Ñgyoozh gyicy mi nu cheti ri añ nir. Dela de amig ni den zeed dey ñgyoozh nir. Tub ga la amig nin gab ruy shnuy.

# San Judas

## Judas zeed yu ñgyoozh ni de mbecy ni Crisht

**1** Yä Judas, bicyä Santiag, nacä tub mbecy nu ricy coz nu rlagy Jesucrisht. Orze' ya zeedä gyicy ii lo de ru mbecy nu dzi razañ lagy Ñgyoozh, Uz den. Ñgyoozh blosum de ru nu gac nim. Nunu Jesucrisht rñam der nu cue' shiñ zac ru.

**2** Ñgyoozh gyicy mi nu sheñ coz nap zac der nu nac nu rashni lagy mi der, nunu gyicy mi nu cheti ri añ ni der, nunu rcam de ru.

## De mbecy nu rlyuu coz fals

**3** De ru, bicyä nu dzi rcä, ya dzi rlagya nu zeedä tub gyicy lo der nu rnëe lac yaruu nu gruu mbañ den: tant de ru, gal nu ya. Tees na rad lagya nu ricy zir ñi presis nu zeedä gyicy ii lo der par nu nishbaq lo der nu gzu fert der nu nac de riidz ni Crisht nu bzeeñ Ñgyoozh yaa mbecy par tub tir zi'l. **4** Gun yu' la be mbecy nu dzi bi rac tiem ca lo cuen nu nit lo dey. Orze' de yu ze' dze ga gu' dey lat de ru nu nac nu bguu dey der. Nac dey mbecy nu za contr ni Ñgyoozh. Par nu nac nu Ñgyoozh ricy mi faboor nu nap ricy num den, orze' nde' nu rzii dey nu gac gyicy yu mas coz to' lo, nunu se la la gac, rzii dey. Nunu rzu chu dey Shuaan den Jesucrisht, biñ nu riib ic de ub na.

**5** Mas de ru bi rad lagy der, tees rlagya nu gyeza' lagy der nu Ñgyoozh bloom de mbecy nim Egipto nu ya num dey par Israeel. Na ornu bi bloom dey, orze' mnit lom de yu nu wangyicy cup consuel lom. **6** Nunu de anc nu wancuez lo riiñ nu briic Ñgyoozh, sinu bruu dey se'y, orze' Ñgyoozh bri noow mi dey tub lugaar ze' nu cow, tub lugaar ze' nu rila wala dey. Orze' ze' cuez dey par ornu shuub dzi nu gri bee Ñgyoozh ni dela mbecy. **7** Nunu ni' zi'l gzac de anc ze' gal nu bzac de mbecy Sodoma nu Gomorra, cyup gyedz nu ri tublaazh ga la. De yu ze' pshet ic dey nu ricy yu de cyi bag nu a' yad ñi nu gyicy dey nu losa'y, nunu pshet ic dey nu gyicy yu cyi nu zañ contr ni mod nu psa' lagy Ñgyoozh nu gyicy yu. Nde' nu bzac zi dey nu gyi nu rila wayu. Nde' tub mod nu ryoo Ñgyoozh rishlo dela mbecy, gun orze' gyicy cuidad dey.

**8** Tees ni' zi'l mod ricy de mbecy rguu nu gu' dze ga lat der ze'. Pcaal rniiñ lo dey nu lac mod gyicy yu. Orze' ricy dey cyi nu ricy ñi nu rabag cuerpi dey. Nunu rzuub yaa dey de riidz nu rnii Shuaan den Jesuuz nu gyicy na. Nunu rab zi dey de anc fert. **9** Mas Miguel, tub anc zab lo, ornu gush losa'y nuras nu riidz gyi' cuerpi dey Moisees, orze' wangash lagy yu niiy nu riidz a' nap nu

gab yu nuras, sinu mniy: "Shuaan de niim nu yu' falt nir", nay rab yu nuras. **10** Tees de mbecy ze' rnii zi dey ni de coz nu wagad lagy yu. Ricy dey gal nu ricy bañcyug nu sac shcab ni. La zi'l na coz nu rnii too dey ricy yu. Nde' nu nit lo dey.

**11** ;Dzi ga cuaa de mbecy ze'! Gun za ca dey ich coz nu b icy Caiing. Orze' nu nac tiñ gudza dey gal nu gudza Balaam. Nunu gat dey gal nu gut Coré ornu guay contr ni Ñgyoozh. **12** Ornu tublaazh la row der gyit nu nac nu rca der losa'r, orze' de yu ze' na dey gal nu na tub coz a' nap nu ri lat der. Lat ze' row dey nunu ro'y. Nap la zu lagy dey rded yu. Nunu waca bee ti rca lagy dey lo reña' mbecy. Na dey gal nu na yu nu rña shily, tees laab ub zi'l dey ricy cuidad yu ub yu. Na dey gal nu na za nu ta' baa nu a' ricy cup nis. Za nu dza la biñ. Na dey gal nu na yag nu wacuic uuggy tiem ni. Na dey gal nu na yag nu gut la par nu bruu lyuñ gal lyu lañ. **13** Na dey gal nu na de nguuly ni nis nu fert rded lo nisyudo. Orze' de coz to' lo nu ricy dey, nde' nañ gal nu na bdziñ nu rzeeñ de nguuly ru' nisyudo. Na dey gal nu na bel baa nu gudza ma nez nu rded ma. Nde' nu Ñgyoozh mniim nu chesa dey ze' nu blaazha' zir cow tub la.

**14** Ni' zi'l Enoc, yu nu bruu zac gashtal ornu bza' gag yu nac nez Adaang, yu ze' ni' zi'l mniy por cuen ni Ñgyoozh. Orze' bztat yu de mbecy ze'. Orze' nay: "Yä bzaacä nu bi yad Shuaan den. Bi yad num be miily la de anc nim. **15** Orze' gri beem ni dela mbecy. Nunu niim lo dela mbecy nu shiñ ricy nu cha dey lo cashtig nu nac dela coz a' nap nu b icy yu gyi' nu nac dey mbecy a' nap. Nunu cha dey lo cashtig nu nac de riidz a' nap nu mnii dey, como nac dey mbecy cyi. Mnii dey de riidz nu gua contr ni Ñgyoozh", nay. **16** De mbecy ze' nac dey mbecy nu rnid ru' lo Ñgyoozh. Nunu nac dey mbecy nu rnii zi nim. Tub lo zi'l nu ryub dey mod nu cha dey ich gusht ni ub yu. Nunu driib zily dey ub yu. Nunu driib zily yu losa'y par nu gad mod nu gyicy losa'y gal mod nu rlag yu.

## Judas bdu'y riiñ yaa de mbecy ni Crisht

**17** Tees na de ru b icy na nu dzi rcä, ca ga ic der de riidz nu mnii de aposht ni Shuaan den Jesucrisht. **18** De yu ze' mnii dey: "Ornu bi yad lazh tiem, orze' gruu zac mbecy rgubdzaa. Orze' de yu ze' zaab gyicy la dey de coz nu rlag yu", na de aposht. **19** De yu ze' gyicy yu nu gyacyup nac mbecy. Gyicy dey de coz nu rlag yu zi'l yu. Nunu a' ricy cup dey Espiriit Yon ni Ñgyoozh.

<sup>20</sup> Tees de ru, b icy na nu dzi rca, bzu fert der nu consuel nu ricy cup ru, como nde' consuel nu bruu lo Ñgyoozh. Mnii nu der Ñgyoozh dub gal mod nu rnii Espiruit Yon nim nañ lardoo der. <sup>21</sup> Pcyiiñ der gyishlombecy ii gal mod nu rlagy Ñgyoozh, gun orze' nap gyicy num de ru nu nac nu rcam der. Blez der ornu shuub dzi nu Shuaan den Jesucrisht gyicy mi nu cui mbañ den tub la. Ni gyicy mi par nu rashni lagy mi de ub na.

<sup>22</sup> Gushni lagy der de mbecy nu ricy cyup ic. <sup>23</sup> Gac gyicy der nu gruu mbañ la be de yu ze'. Nde' nañ gal nu na nu cor dey lo lyush gyi. Nunu gushni ga' lagy der de' zir dey. Nomaas nu b icy cuidad der ub ru nu nac de yu ze'. Nunu güiñ lagy der lo de cyi nu ricy dey.

Laab nde' la gyel mbecy nu ryabic Judas ni Ñgyoozh

<sup>24</sup> Orze' Ñgyoozh, biñ nu tub zi la zu, biñ nu co mbañ de ub na, mi ze' cyiiñ mi nu ñam de ru, gun orze' cue' gyet lag der lo cyi. Nunu cyiiñ mi nu gu'm de ru ze' nu rcyiiñ mi nu gyel lily nim. Nunu lat ze' gac der mbecy nu sac falt ni. Nunu tonal la gyet lagy der. Orze' mi ze' nac mi biñ lily. Nac mi biñ nu gya zir zu. Gac gyicy mi dela coz. Nunu gyub ic mi dela mbecy. Gyabic den gyel mbecy nim nu nac Shuaan den Jesucrisht nese gulas, nu na la, gal nu tub la. ¡Laab ni gac ñii!

# Apocalipsis

De riidz nu rbic Jesucrisht nu gad lagy mbecy

**1** De riidz ii rshaal ñi de coz nu rnii Jesucrisht. Ñgyoozh b icy mi nu Jesucrisht pshaal mi ñii lo de mbecy nu ricy de coz nu rlag y mi par nu gad lagy dey ni de coz nu sñuu ga gac. Briic mi nu gad lagy dey nu nac nu bzuu nez mi anc nim biid yu lo ya, Waa, tub yu nu ricy coz nu rlag y mi. **2** Orze' pcaaq dela coz nu rishli nu bzaaca, nunu nacä teshtig ni de riidz ni Ñgyoozh. Nacä tub yu nu rzat Jesucrisht lo de mbecy.

**3** Dzi ni de mbecy nu rsya' de riidz nu bruu lo Ñgyoozh ii. Nunu dzi ni de mbecy nu reñ ñi gal nu de yu nu rzuub gyidag ni de riidz nu bi ca ii, gun bi yad shu ub tiem nu gac ñii.

**Waa zeed yu gyicy lo gag y nac mbecy ni Crisht**

**4** Ya Waa. Ya gzeedä gyicy ii lo gag y nac mbecy ni Crisht nu yu' lat de gyedz ni Asia. Orze' Ñgyoozh, Shuaan den, gal nu Jesucrisht, gal nu Espiriit Yon nim gyicy dem faboor nu nap gyicy num der, nunu gyicy dem nu cheti ri añ ni der. Laab Ngoozh nac mi biñ nu nac na, nunu nac mi biñ nu gac par ich, nunu nac mi biñ nu cyid par lo. Na Espiriit Yon nim nac mi biñ nu nash numbr gag y, nunu nac mi biñ nu zu lugaar ze' nu riib ic mi. **5** Na Jesucrisht nac mi biñ nu ricy paa nu de riidz nu rnii. Nunu nac mi biñ nu byabañ nu loga la ornu gut mi. Nunu riib ic mi dela gubier nu riib ic gyishlombecy ii.

Orze' de mi ze' gyicy mi faboor num de ru, nunu gyicy dem nu cheti ri añ ni der.

Na Crisht ton a' la rcam de ub na, nunu b icy mi nu bla den ni de coz ily nu ricy nu cyi den nu nac nu pshu reñ mi. **6** B icy mi nu gyub ic den dun mi. B icy mi nu nac naa uz par nu zu biich na nu nac Uz mi, biñ nu nac Ñgyoozh nim. ¡Yad ñi nim nu dugyim gyel lily nim nunu yad ñi nu dugyim nu nac mi biñ nu gac gyicy dela coz dub laa tiem! ¡Laab ni gac ñii!

**7** Crisht yad mi lat za baa.

Orze' dela mbecy zac dey mi.

Gashtal de yu nu b icy mi nu gut mi, nunu de lo la nez mbecy nu yu' gyishlombecy gyicy dey sentiir, nunu gun dey nu nac mi.

¡Laab ni gac ñii!

**8** Orze' na Ñgyoozh Shuaan den: "Ya nacä A, nunu nacä zeta. Nunu nacä biñ nu nil zu nese nu loga. Nunu nacä biñ nu nil zu ornu gya' loñ." Ni na Ñgyoozh, biñ

nu nac na, biñ nu gac par ich, nunu biñ nu cyid par lo. Mi ze' biñ nu gac gyicy dela coz.

**Waa bzaac yu Crisht nu gyel lily nim**

**9** Ya Waa b icy de ru. Gyub ic den tublaazh la ze' nu gyub ic Ñgyoozh. Nunu tublaazh la zac zin nu nac Crisht. Nunu Ñgyoozh cuic mi fers ni den nu gag yen. Dela nde' ricy Ñgyoozh nu nac Crisht. Ya ri pres lo tub nac yu nu ri gazel nisyudoo nu la Patmos. Ri pres nu nac nu pshaala de riidz ni Ñgyoozh, nunu nu nac nu bzata Jesucrisht lo dela mbecy. **10** Orze' tub dzi noming, dzi ni Shuaan den, orze' byub ic Espiriit Yon ni Ñgyoozh ya. Orze' par ichä güeñä nu zaab ti' mbecy. Ye rniy gal nu zaab ti' tub trumpet. **11** Orze' nay:

—Pcaa lo tub cuader de coz nu rzac ru. Orze' zeed ru ñii lo gag y nac mbecy ni Crisht. Zeed ru ñii lo de mbecy ni Crisht nu yu' Efeso, gal nu lo de mbecy nu yu' Esmirna, nu lo de mbecy nu yu' Pérgamo, nu lo de mbecy nu yu' Tiatira, nu lo de mbecy nu yu' Sardis, nu lo de mbecy nu yu' Filadelfia, gal nu lo de mbecy nu yu' Laodicea. Lo de yu ze' zeed ru ñii —na mbecy nu zaab ti' rnii ze'.

**12** Orze' bish cyä bgüjj par ichä ze' nu zaab ti' mbecy nu rnii nu ya ze'. Na ornu bish cyä, orze' bzaacä gag y candeler or. **13** Nunu lat de gag y candeler ze' zu tub mbecy nu rlyu nu nac yu mbecy nu yu' gyishlombecy. Mi ze' zum tub nertub zily duñ. Zaab ñi gal yeñ gyi' lam. Nunu ri tub sinh lyush mi nu byaañ nu or.

**14** Nunu gyich toom cacy iily lañ. Caacy ñi gal nu caacy gyey. Nunu rabee urlom gal nu rabee lyush gyi.

**15** Nunu ryal gyi'm gal nu ryal gyiib cach nu ryanap nañ yo. Nunu ti'm rzig y ñi gal nu rzig y ze' nu yet nis. **16** Ze' nu yaa beem zu yaam gag y bel baa. Ze' ru'm briib tub coz nu na gal nu na mandzicy nu rup dzu la' la ru' ri'ñ. Ze' lom ryal ñi gal nu ryal doo güidz ornu ton a' la nap rzu yaa.

**17** Ornu bzaacäm, orze' wes saa la yeñ gyi'm. Gugiyä gal nu zegyit tub mbecy gut. Orze' briib mi yaa beem ichä. Orze' nam:

—Cue' dzib ru. Ya nacä biñ nu nil zu nese nu loga la, nunu nacä biñ nu nil zu ornu gya' loñ. **18** Nunu nacä biñ mbañ. Gutä tees na cui mbaña tub la. Nunu ya ricy cupä rishbeey nu shaala nez nu ya par ze' nu yu' mbecy nu bi gut. **19** Pcaa lo gyicy dela coz nu rzac ru. Pcaa dela coz nu rac na gal nu dela coz nu gac par lo. **20** Lo gag y bel baa nu rzac ru nu zu yaa bee, gal nu gag y candeler ii, de nii yaruuñ tub coz nu wagad lag y la mbecy. Na doq rishlor lac yaruuñ. De gag y bel baa ze',

nde' yaruuñ gagy anc ni de gagy nac de mbecy ne'. Ze' gagy candeler or ze', nde' yaruuñ laaba' de gagy nac mbecy ne'.

### Jesucrisht zeed mi rasoo lo de mbecy nim nu yu' Éfeso

**2** 'Pcaa lo gyicy de riidz nu rnę par nu gad lagy anc ni de mbecy ne' nu yu' Éfeso. Orze' i mod pcaa nam: "Biň nu zu yaa gagy bel baa par yaa bee, biň nu rded lat de gagy nac de candeler or ze', <sup>2</sup> mi ze' gniim lor: Ya rad lagya dela coz nu ricy der. Rad lagya nu rboor lo der nu nac riiñ ne, nunu rad lagya nu ragyee der ornu deet rac nu nac ya. Nunu rad lagya nu wac-saan der nu chesa nu mbecy a' nap ru. Sinu de ru b icy ru preb de yu nu rnii nu nac aposht, tees walab rishli nac dey, nunu byu' bee nu nac dey mbecy rguu. <sup>3</sup> Guygee der nu tona' la bzac zir nu nac ya, nunu wangazeed der lo de coz ne. <sup>4</sup> Tees ya ricy cupa tub gyel cha' ic nu nac ru. Nde' nu waca ga'r ya gal nu pcar ya nu loga. <sup>5</sup> Orze' b icy der nu gyeza' lagy ru nu gulas dzi gya zu der nu nac de coz ne. Ze' na byagash der. Orze' mne' der de cyi nu ricy ru, nunu b icy der gal nu b icy ru nu loga. Benu wane' der cyi nu ricy ru, orze' ya yapla lo der. Orze' lo chu candeler nir lugaar niñ. <sup>6</sup> Tees tub coz nu zañ faboor ni der. Nde' nu rzi lagy der lo de coz nu ricy mbecy Nicolaítas gal nu ni' ya rzi lagya looñ. <sup>7</sup> ¡De mbecy nu Zub gyidag rlagy ñi nu gzuub gyidag dey coz nu rnii Espiriit Yon ni Ñgyooozh lo de mbecy ne! De mbecy nu gyicy gan, de yu ze' gricä rish-beey ni dey nu gow yu uugy nu ta' ni yag nu rbic gyel mbañ nu Zub tuuba' lugaar cyit zu ni Ñgyooozh" —nam—.

### Jesucrisht zeed mi rasoo lo de mbecy nim nu yu' Esmirna

<sup>8</sup> 'Pcaa lo gyicy de riidz nu rnę par nu gad lagy anc ni de mbecy ne' nu yu' Esmirna. Orze' i pcaa nam: "Biň nu nil zu nese nu loga la, biň nu nil zu ornu gya' loñ, biň nu gut, nunu byabañ mi, mi ze' rniim, orze' nam: <sup>9</sup> Rad lagya nu tona' la bzac zi der par nu nac ya, nunu rad lagya nu tona' la gyel zi zu der. Tees rishli, tona' la guaniñ der nu nac de coz ni Ñgyooozh. Rad lagya nu de mbecy nu rnii nu nac mbecy Israeel rnii zi dey ni der. Rnii dey nu nac yu mbecy Israeel tees walab rishli, sinu bruu dey lat de mbecy ni nuras. <sup>10</sup> Cue' dzib der nu nac de coz nu gzac zir. Orze' nuras gyicy yu nu gyet lag la be der nañ yu' gyiib par nu gac preb der ben a ruu ci-gy der. Orze' gzac zi der la be zil tiem. Orze' b icy paa der gashtal gat lar, gun orze' gyicya nu gyicy der gan gyel mbañ. <sup>11</sup> ¡De mbecy nu Zub gyidag rlagy ñi nu gzuub gyidag dey ni de coz nu rnii Espiriit Yon ni Ñgyooozh lo de mbecy ne! De mbecy nu gyicy gan, se la la coz zac dey ornu gat de mbecy tir cyup" —nam—.

### Jesucrisht zeed mi rasoo lo de mbecy nim nu yu' Pérgamo

<sup>12</sup> 'Pcaa lo gyicy de riidz nu rnę par nu gad lagy anc ni de mbecy ne' nu yu' Pérgamo. Orze' i pcaa nam: "De

riidz ii, nii riidz ni biň nu nuu mandzicy nu rup chu la' la ru' ri'ñ. <sup>13</sup> Rad lagya ca lugaar rcyiñ der. De ru rcyiñ der ze' nu riib ic nuras. Mas ni, tees ricy paa der ne. Nunu wachecha der nu ricy cup ru consuel lo mas lat de dzi nu biit mbecy Antipas, yu nu b icy paa nu rzat ya. Bi-it dey yu ledz der, ze' nu rcyiñ nuras. <sup>14</sup> Tees ya ricy cupa la be gyel cha' ic nu nac der. Lat de ru yu' la be mbecy nu walagy yu laa yaay de coz nu blyuu Balaam, yu nu briic consef ni Balac par nu gad lagy yu lac mod gyicy yu par nu gyicy yu nu gyicy mbecy Israeel coz cyi. Blyuu ni dey nu gow yu de coz nu gua lo nab, nunu blyuu ni dey nu gal dey losa'y nu wanchelaay. <sup>15</sup> Ni zi'l yu' tub naca' mbecy lat der nu walagy dey laa yaay de coz nu rlyuu de mbecy Nicolaítas. <sup>16</sup> Nde' nu na mne' der de cyi nu ricy ru. Gun benu wane' der cyi nu ricy ru, orze' yap gyiilya lo der. Orze' chucog du der nu mandzicy nu grib ru'. <sup>17</sup> ¡De mbecy nu Zub gyidag, rlagy ñi nu gzuub gyidag dey de coz nu rnii Espiriit Yon ni Ñgyooozh lo de mbecy ne! Orze' de yu nu gyicy gan gricä tub lo gyit ni Ñgyooozh nu ri ngach nu la maná gow dey. Nunu ni' zi'l gricä tub gyita' cacy ni dey. Orze' ca tub nu la cub dey loñ. Nde' se cyu la rad lagy, sinu tub zi la yu nu gad ñi ni" —nam—.

### Jesucrisht zeed mi rasoo lo de mbecy nim nu yu' Tiatira

<sup>18</sup> 'Pcaa tuuba' tir lo gyicy de riidz nu rnę par nu gad lagy anc ni de mbecy ne' nu yu' Tiatira. Orze' i pcaa nam: "Nii de riidz nu rnii I'ñ Ñgyooozh, biň nu na urlo gal nu na lyush gyi. Ze' gyi'm nañ gal nu na gyiib cach nu ryanap nañ yo. <sup>19</sup> Rad lagya dela coz nu ricy der. Rad lagya nu dzi rca der losa'r. Rad lagya nu ricy cup ru consuel lo. Rad lagya nu dzi ricy der riiñ ne. Rad lagya nu ragyee der ornu deet rac. Nunu rad lagya nu fert zir ricy der ñii na gaze' nu loga. <sup>20</sup> Tees ya ricy cupa tub gyel cha' ic nu nac der. De ru dzi ricy cup der pasez ni biň mñaa nu la Jezabel. Mi ze' ricy mi nu rniim por cuen ni Ñgyooozh, tees rlyuum coz rguu ni de mbecy nu ricy de riiñ ne. Rlyuum ni dey nu gal dey losa'y nu wanchelaay. Nunu rlyuum ni dey nu gow yu de coz nu gua gun lo nab. <sup>21</sup> Ya bricä tiem nim par nu chaam mod nu gyicy mi, tees mi ze' wangalagy mi. Ni walagy mi laa yaam nu ral mi mbecy nu wanchelaam. <sup>22</sup> Orze' ya ricä güii nim par nu cham lo da'. Nunu ya gyicya nu tona' la zac zi de yu nu nac num benu wane' dey cyi nu ricy yu gal nu ricy mi ze'. <sup>23</sup> Nunu gyicya nu gat de I'ñ mi. Orze' gad lagy dela mbecy ne' nu ya nacä biň nu rad lagy dela coz nu yu' nañ lardoo mbecy, gal nu nañ shcab ni dey. Orze' ya gyabicä i tub ga la der dub gal nu na coz nu b icy ru. <sup>24</sup> Ze' na de ru mbecy nu yu' Tiatira nu wacsuub gyidag de coz nu rlyuum, de ru mbecy nu nigul gad lagy nap de coz ngach ni nuras, ya wanę lo der nu gyicy ru zañ zir coz. <sup>25</sup> Nomaas nu rnę lo der nu gzuub fert ru nu de coz nu bi ricy cup ru gashtal shu-ub la dzi nu yapla tuuba' tir. <sup>26</sup> De yu nu ricy gan, gal nu de yu nu ricy coz nu rlagya gal gat la dey, orze' ricä rishbeey ni dey nu gyub ic yu zañ nac mbecy <sup>27</sup> gal nu briic Ñgyooozh rishbeey ne ya. Gun Ñgyooozh nil bzat mi

yə ornu nam: Mi ze' gyub ic mi de lo la nac nez mbecy nu tub yangam nu byaa nu gyiib. Orze' gla'm dey nu yangam ze'. Nguzh nguzh la dey gyicy mi gal nu ricy dey ornu rla'y tub gyis, nam.<sup>28</sup> Nunu Ñgyoozh cuic mi yə, biñ nu nac bel rza' yu, ni dey.<sup>29</sup> ¡De mbecy nu Zub gyidag, rlagy ñi nu gzuub gyidag yu ni de coz nu rnii Espiriit Yon ni Ñgyoozh lo de mbecy ne!" —nam—.

### Jesuuuz zeed mi rasoo lo de mbecy nim nu yu Sardis

**3** 'Pcaa lo gyicy de riidz nu rnęe par nu gad lagy anc ni de mbecy ne nu yu' Sardis: "Nii de riidz ni biñ nu ricy cup Espiriit Yon ni Ñgyoozh, biñ nu nash numbr gagy, gal nu gagy de bel baa ze'. Yə rad lagya dela coz nu ricy der. Rad lagya nu bi gut der, mas zaab riidz nu mbañ ru.<sup>2</sup> Brish der yaa, gun na der gal nu na mbecy nu nas. Orze' bzu nap der de coz nap nu b icy ru, de coz nu bi zuu la nu nit lo, gun yə rad lagya nu yu' falt ni der par lo biñ nu nac Ñgyoozh ne nu nac de coz nu ricy ru.<sup>3</sup> Orze' bicy der nu gyeza' lagy ru de riidz nu bi güeñ ru, de riidz nu bi pshet ic der ni. Bzuub gyidag der ñii, nunu mne' der de cyi nu ricy ru. Ze' be-nu wayish der yaa, orze' yə yapa lo der gal nu ryiid tub gubaan. Tiem nu a' sa' la lagy der, orze' gru'ñə lor.  
**4** Ze' yu' la be mbecy lat de ru mbecy Sardis nu wac-saan yu nu gabag shab yu nu nac cyi. Orze' de mbecy ze' gzu dey shab cacy yu. Orze' chesa nu dey ya, gun yad ñi ni dey.<sup>5</sup> De mbecy nu gyicy gan, orze' gzu dey shab cacy yu. Orze' yə rila wadiba nu la dey lo lisht nu ri nañ libr nu ta' nu la de mbecy nu cui mbañ, sinu yə du' lo dey lo Ñgyoozh Uza gal nu lo de anc nim.<sup>6</sup> ¡De mbecy nu Zub gyidag, rlagy ñi nu gzuub gyidag yu de coz nu rnii Espiriit Yon ni Ñgyoozh lo de mbecy ne!"

### Jesucrisht zeed mi rasoo lo de mbecy nim nu yu' Filadelfia

**7** 'Pcaa lo gyicy de riidz nu rnęe par nu gad lagy anc ni de mbecy ne nu yu' Filadelfia: "Nii de riidz ni biñ yon, ni biñ nu ricy paa. Nii de riidz ni biñ nu ricy cup rishbeey nu bruu lat de riidz nu mnii Ñgyoozh lo Dabi. Ricy cup mi rishbeey nu shaal mi nez, nez nu rila wac soow mbecy. Nunu ornu soow mi nez ze', orze' ni tub la mbecy wac shaal yu.<sup>8</sup> Rad lagya dela coz nu ricy der. ¡Güii! Yə pshaala tub nez par de ru nu ni tub la mbecy wac soow yu. Rad lagya nu a' fert der. Mas ni na der, tees b icy paar nu de riidz nu mnęe, nunu wancyuu der lo.<sup>9</sup> Orze' de mbecy nu druu lat de mbecy ni nuras, de yu nu rnii nu nac mbecy Israeel, tees walab rishli nac dey, gun rguu dey, orze' gyicya nu cyid dey lor. Orze' zu tib dey lo der, gun orze' gad lagy dey nu yə rca ru.<sup>10</sup> De ru b icy paa der nu de riidz nu mnęe lor. Riidz ze', nde' b icy der nu gagyer. Nde' nu yə zaab icə de ru ornu shuub dzi nu zac zi dela mbecy nu yu' gyishlombe-cy, gun dzi ze' gyicya preb dela mbecy nu yu' gyishlombe-cy.<sup>11</sup> Bi yap gyiilya. Cue' laa yaa der coz nu bi ricy cup ru, gun orze' ni tub la mbecy wac coy ir.<sup>12</sup> Dela de yu nu gyicy gan, gyicya nu gac dey yabi ni yu' ni Ñgyoozh ne. Nunu rila waruu ga' dey lugaar ze'. Orze'

yə cąa nu la Ñgyoozh ne lo cuerپ ni dey. Nunu cąa ga' nu la gyedz nim, Jerusaleeng cub nu gruu gyibaa ze' nu Zub mi. Cąa ñii laaba' lo cuerپ ni dey. Nunu cąa ga' nu la cuba laab lo cuerپ ni dey.<sup>13</sup> ¡De mbecy nu Zub gyidag, rlagy ñi nu gzuub gyidag dey de riidz nu rnii Espiriit Yon ni Ñgyoozh lo de mbecy ne!"

### Jesucrisht zeed mi rasoo lo de mbecy nim nu yu' Laodicea

**14** 'Pcaa lo gyicy de riidz nu rnęe par nu gad lagy anc ni de mbecy ne nu yu' Laodicea. "Nii de riidz ni biñ nu nac nu rishli, ni biñ nu ricy paa nu de coz nu rnii. Nunu rishli rnii. Nunu Ñgyoozh psa' lagy mi dela coz nu nac mi.<sup>15</sup> Rad lagya dela coz nu ricy der. Neñə nu walab nu dzi rca der yə, nunu walab nu waca der yə. Gyet zir lagya benu dzi ca der yə, o gyet zir lagya benu wa-caa la der yə.<sup>16</sup> Tees como beñ zil' rca der yə, walab nu dzi rca der yə, ni walab nu dzi waca der yə, nde' nu yə gaba der.<sup>17</sup> Orze' rnii der nu nac ru guani'ñ, nunu bi gup der, nu wagyicy falt ni tub la coz nir. Ze' wagad lagy der nu nac ru mbecy nu se la la sac. Nac ru mbecy shni. Nac ru mbecy zi. Nac ru lo ca'. Nac ru mbecy yagy. Ni mod na der par de coz ne yə.<sup>18</sup> Laab ni nde' nu rdęo rishlor nu gyicy der gal nu rlagy ñi par nu gad gyel nap ne yə ni der, nunu par nu gad gyel nap nu na gal nu na or nu byanap nañ yo, gun orze' rishli gaal gyaguani'ñ der. Orze' gad shab cacy der nu soow ñi cuerپ yagy ni der, gun orze' cue' nu to' lo chesa der. Orze' gad cuaan nu cab der urlor par nu gac zac ru.<sup>19</sup> Gun de mbecy nu rca, rshuu du dey, nunu ricy napę dey. Orze' bloo lo der, nunu mne' der dela cyi nu ricy ru.<sup>20</sup> Yə cą gyero' nir nu rnęe du ru. Ze' benu cyu zil' mbecy gyeñ yu nu rnęe, orze' shaal yu ro' niy nu chü' nañ yu'y. Orze' daw du yu tublaazh la.<sup>21</sup> Orze' de yu nu gyicy gan, orze' yə gricə rishbeey nu gzub nuy yə lugaar ze' nu riib icə, ni' zil' gal nu yə b icya gan, nunu guud cuit Uza gusuba lugaar ze' nu riib ic mi.<sup>22</sup> ¡De mbecy nu Zub gyidag, rlagy ñi nu gzuub gyidag yu ni de coz nu rnii Espiriit Yon ni Ñgyoozh lo de mbecy ne!" —na Jesucrisht.

### Gashtal gyibaa griib zily mbecy Ñgyoozh

**4** Na despuees ni de nu nde', orze' bgüij. Orze' bza-ça tub ro' gashtal gyibaa. Naal ñi. Nunu güeña nu zaab ti' mbecy, laab yu nu mnii nu yə loga. Ti' nu rnii ze' zaab ti'ñ gal nu zaab ti' tub trumpet. Orze' nay:  
 —Gup gashtal ii. Orze' lyuu lor dela coz nu gac despuess ni de nu nde' —nay.

**2** Laab or la ze', orze' gutib ic Espiriit Yon ni Ñgyoozh yə. Orze' bzaacə tub yashily ze' nu riib ic mbecy gashtal gyibaa la. Ze' Zub tub mbecy loñ.<sup>3</sup> Orze' mbecy nu Zub lo yashily ze' rabee gal nu rabee tub gyita' nu ryaal gyi lo o gal nu rabee tub gyita' coloor gyee reñ. Nunu dub yub la ze' nu zu yashily ze' zu tub shelcuit nu na gal nu na tub gyita' ca' nu ryaal gyi lo.<sup>4</sup> Orze' laab ze' nu zu yashily ze' dub yub la par loñ, zu ga' gal zu tap yashily ze' nu riib ic mbecy. Ze' lo gal zu tap

yashily ze', zub gal zu tap yu bel. Orze' dela dey zuy negy cacy iily la, nunu ri coron or too dey. <sup>5</sup> Ze' nu nguaa de yashily ze' rzu gyi ni guzii. Orze' zaab ti' guzii, nunu pang la yet ňi. Orze' par lo yashily ze' zu gagy candiil rca gyi loñ. Orze' gagy candiil ze', nde' muesht ni Espiriit Yon ni Ñgyoozh, biñ nu nash numbr gagy. <sup>6</sup> Nunu laaba' par lo yashily ze' ri tub coz nu na gal nu na tub nac nis ily, nu rabee gal nu rabee guan nu rdugyi yaa lo.

Orze' laab gazel ze' nu zu yashily ze', dub yub la cuit ňi zu tap mbecy mbañ nu psa' lagy Ñgyoozh. De yu ze' ta' urlo dey dutuub la cuerp niy. Gal nu ta'ñ par lo dey ni' zi'l ta'ñ par ich yu. <sup>7</sup> Orze' yu loga la nay gal nu na tub biidz. Ze' yu cyup nay gal nu na tor. Ze' yu chon rabee loy gal nu rabee lo mbecy. Ze' yu tap nay gal nu na tub psi ornu rded ma lo bi. <sup>8</sup> Lo tap de mbecy ze' tub ga la dey zub shuup ga lowe'y. Nunu dutuub la cuerp ni dey ta' urloy. Dzi rel la wacheca dey nu rniiy:

Ñgyoozh, biñ nu nac Shuaan dę,  
biñ nu gac gyicy dela coz,  
mi ze' tona' la yon mi.  
Mi ze' biñ nu nil nac gulas,  
nunu biñ nu nac na,  
nunu laab mi biñ nu cyid par lo,  
rnii dey.

<sup>9</sup> Orze' de tap anc ze' ryabic dey gyel mbecy ni Ñgyoozh, biñ nu zub lo yashily, nunu zum tub la. Orze' briib zily dey mi, nunu briic dey gras nim. <sup>10</sup> Na laab mnii la dey nde', orze' de gal zu tap yu bel ze' wes saa tiily la dey lo biñ nu zub lo yashily ze'. Nunu pca dey mi ze', biñ nu zu tub la. Orze' briib dey coron niy ze' nu zu yashily nu riib ic mi. Orze' na dey:

<sup>11</sup> Shuaan dę, Ñgyoozh nę dę,  
ru yad ňi nir nu gyabid dę gyel mbecy nir,  
nunu yad ňi nir nu ca lagy dę lor,  
nunu yad ňi nir nu gac gyicy ru dela coz,  
gun dela coz yu'ñ par nu nde' coz nu ru rlagy ru.  
Nunu par nu nac nu nde' coz nu ru rlagy ru, nde' nu psa' lagy ru ňii,  
na dey.

### Gyicy nu ndudub gal nu Biñ nu nac Shily

**5** Orze' bzaaca mbecy nu zub lo yashily ze' nuum tub gyicy nu ndudub nu yaa beem. Rup chu la' la lo gyicy ze' ta' letr. Orze' gagy se' nag nañ ňi nu duu iily. Tub ga se' nu nag de duu iily ze', ze' zub tub ga sey nu byaa nu biñ. <sup>2</sup> Orze' bzaaca tub anc nu dzi fert. Ye la rbish tiy nu rgugyi'y:

—¿Ca na mbecy nu cyiiñ yu sug yu sey ze'? Orze' tiily yu lo gyicy ze' —na anc ze'.

<sup>3</sup> Tees wancyuu su ni tub la mbecy nu yu' gyibaa, ni mbecy nu yu' gyishlombecy ii, ni mbecy nu yu' lat de mbecy gut nu ňcyiiñ yu shaal yu loñ, ni nu güiij loñ.

<sup>4</sup> Orze' tona' la bduna, gun wangad ni tub la mbecy nu ňcyiiñ yu shaal yu lo gyicy ze', ni nu ngüiij loñ. <sup>5</sup> Orze' na tub de yu bel ze' rab yu ya:

—Cue' gun ru, gun biidz, biñ nu bruu lat nez de mbe-  
cy Judá, biñ nu bruu cyong nez gyitoo rey Dabi, mi ze'

bi bicy mi gan, nunu cyiiñ mi sug mi gagy sey ze'.  
Orze' tiily mi lo gyicy ze' —na tub de yu bel ze'.

<sup>6</sup> Orze' gazel ze' nu zu yashily ze', laab ze' nu zu tap de mbecy mbañ ze', gal nu de yu bel ze'. Orze' ze' bzaaca tub Shily. Rlyu nu ma ze' bi gua ma guc ma gun. Zub gagy nguaz ma, gal nu gagy urlo ma. Nde' yaruuñ Espiriit Yon ni Ñgyoozh, biñ nu nash numbr gagy. Mi ze' biñ nu bzuu nez Ñgyoozh nu cham dutuub la gyishlombecy. <sup>7</sup> Orze' biñ nu nac Shily ze' guam lo biñ nu zub lo yashily ze'. Orze' gush mi gyicy nu ndudub nu zu yaa bee biñ nu zub lo yashily ze'. <sup>8</sup> Na laab bdu' yaa lam gyicy ze', orze' de tap mbecy mbañ nu zu ze', nu de gal zu tap yu bel ze', dela dey gusu tib yu lo biñ nu nac Shily ze'. Orze' lo dela dey tub ga lay nuuy tub ga been nu la arpa. Nunu ni' dela dey nuuy tub ga bas or nu yu' yaal nañ. Orze' yaal ze', nde' yaruuñ ornu rnii nu de mbecy Ñgyoozh, de yu nu bi nac nim. <sup>9</sup> Orze' biil dey tub cant cub. Orze' rul dey:

Ru nac ru biñ nu cyiiñ nu gash gyicy nu ndudub.  
Orze' sug ru de sey niñ.

Gun ru gut ru guc ru gun nu gua lo Ñgyoozh.  
Nunu pshu reñ ru.

Gun orze' wiir de mbecy par nu cuic ru nim.  
Wiir de lo la nez mbecy,

gal nu de lo la mbecy nu rnii reñ gal la riidz,  
gal nu de mbecy nu yu' dela gyedz,  
gal nu de mbecy nu yu' dela lugaar.

<sup>10</sup> De yu ze', bicy ru nu byac dey tub nac mbecy nu gyub ic Ñgyoozh.

Nunu bicy ru nu byac dey uz par nu gac dey riiñ ni mi ze'.

Nunu de yu ze' gyub ic yu gyishlombecy.  
Ni mod za de riidz nu biil dey.

<sup>11</sup> Gaze' nu bgüij nunu güeñä nu zaab ti' zigy tona' la anc nu yu' dub yub la ze' nu zu yashily ze', gal nu de tap mbecy mbañ ze', gal nu dela de yu bel ze'. Ze' yu' bee miyoq la dey nac yu yu'y. <sup>12</sup> Orze' ye la rbish ti dey. Orze' na dey:

Biñ nu na gal nu na Shily nu gua gun lo Ñgyoozh,  
mi ze' yad ňi nim nu gyub ic mi dela coz,  
nunu yad ňi nim nu gyu' dela gyel nap yaam,  
nunu yad ňi nim nu gad lagy mi dela coz,  
nunu yad ňi nim nu nac mi biñ nu fert,  
nunu yad ňi nim nu ca lagy mbecy lom,  
nunu gyabid dey gyel mbecy nim,  
nunu griib zily dey mi,  
na dey.

<sup>13</sup> Orze' ni' zi'l güeñä nu rnii dela coz nu psa' lagy Ñgyoozh: dela coz nu yu' gyibaa, nu de coz nu yu' gyishlombecy ii, nunu de coz nu bi gut, gal nu de coz nu yu' lo nisyudoo. Orze' na dela nde':

Gyabid den gyel mbecy ni biñ nu riib ic lo yashily,  
ni biñ nu nac Shily.

Nunu ca lagy den lom,  
nunu grib zily den mi,  
nunu mi ze' gyub ic mi dela coz dub laa tiem,  
na de coz ze'.

<sup>14</sup> Orze' za' tap la de mbecy mbañ ze' rnii dey:

—¡Laab ni gac ñii! —nay.  
Ze' de gal zu tap de yu bel ze' gusu tib dey. Orze' bri-  
ib zily dey mi.

### Ornu duzug de gagy sey ze'

**6** Gaze' nu bzaacä biñ nu nac Shily ze' psug mi tub  
sey lo gagy ñii. Orze' lo tap mbecy mbañ ze'  
gueñañ nu rnii tub yu gal nu rnii guzii. Orze' nay:

—¡Da! —nay.

<sup>2</sup> Orze' bgüii. Orze' bzaacä tub cuay cacy zu ma. Ze'  
yu nu riib cuay ze' zu yaay tub guaz. Nunu guud tub  
coron nu ri tooy. Orze' gush nez yu zay nu gyicy yu  
gyel yuu, nunu gyicy yu gan.

<sup>3</sup> Na ornu biñ nu nac Shily ze' psug mi sey cyup, orze'  
gueñañ nu rnii mbecy cyup nu bruu lo tap mbecy mbañ  
ze'. Orze' nay:

—¡Da! —nay.

<sup>4</sup> Orze' bruu zac tuuba' cuay coloor ña. Ze' yu nu riib  
ma ze', yu ze' guud rishbeey niy nu coy gyel ri zu gy-  
ishlombecy, nunu gyicy yu nu cut mbecy losa'y. Orze'  
guud tub mandzicy ily niy.

<sup>5</sup> Na ornu biñ nu nac Shily ze' psug mi sey chon, orze'  
gueñañ nu rnii mbecy chon nu bruu lo de tap mbecy  
mbañ ze'. Orze' nay:

—¡Da! —nay.

Orze' bgüii, nunu bzaacä tub cuay cas zu ma. Ze' yu  
nu riib ma zu yaay tub igat beey. <sup>6</sup> Orze' güeñañ nu  
zaab ti' rnii lat de tap mbecy mbañ ze'. Orze' riidz ze'  
rniiñ:

—Nomaas tub cyl zi trig, nde' i mbecy tub dzi. Ze'  
chon cyl mbigy sebada, nde' laaba' i dey par tub dzi.  
Tees cue' gan ru asecy. Ni' zi'l ñup urbyay cue' gan ru  
ñii —rniiñ.

<sup>7</sup> Na ornu biñ nu nac Shily ze' psug mi sey tap ze',  
orze' güeñañ nu rnii mbecy tap nu mbañ ze'. Orze' nay:

—¡Da! —nay.

<sup>8</sup> Orze' bgüii, nunu bzaacä tub cuay mñush. Orze' yu  
nu riib cuay ze', yu ze' lay Gyel Gut. Nunu ich yu ze'  
zaab tuuba' mbecy nu yaruuñ lugaar ze' nu yu' de añ.  
Orze' de yu ze' guud rishbeey niy nu cut yu tub nac  
mbecy lo tap nac yu. Ni mod gyicy dey dutuub la gy-  
ishlombecy. Gyicy dey nu gat mbecy nu mandzicy. Gyicy  
dey nu gat mbecy nu gyel yuu. Gyicy dey nu gat  
mbecy nu cubiñ. Gyicy dey nu gat mbecy nu güii.  
Nunu ni' zi'l gyicy dey nu cut de bañ gyish de mbecy.

<sup>9</sup> Na ornu biñ nu nac Shily ze' psug mi sey gay, orze'  
par nañ mez ni cuug bzaacä nu yu' de mbecy nu gut  
yu yaa de mbecy nu nac nu bzu fert dey nu nac de riidz  
ni Ñgyoozh, nunu nu nac nu b icy paa dey nu bzat dey  
Ñgyoozh. <sup>10</sup> Orze' de yu ze' ye la rniiy. Orze' nay:

—Ñgyoozh yon nu gya zir zu par dela mbecy, biñ nu  
ricy paa, ¿gul shuub dzi nu gri beer ni dela mbecy nu  
yu' gyishlombecy? Orze' gyabic ru i de mbecy nu biit  
de ya —na dey.

<sup>11</sup> Orze' tub ga la dey guud tub negy cacy duñ zuy.  
Orze' bdunii nu gyicy cup dey pasez se tub tiem mi'  
zi'l, gashtal gza' la numbr ni de mbecy nu ricy riiñ ni

Crisht, de yu nu ca lo cuen nu gat gal mod nu gut de  
yu nu bi gut ze'.

<sup>12</sup> Na ornu psug biñ nu nac Shily ze' sey shup, orze'  
bzaacä nu briib tub duru ily. Orze' bet cow lo doo  
güidz gal nu na negy nu rzu mbecy ornu rat famil niy.  
Ze' beey byaña lo ma gal nu na reñ. <sup>13</sup> Ze' de bel baa  
bet lag ma lo yu gal nu yet lag de urlas ca' ornu fert  
druu tub bi ily. <sup>14</sup> Orze' mnit baa gal nu rzac tub lyag  
gyicy ornu rtub mbecy ñi. Orze' dela b icy nu dela yu  
nu ri lo nisyudoo, delañ bruu chuñ se'ñ. <sup>15</sup> Orze' de rey  
ni gyishlombecy gua cach lo dey nañ de gyita' blyuu  
gal nu de lat gyita' ily ni de logyi'. Tublaazh la za dey  
nu de mbecy nu zu riiñ, gal nu de mbecy nu riib ic de  
soldad, gal nu de mbecy guani'ñ, gal nu de mbecy nu  
dzi cyiñ, gal nu de mbecy nu byac moz por fers la, gal  
nu de mbecy nu a' nac moz por fers la. <sup>16</sup> Orze' na dey  
rab yu de gyita' ily ze', gal nu de b icy ily:

—¡Bet lag too d e par nu cach ru d e ya, gun cue' nu  
gzac d e lo biñ nu zub lo yashily re, nunu cue' nu gzac  
d e lo cashtig nu cuic biñ nu nac Shily re! <sup>17</sup> Gun bi  
pshuub dzi nu blaazha' zir dzi ily, dzi nu cuic mi  
cashtig. Orze' ¿cyu gac gagye loñ? —na dey.

### De yu nu zub sey cyuga

**7** Despuees ni de nu nde', orze' bzaacä tap anc zu  
tub gay za' tap la scyiñ ni gyishlombecy. Orze' de  
yu ze' b icy dey nu cuez za' tap la bi ni gyishlombecy,  
gun orze' cue' nu gruuñ lo nisyudoo, ni lo yu. Ni lo ni  
tub la yag waruuñ. <sup>2</sup> Orze' bzaacä tub anc yad yu par  
ze' nu driib doo. Yu ze' nuuy tub g yiib nu nac sey ni  
Ñgyoozh mbañ. Orze' anc ze' ye la brish ti nuy de tap  
anc ze', como bi guud rishbeey ni dey nu ted ziy lo yu  
gal nu lo nisyudoo. <sup>3</sup> Orze' nay rab yu dey:

—¡Cue' ted zir lo yu, ni lo nisyudoo, ni lat de yag,  
gashtal gzuub la d e sey cyuga de mbecy nu ricy coz nu  
rlagy Ñgyoozh! —nay.

<sup>4</sup> Orze' güeñañ nu rnii tub mbecy nu la be la tant mbe-  
cy de yu nu gzub sey cyuga ze'. Orze' nde' tub gaynal  
zub cyuu Zub tap miily dey. De yu ze' bruuuy lat dela  
nez mbecy Israeel. <sup>5</sup> Orze' trocyup miily de mbecy Is-  
rael nu bruu lat nez Judá, de yu ze' bzub sey cyuga  
dey. Ze' trocyupa' miily de yu nu bruu lat nez Rubén.  
Ze' trocyupa' miily de yu nu bruu lat nez Gad. <sup>6</sup> Ze' trocyupa'  
miily de yu nu bruu lat nez Aser. Ze' trocyupa'  
miily de yu nu bruu lat nez Neftalí. Ze' trocyupa' miily  
de yu nu bruu lat nez Manasés. <sup>7</sup> Ze' trocyupa' miily de  
yu nu bruu lat nez Simeón. Ze' trocyupa' miily de yu nu  
bruu lat nez Leví. Ze' trocyupa' miily de yu nu bruu lat  
nez Isacar. <sup>8</sup> Ze' trocyupa' miily de yu nu bruu lat nez  
Zabulón. Ze' trocyupa' miily de yu nu bruu lat nez See.  
Ze' trocyupa' miily de yu nu bruu lat nez Benjamíing.

### Tub nac mbecy zigy nu zu negy cacy

<sup>9</sup> Despuees ni de nu nde', orze' bgüii, nunu bzaacä  
nu yu' tub nac mbecy zigy tonal la. Par nu tanta' zigy  
dey, ni wagaca' dulab dey. Orze' de yu ze' bruuuy lat de  
lo la nac mbecy. Bruu dey lat de lo la nez mbecy. Bruu

dey lat de mbecy nu rnii de lo la riidz. Nunu mas gash-tal lat dela mbecy bruu dey. Orze' bzu dey par lo yashily ze', nunu par lo biñ nu nac Shily ze'. Zu dey negy cacy duñ, nunu zu yaa dey yaa yagiñ. <sup>10</sup> Orze' ye la rbish ti dey. Orze' na dey:

¡Ñgyoozh, biñ nu zub lo yashily ze', nac mi biñ nu rboo mbañ de mbecy!

¡Ni' zi'l biñ nu nac Shily nac mi biñ nu rboo mbañ de mbecy!

<sup>11</sup> Orze' dela de anc yu'y dub yub la ze' nu zu yashily ze', gal nu ze' nu yu' de yu bel ze', gal nu ze' nu yu' tap de mbecy mbañ ze'. Orze' wes saa tiily dey gal lo yu la par ze' nu zu yashily ze'. Orze' briib zily dey Ñgyoozh.

<sup>12</sup> Orze' na dey:

¡Laab ni gac ñii!

Yad ñi ni Ñgyoozh ni den nu gyed gyel mbecy nim.

Yad ñi nim nu dugyim gyel lily.

Yad ñi nim nu gad lagy mi dela coz.

Yad ñi nim nu gyash mi de gras nu gric den nim.

Yad ñi nim nu ca lagy den lom.

Yad ñi nim nu gac gyicy mi dela coz.

Yad ñi nim nu nac mi biñ fert.

Dela nu nde' yad ñi ni Ñgyoozh ni den dub laa tiem par lo.

¡Laab ni gac ñii!,

na dey.

<sup>13</sup> Orze' tub de yu bel ze' bdugyi'y lo. Orze' nay:

—¿Cyu mbecy, de yu nu zu negy cacy duñ? ¿Nunu ca bruu dey? —nay.

<sup>14</sup> Orze' ya mnœ̄ loy:

—Ru rad lagy ru ca bruu dey —mnœ̄.

Orze' nay rab yu ya:

—De yu re yu nu bruu lugaar ze' nu tona' la deet guc. De yu re yu nu gu shab, nunu b icy caacy dey ñi lo reñ biñ nu nac Shily.

<sup>15</sup> Nde' nu yu' dey ze' nu zu yashily nu riib ic Ñgyoozh. Dzi rel la ricy dey coz nu rlagy mi nañ yu' nim.

Orze' biñ nu zub lo yashily ze' rsow mi too dey par nu cue' nu shiñ gzac yu, gun yu' dey ze' nu zum.

<sup>16</sup> Ze' wazac zi ga' dey nu gyan yu.

Ni nis wabigya' dey.

Ni ba wachuu ga'ñ cuerپ ni dey.

Ni nu zig wayicy seeda'ñ dey.

<sup>17</sup> Gun biñ nu nac Shily nu zu gazel ze' nu zu yashily ze',

mi ze' gñam dey gal nu rña mbecy Shily niy.

Orze' cha num dey ze' nu driib nis, nis nu rbic gyel mbañ.

Orze' Ñgyoozh cuiigy mi dela nis nu druu urlo dey —nay.

### Sey gagy

<sup>8</sup> Na ornu biñ nu nac Shily ze' psug mi sey gagy ze', se ri zu la byac gyibaa tub cyaal or. <sup>2</sup> Orze' gaze' nu bzaacä tub mbecy nu na gal nu na bel baa. Orze' bruu yu ze' guud ya gyiib ni gyerye ily nu rnii dey gably niy. <sup>2</sup> Orze' pshaal yu ro' ni gably. Orze' ru' gably ze' bruu tub dzeeñ ily gal nu druu ru' tub yo ily. Orze' dzeeñ ze' psoow ñi lo ba ni doo, gal nu lo bi, nunu wacabee napa' la gyishlombecy. <sup>3</sup> Orze' gushagy bruu de ma lat dzeeñ ze' bet ma lo yu. Orze' ma ze' cyiiñ ma nu gyicy ma gal nu ricy gune.

gua nuy ñi lo cuug nu zaay yuñ lat nu rnii nu dela mbecy Ñgyoozh. Rzaay yuñ lo cuug or nu zu par lo yashily, ze' nu riib ic Ñgyoozh. <sup>4</sup> Orze' dzeeñ yaal ze' bruuñ yaa anc nu zu lo Ñgyoozh, orze' wes nañ ñi lat nu rnii nu de mbecy mi. <sup>5</sup> Orze' gaze' nu anc ze' bdu' yaay psi'ñ yaal or ze'. Gaze' nu gush yu boo nu bruu lo cuug, bdu'y ñi nañ psi'ñ yaal ze'. Gaze' nu pshet lag yuñ lo yu. Gaze' nu mnii guzii. Nunu guc zu redz. Nunu bzu gyi ni guzii. Nunu briib duru.

### De trompet

<sup>6</sup> Orze' de gagy anc nu zu yaa gagy trompet ze' bzu ub ru' dey trompet niy nu bzu lily yu nu laay ñi.

<sup>7</sup> Gaze' nu anc loga blaay trompet niy. Orze' bet gyey gye, nu gyi, nu reñ. Gu' can ñii ornu beet ñi lo yu. Orze' lo dela lugaar ni gyishlombecy, wic tub ga nac lugaar niñ. Ze' byeeñ cyup nac lugaar nu wanchic. Lo dela yag nu nash gyishlombecy, wic tub nac ñii. Orze' byeeñ se cyup nac ñii. Orze' lo dela gyish, wic tub nac ñii. Ze' byeeñ cyup nac ñii.

<sup>8</sup> Gaze' nu anc cyup blaay trompet niy. Orze' bet lag tub coz nu rca gyi. Nañ gal nu na tub b icy ily. Bet lag ñi lo nisyudoo. Orze' lo dela nis nu yu' gyishlombecy, tub nac ñii byac ñi reñ. Ze' cyup naca'ñ wangyac ñi reñ.

<sup>9</sup> Orze' lo dela bañcyug nu yu' lo nisyudoo, gut tub nac ma. Ze' byeeñ cyup nac ma. Nunu lo dela barc, mnit lo tub nac ñii. Ze' byeeñ se cyup nac ñii.

<sup>10</sup> Orze' gaze' nu blaa ga' anc chon trompet niy. Orze' bet lag tub bel baa ily. Rca gyi ma gal nu na tub yaa gyi gyegy. Bruu ma gal baa. Orze' lo dela gyoow ni gyishlombecy, bet lag ma lo tub nac ñii. Ze' wangyet lag ma lo cyup nac ñii. Orze' lo dela lugaar ze' nu driib nis, bet lag ma lo tub nac ñii. Ze' wangyet lag ma lo cyup nac ñii. <sup>11</sup> Orze' nu la bel baa ze', nde' Bel Baa Lya. Orze' lo dela nis nu yu' gyishlombecy, tub nac ñii byalyañ. Ze' cyup nac ñii wangyalyañ. Orze' zigy mbe-cy gut yu nu nac nu go'y nis ze', gun byalyañ.

<sup>12</sup> Orze' gaze' nu anc tap blaay trompet niy. Orze' lo dela lugaar ni doo, bet cow tub nac ñii. Ze' cyup nac ñii wangyet cow ñi. Nunu lo dela lugaar ni beey, bet cow tub nac ñii. Ze' cyup nac ñii wangyet cow ñi. Nunu lo dela bel nu ta' baa bet cow lo tub nac ma. Ze' cyup nac ma wangyet cow lo ma. Orze' lo trocyup or ni tub dzi, bet cow tap or. Nunu lo trocyup or ni tub rel, bet cow'a' tap or.

<sup>13</sup> Orze' bgüjj baa. Bzaacä tub psi. Gya zaab ma lo bi. Orze' güeñä nu ye la mnii ma. Orze' na ma:

—Lashta de mbecy nu rcyiiñ lo yu ornu glaa se chon de anc trompet niy! —na psi ze'.

<sup>9</sup> Orze' gaze' nu anc gay blaay trompet niy. Orze' bzaacä tub mbecy nu na gal nu na bel baa. Orze' bruu yu ze' guud ya gyiib ni gyerye ily nu rnii dey gably niy. <sup>2</sup> Orze' pshaal yu ro' ni gably. Orze' ru' gably ze' bruu tub dzeeñ ily gal nu druu ru' tub yo ily. Orze' dzeeñ ze' psoow ñi lo ba ni doo, gal nu lo bi, nunu wacabee napa' la gyishlombecy. <sup>3</sup> Orze' gushagy bruu de ma lat dzeeñ ze' bet ma lo yu. Orze' ma ze' cyiiñ ma nu gyicy ma gal nu ricy gune.

<sup>4</sup> Orze' ma ze' gua rasoo lo ma nu cue' gyicy ma dąy nu de gyish, ni cue' gyicy ma dąy nu de yag, ni cue' gyicy ma dąy nu ni tub la coz ca'. Sinu tub zi la mod nu gyicy ma, nde' nu shiñ gyicy nu ma mbecy nu sac sey ni Ngoozh cyuga. <sup>5</sup> Orze' de gushagy ze' wangad rishbeey nu cut ma de mbecy ze'. Nomaas guud rishbeey ni ma nu shet zi zil ma mbecy gaay beey. Nunu gyicy ma nu gac ni mbecy gal nu rac nu rgod gune. <sup>6</sup> Orze' lat gaay beey ze', orze' de mbecy yub yu tub mod nu gat yu. Tees wayap dey ñi. Nunu mas galagy dey nu gat yu, tees rila wad mod nu gat dey.

<sup>7</sup> Orze' de gushagy ze' rabee ma gal nu rabee cuay ornu bi zu lily ma par gyel yuu. Too ma Zub tub coz nu na gal nu na coron or. Nunu lo ma nañ gal nu na lo mbecy. <sup>8</sup> Ze' gyich too ma nañ gal nu na gyich too biñ mñaa. Ze' lay ma nañ gal nu na lay biidz. <sup>9</sup> Orze' lyush ma noow ñi nu tub coz nu na gal nu na gyiib. Nunu lowe' ma rzigy ñi gal nu rzigy zañ caret ornu rca yu cuay ornu rash ma carer nu rshet yaa dey losa' yuuy.

<sup>10</sup> Zub ne de ma. Nañ gal nu na ne gune. Nunu Zub ngooch ma looñ. Nunu nu nac ne ma, cyiñ ma nu shet zi ma mbecy lat gaay beey ze'. <sup>11</sup> Orze' zu tub mbecy nu riib ic gushagy ze'. Yu ze' nac yu anc ni gabil. Orze' yu ze' lay Abadón benu nu riidz hebreo. Ze' benu nu riidz griego, orze' lay Apolión. Nde' yaruuñ yu nu rnit lo.

<sup>12</sup> Orze' bded tir loga la nu shiñ guc. Ze' ricy falt ru' se cyup tir nu shiñ gac.

<sup>13</sup> Orze' gaze' nu anc shup blaay trumpet niy. Orze' güeña nu zaab ti' nu rnii par de tub ga scyiñ ni cuug or nu zu lo Ngoozh. <sup>14</sup> Orze' riidz ze' rniiñ lo anc shup nu ricy cup trumpet ze':

—Glaar de tap anc nu nag ru' gyoow ily nu la gyoow Eufrates —rniiñ.

<sup>15</sup> Orze' ni mod bdulaa de tap anc ze', gun orze' lo dela mbecy nu yu' gyishlombecy, cut dey tub nac yu. Orze' gyiyeen se cyup nac yu. Gun de yu ze' bi yu' lily laa dey par or na, nu dzi na, nu beey na, nu ña'n na. <sup>16</sup> Orze' yu' cyup gaynal miyoo de soldad nu riib cuay.

<sup>17</sup> Orze' pcaal mniiñ lo nu bzaaca de cuay ze' gal nu de yu nu Zub ich ma. De yu ze' bi ca tub cyug nu rsoow ñi lyush yu. Ze' cyug ze', nde' nañ gal nu na gyi, nunu ca' la rgüiiñ, nunu caach rgüiiñ. Nunu cuay ze' na too ma gal nu na too biidz. Nunu ru' ma driib lyush gyi, gal nu dzeeñ, gal nu asufre. <sup>18</sup> Orze' lo dela mbecy nu yu' gyishlombecy, gut tub nac yu nu nac chon coz nu driib ru' ma ze'. Orze' byeeñ se cyup nac yu. Chon coz ze', nde' gyi, nu dzeeñ, nu asufre. <sup>19</sup> Gun de cuay ze' cyiñ ma nu nac ru' ma nunu nu nac ne ma. Orze' ne ma nañ gal na bily. Zub too ma. Orze' nu too ma shet zi ma mbecy.

<sup>20</sup> Tees de' zir mbecy nu wangat nu nac de coz dañ ze' wanchecha dey nu gyicy yu de coz a' nap nu ricy yu, ni wanchecha dey nu rcay de nuras a' nap, nu de nab nu byaa nu or, nu de nab plat, nu de nab nu byaa nu gyiib cach, nu de nab nu byaa nu gyita', nu de nab nu byaa nu yag. Wanchecha dey nu rcay nab nu wacsac, ni wagyeñ, ni wacsca. <sup>21</sup> Ni wanne' dey cyi nu ricy yu. Cyi ze', nde' nu rut dey losa'y, nunu ricy dey gyel tu', nunu

ricy dey cyi nu ral yu mbecy nu wanchelaay, nunu ricy dey gubaan. Dela cyi ze' wanne' dey ñi.

### Tub anc nu nash gyicy miñ

**10** Orze' gaze' nu bzaaca tuuba' anc fert. Orze' bruuuy gyibaa bet yu. Orze' za baa rsoow ñi cuerpa niy. Ze' tooy riib shelcuit. Ze' ya loy briic ñi yaa gal nu na yaa ni doo güidz. Ze' gyi'y rabeeñ gal nu rabee tub yabi gyi. <sup>2</sup> Orze' zu yaay tub gyicy mi'. Orze' bi ndiily loñ. Orze' bzu gyi' beey lo nisyudoo. Ze' gyi' reg yu bzuy ñi lo yu wach. <sup>3</sup> Orze' ye tona' la brish tiy gal nu rbish ti biidz. Na ornu brish tiy na, orze' mnii guzii gagy se'. <sup>4</sup> Na ornu mnii guzii gagy se' na, orze' bacy pœe nu ncœa lo gyicy. Orze' güeña nu zaab ti' gal gyibaa. Orze' nam:

—Riidz nu mnii guzii gagy se' ze', cu' choow ru ñii nañ lardoor. Cue' caar ñii lo gyicy —nam.

<sup>5</sup> Gaze' nu bzaaca anc nu zu gyi' lo nisyudoo gal nu lo yu wach, orze' yu ze' pshes nañ yaa beey par baa.

<sup>6</sup> Orze' bzat yu Ngoozh par nu gabe nu segur la gac gal nu mniy. Ngoozh rcyiñ mi tub la. Mi ze' psa' lagy mi baa, nu gyishlombecy, nu nisyudoo, nu dela coz. Orze' anc ze' bzat yu mi ze'. Orze' nay:

—Walagy ñi nu tuñ lez naa na. <sup>7</sup> Tees ornu anc gagy ze' cugyil' nu laay trumpet niy, orze' Ngoozh gza' lom coz nu rnii toom nu gyicy mi. Coz ze', nde' wangad lagy de mbecy. Tees pshaal mi ñii lo de moz nim, lo de yu nu mnii por cuen nim —nay.

<sup>8</sup> Orze' güeña nu zaab ti' nu rnii tub tira' laaba' gal gyibaa. Orze' nam:

—Gua na, nunu gush gyicy mi' nu bi ndiily lo nu zu yaa anc nu zu gyi' lo nisyudoo gal nu lo yu wach —nam.

<sup>9</sup> Orze' gua lo anc ze'. Orze' bdiña gyicy mi' ze' loy. Orze' yu ze' nay rab yu ya:

—Gush ñi gow ru. Ornu gow ru ñii, orze' ish ñi gal nu ish dziñ. Tees ornu chetiñ nañ ru, orze' gyalyañ —na anc ze'.

<sup>10</sup> Orze' brusha gyicy mi' nu zu yaa anc ze'. Orze' bdaw ñii. Orze' ish row ñi gal nu ish dziñ. Tees ornu gutiñ nañ, orze' byalyañ.

<sup>11</sup> Orze' de mbecy mniy lo:

—Orze' na tub tira' rlagy ñi nu shaal ru de riidz nu druu lo Ngoozh nu rniiñ lac na de coz nu gzac zañ nac nasyoong, gal nu zañ nac nez de mbecy, gal nu zañ lo riidz, gal nu zañ rey —na dey rab yu ya.

### Cyup teshtig ni Ngoozh

**11** Orze' guud tub ya beey ne nañ gal nu na tub yagi. Orze' na dey rab yu ya:

—Wes su. Orze' tush peer yu' wedz ni Ngoozh.

Nunu tush peer lo cuug. Nunu glab ru de mbecy nu driib zily Ngoozh nañ yu' ze'. <sup>2</sup> Tees cue' tush peer loli' nu riib par ich yu', gun Ngoozh bzaan mi gyu'ñ yaa de mbecy nu walab mbecy Israeel. Orze' de yu ze' zub gyi' dey too gyedz ni Ngoozh cyuu zub cyup beey.

<sup>3</sup> Orze' ya zuu nezä cyup teshtig ne nu cha nii dey por

cuen nē nañ trocyup gaynal zab gayon dzi. Ze' de yu ze' zu dey negy nu byaa nu duu gyedz.

<sup>4</sup>Orze' cyup de teshtig ze' nac yu cyup ya oliva, nunu nac dey cyup candeler nu zu lo Ñgyoozh Shuaan den, biñ nu nac Ñgyoozh ni gyishlombecy. <sup>5</sup>Benu ca na tub mbecy galagy yu shiñ gyicy nuy dey, orze' grib gyi ru' dey nu gnit lo mbecy ze'. Orze' ni mod gat cyu zi'l mbecy nu galagy nu shiñ gyicy nu de yu ze'. <sup>6</sup>Orze' de yu ze' ricy cup yu rishbeey nu soow yu baa nu cue' gyet gyey lat nu shaal dey riidz ni Ñgyoozh. Ni' zi'l ricy cup dey rishbeey par nu gyicy yu nu nis gyac ñi reñ. Nunu ricy cup dey rishbeey nu gyicy yu nu gzac zi de mbecy gyishlombecy nu de lo la mod nunu la zi'l be tir nu galagy dey. <sup>7</sup>Na ornu gya' lo nu nii dey por cuen ni Ñgyoozh, orze' tub bañcug dañ nu gruu gabil, ma ze' chucoo nu ma dey. Orze' gyicy ma gan cut ma dey. <sup>8</sup>Orze' cuerpi dey gabish ñi lat cay ni gyedz ily, ze' nu pca Shuaan den Jesuuz lo cruu. Orze' gyedz ze' lañ Sodoma, nunu lañ Egipto, benu nu riidz tiily. <sup>9</sup>Orze' mbecy nu gruu dutuub la gyishlombecy, güii dey cuerpi de yu ze' par chon dzi nu. Mbecy nu gruu dela gyedz, mbecy nu gruu lat de lo la nez, mbecy nu rnii de lo la riidz, mbecy nu gruu dela nasyoong, dela dey güii lo cuerpi de yu ze'. Ni wazaan dey nu cach mbecy de cuerpi de yu ze'.

<sup>10</sup>'Orze' de mbecy nu yu' gyishlombecy gyet lagy dey nu nac cyup mbecy nu gut ze'. Par nu tanta' yet lagy dey, orze' cuic dey coz ni losa'y leew la. Gun cyup de mbecy nu mnii por cuen ni Ñgyoozh ze' b icy dey nu bzac zi de mbecy nu yu' gyishlombecy. <sup>11</sup>Tees ornu gza' chon dzi nu, orze' Ñgyoozh gyicy mi nu gyabañ dey. Orze' gyeshte dey. Orze' dela mbecy tonaa' la dzib dey. <sup>12</sup>Gaze' nu gyeñ de yu nu byabañ ze' nu zaab ti' nu rnii gashtal gyibaa. Orze' nam:

—jGup der gal ii! —nam.

Orze' chup dey gyibaa lat za, nunu de losa' yuu dey gzac yu. <sup>13</sup>Orze' laab or la ze' griib tub duru ily. Orze' lo dela lugaar ni gyedz ze', nit lo tub nac lugaar niñ. Ze' wanit lo se gaa nac lugaar ze'. Nunu nit lo gagy miily mbecy nu nac duru ze'. Orze' de' zir de mbecy tonaa' la dzib dey. Orze' cugyi' nu griib zily dey Ñgyoozh, biñ nu Zub gyibaa.

<sup>14</sup>Orze' bi bza' cyup tir nu shiñ rac. Sñuu ga bi cyid tir chon.

### Trompet gagy

<sup>15</sup>Orze' gaze' nu anc gagy blaay trompet niy. Orze' ye la zaab ti' nu rnii gal gyibaa. Orze' nam:

Na bi bri gyel gubier ni Ñgyoozh, Shuaan den, gal nu Jesuuz, Mesías nim.

Orze' de mi ze' gyub ic mi tub la.

<sup>16</sup>Gaze' nu gal zu tap de yu bel nu Zub par lo nu lo nu yashily ze' nu riib ic Ñgyoozh, gusab tiily dey lo yu. Orze' briib zily dey Ñgyoozh. <sup>17</sup>Orze' na dey:

Gric de gras nir, Ñgyoozh, Shuaan de.

Ru biñ nu gac gyicy dela coz.

Ru gac ru par ich, nunu ru nac ru na.

Na cugyi' nu gyub ic ru gyishlombecy.

<sup>18</sup>Orze' de mbecy nu walab mbecy Israeel tonaa' la rzi lagy dey,  
gun na bi pshuub dzi nu cuic ru cashtig ni dey.  
Nunu ni' zi'l pshuub dzi nu ri beer ni de mbecy gut.  
Nunu pshuuba' dzi nu gyabic ru i de moz nir, de yu nu mnii por cuen nir,  
gal nu ni de yu nu bzu chu nu gac nir, nunu ni de yu nu pca lagy lor.

Orze' gyabic ru i dey mas nac yu yu lily o mas nac yu yu gyidz.

Nunu na bi pshuub dzi nu nit lor de mbecy nu rnit lo gyishlombecy ii,  
na gal zu tap de yu bel ni mbecy Israeel.

<sup>19</sup>Orze' byaal ro' wedz ni Ñgyoozh gal gyibaa. Orze' nañ yu' wedz ze' bruu zac gyañ nu ri choow trat nim. Gaze' nu bzu gyañ ni guzii, nunu gac zu redz, nunu mnii guzii, nunu briib duru, nunu tonaa' la bet gyey gye.

### Biñ mñaa nu low dañ

**12** Orze' gaze' nu bruu zac tub muesht ily gyibaa. <sup>1</sup>Nde' tub biñ mñaa. Shab mi nu zum nañ gal nu na doo güidz. Ze' gyañm ca tub coz nu na gal nu na beey. Orze' toom zab tub coron nu ricy cup trocyup bel baa. <sup>2</sup>Orze' mi ze' se nu gaal zi'l mi mdoo. Orze' rbish tim nu rac nim nu gaal mi mdoo.

<sup>3</sup>Orze' bruu zaca' tuuba' muesht gyibaa. Nde' tub low dañ. Tona' la zily ma. Nunu ña coloor ma. Ma ze' zub gagy too ma. Nunu zub tii nguaz ma. Nunu ri tub ga la coron tub ga too ma. <sup>4</sup>Orze' lo dela bel nu ta' baa ptel ne ma tub nac ma. Orze' byeeñ cyup nac de bel ze'. Orze' pshet lag ma de ma ze' lo yu. Orze' low ze' gusu ma lo biñ mñaa nu sñuu ga gal mdoo ze', gun orze' gow ma mdoo cuanzir nu gal mi. <sup>5</sup>Orze' biñ mñaa ze' bgaal mi tub mdoo gyeey. Orze' mdoo ze', mi ze' gyub ic mi de lo la mbecy nu tub garot gyiib. Gaze' nu byash mbecy mdoo ze'. Orze' gua nu dey mi lo Ñgyoozh, ze' nu riib ic mi. <sup>6</sup>Orze' biñ mñaa ze' bruu chum carer zam tub lugaar ub zi. Zam tub lugaar nu bi bzu lily Ñgyoozh. Gun ze' gad coz nu ciyiñ nim trocyup gaynal zab gayon dzi.

<sup>7</sup>Gaze' nu brugyi' tub gyel yuu gyibaa. Orze' Miguel nu de anc niy gua dey contr ni low dañ ze' gal nu de anc ni ma ze'. <sup>8</sup>Tees wangagye low dañ ze'. Orze' wangada' lugaar nu ñciyiñ ma nu de anc ni ma gyibaa. <sup>9</sup>Orze' pcyuu nu dey ma. Orze' laab low dañ ze', ma ze' bily nu nil zu nese gulas. Ma ze' bañ nu rnii dey nuras, bañ nu rguu dela mbecy gyishlombecy. Orze' pshet lag dey ma nu dela anc ni ma lo yu ii.

<sup>10</sup>Orze' ye la zaab ti' nu rnii gal gyibaa. Orze' na:

—Na bi pshuub dzi nu co mbañ Ñgyoozh mbecy.

Pshuub dzi nu gyicy mi coz ily, nunu pshuub dzi nu gyub ic mi gal nu ricy rey. Nunu shuub dzi nu gyub ica' Mesías nim. Gun bi pcyuu nu dey yu nu driib gyidza too de losa' den. Yu ze' zuy dzi rel la lo Ñgyoozh nu driib yu gyidza too dey. <sup>11</sup>Tees de losa'n b icy dey gan yu ze' nu nac reñ biñ nu nac Shily nu gua gun lo Ñgyoozh nunu nu nac de riidz rishli nu mnii dey. De yu ze' wanchib dey nu gat yu, sinu "O la" mnii dey mas gat

yu.<sup>12</sup> Orze' guciyit lagy de mbecy nu yu' gyibaa. Tees cuua de ru mbecy nu yu' lo yu gal nu lo nisyudoo. Gun nuras bi bet yu lat der. Nunu ton'a' la rzi lagy yu, gun bi rad lagy yu nu wazu tuñ yu —na qal qyibaa.

<sup>13</sup> Na ornu gud lagy low dañ ze' nu bi pshet lag dey  
ma lo yu, orze' brugyi' nu zaab ma ich biñ mñaa nu  
bgaal mdoo gyeey ze'. <sup>14</sup> Orze' guud cyup lowe' ily ni  
psi ni biñ mñaa ze', gun orze' gyes nañ mi cham tub  
lugaar ub zi. Orze' byazet mi lo bily ze'. Orze' ze' gad  
dela coz nu cyiiñ nim chon ña'n nu. <sup>15</sup> Orze' bily ze'  
bloo ma nis ru' ma, gun orze' byac ñi tub gyoow nu  
cha nuñ biñ mñaa ze'. <sup>16</sup> Tees yu blocyuub ñi biñ mñaa  
ze'. Orze' byaal loñ. Go'ñ nis nu bruu ru' low dañ ze'.  
<sup>17</sup> Orze' tona' la guzi lagy ma lo biñ mñaa ze'. Orze'  
gush nez ma za ma nu chucoo nu ma de' zir nez mi nu  
bruu zac despuees, gal nu dela mbecy nu rzuub  
gyidag de riidz nu mnii Ñgyoozh, laab de yu nu ricy  
paa nu de riidz rishli nu rshaal mbecy nu nac Jesucr-  
isht.

13 Orze' low dañ ze', ma ze' gusu ma ru' nisyudoo.

## Cyup bañ dañ

Orze' bzaacə tub bañ dañ bruu ma lo nisyudoo yad ma. Orze' ma ze' ricy cup ma gagy too ma. Nunu ricy cup ma tii nguaz ma. Orze' lo tub ga nguaz ma ri tub ga coron. Nunu laab de too ma ze' ta' de nu la nu za contr ni Ñgyoozh.<sup>2</sup> Orze' bañ dañ nu bzaacə ze' rabee ma gal nu rabee tub biidz. Ze' gyi' ma gal nu na gyi' os nañ. Nunu ru' ma gal nu na ru' bishtoo na. Orze' low dañ ze' b icy ma nu gac gyicy bañ dañ ze' la zi'l coz nu cyiiñ ma nu gyicy ma. Nunu briic ma yashily nu riib ic ma, ni bañ dañ ze'. Nunu briic ma rishbeey nu gyub ic ma ze'.<sup>3</sup> Orze' lo gagy too bañ dañ ze', rlyu nu gud güiiñ, tub lo güii nu gyicy ñi nu gat ma. Tees ze' nu gud güii ze' ni ma mnit. Orze' dela mbecy nu yu' gyishlombecy za nu ic dey. Orze' za ca dey ich bañ dañ ze'.<sup>4</sup> Orze' dela mbecy briib zily dey low dañ ze', gun ma ze' briic ma rishbeey ni bañ dañ ze' nu gyub ic ma. Nunu ni' zi'l briib zily dey bañ dañ ze'. Orze' na dey:

—¿Cyu ñuu lily na gal nu na bañ dañ ii? ¿Cyu gagye nu chucoo nu ma re? —na dey.

<sup>5</sup> Orze' low dañ ze' bzaan ma nu rnii bañ dañ ze' riidz le' gal nu riidz nu za contr ni Ñgyoozh. Nunu briic ma rishbeey nu gyub ic ma cyuu zub cyup beey. <sup>6</sup> Orze' ni bicy ma. Mnii ma riidz nu za contr ni Ñgyoozh. Mnii zi ma ni Ñgyoozh, nunu mnii zi ma ni yu' wedz nim, nunu mnii zi ma ni de anc nu yu' gyibaa. <sup>7</sup> Nunu ni' z'il low ze' bzaan ma nu gyicy ma gyel yuu nu de mbecy ni Ñgyoozh gashtal gyicy la ma gan. Orze' briica' ma rishbeey nu gyub ic ma dela nez mbecy, de mbecy nu yu' dela gyedz, de mbecy nu rnii de lo la riidz, nunu de mbecy ni dela nasyoong. <sup>8</sup> Orze' dela mbecy nu yu' gyishlombecy briib zily dey bañ dañ ze'. Nomaas nil nese anzir nu sa' lagy Ñgyoozh gyishlombecy, bi ca nu la de mbecy lo libr ni mbecy nu gruu mbañ. Orzel' de yu ze' wanriib zily dey ma. De yu ze' yu nu ca nu la lo libr nu ricy cup biñ nu nac Shily nu gut ze', de yu ze' wanriib zily dey ma.

<sup>9</sup> Orze' benu mbecy zub gyidag yu, orze' rlagy ñi nu zuub gyidag yu. <sup>10</sup> Ze' benu tub mbecy ca lo cuen niy nu chay pres, orze' segur la chay. Ze' de yu nu ca lo cuen nu gat nu mandzicy, segur la gat dey nu mandzicy. Nde' nu de mbecy ni Ñgyoozh rlagy ñi nu gyicy cup dey pasez nunu rlagy ñi nu gyicy cup dey consuel lom.

<sup>11</sup> Orze' gaze' nu bzaacą tuuba' bañ dañ. Briib ma lo  
yu yad ma. Orze' ma ze' Zub cyup nguaz ma. Nañ gal  
nu na nguaz shily. Orze' mnii ma gal nu rnii low dañ  
ze'. <sup>12</sup> Orze' bañ dañ cyup ze' b icy ma riiñ ni bañ dañ  
loga la ze'. Gun laaba' rishbeey nu ricy cup bañ loga  
ze' nu gyub ic ma mbecy, ni' zi'l laaba' rishbeey ze' ricy  
cup bañ cyup ze'. Orze' b icy ma nu briib zily dela mbe-  
cy nu yu' gyishlombecy bañ loga ze', bañcyug nu guud  
güii nu rlyu nu gat la. Ze' mnit ni ma. <sup>13</sup> Ni' zi'l bañ  
cyup ze' b icy ma zañ nusuriidz. Lo rgüii la de mbecy bi-  
cy ma nu bruu gyi gal baa bet ñi lo yu. <sup>14</sup> Orze' guud  
rishbeey nu gyicy ma nusuriidz laab ze' nu zu bañ loga  
la ze'. Orze' nu nac nusuriidz nu b icy ma ze', orze' b icy  
ma gan bguu ma dela mbecy nu yu' gyishlombecy.  
Orze' laab ma mnii ma lo dela mbecy nu zaa dey tub  
nab bañ loga ze', bañ nu gud güii nu mandzicy ze',  
tees gabee mbañ ma. <sup>15</sup> Orze' bañ cyup ze' guud mod  
ni ma nu gyicy ma nu cui mbañ nab bañ loga ze', gun  
orze' nab ze' gniñ, nunu gyicy ñi nu gat de mbecy, de  
yu nu wariib zily ñi. <sup>16</sup> Orze' ma ze' b icy ma nu dela  
mbecy ca beey cyugay gal nu yaa beey. Mas yu gyidz,  
mas yu lily, mas yu guaniñ, mas mbecy zi, mas moz, o  
mas patroo, tees dela dey ca beey dey. <sup>17</sup> Ni tub la  
mbecy wac ziy, ni wac cut yu coz niy benu sac beey ze'  
cuerp niy. Ze' beey ze', nde' nu la bañ dañ ze', o num-  
br nu yaruuñ nu la ma. <sup>18</sup> Orze' rlagy ñi mbecy nu siñ  
too par nu gyet lag yu cuen de nu nii. Gun yu nu gyet  
lag cuen gac gyicy yu nu gyet lag yu cuen lac yaruu  
numbr ni bañ dañ ze'. Gun numbr ze', nde' yaruuñ nu  
la tub mbecy. Nunu numbr ze', nde' shuup gaynal Zub  
gayon Zub shuup.

Tub gaynal zub cyuu zub tap miily mbecy rul dey

**14** Gaze' nu bgüii. Orze' bzaacä biñ nu nac Shily  
zum too tub bicy nu la Sión. Orze' yu' tub gaynal  
zub cyuu Zub tap miily mbecy yu' dey tuy mi. Orze'  
cyuu de yu' zel hi ca pu lam gal pu pu la Ñgwacab.

<sup>2</sup> Gaze' nu güeñä nu zaab ti' rnii gal gyibaa. Orze' rzigy gal nu rzigy ze' nu yet sheñ nis. Nunu rzigy gal nu rnii guzii. Zaab ti' ze' gal nu zaab ti' nu rshet dey lo zañ beeñ nu la arpa. <sup>3</sup> Orze' tub gaynal zub cyuu zub tap miily mbecy ze' rul dey yu'y ze' nu zu yashily ze' nu riib ic Ñgyoozh, nu lo de tap mbecy mbañ ze', gal nu lo de yu bel ze'. Orze' ni tub la mbecy wagac dey cant ze'. Nomaas tub gaynal zub cyuu zub tap miily mbecy ze', de yu nu bruu mbañ lat de mbecy gyishlombecy, de yu ze' guc yu cant ze'. <sup>4</sup> Orze' de yu ze' mbecy nu wangal biñ mñaan. Nac dey mbecy yon. Orze' za ca dey ich biñ nu nac Shily ze' ca zi'l ze' nu cham. Orze' bruu mbañ dey lat de mbecy gyishlombecy, nunu nac dey mbecy loga nu byash Ñgyoozh, gal nu biñ nu nac Shily ze'. <sup>5</sup> Nunu rila wanquu dey. Nunu sac la falt ni dey.

## De chon anc

<sup>6</sup> Gaze' nu bzaacä tub anc nu gya tonä' la zaab yu baa. Orze' yu ze' rded nuy riidz nu rila walazh nu rnii lac mod gruu mbañ mbecy. Orze' pshaal yu riidz ze' lo dela mbecy gyishlombecy. Gush lañ mbecy nu bruu dela nasyoong, mbecy nu bruu de lo la nez, mbecy nu rnii de lo la riidz, mbecy nu bruu de ga la gyedz. Lo de yu ze' pshaal anc ze' de riidz ze'. <sup>7</sup> Orze' ye la mniyi. Orze' nay:

—Pca lagy der lo Ñgyoozh nunu byabic der gyel mbecy nim. Gun na bi pshuub or nu gri beem ni de mbecy. Orze' briib zily der mi ze', biñ nu psa' lagy gyibaa, gal nu gyishlombecy, gal nu nisyudoo, gal nu dela ze' nu driib nis —nay.

<sup>8</sup> Orze' yad tuuba' anc. Yu ze' anc cyup. Orze' gua cay ich anc loga ze'. Orze' ye la mniyi. Orze' nay:

—Byagash zu gyedz Babilonia, tub gyedz nu dzi gya bzu, gun gyedz ze', nde' nañ gal nu na tub biñ mñaa nu b icy nu rzugy mbecy dela gyedz nu ñup nim. Ze' ñup ze', nde' yaruuñ gyel che' nim —nay.

<sup>9</sup> Gaze' nu yad tuuba' anc. Yu ze' yu chon. Orze' yu ze' gua cay ich yu cyup ze'. Orze' ye la mniyi. Orze' nay:

—Orze' cyu zi'l mbecy nu griib zily bañ dañ ze' nu nab ma, nunu cyu zi'l mbecy nu ricy cup beey ni ma cyugay o yaay, <sup>10</sup> orze' yu ze' gzuub ru'y taz ñup nu cuic Ñgyoozh. Ze' ñup ze', nde' cashtig nu cuic gyel lam ni dey. Nde' yu'ñ nañ taz nu gzuub ru' dey. Orze' dela de mbecy nu zuub ru' taz ze', gzac zi dey nu gyi gal nu asufre lo la de anc ni Ñgyoozh. Nunu lo biñ nu nac Shily ze' wayeca lañ nu zac zi dey. <sup>11</sup> Orze' dzeeñ nu grib lo gyi nu gzac zi de yu ze', gyes nañ ñi tub la. Nunu wada' nu gyag lagy de mbecy nu griib zily bañ dañ ze' nu nab ma. Wada' nu gyag lagy de yu nu ca beey nu yaruuñ nu la ma. <sup>12</sup> Orze' dela de mbecy ni Ñgyoozh rlagy ñi nu gyicy cup dey pasęz. De yu nu rzu ub gyidag nim, de yu nu ricy paa ni Jesuuz, dela dey rlagy ñi nu gyicy cup dey pasęz —nay.

<sup>13</sup> Orze' gaze' nu güeñä nu zaab ti' nu rnii gal gyibaa. Orze' rniiñ:

—Pcaa nu nii: "Dzi ni de mbecy benu nac yu mbecy ni Ñgyoozh ornu gat yu par lo." Ni pcaa.

Gaze' nu mnii Espiriit Yon ni Ñgyoozh. Orze' nam:

—Laab, gun gad nu zu lagy dey, nunu gya nu dey gyel nap ni de coz nu b icy yu —nam.

## Cosech ni gyishlombecy

<sup>14</sup> Orze' gaze' nu bgüij par baa. Orze' bzaacä tub za cacy. Orze' too za ze' zu Jesuuz. Rabeem gal nu rabee tub yu gyeey. Ze' toom ri tub coron or. Zu yaam tub os ri'ñ. <sup>15</sup> Gaze' nu bruu tuuba' anc nañ yu' wedz ni Ñgyoozh. Orze' ye la mnii nuy Jesuuz, biñ nu zu too za ze'. Orze' nay:

—Bicy riiñ nu os nir. Pte' cosech, gun bi guc niñ. Cosech ni gyishlombecy ii bi pshuub dzi niñ —nay.

<sup>16</sup> Orze' Jesuuz, biñ nu zu too za ze' bdu' ted mi os nim lo yu. Orze' pte'm cosech nu yu' gyishlombecy ii.

<sup>17</sup> Gaze' nu bruu tuuba' anc nañ yu' wedz ni Ñgyoozh nu Zub gyibaa. Nunu ni' zi'l yu ze' zu yaay tub os ri'ñ.

<sup>18</sup> Gaze' nu bruu tub anc lo cuug, yu nu riib ic gyi. Orze' ye la mniyi ornu bredz yu anc nu zu yaa os ri'ñ ze'. Orze' nay:

—Bicy riiñ nu os nir. Orze' pcyug de ic urbyay nu zaab dela ze' nu nash gyishlombecy, gun na bi guuñ —nay.

<sup>19</sup> Gaze' nu anc ze' bdu' ted yu os niy lo yu nu shi'ñ yu de urbyay. Gaze' nu pshet lag yu urbyay ze' nañ tub zo nu dushijñ. Orze' zo ze', nde' yaruuñ cashtig ni Ñgyoozh. <sup>20</sup> Orze' zet ru' gyedz bdushij urbyay ze' nañ zo ze'. Orze' bruu reñ nañ zo ze'. Orze' byac ñi tub gyoow. Yu' chon gaynal miily metr nu tuñ nu yaañ. Ze' nu gyi nu ri reñ ze', nde' pshuub ñi gal fren la ni cuay.

## De anc nu briic gagy cashtig: laab nde' la cashtig blazh

<sup>15</sup> Orze' gaze' nu bzaacä tub muesht baa. Coz ily tonä' la guc, nunu tonä' la za du icä. Orze' zu gagy anc. Nunu zu gagya' cashtig. Laab nde' la cashtig blazh, gun laab nde' la nu blazh pcha' ic Ñgyoozh.

<sup>2</sup> Gaze' nu bzaacä tub coz nu rlyu nu nac ñii nisyudoo guan gu' can ñii nu gyi. Nunu bzaacä nu ru' nisyudoo ze' yu' de mbecy nu b icy gan. Wanriib zily dey bañ dañ ze'. Ni wanriib zily dey nab ma. Ni wanca numbr ni ma cyuga dey. Numbr ze', nde' yaruuñ nu la ma. Nunu zu yaa dey tub lo beeñ nu la arpa nu briic Ñgyoozh ni dey. <sup>3</sup> Orze' de yu ze' biil dey cant ni Moisees, yu nu b icy de coz nu mnii Ñgyoozh. Nunu biil dey cant ni biñ nu nac Shily ze'. Orze' rul dey:

Ñgyoozh Shuaan de, biñ nu gac gyicy dela coz, tonä' la coz ily ricy through.

Za du la ic dë nu nac ñii.

Ru nac ru rey ni dela nasyoong.

Dela mod nu ricy ru ricy ru tub mod nu se'ñ, nunu ricy ru tub mod nu rishli.

<sup>4</sup> Shuaan de, dela mbecy rdzib dey lor.

Dela mbecy gyabic dey gyel mbecy nir.

Tub zi la ru nac ru biñ yon.

Orze' mbecy nu gruu dela gyedz gru'ña dey lor nu grib zily dey ru,

gun orze' dela mbecy zac dey de coz nap nu ricy ru.

Ni mod biil de mbecy ze'.

<sup>5</sup> Na ornu blazh de nu nde', orze' bgüij. Orze' bzaacä nu byaal lugaar yon ni yu' wedz ni Ñgyoozh, laab lugaar ze' nu ri choow trat nu b icy mi nu de mbecy.

<sup>6</sup> Orze' ze' bruu gagy anc, yad nu dey gagy cashtig. Orze' de anc ze' zu dey tub negy cacy nu la lino. Tona' la ryal ñi. Ze' ri sinch or lyush yu. <sup>7</sup> Orze' brusu tub mbecy laab lat tap mbecy mbañ nu psa' lagy Ñgyoozh ze'. Orze' briic yu gagya'n ni de anc ze'. Ze' nañ gagya'n ze' yu' cashtig ily ni Ñgyoozh, biñ nu rcyiiñ tub la. <sup>8</sup> Lugaar yon ni yu' wedz, dza laa nañ ñi yu' dzeeñ nu bruu lo gyel lily ni Ñgyoozh, gal nu lo fers nim.

Orze' ni tub la mbecy wangac chu'y nañ yu' ze' gashtal bya' lo la gagya' cashtig nu za nu gagya' anc ze'.

## Taz ni cashtig ni Ñgyoozh

**16** Orze' gaze' nu güeñä nu zaab ti' mbecy rniiy lo gagy de anc ze'. Mniiy gal nañ lugaar yon ni yu' wedz ni Ñgyoozh. Orze' nay:

—Gua der gua shur nis nu yu' nañ gagy taz ni cashtig ni Ñgyoozh dutuub la gyishlombecy —nay.

<sup>2</sup> Gaze' nu anc loga la gua shuy nis nu yu' nañ taz niy. Orze' briib gyedz shiñ na cuerp ni de mbecy nu ca beey ni bañ dañ ze', de yu nu briib zily nab ma. Orze' ton'a la rac cuerp ni dey.

<sup>3</sup> Orze' gaze' nu anc cyup gua shuy nis nu yu' nañ taz niy lo nisyudoo. Orze' nis ze' byac ñi reñ gal nu na reñ mbecy nu biit losa'. Orze' dela bañcyug nu yu' lo nisyudoo gut ma.

<sup>4</sup> Gaze' nu anc chon gua shuy nis nu yu' nañ taz niy lo de gyoow, gal nu de ze' nu driib nis. Orze' de nis ze' byac ñi reñ. <sup>5</sup> Gaze' nu güeñä nu rnii anc nu riib ic de nis. Orze' nay:

—Ñgyoozh, ru nac ru biñ Yon. Nac ru biñ nu guc gulas, nunu nac ru biñ nu nac na. Orze' de cashtig nu bzeed ru, nde' se'ñ. <sup>6</sup> Gun de mbecy gyishlombecy bicy dey nu pshu reñ de mbecy nir, gal nu reñ de yu nu mnii por cuen nir. Nde' nu na, ru, briic ru reñ go' dey. ¡Nde' cashtig nu yad ñi nu gad ni dey! —nay.

<sup>7</sup> Orze' gaze' nu güeñä nu zaab ti' rnii gal lo cuug. Orze' na: —Ñgyoozh, Shuaan de, biñ nu gac gyicy dela coz, de cashtig nu cuic ru, nde' laab ñi, nunu nde' coz nu se'ñ —nay.

<sup>8</sup> Orze' gaze' nu anc tap gua shuy nis nu yu' nañ taz niy lo doo güidz. Orze' briic ñi fers ni doo, gun orze' ba pchuñ de mbecy. <sup>9</sup> Orze' dela mbecy ton'a la bdzuu dey. Tees wannte' dey de cyi nu ricy yu. Ni wangyabic dey gyel mbecy ni Ñgyoozh. Sinu brugyi' nu rnii zi dey nim, gun mi ze' biñ nu riib ic dela cashtig ze'.

<sup>10</sup> Orze' anc gay gua shuy nis nu yu' nañ taz niy lo yashily ze' nu riib ic bañ dañ ze'. Orze' bet cow dela lugaar nu riib ic ma. Orze' de mbecy bducua' dey lyudz yu par nu tona' la shiñ rzac dey. <sup>11</sup> Tees wancheaca dey nu shiñ ricy yu, sinu mnii zi dey ni Ñgyoozh, biñ nu Zub gyibaa, nu nac de lugaar ze' nu dzi rac ni dey gal nu nu nac de gyedz nu ta' cuerp ni dey.

<sup>12</sup> Gaze' nu anc shup gua shuy nis nu yu' nañ taz niy lo tub gyoow ily nu la gyoow Eufrates. Orze' bigy ñi, gun orze' gad tub nez par nu ded de rey nu gruu gashtal ze' nu driib doo.

<sup>13</sup> Orze' bzaacä chon nuras. Na dey gal nu na bigy. Orze' bruu dey ru' low dañ ze', gal nu ru' bañ dañ ze', gal nu ru' mbecy fals nu rnii por cuen ni Ñgyoozh.

<sup>14</sup> Orze' de yu ze' nac yu espiriit ni nuras nu ricy nusuridz. Orze' de nuras ze' gush nez yu zay lo de rey ni gyishlombecy, gun orze' gyicy tublaazh yu de rey ze', gun orze' chucoo dey nu Ñgyoozh, biñ nu gac gyicy dela coz, ornu shuub dzi nu chu'm gyel yuu. <sup>15</sup> Orze' nam:

—Bzuub gyidag der. Ya sij la ru'ña gal nu ryiid tub gubaan. Dzi ni mbecy nu zu ga lagy nunu dzi ni mbecy nu ricy cuidad shab, gun orze' cue' nu yagy yu chesay nu gzac mbecy nu to' lo nay —nam.

<sup>16</sup> Orze' de nuras ze' b icy tublaazh dey de rey ze' tub lugaar nu la Armagedón benu nu riidz hebreo.

<sup>17</sup> Orze' gaze' nu anc gagy gua shuy nis nu yu' nañ taz niy lo bi. Orze' ye la mnii mbecy gal lo yashily nu Zub nañ yu' wedz ni Ñgyoozh gyibaa, lo yashily ze' nu riib ic mi. Orze' nay:

—¡Bi bya' loñ! —nay.

<sup>18</sup> Gaze' nu bzu gyi ni guzii. Nunu guc zu redz. Nunu mnii guzii. Nunu briib duru. Nunu nese nu psa' lagy Ñgyoozh mbecy nigul griib duru ily gal nu briib ñi na. Tona' la coz ily b icy ñi. <sup>19</sup> Orze' gyedz lily byac chon la'ñ. Nunu de gyedz nu yu' dela nasyoong mnit loñ. Orze' Ñgyoozh byeza' lagy mi gyedz Babilonia. Orze' bzuub mi taz ñup ru'ñi. Ñup ze', nde' cashtig nim.

<sup>20</sup> Orze' mnit dela yu nu yu' lo nisyudoo. Nunu mnit dela de b icy. <sup>21</sup> Orze' bruu gyey gye baa bet ñi too de mbecy. Tona' la zily ñi. Yu'ñ mas gashtal cyuu cyl tub gañ. Orze' mnii zi de mbecy ni Ñgyoozh nu nac cashtig ni gyey gye ze', gun nde' ton'a la cashtig ily.

## Biñ congal Zub lo

**17** Orze' gaze' nu brusu tub anc lat gagy de yu nu nuu taz ze'. Orze' biid niiy lo. Orze' nay:

—Da, gun lyuu lor cashtig nu gad ni biñ congal Zub lo. Biñ congal ze', nde' tub gyedz nu ri garee ru' nis sheñ. <sup>2</sup> De rey nu yu' gyishlombecy b icy dey gyel che' nuy mi. Nunu dela mbecy nu yu' gyishlombecy rzugy dey nu ñup nim. Ze' ñup nim, nde' yaruuñ gyel che' —na anc ze'.

<sup>3</sup> Gaze' nu mnii pcaal lo nu nac Espiriit Yon ni Ñgyoozh nu gua nu anc ze' ya tub lugaar ub zi. Orze' bzaacä tub biñ mñaa riib mi ich tub bañcyug dañ, tub bañ coloor ña. Orze' dutuub la ich ma ta' riidz a' nap, riidz nu za contr ni Ñgyoozh. Nunu Zub gagy too ma. Nunu Zub tii nguaz ma. <sup>4</sup> Ze' biñ mñaa ze' zum negy bizat.

Nunu zu ga'm negy ña. Nunu dutuub la cuerp nim bdudii nu or, nu gyita' nu dzi ñgyup sac, nu urndub nu dzi ñgyup sac. Ze' zu yaam tub taz or. Dza laa nañ ñi yu' coz bag nu coz a' nap nu bruu lo gyel che' nim.

<sup>5</sup> Ze' cyugam ca tub nu la. Tiily cañ. Orze' nu la ze', nde' Babilonia. Mi ze' tub gyedz nu gya zu, tub gyedz nu nac ñaa dela biñ congal gal nu dela coz a' nap nu yu' gyishlombecy. Nde' nu lam. <sup>6</sup> Orze' bzaacä biñ mñaa ze' rzugy mi nu nac nu go'm reñ de mbecy ni Ñgyoozh, gal nu reñ de mbecy nu gut nu nac Jesuuz. Na ornu bzaacä nde', ton'a la za du icä.

7 Orze' na anc ze' rab yu ya:

—¿Lagu dzi za nu ic ru? Ya nee lor lac yaruu biñ mñaa re gal nu lac yaruu bañ dañ nu riib mi ich ze', bañ nu Zub gagy too gal nu tii nguaz. <sup>8</sup> Bañ dañ nu bzaac ru, ma ze' gulas mbañ ma, tees na saca' ma. Tees sñuu ga grib ma gabil. Orze' gaze' nu cha ma gat ma tub tir zi'l. Na yu' mbecy nu sac nu la dey lo libr, ze' nu ta' nu la de mbecy nu gruu mbañ nese anzir nu sa' lagy Ñgyoozh gyishlombecy. Orze' de yu ze' güü dey lo bañ dañ ze'. Orze' ton'a la cha nu ic dey. Gulas ma ze' mbañ ma. Na saca' ma. Tees gruu zac ma tua' tir.

<sup>9</sup>'Nii tub coz nu rlagy ñi nu grush na shcab. Gagy too ma, nde' yaruuñ gagy bicy, ze' nu zub biñ mñaa ze'. Nunu yaruu gañ lo gagy too ma, nde' gagy rey.

<sup>10</sup> Orze' lo gagy de rey ze', gaay dey bi gut yu. Ze' tub yu gabee riib ic yu. Ze' tuuba'y gabee nigul cyiid yu. Na ornu cyid yu, wacyiiñ yu tuñ. <sup>11</sup> Ze' bañ dañ, bañ nu gu-las mbañ ze', ze' na saca' ma, laab ma ze' nac ma rey shuñ mas bruu ma laab lo gagy rey ze'. Tees orze' despuées, orze' gat ma tub tir zi'!

<sup>12</sup> Na lo tii nguaz ma, nde' yaruuñ tii rey. De yu ze' nigul zub gyi' nu gyub ic yu. Tees gad rishbeey ni dey nu gyub ic yu tub or zi'l tublaazh la nu bañ dañ ze'.

<sup>13</sup> Orze' tub zi'l shcab bicy dey za' tii lay. Orze' fers nu ricy cup dey, nu rishbeey nu ricy cup dey nu gyub ic yu, de nu nde' cuic dey ni bañ dañ ze'. <sup>14</sup> Orze' de rey ze' chucooy nu biñ nu nac Shily ze'. Tees biñ nu nac Shily ze' gyicy mi gan de rey ze'. Nunu de yu nu bi bzu chu Ñgyoozh, de yu nu ricy paa nim nac nu dey mi. Gun mi ze' nac mi Shuaan de yu nu nac shuaan, nunu nac mi rey ni de yu nu nac rey —na anc ze'.

<sup>15</sup> Orze' na ga' anc ze':

—Nis nu bzaac ru ze' nu bzu biñ mñaa lo ze', nde' yaruuñ mbecy dela nasyoong, mbecy dela gyedz, mbecy de lo la nez, mbecy nu rnii de lo la riidz. <sup>16</sup> Orze' de mbecy nu nac tii nguaz ze', gal nu bañ dañ ze' gazi lagy dey lo biñ congal ze'. Orze' co dey dela coz nu ricy cup mi. Orze' gyid yaagy lam chesum. Orze' gow dey beel mi, nunu chuu dey mi nu gyi. <sup>17</sup> Gun Ñgyoozh bicy mi nu mnii too dey nu gyicy yu coz nu rlagy mi. Nde' nu bicy dey tub zi'l shcab, nunu briic dey rishbeey nu gyub ic bañ dañ ze'. Ni bicy dey gal gyu' la niñ gal nu mnii Ñgyoozh. <sup>18</sup> Orze' biñ mñaa nu bzaac ru ze', mi ze' yaruum gyedz ily nu riib ic dela rey ni gyishlombecy —na anc ze'.

### Gyagash zu gyedz Babilonia

**18** Na ornu bded ni de nu nde' na, gaze' nu bzaaca tuuba' anc bruuy gyibaa bet yu. Ricy cup yu rish-beey nu gyicy yu zañ coz. Ze' par nu tona' la ryal rabee, orze' bzu la yaa dutuub la gyishlombecy. <sup>2</sup> Orze' ye la brish tiy. Orze' nay:

—Gyedz Babilonia gulas dzi gya bzuñ. Ze' na bya-gash zuñ. Na zigy nuras guchu'y lugaar ze'. Byac ñi teez chigyiñ a' nap, chigyiñ nu gyiñ lagy na lo. <sup>3</sup> Gyedz ze', nde' nañ gal nu na tub biñ mñaa. Orze' dela mbe-cy rzugy dey nu nac ñup nim. Orze' ñup ze', nde' yaru-uñ bis ni gyel che'. Nunu de rey nu yu' gyishlombecy bicy dey gyel che' nu biñ mñaa ze'. Nunu de yu nu ricy daljez byaguani'ñ dey nu nac nu bicy shaad mi de gusht a' nap nim.

<sup>4</sup> Orze' güeñä nu zaab ti' tuuba' mbecy rniiy gal gyibaa. Orze' nam:

—De ru mbecy ne, bruu der lo biñ mñaa nu nac gyedz ze', gun orze' cue' nu gyicy der de cyi nu ricy mi, nunu cue' nu zac der lo cashtig nu dugyim. <sup>5</sup> Gun bi byañ cyi nu ricy mi gashtal gyibaa bi pshuub ñi. Nunu Ñgyoozh ca ic mi de coz a' nap nu ricy biñ mñaa ze'.

<sup>6</sup> Orze' gyicy nu der mi dub gal mod nu bicy num de

ru. Nunu de coz nu bicy num mbecy, nde' cyup tant gyabic der nim. Cuic der cyup tant ñup nu fert zir go'm gaze' ñup nu briic mi go' der. <sup>7</sup> Gyicy der nu gzac zim, nunu gyicy shnim dub gal mod nu bicy le'm, nunu dub gal mod nu bicy mi gusht. Gun rniim nañ lardoom: "Ii zubañ na gal nu na tub rey. Ya walab byud naçä. Nunu rila wayicya sentiir", rniim nañ lardoom. <sup>8</sup> Nu nac nu ni rniim, orze' dela cashtig nu yad goñ toom nañ tub dzi zi'l. Ze' cashtig nu gad nim, nde' nu gat mi, nu gzac zim, nunu nu gyan mi. Nunu ca gyim, gun Ñgyoozh Shuaan den, biñ nu gri bee nim, mi ze' tona' la fert mi. —Ni mnii riidz nu zaab ti' gal gyibaa.

<sup>9</sup> Orze' de rey nu yu' gyishlombecy, de yu nu bicy gyel che' nu biñ mñaa ze', de yu nu bicy gusht nu mi ze', orze' de yu ze' tona' la gun dey nunu tona' la gyicy dey sentiir ornu zac dey nu grib dzeeñ nu ca gyim.

<sup>10</sup> Orze' zet chechu' dey nu dzib yu lo cashtig nu dugyim. Orze' nii dey gab yum:

—¡Dzi ga coz ily! ¡Lashta ru, gyedz Babilonia! Ru tub gyedz nu dzi gya bzu. Nunu tona' la fert ru. Tees nañ tub or zi'l, orze' bru'ña cashtig lor —nii dey.

<sup>11</sup> Orze' ni' zi'l de mbecy nu bicy daljez gyishlombecy ii gun dey, nunu gyicy dey sentiir nu nac mi. Wada' cyu nu gzi suu dey. <sup>12</sup> Wasa'ya' or ni dey. Wasa'ya' plat ni dey. Wasa'ya' gyiib nu ñgyup sac ni dey. Wasa'ya' urn-dub nu dzi ñgyup sac. Wasa'ya' negy lino. Wasa'ya' negy sed. Wasa'ya' negy ña, nu negy bizat. Wasa'ya' yala nu zguul ti'. Wasa'ya' coz nu byaa nu lay grambesht. Wasa'ya' yala ñgyup. Wasa'ya' gyiib cach. Wasa'ya' gyiib cacy. Wasa'ya' gyita' mármol. <sup>13</sup> Wasa'ya' canel, ni coz zguul, ni yaal, ni mirra, ni nis zguul. Wasa'ya' ñup. Wasa'ya' asecy. Wasa'ya' arin. Wasa'ya' trig. Wasa'ya' chigud, ni shily, ni cuay. Wasa'ya' caret ni ma. Wasa'ya' moz por fers la. Ni Wasa'ya' mbecy. Orze' dela nde' Wasa'ya' ni de yu nu ricy daljez ze'. <sup>14</sup> Gaze' nu nii de mbecy nu ricy daljez gab yu biñ mñaa ze':

—Dela coz nu ngulagy der nu gad nir, dela nde' mnit loñ. Nunu mnit lo ga' dela gyel nap nir, gal nu de coz nu cyit na nir —na dey.

<sup>15</sup> Orze' de mbecy nu ricy daljez, de yu nu byaguani'ñ nu nac riiñ nu bicy dey lat gyedz ze', de yu ze' zet guchu' dey nu rdzib yu lo cashtig nu guud nim. Nunu ruun dey nunu ricy dey sentiir. <sup>16</sup> Orze' na dey:

—¡Dzi ga coz ily! ¡Lashta gyedz lily re! Gulas nañ gal nu na tub biñ mñaa nu bzu negy cyit na. Bzum negy lino. Nunu bzum negy coloor bizat nu coloor ña. Nunu bdiim ub mi nu or, nu gyita' nu dzi ñgyup sac, nu urn-dub nu dzi ñgyup sac. <sup>17</sup> Tees nañ tub or zi'l mnit lo dela gyel nap nim —na dey.

Orze' zet guchu' ga' de yu nu riib ic nañ barc, gal nu de yu nu rded nañ ñi, gal nu de yu nu ricy riiñ nañ barc ze', gal nu dela de' zir mbecy nu ricy gan tiñ lo nisyudo. <sup>18</sup> Orze' gzac dey nu grib dzeeñ nu ca gyi gyedz ze'. Orze' cush ti dey. Orze' nii dey:

—Warusuu ga' tuuba' gyedz nu na gal nu na gyedz lily ii —nii dey.

<sup>19</sup> Orze' coo dey yu gyedz tooy par nu nac nu gyicy dey sentiir. Orze' gun dey nu gyicy yu sentiir. Orze' nii dey:

—¡Dzi ga coz ily! ¡Lashta gyedz lily re! Nu nac gyel nap ni gyedz re, dela mbecy nu ricy cup barc nu zaab lo nisyudoo byaguani'ñ dey. Tees nañ tub or zi'ln mnit lo delañ —na dey.

<sup>20</sup> Orze' guciyit lagy de ru mbecy nu yu' gyibaa. Nunu gucyita' lagy der aposht, gal nu de ru mbecy nu mnii por cuen ni Ñgyoozh, gal nu de ru mbecy nim, gun Ñgyoozh bi briic mi cashtig ni biñ mñaa ze'. Ñgyoozh bicy mi mod nu se'ñ nu biñ mñaa ze' nu nac de coz nu bicy nu biñ mñaa ze' de ru.

<sup>21</sup> Gaze' nu tub anc fert pshes nañ yu tub gyita' nu na gal nu na tub gyita' gyech ily nu rdugu. Gaze' nu bzaan yuñ zañ lo nisyudoo. Orze' nay:

—I mod nu byagash zu gyedz Babilonia, tub gyedz nu dzi gya bzu. Orze' rila wansaca' mbecy ñi tuuba' tir.

<sup>22</sup> Ni wayeña' dey di ni musiic ni arpa, ni ni bdzi, ni ni trumpet lat gyedz ze' tuuba' tir. Ni' zi'l wayicya' mbecy daljez lat gyedz ze'. Ni wazigya' molin lat gyedz ze'.

<sup>23</sup> Ni wacaa ga' gyi ni candiil lat gyedz ze'. Ni a' zaab ti' ga' la nu rnii nob gyeey nu nob mñaa. Gulas de mbecy nu bicy daljez lat gyedz ze' lily zir na dey gaze' de' zir mbecy nu ricy daljez gyishlombecy. Nunu gyedz ze' bguuñ dela mbecy gyishlombecy nu nac de coz tu' nu ricy ñi —na anc ze'.

<sup>24</sup> Gun gyedz ze', ze' gyad reñ dela de yu nu mnii por cuen ni Ñgyoozh, nunu reñ de mbecy nim. Gyad reñ dela mbecy nu gut gyishlombecy nu nac Ñgyoozh.

**19** Ornu blazh de nu nde', orze' güeñä nu ye zaab ti' tub nac mbecy zigy rnii gal gyibaa. Orze' na dey:

¡Rlagy ñi gyabic den gyel mbecy ni Ñgyoozh!  
Mi ze' nac mi biñ nu rboo mbañ.

Nac mi biñ lily,  
nunu nac mi biñ fert,

<sup>2</sup> Gun mi ze' ri beem nu mod nu se'ñ,  
nunu ri beem nu mod nu rishli.

Orze' bi mniim nu cha biñ congual nu dzi gya bzu ze' lo cashtig,

biñ congual nu mnu dela mbecy nu yu' gyishlombecy nu nac gyel che' nim.

Orze' Ñgyoozh briic mi cashtig ni biñ congual ze'  
nu nac nu bicy mi nu gut de yu nu ricy coz nu mniim.

<sup>3</sup> Gaze' nu brugyi' rnii ga' dey. Orze' na dey:

—¡Rlagy ñi gyabic den gyel mbecy ni Ñgyoozh! Orze' dzeeñ nu driib nu pca gyi gyedz nu gya bzu ze' rila wayecañ nu grib ñi —na de mbecy zigy.

<sup>4</sup> Orze' de gal zu tap yu bel, gal nu tapa' de mbecy mbañ ze' gusab tiily dey gal lo yu la. Orze' brugyi' driib zily dey Ñgyoozh, biñ nu Zub lo yashily lugaar ze' nu riib ic mi. Orze' na dey:

—¡Laab ni gac ñii! ¡Rlagy ñi nu gyabic den gyel mbe-  
cy ni Ñgyoozh! —na dey.

<sup>5</sup> Orze' güeñä nu zaab ti' rnii gashtal ze' nu riib ic  
Ñgyoozh. Orze' rniiñ:

Gyabic der gyel mbecy ni Ñgyoozh nin,

de ru mbecy nu ricy coz nu rnii, gal nu de ru mbecy nu rca lagy lom. Gyabic der gyel mbecy nim, tant de mbecy gush tant de mbecy feñ, rniiñ.

### Fandang ni biñ nu nac Shily

<sup>6</sup> Gaze' nu güeñä nu zaab ti' gal nu zaab ti' tub nac mbecy zigy ornu rnii. Güeñä nu rzigy gal nu rzigy ze' nu yet nis ily. Rzigy gal nu rac nu yet guzii. Gaze' nu güeñä nu rnii mbecy. Orze' nay:

Rlagy ñi nu gyabic den gyel mbecy ni Ñgyoozh.

Gun Ñgyoozh Shuaan den, biñ nu gac gyicy dela coz, mi ze' nac mi rey.

<sup>7</sup> Orze' rlagy ñi nu gyet lagy na nunu zu cyit lagy na.  
Nunu rlagy ñi nu gyabic den gyel mbecy nim nu dzi lily nam.

Gun bi pshuub dzi nu chelaa biñ nu nac Shily.  
Nunu biñ mñaa nu chelaam bi zu lily mi.

<sup>8</sup> Nunu bi guud negy nu bya nu lino nu gzum.  
Nde' negy cacy, nunu ryal rabee loñ.

Gun negy ze' yaruuñ de coz nap nu ricy de mbecy ni Ñgyoozh,  
na dey.

<sup>9</sup> Orze' mnii tub anc lo. Orze' nay:

—Pcaa coz nu ya neę: "Dzi ni mbecy benu bredz dey  
yu chay lo fandang ni biñ nu nac Shily" —nay.

Orze' gaze' nu na ga'y:

—De nii riidz rishli ni Ñgyoozh —nay.

<sup>10</sup> Orze' ya bzu tiba yeñ gyi' anc ze' nu riib zilya yu.  
Orze' yu ze' nay:

—Cue' ni gyicy ru lo. Gun ya nacä losa'r nu nac ru  
moz ni Ñgyoozh nu de' zir de losa'r, de yu nu ricy paa  
nu de riidz nu mnii Jesuuz, sinu briib zily Ñgyoozh —na  
anc ze' rab yu ya.

Gun de riidz nu mnii Jesuuz, laab nde' riidz nu briic  
Espiriiit Yon ni de mbecy nu mnii por cuen ni Ñgyoozh.

### Mbecy nu riib cuay cacy

<sup>11</sup> Gaze' nu bzaacä gyibaa nu byaal ñi. Orze' bruu zac  
tub cuay cacy. Ich cuay ze' riib tub mbecy nu la Biñ nu  
Ricy Paa nunu Biñ nu Rishli Rnii. Gun mi ze' riib ic mi  
mod nu se'ñ. Nunu zuub mi gyi' gyel yuu mod nu se'ñ.

<sup>12</sup> Orze' urlom ryal ñi gal nu ryal lyush gyi. Nunu toom  
ri zañ coron. Ca tub nu la ich mi. Nunu ni tub la mbecy  
wagad lagy yu lac rniiñ. Tub zi la ub mi rad lagy mi.

<sup>13</sup> Nunu dutuub la negy nu zum ta' reñ mi. Orze' mi ze'  
lam Riidz ni Ñgyoozh. <sup>14</sup> Orze' ich mi ze' yad ca de soldad  
nu yu' gyibaa. Negy nu zu dey, nde' negy lino ca-  
cacy. Nunu laaba' cuay cacy riib dey. <sup>15</sup> Orze' ru'm briib  
tub mandzicy ri'ñ. Orze' nu mandzicy ze' gyicy mi gan  
mbecy ni dela nasyoong. Orze' dzi ta gyub ic mi dey.

Orze' gal nu rshii mbecy urbyay, ni mod gri beem ni  
mbecy. Orze' gyicy mi nu go' dey ñup nu yu' nañ taz  
ze'. Ñup ze', nde' yaruuñ cashtig nu cuic Ñgyoozh, biñ  
nu gac gyicy dela coz. Cuic mi ñii par nu tanta' rzi lagy  
mi. <sup>16</sup> Orze' lo negy nu zum gal nu lo cuiigy mi ta' letr

nu rniiñ: "Biñ nu nac rey ni de yu nu nac rey nunu biñ nu nac Shuaan de yu nu nac shuaan", rniiñ.

<sup>17</sup> Gaze' nu bzaaca tub anc nu zu lo doo güidz. Orze' ye la rbish tiy. Orze' nay rab yu de chigyiñ nu zaab lo bi:

—¡Da der, gyatublaazh ru nu gow der coz ily nu cuic Ñgyoozh, <sup>18</sup> gun orze' gow der beel de rey, gow der beel de jeneraal, gow der beel de soldad bariant, gow der beel cuay, gow der beel yu nu riib ma, gow der beel dela mbecy, mas mbecy nu sac shuaan, mas yu nu zu shuaan, mas yu feñ o yu gush! —nay.

<sup>19</sup> Gaze' nu bzaaca bañ dañ, gal nu de rey nu yu' gyishlombeç, gal nu de soldad ni dey bi yu' tublaazh dey nu chucooy nu biñ nu riib cuay ze' gal nu de soldad nim. <sup>20</sup> Orze' bdub dey bañ dañ ze', gal nu mbecy fals nu mnii por cuen ni Ñgyoozh ze', yu nu bicy nusuriidz lo rgüi la bañ dañ ze'. Nu nac nusuriidz nu b icy yu ze', orze' bguuy de yu nu pca beey ni bañ dañ ze', de yu nu briib zily nab ma. Orze' gua nu dey de yu ze' pres.

Orze' pshet lag dey bañ dañ ze', gal nu mbecy fals nu mnii por cuen ni Ñgyoozh ze' gyel nu rca gyi nu asufre.

<sup>21</sup> Orze' dela soldad ni dey gut yu nu nac mandzicy nu driib ru' biñ nu riib cuay ze'. Orze' de chigyiñ bdow gyel la ma beel dey.

### Tub miily ña'n

**20** Orze' bzaaca tub anc bet yu nu bruuy gyibaa.

Orze' yu ze' zu yaay ya gyiib ni gably. Nunu nuu ga'y tub caden ily. <sup>2</sup> Orze' anc ze' b icy yu gan low dañ ze'. Laab ma ze' nac ma bily nu nil zu nese gulas. Nunu nac ma nuras. Nunu nac ma nushow. Orze' ma ze' pcyiig yu ma nu caden par tub miily ña'n. <sup>3</sup> Orze' pshet lag yu ma gyerye ily nu rnii dey gably. Orze' psoow nicy yu ro' niñ. Orze' pcaay tub beey loñ. Gun orze' cue' ga' nu gad mod nu guu ma de mbecy nu yu' de lo la nasyoong gashtal za' la tub miily ña'n. Na ornu laz tub miily ña'n ze', orze' rlagy ñi nu dulaa ma par ñuu zi'li tiem.

<sup>4</sup> Orze' bzaaca de yashily ze' nu gyub ic mbecy. Nunu bzaaca de mbecy nu zub lo de yashily ze'. Orze' Ñgyoozh briic mi rishbeey nu gri bee dey ni losa'y. Orze' ni' zi'l bzaaca de espiriit ni de yu nu pcyug mbecy too nu nac nu bzat dey Crisht nunu nu nac nu pshaal dey riidz ni Ñgyoozh. Orze' de yu ze' wanriib zily dey ni bañ dañ ze' ni nab ma. Ni wanca beey ni ma cyuga dey, ni yaa dey. Orze' de yu ze' byabañ dey. Orze' byub ic dey tublaazh la nu Crisht par tub miily ña'n. <sup>5</sup> De' zir de mbecy gut wangyabañ dey gal bza' la tub miily ña'n ze'. Nde' tir loga la nu gyabañ mbecy. <sup>6</sup> ¡Dzi ni de mbecy benu gaza'y gyabañ yu tir loga la! ¡De yu ze' nac yu mbecy ni Ñgyoozh! Sacal mod nu gat dey tuuba' tir. Orze' de yu ze' gac dey uz nu gzu riñ lo Ñgyoozh gal nu lo Crisht. Nunu gyub ic dey tublaazh nu mi ze' tub miily ña'n.

### Gyicy mi gan nuras

<sup>7</sup> Na ornu za' tub miily ña'n na, orze' dulaa nuras gruu nañ gyerye ze'. <sup>8</sup> Orze' yu ze' cha guuy de mbeç nu yu' dela nasyoong nu yu' dutuub la gyishlombeç. Cha guuy nasyoong Gog nu Magog. Orze' gyicy tublaazh yu dey par gyel yuu. Zigy dey gac yu gal nu nguaa yu uzh ru' nisyudoo. <sup>9</sup> Orze' rush las dey dutuub la gyishlombeç. Orze' ri lo' dey lugaar ze' nu gyeche de mbecy ni Ñgyoozh. Nunu ri lo' ga' dey gyedz nu dzi rcam. Orze' gruu gyi gal gyibaa gyet ñi. Orze' nde' nit loñ dey. Orze' gya' lo dey. <sup>10</sup> Orze' nuras, yu nu bguu de yu ze', orze' shet lag dey yu lo tub gyel ni gyi nu asufre. Orze' bañ dañ ze' gal nu mbecy fals nu rnii por cuen ni Ñgyoozh ze', de yu ze' bi bet lag dey gyel ze' anzir. Orze' lugaar ze' gzac zi dey dzi rel la par tub la.

### Ñgyoozh ri beem ni mbecy

<sup>11</sup> Gaze' nu bzaaca tub yashily. Zily nac ñii. Nunu caacy ñi. Nunu bzaaca biñ nu zub lo yashily ze'. Lat nu zub mi lugaar ze' orze' mnit gyishlombeç, nunu mnita' gyibaa. Orze' wacabee la ca zañ. <sup>12</sup> Orze' bzaaca dela mbecy nu bi gut nu zu par lo ze' nu zu yashily ze'. De yu lily, nu de yu gyidz, dela dey zuy par lo yashily ze'. Gaze' nu byaal lo de libr. Orze' ni' zi'l byaal lo libr nu ta' nu la de mbecy nu cui mbañ. Orze' de mbecy nu bi gut duri bee ni dey dub gal mod nu b icy dey gal nu bi cañ lo de libr ze'. <sup>13</sup> Gaze' nu dela añ nu ri lo nisyudoo bruu zaca' dey, nunu dela añ nu yu' lugaar ze' nu yu' y bruu zaca' dey. Orze' tub ga la dey duri bee niy dub gal nu na coz nu b icy dey. <sup>14</sup> Orze' lugaar ze' nu cha mbecy ornu gat yu, lugaar ze' bet lag ñi lo gyel ni gyi ze'. Gyel ni gyi ze', nde' lugaar nu rnii dey nu gat mbecy nu cyupa'. <sup>15</sup> Orze' cyu zi'l mbecy nu sac nu la lo libr nu ta' nu la de mbecy nu cui mbañ, orze' de yu ze' gyet lag yu lo gyel ni gyi ze'.

### Gyibaa cub gal nu gyishlombeç cub

**21** Orze' gaze' nu bzaaca gyibaa cub nu gyishlombeç cub. Orze' mnit gyibaa nu psa' lagy Ñgyoozh nu loga la, nunu mnita' gyishlombeç nu psa' lagy mi nu loga la. Nunu saca' nisyudoo. <sup>2</sup> Orze' bzaaca gyedz ni Ñgyoozh. Gyedz ze' lañ Jerusaleeng cub. Orze' bzaaca ñii bruuñ lo Ñgyoozh gyibaa bet ñi. Bi zu lily ñii gal nu zu lily tub nob mñaa nu chelaam ñgyeem. <sup>3</sup> Orze' güeñä nu ye la zaab ti' rnii. Ti' ze' bruuñ ze' nu riib ic Ñgyoozh. Orze' nay:

—Na Ñgyoozh bi rciyin mi lat de mbecy. Nunu cyiñ num dey par lo. Nunu de yu ze' gac dey mbecy nim. Nunu laab Ñgyoozh gac num dey. Nunu mi ze' gac mi Ñgyoozh ni dey. <sup>4</sup> Orze' mi ze' cyib mi nis urlo dey. Orze' de yu ze' rila wata'y, ni wayicy shni ga' dey, ni wuna' dey, ni wagatowa' ni dey. Gun dela coz nu gu' gulas bi bded niñ —nay.

<sup>5</sup> Orze' biñ nu riib ic lo yashily ze' nam:

—Na gyicy cuba del a coz —nam.

Orze' na ga'm rab mi ya:

—Pcaa de riidz ii, gun nii riidz rishli, riidz nu gac gyicy cup ru consuel lo —nam.

<sup>6</sup> Orze' mnii ga'm lo. Orze' nam:

—Bi bya' loñ. Yä nacä A, nunu nacä zeta. Nacä biñ nu nil zu nese nu loga la. Nunu nacä biñ nu nil zu ornu gya' loñ. Orze' benu ca na mbecy rbigy yu nis, orze' ya leew la ricä nis go'y. Rica nis nu druu ze' nu driib nis nu cuic gyel mbañ go'y. <sup>7</sup> Cyu zi'l mbecy nu gyicy gan, orze' ricä de nis ze' go'y. Orze' ya gacä Ñgyoozh ni dey, nunu de yu ze' gac yu iñq. <sup>8</sup> Tees de' zir mbecy dugyi dey nu chay reña' se'. De mbecy dzidz, de mbecy nu wacheña lagy, de mbecy nu shiñ ricy, de mbecy nu rut losa', de mbecy nu ricy gyel che', de mbecy nu ricy fis gyel tu', de mbecy nu driib zily nab, dela de yu nu rguu, dela de yu ze' dugyi dey nu chay lo gyel nu rca gyi nu asufre. Nde' nu gat dey nu cyupa'.

### Jerusaleeng cub

<sup>9</sup> Orze' gagy anc zu yaay gagy taz ni cashtig. Laab nde' la cashtig nu blazh. Orze' lat de yu ze' bruu tub yu biid yu lo. Orze' nay rab yu ya:

—Da. Orze' lyuu nob lor. Mi ze' biñ nu gac mñaa biñ nu nac Shily —nay.

<sup>10</sup> Orze' pcaa mniiñ lo nu nac Espiriit Yon ni Ñgyoozh. Orze' mniiñ nu gua nu tub anc ya too tub b icy nu gya. Orze' blyuuy gyedz Jerusaleeng lo. Nde' gyedz ni Ñgyoozh nu bruu gal lom gyibaa bet ñi. <sup>11</sup> Orze' gyedz ze' tona' la cyit zu. Ryal rabeeñ nu nac gyel lily ni Ñgyoozh. Ryal rabeeñ gal nu rabee tub gyita' nu dzi gya sac, gal nu rabee gyita' nu la jaspe. Orze' rabee loñ gal nu rabee tub gyita' nu rdugyi yaa lo. <sup>12</sup> Zu tub lo' gya dub yub la ru' gyedz ze'. Orze' lo' ze' ricy cup ñi trocyup ro'. Ze' yu' trocyup anc. Tub gay riib ic yu tub ga ro'. Orze' lo de ya ro' ze' ca nu la de trocyup nac nez de mbecy Israeel. <sup>13</sup> Orze' tub la' ga cuit ñi ca chon ro'. Par ze' nu driib doo ca chon ro'. Na ornu güiin par ze' nu rza doo, ca ga' chon ro'. Na par yaa reg na ca ga' chon ro'. Na par yaa been, ca ga' chon ro'. Orze' tub la' ga cuit ñi ca chon ro'. <sup>14</sup> Orze' lo' ze' Zub ñi too trocyup gyita' ily. Ze' lo de gyita' ze' ca nu la de trocyup aposht ni biñ nu nac Shily.

<sup>15</sup> Orze' anc nu mnii lo nuuy tub ya beey or par nu tush peey gyedz ze', nu ro' niñ, gal nu lo' niñ. <sup>16</sup> Orze' gyedz ze' cuadrad riñ. Nu she nu nu tuñ tub zi'l nañ. Orze' anc ze' ptush peey gyedz ze' nu ya beey niy. Orze' nde' yu'ñ cyup miily zab cyup gaynal kilometros nu tuñ. Nde' nu tuñ ñi. Nu tuñ, nu gyañ, nu nu sheñ tub zi'l beey yu'ñ. <sup>17</sup> Orze' anc ze' brugyi' nu rtush peey lo' niñ. Orze' nde' gayon zab gaay metr nu gya, dub gal nu na ya beey nu b icy nuy riiñ. Nunu ya beey ze' ricy ñi mod nu ricy ya beey ni cualcyer la mbecy.

<sup>18</sup> Orze' lo' ze' byaañ nu tub lo gyita' nu la jaspe. Nunu gyedz ze' byaañ nu du ub or la. Nunu rabeeñ gal nu rabee guan nu nap byecy lo. <sup>19</sup> Orze' de simient ni lo' ze', nde' bdudiiñ nu gyita' nu dzi gya sac. Orze' gyita' loga la ni simient ze', nde' tub gyita' nu la jaspe. Ze' gyita' cyup, nde' tub gyita' nu la zafiro. Ze' gyita' chon, nde' tub gyita' nu la ágata. Ze' gyita' tap, nde' tub gyi-

ta' nu la esmeralda. <sup>20</sup> Ze' gyita' gay, nde' nu la ónice. Ze' gyita' shup, nde' tub gyita' nu la cornalina. Ze' gyita' gag, nde' tub gyita' nu la crisólito. Ze' gyita' shuñ, nde' tub gyita' nu la berilo. Ze' gyita' ga, nde' tub gyita' nu la topacio. Ze' gyita' ti, nde' tub gyita' nu la crisoprasa. Ze' gyita' trotub, nde' tub gyita' nu la jacinto. Ze' gyita' trocyup, nde' tub gyita' nu la amatista. <sup>21</sup> Orze' lo trocyup ro' ze', orze' tub ga ro' byaañ nu tub urndub nu dzi ñgyup sac. Orze' de cay nu nguaa lat gyedz ze', byaañ nu ga ub or la. Rabeeñ gal nu rabee guan nu nap byecy lo. Ni rabeeñ.

<sup>22</sup> Na yä wansacä ni tub yu' wedz lat gyedz ze'. Gun Ñgyoozh Shuaan den, biñ nu gac gyicy dela coz, nunu biñ nu nac Shily, de mi ze' nac mi yu' wedz ni gyedz ze'. <sup>23</sup> Orze' gyedz ze' walagy ñi yaa ni doo ni yaa ni beey, gun gyel lily ni Ñgyoozh, nde' rbic ñi yaa. Nunu biñ nu nac Shily ze', mi ze' nam gal nu na candiil ni gyedz ze'. <sup>24</sup> Orze' dela mbecy nu yu' gyishlombecy chesa dey nu nac yaa ni gyedz ze'. Nunu de rey nu yu' gyishlombecy cha zeeñ dey gyel nap niy gyedz ze'.

<sup>25</sup> Orze' de ro' ze' naal ñi dub dzii la. Ni wasoowa' dey ñi gun saca' rel. <sup>26</sup> Orze' cha zeeñ de mbecy nu yu' gyishlombecy dela gyel nap niy nu dela coz cyit na niy gyedz ze'. <sup>27</sup> Orze' ni tub coz a' nap wac chu'ñ lat gyedz ze'. Ni mbecy nu shiñ ricy, ni mbecy nu rguu wac chu'y lat gyedz ze'. Tub zi la de yu nu bi ca nu la lo libr ni biñ nu nac Shily, lo libr nu ta' nu la de mbecy nu gruu mbañ, tub zi la de yu ze' gac chu'y gyedz ze'.

**22** Gaze' nu anc ze' blyuuy tub gyoow ni nis nu rbic gyel mbañ lo. Ryal ñi gal nu ryal tub gyita' nu rdugyi yaa lo. Orze' gyoow ze' bruuñ gal lugaar ze' nu riib ic Ñgyoozh gal nu biñ nu nac Shily. <sup>2</sup> Orze' nde' ded ñi gazel nez Zub lo ni gyedz ze'. Orze' rup chu la' ga' la ru' gyoow ze' nash yag nu rbic gyel mbañ. Orze' trocyup tir rbic ñi uugy nañ tub ña'n: tub ga tir tub ga beey. Nunu lyag niñ cyiñ ñi par nu gyicy ñi guñaa nuñ de lo la mbecy. <sup>3</sup> Orze' ni tub la coz nu bzaa lagy Ñgyoozh ni sac ñi lat gyedz ze'. Orze' lat gyedz ze' zu yashily ze' nu riib ic Ñgyoozh gal nu biñ nu nac Shily. Orze' de yu nu ricy coz nu rlagy Ñgyoozh driib zily dey mi lugaar ze'. <sup>4</sup> Lo nu loo la rzac dey mi, nunu ca nu lam cyuga dey. <sup>5</sup> Nunu lugaar ze' saca' rel. Nunu de mbecy nu yu' ze' walagya'ñ gyi ni candiil ni dey. Ni walagya'ñ ba ni dey. Gun Ñgyoozh Shuaan den rbic mi yaa lat dey. Nunu de mbecy ze' gyub ic dey tub la.

### Sñuu ga cyid Jesucrisht

<sup>6</sup> Gaze' nu na anc ze' rab yu ya:

—De riidz ii, nii coz rishli, nunu gac gyicy cup ru consuel loñ. Orze' laab Ñgyoozh, biñ nu rbic Espiriit nim ni de yu nu rnii por cuen nim, mi ze' bzuu nez mi anc nim nu chay lo de yu nu ricy coz nu rnii, gun orze' cuic yu nu gad lagy dey la na coz nu sñuu ga gac.

<sup>7</sup> 'Orze' na Jesuuz: "¡Yä yap gyiilya! ¡Dzi ni de mbecy, yu nu gyicy yac ni de riidz nu bi ca lo gyicy ii!" nam —na anc ze'.

<sup>8</sup> Orze' laab yä, Waa, bzaacä nunu güeñä de coz ii. Na ornu blazh bzaacä nunu güeñä de coz ii, orze' gusab

tiilya yeñ gyi' anc, yu nu blyuu de coz ze' lo. Ni bicya par nu riib zilya yu. <sup>9</sup> Orze' nay rab yu ya:

—jCue' ni gyicy ru lo ya! Gun ru nu ya nac naa losa'n nu ricy na de coz nu rnii Ñgyoozh, nunu nac naa mbecy nu ricy yac de riidz nu bi ca lo gyicy ii. Dela den tub zi'l nac naa. Orze' driib zily den Ñgyoozh —na anc ze'—.

<sup>10</sup> 'Orze' cue' cach ru'r de riidz ni Ñgyoozh nu bi ca lo gyicy ii, gun sñuu ga shuub tiem nu gyu' niñ. <sup>11</sup> Orze' cyu zi'l mbecy a' nap, orze' zaab ricy lay coz a' nap. Orze' cyu zi'l mbecy cyi, orze' zaab ricy lay coz cyi. Orze' cyu zi'l mbecy nap zaab ricy lay coz nap. Nunu cyu zi'l mbecy ni Ñgyoozh, zaab ricy paa lay nuy mi.

<sup>12</sup> Gaze' nu na Jesuuz:

—¡Ya yap gyiilya! Nunu yap du i de mbecy. Orze' gyabicä ñii ni de mbecy dub gal nu na coz nu b icy dey. <sup>13</sup> Ya nacä A, nunu nacä zeta. Nunu nacä biñ nu nil zu nese nu loga. Nunu nacä biñ nu nil zu ornu gya' loñ. Nunu nacä biñ nu bzuub gyi'ñ. Nunu nacä biñ nu za' loñ —na Jesuuz.

<sup>14</sup> Dzi ni de mbecy, benu racaacy yu shab yu, gun orze' ricy cup dey rishbeey nu gow yu uugy ni yag nu rbic gyel mbañ. Nunu ricy cupa' dey rishbeey nu chu'y ro' ni gyedz ze'. <sup>15</sup> Orze' zet ru' gyedz chu' de mbecy a' nap. Yu' de mbecy nu ricy fis ni gyel tu'. Yu' de mbecy nu ricy gyel che'. Yu' de mbecy nu rut losa'. Yu' de mbecy nu driib zily nab. Yu' de mbecy rguu. Rguu dey nu nac mod nu ricy yu. Nunu rguu dey nu nac coz nu rniiy. Dela de yu ze' yu' dey par ich gyedz ze'.

<sup>16</sup> Orze' na Jesuuz:

—Ya, Jesuuz, bzuu nezä anc nę nu chay lo de mbecy ne, gun orze' shaal yu de coz ze' lo dey. Orze' ya nacä nez rey Dabi. Ya nacä bel rza' yu nu dzi rbic yaa —na Jesuuz.

<sup>17</sup> Orze' Espiriit Yon ni Ñgyoozh gal nu nob ni biñ nu nac Shily mnii dey. Orze' na dey:

—¡Da! —na dey.  
Orze' de mbecy nu bzuub gyidag riidz ze' rnii ga' dey:

—¡Da! —rnii dey.

Orze' ca na de mbecy nu rbigy nis, benu rlag yu, gac cyid yu go'y nis nu rbic gyel mbañ. Nunu leew la gad ñi.

<sup>18</sup> Orze' ya, Waa, døq rishlo dela mbecy nu zuub gyidag de riidz ni Ñgyoozh nu bi ca lo gyicy ii. Benu ca na mbecy gzuub yu riidz lo de riidz nu bi ca lo gyicy ii, orze' ni' zi'l Ñgyoozh cuic mi cashtig nu bi ca lo gyicy ii ni dey. <sup>19</sup> Nunu benu ca na mbecy shet naañ yu riidz ni Ñgyoozh nu bi ca lo gyicy ii, orze' Ñgyoozh com uugy nu dugiyi ni yag nu rbic gyel mbañ, nunu co ga'm yaay lugaar ze' nu dugiyi lat gyedz nim. De coz ze' biñ lo gyicy ii.

<sup>20</sup> Orze' biñ nu mnii dela coz ze' nam:

—Laab ni. ¡Ya bi yap gyiilya! —nam.

Laab ni gac ñii. ¡Shuaan na Jesuuz, da!

<sup>21</sup> Orze' Shuaan den Jesuuz nap gyicy num dela de mbecy nim.